

Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files dated 29 Jan 2022

bc03f416-faf8-5000-bfb5-5ca8a3fa98cf

Contents

SAN MATEO	1
SAN MARCOS	144
SAN LUCAS	227
SAN JUAN	375
HECHOS	471
ROMANOS	603
1 CORINTIOS	664
2 CORINTIOS	728
GÁLATAS	768
EFESIOS	794
FILIPENSES	814
COLOSENSES	828
1 TESALONICENSES	842
2 TESALONICENSES	853
1 TIMOTEO	859
2 TIMOTEO	874
TITO	885
FILEMÓN	892
HEBREOS	895
SANTIAGO	943
1 SAN PEDRO	958
2 SAN PEDRO	975
1 SAN JUAN	986
2 SAN JUAN	999
3 SAN JUAN	1001
JUDAS	1004
APOCALIPSIS	1010

Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi
(Lc 3.23-38)*

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnēnē. Davidpijinē pijinia Abrahampijinē pemomoxiyajuvēnēnē. ² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnēnē pevēnē Judá. Judápijinē pematapijinēbeje, pejuyapijivi ata, xaina. ³ Judápijinē juya pexēnatobeje xaina. Itsanē pevēnē Fares. Itsanē Zara. Bajaraponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram. ⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón. ⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isaí. ⁶ Isaípijinē juya pexēnato xaina. Pevēnē David. Bajaraponēmi nacuaevecsiniēmi. Davidpijinē yacajērēta Uríaspijinē pijavami. Nexata bajarapajivibeje juya pexēnato xainabeje. Pevēnē Salomón. ⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa. ⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías. ⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acaz. Acazpijinē juya pexēnato xaina. Pevēnē Ezequías. ¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías. ¹¹ Josíaspijinē juya pexi xaina. Pexiyajuvēnēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecēbiaya caponatsi Babilonia nacuyabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel. ¹³ Zorobabelpijinē juya pexēnato xaina. Pevēnē

Abiud. Abiudpijinë juya pexënato xaina. Pevënë Eli-aquim. Eliaquimpijinë juya pexënato xaina. Pevënë Azor. ¹⁴ Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina. Pevënë Eliud. ¹⁵ Eliudpijinë juya pexënato xaina. Pevënë Eleazar. Eleazarpijinë juya pexënato xaina. Pevënë Matán. Matánpijinë juya pexënato xaina. Pevënë Jacob. ¹⁶ Jacobpijinë juya pexënato xaina. Pevënë José. Bajaraponëmi María pamoná. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

¹⁷ Nexata Abrahampijinëmita petaxuxuabicujinae jivi penaexanaponaejava, trecenëta naexana Davidpijinë. Bajaraxuacujinae icatsia Davidpijinëmita petaxuxuabicujinae jivi penaexanaponaejava, trecenëta icatsia naexana Jeconíaspijinë. Pamatacabi Israel nacuapijivi cobecëbiaya caponatsi Babilonia nacuayabelia, naexana Jeconíaspijinë. Bajaraxuacujinae icatsia Jeconíaspijinëmita petaxuxuabicujinae jivi penaexanaponaejava, trecenë pijavata naexana Jesucristo jane baja, ponë Dioso athëbëvetsica itoroba jivi pecapanepaenexa.

Pacuenia Jesús naexana yabara pelivaisi
(Lc 2.1-7)

¹⁸ Jesucristo itsa naexana mapanacuataje, naexana mapacueniaje. Copiata Josébeje Maríabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espíritu Santo pejamatabëcueneta. ¹⁹ José, María jane baja pamonanexa, bitso penajamatabëcuenereviabinë. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponaponae:

—Itsanëjavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabëjai picani bëpënëa tsaponaponae José.

²⁰ Pamatacabi abaxë José bajarapacuenia najamatabëxainaponapona, majitsinaebota José tsitanaitajëtatsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinë pemomomë. Pëtsa cujunavame nepitsijava María nijavanexa. Tsipaji raja panacueto María yacotaponapona, Espíritu Santo saya pejamatabëcueneta nacoxita. ²¹ Bajarapova exanaena penacuetonëyo. Vënërubianame bajarapanacuetonëyo Jesús. Tsipaji raja bajaraponë capanepaena daxita pijajivi

pibisiacuene pexanaeneconimivecua. ²² Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniaje:

²³ Petiriva apo naperabëquenatsinejeva pebijavabelia, nacoxtitsiana. Exanaena penacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume,

jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jume-covënëta pacuenia itorobatsi ángel. Nexata baja José pijaboyaberena María barëpata pijavanexa. ²⁵ Itsiata abaxë José apo imoxoyobi pijava penamataxainaenacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

2

Pacuenia tulupu perubenaejava pecanaëcobivi najetarubena petaenexa Jesúsñëyo yabara pelivaisi

¹ Jesús naexana Belén tomarata, Judea nacuata peetaetomarata. Bajarapamatacabi nacuaeavetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacujavavetsina. Pata Jerusalén tomarajavabetsina.

² Tulupu perubenaejava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinëxexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënëlivaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsñëyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaronë jane baja evetsiana Dioso pijajivi, Israel nacuapijivi. Bjaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane,

jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

⁷ Bjaraxuacujinae Herodes muetsia junata tajënacuvetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

⁹ Nexata jane baja tulupu perubenaejava pecanaëcobiviponalia Belén tomarabelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnyöo pena barëecatsi pematatsënëatsia, bajarapatuluputo rucojopa.

¹⁰ Tulupu perubenaejava pecanaëcobivi itsa tane bajarapatuluputo, bitso barëya. ¹¹ Nexata bajarapamonae boyalia itsa joneya, tane Jesúsnyöo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsnyöo

pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsñëyo rajuta orojavanë. Rajutanua petuxujuvijavabeje. Itsajava inciensovënëjava. Itsajava mirravënëjava. ¹² Bajaraxuacujinae tulupu perubenaejava pecanaëcobivi meravi majitsinaebota Dioso itavetatsi penaviabiyaniwa nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsñëyo Egipto nacuyabelia yabara pelivaisi

¹³ Tulupu perubenaejava pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tspaji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamajitsinaemeravi baja José barëpona Jesúsñëyo, pena yajava. Barënajetabajirava Egipto nacuyabelia. ¹⁵ Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tspaji baja cajena bajayata Diosojumepaebiniemi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenejë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaevetsinë Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsñëyo yabara. Itsiata tulupu perubenaejava pecanaëcobivi caxitajarabi ata Jesúsñëyo, apo vajunucaponaeremena Herodesjavabelia. Nexata Herodes itsa yapëtane tulupu perubenaejava pecanaëcobivi apo pevajunucaponaeremena, caxitajarabi ata Jesúsñëyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjava ata. Daxita papebinacuetoxi abaxë apo xainae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnyö picani peyjavabeyaxuabinexatsi. Tsipaji tulupu perubenaëjava pecanaëcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi,

jai bajayata tajëvelia profeta Jeramíaspijinë peyaquinaelivaisita pexoxibeponaëjavanexatsi yabara bajarapatomarata.

¹⁹ Nacuaevetsinë baja Herodes pepuatëpae, Dioso icatsia pijaángel itoroba Joséjavabelia. Nexata ángel meravi majitsinaebota José tsitanaitajëtatsi Egipto nacuata. ²⁰ Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuayabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

²¹ Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuayabelia.

²² Nacuaevetsinëmi Herodespijinë pexënato pevënë Arquelao. Nexata Arquelao eveta Judeanacua paxa pevënamuto. Nexata José ita vënëlivaisitane nacuaevetsinëmi Herodespijinë pexënato pevetsijava Judeanacua, José cujunava Jesúsnyö pebarëponaëjava Judea nacuayabelia. Majitsinaebota José Dioso itavetatsi Jesúsnyö pebarëponaëyaniva Judea nacuayabelia. Nexata José barëpona Jesúsnyö Galilea nacuayabelia. ²³ José ita barëpata Jesúsnyö Galilea nacuayabelia, Nazaret tomarata barëpatajopa pebarëcaenexa Nazaret tomarata. Bajarapacuenia José Nazaret tomarata ita barëca Jesúsnyö, copiapata jane baja pacuenia baja cajena bajayata Diosojumepaëbivimi profetavi tajëvelia jumaitsi. Diosojumepaëbivimi profetavi bajayata baja cajena tajëvelia ju-

maitsi Jesús yabara mapacueniaje: “Ponë Dioso itorobijitsi-atsica jivi pecapanepaenexa, bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsi-paeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús itsa baja xaina bejamatabëcuene treinta pavaibeje, Juan jivibautisabinë najetaruca Judea nacuatusatojava. ² Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënëyorore Diosojavabelia, jai tsanajetaruca Juan jivijavabelia.

³ Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinëmi profeta, Isaíaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipaebanajetarucaejavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexanana namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeyarena,” jai tsane tanejumelivaisipaebinë, jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopi-jivi ata. ⁶ Nexata bajarapamonae pibisiacuene pexanaejavami, roviafia Diosojavabelia navecuapaebaona. Nexata bajarapamonae Juan bautisabapona Jordán meneta.

⁷ Jivibitsaëtoخانeto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabėjai.

Nexata Juan itsa tane ayaibitsaëttoxaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpa itsa tane isoto petajuenajetarucaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. ⁹ Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi. ¹¹ Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatabëcuenepënëyorotanua Diosojavabelia. Itsiata baitsi jane ponë tacovëverena najetarucaena, tabautisabivi Espiritu Santo tsijamatabëjoneyaexanaenatsi, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë. ¹² Arrozxainaenë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecua. Nexata ëpexu xaniavaeteta

peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereverecaesotojavabelia, jai Juan daxita bajarapamonaëjavabelia.

Pacuenia Juan bautisaba Jesús yabara pelivaisi
(Mr 1.9-11; Lc 3.21-22)

¹³ Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴ Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtsia itaboxo penapatsijava. Nexata Jesús tane Espíritu Santo perunaëjavatsica beucucuto. Tsimatarunaicatsi. ¹⁷ Nexata Juan jumetane athëbëvetsica Dioso pejumaitsijava: “Mara ponë taxënato tasivanëje. Sivajamatabëcuenebarëyanë bitso,” pejaijava.

4

Pacuenia Jesús jamatabëcueneëjëbatsi dovathi yabara pelivaisi
(Mr 1.12-13; Lc 4.1-13)

¹ Jesús pebautisabicujinaetsi, Espíritu Santo ponaëyaexanatsi petusato nacuyabelia. Bajarabelia ponaëyaexanatsi pejamatabëcueneëjëbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuepe anaenexa. Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapai-botonëje penaexanaenexa pan, jai dovathi.

⁴Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matababi apo pev-evereceajava,” jai raja Dioso pejumelivaisibaxutota, jai Jesús dovathijavabelia.

⁵Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia.

⁶Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevetsinexa Dioso pejumelivaisibaxutota jumaitsi mapacueniaje:

Dioso itorobianica pijaängelevi pecaevetsinexa. Nexata Ángelevi pecobeta cayotsiana pecataxutsaquitsiyaniva ibotonëjavabelia,

jai Dioso pejumelivaisibaxutota xamë pecaevetsinexa Ángelevi, jai dovathi Jesúsjavabelia.

⁷Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata exanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

⁸Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexinaejava yajavatsitajëtatsi. ⁹Nexata icatsia dovathi jumaitsi Jesúsjavabelia:

—Ayaijamatabëcuenenënë netaeya taitabarata nematabacabëta itsa netonucajunuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë pepo petuxanenë Diosojavabelia.

Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi
(Mr 1.14-15; Lc 4.14-15)

¹² Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia. ¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvënë nacuabeje Neftalivënë nacuabejejavata. Capernaumtomara eca pucaxanetoitapata. ¹⁴ Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

¹⁵⁻¹⁶ Zabolón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtioxanetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi itsa tsipaebianatsi Diosojavabelia pecapanepaelivaisinexatsi, jai tajëvelia Isaíaspijinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

¹⁷ Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënëyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamataju-cabiabivi yabara pelivaisi
(Mr 1.16-20; Lc 5.1-11)

¹⁸ Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacae-bananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. ¹⁹ Nexata Jesús jumaitsi Simónbeje Andrésbejejavabelia:

—Naxanitsia. Panepënaponarebeje. Nexata pacacubarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

²⁰ Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

²¹ Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacae-bananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucae javanexabeje. Nexata icatsia Jesús junata Santiagobeje Juanbeje. ²² Nexata bajarajota paxa puentanutabeje jera yajava. Santiagobeje Juanbeje naponabeje baja Jesús pepëta.

Pacuenia Jesús livaisi tsipaeba jivi ayaibitsaëttoxanetojavabelia yabara pelivaisi

(Lc 6.17-19)

²³ Jesús jane baja najetaruca daxita Galilea nacuajava. Dioso pitorobilivaisi tsipaebapona judíovi penacaetuatabiabinëjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. ²⁴ Nexata daxita Siria nacuajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pënaponatsi jivi ayaibitsaëttoxaneto Galilea nacuapijivi, Decápolis nacuapijivi ata, Jerusalén tomarapijivi ata, Judea nacuapijivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi

(Lc 6.20-23)

¹ Jesús itsa tane jivibitsaëtoxaneto, nexata junaya petsutot-sia. Bजारपत्सुतोयेनपानता एपतता एका. Nexata बा-
जाराजोता Jesús पिजावि मातओरोत्सि नाकातुात्सि. ² Nexata
Jesús taxuxuaba livaisi petsipaebijava. ³ Jesús jumaisi pija-
jivijavabelia mapacueniaje:

—Jamatabëcuenebarëya tsavanapae tsane pamonaē picani mapanacuata yajamatabëcuenebëjai tsavanapae pibisiacuene pexanabiabijava. Bजारपामोनाē जोना डोसो पिजानाकुआयबत्सि.

⁴ 'Jamatabëcuenebarëya tsavanapae tsane pamonaē picani mapanacuata bejamatabëjiobi tsavanapae itsamonaē pibisiacuene petoexanaexaetsi. Bजारपामोनाē डोसो जामातबëकुएनेयावेनोनाएनात्सि.

⁵ 'Jamatabëcuenebarëya tsavanapae tsane pamonaē apo jamatabëbëjai tsabiabi mapanacuata, itsacueniababiabi atatsi itsamonaē. Apo cuenecanaviatabiabinua. Bजारपामोनाē जि-
नानापाना डोसो पिजानाकुात्सि पाकुनिया डोसो नाजुमे-
कापानेपाया जुमात्सि बाजारपामोनाē यबारा.

⁶ 'Jamatabëcuenebarëya tsavanapae tsane pamonaē ma-
panacuata bitso daxitacuene matatoxenetsia jitsipabiaba
pexanaenexa डोसो पितोरोबिकुएनात्सि. डोसो बाजा काजना
यावेनोनाबिआनात्सि पexanaenexa बाजारपाकुने.

⁷ 'Jamatabëcuenebarëya tsavanapae tsane pamonaē ma-
panacuata itsamonaē ata itaxutotsoniataeyabiaba. डोसो
nexata जुया itaxutotsoniataeyabiabianatsi बाजारपामोनाē.

⁸ 'Jamatabëcuenebarëya tsavanapae tsane pamonaē ma-
panacuata ëpexaniacuene pexanaenexa najamatabëxainabiaba.
Bजारपामोनाē ताणा डोसो.

⁹ 'Jamatabëcuenebarëya tsavanapae tsane pamonaē
mapanacuata penaitoyavimi ata, nabarajamatabëcuene
xanepanaeyaexanapona. Bजारपामोनाē यबारा: "Taxi,"
jai tsane डोसो.

¹⁰ 'Jamatabëcuenebarëya tsavanapae tsane pamonaē
mapanacuata bejiobiaexanabiabatsi डोसो पितोरोबिकुएनात्सि
pexanabiabijava यबारा. Bजारपामोनाē जोना डोसो
पिजानाकुआयबत्सि.

¹¹ 'Patajajivixaemë, itsamonaē pibisiacuenia itsa
pacabaracuaicuajai, itsiata pajamatabëcuenebarëyamë
tsavanapae tsane. Bजारपामोनाē पाकाबेजिओबिआना
आ तांने, नाजुमेत्सेनेत्सिया पाकाबारकुआकुआजै आनुआ
तांने, itsiata pajamatabëcuenebarëyamë tsavanapae tsane.

¹² Bajara tsipaji pacuenia panevajënaeyapijivimi ata,
Diosojumepaebivimi profetavi, bajayata bejiobiaexanatsi.
Nexata pasivajamatabëcuenebarëyamë tsavanapae tsane
paxamë ata बाजारपाकुनिया itsa पाकाखानाणा. Tsipaji

raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi
(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Yajobeno xanepana vajaexabinexa pevi piabejyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ Pacuenia piatayotsicotia itayota piitaquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame piagamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta

penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiayaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje. ¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caetanetoyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlvaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi dexitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi
(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. ²² Itsiata baitsi jane xanë pacatsipaebatsi mapacueniaje. Pajivi baranaepana itsajivijavabelia, bajarapajivi

naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi infierno isotojavabelia.

²³ Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje.

²⁴ Altarvënëjava pitabarata abaxë papuenere ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacopona bajarapajivi jueznëjavabelia papecaneconitsinexa, namutua xaniavaetsia panabarëcuaicuajamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuajamërebeje papecanutsiyaniva jueznë pitabarata. Tspaji raja jueznë itorobijitsipa policíavi panijaneconi yabara papecacoponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojibinë itsava pejaitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai.

²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi

mapovajavabeliaje,” itsa jamatabējai, bajaraponē naneconita Diosojavabelia. Nexata najjēpaeya naneconitabeje Diosojavabelia ponēbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajē baja paxuare. Xanepana panenavecuaxuabinexa bajarapaitaxuto, padaxitaperabētojivimē Dioso papecaxuabijaniva infiernojavabelia. ³⁰ Panecujuacobeta pibisiacuene itsa paexaname, panacobecaucure. Tajē baja paxuare. Xanepana panenavecuaxuabinexa, bajarapacobe padaxitaperabētojivimē Dioso papecaxuabijaniva infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinē pijava pexuabijaniva yabara pelivaisi

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibitsaētoxfanetojavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Ponē jamatabēxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinēta penajumecopatsilivaisi. ³² Itsiata baitsi jane xanē mapacuenia pacatsipaebatsije. Ponē pijava xuaba, itsanējavabelia bajarapova pevitota pibisiacuene apo vecuaexanae atatsi, bajaraponē naneconita Diosojavabelia pijava pexuabixae. Petiriva pamona pexuabixaetsi, nacojobijitsipa itsanējavabelia. Nexata jane baja bajaraponē pijava pibisiacuene vecuaexanaejitsipatsi itsanējavabelia. Tsi-paji abaxē bajaraponē pijavacuenia Dioso totanetsi. Nexata pijinia ponē pita bajaraponē pexuabicovēvami, bajaraponē ata pibisiacuene exana pevitota. Tsi-paji abaxē bajaraponē pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibitsaētoxfanetojavabelia:

—Paxamē rabaja payapētaneme pacuenia bajayata Moiséspijinē jumaitsi panijasalinaivimijavabelia. Panijasalinaivimi penajumetsēnētsiyaniva, bajayata Moiséspijinē panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamē, itsamonae papecajumexaniataenexa itsa pajumaitsimē: ‘Xaniajanē raja. Cajumaitsi

mapacueniaje Dioso pitabarata,' itsa pajamë, pëtsa epatua panajamatabëcopatame bajaraxua paexanaenejevamë," jai bajayata Moiséspijinë panijasalinaivimijavabelia. ³⁴ Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, roviaia panavajunupaebare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: "Xaniajanë raja. Cajumaitsi mapacueniaje Dioso pitabarata," pajamë pëtsa. Pëtsa pajumaitsimënu: "Xaniajanë raja. Cajumaitsi mapacueniaje athëbënacua pevënëta," pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi. ³⁵ Pëtsa pajumaitsimënu: "Xaniajanë raja. Cajumaitsi mapacueniaje mapairaje pevënëta," pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaeavetsinë pijatomara. ³⁶ Pëtsa pajumaitsimënu: "Xaniajanë cajena. Itsa apo xaniajanë tsane, nexata nacaevetsianajë tanematathinaxuabinexamë tatëpaenexa," pajamë pëtsa. Tsipaji panematabocoto ata Dioso eveta. Nexata paxamë apo pacacaëjêpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. ³⁷ Itsa pepacuenie paexanaejitsiamë, "Jājā, exanaenajë," pajamë roviaia. Itsa apo pajamatabëexanaemë, "Jume, apo exanaenë tsane," pajamë roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

Pacuenia Jesús pijajivi muxujioba pecuenecanaviatsiyaniva itsajivi itsacueniabi atatsi yabara pelivaisi

(Lc 6.29-30)

³⁸ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: "Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi," jai bajayata Dioso Moiséspijinëta penajumecopatsilivaisi. ³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabarapacabiauxuaba anaeya, nexata icatsia

itsanenia ata papecaitarapacataxuabinexa, panaitabara-caevere. ⁴⁰ Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. ⁴¹ Vajabitsaë itsa pacacoponaeyaexana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. ⁴² Bitso bepejiobjivi itsa pacavajëta itsacuenejavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsiyabara pelivaisi
(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitoiyavi ata. Pamonaë ata pibisiacuena pacabaracuaicuaijai, bajarapamonaë paxamë xaniavaetsia pabaracuaicuaijamëre. Pamonaë ata pacaitoya, bajarapamonaë pexaniacuene patoexanare. Pamonaë ata pibisiacuena pacabijatane, pibisiacuene pacaexanaë ata, patovajëre Diosojavabelia peyavenonaenexatsi. ⁴⁵ Bajarapacuenia nexata paneaxa, athëbëtatsia peecaenë, papeximëcuena patsitajinavanapae-name. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonaë ata asiva piasivavitsi. ⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonaë Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. ⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—¡Xania baja tsane! Pëtsa pexaniacuene paexaname saya jivi papecacuenaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia ita paexanaejitsipame, nexata paneaxa, athëbëtsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtsia.

² Bajaraxuata ita payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabibonëjava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xainae tsane athëbëtsia perajutsijavanexatsi. ³ Ita payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata.

⁴ Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi

(Lc 11.2-4)

⁵ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Ita pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judíovi penacaetuatabibonëjava, calle penaepacaxitajarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia exanabiaba, bajarapacuenia pexanaexae, Diosojavabelia apo xainae tsane athëbëtsia perajutsijavanexatsi. ⁶ Nexata paxamë Diosojavabelia ita pavajëcame, pacaenëmë

canacujitsia, pajonemeya panijaboyaliala. Pabaupaxatare. Bajaraxuacujinae pavajëcare paneaxajavabeliala. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

7 'Itsa pavajëcame Diosojavabeliala, pëtsa napëna pavajëcame saya piapianexa panevajëcaejava pacueniala Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiayala jamatabëjumai tsabiabi: "Itsa bitso apiala vajavajëcaejava Diosojavabeliala, nexata matapaniala Dioso nacajumetaenala vajavajëcaejava," jamatabëjai tsabiabi Dioso apo peyapëtaevi. 8 Pëtsa bajarapacueniala paxamë pajamatabëcuenetsimë. Panevajëcaevajënaeyala ata rajala paneaxa, Dioso, yapëtane xuala panamatavenoname. 9 Bajaraxuatala itsa pavajëcame Diosojavabeliala, pavajëre mapacuenialaje:

Taxamë, athëbëtatsiala neecaenë, jitsipajë pecayaiyataejavalaxitajivi. 10 Jitsipajë naxanitsiayola pecopiapatsijavalaxitala nijajivi nevetsijavalaxitala mapanacuatalaje. Jitsipajë daxitalajivi mapanacuatala nejitsipaecueniala pecatoexanabiabinexa, pacueniala bajala athëbëtatsiala nijajivi nejitsipaecueniala catoexanabiabala, bajarapacueniala pecatoexanavanapaenexa mapanacuapijiviala atajele. 11 Ajena, pamatacabinala, panerajure pataxaejavanexa pacueniala panamatavenonajë. 12 Panevecuaajibiaexanare pibisiacuene pataexanaeneconimi. Pacueniala paxanë pajamatabëcuenecaevajë, pabarajamatabëcuenexanepananuala, itsamonae paxanëjavaberena pibisiacuene patanexanaejavalaxitala, bajara pijiniala pacueniala xamë atalaxitala nitabaratala pibisiacuene pataexanaejavalaxitala jamatabëcuenecaevare. Panebarajamatabëcuenexanepanarenuala. 13 Panevecuatsare dovathipatanejamatabëcuenëjëbiyanivala. Panecapaneparejalaxitala pibisiacuenevecuala. Pamatacabialaxitala xamë taxuxuabianamexitala daxitala nijajivi nevetsijavalaxitala mapanacuatalaje, nejamatabëcuenesaëtalaxitala evetsianamexitala. Nexatala nijajivijumai tsane xamë yabara: "Dioso cajenala bitso ayaijamatabëcuenenë," jai tsane. Bajarapacueniala nijajivialaxitala evetsianamexitala daxitalamatacabijavabelianexa, pajamë tsane mapacuenialaje itsa pavajëcame Diosojavabeliala,

jai Jesús pijajivijavabeliala.

14 Jesús icatsiala jumaitsi pijajivijavabeliala:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua. ¹⁵ Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanarena tsane, pitabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajëtaþona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba. ¹⁷ Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarena xaniavaetsia. ¹⁸ Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayaijava pexainaenexa athëbëtatsia yabara pelivaisi

(Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pëtsa pacatuataponame ayaijava panexinaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi.

²⁰ Dioso jane xaniavaetsia patonacuenebavanapare. Nexata Diosojavabelia ayaijava pexaniacuene paxainaename athëbëtatsia. Nexata bajarajotatsia apo pacatobijiana tsane piucubaxaevi.

Apo pacatotasibitsinua tsane. Penacobetoxotsivi ata apo pacatonacobetoxotsi tsane.

²¹ Panacuatatsia pacatoxaniavaeta panexinaejavanexa, bajarapanacua panejamatabëthëtovetsina pajamatabënjavanapaenename, jai Jesús pijajivijavabelia.

Pacuenia vajaitaxuto belámparabë yabara pelivaisi

(Lc 11.34-36)

²²⁻²³ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoخانepanaexae xaniavaetsia panatsivajënaetaneme.

Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata.

Dioso itsa pacajamatabëcueneitayota, pajitsipaenename paneexanabiabinexa pacuenia Dioso pacaitoroba. Nexata xaniavaetsia pajinavanapaenename.

Itsa panajamatabëxinaejitsipame bitso panexinaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioba bitso pejitsipaeyaniva palata yabara pelivaisi

(Lc 16.13)

²⁴ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Itsajivi ata acuenebi caecuenia petonacuenebijava anjanëbeje pijatuxanenëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso,

nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

*Pacuenia Dioso pijajivi eveta mapanacuataje yabara peliv-
aisi*

(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁶ Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. ²⁷ ¿Detsa jane ponë paxamëyajuvënënë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ 'Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjere pacuenia vitsabapona pematono vayafjava. Bajarapamatono apo natsijumanacuenebi. Penaxatatsijavanexa ata apo natsijumaexanae. ²⁹ Bajayata nacuaejetsinëmi Salomónpijinë, bitso pexainaenëmi. Naitabëtsiaya naxatabiabiaba bitso pexaniavirijavanë. Itsiata baitsi jane Salomónpijinë penitabëtsijava matatoxenetsia bitso aitabë mapamatonotoxije. ³⁰ Paxamë bevelia panejumecovënëtsivi Dioso, asaëya bepajumecovënëtame Dioso papecaejetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata Dioso pacaxatabiana piaitabëjava itsa pajumecovënëtame Dioso. ³¹ Bajaraxuata pëtsa jamatabëbjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa. ³² Pamonae Dioso apo pejumecovënëtsivi, bajara-pacuenia bitso sivanajamatabëxainabiaba ëpexaejavanexa, ëpenaxabijavanexa ata. Itsiata baitsi jane paneaxa paxainame,

athëbëtatsia peecaenë. Bajaraponë yapëtane daxita xua panamatavenoname. ³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panetoexanavana-paenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjaitsi xua meravia pitsijavata nacatocopiapatsijitsia, jai Jesús pijajivijavabelia.

7

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi

(Lc 6.37-38, 41-42)

¹ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene itsa paexaname, itsamonae pijinia bajarapacuenia pacabaracuaicuaijai tsipae. ³ Bajaraxuata paxamë pepacuene bepaneaneconijibivi nataeya pëtsa pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë. ⁵ Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare

pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pëtsa matavëjëa patsipaebaponame Dioso pejumelivaisi, pamonaе patsipaebi atamë, apo yaiyatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaе apo yaiyatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaе, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëtaponaеjitsia yabara pelivaisi

(Lc 11.9-13; 6.31)

⁷ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pavajëtaponare Diosojavabelia bajayajebi ata pacuenia bajayajebi ata pajaitsipame panecaxitajarabinexa itsa pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta.

⁸ Bajarapacuenia asaëyata pavajëtaponare Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

⁹ 'Paxamë papebijivimë panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto.

¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë panejamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

¹² 'Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaеjavabelia. Bajarapajamatabëcuene jëpa Dioso Moiséspijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

Tsiquiribaupayo epatajërëtsialia yabara pelivaisi
(Lc 13.24)

¹³ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pajonemeya tsiquiribaupajovalia panepatsinexa Dioso pijanacuayabelia. Tsipaji pinihibaupa, pini-jinamutonua, pata infiernojavabelia. Nexata jivi ayaibitsaëtoخانetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyonua, bajarapanamuto pata maticabi apo pevereverecaejava pexainaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaënë itsa nacuita, nayapëtane pavirianaecueneyabara pelivaisi
(Lc 6.43-44)

¹⁵ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Xania panayajivitaema. Pamonae saicayacuenia Dioso pejumelivaisivecua jivi tsipaebapona, bajarapamonae najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamonae Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacueneje. Peubinaenë itsa nacuita, yapëtanetsi ponaecuai xanepana vajaxaenexa. Nexata bajaraponae cuaixanetsi. Ponaë pijinia pibisiacuai nacuita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaënë itsa nacuita, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponaë pexanianaë, pexaniacuai pijinia nacuita vajaxaenexa. Ponaë pijinia pibisianaë, ëpiabejecuai nacuita. ¹⁸ Pexanianaë pexaniacuai nacuita. Apo nacuitai piabejecuai. Pibisianaë pijinia apo nacuitai pexaniacuai. ¹⁹ Daxita ponaenë nacuita pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota. ²⁰ Bajara pijinia pacuenia paxamë ata payapëtaename itsa pacuetaename xua exanavanapa pamonae saicayacuenia

Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi

(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Daxita pamona: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamona exanavanapa taxa, athëbëtatsia peecaenë, pejitsipaecuenia, ëbajarapamona jonena taxa pijanacuayabetsia. ²² Pamatacabi copiapatsiana pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pinijicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi. ²⁵ Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo

pexanaejava. ²⁷ Tsipaji bo peveretetsicujinae ayaiemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabēcuenenabenajaca. ²⁹ Jesús pejumetaevitsi bitso jamatabēcuenenabenajaca tsipaji Jesús livaisi tsipaeba pinijijamatabēcuenenabenajaca pexainaenēcuenia. Apo tsipaebi pacuenia judíovi pecujarubivi tsipaebabiaba.

8

Pacuenia Jesús jamatejemayaexana bajayajebi bitso peperabětsabanaenē yabara pelivaisi

(Mr 1.40-45; Lc 5.12-16)

¹ Itsa baja Jesús runaica petsutojumavetsica, jivi ayaibit-saētoxaneto pēnaponatsi. ² Nexata imoxoyotatsi bajayajebi bitso peperabětsabanaenē. Pitabarata pematabacabēta tonucatsi. Bitso peperabětsabanaenē jumaitsi Jesúsjavabelia:

—Jesús, cacaējēpa raja tanejamatejemayaexanaenexamē. Itsa jitsipame, nejamatejemayaexanare mapavitanevecuaje, jai bitso peperabětsabanaenē.

³ Nexata Jesús pecobeta perabējayalia bitso peperabětsabanaenē. Jesús jumaitsi bajaraponējavabelia:

—Jājā, jitsipajē cajena. Jamatejemamē rabaja, jai Jesús bajayajebi bitso peperabětsabanaenējavabelia.

Bजारapacuenia Jesús pejumaitsijavata peperabětsabanaenēmi baja peraběxanepananajereca. ⁴ Nexata icatsia Jesús jumaitsi bajaraponējavabelia:

—Nejumetaema. Pětsa tsipaebame itsajivijavabelia ata tacajamatejemayaexanaejava. Naitajětsiaremelia jane sacerdotenējavabelia, templobota penacuenebinējavabelia. Nexata jivi yapětaena pepacuene baja pecavecuajibijava niavitanejavami. Diosonexa rajuremelia ofrenda sacerdotenējavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainēmi Moiséspijinē nacaitoroba. Nexata sacerdotenē cataena pecavecuajibijava baja niavitanejavami, jai Jesús bajaraponējavabelia.

Pacuenia vajabitsaē pijacapitán pijabota petonacuenebaponaponaenětsi, Jesús tojamatejemayaexana yabara pelivaisi

(Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaëvi pijacapitán Jesús imoxoyorenatsi pe-vajëtsinexatsi. ⁶ Vajabitsaëvi pijacapitán bitso ayaicuenia vajëta Jesúsjavabelia. Jumaitsi:

—Petuxanenë, tajajivitonë raja tajabota camata boboca. Bitso cuenabatsi. Pinijicuenia navixaetaeyabiaba, jai.

⁷ Nexata Jesús jumaitsi capitánjavabelia:

—Xanë ponaenajë nijaboyabelia. Nexata catojamatejemaayaexanaenatsi nijajivitonë, jai Jesús.

⁸ Nexata capitán jumaitsi Jesúsjavabelia:

—Petuxanenë, xanë raja bitso beveliajamatabëcuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. ⁹ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaëvi tajajivi taitorobicuenia tanetoexanabiabinexa. Nexata ita itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa xanëjavaberena, bajaraponë patabiabarena. Itsa itorobajë tajajivitonë tanetoexanaenexa itsacueneyavayo, nexata netoexanabiaba. Bajara pijinia pacuenia xamë ata nexanaenexa cacaëjëpa. Nexata saya maveliaje ënijume itorobare saya ënijumeta tajajivitonë tanetojamatejemayaexanaexamë, jai capitán Jesúsjavabelia.

¹⁰ Jesús ita jumetane bajarapacuenia capitán pejumaitsi-javatsi, nexata Jesús jamatabëcuenenabenajaca. Nexata Jesús jumaitsi pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tane-sivanajamatabëcuenecopatsinë pacuenia mapacapitán nesivajamatabëcuenecopatsiaya jumaitsije. ¹¹ Nexata pacatsipaebatsi paneyapëtaenexa. Apo judíovi ata raja, ayaibitsaëtoxanetonë daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana.

¹² Itsiata baitsi jane judíovi, pamonae picani Dioso athëbëtatsia toxaniavaetatsi peyajavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanajamatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi

(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. ¹⁵ Nexata Jesús cobejayata peromaebanucaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesúsbana pexaejava bajarapova toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mr 1.32-34; Lc 4.40-41)

¹⁶ Itsa baja ajena meravitsia, Jesúsjavaberena tocapatatsi ayaibitsaëto dovathi peyjavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuaajibiaexanaena vavaavitanejavami,” jai bajayata tajëvelia Isaíaspijinë Jesús yabara.

Pacuenia picani Jesús jamatabëpënaponatsi itsamonae yabara pelivaisi

(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronaejavatsi, pijajivi junata pepëanaxuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaenatsi cajena, jai.

²⁰ Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namu pijamëthëanë xaina pepatabiabinexa pe-majitabiabinexa. Baratsui ata pematapenanë xaina. Itsiata

baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

²¹ Nexata Jesús pijajiviyajuvënëne jumaitsi Jesúsjavabelia:

—Tajatuxanenë, caepatoyo abaxë necopare tamëthëtsinexa taxa petëpaenë, jai.

²² Jesús nexata jumaitsi pijajivitonëjavabelia:

—Naxanitsia. Nepënaponare. Copare matacabi apo pev-
ereverecaejava apo pexainaevinexa pemëthëcaenexatsi nija-
monaemi itsa tēpa, jai Jesús pijajivitonëjavabelia.

*Pacuenia Jesús itaveta joviboxaneto, malataca yajava, pi-
ayaijavami yabara pelivaisi*

(Mr 4.35-41; Lc 8.22-25)

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. ²⁴ Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëabereca mera epabajarabapona. It-siata Jesús jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. ²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

*Pacuenia Gadara tomarapijinëbeje, dovathivi peyajavapon-
aponaenëbeje, Jesús vecuacapitsapa Gerasa nacuata yabara pe-
livaisi*

(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuyabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. ²⁹ Nexata dovathivi peyajavaponaponaenëbeje vavajai-beje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaexamëbeje? jai-beje Jesúsjavabelia dovathivi peyajavaponaponanëbeje.

³⁰ Nexata bajarajota, imoxoyo petsutojavata, marranobitsaëttoxaneto xaevanapa. ³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëttoxanetojavabelia, jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëttoxanetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaëttoxanetojavabelia junua dovathivi. Nexata daxita bajara pamarranobitsaëttoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëttoxanetomi meneta bubuna.

³³ Bajara pamarranobitsaëttoxanetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapsapa dovathivi peyajavaponaponanëbeje. ³⁴ Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuave-cua, jai bajarapamonae Jesúsjavabelia tsipaji cujunavatsi.

9

Pacuenia Jesús jamatejemayaexana petabusipacuenabinëtsi yabara pelivaisi
(Mr 2.1-12; Lc 5.17-26)

¹ Jesús runareca jera ënëabereca. Nicabilia puca itsapanabelia. Pata nexata pijatomarabelia.

² Bajarajota Jesús tocapatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenëbinëtsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi itsa jumetaeyena bajara-pacuenia Jesús pejumaitsijava, najamatabëxainena.

—Maponë Jesúsje Dioso apo pejitsipaecuenia cuaicuajai, jamatabëjai tsenae judíovi pecujarubivi Jesús yabara.

⁴ Jesús jamatabëcueneyapëtane judíovi pecujarubivi bajara-pacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisia-jamatabëcuene. ⁵ Paxamë apo pacacaëjêpae ata itsajivi pibisiacuene pexanaeneconi panevecuaajibiaexanaenexa, pacacaëjêpa picani saya jema panejumaitsinexa petabusipacuenebinëtsijavabelia mapacueniaje: “Cave-cuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjêpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjêpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona.

⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tsipaji jivi caëjêpaeayaexaname pinijicuene pexanaenexa, jai.

Pacuenia Jesús pijajivitonënexa junata Mateo yabara pelivaisi

(Mr 2.13-17; Lc 5.27-32)

⁹ Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucaejavata taeyeta Mateo. Mateo gobierno pejamatabëcuene impuestomatamo pematamoyanijobabiabinë. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

¹⁰ Nexata Mateo junata Jesús pebarënanabinexa pijabota. Nexata Mateo pijabota Jesús pexaejava naxane. Mateo pijabota naena ayaibitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, piajamatabëcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuenë, jamatabëcuenenavëxaniabiaya jumaitsi Jesús pijajivijavabelia:

—Papecacujarubinë rabaja Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, piajamatabëcuenebejevijavatanua, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitisijava. Nexata Jesús jumaitsi fariseovijavabelia:

—Pevaëbinë raja apo vaëbi pejamatabëjemavi. Pevaëbinë raja piavitanevi vaëba. Bajara pijinia xanë ata itsinë. Sivapatajopajë tajunatsinexa pibisiajamatabëcuenevi pecapanepaenexatsi Diosojavabelia. ¹³ Paponare. Palebianame Dioso pejumelivaisibaxuto. Nexata payapëtaename pajamatabëcuene yabara jumaitsi Dioso pejumelivaisibaxutota mapacueniaje: “Jitsipajë paneitaxutotsoniataejava itsamonae. Apo jitsipaenë saya patanetobeyabiabijavamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xanë raja apo sivapatajopaenë tajunatsinexa pamonaë baja aneconijibi tsavanapae. Biji rajane sivapatajopajë tajunatsinexa pijaneconi pexainaevi. Junataponajë bajarapamonae pecopabinexa pibisiacuene pexanaejava penajamatabëcuenepënyorotsinexa Diosojavabelia, jai Jesús fariseovijavabelia.

*Pacuenia Jesús yanijobatsi pamatacabibeje jivi vajëta*pona Diosojavabelia pexaejava apo pexaeyabiabixae yabara pelivaisi

(Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenë, paxanë pataxaejava apo paxaeyabiabinë pamatacabibeje pavajëtaaponajë Diosojavabelia. Bajara pijinia itsi fariseovi ata pamatacabibeje vajëtapona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtapona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifiestajavabelia penanabainexa, apo atsohi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsi-maxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponanexatsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponanena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús Juan pijajivijavabelia.

¹⁶ Nexata Juan pijajivi perujujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijajamatabëcuenebeje pexainaeyaniva, perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivotito titinaejitsipa. ¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi
(Mr 5.21-43; Lc 8.40-56)

¹⁸ Jesús livaisi petsipaebanuaejavata Juan pijajivijavabelia, judíovi penacaetuatabiabibo pevetsinë parena Jesúsjavaberena. Nexata bajaraponë Jesús pitabarata yaiyataeya pematabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona. ²⁰ Nexata Jesús namutua penajetaruaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibitsaëttoxaneto tuatujëjavalia. Nexata bajarapova tojayataba Jesús penaxatatsijavacopia. ²¹ Bajarapacuenia tojayataba Jesús penaxatatsijavacopia tsipaji bajarapova jamatabëjumaitsi mapacueniaje:

—Itsa tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

²² Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumaitsijavata bajarapova jamatejema baja. ²³ Bajaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pemataneuyabavanapaejava petëpaevayo.

²⁴ Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitsijava. ²⁵ Jesús nexata bajarapamonae bovecua pitsapaeyaexana. Nexata itsaxuayolia petëpaevayo

boca, Jesús joneya. Cobepita petëpaevayo. Bajarapovayo baja namatacota. ²⁶ Nexata daxita bajarapanacuapijivi Jesús vënëlvivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoni-ataemabeje! jaibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsidebeje Jesúsjavabelia:

—Jājā, payapëtanijibeje cajena, jaibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuenecopatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icatsia itsamonae Jesús tocaparenatsi apo pecuaicuaijainë. Bajaraponë dovathi peyajavaponaponaenë. ³³ Nexata apo pecuaicuaijainë Jesús dovathi itsa vecuacapsapa, cuaicuaijai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapit-sicueneje, najai bajarapamonae.

³⁴ Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomaranëjava, tsiquiritomarax-ijava ata. Nexata bajarapatomaranëjava judíovi penacaetu-atabiabibonëjava pexania livaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Pivitanevi ata Jesús jamatejemayaexanapona, daxitaviriavitane pexainaevimi. ³⁶ Jesús jivi itsa tane, itaxutobejiobiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacuenejavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

³⁷ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxaneto. Itsiata baitsi jane Dioso panetonacuenebivi pacaejiviyomëbeje saya. ³⁸ Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi
(Mr 3.13-19; Lc 6.12-16)

¹ Jesús pijajivi ayaibitsaëtoxanetoyajuvënëvi junata saya doce ponëbeje Jesús pebarënacaetuatsinexa. Jesús pijajivi pecaëjëpaejamatabëcuenetsi jamatabëcuenecaëjëpayaexana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje.

³ Itsanë pevënë Felipe. Itsanë Bartolomé. Itsanë Tomás.

Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevenë Santiago, Alfeo pexenato. Itsanë pevenë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevenë Judas Iscariote. Bajaraponë bexëjavabelia canajetsijtsiatsi Jesús pijavajabitsaë pecobeyabelia pebeyaxuabinexatsi.

Pacuenia Jesús pijajivi itoroba Dioso pitorobilivaisi jivi pet-sipaebanajetarubenaenexa yabara pelivaisi
(Mr 6.7-13; Lc 9.1-6)

⁵ Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëtöxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. ⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacäjäpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. ¹⁰ Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ 'Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja

pacatovajëtsijtsiatsi xaniavaetsia panejinavanapaenexa,” pajamë tsabiabi tsane. ¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecu, paneponaevajënae, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. ¹⁵ Xaniajanë pacuenia pacatsipaebi-jitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyani-vatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. ¹⁷ Xania baja tsane. Patajajivixaemë raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaponaena. Judíovi penacaetuatabiabibonëjava pacajumatitibabeyabiabiana penaneconitsivi pejumaconitabiabimacata. ¹⁸ Patajajivixaemë pacanubiananua nacuaevetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaejavabelia, apo judíovi ata pitabarata. ¹⁹ Itsiata baitsi jane itsa pacanubiana nacuaevetsivi pitabarata, pëtsa pajamatabëbëjamë panenayajivicuaicuaijainexa

bजारपामोनाेजवबेली. Tsipaji raja paepatota panayajivicuaicuaijamējitsia, bajarapaepatota Dioso pejamatabēcueneta pacacuaicuaijaiyaexanaena. ²⁰ Itsa panayajivicuaicuaijamē tsane, paxamē panijacuata apo pacuaicuaijamē tsane. Espiritu Santo raja pacacuaicuaijaiyaexanaena.

²¹ 'Itsamonaे pematapijivi, pejuyapijivi ata, canajetsiana nacuaevetsivijavabelia pebexuabinexatsi. Itsamonaे nacoxicanajetsiana nacuaevetsivijavabelia pebexuabinexatsi. Itsamonaे canajetsiana paxa, pena ata, nacuaevetsivijavabelia pebexuabinexatsi. ²² Daxita nacuapijivi pacaitoya tsane patajajivixaemē. Pajivi bejiobiaexanae atatsi tsane, itsiata itsa casaē tsaponaponaे tsane tanejumecovēnētsijava, bajarapajivi capanepaenatsi Dioso pijanacuayabetsia. ²³ Itsa patomarata pacabejiobiaexanaena, bajarapatomaravecua parēcēpecaename itsatomarabelia. Xanijanē pacuenia pacatsipaebijitsiatsi. Daxita Israel nacuata penaetomaranējava abaxē patsipaebiveretsinejevamē pexanialivaisi, xanē, Daxitajivi Pematapijinēnē, itacarajeta icatsia patsianicajē.

²⁴ 'Itsajivi ata apo jamatabēcuenematatoxenetsi pecujarubinētsi. Itsajivi ata pijinia itsanē itsa pijajivitonē, apo jamatabēcuenematatoxenetsi pijatuxanenē. ²⁵ Pacuenia pecujarubinē itsamonaे copiaya bejiobiaexanatsi, bajarapacuenia icatsia bajaraponē pecujarubivi ata bejiobiaexanaenatsi. Pacuenia petuxanenē copiaya bejiobiaexanatsi, bajarapacuenia icatsia pijajivitonē ata cotocaevi bejiobiaexanaenatsi. Xanē panijatuxanenēnē: “Beelzebú, daxita dovathivi pijatuxanenē,” nejai tsabiabi itsamonaे. Nexata pijinia patajajivixaemē bitso pibisiavēnēta paxamē ata cotocaevi pacajunatabiabiana, jai Jesús pijajivijavabelia.

Pacuenia Jesús pijajivi tsipaeba pecujunaviyaniva pebexuabijavatsi yabara pelivaisi
(Lc 12.2-7)

²⁶ Icatsia Jesús jumaitsi pijajivijavabelia:

—Pētsa pacujunavame jivi, pacaatiobi ata. Daxita xua jivi muetsia pibisiacuene exana, bexējavabelia cueneyapētaeponaenatsi daxitajivi. ²⁷ Palivaisianē muetsia vajaepatojavata pacatsipaebaponatsi, bajarapalivaisianē paxamē pinijijumeta patsipaebaponaename jivi penacaetuatabibijavata. ²⁸ Pētsa pacujunavame jivibeivi ata. Bजारपामोनाे pacabexuabi ata tsipae, acuenebi matavējēa papecaitsacueniabinxaxa pepo panejamatabēcuenējavabelia. Biji rajane pacujunavare

Dioso, ponë caējēpatsi papecaxuabinexa infiernojavabelia papecabeyaxuabicujinae.

²⁹ Anijanēbeje baratsuitobeje namatamota saya caepalantanēyo. Itsiata baitsi jane caenē ata baratsuito Dioso pepēya jemata muetsia apo jopaetsica petēpaenē. Tsipaji paneaxa, Dioso, asiva baratsui ata. ³⁰ Dioso cajena bitso pacaasiva baratsui matatoxenetsia. Nexata panematanatoxi ata, caematanatoyo canacujitsia, Dioso namataējēta. ³¹ Bajaraxuata pētsa pacujunavame itsacuenejavayo ata. Tsipaji paxamē Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi

(Lc 12.8-9)

³² Icatsia Jesús jumaitsi pijajivijavabelia:

—Daxita pamonaē tajajivi, jivi pitabarata itsa navajunupaebiana tajajivicuene, xanē ata vajunupaebianajē bajarapamonaē tajajivicuene taxa, athēbētatsia peecaenējavabelia. ³³ Pamonaē jumai tsane itsamonaējavabelia: “Xanē cajena Jesús apo pijajivitonēnē,” jai tsane, nexata pijinia bajarapamonaē yabara xanē jumaitsinē tsane taxa Diosojavabelia: “Mara pamonaē apo tajajivije,” janē tsane, jai Jesús pijajivijavabelia.

Pacuenia Jesús apo penajuajumecovēnētsixae, nacaemonaē ata apo najamatabēcuenējēpae tsane yabara pelivaisi

(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pētsa panesivajamatabējumaitsimē mapacueni-
aje: “Jesús rabaja patsica mapanacuayabetsicaje
daxitajivi mapanacuataje najamatabēcuenējēpaeya
pejinavanapaeyaexanaenexa,” panesivajamatabējamē
pētsa. Bajaraxuanexa apo patsinētsica. Biji rajane
xanē tapatsixaetsica mapanacuayabetsicaje, jivi itsa
nejumecovēnētsiana, apo najamatabēcuenējēpae tsane
pamonaējavabelia apo nejumecovēnētsi, nacaemonaē
ata. Napijavajabitsaē tsane namataenetsia. ³⁵ Xanē
apo tanenajuajumecovēnētsixaēbeje, pebibēje paxabeje
apo najamatabēcuenējēpaebeje tsane. Petirivabeje ata,
pexēnatoyobeje xanē apo tanenajuajumecovēnētsixae
penabeje apo najamatabēcuenējēpaebeje tsane. Pamebeje ata
pecopenabeje apo najamatabēcuenējēpaebeje tsane. ³⁶ Nexata
xanē apo tanenajuajumecovēnētsixae, caejivi canacujitsia
bepijavajabitsaējivi taenatsi pijamonaējivi ata.

³⁷ Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepënaponae tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejiobiaexanaeyanivatsi, pebeyaxuabiyativatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamona xaniavaetsia copiapita Jesús pijajivi yabara pelivaisi

(Mr 9.41)

⁴⁰ Icatsia Jesús jumaitsi pijajivijavabelia:

—Pajivi pacocopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacuene matamotsianatsi Dioso, jai Jesús pijajivijavabelia.

11

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi

(Lc 7.18-35)

¹ Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata

Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecua tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. ⁶ Pajumaitsimënuua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ⁸ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamonae naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. ⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë,

Diosojumepaebinë, pataneme. Nexata saya bevelia profetanë apo pataemë. ¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan yabara, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetaruaejavanexa yabara.

¹¹ Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

¹² 'Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetaruaejava mapamatacabijavaberena ataje, ayaibitsaëtoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyaniva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatacabi Dioso pijajivi pevetsijavanexa.

Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitsi mapacueniaje:

“Elíaspijinë icatsia patsiana,” jai. Bajarapacuenia tajëvelia itsa jumaitsi, Juan jivibautisabinë yabara jumaitsi. Tsipaji pacuenia jamatabëcueneitsi profeta Elíaspijinë, bajara jamatabëcueneitsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje:

“Bajarapamonae abaxë saya bepejevaxijivixi, pajivixi tomara tuatuaejëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua

namuxusitenaevijavabelia. ¹⁷ Pevavajaijavata bajumaitsi: ‘Pacatoobecatsi picani flauta. Itsiata apo payavajibimē. Pacatonaxēanecatsi picani penemuxunanuevajinexa ata. Itsiata apo panuemē,’ bajai tsenae pejevaxi penajua namuxusitenaevijavabelia. Bajara saya jamatabēcueneitsi pamonae aeconoxae jinavanapa mapanacuataje,” janē meta tsane paxamē yabara. ¹⁸ Juan jivibautisabinē Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajētapona. Vinora ata apo apaeyabiabi. Nexata bajaraponē yabara jamatabēcuenenavēxaniabiaya pajumaitsimē tsabiabi: “¡Juan raja dovathi yajavaponapona!” pajamē tsabiabi jamatabēcuenenavēxaniabiaya. ¹⁹ Bajaraxuacujinae icatsia xanē, Daxitajivi Pematapijinēnē, najetarucajē. Itaxutojema xaniji. Matavējēa apaeyabiabajēnua. Nexata xanē yabara icatsia jamatabēcuenenavēxaniabiaya pajumaitsimē tsabiabi: “¡Pataema maponēje! Ayaijava xaeyabiaba. Ayaira matavējēa apaeyabiabanua piaitajibinexa. Barēnajamatabēcuenejēpanua gobierno pejamatabēcuene impuestomatamo pematamoyanijobabiabivi. Pamonae ata piamatabēcuenebejevi, barēnajamatabēcuenejēpa,” pajamē tsabiabi xanē yabara. Itsiata baitsi jane xuanē paxanēbeje Juanbeje paexanaponajēbeje, bajaraxuanē Dioso pejamatabēcueneta pataexanaejavabeje itsamonae xaniavaetsia yapētaena. Nexata daxita bajarapamonae yapētaena pacuenia Dioso paneyapētaeyaexanabeje pepacuene pepo pexaniajaijamatabēcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jume-covēnētsitsi yabara pelivaisi

(Lc 10.13-15)

²⁰ Itsatomaranējava Dioso pesaēta Jesús pinijicuene pexanaejavanē navitsia exanapona. Itsiata bajarapatomaranēpijivi apo copabi pibisiacuene pexanabiabijava. Apo najamatabēcuenepēnēyorotsi Diosojavabelia. Nexata Jesús ajumesaēya jumaitsi bajara patomaranēpijivijavabelia:

²¹ ¡Bitso bepajjobimē tsane paCorazín tomarapijivimē! ¡Bitso bepajjobimē tsane paBetsaida tomarapijivimē ata! Pinijicuene Dioso pesaēta taexanaejavanē patae atamē, itsiata apo panejumecovēnētsimē. Apo pacopabimē pibisiacuene paneexanabiabijava. Apo panajamatabēcuenepēnēyorotsimē Diosojavabelia. Bajayata Tiro tomarapijivimi, Sidón tomarapijivimi ata, petuatuajēta bajarapitsipinijicuene itsa tsitaexanaejitsipajē, nexata bajarapamonaemi copabijitsipa pibisiacuene pexanaejava.

Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebėjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebėjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebėjaixae pibisiacuene pexanabiabineconi. ²² Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomara-pijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena. ²³ Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Nexata bajarapamonaemi Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata. ²⁴ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

Pacuenia Jesús pijajivi junata pejamatabëcueneasaëyaexanaenexa pejamatabëcuenequeranaejavavecua yabara pelivaisi
(Lc 10.21-22)

²⁵ Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tsipaji

pamonae bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. ²⁶ Bajarapacuenia exaname tsipaji baja exaname nejitsipacuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë xanë, pexënatonë, jamatabëcueneyapëtaniji. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaponaenajë. ²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacuene paneexanabiabijava yabara, xanëjavaberena paponare paneajamatabëcuenesaënexa icatsia. ²⁹ Bueyubeje banavësjumacaevetabeje petsivësjumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuenecaevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneyapëtaeponaename. Tsipaji xanë xaniavaetsia pacatsipaebaponaenatsi. Xanë beayai-jamatabëcuenenë apo nataenë. Nexata bajarajota panajamatabëcueneevetsianame paneajamatabëcuenesaënexa icatsia. ³⁰ Pacuenia bueyu tsivësjumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi

(Mr 2.23-28; Lc 6.1-5)

¹ Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso pajani. Nexata trigoxu siricanajetarubena. Xuxaeyabuatapona.

² Nexata fariseovi tane Jesús pijajivi pesiricanajetarubena-ejava trigoxu. Nexata fariseovi jumaitsi Jesúsjavabelia:

—Taema mapamona-eje. Dioso Moisés-pijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajara-pacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani?

⁴ Davidpijinë joneya Dioso pijatemploboyalia. Nexata Dioso pijatemplobenëta, mesajumata, bobena Diosonexa ofrendacuena petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyaniva Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsipaji Dioso Moisés-pijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanë cajena ayaijamatabëcuenenënë.

Nexata Dioso netojitsipa jivi taneyaiyataenexa templobo matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonae ata. Apo jitsipaenë cajena saya patanetobeyabiabinexamë dajubicuene ofrendacuena patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moisés-pijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane. ⁸ Nexata xanë, Daxitajivi Pematapijinënë,

netoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

Pacuenia Jesús jamatejemayaexana pebi pecobetsaque-naenë yabara pelivaisi

(Mr 3.1-6; Lc 6.6-11)

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiboyalia. ¹⁰ Nexata bajarajota pebi naeca, pecobetsaque-naenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcueneëjëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane?

¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaitsi pecobetsaque-naenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaque-naejavami baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaque-naenë, fariseovi anaepana. Nexata pitsaparena judíovi penacaetuatabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi

¹⁵ Jesús jamatabëcueneyapëtane pacuenia fariseovi sivana-jamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëttoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyaniava itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebiyaniava itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

18 Maponē taitapetsinē, taitorobicuenia exanabiaba. Bajaraponē tasivanē. Sivajamatabēcuenebarēyanē. Espiritu Santo runaeyaexanaenicajē bajaraponē pematatsēnēatsica. Bajaraponē apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. 19 Bajaraponē itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. 20 Pamonaē xanē tajumelivaisi pejumecovēnētsijava abaxē apo ajamatabēcuenesaē ata, itsiata bajaraponē bajarapamonae apo xuabi tsane. Capanepaena. Pamatacabi tocopiapatsianatsi bajaraponē pijajivi pevetsimatacabinexa, xaniavaetsia bajaraponē evetsiana daxita pijajivi. 21 Nexata daxitajivi, apo judíovi ata, sivanajamatabēcuenecopatsianatsi bajaraponē pecapanepaenexa, jai bajayata tajēvelia profeta Isaíaspijinē Dioso pejumaitsijava Jesús yabara. Bajarapacuenia bajayata tajēvelia jumaitsi Isaíaspijinē peyaquinaebaxutota.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta Jesús dovathi jivivecua capitsapapona,” jai yabara pelivaisi (Mr 3.20-30; Lc 11.14-23; 12.10)

22 Jesús toapatatsi bitso pitaxutotsēcēnaenē, apo penatsipaebinē. Bajaraponē dovathi yajavaponapona. Bajaraponē Jesús jamatejemayaexana. Xaniavaetsia baja nexata tane. Natsipaebanua baja. 23 Jivi itsa tane Jesús pejamatejemayaexanaejava bajaraponē, jamatabēcuenenabenajaca. Nexata jivi najumaitsi Jesús yabara:

—¿Matsaeta ponē Davidpijinē pemomoje, Dioso pitorobinētsicaje? najai bajarapamonae Jesús yabara.

24 Nexata fariseovi itsa jumetane bajarapacuenia jivi pejumaitsijava, fariseovi jumaitsi jivijavabelia:

—Mara ponē Jesúsje, dovathi jivivecua capitsapabiaba Beelzebú pesaēta. Beelzebú raja daxita dovathivi pitorobinē, jai fariseovi jivijavabelia jamatabēcuenenavēxaniabiaya Jesús yabara.

25 Jesús jamatabēcueneyapētane pacuenia fariseovi sivanajamatabēxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaētsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa nacaetomarapijivi ata. Bajara pijinia

itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavabitsaënë taejitsipatsitsi pijajivi. Itsajamatabëcuene vecuaxinaejitsipa pijajivi. Pesaë ata apo xainaponae tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitisijava xanë yabara. ²⁸ Espiritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

²⁹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ Bajaraxuata pacatsipaebijitsiatsi, Dioso caëjëpatsi daxitajivi pibisiacuene pexanaeoneconimi pevecuaajibiaexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuaijai Espiritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi. ³² Pajivi pibisiacuenia nebaracuaicuaijai ata, xanë, Daxitajivi Pematapijinënë, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuaijai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenë itsa nacuita, nayapëtane pavirianaecuene yabara pelivaisi
(Lc 6.43-45)

³³ Icatsia Jesús jumaitsi fariseovijavabelia:

—Pexaniavirianaenē ita ubatsi, nacuita pijinia pexaniacuai. Ponae pijinia pibisianaē, nacuita pibisiacuai. Caevirianaē canacujitsia yapētanetsi ita nacuita. ³⁴ Bajara pijinia pacuenia paxamē ata dovathi papijajivimē, panayapētaneme paneajamatabēcuenebejejava. Nexata apo pacacaējēpae panecuaicuajainexa pexaniacuene yabara. Pajamatabēcuene bēpēnēa panejamatabēēthētota panajamatabēxainame, panecuibovojojotuatsina pitsapa panecuaicuajainexa. ³⁵ Itsamonae pijinia majamatabēcueneitsije. Pacuenia vajaubinaē, pexanianaē, pexaniacuai pijinia nacuita, bajara pijinia jamatabēcueneitsi itsamonae. Ponē pexaniajamatabēcuenenē, pexaniacuene yabara cuaicuajai. Tsipaji pexaniajamatabēcuene xaina pejamatabēēthētota. Ponē pijinia pibisiajamatabēcuenenē pibisiacuene yabara cuaicuajai. Tsipaji pibisiajamatabēcuene najamatabēxaina pejamatabēēthētota. ³⁶ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, caejivi canacujitsia, naneconitsiaexanaponaena caejumeyo canacujitsia pibisiacuena pecuaicuajaijava yabara. ³⁷ Pibisiacuena panecuaicuajaijava yabara Dioso pacananeconitsiaexanaena. Pexanialivaisi ita pacuaicuajamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

Pacuenia pibisiajamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi

(Mr 8.12; Lc 11.29-32)

³⁸ Fariseovi, judíovi pecujarubivi ata, jumaitsi Jesúsjavabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacuene Dioso athēbēvetsica pecaitorobinēcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejume-covēnētsijavami panecopabivi. Paneitorobame picani Dioso pesaēta pinijicuene taexanaejava patacatsitaexanaenexa pataneyapētaenexamē Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava pacatsitajētsianatsi. ⁴⁰ Bajayata Jonáspijinē boca ayainē dujuainē pēnēta acueyabi pamatacabibeje, acueyabi pameravibeje yajava. Bajara pijinia pacuenia xanē ata,

Daxitajivi Pematapijinënë, bocaenajë mëthëta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuenepënëyorota Diosojavabelia. Copiapatsiana rabaja Dioso papecananeconitsia exanaematacabinea daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovënëtsivi. Xanë majotaje ponaponajë, bitso ayaijamatabëcuenenënë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimënuu pibisiacuene paneexanaejavavecua. Bajaraxuata ayaineconi paxainame Diosojavabelia. ⁴² Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaneconitsinexa Dioso apo panejumecovënëtsivi. Bajarapova pacaneconitsiana. Tsipaji bajayata bajarapovami tajë nacuataverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayaijamatabëcuenenënë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimënuu. Bajaraxuata Dioso pacananeconitsiaexanaena, jai Jesús tajëvelia fariseovijavabelia, judíovi pecujarubivijavabelia ata.

Pacuenia dovathi jivitonë pevejamatabëpitsapaecuajinaetsi, icatsia naviarena pecovëyaberena petsijamatabëecaenexatsi icatsia yabara pelivaisi

(Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjoneenexa penacueraevetsinexa bajaraponëjavata. Itsa apo caxitajarabi ponëjavabelia tsijamatabëjonejitsia, nexata dovathi jamatabëjumaitsi: ⁴⁴ “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjoneenexatsi. Dovathi baja caevëa itsa naviarena, caxitajaraba peyjavaponaponaenëmitsi.

Nexata peyjavaponaponaenëmitsi pejamatabëethëto, dovathi tane bepënësajinecaebo, bepënëxaniavaetetsibo, bepiracajuetetsibo. ⁴⁵ Nexata dovathi icatsia sivapona peyjavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë ita tsijamatabëcatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaë aeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi

(Mr 3.31-35; Lc 8.19-21)

⁴⁶ Jesús abaxë jivi livaisi ita tsipaeba bo ënëtuatuajëalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabëbarëcuaicuaijaitsi picani Jesús. ⁴⁷ Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamonae pina jitsipa pecabarëcuaicuaijajava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijivinua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamonaë taenajivije, tajuyapijivinua.

⁵⁰ Tsipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinë pelivaisicuenia yabara pelivaisi

(Mr 4.1-9; Lc 8.4-8)

¹ Jesús baja ita najumevereta jivijavabelia livaisi petsipaebijava, pitsapa baja bajarapabovecua. Pona baja itsjavabelia. Nexata Jesús ecojopa pucaxaneto itapata. ² Nexata pucaitapata jivi ayaibitsaëtoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelia. ³ Nexata Jesús daxitacuene livaisianë tsipaeba jivijavabelia. Jesús jumaitsonae bajarapamonaejavabelia mapacueniaje:

—Peubinē pona pabiabelia peubinexa. ⁴ Nexata itsa pata pabita, peubixu pexucayabajarabicuenia ubanajetaruca. Pexucayabajarabijavata itsaxu othopa pabi tuatujējava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananējumata, itsajota bitso ira apo aitayaē. Nexata bajarapaxu bepījia juva. Tsipaji bitso ira apo aitayaē. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepireca. ⁷ Itsaxu pijinia othopa xanēebacabomijavata. Nexata peubixu xanēebotonē caecuenia itsa yajavajuva, bitso xanēebotonē matakēnēnatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsia nacuita. Itsabotonē capitsapa cien paxutoyobeje tsaponae. Itsabotonē capitsapa sesenta paxutoyobeje tsaponae. Itsabotonē capitsapa treinta paxutoyobeje tsaponae. ⁹ Pajivi jamatabēnejumeyapētane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuene yabara Jesús jivijavabelia livaisi tsipaeba
ëcomparacióncuenia yabara pelivaisi
(Mr 4.10-12; Lc 8.9-10)*

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenē, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamē rabaja xaniavaetsia Dioso pacayapētaeyaexana Dioso papijajivimē papecaevetsijava. Itsiata itsamonae apo yapētae bajarapacuene. ¹² Pajivi xaniavaetsia nejumeyapētane tatsipaebilivaisi, bajarapajivi icatsia itsalivaisi pematatsēnēa Dioso yapētaeyaexanaenatsi. Itsiata pajivi apo jitsipae pematatsēnēa pejumeyapētaeponaenexa tatsipaebilivaisi, bajarapajivi xuayovajēto jumeyapētane picani, nacofēnētsiana. ¹³ Bajaraxuata livaisi itsa tsipaebajē bajarapamonae, ëcomparacióncuenia tsipaebajē. Nexata bajarapamonae tae ata Dioso pesaēta pinijicuene taexanaejava, itsiata apo yapētae pajamatabēcuene yabara exanajē pinijicuene taexanaejava. Namuxunaevetsi ata tatsipaebilivaisi, itsiata apo jumeyapētae pajamatabēcuene xaina tatsipaebilivaisi. ¹⁴ Bajarapacuenia apo jumeyapētae tsipaji jane baja tocopiapatatsi pacuenia bajayata tajēvelia Diosojumepaebinēmi profeta Isaíaspijinē yaquina. Dioso pejumaitsiyava apo

tanejumeypätaevinexa yabara, bajayata profeta Isaíaspijinē peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeypätae tsane xua yabara tsipaebiansi. Bajarapamonae taena picani. Itsiata apo yapätae tsane pajamatabëcuene xaina petaejava.
¹⁵ Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapätaejitsipa pajamatabëcuene xaina xua taena. Jumeypätaejitsipania palivaisi jumetaena. Pejamatabëthëtojavavetsina jumeypätaejitsipa. Nexata xanëjavaberena najamatabëcuenepënëyorotsipa perujumatabëcuenevecua. Nexata xanë jamatabëcuene xanepanaeyaexanaejitsipajë,

jai bajayata tajëvelia Isaíaspijinē peyaquinaelivaisita xua yabara tsipaebajë bajarapamonae apo tanejumeypätaejavanexa yabara.

¹⁶ Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeypätanemenua pajamatabëcuene xaina palivaisi pajumetaneme.

¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

Pacuenia Jesús yapätaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi

(Mr 4.13-20; Lc 8.11-15)

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere panejumeypätaenexa pajamatabëcuene xaina palivaisi pacatsipaebatsi pabita peubinë pelivaisicuenia. ¹⁹ Pamonaevi jumetae ata Dioso pejumelivaisi, itsiata itsa apo jumeypätae pejamatabëthëtota, bajarapamonae bepiothopaexu pabi tuatuajëjava penajetarucaenamutojumata. Nexata

najetaruca dovathi. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ²⁰ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ²¹ Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtanapae. ²² Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicueene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuajëa piabejjava juva yabara pelivaisi

²⁴ Dioso apo pejumecovënëtsivi, pamonaë najinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibit-saëtoxanetojavabelia. Jesús jumaitsi mapacueniaje:

—Mara pacuene jēpaje Dioso pijajivi pevetsijavaje. Pabi pexainaenē, ēpexaniaviriatrigoxu uba pijapabita. ²⁵ Itsiata baitsi jane daxitajivi pemajitsijavata meravi, pabi pexainaenē pijavajabitsaenē tojunuatsi pijapabita. Nexata toubatsi trigo tuatuajējāva pibisiaviriajava, betrigobotonē pecataejāva. Bajaraxuacujinae vemaxēpona baja. ²⁶ Nexata trigoxu juva. Vitsaba. Itsa baja trigobotonē namatonota, nexata matapania bajarajota nayapētane pibisiaviriajava yajava penamatonotsijava. ²⁷ Nexata pabi pexainaenē pijajivi pata petsipaebinxatsi. Pabixainaenē pijajivi jumaitsi: “Nijapabita ubame ēpexaniaviriatrigoxu. ¿De tsaeta pacuenia pitsapa pibisiaviriaxu pibisiajava peyajavajuvinxaxa trigoxa?” jai pabixainaenē pijajivi. ²⁸ Nexata pabixainaenē jumaitsi pijajivijavabelia: “Tajavajabitsaenē raeta bajaraxua uba,” jai. Nexata pabixainaenē pijajivi jumaitsi: “¿Jitsipame tsaja bajaraxua pataxunaejava?” jai. ²⁹ Itsiata baitsi jane pabixainaenē jumaitsi pijajivijavabelia: “Jume. Tsi-paji panexunaejavata payajavaxunaejitsipame trigobotonē. ³⁰ Copatsianatsi abaxē penacuaitsinxaxa. Nexata penotsimat-acabi itorobianajē tanetonotsivi copiaya pecaetuatsinxaxa piabejējava. Pepacunuanē exanaena. Bajaraxuacujinae bajaraxua tajuitsiana. Bajaraxuacujinae ētrigoxu netonotsiana taetabiabibota tanetoetsinxaxa,” jai pabixainaenē pijajivijavabelia, jai Jesús jivi ayaibitsaētoxfanetojavabelia.

Pacuenia mostazaxutoyo pejuvicujinae, mostazanae bepījia vitsaba yabara pelivaisi

(Mr 4.30-32; Lc 13.18-19)

³¹ Jesús livaisi tsipaeba comparacióncuenia jivi ayaibitsaētoxfanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepījia vitsaba mostazanae, bajara pijinia itsane Dioso pijajivi ata. Bepījia Dioso pijajivi ayaibitsaētoxfaneto naexanaena. Pabi pexainaenē mostazaxu uba pijapabita. ³² Mostazaxu raja bitso tsiquirixutoxi daxita peubixuveca. Itsiata baitsi jane mostazanae itsa juva, bepījia vitsaba. Caevaita pinijinae naexana itsapeubinaenē matatoxenetsia. Nexata baratsui ata pata bajaraponaeta. Pematapenanē exana bajaraponaemaxērananējāva. Bajara pijinia itsane jivi ata. Bepījia ayaibitsaēto Dioso pijajivi naexanaena, jai Jesús jivi ayaibitsaētoxfanetojavabelia.

Pacuenia pan pexanaematabēnexa, levaduravēnējāva fufu-naeyaexana yabara pelivaisi

(Lc 13.20-21)

³³ Jesús livaisi tsipaeba comparacióncuenia jivi ayaibitsaētoxfanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia pan pexanaematabēnexa, levaduravēnējāva yacaējēpa daxita panmatabējāva, bajara pijinia itsi Dioso pijajivi pevetsijava. Yacaējēpaena daxitanacuanējāva. Petiriva pan pexanaenexa, acueyabi patarroxanetobeje trigobenonē matajērēaba levaduravēnējāvata. Nexata pan pexanaematabēnexa, ayaimatabē ata, levaduravēnējāva pijinia tsiquirijavayo ata, itsiata levaduravēnējāva yacaējēpa daxitamatabējāva. Nexata levaduravēnējāva fufunaeyaexana daxita panmatabēnexa. Bajara pijinia itsi Dioso pijajivi pevetsijava. Yacaējēpa daxitanacuanējāva Dioso pijajivi pevetsicuene, jai Jesús jivi ayaibitsaētoxfanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianē tsipaebapona ěcomparacióncuenia. ³⁵ Bजारapacuenia Jesús jivi livaisianē itsa tsipaebapona ěcomparacióncuenia, tocopiapatatsi jane baja pacuenia Diosojumepaebinē profetanē bajayata tajēvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanē peyaquinaebaxutota jumaitsi mapacueniaje:

Jivi itsa tsipaebajē, livaisi tsipaebianajē comparacióncuenia. Tsipaebianajē pitsicuene Dioso nacua pexanaejavaveliacujinae itsajivi ata abaxē apo yapētae, jai tajēvelia bajayata profetanē peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapētaeyaexana pajamatabēcuene xaina palivaisi tsipaeba trigobotonē tuatuajēa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaētoxfaneto. Bजारaxucujinae Jesús boya joneya. Bजारapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenē, panetsipaebare pajamatabēcuene xaina palivaisi tsipaebame jivi ayaibitsaētoxfanetojavabelia. Baitsi palivaisi tsipaebame trigobotonē tuatuajēa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponē uba pexaniaviriatrigoxu,” itsa janē, xanē rabaja, Daxitajivi Pematapijinēnē, yabara nayabarajumaitsinē. ³⁸ “Pijapabi,” itsa janē, mapanacua yabaraje jumaitsinē. “Pexaniaviriatrigoxu,” itsa janē, Dioso pijanacuayabetsia pejonevinexa yabara jumaitsinē. “Pibisiaviriajava pejuvijava,” itsa janē, dovathi pijajivinexa yabara

jumaitsinē. ³⁹ “Pijavajabitsaēnē, ponē pabi pexainaenē toubatsi pibisiaviriajava pejuvinexa,” itsa janē, dovathi yabara jumaitsinē. “Penotsimatacabi,” itsa janē, mapanacua pevereverecejavanexa yabara jumaitsinē. “Tanetonotsivi itorobianajē,” itsa janē, ángelevi yabara jumaitsinē. ⁴⁰ Nexata pacuenia piabejajava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaaje pevereverecaematacabi. ⁴¹ Bajarapamatacabi xanē, Daxitajivi Pematapijinēnē, itorobianajē tajaángelevi taevetsinacua tanetovecuajutsinexa daxita pamonaē pibisiacuene pexanabiabivi. Pamonaē ata itsamonaējavabelia pibisiacuene exanaeyaexana, bajara-pamonaē ata taevetsinacua netovecuajutsiana tajaángelevi. ⁴² Bajarapamonaē xuabianatsi infernojavabelia. Bajarajota nuena. Navonosiniana bitso penavixaetaexae. ⁴³ Pamonaē jumecovēnētsiajinavanapa Dioso pitorobicueniatsi, bajarapamonaē perabēnaitayotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabēnaitayotsiana. Pajivi jamatabēnejumeyapētane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanē, it-sanē irata pemēthētetsijavami, yabara pelivaisi

⁴⁴ Icatsia Jesús comparacióncuenia jumaitsi pijajivijavabelia:

—Pebi irata mēthēteta bitso penamatamotsijavanē. Bajaraxuanē bitso xanepana. Nexata juya itsanē bexējavabelia bajaraxuanē caxitajarabeta irata. Nexata abaxē bajaraponē apo jutsi bajaraxua. Abaxē saya mataacateta bajarajota. Nexata jamatabēcuenebarēyaya pona pijaboyabelia. Nexata xuacujinae bajaraponē canajeta daxita pexainaejavaximi. Nexata bajaraponē yacomuata bajarapaira. Tsipaji xua bajaraponē caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotana, xuanē bajaraponē bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotana, jai Jesús pijajivijavabelia.

Perlavēnējava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavēnējava, bajara pijinia itsi Dioso pijajivi pevetsijava, bitso pexaniacuene.

Perlavënëjavanë pecanajetarutsinë jaitapona pexaniavirijavanë juya pecanajetaponaenexa. ⁴⁶ Nexata itsa caxitarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexainajavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. ⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pexapanepaenexatsi. ⁵⁰ Nexata pibisiacuene pexanaevi xuabianatsi infernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomara-belia, yabara pelivaisi

(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacaetuatabiabibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjëpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxait-siyajuvënënë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatomarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsiabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jume-covënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

14

Pacuenia Juanpijinë jivibautisabinëmi beyaxuabatsi yabara pelivaisi

(Mr 6.14-29; Lc 9.7-9)

¹ Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi

pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ⁴ Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cjunava jivi. Daxitajivi Juanpijinë yapëtanetsi Diosojumepaebinëcuene. ⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejionëyo, pijava pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëitajitsipa peyavajibijava pejionëyo. ⁷ Nexata Herodes najumecapanepaeya pexaniajaijumeta jumaitsi pejionëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejionëyo itsa jumaitsitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejionëyojavabelia pexaniajaijumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë. ¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodíasva yapëthane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinxaxa Juanpijinë pebeyaxuabijavatsi.

Pacuenia Jesús pexaejava rajuta cinco mil ponëbeje yabara pelivaisi

(Mr 6.30-44; Lc 9.10-17; Jn 6.1-14)

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëttoxaneto yapëtane itsabelia Jesús pona. Nexata pijatomaranë vecuapona. Matatsënëa najetarubena pepëjaitshivitsi Jesús. ¹⁴ Itsa Jesús nonotajuna jeravecua, tane jivibitsaëttoxaneto. Nexata Jesús itaxutobejio-
biatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberenahe, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje be-
mapirecuenia pexanaejavanë. ²¹ Pamonahe pexaejava xane, ayaibitsaëttoxaneto. Cinco mil ponëbeje namataëjëtsatsi xaniavaetsia. Petiriavi, pejevaxi ata, apo namataëjëtsitsi.

Pacuenia Jesús mene itaboxoya najetaruca yabara pelivaisi
(Mr 6.45-52; Jn 6.16-21)

²² Jesús jivi ayaibitsaëttoxaneto pexaejava perajutsicujinae, Jesús pijajivi bepiglia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia,

Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanjetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya najetarucajava, nabenjaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia. ³⁰ Itsiata baitsi jane Pedro itsa tane jovibo piasaëjava, bitso cujunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtamë tacaevetsijava. ¿Detsa xuajitsia nejumeabiataneme? jai Jesús.

³² Nexata baja Jesúsbeje Pedrobeje jera ënëabelia itsa nonoliabeje, joviboxanetomi baja ajibi tsaxuabi. ³³ Nexata daxita jerata peponaevi pematatabacabëta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi

(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi itsa yapëtanetsi Jesúsucuenë, nexata daxita bajarapanacuajava vajunupabatsi pepatsijava. Nexata tocapatatsi daxita piavitanevi

Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponêje pecatojayatsinexa nenaxatatsijavacopia, jai tsabiabi.

Nexata daxita pamonae Jesús penaxatatsijavacopia tojay-
ataponatsi, jamatejema tsaponae piavitanejavavecua.

15

*Pacuenia Jesús tsipaeba xua jivi jamatabëcuenebijanatsi
yabara pelivaisi*

(Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bजारapamonae Jesús imoxoyorenatsi. Nexata bajarapamonae jumaitsi Jesúsjavabelia:

² —Jesús, nijajivi naneconita Diosojavabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane paxamë jivi pamuxubijiapeneta biabame peyaiyataeyaniva paxajivi, penajivi ata. Paxamë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeayaniva,” pajamë tsabiabi jivijavabelia. ⁶ Nexata caranata Dioso pejumaitsi jume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëtojobivi! Dioso jumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsi jiva paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁹ Saya baitsi bajarapamonae pijajumaitsita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Isaiaspijinë

peyaquinaelivaisita Dioso pejumaitsijava paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapëtaenexamë patacatsipaebilivaisi. ¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabëcuenebijianatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetojavareca. Pabita piabejjava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipaebame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

¹⁶ Nexata Jesús jumaitsi:

—¿Paxamë ata tsarovia abaxë apo panejumeyapëtaemë? ¹⁷ Daxitacuene xua jivi xane pecuibovojotota, junua pecotsorotuabereca. Bajaraxuacujinae vecuapitsapatsi.

¹⁸ Baitsi rajane xua jivi pecuibuatsina pitsapa pecuaicuaijainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijianatsi. ¹⁹ Tsipaji

rabaja jivi pejamatabëethëtojavavetsina pitsapa pibisiacuene penajamatabëxainaenexa. Pitsapa jivi pebeyaxuabijamatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa penacobetoxotsi-jamatabëcuenenexa. Pitsapa itsamonae pexanaejava yabara najumetsënëtsiaya pepaebijamatabëcuenenexa. Pitsapa itsamonae yabara najumetsënëtsiaya pebaracuaicuaijai jamatabëcuenenexa. Daxita bajarapajamatabëcuene pitsapa jivi pejamatabëethëtojavavetsina. ²⁰ Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemaaxana yabara pelivaisi
(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Piniijumeta bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxutotsoni-ataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonae Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematatabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaejitsipatsi, nexata pacuenia pejevaxi pexaejavaminexa

yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajara-pacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

Pacuenia Jesús jamatejemayaexana ayaibitsaëtoخانeto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa. ³⁰ Nexata jivi ayaibitsaëtoخانeto pata Jesúsjavaberena. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaivi. Tocapatatsinua penabejenaevi. Tocapatatsinua ayaibitsaëtoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae. ³¹ Nexata jivi jamatabëcuenenabenajaca itsa tane pecuaicuaijajava apo pecuaicuaijaivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacuenë, jumaitsi Diosojavabelia: “Diosomë, bitso ayaijamatabëcuenenëmë, paIsrael nacuapijivinë patajaDiosomë,” jai bajarapamonae.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi

(Mr 8.1-10)

³² Jesús jivi ayaibitsaëtoخانeto pënajinavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi pijajani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibitsaëtoxanetoje? Majotaje ajibi pexaejava. Tsipaji it-sajivi ata pijabo apo xainae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata.

³⁶ Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bजारखुअकुजिनाए जेसूस एपसिकाकापुना पान, दुजुअिनैखी यजवा. नेखाता जेसूस पेपसिकाकाएपान राजुता पीजजिवीजवअबेली. नेखाता जुया जेसूस पीजजिवी त्सिकोबेत्सना बजारापजिवी बिताएतोखानेजवअबेली. ³⁷ डखिता बजारापामुनाए नअबने खानिआवैत्सी. नेखाता पेयजुवेंनैकोपअीजवनै जेसूस पीजजिवी काएतुआ. वेंनैबा सैते खुअबेजे बेमअपिरेकुएनी पेखानैजवनै.

³⁸ पामुनाए पेखैजवा खाने, अयाबिबिआतोखाने. कुअतु मील पुनैबेजे नअमताऐजैतसि खानिआवैत्सी. पेतिरिअवी, पेजेवखी आ, अपु नअमताऐजैत्सि. ³⁹ पेखाकुजिनाए पेखैजवा, जेसूस बजानविअबियाखाना जीव. नेखाता जेसूस रुनारेका जेरा ऐनैअबेरेका. पुना बजाना मगदाला नअकुयअबेली.

16

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonae Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bजारापकुएनी पिकनी जेसूस इतरोबत्सि पेयपैताएनेखत्सि डियो पेपकुएने अथैबैवैत्सिका पितरोबिनैकुएनेत्सिस्सिका.

² Nexata Jesús jumaitsi bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tsipaji itaboxo tsobia,” pajamë tsabiabi. ³ Pamatacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayaijitsia daxita matacabi. Tsipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tsipaji itarërëbo pepitsapaexae, payapëtaeyabiabame. Itsiata baitsi

jane patae atamē Juan jivibautisabinēmi pexanaponaejava, xanē ata taexanaponaejava patae atamē, itsiata apo payapētaemē Dioso athēbēvetsica taneitorobinēcuenetsica. ⁴ Bitso pibisiajamatabēcuenē xaina pamonae copaba Dioso pejumecovēnētsijavami. Bajarapamonae picani nitoroba Dioso pesaēta pinijicuenē taexanaejava tatsitaexanaenēna tanyapētaenēna pepacuenē Dioso athēbēvetsica taneitorobinēcuenetsica. Itsiata baitsi jane Dioso pesaēta pinijicuenē taexanaejava, apo tsitaexanaenē tsane. Pacuenia bajayata Diosojumepaebinē profeta Jonáspijinē exanatsi, bajara ēpitsicuenē taneexanaejava, tsitajētsianajē, jai Jesús petēpaecujinae icatsia Dioso piasaēyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaebilivaisi pejumecovēnētsianiva yabara pelivaisi

(Mr 8.14-21)

⁵ Jesús pijajivi nicabilia puca itsapanabelia. Nexata nacofēnēta pamarue. Apo caponae pan. ⁶ Nexata Jesús pijajivi muxujioba pejumecovēnētsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovēnētsianiva. ⁷ Itsiata Jesús pijajivi apo jumeyapētaetsi. Bajaraxuata Jesús pijajivi nabarēcuaijai bajarapacuenia Jesús pejumajitsijume yabara. Jesús pijajivi jamatabēcuenenavēxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponae, najai Jesús pijajivi jamatabēcuenenavēxaniabiaya.

⁸ Jesús pijajivi jamatabēcueneyapētane bajarapacuenia jamatabēcuenenavēxaniabiaya pejumajitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimē: “Baja raeta pacuenia Jesús nacajumaitsi pan apo vajacaponae,” panajamē? ¡Apo payapētaemē tsipaji tanecaējēpaejava taexanaenēna pan itsa namatavenonatsi! ⁹ Paxamē abaxē apo panejumeyapētaemē. ¿Apo panajamatabēnapitsimē tsipaji pacuenia exanajē pamatacabi pan namatavenonatsi? Tsicobetsanajē cinco papanbēmibeje cinco mil

ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë?
 10 ¿Apo panajamatabënapitsimënuua tsipaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanë bemapirecuenia pexanaejavanë?
 11 Itsa pacajumaitsitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsitsi, jai Jesús pijajivijavabelia.

12 Nexata jane baja Jesús pijajivi xaniavaetsia jumeyapëtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

*Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi
 (Mr 8.27-30; Lc 9.18-21)*

13 Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

14 Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënënë icatsia asaë,” jai tsabiabi itsamonae xamë yabara, jai Jesús pijajivi.

15 Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

16 Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

17 Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbëtatsia peecaenë, cayapëtaeyaexana. ¹⁸ Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenematatoxenetsitsi tsane. ¹⁹ Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuapijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebiyaniwa itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

Pacuenia Jesús tajëvelia navajunupaeba pebeyaxuabijavanexatsi yabara pelivaisi
(Mr 8.31–9.1; Lc 9.22–27)

²¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matababita, icatsia asaënë tsane, jai Jesús tajëvelia pijajivijavabelia.

²² Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

²³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Nejamatabëcuenejëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaitsi pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiabijavami. Exanaponaponae taitorobicuenia. Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponae nexa. Nexata jane baja xuacujinae nepënaponae.²⁵ Pajivi exanaponapona penatojitsipaecuenia, apo xainae tsane matabi apo peverevecejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matabi apo peverevecejava.²⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xinae ata, mapanacuapijicueneye, itsiata nacuerata. Tsipaji pexinaecueneye apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyani Diosovecua.²⁷ Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënu tajaängelevi. Nexata matamotaponaenajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexinaeivi.²⁸ Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaibitsaëtoxaneto naexanaena. Nexata paxamëyajuvënëvi pepuatae tsane xanë tajajivi ayaibitsaëtoxaneto taevetsijava, tēpaena, jai Jesús pijajivijavabelia.

17

Pacuenia Jesús caeepatoyo perabënivenivenataba yabara pelivaisi

(Mr 9.2-13; Lc 9.28-36)

¹ Jesús petëpaejavanexa tajëvelia penavajunupaebicujinae, seis pamatabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan.² Nexata petsutojumatsia Jesús perabënivenivenareca bajarapamonae pitabarata. Pacuenia matabipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai.³ Nexata bajarajota Jesús pijajivi tane bajayata petëpaenëmibeje, Moiséspijinëbeje Eliáspijinëbeje. Jesús barëcuacuajitsi bajaraponëbeje.⁴ Nexata Pedro jumaiti Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁵ Itsa abaxë Pedro cuaicuajai tsanuca, penaitayotsi-itarërëbo mataacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Dioso pejumaitisijava: “Mara ponë taxënato, tasivanëje. Bitso siva-jamatabëcuenebarëyanë. Pajumetaema bajaraponë,” pejajjavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumaitisijavatsica, irataeya othopa irata. Jesús pijajivi bitso najunaviaca. ⁷ Nexata Jesús imoxoyolia pijajivi. Jayalia. Jumaitsi pijajivijavabelia:

—Panobapunare. Pëtsa pajunavame, jai Jesús pijajivijavabelia.

⁸ Nexata Jesús pijajivi itsa naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

¹¹ Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Xaniajai rabaja pacuenia judíovi pecujarubivi jumaitsi. ¹² Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

¹³ Nexata Jesús pijajivi jumeyapëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mr 9.14-29; Lc 9.37-43)

¹⁴ Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yaiyataeya pematabacabëta nucajunua Jesús pitabarata. Bajaraponë jumaitsi Jesúsjavabelia:

¹⁵ —Jesús, netoitaxutotsoniataema taxënatonëyo. Netodevacaiababatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia. ¹⁶ Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

¹⁷ Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaenë tsaponaponaë tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

¹⁸ Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

¹⁹ Bajaraxuacujinae Jesús pijajivi barëcuaicuaijaiti pijaepatojavata. Jesús pijajivi jumaitsi:

—Patajatuxanenë, ¿detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

²⁰ Nexata Jesús jumaitsi pijajivijavabelia:

—Apo pacacaëjëpae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjëpaejitsipa Dioso pesaëta pinijicuene paneexanaenexa. Nexata itsa pajumaitsimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsipae itsa

pepacuene xaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaPONAME dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxu-abijavanexatsi yabara pelivaisi
(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. ²³ Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaejava petëpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobiabiaba templobo pevetsivijavabelia? jaitsi.

²⁵ Pedro nexata jumaitsi:

—Jãjã. Matamotabiaba cajena, jai.

Nexata Pedro joneya Jesús peecaeboyalialia. Nexata Pedro pejonejavatalialia Jesús peecaeboyalialia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaevetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevetsivi pijajivi yanijobabiaba impuestomatamo? ¿Nacuaevetsivi tsaja pijamonaejavabelia? Itsa jume, ¿saicayavijavabelia tsaja, nacuaevetsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevetsivi raja pijajivi impuestomatamo yanijoba-biaba saicayavijavabelia, nacuaevetsivi pevetsinacuata pe-jinavanapaevijavabelia. Apo yanijobabiabi nacuaevetsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevetsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevetsivijavabelia taxa Dioso pijatemploboxae.
 27 Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia. Ejëbianame culupabota. Padu-juainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota cajëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënënë panevecuaayaijamatabëcuenenë?” jai Jesúsjavabelia yabara pelivaisi

(Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuai-jaijava impuesto yabara, daxita Jesús pijajivi imoxoyore-natsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënënë bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuatuajëta nuteta pejevaxinëyo. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Ma-papejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë itsa apo panajamatabëcuenepënëyorotsimë tsane perujumatabëcuenecua beveliajamatabëcueneni panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabet-sia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije. ⁵ Pajivi copiapita tanejumecovënëtsijiviyo, mapitsijamatabëcuenejiviyoje,

bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniwa Diosojavabelia pibisiacuene itsa exanaeyaexana tanejumecovënëtsiviyajuvënëvi. ⁷ ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bajaraxuata panecobeta, panetaxuta ata, pibisiacuene itsa paexaname, panacobecacure. Panataxucaucure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaesotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi

(Lc 15.3-7)

¹⁰ Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejexinëyo ataje,

tanejumecovënëtsijiviyo. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjère mapacueneje. Pebi xainaejitsipa cien ponëbeje oveja. Nexata itsa toyajuvënëanaxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. ¹³ Xaniajanë pacuenia pacatsipaebijitsiatsi. Bajaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. ¹⁴ Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi

(Lc 17.3)

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlvaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje. ¹⁶ Xaniavaetsia itsa apo pacabarëcuaicuaijai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujiobinexatsi. Nexata bajaraponëbeje pacajumetaena xaniavaetsia panabarëcuaicuaijajava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. ¹⁷ Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujiobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bajaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename

Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtamebeje. ²⁰ Tspaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinë. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponë apo jitsipae pebarajamatabëcuenexanepanaenexa itsanëjavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaeavetsinë pijajivijavabelia baexana. Nacuaeavetsinë jitsipa piamoneyabivitsi pematamotsinexatsi

xua amoneyabatsi. ²⁴ Nexata itoroba pijajivi petot-sipaebaponaenexatsi daxita pamonaе amoneyabatsi. Nexata pijajivi tobarëparenatsi ponë bitso ayaijava amoneyabatsi, baitsi millones de pesos piamoneyabinëtsi. ²⁵ Nexata bajaraponë apo xainae pematamotsijavanexatsi. Nexata nacuaevetsinë itoroba pijajivi. Jumaitsi: “Mara ponë bitso ayaijava niamoneyabaje. Nexata pacanajetaxuabianame dajubicuenia itsamonaеjavabelia amoneya petonacuenebaponaenexa daxitamatacabi-javabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamamoto,” jai nacuaevetsinë pijajivijavabelia. ²⁶ Nexata ponë amoneyaba, nacuaevetsinë pitabarata pematabacabëta nucajunua. Pinijicuenia vajëta nacuaevetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevetsinë itaxutotsoniatane piamoneyabinëtsi. Nexata nacuaevetsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevetsinë piamoneyabinëtsijavabelia. Bajaraxuacujinae copata baja penaviatsinexa. ²⁸ Nexata bajaraponë penaviatsinexa, ajena pitsapalia nacuaevetsinë pijabovëcua, caxitajarabaxuaba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai. ²⁹ Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponë piamoneyabinëtsi apo itaxutotsoniatæ. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹ Nexata nacuaevetsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamonaе bitso najamatabëxaina. Nexata nacuaevetsinë pijajivi ponalia petsipaebinexa bajaraxua pijatuxanenëjavabelia. ³² Nexata nacuaevetsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi, nacuaevetsinë jumaitsi bajaraponëjavabelia:

“Niajamatabëcuenebejenë baja rovia. Catoiquinatsi rabaja picani taneamoneyabijavamë. Tshipaji pinijicuenia nevajëtame. ³³Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaeavetsinë. ³⁴Nexata nacuaeavetsinë bitso baraanaepana millones de pesos piamoneyabinëtsijavabelia. Nexata nacuaeavetsinë jumaitsi pijajivijavabelia: “Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaeavetsinë, jai Jesús pijajivijavabelia.

³⁵Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbëtatsia peecaenë, pacaexanaena, itsa apo pajamatabëcaevimë tsane panebarajamatabëcuene xanepanaenexa pamonaë pacait-sacueniaba, jai Jesús pijajivijavabelia.

19

Pacuenia Jesús jivi livaisi tsipaeba penacojobinë pijava pexuabiyaniya yabara pelivaisi
(Mr 10.1-12; Lc 16.18)

¹Jesús pijajivi pemuxujiobicujinae pebarajamatabëcuene xanepanaenexa itsamonae itsacueniabi atatsi, Jesús baja pona Galilea nacuavecua. Jesús nexata pata Judea nacua-yabelia, Jordánmene itsapanabelia. ²Jivi ayaibitsaëttoxaneto pënaponatsi. Bajarajotalia Jesús jamatejemayaexana piavitanevi.

³Nexata fariseovi Jesús imoxoyorenatsi. Jamatabëcueneëjëbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa it-sacueneyavayo ata yabara? jai fariseovi.

⁴Jesús nexata jumaitsi fariseovijavabelia:

—¿Apo palebimë tshipaji paneyapëtaenexa pacuenia Dioso pejumelivaisibaxutota jumaitsi? Pamatacabi Dioso taxuxu-aba nacua pexanaejava, bajarapamatacabi Dioso exana pebi, pijava yajava. ⁵Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota.

⁶Nexata Dioso apo tae beanijajivibeje. Becaejivi saya tane

Dioso. Bajaraxuata itsanë ata apo bexuabi pijava. Tsi-paji Dioso pejamatabëcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinë copata penaco-jobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabëcuenetajaxae, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë itsa nacojioba icatsia itsavajavabelia, bajaraponë pibisiacuene exana pevitota. Tsi-paji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsi-paji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamona Dioso jamatabëcueneyavenonatsi. ¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuene caëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi

(Mr 10.13-16; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponaenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta

pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

14 Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajaran pijinia pacuenia jumeaebinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

15 Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapañacuavecuа.

Pacuenia pevëjëato, bitso pexainaenë, cuaicuaijai Jesúsjavabelia yabara pelivaisi
(Mr 10.17-31; Lc 18.18-30)

16 Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa maticabi apo peverevereцаejava? jai pevëjëato.

17 Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa maticabi apo peverevereцаejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

18 Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecuа. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. 19 Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

20 Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

21 Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobet-sanaename bepejiobivi. Nexata bajarapacuenia xainaename bitso nexainaejava Dioso pijanacuatatsia. Bajaraxuacujinae nepënaponaname, jai Jesús pevejëatojavabelia.

²² Nexata pevejëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevejëato daxitacuene bitso pexainaenë. Nexata pevejëato apo jamatabëjumecovënëtsi palivaisi Jesús tsipaeba.

²³ Nexata pevejëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë, tsiayapëbejetsi bitso penajamatabëcuenecopatsinexa Diosojavabelia peca-panepaenexatsi Dioso pijanacuayabetsia. ²⁴ Icatsia matavëjëa pacajumaitsi. Pacuenia camello acuenebi pejonejava palutaetoitaxutovojojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi itsa jumetane bajarapacuenia Jesús pejumaitsi, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁶ Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatacabi paxamë ata, doce paponëmëbeje patanepënajinavanapaevimë, paenaename, pacaenëmë canacujitsia, panijatronota vajanajuaevetsinexa xua evetsianajë. Nexata paxamë paenaename jueznëcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijinëmi pexi, doce ponëmibeje, pemomoxi. ²⁹ Daxita

pamonae tajamatabëcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayaijava bitso pepuenetsijavanëmi matatoxenetsia. Caejavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua maticabi apo peverevereaejava. ³⁰ Pamonae aeconoxae mapamatacabitaje ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae itsamatacabi Dioso ayaijamatabëcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi

¹ Icatsia Jesús jumaiti pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatatsia, jëpa mapalivaisije. Pabixaneto pexainaenë ponapona. Ajena maticabi tsarucaponae, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jelai nexata bajarapamonae. Nexata itoroba pijapabiabelia petonacuenebinexatsi.

³ Bajaraxuacujinae juameto baja tajë itsa rucaina, a las nueve, naropota icatsia. Taenuba tomara tuatujëta pebijivi, saya jema pejinavanapaevi. ⁴ Nexata jumaiti bajarapamonaejavabelia: “Paxamë ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenë.

⁵ Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabëcuene a las tres, junata icatsia itsamonae. Bajarapamonae ata ponalia petonacuenebinexatsi. ⁶ Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatujëareca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaiti bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamë?” jai. ⁷ Nexata

bजारपामोनाे जुमात्सि: “त्सिपजि इत्सजिवि अता अपो पानेजुनात्सि पातानाकुनेबिनेखा,” जै. नेखाता पाबिखानाने जुमात्सि: “पाखामे अता पापोनारेमेला तजपाबिअबेली पातानाकुनेबिनेखामे. पाकामातमोत्सिअनात्सि राजा खानिआवैत्सि,” जै पाबिखानाने. नेखाता बजारपामोनाे जेजै. पोनाली पेताकुनेबिनेखात्सि. ⁸ नेखाता बजा जुअमेटो इत्सा ताबुजुनीया, पाबिखानाने जुमात्सि पिजजिवितोनेजवअबेली: “जुनारे बजा तानेताकुनेबिवि. मातामोबारे बजा. कोपिया मातामोबारे पामोनाे पेपाकोतोकाेवि पेजोनेवि. पामोनाे पेपाकोपिया पेजोनेवि कोतोकाेवि मातामोबिअनामे,” जै पाबिखानाने पिजजिवितोनेजवअबेली. ⁹ नेखाता पामोनाे पेपाकोतोकाेवि जुनुआ अ लस सिंको पेनाकुनेबिनेखा, पारना पैमातामोबिनेखात्सि. नेखाता काेने कानाकुजित्सिअ मातामोबत्सि काेदैनारिओ. ¹⁰ नेखाता दाखिता पामोनाे बाजायअकुनुआ पेपाकोपिया जुनुआ पेनाकुनेबिनेखा, पेपाकोतोकाेवि जुया पारना पैमातामोबिनेखात्सि. नेखाता बजारपामोनाे जामाताबेजुमात्सि: “काेदैनारिओ मेता पैमात्सैनेआ वखैत्सि नाकामातामोबिअना. त्सिपजि कोपिया वखैत्सि जुनुअत्सि वजानाकुनेबिनेखा,” जामाताबेजै बजारपामोनाे. इत्सिआ बात्सि जाने बजारपामोनाे अता, काेने कानाकुजित्सिअ, मातामोबत्सि काेदैनारिओ त्सापोनाे. ¹¹ नेखाता बजारपामोनाे पेनाकुनेबिमातामो बजा इत्सा नोता, बाराआेपाना पाबिखानानेजवअबेली. ¹² जुमात्सि बजारपामोनाे: “मापामोनाे कोतोकाेवि पेपात्सिवि, नाकुनेबा साया काेहोरा. पाखाने बजा रोविया अयािकुनिया पानाकुनेबाजे. इकोतिया दाखितामाताकअबि पानैत्सजआवा. इत्सिआ मापामोनाे मातामोबामे पाकुनिया पानेमातामोबामे,” जै बजारपामोनाे. ¹³ इत्सिआ बात्सि जाने पाबिखानाने जुमात्सि बाजारा पामोनाेयजुवेनेनेजवअबेली: “इत्साकुनेजवओ अता पिबिसिअकुने अपो पाकाेखानाैत्सि. पाताकाजुनात्सिजवअता पातानाकुनेबिनेखामे, काेदैनारिओ पाकात्सिपाेबत्सि पाताकामातमोत्सिअनेखा पातानाकुनेबिमातामोमे. नेखाता बजा बजारपाकुनिया पाकारजुत्सि. ¹⁴ पानिजामातामो बजा पापितामे. पापोनारे बजा पानिजबोनेजवअबेली. पामोनाे कोतोकाेवि जुनुआ तानेताकुनेबिनेखा, बजारपामोनाे अता मातामोबाजे पाकुनिया पाकामातामोबत्सि. बजारपाकुनिया मातामोबाजे पाकुनिया खाने जित्सिपाजे. ¹⁵ तजजपालाताखाे, नेतोखानेपाना पाकुनिया जित्सिपाजे ताराजुत्सिअनेखा. जेपाकोबेकाेबामे त्साजा बजारपामोनाे अयािजआ ताराजुत्सिअ? जै पाबिखानाने पेताकुनेबिवित्सि यजुवेनेनेजवअबेली. ¹⁶ बाजारा पिजिनीया पाकुनिया डियोसो अता, पाकुनिया जित्सिपा, खानाेना पिजजिविजवअबेली. पामोनाे मापानाकुआता अयािजामाताबेकुनेवि तानैत्सि, बजारपामोनाे इत्सामाताकअबि डियोसो बेवेलिजामाताबेकुनेवि खानाेनात्सि. पामोनाे पिजिनीया मापानाकुआता बेवेलिजामाताबेकुनेवि तानैत्सि,

bajrapamonaē itsamatacabi Dioso ayaijamatabēcuenevi exanaenatsi. Bajrapacuenia Dioso exanaena tsipaji picani jivi ayaibitsaēto xaneto Dioso junata. Itsiata bajrapamonaeyajuvēnēvi, caejiviyobeje saya, Dioso jumecovēnēta, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxu-abijavanexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaēto yajava, najetaruca namutua, itsamonaē yajava. Nexata bajrapamonaēvecua ēpijajivi, doce ponēbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajrajotalia xanē, Daxitajivi Pematapijinēnē, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanē neneconitsiana tanebeyaxuabinexa. ¹⁹ Bajraxuacujinae icatsia necanajetsiana itsanacuaverena pepatsivi pecobeyabelia. Bajrapamonaē necanecaponaena. Nejumatitibabena penaneconitsivi pejumaconitabiabimacata. Bajraxuacujinae cruzajavabelia necobematabiabarutsiana tatēpaenexa. Itsiata baitsi jane tanebeyaxuabicujinae, acueyabi matacabita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajēta Jesúsjavabelia pexaniacuene petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevēnē Zebedeo. Nexata bajaraponēbeje pena barēliatsibeje Jesúsjavabelia. Bajrapova pematatabacabēta nucajunua Jesús pitabarata. Vajēta pexaniacuene petoexanaenexatsi. ²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxēnatobeje nemuxuneneta penaecaenexabeje panenajuaevetsinexa. Itsanē tocopatsianame necujanenia peecaenexa. Itsanē tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejevavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaëjëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejibiaexanaenexa? ¿Pacacaëjëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsibeje:

—Jājā, panecaëjëpabeje cajena, jaibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabejibiaexanaenabeje pacuenia xanë nebejibiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamëbeje panenaecaenexabeje, itsanë tacujuanenia, itsanë tatsavenononia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonae jamatabëcuenebaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaë jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. ²⁶ Pëtsa paxamë bajarapamonae cuenejëpaeya bajarapacuenia paexaname itsamonaëjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacyavenonabiaba. ²⁷ Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacyavenonabiaba. ²⁸ Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaiBITSaëtoXaneto pibisiacuene

pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana bitso pitaxutotsēcēnaenēbeje, apo petaenēbeje, yabara pelivaisi (Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaēto pēnaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsēcēnaenēbeje, apo petaenēbeje. Nexata bajaraponēbeje itsa jumetanebeje bajarapanamutua imoxoyo Jesús penajetarucēja, vavajaiibeje tsecae.

—¡Jesús, Davidpijinē pemomomē, paneitaxutotsoni-ataemabeje! jaiibeje tsecae pitaxutotsēcēnaenēbeje.

³¹ Jivi picani jumeitavetatsibeje pemoyanexabeje tsecae. Itsiata biji bitsoyo orijibia vavajaiibeje tsecae.

—¡Jesús, Davidpijinē pemomomē, paneitaxutotsoni-ataemabeje! jaiibeje tsecae Jesúsjavabelia.

³² Nexata Jesús muxunanucojopa. Junata pitaxutotsēcēnaenēbeje. Jesús jumaitsi bajaraponēbejevabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponēbeje jumaitsibeje Jesúsjavabelia:

—Jesús, pajitsipajēbeje pataitaxutoxanepanaejavabeje, jaiibeje tsecae.

³⁴ Nexata Jesús itaxutotsoniatane bajaraponēbeje. Jesús itaxutojayata bajaraponēbeje. Bajarajota caecuenia bajaraponēbeje itaxutoxanepanabeje baja. Nexata bajaraponēbeje Jesús pepēta naponabeje.

21

Pacuenia Jesús pata Jerusalén tomarata yabara pelivaisi (Mr 11.1-11; Lc 19.28-40; Jn 12.12-19)

¹ Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarata. Patsutojumata nubena olivonaenē, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonēbejevabelia mapacueniaje:

² —Paponarebeje mapatomarayo ecaliajevabelia. Bajarajotalia, ajena papatsiaremeliabeje, pataenutsianamebeje burro pecētanutsinētsi, pexēnatonēyo yajava. Paisinaenamebeje bajarapaburrobeje. Payamaēyacarenamēbeje tsane. ³ “¿Detsa xuajitsia burrobeje paisinamebeje?” itsa pacajaiibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canaviatsiarena,” pajamēbeje tsane, jai Jesús pijajivitonēbejevabelia.

⁴ Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinēmi profetanē bajayata tajēvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanēmi bajayata peyaquinaelivaisita jumaitsi mapacueniaje:

⁵ Pajumaitsimē tsane Jerusalén tomarapijivijavabelia: “Pataename pepo paneevetsinē paxamējavaberena penajetarucaejava. Beveliajamatabēcuenenēcuenia najetarucaena. Pejanaburroyota yapatanajetarucaena,” pajamē tsane Jerusalén tomarapijivijavabelia, jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje. ⁷ Yamaēya carenabeje burro, pexēnatonēyo yajava. Nexata bajarapaburrobeje Jesús pijajivi tsijumajeba pijacama,” pajamē tsane Jerusalén tomarapijivijavabelia,

jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota.

⁸ Panamutuarena Jesús najetaruca, bajarapanamutuarena jivi ayaibitsaētoخانeto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yaiyataeya pecopiapitsinexatsi. ⁹ Jesús penajetarucaejavata jivi ayaibitsaētoخانeto Jesús pevajēnaeya namataxainaeya najetarubena. Itsabitsaētoخانeto Jesús pecovēya cotocaevanajetarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponēje, pepo nacuaevetsinēmi Davidpijinē pemomo! ¡Dioso yavenonaenatsi maponē najetarucaje nacua pevetsinēnexa Dioso pejamatabēcueneta! Nexata vaxaitsi pexaniajamatabēcueneta rajutatsi Diosojavabelia, jai tsanajetarubena bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomarapijivi jamatabēcuenenabenajaca. Nexata nayanijoba.

—¿Detsa meta maponē najetarucaje? najai bajarapamonae.

¹¹ Nexata jivi jumaitsi:

—Jesús ra manajetarucaje, Diosojumepaebinē profetanē. Galilea nacuata peecaetomara, Nazaret tomarapijinē, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mr 11.15-19; Lc 19.45-48; Jn 2.13-22)

¹² Jesús itsa pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomua-caevinua. Nexata daxitaitsi:

—Jesús ra manajetarucaje, Diosojumepaebinë profetanë. Galilea nacuata peecaetomara, Nazaret tom bajarapamonae Jesús pitsapaeyaexana templobovecua. Palata pecambiabiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

¹³ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitsi-
java Dioso pejumelivaisibaxutota. Itsiata baitsi jane paxamë yamaxëitorobiaya panenacobetoxotsinexa panacaetuatabi-
abame mapabotaje, jai Jesús templobota pecanajetabiabivi-
javabelia.

¹⁴ Bajarajota templobota Jesús imoxoyorenatsi pitaxu-
totsëcënaevi, pejayujayunaevinua. Nexata Jesús bajarapa-
monae xanepanaeyaexana. ¹⁵ Templobota nubena sacer-
dotevi. Nubena judíovi pecujarubivina. Bajarapamonae
taenubena Jesús pitaxutoxanepanaeyaexanaejava pitaxu-
totsëcënaevi. Taenubenanua Jesús pexanepanaeyaexanae-
java pejayujayunaevi. Jumetaenubenanua pejevaxi tem-
plobota pevavajaijavata pejumaitsijava Jesús yabara: “¡Dioso
yavenonaenatsi maponëje, pepo nacuaevetsinëmi Davidpi-
jinë pemomo!” pejaijava Jesús yabara. Bajaraxuata sacer-
dotevi baraanaepanatsi Jesús. Judíovi pecujarubivi ata
baraanaepanatsi Jesús.

¹⁶ Nexata bajarapamonae jumaitsi Jesúsjavabelia:

—¿Tsipaji apo jumetaemë mapapejevaxi xamë yabara peju-
maitsaponaejavaje? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jãjã. Jumetaniji picani. Itsiata apo jumeitavetsinë.
¿Paxamë tsipaji Dioso pejumelivaisibaxuto apo palebimë
paneyapëtaenexa pacuenia tajëvelia jumaitsi xanë yabara
bajarapapejevaxi pevavajaijavanexa? Dioso pejumaitsi-
java xanëjavaberena, tajëvelia Dioso pejumelivaisibaxutota ju-
maitsi mapacueniaje:

Pejevaxi, mitoapaenacuetoxi ata, naxëanaeyaexanaename penaxëanaejavata xamëjavaberena pecajumaitsinexa: “Ayaijamatabëcuenenëmë bitso,” pecajainexa, jai Dioso pejumelivaisibaxutota xanëjavaberena Dioso pejumaitsijava. Bajaraxuata mapapejevaxije jumaitsi bajarpacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaavecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higeranae piacuaijibixae yabara pelivaisi

(Mr 11.12-14, 20-26)

¹⁸ Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia Jerusalén tomarabelia. Jesús nexata namutua penajetarucæjavata, piajani. ¹⁹ Jesús nexata taenuta higeranae namuto muxuneneta. Nexata Jesús imoxoyolia higeranae, pecuai itsa xaina, pexaenexa. Pecuai itsiata apo xinae higeranae. Ëpebaxu saya tsanucæ. Bajaraxuata nexata Jesús jumaitsi higeranaejavabelia:

—¡Xamë baja apo nacuaitsimë tsane! jai Jesús.

Bajarapacuenia Jesús pejumaitsijavata, bepiglia higeranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepiglia tēpanajerecaje? najai.

²¹ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, nexata paxamë ata pacacæjēpæjitsipa paneexanaenexa pacuenia exanajë mapahigeranaejavabeliaje. Itsiata ëbajarapacuenia paneexanaenexa, apo pacacæjēpæjitsipa. Pematatsënëa itsacuenëjavanëna paneexanaenexa, pacacæjēpæjitsipa.

Nexata itsa pajumaitsimë tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia pacajumecovënëtsipa.

²² Nexata daxitacuene xua pavajëtsianame Diosojavabelia, pasivajamatabëjumaitsimë tsane mapacueniaje: “Xua vajëtajë Diosojavabelia, pepacuene Dioso nejumecovënëtsiana,” pasivajamatabëjamë tsane. Nexata xua pavajëtsianame

Diosojavabelia, Dioso pacajumecovënëtsiana, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi

(Mr 11.27-33; Lc 20.1-8)

²³ Jesús junua templobotalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomua-caevinua, capitsapame mapatemplobopanabovecuaje? jai bajarapamonae Jesúsjavabelia.

²⁴ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuene.

²⁵ ¿Jipatsa jane pejamatabēcueneta Juanpijinë jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaejavabelia.

Nexata epamonae nabarēcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabēcueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabējumaitsi: “Juanpijinë raja pepacuene Diosojumepaebinëmi,” sivajamatabējai, najai sacerdotevi, judíovi pijaancianovi yajava.

²⁷ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

Pacuenia Jesús jivi livaisi tsipaeba anijanëbeje pexënatobeje pexainaenë pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaējëtsianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatovjavabelia jumaitsi: “Taxë nato, ajena netonacuenebianame tajauvabacabota,” jai pexënatovjavabelia.

²⁹ Nexata bajaraponë paxajavabelia jumaitsi: “¡Jume! ¡Apo jitsipañë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaitsi: “Xanë baja rovia pibisiajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë. ³⁰ Bajaraxuacujinae pexënatobeje pexainañë pona icatsia itsanë pexënatojavabelia. Bajaraponëjavabelia ata jumaitsi: “Taxënato, ajena netonacuenebianame tajauvabacabota,” jai pexënatojavabelia. Nexata jejai itajara pexënato. Itsiata apo ponae. ³¹ ¿Detsa ponë bajaraponëbejeyajuvënëne paxa jumecovënëta? jai Jesús bajarapamonaejavabelia.

Nexata bajarapamonae jumaitsi Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona copabiana pibisiacuene pexanabiabijavami, pamona najamatabëcuenepeñëyorotsiana Diosojavabelia. Impuestomatamo gobierno pejamatabëcuene petomatomoyanijobabiabivimi ata jonena Dioso pijanacuayabetsia itsa najamatabëcuenepeñëyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabëcuenepeñëyorota Diosojavabelia pibisiacuene pexanabiabijavamivecua. Itsiata baitsi jane paxamë apo pajonemë tsane. ³² Juanpijinë jivibautisabinë patajopa Dioso pejumelivaisi papecatsipaebinexa panenajamatabëcuene peñëyorotsinexa pibisiacuene paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata bajarapalivaisi jumecovënëta impuestomatamo gobierno pejamatabëcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuenepeñëyorotsimë panejumecovënëtsinexa Dioso, jai Jesús bajarapamonaejavabelia.

Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijancianovijavabelia ata:

—Xaniavaetsia panemuxunaevere mapalivaisije. Pijaira pexainañë pijairata uba ayaibacaboxaneto uvavënëjava. Bajaraxuacujinae pijaira matatoyorotsia,

ibopanaxanetonē mataropotsia pefaratsijavata, yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabijavanexa. Bajaraxuacujinae pijauvabacabo tuatujēta exananuta piapiabotsia, penacuaitsimatacabi ita tonaveretatsi, athēbēyo pevetaabiabecaenexa pijauvabacabo.

¹Nexata bajaraponē itsamonae evetsiaexana pijauvabacabo. Uvabacabo pexainaenē jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvabacabo pexainaenē petoevetsivitsijavabelia. Nexata uvabacabo pexainaenē tajē nacuyabelia pona. ³⁴Itsa baja uvabacabo pexainaenē yapētane pecopiapatsijava uvacuai penaveretsimatcabi penotsinexa, nexata uvabacabo pexainaenē itoroba pijajivi. Itoroba petoevetsivitsijavabelia petsicobetsatsinexatsi. ³⁵Nexata uvabacabo pexainaenē pijajivi uvabacabo petoevetsivitsi totaicsi. Caenē bajarapamonaeyajuvēnē toconibabiatsi. Itsanē pepacuene tobeyaxuabatsi. Itsanē ibotonēta totseconatsi. ³⁶Nexata uvabacabo pexainaenē icatsia itsabitsaēto pijajivi itorobalia. Bajara icatsia pacuenia exana uvabacabo pevetsivi.

³⁷Nexata uvabacabo pexainaenē itoroba icatsia pexēnato jane baja. Uvabacabo pexainaenē jamatabējumaitsi: “Netoyaiyataena meta taxēnato,” jamatabējai. ³⁸Itsiata baitsi jane uvabacabo petoevetsivitsi uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonaē najumaitsi: “Mara ponēje paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ³⁹Nexata icatsia uvabacabo pexainaenē pexēnato ata tovaetabatsi. Caponaliatsi bajarapauvabacabo pēnēyabelia. Nexata uvabacabo pexainaenē pexēnato ata bajarapacuenia icatsia tobeyaxuabatsi, jai Jesús.

⁴⁰Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvabacabo pexainaenē ita patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaējavabelia.

⁴¹Nexata bajarapamonaē jumaitsi Jesúsjavabelia:

—Pijauvabacabo raeta pexainaenē apo itaxutotsoniatae tsane. Nexata verebiabiana bajarapamonaemi pibisiacuene

pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaëjëtatsi uvabacabo pexainaenë perajutsinexatsi, jai bajarapamonae.

⁴² Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. Vajatuxanenë Dioso raja exanaena bajarapacuenie. Nexata bitso nacatsita pexaniacuene tsane bajarapacuenie,

jai tajëvelia Dioso pejumelivaisibaxutota xanë yabara.

’Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenë icatsia itsamonae evetsiaexanaena, bajara pijinia pacuenia Dioso exanaena paxamëjavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaev xaniavaetsia jumecovënëta Dioso pitorobicueniatsi. ⁴⁴ Pamonaev apo nejumecovënëtsi Dioso pexënatocuenenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonaev naneconitsiaexanaenajë, bajarapamonae pepacuenie naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsijava, bajarapamonae jamatabëjumai tsenae: “Vaxaitsi yabara raeta jumaitsi,” jamatabëjai tsenae bajarapamonae. ⁴⁶ Nexata picani bajarapamonae Jesús jamatabëvaetabatsi. Itsiata bajarapamonae jamatabëjumaitsi: “Bajaraponë jivi tanetsi Diosojumepaebinëcuene. Nexata nacaitsacueniabijitsipa vaxaitsi itsa vaetabijitsipatsi maponëje,” jamatabëjai tsenae bajarapamonae. Bajaraxuata Jesús apo vaetabitsi.

22

*Pacuenia Jesús jivi livaisi tsipaeba penacasabifiesta pex-
anaenë pelivaisicuenia yabara pelivaisi*

(Lc 14.15-24)

¹⁻² Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamonae peyapëtaenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitsi mapacueniaje:

—Pepo nacuaeetsinë fiesta exana pexënato petonacasabifiestanexatsi. ³ Nexata nacuaeetsinë jumaitsi pijajivijavabelia: “Pamonae baja tajëvelia junatajë, patsipaebare baja tanetopatsinexarena fiestanexa jane baja,” jai nacuaeetsinë pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaeetsinë pijajivi naviabarena petsipaebinexa pijatuxanenëjavabelia.

⁴ Nexata nacuaeetsinë itsamonae icatsia pijajivi itorobalia pesivaponaenexalia. Nacuaeetsinë jumaitsi pijajivijavabelia: “Pajumaitsimë tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaremelia,’ pajamë tsane tajunatsivijavabelia,” jai nacuaeetsinë pijajivijavabelia. ⁵ Itsiata baitsi jane bajarapamonae icatsia sivapona atalia, nacuaeetsinë pejunatsivi apo jejai. Pejunatsiviyajuvënënë itsanë pona pijapabianëjavabelia. Itsanë pijinia pona penavijatsinexa.

⁶ Itsamonae nacuaeetsinë pijajivi taicatsi. Bejibiaexanatsi pibisiacuenia. Beyejebatsi baja belia. ⁷ Bajaraxuata nexata nacuaeetsinë bitso baraanaepana pejunatsivimijavabelia. Nexata nacuaeetsinë itorobalia vajabitsaëvi pebenexa pamonae tobeyejebatsi pijajivi. Itorobanua pijatomaranëmi ata petotajuitsinexa. ⁸ Bajaraxuacujinae nacuaeetsinë icatsia pijajivijavabelia jumaitsi: “Daxitacuene baja picani veretejebiaexanajë taxënato penacasabifiestanexa. Itsiata baitsi jane tajunatsivimi apo netopatsirena. ⁹ Paponaremelia pinijicallexanetonëjavabelia. Nexata daxita pamonae pacaxitajarabaponaename bajarapacallexanetonëjava, pajunataponaename taxënato penacasabifiestajavaberena pepatsinexa,” jai nacuaeetsinë pijajivijavabelia.

¹⁰ Nexata nacuaeetsinë pijajivi ponalia. Najetarubena callexanetonëjava. Junatapona daxita pamonae caxitajarabapona. Junatapona pijamatatabëcuenebejevi, pejamatabëcuenexanepanaevi ata. Nexata bajarapamonae

barëpona fiesta pexanaebojavabelia. Nexata pabota fiesta exana, vënëca jivi.

¹¹ 'Nexata nacuaeavetsinë jonena bajarapaboyarena petaenexa petopatsivitsi. Daxita pamonae topatatsi, jumapata xua banaxataba itsa pona penacasabifestajavabelia. Nexata nacuaeavetsinë taenuta bajarajota itsanë, saicayaviriajava penaxatatsinë. Apo naxatatsi xua naxataba daxita. ¹² Nexata nacuaeavetsinë jumaitsi bajaraponëjavabelia: "¿Detsa xuajitsia najunuame apo nenaxatatsinë pacuenia daxita naxataba penacasabifestajavaberena penajonevi?" jai nacuaeavetsinë. Nexata bajaraponë moya nuca. ¹³ Nexata nacuaeavetsinë jumaitsi mesa pevetsivijavabelia: "Maponë pataxucëreje. Pacobecëre yajava. Paxuaremelia bopëñëyabelia, pitaquirijavabelia. Bajarajotalia nuena. Navonosiniana bitso penavixaetaexae," jai nacuaeavetsinë. ¹⁴ Pacuenia fiesta pexanaenë ayaibitsaëtoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëtoxaneto junata pijajivinexa. Itsiata saya caejiviyobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarëcuaicuajainexa. Bajarapamonae najamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaeavetsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cjunavimë. Apo auramë livaisi netsipaebabijava. Nexata daxitajivi najëpaeya livaisi tsipaebabiabame. ¹⁷ Panetsipaebare pacuenia najamatabëxainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁸ Itsiata baitsi jane Jesús jamatabëcueneypëtane bajarapamonae jamatabëcueneëjëbiaya peyanijobijavatsi

peneconitsinexatsi picani. Nexata Jesús jumaitsi bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame? ¹⁹ Panetsitajëre pitsipalatanëyota pamatamotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. ²⁰ Jesús itsa tane bajarapapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyoyumataje? jai Jesús.

²¹ Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneëjëbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

²⁴—Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁵ Nexata jinavanapa ënacaemonae siete ponëbeje paxanëjavata. Pepo matapijinë copiyaya nacojioba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami. ²⁶ Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajara icatsia ponë ata

tēpa pexi xainaenejeva bajarapovajavabelia. Bajarapacuenia tēpa daxita siete ponēmibeje nacaemonaemi, bajarapova pepitaponaevi. Itsiata itsanē ata pexi apo xinae bajarapovajavabelia. ²⁷ Bajaraxuacujinae bajarapova ata tēpa baja. ²⁸ “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē bajarapamonaeyajuvēnēnē pijava tsane bajarapova bajarapamatacabi? Daxita pamonae siete ponēmibeje nacaemonaepitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamē saya pajamatēbēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. ³⁰ Pamatacabi raja petēpaevimi Dioso icatsia asaēyaexanaenatsi, apo nacojioi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojioinexatsi. Bajarapamonae nacojioinejeva, jinavanapaena athēbētatsia pacuenia ángelevi jinavanapa. ³¹ Itsa pepacuene paxamē xaniavaetsia paneyanijobame paneyapētaenexa Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Dioso jumaitsi. Abraham baja pepuatēpae, Isaac ata baja pepuatēpae, Santiago ata baja pepuatēpae, bajarapamonae yabara bajayata Dioso jumaitsi Moiséspijinējavabelia mapacueniaje: ³² “Xanē rabaja abaxē Abraham pijaDiosonē. Isaac ata pijaDiosonē. Jacob ata pijaDiosonē,” jai baja cajena Dioso bajayata petēpaevimi yabara. Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia, jai Jesús saduceovijavabelia.

³³ Jivi ayaibitsaētoخانeto itsa jumetane bajarapacuenia Jesús pejumaitsiyava saduceovijavabelia, jivi bitso jamatabēcuenenabenajaca Jesús petsipaebilivaisi yabara.

Palivaisi bitso jivi bejumecovēnēta daxita Dioso pitorobilivaisianē pejumecovēnētsiyava matatoxenetsia yabara pelivaisi (Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vēnētane saduceovijavabelia Jesús xaniavaetsia pejumecanaviatsiyava, nexata fariseovi nacaetuata penabarēcuaijainexa. Nexata fariseovi

najumejaita pacuenia yanijobijitsia Jesúsjavabelia. ³⁵ Nexata fariseoviyajuvënë, judíovi pecujarubinë, Jesúsjavabelia jamatabëcuenejèbiaya yanijoba. Jumaiti Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaiti judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaiti mapacueniaje: “Pasivamëre panijatuxanenë panijaDioso daxita panejamatabëethëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaiti icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi (Mr 12.35-37; Lc 20.41-44)

⁴¹ Fariseovi penacaetuatsijavata, fariseovijavabelia Jesús pijacuata nayabarajumaiti mapacueniaje:

⁴² —¿Detsa pacuenia pasivanajamatabëxainaename Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaiti Jesúsjavabelia:

—Davidpijinë pemomo tsane, jai.

⁴³ Nexata Jesús jumaiti fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitisijava Cristo yabara, Davidpijinë Espiritu Santo pejamatabëcueneta tajëvelia jumaiti mapacueniaje:

⁴⁴ Dioso jumaiti tajatuxanenëjavabelia:

“Ecare abaxë tacujuanenia. Vecatsivajënae jume-covënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

⁴⁵ Nexata Davidpijinë bajayata Cristo yabara: “Tajatuxanenë,” itsa jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexënatocuene.

⁴⁶ Nexata itsanë ata fariseoviyajuvënënë Jesús apo jumepit-sitsi caejumeyo ata. Bajaraxuacujinae fariseovi, saduceovi ata, cujunava Jesúsjavabelia baja jamatabëcueneëjëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujaru-bivijavabelia ata, bajarapamonae penaneconitsijava Diosojavabelia yabara pelivaisi

(Mr 12.38-40; Lc 11.37-54; 20.45-47)

¹ Jesús jumaitsi jivi ayaibitsaëtojavabelia, pijajivijavabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponanexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonaë bajarapacuenia pacatsipaeba, itsanë ata bajarapamonaeyajuvënënë apo jamatabënajinae pexanaenexa bajarapacuenia. ⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia piajumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta.

Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabibota, jitsipabiaba penaenexa peyaiyataevitsi penaenexa petsinubijavanëta. ⁷ Bajarapamonae bitso jitsipabiaba jivi pebajacobinexatsi yaiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayaibitsaëtojanetoxanetoxavabelia, pija-jivijavabelia ata:

—Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tsipaji daxita paxamë bepanacaemonaemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacucujarubinënexa. ⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsipaji caenë paneaxa paxainame, ponë eca athëbëtatsia. ¹⁰ Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tsipaji xanë, caenënë Cristonë, patacaevetsinë. ¹¹ Ponë paxamëyajuvënënë pacavecuayaijamatabëcuenenë, bajaraponë pacayavenon-abiaba padaxitamë. ¹² Pajivi daxitajivi matatoxenetsia pijacuata ayaijamatabëcuenejivi natane, bajarapajivi itsamatacabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayaibitsaëtojanetoxanetoxavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënuu, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabetsia.

¹⁴ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënuu, ayaineconi panatsixainame Diosojavabelia! Yamaxëitojorobiaya pavecuannotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara

Diosojavabelia pavajëcabiabame. Itsiata pepo panexani-ajaijamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamonae Dioso apo pejumecovënëtsivi.

15 '¡Paxamë saya jivi paneyamaxëitorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

16 '¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamonae! Nexata paxamë panecujarubijamatabëcueneta bajarapamonae pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: "Pajivi itsanëjavabelia najumecapanepaeya jumaitsi pejumexaniataenexatsi: 'Catoexanaenatsi pepacuene. Cajumaitsiitsi cajena templobo pevënëta,' jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane itsanëjavabelia jumaitsi pejumexaniataenexatsi: 'Catoexanaenatsi pepacuene. Cajumaitsiitsi cajena templobopijiorojavanë pevënëta,' jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia," pajamë tsabiabi jivijavabelia. 17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yaiyatanetsi. Tsipaji bajarapaorojavanë templobopijiorojavanë. 18 Jamatabëcuenenavëxaniabiaya pajumaitsimë tsabiabinua: "Pajivi itsanëjavabelia najumecapanepaeya jumaitsi pejumexaniataenexatsi: 'Catoexanaenatsi pepacuene. Cajumaitsiitsi altavënëjava pevënëta,' jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane pejumexaniataenexatsi

itsanējavabelia jumaitsi: ‘Catoexanaenatsi pepacuene. Cajumaitsitsi altarvënējavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniwa Diosojavabelia,” pajamë tsabiabinua jivijavabelia. ¹⁹ Paneamatabocotajavi, bepaneitatsëcënavanapaevinua panejamatabëëthëtota. Biji rajane beyaiyatanetsi altarvënëjava, bajarapaaltarvënējavajumata pebuatsiofrenda matatoxenetsia. Bajarapaofrenda ata yayiyanetsi. Tsipaji altarvënējavajumata boca. ²⁰ Pajivi jumaitsi: “Cajumaitsitsi altarvënëjava pevënëta,” jai, caecuenia yajavavënëjona bajarapaaltarvënējavajumata pebocaeofrenda. ²¹ Pajivi pijinia najumecapanepaeya jumaitsi pejumexaniataenexatsi: “Cajumaitsitsi templobo pevënëta,” jai, caecuenia yajavavënëjona bajarapatemplobota peponaponaenë Dioso. ²² Pajivi pijinia najumecapanepaeya jumaitsi pejumexaniataenexatsi: “Cajumaitsitsi athëbëtatsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

²³ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuene panetoexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. ²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaxae, panecujarubivi

ata naneconita Diosojavabelia pacuenia paxamë pananeconitame Diosojavabelia.

25 ¡Paxamë jivi paneyamaxëtojobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijianaejitsipajë Diosojavabelia,” panejamatabëjaitabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaicuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainaenexa ayajava ëpaxamënexa. 26 Paxamë pafariseovimë, bepaneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi paneajamatabëcuenexuirajibinexa. Nexata bajaraxuacujinae pacajamatabëcuenecajëjëpaena paneexanaenexa ëpexaniacuene pacuenia Dioso pacaitoroba.

27 ¡Paxamë saya jivi paneyamaxëtojobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajayatsinexa. Bajara pijinia paxamë ata Dioso patsitamatabëcueneitsimë. 28 Itsamonae naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëtojobinexa. Itsajava ata pematatsënëa pibisiacuene paneexanaenexa, panajamatabëxainabiabame.

29 ¡Paxamë saya jivi paneyamaxëtojobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapapofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapapofetavimi. Pamonaemi ata bajayata tëpa, pamonaë aneconijibia

pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. ³⁰ Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonaei beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. ³² Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetarucejava isoto, bajara paitsimë. Itsiata apo papanepaemë tsane infiernovecua panijaneconi yabara. ³⁴ Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonae pabeyaxuabaponaename. Itsamonae cruzajavabelia pacobematabiaxuababiananame. Itsamonae pajumatitibabeyabiananame penaneconitsivi panejumaconitabiabimacata judíovi penacaetuatabiabibonëjava. Itsamonae pabaraponabiananame itsa tomaranëjavabelia ata panebejiobiaexanaenexa. ³⁵ Bajarapacuenia nexata paxamë ayaineconi panatsixainaename Diosojavabelia. Daxita pamonaeaneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamë pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijnëta. Bajaraxuacujinae icatsia pevajënaeyabelia beyaxuabapona itsamonae ata, Dioso pitabarata aneconijibia pejinavanapaevimi. Nexata bexëajavaberena ata Berequíaspijnë pexënatomi, Zacaríaspjinë, panijasalinaivi beyaxuaba. Zacaríaspjinëmi panijasalinaivimi beyaxuaba templobopanabota, templobobeje altarvënëjavabeje tuatujëta. ³⁶ Xaniajanë pacuenia pacatsipaebijitsiatsi. Daxita pamonaemi Dioso pitabarata aneconijibia

pejinavanapaevimi, panijasalinaivimi beyaxuababiaba. Bajarapaneconimi yajava, paxamë aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabëxainaeya sivanua Jerusalén tomarapijivi yabara pelivaisi
(Lc 13.34-35)

³⁷ Jesús najamatabëxainaeya sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimë, pabeyabiabame Dioso-jumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena! ³⁸ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. ³⁹ Xaniajanë pacuenia pacatsipae-bijitsiatsi. Paxamë rabaja apo panetaemë tsane matavëjëa. Matapania itsa panejumecovënëtsianame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënua tsane: “Dioso, bitso yavenonare maponë najetarucaje, nejamatabëcueneta penajetarucaenë,” itsa panesivajamatabëjamë tsane xanë yabara, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi
(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús ve-cuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaeboxanetonë ata, jai.

² Nexata Jesús tajëvelia vajunupaeba itsamatacabi itsanacuapijivi bajarapaboxanetonëmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëmi itsamatacabi itsanacuapijivi penetsianica irabetsica. Nexata pai-botonë catsanaruba mapaboxanetonëtaje, itsaiboto ata peju-mavereca apo boca tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi
(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaejitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana. ⁶ Vajabitsaë

pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. ⁷ Mapanacuaje

pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitane cuene ata najetarucaena itsanacuanëjava. Ira najëabiana ayaicuenia itsanacuanëjava.

⁸ Daxita bajarapacuenia itsa pataename, saya abaxë taxuxuabaponaena piayaicuenia, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamē pacacaponae nae nacuae vetsivijavabelia papecabebiobianae nexa. Nexata pacabeyejebiana. Daxitanacuanē pijivi pacaitoya tsabiabi tsane patajajivix-aemē. ¹⁰ Nexata bajarapamatacabita jivi ayaibitsaēto navecuacopabiana tanejume covēnētsijava. Namataenetsia naitoya tsane. Namataenetsia nacanajetsiana nacuae vetsivi pecobeyabelia. ¹¹ Nexata ayaibitsaēto najetarubenaena jivi petsipaebaponaevinexa saicayalivaisi Dioso pejumelivaisivecua. BeDioso jumelivaisipaebivicuenia tsipaebaponaena. Bajarapamonae yamaxē itojorobiana jivi ayaibitsaēto xaneto. ¹² Jivi pibisiacuene pexanavanapaevi, pevajēnaeyabelia ayaibitsaēto xaneto tsaponae tsane. Nexata ayaibitsaēto Dioso pejume covēnētsivi, namataenetsia penaasivajava vereverecaponaena. ¹³ Itsiata pajivi ajamatabēcuenesaē tsane Dioso pejume covēnētsijava petēpaejavabelianexa, bajarapajivi Dioso capanepaenatsi. ¹⁴ Itsamonae daxita nacuanējava tsipaebiana jivi peyapētaenexa imoxoyo baja pevajēnae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai Jesús pijajivijavabelia tajēvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajēvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Dioso jumepaebinēmi profeta Danielpijinē piayaicuene tajēvelia pevajunupaebilivaisi bajayata yaquina. Xua panijatamaranēmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapētaena papiayaicuene vajunupaeba mapalivaisitaje.) Nexata paxamē itsa pataename bajarapapiayaicuene penucaejava templobota, nexata Judea nacuata pejinavanapaevi pētsa nubena. Naxanitsiayo rēcēpecaena petsutonējavabelia. ¹⁷ Pajivi pijabojumata athēbēyo ecaya, itsa vēnēlivaisitaena bajarapapiayaicuene penucaejava templobota, bajarapajivi perunaecujinaetsica, bepijia najetabajiraviana. Pētsa joneya pijaboyalia pejutsinexa pecobecovē. ¹⁸ Pajivi pijinia nacuenebaponapona pijapabita, itsa vēnēlivaisitaena bajarapapiayaicuene penucaejava templobota, bepijia najetabajiraviana. Pētsa naviata pijaboyabelia pejutsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajēvelia Dioso javabelia

pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejibitsiaya paneponaeyaniva. Pavajëcarenua penacueraevetsimatacabita bajarapapiayaicuene papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejibicuene abaxë jivi caeto ata apo tae Dioso nacua pexanaecujinae, bajarapabejibicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi bitso nabejibitsiaya pejinavanapaematacabianëminexa bitso jivi nabejibitsia pejinavanapaeyaniva. Dioso epatua itsa apo yatuucutsi tsipae bitso jivi nabejibitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejibitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtime. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtime. ²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²⁵ Tajëvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtime. ²⁷ Payapëtaneme rabaja mapacueneje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi

Pematapijinënë. ²⁸ Payapëtaneme rabaja mapacuene ataje. Quequeremonae bepíjia bayapëtane itsajota petuxutsaebínë boca. Nexata bajarajota bepíjia banacaetuana. Bajara pijinia pacuenia daxitanacuanëpijivi tajajivi bepíjia yapëtaena tapatsijavatsica. Nexata bepíjia nacaetuanaena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi
(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueni-aje:

—Xanë tapatsivajënaetsica jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëbiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. ³¹ Bajaraxuacujinae trompeta itsa najumetsiana ayaijumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana taja-jivi, pamonaе Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae

jane baja vereverecaena. ³⁵ “Itaboxo, ira yajava, tsitecaena daxitamatacabijavabelianexa,” jamatabējai ata tsane itsamonae, itsiata jamatabēcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. ³⁸ Pamatacabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamonae pinijibarcoxanetojavabelia barëjunua. ³⁹ Daxitajivi

abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë.

Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najuacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

⁴² Nexata nejamatabēcueneevetsiaya panecopiaevetavana-paename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica.

43 Pacanaäjëre mapacueneje. Bo pexainaenë itsa yapëtaejitsipa paepatota meravi pijaboyaberena patsijitsia pecobcovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. 44 Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi (Lc 12.41-48)

45 Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta toevetaponaponaena piabatabinexa pexaejava caematacabi canacujitsia pacuenia pijatuxanenë itorobatsi. 46 Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoebetaponaponaexae pecovëta. 47 Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. 48 Itsa bajaraponë piamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucae tsane bajayajebi,” jamatabëjai tsipae. 49 Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piaitajibivita. 50 Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. 51 Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús

pijajivijavabelia petuxanenë pijajivitonëbeje pelivaisicuenia petsipaebijavata.

Bजारapacuenia Jesús tsipaeba pijajivi xaniavaetsia pecopi-aevetavanapaenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopi-aevetavanapaena. Itsamonae tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bजारapacuenia yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bजारajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifiestajavabelia. ²⁻⁴ Bजारapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicaponae itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona. ⁵ Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bजारaxuacujinae ayaimeravi tuatuajëta jumetane pevavajajava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejajava jumetane. ⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana. ⁸ Nexata papetiriavi apo tsicaponae aceiteranë, jumaitsi aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai

bजारपामोनाे. ⁹ Itsiata aceiteranē petsicaponaeivi jumaitsi: “Jume. Apo caējēpae. Paxanē ata meta apo panetocaējēpae tsipae. Paponaremelia. Panijacuata pacomuare itsajotalia canajetabiaba aceiteranē,” jai aceiteranē petsicaponaeivi pijalámparabēxinexa. ¹⁰ Nexata papetiriavi aceiteranē apo tsicaponae pijalámparabēxinexa, ponalia aceiteranē pecomuacaenexa. Nexata pecovēta penacasabinēnexa patanajetaruca. Nexata papetiriavi aceiteranē tsicaponae pijalámparabēxinexa, naponae baja penacasabifiestanexa pexanaebojavabelia. Pejonecujinaelia baupaxatata. ¹¹ Bajaraxuacujinae aceiteranē pijalámparabēxi petsicomuacaeivi pata. Nexata bajarapapetiriavi jumaitsi penacasabinēnexajavabelia: “¡Panetobaupare! ¡Panetobaupare! jai tsanubenaē bojumavelia. ¹² Nexata penacasabinēnexa jumaitsi: “Xaniajanē pacuenia pacatsipaebijitsiatsi. Apo pacayapētaetsi cajena paxamē,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapētaexae, aceiteranē tsicaponae pijalámparabēxinexa, bajara pijinia pacuenia paxamē ata paneyapētaexae, jamatabēcueneaitavaya panecopiaeveta-vanapaename. Tsipaji apo payapētaemē tsane pamatacabita, paepatota ata, xanē, Daxitajivi Pematapijinēnē, icatsia patsijitsianētsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenē pelivaisicuenia yabara pelivaisi (Lc 19.11-27)

¹⁴ Jesús icatsia jumaitsi pijajivijavabelia:

—Tacovēta patajajivimē, itsamonae ata, pamonaē tajajivi, panetonacuenebianame. Nexata pamatacabici icatsia patsianicajē, pacuenia pacasivanajamatabēxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenē itsa ponaejitsia tajēnacuyabelia, junata pijajivi. Evetsiaexana pijapalata petoevetsinexatsi pecovēta.

¹⁵ Caenē canacujitsia evetsiaexanaponae peto-canacuenebinexatsi pecovēta pacuenia bajarapamonae caējēpatsi. Nexata petuxanenē pijinia evetsiaexana cinco mil ponēbeje pepovi, bitso penamatamotsivi. Itsanē pijinia evetsiaexana dos mil ponēbeje. Itsanē pijinia evetsiaexana mil ponēbeje. Bajaraxuacujinae petuxanenē pona tajēnacuyabelia.

¹⁶ Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacincio mil ponëbeje. Nexata baja daxitata diez mil ponëbeje caejavata. ¹⁷ Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. ¹⁸ Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

¹⁹ Bexëa nexata najetaruca petuxanenë. Junata pijajivi peyapëtaenexa pacuenia toevetatsi pecovëta pijapalata. ²⁰ Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacincio mil ponëbeje, xua nacanabajë bajarapapalata,” jai bajaraponë pijatuxanenëjavabelia. ²¹ Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. ²² Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalata,” jai bajaraponë pijatuxanenëjavabelia. ²³ Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. ²⁴ Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: “Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcueneta ayaijava palata pecatopitsapaenexa. Bajara pijinia pacuenia xanë ata nevecuapitsipame xua nacanabijitsipajë nijapalata ita canacuenebijitsipajë. ²⁵ Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia.

²⁶ Nexata petuxanenē jumaitsi: “Tajajivitonē atamē, itsiata ajamatabēcuenebejemē. Afaetabimēnua. Xamē baja cajena yapētaneme tajajivi taubiaexanabiabijava, taubiaexanabiabijava nexata bajarapamonae pejamatabēcueneta ayaijava palata tanetopitsapaenexa. ²⁷ Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabēcuenene netocanaviatsipa tajapalata pematatsēnē,” jai petuxanenē pijajivitonējavabelia.

²⁸ Nexata petuxanenē jumaitsi bajarajota penubenaevijavabelia: “Pavecuapire bajarapamil ponēbeje. Nexata juya parajure ponējavabelia xaina diez mil ponēbeje. Tsipaji bajaraponē caējēpatsi tanetoevetsinexa pematatsēnē. ²⁹ Tsipaji pajivi ayaijava baja xaina, pematatsēnē icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponē tajajivitonēje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixae-taexae,” jai petuxanenē, jai Jesús comparacióncuenia pijajivijavabelia.

Bajarapacuenia Jesús jumaitsi pamonaē pijaneconi pexainaēvi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaēvi yabara pelivaisi

³¹ Jesús tajēvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanē, Daxitajivi Pematapijinēnē, icatsia itsa najetarucaenajē daxitanacua taevetsinexa, ángelevi nematatoyoronaeya yajavanajetarucaenajē. Nexata ecaenajē tajapenivenivenaetronovēnējavata. ³²⁻³³ Nexata daxitanacuanēpijivi caetuat-sianatsi taitabarata. Tsataponaenajē bajarapamonae. Oveja pevetsinē ovejavecua chivo saicaya tsatapona. Nexata oveja pevetsinē petsavenononia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanē tsataponaenajē Dioso apo pejumecovēnētsivi, Dioso pejumecovēnētsivivecua. Dioso apo pejumecovēnētsivi tatsavenononia nubenaeyaexanaenajē. Dioso pijinia pejumecovēnētsivi tacujuanenia nubenaeyaexanaenajē. ³⁴ Nexata jumaitsinē tsane tacujuanenia penubenaevijavabelia, Dioso

pejumecovënëtsivi: “Naxanitsia. Paxamë taxa papecaitax-utotsoniataevi. Payajavajinavanapaename taxa pijanacu-atatsia, itsajotatsia pacatoxaniavaeta tajëvelia. Dioso paca-toxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabi-abibota, papatame patanetaenexamë,” janë tsane tacujua-nesia penubenaevijavabelia. ³⁷ Nexata bajarapamonae ne-jumai tsane: “Tajatuxanenë, ¿detsa pacujinae niajanijavata patajaccarajutsi nexaejava?” nejai tsane. ¿Detsa pacujinae mera nejitsipaejavata patajaccarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinë patajaccopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajaccarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë jumaitsinë tsane bajarapamonaejavabelia: “Xaniajanë pacuenia pacat-sipaebijitsiatsi. Daxita xua patoexaname paneyavenon-aenexa tajajiviyajuvënëjivi, beveliajamatabëcuenevi petaevit-sijavabelia, bajaraxua xanë taniji xanëjavaberena bepatane-toexanaejavamë,” janë tsane.

⁴¹ Nexata tatsavenonenia penubenaevi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonenia penubenaevijavabelia. ⁴⁴ Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata

mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponaeñë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponaeñë patacataenexa?” nejai tsane bajarapamonae.⁴⁵ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajara-pacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia.⁴⁶ Bajaraxuacujinae bajarapamonae ponaena penaneconit-siajinavanapaenexa daxitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matacabi apo pevereverecejava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

26

Pacuenia picani Jesús pijavajabitsaë jamatabëvaetabatsi yabara pelivaisi

(Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi pet-sipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

² —Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pija-jivijavabelia tajëvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinua. Nacaetuata judíovi pijaancianovinua. Daxita bajarapamonae nacaetuata Caifásvënënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënëtsilivaisita

picani Jesús jamatabëvaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vanacaitsacueniabiyaniwa, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumait-sijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata. ¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaishi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajërëbinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponae najë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

²⁰ Nexata baja ajena meraviyotsia, Jesús pijajivi, doce ponëbeje, barëca mesa muxuneneta. ²¹ Nexata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajava-jabitsaë pecobeyabelia. ²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsi-paji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

²⁶ Pexaeyenaevavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita pia-paeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. ²⁸ Tsi-paji tajana othopaena jivi ayaibitsaëttoxaneto pibisiacuene pexanaeneconi pevecuaajibiaexanaenexatsi. Nexata tatēpaejava pejamatabëcueneta, jivi yapētaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavējēa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

(Mr 14.26-31; Lc 22.31-34; Jn 13.36-38)

³⁰ Jesús pijajivi barënaxëana Diosojumevajianë. Bajarax-uacujinae Jesús pijajivi barëpona petsutojumabelia. Pat-sutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pija-jivijavabelia:

—Daxita raja paxamë ajena, pameravi, panexu-abarëcëpecaename. Tsipaji rabaja patanexu-abarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, naniaanaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívënëjavata yabara pelivaisi

(Mr 14.32-42; Lc 22.39-46)

³⁶ Jesús pijajivi pecunuameravita yajavapata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjiobireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pama-jitame, jai Jesús pijajivi acueyabi ponëbejevavelia.

³⁹ Nexata Jesús caenë pevajënaeyavelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavelia. Jumaitsi Diosojavelia:

—Taxa Diosomë, netocopatame picani tanebeyaxuabinexa betajio-bicueneta. Daxitacuene raja cacaëjëpa nexanaenexa. Nexata necapanepare bajarapabejio-bicuenenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavelia pevajëtsijavata pe-beyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavavelia:

—¿Apo pacacaëjëpae tsabaja rovia caepatoyo ata paneaitavatsenaenexa? ⁴¹ Pëtsa pamajitame. Paitavamëre. Pavajëre Diosojavelia papecayavenonaenexa pibisiacuene paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuensaëmë pexaniacuene paneexanaenexa, jai Jesús Pedrojavavelia.

⁴² Nexata icatsia Jesús pona pecovëyavelia pevajëtsinexa icatsia Diosojavelia. Vajëta Diosojavelia mapacueniaje.

—Axa, itsa apo jitsipaemë tanevecuatsatsinexamë betajio-bicueneta tatëpaejavanexa, nexata pacuenia jitsipame, netocopatsianame, jai Jesús Diosojavelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. ⁴⁴ Nexata abaxë bajarapamonae pemajitanubenaevavata, Jesús icatsia pona pecovëyavelia pevajëtsinexa icatsia Diosojavelia. Nexata icatsia vajëta Diosojavelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavavelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyavelia. ⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyavelia tanecanajetsinënexa, jai Jesús pijajivijavavelia Judas yabara.

*Pacuenia Jesús vaetabatsi pijavajabitsaë yabara pelivaisi
(Mr 14.43-50; Lc 22.47-53; Jn 18.2-11)*

⁴⁷ Jesús pijavajabitsaë pevaetabijavatanexatsi, cuaicuaijai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënemi. Judas pënanajetarubenatsi jivi ayaibitsaëtoxaneto. Bajarapamonaeya-juvënëvi itsamonæ canajetarubena espadanë. Itsamonæ canajetarubena naebonë yajava. Bajarapamonaë itorobatsi sacerdotevi penamatacaitorobivi, judíovi pijaancianovinua. ⁴⁸ Judas pebarërenavajënaë bajarapamonaë, copiaya baja cajena Judas tsipaeba pacuenia bajarapamonaë yapëtaejitsia Jesús cuene. Judas jumaitsi mapacueniajæ:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarërenavajënaë.

⁴⁹ Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesús cuene. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi xaniavaetsia pecaponaenexatsi.

⁵¹ Bajarajota Jesús pijajiviyajuvënënë pijaespada nave-marajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonaë namaxëvanita espadata, daxita bajarapamonaë juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonævinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtoxanetonë ángelevi.

⁵⁴ Itsa vajëtsipajë taxa Diosojavabelia tanetoitorobinexatsica taneyavenonævinexa, nexata baja apo netocopiapatsi tsipæ pacuenia Dioso pejumelivaisibaxutota tajëvelia neva-junupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava,

patanevaetabinexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë.⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo mata-toyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajara-jota Pedro naeca petaenexa pacuenia Jesús pijavajabitsaë exanatsi.

⁵⁹ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

⁶¹ Jumaitsibeje bajaraponëbeje Jesús yabara:

—Maponë jumaitsije: “Xanë necaējēpa taxuabinexatsica Dioso pijatemplobo. Necaējēpanua acueyabi matacabita icatsia taveretetsinexa itsabo,” jai maponēje, jai beje bajaraponēbeje Jesús yabara.

⁶² Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapētaemē tsaja itsalivaisiyo ata nejumecanavitsinexa? ¿Xaniajai tsabaja pacuenia maponēbeje caneconitsiajumaitsibeje? jai sacerdotevi pepo penamatacaitorobinē.

⁶³ Jesús itsiata moya. Nexata bajaraponē icatsia jumaitsi Jesúsjavabelia:

—Caitorobatsi caecuenia tanenavajunupaebinexamē nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamē Cristomē, athēbēvetsica Dioso pecaitorobinētsica jivi necapanepaenexa. ¿Xamē tsaja Dioso pexēnatomē? jai.

⁶⁴ Nexata Jesús jumaitsi:

—Jājā, xanē rabaja pacuenia nejumaitsimē. Nexata icatsia pacajumaitsitsi. Paxamē raja panetaename xanē, Daxitajivi Pematapijinēnē, taecaejava Dioso pecujanenia, daxitajamatabēcuene pecaējēpaenētsi. Panetaenamenua tanajetarucaejava athēbēvetsica itarērēbota, jai Jesús.

⁶⁵ Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Mara ponē Dioso apo pejitsipaecuenia cuaicuaijaije. Dioso bepexēnato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsēnēa baja apo namatavenonaetsi itsamonae vajanacatsipaebinexa paneconi yabara maponēje naneconitsiaexanaejitsiatsi. Paxamē rabaja pajumetaneme maponēje Dioso apo pejitsipaecuenia pecuaicuaijajava.

⁶⁶ ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquiababeponatsi pecobethaitonēta. Itsamonae itabarapacabixuababiabatsi.

⁶⁸ Nexata bajarapamonae jumai tsaponae Jesúsjavabelia:

—¡Xamë raja itsa Cristomë, athëbëvetsica Dioso itsa peccatorobinëtsica jivi necapanepaenexa, nexata vënëjonare ponë caitabarapacabiauxuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi

(Mr 14.66-72; Lc 22.56-62; Jn 18.15-18, 25-27)

⁶⁹ Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponaponame Jesústa, Galilea nacuapijinëta, jai.

⁷⁰ Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

⁷¹ Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

⁷² Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsi. Apo yapëtaenë cajena bajaraponë, jai.

⁷³ Bajaraxuacujinae icatsia, caeepatoyocujinae, bajarajota penubenaevi kujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviya-juvënënëmë. Tsipaji rabaja Galilea nacuapijivi penatsipae-bicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Dioso-javabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús

pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejajjava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi

(Mr 15.1; Lc 23.1-2; Jn 18.28-32)

¹ Ajena baja matacabi tsarucaponae, sacerdotevi penamat-acaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi. ² Nexata Jesús cobecëtsiaya caponaliatsi nacuaeavetsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. ⁴ Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapalata pejamatabëcueneta jivitonë beyaxuabijitsiatsi, najai bajarapamonae.

⁷ Nexata bajarapamonae najamatabējēpa bajarapapalatanēanēta pecomuatsinexa ira. Nexata bajarapamonae bajarapapalatanēanēta comuata canalitonē pefaratabiabinē pijairami. Bajarapamonae comuata bajarapaira, itsanacuaverena pepatsivi itsa tēpa Jerusalén tomarata, bajarapairata pemēthētabiabinexa. ⁸ Bajaraxuata mapamatacabijavaberena ataje vēnēruba bajarapaira mapejumaitsivēnēje: “Papalata pejamatabēcueneta jivitonē beyaxuabatsi, bajarapapalatata pecomuatsiira,” pejaivēnē vēnēruba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinēmi profeta Jeremiaspijinē bajayata tajēvelia vjunupaeba bajarapapalata. Profeta Jeremiaspijinē baja cajena bajarapapalata yabara tajēvelia jumaitsi mapacueniaje: “Israelnacua pevetsivi rajutsiana jivitonē pecanajetsinējavabelia treinta ponēbeje, pepo platananitota pexanaenēanē. Bajarapapalatanēanē icatsia bajarapamonae pitsiana. ¹⁰ Nexata bajarapapalatanēanēta bajarapamonae comuatsiana canalitonē pefaratabiabinē pijairami, pacuenia Dioso tajēvelia nejumaitsi,” jai bajayata profeta Jeremiaspijinē tajēvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi
(Mr 15.2-5; Lc 23.3-5; Jn 18.33-38)

¹¹ Jesús nutatsi nacuaevetsinē Pilato pitabarata. Nexata Pilato jumaitsi Jesúsjavabelia:

—¿Xamē tsaja judíovi pepo nevetsinē? jai Pilato.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemē tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabēcuenenabenajaca. Apo yapētae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi
yabara pelivaisi

(Mr 15.6-20; Lc 23.13-25; Jn 18.38–19.16)

¹⁵ Nacuaevetsinē Pilato xaina pijacujirucuenē. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi vajētabiaba Pilatojavabelia, bajarapajivi Pilato copatabiaba pascua

fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenë, Barrabásvënënë. Bajaraponë bitso piacujirubejenëcuene yapëtanetsi daxitajivi. ¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponë pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

¹⁹ Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponë, ponë itsacueneneconiyó ata apo penaneconitsinë. Ajena raja, meravi, amajitsinaebejenë bajaraponë yabara,” jaitsirena Pilato pijava. Nexata picani Pilato jamatabëcopata Jesús.

²⁰ Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinexatsi, jai tsaponae bajarapamonae.

²¹ Nexata nacuaejetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

²² Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

²³ Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

²⁴ Pilato tane piauamesaëjava bajarapamonae. Muxujiobi ata, apo jumecovënëtsitsi. Bitsoyo biji caranata bajarapamonae jamatabënaecajematapona bajarapatomarata. Nexta Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapëtaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatabëcueneta apo beyaxuabiaexanaenë tsane maponëje, planeconijibinë. Paxamë panejamatabëcueneta pabeyaxuabiaexanaename, jai Pilato.

²⁵ Nexata daxita bajarapamonae jumaitsi:

—¡Itsa bajaraponë planeconijibinë Diosojavabelia, nexta bajaraponë patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

²⁶ Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaëvi ayaicuenia Jesús pejumatatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

²⁷ Nexata baja Pilato pijajivi, vajabitsaëvi, Jesús caponaliatsi nacuaevetsinë Pilato pijaboxanetojavabelia. Nexta bajarajota Jesús matatoyorotsia nacaetuatsi daxita vajabitsaëvi. ²⁸ Jesús penaxatatsijava vajabitsaëvi vejumajonotatsi saicayajava pexatatsinexatsi. Nexta jane baja vajabitsaëvi Jesús quenetsiataeya xatatatsi petsobiajava benacuaevetsinëcuenia petaenexatsi. ²⁹ Becoronacuenia pemataxatatsinexatsi, peejuvitoyoroto tsmataexanatsi. Bajarapatoyoroto Jesús mataxatatatsi. Tsiheberutatsinua naebo pecujanenia benacuaevetsinëcuenia petaenexatsi. Nexta bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponae:

—¡Bajaco, judíovi pepo pevetsinë! jai tsaponae ts bajarapamonae.

³⁰ Suabaponatsi. Vecuapitatsi naebo. Bajarapanaebota mataconitajarababiabatsi. ³¹ Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mr 15.21-32; Lc 23.26-43; Jn 19.17-27)

³² Vajabitsaävi Jesús itsa caponaliatsi tomaravecua, namutota caxitajaraba Simónvënënë, Cirene tomarapijinë. Nexata vajabitsaävi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponanexa.

³³ Jesús caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsi-jume: “Jivimatasipatsuto,” pejaijume. ³⁴ Bajarajota picani Jesús rajutatsi vinora, pematäjërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaävi cobematabiabarutatsi cruzajavabelia. Bajaraxuacujinae vajabitsaävi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaävi natsicobetsana Jesús penaxatatsijavami. Bajarapacuenia vajabitsaävi itsa natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi. ³⁶ Bajaraxuacujinae vajabitsaävi bajarajota evetena penaitaxutocaevetsinexatsi Jesús. ³⁷ Bajarajota Jesús pematobocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. ⁴⁰ Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matacabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso

pexēnatomē, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ēpamonae najumaitsi:

⁴² —Maponēje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa apo caējēpaetsi. Itsa xaniajai Israel nacuapijivi pepo pevetsinē, nexata aeconoxae cruzajavavetsica runaenica vajataenexa. Nexata jane baja jumecovēnētsianatsi Cristonēcuene. ⁴³ Bajaraponē pina najamatabēcuenecopata Diosojavabelia peyavenonaenexatsi. “Xanē raja Dioso pexēnatonē,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponēbeje penacobetoxotsinēbeje Jesús yajavacobematabiabarutatsi, bajaraponēbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi
(Mr 15.33-41; Lc 23.44-49; Jn 19.28-30)

⁴⁵ Jesús baja itsa tēpaejitsia, ajena matonejejitsia, daxita nacuanējava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aējai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsiyume: “TajaDioso, tajaDioso, ¿detsa xuajitsia baja tajaepato necopatame?” pejaiyume.

⁴⁷ Nexata itsamonae bajarajota penubenaevi bijiaya jumetane bajarapacuenia Jesús pejumaitsiyava. Nexata saya jamatabēcuenenavēxaniabiaya jumaitsi bajarapamonae:

—Mara ponē junata profeta Elíaspijinēmi, Diosojumepaebinēmi, jai bajarapamonae.

⁴⁸ Nexata bajarapamonaejajuvēnēnē bepijia cujinaelia pecarenanexa esponjavēnējava. Nexata esponjavēnējava jabutaba piajatuvinorayalia. Bajaraxuacujinae esponjavēnējava naeboupita cētaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonae jumaitsi:

—Copare abaxē. Taenatsi Elíaspijinē itsa najetaruca pecapanepaenexatsi, jai bajarapamonae capocaponaeya.

⁵⁰ Icatsia Jesús pinijicuenia aējai. Bajaraxuacujinae jane baja Jesús tēpanajereca. ⁵¹ Paepatota Jesús

tëpanajereca, bajarapaepatota templobo ënëtuatujëalia peyatuucutarutsipana, ayaipapaëbërëpanaxaneto, titititica tuatujëareca, athëbëvetsicacujinae irabereca. Ira najëaba. Ibotoxanetonë ata sarapajunujunua. ⁵²⁻⁵³ Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi matcabita icatsia ita asaë petëpaeacujinae, pamonae pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

⁵⁴ Jesús cruzata petëpaejavata vajabitsaëvi pijacapítán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonae ita tane ira penajëabijava, itsajavanë ata ita taepona, bajarapamonae bitso junava. Jumaitsi:

—Matsaena ponë tëpaje, pepacuene baja rovia Dioso pexënato, jai bajarapamonae.

⁵⁵ Bajarajota petiriavibitsaëtoxaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaeverena, Jesús peyavenonaevimitsi.

⁵⁶ Bajara papetiriavibitsaëtoxaneto tuatujëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bajarapova Santiagobeje Josébeje pena. Itsava pijinia Salomévenëva. Bajarapova pijinia Santiagobeje Juanbeje pena. Bajarapova Salomévenëva, Zebedeo pijava.

*Pacuenia Jesús petëpaenë mëthëtatsi yabara pelivaisi
(Mr 15.42-47; Lc 23.50-56; Jn 19.38-42)*

⁵⁷ Itsa baja caniviyotsia, José, Arimatea tomarapijinë, pona nacuaevetsinë Pilatojavabelia. Bajaraponë José bitso pexainaenë pexinaejava. José jumecovënëtaaponapona Jesús Cristocuene. ⁵⁸ Nexata José ita pata nacuaevetsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. ⁵⁹ Nexata José cruzajavavetsica pitsica Jesús petëpaenë. Mataquionaeya daxitanëreca matcacëba pexaniaviria piapiasábanapanata, piaxuirajibipanata. ⁶⁰ Bajaraponë José, pamatacabi tëpa pemëthëtsinexatsi picani, iboitapajanitojavata pini-jiibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae piniji-ibopanaxaneto José tixirena. Yavajuvëpacatabuata. Nexata baja José naviata pijaboyabelia. ⁶¹ Bajarajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaishi

⁶² Pascuafiesta pejonematacabinexa pevajënaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia. ⁶³ Nexata bajaramonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaecujinae, acueyabi matacabita, icatsia asaënë tsane,” jai tsabiabi. Bajarapejumaitsijava paxanë apo panacofënëtsinë. ⁶⁴ Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matacabijavabelia, bajaraponë pecapaebimatacabijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejajava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaëvi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

28

Pacuenia Jesús petëpaecujinae icatsia asaë yabara pelivaishi
(Mr 16.1-8; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, meravia pitsijavata, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia.

² Jemata ira najëaba. Tsipaji Dioso pijaángel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanajumata.

³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. ⁴ Vajabitsaë, pamonaevetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitsi petirivabejevavelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavelia, pajaitamebeje. ⁶ Ajibi raja tsarucae majotaje. Asaë rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani buatasti. ⁷ Bajaraxuacujinae paliamëbeje tsane bepijia. Pijajivijavelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyavelia pina pona Galilea nacuyavelia. Baja pina jotalia pacaxitajarabianame,” pajamëbeje tsane pijajivijavelia. Bajarapalivaisiyo xainajë patacatsipaebinexabeje, jai ángel bajarapovabejevavelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinexabeje Jesús pija-jivijavelia. ⁹ Bajarapovabeje namutualia pecujinaejinaenajetarucaejavatabeje, Jesús jemata tsitanaitajëtatsibeje. Nexata bajarapovabeje kujitabaliabeje Jesúsjavavelia. Bajacobat-sibeje. Nexata pematatabacabëta nucajunuabeje. Sitaicaliabeje yaiyataeya Jesús pecopiapitsinexabeje bajarapacuenia. ¹⁰ Jesús nexata jumaitsi bajarapovabejevavelia:

—Pëtsa pajunavamebeje. Paliamërebeje tajajivijavelia. Pajumaitsimëbeje tsane tajajivijavelia: “Jesús raja jumaitsi. Paponeremelia pina Galilea nacuyavelia. Baja pina jotalia pacacaxitajarabiana Jesús,” pajamëbeje tsane tajajivijavelia, jai Jesús.

Pacuenia vajabitsaëvi navajunupaeba yabara pelivaisi

¹¹ Paepatota ëMaríavënëvabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënëvi, pona tomaravelia. Bajarapamonae tsipaeba sacerdotevi penamatacaitorobivijavelia pacuenia tane bajarapamonae. ¹² Nexata sacerdotevi penamatacaitorobivi pona judíovi pijaancianovijavelia penabarëcuaicuajainexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenejëpa. Nexata bajarapamonae rajuta ayaijava palata vajabitsaëvijavelia. ¹³ Bajarapamonae jumaitsi vajabitsaëvijavelia:

—Jivijavabelia pajumaitsimē tsane: “Meravi pataitamajitsita, Jesús pijajivi pata. Nexata bajarapamonae juta Jesús petēpaenē,” pajamē tsane. ¹⁴Nexata nacuaevetsinē Pilato itsa jumetaena mapajumeje, paxanē itsiata pacayavenonaenatsi itsacuene papecaexanaeyaniva, jai bajarapamonae vajabitsaēvijavabelia.

¹⁵ Nexata vajabitsaēvi jejai. Nota bajarapapalata. Nexata jane baja vajabitsaēvi pona najumetsēnētsiaya jivijavabelia pejumaitsinexa pacuenia itorobatsi. Nexata vajabitsaēvi najumetsēnētsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petēpaenē jutatsi, jai tsaponae jivijavabelia.

Bजारapacuenia vajabitsaēvi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petēpaenē jutatsi, jai tsabiabi.

Pacuenia Jesús petēpaecujinae icatsia itsa asaē, pijajivi itoroba pejumelivaisi jivi petotsipaebanajetarubenaenexatsi daxitanacuanējava yabara pelivaisi

(Mr 16.14-18; Lc 24.36-49; Jn 20.19-23)

¹⁶ Jesús pijajivi once ponēbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapaebatsi. ¹⁷ Nexata bajarapatsutojumata Jesús pijajivi itsa taenuta Jesús, yaiyataeya pitabarata pematatabēta tonubena. Itsiata itsamonae Jesús pijajiviyajuvēnēvi jamatabēcuenenavēxaniabiaya jamatabējumaitsi:

—Apo Jesús meta, jamatabējai.

¹⁸ Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuene athēbētatsia, daxita mapanacuajava ataje, taevetsinexa.

¹⁹ Nexata pacaitorobatsi. Paponare daxitanacuanējava daxitanacuanēpijivi tajumelivaisi patanetotsipaebinexamē tanejumecovēnētsinexa.

Bजारapamonae pabautis-abaponaename taxa pevēnēta, xanē ata pexēnatonē tavēnēta, Espíritu Santo ata pevēnēta. ²⁰ Bजारapamonae patsipaebaponaename pejumecovēnētavanapaenexa

daxita pacuenia pacaitorobatsi. Pētsa panacofēnētame daxitamatacabi patacayajavaponaponaeyava. Nacua pev-ereverecaejavabelianexa ata pacayajavaponaponaenatsi, jai Jesús pijajivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexënato pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitisijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa.

Catsivajënaexanebijitsia nijanamoto. ³ Nexata

tanejumelivaisipaebinë vavajai tsane petusato

nacuata. Jumaitsi tsane jivijavabelia: “Jivi baxaneba

panamutoverena najetarucaejetsia petuxanenë.

Batoroviaexananua namuto. Bajara pijinia pacuenia

paxamë ata panajamatabëcuenexaniavaere pepo

petuxanenë pepatsivajënaeya paxamëjavaberena,” jai

tsane tanejumelivaisipaebinë xamë yabara,

jai bajayata tajëvelia Dioso pexënatojavabelia pejumaitisijava Juan jivibautisabinë jivijavabelia Dioso pejumelivaisi petsipaebanajetarucaejavanaxa yabara.

⁴ Bjaraxuata nexata Juan jivibautisabinë Dioso pejumelivaisipaebinë najetaruca petusato nacuajava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava.

Panajamatabëcuenepënëyorore Diosojavabelia. Ba-

jaraxuacujinae pacabautisabianatsi. Nexata Dioso

pacavecuajibiaexanaena panijaneconimi, jai tsaponae

Juan jivijavabelia.

⁵ Nexata ayaibitsaëtoxaneto Judea nacuapijivi,

Jerusalén tomarapijivina, muxunaponabiabatsi Juan

petsipaebilivaisi penamuxunaevetabiabinexatsi. Nexata

bjarapamonae pibisiacuene pexanaejavami, rovia

Diosojavabelia navecuapaebapona. Bjaraxuacujinae Juan

bautisabapona bjarapamonae Jordán meneta.

⁶ Juan naxatata camellonata pexanaejava. Naepacëta cuer-

obocoto. Pexaejava ëbosese, jabëra yajava. ⁷ Juan Jesús peliv-

aisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bjaraponë daxitacuene

pexanaenexa pecaëjëpaenëtsi tsane. Xanë raja saya beveli-

ajamatabëcuenenënë bjaraponëvecua. Nexata vecuaauranë

bajaraponë bepijajivitonënë tanataenexa. Nexata auranë pijazapato ata tataxujonotsinexa. ⁸Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espíritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavanexa.

Pacuenia Juan bautisaba Jesús yabara pelivaisi
(Mt 3.13-17; Lc 3.21-22)

⁹Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta. ¹⁰Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. ¹¹Jesús jumetanenua athëbëvetsica Dioso pejumaitisjavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

Pacuenia Jesús jamatabëcuenejëbatsi dovathi yabara pelivaisi
(Mt 4.1-11; Lc 4.1-13)

¹²Jesús Juan pebautisabicujinaetsi, bepijiayo Espíritu Santo ponaeyaexanatsi petusato nacuayabelia. ¹³Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae ángelevi runaica Jesús pevavenonaenexatsi.

Pacuenia Jesús Galilea nacuata taxuxuaba Dioso pitoroblivaisi jivi petsipaebijava yabara pelivaisi
(Mt 12.12-17; Lc 4.14-15)

¹⁴Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenejëbatsi Diosojavabelia. Pajumecovënëre mapapexanialivaisije papecapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi

(Mt 4.18-22; Lc 5.1-11)

¹⁶ Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacae-bananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje. ¹⁷ Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujaru-bianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyajavaponaponaenë Jesús jamate-jemayaexana yabara pelivaisi

(Lc 4.31-37)

²¹ Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonaejamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³ Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

²⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabi-jirava jivitonëvecua. ²⁷ Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueñeje? ¿Detsa mapitsipejanacujaru-bicueñeje? ¡Maponëje Jesús, beDioso pitorobinëtsitsical! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepijia Jesús vënëlvivaisitanetsi Dioso pesaëta pinijicueñe pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Lc 4.38-39)

²⁹ Jesús baja pitsapa judíovi penacaetuatabiabibovecua. Nexata Santiagobeje Juanbeje Jesús yajavapona. Jesús bana napon Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesús bana pevajënae romaebanucatsi camata. Nexata itsamonae bepijia Jesús tsipaebarëcëpatsi bajarapova peromaebanucaevatsi. ³¹ Nexata Jesús imoxoyotabalia peromaebanucaevatsi. Cobeyotsiaya matakota. Nexata bajarajota peromaebanucaevatsi vecuajibi tsanajetsitsireca baja domae. Nexata bajarapova Jesús bana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi

(Mt 8.16-17; Lc 4.40-41)

³² Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. ³³ Daxita tomarapijivi Jesús pepatsibota baupajavaberena nacaetuata. ³⁴ Nexata Jesús jamatejemayaexana ayaibitsaëto daxitacuenevitane pexainaevimi. Vecuacapitsapanua dovathi peyajavajinavanapaevi. Jesús apo tocopatsi dovathi pecuaicuajainexa jivijavabelia pevajunupaebiyanivatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Lc 4.42-44)

³⁵ Pepo bajayacunua, abaxë itsa apo napebetsi matakabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matakabi baja. ³⁶ Itsa baja matakabi, Simónbana Jesús pëjaitaponalia. ³⁷ Itsa baja bajarapamonae Jesús caxitaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

—Ponatsi baja imoxoyo penaetomaraxijavabelia bajara-jotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹ Nexata daxita Galilea nacujava Jesús jivi tsipaebapona Dioso pitorobilivaisi judíovi penacaetuatabibonëjava. Jesús jivi dovathi vecuacapitsaponganua.

Pacuenia Jesús jamatejemayaexana bajayajebi bitso peper-abëtsabanaenë yabara pelivaisi

(Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peper-abëtsabanaenë. Nexata bajaraponë pematabacabëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

⁴¹ Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴² Bajarapacuenia Jesús pejumaitsijavata peper-abëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi. ⁴³ Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

⁴⁴ —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuajibijava niavitanejavami, jai picani Jesús bajayajebi bitso peper-abëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxita-jivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaeto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.

2

Pacuenia Jesús jamatejemayaexana petabusipacuenabinëtsi yabara pelivaisi
(Mt 9.1-8; Lc 5.17-26)

¹ Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. ² Nexata jivibitsaëtoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponëbeje parena, camayota peyavëtaranajetarubenaevi petabusipacuenebinëtsi. ⁴ Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojuotsica camayota yacopatsica petabusipacuenebinëtsi. ⁵ Jesús jamatabëcueneyapëtane pacuenia bajarapamonae sivana-jamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaiti mapacueniaje:

—Tajabanänë, pibisiacuene rabaja nexanaeconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitisijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷—Maponëje Jesús Dioso apo pejitsipaecuenia cuaicuaijai. Itsanë ata cajena apo caëjëpaetsi itsajivi pibisiacuene pexanaeconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamonae.

⁸ Jesús jamatabëcueneyapëtane bajarapamonae jamatabëcuenenavëxaniabiaya bajarapacuenia pesivanajamatabëxinaejavatsi. Nexata Jesús jumaiti bajarapamonaejavabelia:

—Pëtsa bajarapacuenia panesivanajamatabëxiname. Tsipaji cajena xanë necaëjëpa jivi pibisiacuene pexanaeconimi tavecuaajibiaexanaenexa. ⁹ Paxamë apo pacacaëjëpae ata itsajivi pibisiacuene pexanaeconimi panevecuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo

yapëtae tsipae saya jema panejumaitsijava. Itsiata baitsi jane itsa apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjêpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjêpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëjê, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

¹¹ —Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënënë yabara pelivaisi

(Mt 9.9-13; Lc 5.27-32)

¹³ Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia.

¹⁴ Bajaraxuacujinae penajetarucuejavata Jesús taeyeta Levívënënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

¹⁵ Nexata Leví junata Jesús pebarënanabinexa pijabota. Nexata Leví pijabota Jesús pexaejava naxane. Leví pijabota

ayaibitsaëto naena gobierno pejamatabëcuene jivijavabelia impuestomatamo pematamoyanijobabiabivi. Itsamonae ata nanabane piajamatabëcuenebejevi. Nexata Jesús pijajivi nabarëeca bajarapamonaejavata. ¹⁶ Nexata fariseovi, judíovi pecujarubivinia, Jesús taeyetatsi daxita bajarapamonaejavata pijajivi penabarënanabaneceajava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsi-paji gobierno pejamatabëcueneta impuestomatamo pematamoyanijobabiabivijavata, piajamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

¹⁷ Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava penajamatabëcuenepënyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtaona Diosojavabelia pexaejava apo pexaeyabiabixae yabara pelivaisi

(Mt 9.14-17; Lc 5.33-39)

¹⁸ Itsamatacabi Juan pijajivi, fariseovi pijajivinia, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinia, pexaejava apo xaeyabiabi pamatacabibeje Diosojavabelia vajëtaona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëtaona? jai Jesús peyanijobivitsi.

¹⁹ Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsohi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. ²⁰ Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara

pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

²¹ Nexata bajarapamonae perujujamatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivotito titinaejitsipa. ²² Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsi-paji perujubocodoruanë apo yanayeretsi tsipae. Tsi-paji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja penacopabinexa.

Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi

(Mt 12.1-8; Lc 6.1-5)

²³ Judïovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuatapona.

²⁴ Nexata fariseovi jumaitsi Jesúsjavabelia:

—¡Taema mapacuenije! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenije, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarpacuenia exanae ata, itsiata apo pibisiacuene. Tsi-paji bitso piajani. ¿Apo palebimë tsi-paji Dioso pejumelivaisibaxuto

paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? ²⁶ Davidpijinë joneya Dioso pijatemploboyalia pamatacabi Abiatarpijinë daxita sacerdotevi penamatacaitorobinë tsaponapona. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueræevetsinexa. Tsipaji Dioso yapëtane pacuenia jivi namatavenona penacueræevetsinexa. Dioso apo exanae jivi saya jema peyaiyataenexa penacueræevetsimatacabianë. ²⁸ Nexata xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueræevetsimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaque-naenë yabara pelivaisi

(Mt 12.9-14; Lc 6.6-11)

¹ Penacueræevetsimatacabita Jesús joneya judíovi penacætuatabiabiboyalia. Nexata bajarajota pebi naeca pecobetsaque-naenë. ² Nexata Jesús naitaxutocævetatsi fariseovi petaenexatsi pecobetsaque-naenë pejamatejemayaexanae-java penacueræevetsimatacabita. Nexata Jesús pecobetsaque-naenë itsa jamatejemayaexana penacueræevetsimatacabita, “Jesús raja naneconita Diosojavabelia. Tsipaji penacueræevetsimatacabita nacueneba,” pejainexa bajarapamonae. ³ Nexata Jesús jumaitsi pecobetsaque-naenëjavabelia:

—Nonotapunare. Nucare mapamonae pitabarataje, jai.

⁴ Nexata Jesús jumaitsi fariseovijavabelia:

—Penacueræevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. ⁵ Nexata Jesús anaeya naëcota bajarapamonae. Bajaraxuacujinae Jesús bejamatabëjibireca. Tsipaji yapëtane pijamatabëcuenetajajava fariseovi. Nexata Jesús jumaitsi pecobetsaque-naenëjavabelia:

—Namaxërovire, jai.

Nexata pecobetsaque-naenë namaxërovita. Bajarajota cobexanepananajereca baja. Pecobetsaque-naejavami ajibi.

⁶ Nexata fariseovi itsa tane Jesús pecobexanepanaeyaex-
anaejava pecobetsaquenaenë, fariseovi anaepana. Nexata
bajarapabovecua pitsapa. Pona penabarëcuaiquaijainexa
nacuaevetsinë Herodes pijajivijavabelia. Bajarapamonae
najumejaita Jesús pebeyaxuabinexatsi.

*Pacuenia jivi nacaetuata Galilea pucaxaneto itapata
yabara pelivaisi*

⁷ Jesús, pijajivi yajava, pona Galilea pucaxaneto ita-
payabelia. Nexata Jesús pënaponaliatsi ayaibitsaëtoxaneto
Galilea nacuapijivi. ⁸ Nexata Jesús pënaponaliatsi Judea
nacuapijivinu, Jerusalén tomarapijivinu, Idumea nacuapi-
jivinu, Jordánmene itsapanaverenapijivinu, imoxoyo Tiro
tomaravecua pejinavanapaevinu, imoxoyo Sidón tomar-
avecua pejinavanapaevinu. Daxita bajarapamonae Jesús
pënaponaliatsi tsipaji Jesús vënëlivaisitanetsi Dioso pesaëta pini-
jicuene pexanaponaejava. ⁹ Nexata Jesús pijajivi itoroba
jera petoxaniavaetarutsinexatsi menetareca. Itsa bajarapa-
jivibitsaëtoxaneto Jesús bitso matakënënaponatsi, nexata ba-
jarapamo ënëabereca Jesús perunaenexareca. ¹⁰ Jesús baja
ayaibitsaëto piavitanevi jamatejemayaexana. Bajaraxuata
itsamonae, piavitanevi, Jesúsjavabelia natorotaponabiaba pe-
jayatsinexatsi.

¹¹ Dovathi peyajavajinavanapaevi Jesús itsa taeyabiabatsi,
bajarapamonae irata othopabiaba Jesús pitabarata. Bajara-
pamonae aëjai tsabiabi.

—Xamë tsaena Dioso pexënatomë, jai tsabiabi dovathi peya-
javajinavanapaevi.

¹² Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivi-
javabelia, jai Jesús bajarapamonaejavabelia.

*Pacuenia Jesús pijajivi ayaibitsaëtoxanetoyajuvënëvi itapeta
saya doce ponëbeje apóstolevinexa yabara pelivaisi*

(Mt 10.1-4; Lc 6.12-16)

¹³ Jesús pijajivi ayaibitsaëtoxanetoyajuvënëvi, doce saya
ponëbeje, itapeta apóstolevinexa. Jesús pitapetsivajënae
apóstolevinexa, junaya petsutojumabetsia. Bajaravetsica
Jesús junatanuca ponëbeje jamatabëitapeta apóstolevinexa.
Nexata pamonae Jesús itapeta apóstolevinexa, junaya petsu-
tojumabetsia, Jesúsjavabetsia. ¹⁴ Nexata Jesús caetuata caebit-
saëtoyo, doce ponëbeje pijajivi, pepënajinavanapaevinexatsi.
Jesús itorobijitsianua bajarapamonae daxitanacuanëjava
jivi petsipaebanajetarubenaenexa Dioso pitorobilivaisi.
¹⁵ Jesús pijajivi jamatabëcuenecaëjëpaeyaexana Dioso
pesaëta pejamatejemayaexanaponaenexa piavitanevi.

Jamatabēcuenecaējēpaeyaexananua Dioso pesaēta dovathi jivi pevecuacapitsapaponaenexa. ¹⁶ Jesús pijaapóstolevi, doce ponēbeje, mapevënēanēje. Copiaya ponē pevënē Simón. Bajaraponē Jesús vënēruba itsavënē, Pedro. ¹⁷ Itsanē Santiago. Itsanē Juan. Santiagobeje Juanbeje nacaebananēbeje, Zebedeo pexēnatobeje. Bajaraponēbeje Jesús vënēruba Boanerges. “Boanerges,” itsa jai, bajarapamonae pijajumeta mapajumetaje pejumaitsijume: “Yamaxē pexēnatobeje,” pejajume. ¹⁸ Itsanē pevënē Andrés. Itsanē Felipe. Itsanē Bartolomé. Itsanē Mateo. Itsanē Tomás. Itsanē Santiago, Alfeo pexēnato. Itsanē Tadeo. Itsanē Simón, celotenē. ¹⁹ Itsanē Judas Iscariote. Bajaraponē bexējavabelia Jesús canajetsijitsiatsi pijavajabitsaē pecobeyabelia pebeyaxuabinexatsi.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta, Jesús dovathi jivivecua capitsapapona,” jai yabara pelivaisi (Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaētoxaneto nacaetuata. Nexata acuenebi Jesús pijajivi pebarēnabanijava. ²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijava, Jesús pijamonae vënēlvivisitanetsi. Nexata Jesús pijamonae ponarena Jesúsjavaberena pebarēponaenexatsilia picani.

²² Judíovi pecujarubivi, Jerusalén tomaraverena peponaevi, jamatabēcuenenavēxaniabiaya Jesús yabara jumaitsi:

—Mara ponē Jesúsje, Beelzebú yajavaponapona. Beelzebú raja daxita dovathivi pevetsinē. Bajaraxuata Jesús Beelzebú pesaēta dovathi jivivecua capitsapapona, jai judíovi pecujarubivi jamatabēcuenenavēxaniabiaya Jesús yabara.

²³ Nexata Jesús junata bajarapamonae jamatabēcuenenavēxaniabiaya pejumaitsijava pecanaējētsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaejitsipa, nexata Beelzebú bepijavajabitsaē taejitsipa pijajivi. ²⁴ Pacanaējēre mapacuenēje. Nacaenacuapijivi ata itsa navecuanatsanaejitsipa penasivanavajabitsaētsinexa, namataenetsia naverebiabijitsipa nacaenacuapijivi ata. ²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaētsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua

itsa capitsapaponaejitsipa pijajivi dovathivi, nexata bepijavajabitsaenë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaenëcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaenë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaenë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaenë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

²⁸ Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. ²⁹ Itsiata baitsi jane pajivi pibisiacuenia baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaitsi tsipaji Jesús Espíritu Santo yjavaponapona atatsi, judíovi pecujarubivi jumaitsi Jesús yabara: “Jesús raja Beelzebú yjavaponapona,” jai. Nexata bajaraxuata bajarapamonae naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Lc 8.19-21)

³¹ Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. ³² Nexata pamona Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapëneverena. Cajaita raja xamë, jai bajarapamonae Jesúsjavabelia.

³³ Nexata Jesús jumaitsi bajarapamonaejavabelia:

—¿Detsa pitsijamatabëcuenevi taena, tajuyapijivinua? jai Jesús.

³⁴ Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamona xanëjavata penaevije, bajarapamonae jane taenajivi, tajuyapijivinu. ³⁵ Tsipaji raja pamona exana pacuenia Dioso itorobatsi, bajarapamonae jane baja tajuyapijivi, taenajivinu, jai Jesús bajarapamonaejavabelia.

4

Pacuenia Jesús jivi livaisi tsipaeba peubinë pelivaisicuenia yabara pelivaisi

(Mt 13.1-9; Lc 8.4-8)

¹ Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoxaneto nacaetuta itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto tajetabovelialia nubena. ² Nexata Jesús daxitacuene livaisianë tsipaeba jivijavabelialia. Jesús jumai tsaponae bajarapamonaejavabelialia mapacueniaje:

³ —Panenamuxunaevere mapalivaisije. Peubinë pona pabiabelialia peubinexa. Nexata itsa pata pabita, peubixu pexucayajabajarabicuenialia ubanajetaruca. ⁴ Nexata pexucayajabajarabijavata itsaxu othopa pabi tuatuaejëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. ⁶ Nexata icotialia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenialia itsa yajavajuva, bitso xanëebotonë matakënënatsi peubijavami. Nexata peubijava apo xainae pecuai. ⁸ Itsaxu pijinia othopa pexaniairata. Nexata juva. Xaniavaetsialia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelialia.

⁹ Nexata icatsia Jesús jumaitsi jivibitsaëtoxanetojavabelialia:

—Pajivi jamatabënejumeyapëtane patacatsipaebilivaisi, nenamuxunaevetsi xaniavaetsialia, jai Jesús.

Pacuene yabara Jesús jivijavabelialia livaisi tsipaeba ëcomparacióncuenialia yabara pelivaisi

(Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijaepato barënacopata doce ponëbeje pijajivi, itsamonae itsiata yajava. Nexata

bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinē pelivaisicuenia, pajamatabēcuene xaina, patayapētaenexa panetsipaebare, jai bajarapamonae Jesúsjavabelia.

¹¹ Nexata Jesús jumaitsi bajarapamonaejavabelia:

—Paxamē rabaja xaniavaetsia Dioso pacayapētaeyaexana Dioso papijajivimē papecaevetsijava. Bajarapacuene abaxē daxitajivi apo yapētae. Baitsi ra saicaya pamonaē apo taja-jivi, tsipaebajē livaisianē ēcomparacióncuenia. ¹² Bajaraxuata nexata bajarapamonae tae ata Dioso pesaēta pinijicuene taexanaejava, itsiata apo yapētae pajamatabēcuene yabara exanajē pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapētae pajamatabēcuene xaina tatsipaebilivaisi. Bajarapacuenia apo jumeyapētae penajamatabēcuenecopatsiyaniva Diosojavabelia pibisiacuene pexanaeconimi Dioso pevecuaajibiaexanaeyanivatsi, jai Jesús.

Pacuenia Jesús yapētaeyaexana pijajivi, itsamonae yajava, pajamatabēcuene xaina palivaisi tsipaeba peubinē pelivaisicuenia yabara pelivaisi

(Mt 13.18-23; Lc 8.11-15)

¹³ Jesús icatsia jumaitsi pijajivijavabelia:

—Itsa apo pajumeyapētaemē pajamatabēcuene xaina palivaisi pacatsipaebatsi peubinē pelivaisicuenia, ¿detsa nexata pacuenia pajumeyapētaename daxita palivaisianē pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapētaenexa pajamatabēcuene xaina palivaisi tsipaeba peubinē pelivaisicuenia:

—Pajivi raja peubixu uba, bajarapajivi bepepaebinē Dioso pitorobilivaisi. ¹⁵ Pacuenia itsi pabita peubixu, paxu othopa pabi tuatujajējava penajetarucaenamutojumata, bajara tsijamatabēcueneitsitsi itsamonae Dioso pitorobilivaisi. Bajaramonaē itsa tsipaebatsi Dioso pitorobilivaisi, jumetane picani. Tsijamatabēubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi. ¹⁶ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barēyaya jumecovēnēta.

17 Itsiata baitsi jane pacuenia irabereca apo atabunepepi-areca paxu othopa ibopananējumata, nexata nabijiana, bajara tsijamatabēcuenesitsi bajarapamonae Dioso pitorobilivaisi. Tsipaji pepacuene pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopiapatatsi daxita petoayapēbejecuenetsi, itsa yalivaisibatsinua Dioso pitorobilivaisi yabara, nexata pejumecovēnētsijavami bajarapalivaisi bepijia copaba. Pevajēnaeyabelia apo jumecovēnētavanapae. 18 Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcuenesitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. 19 Itsiata baitsi jane bitso jamatabēcuenenatsi mapanacuapijicuene yabaraje. Tsipaji najamatabēxaina ayaijava palata pexainaenexa. Nexata pijacuata najamatabēcueneyamaxēitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonae. Tsipaji Dioso xaniavaetsia apo tojinavana-pae. 20 Pacuenia pijinia itsi paxu othopa pexaniairata, bajara tsijamatabēcuenesitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabējunuatsi. Nexata tsijamatabēcuenevitsabaponatsi Dioso pitorobilivaisi. Nexata pacuenia peubijava capitsapa itsabotonē treinta paxutobeje tsaponae, itsabotonē sesenta paxutobeje tsaponae, itsabotonē cien paxutobeje tsaponae, bajara tsijamatabēcuenesitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabē pelivaisicuenia yabara pelivaisi

(Lc 8.16-18)

21 Jesús icatsia jumaitsi doce ponēbeje pijajivijavabelia, itsamonaejavabelia ata:

—Itsajivi ata lámparabē pitanojotsicujinae apo etsi cajoniēnēalia. Apo etsi cama bēxēpanalia ata. Jume baja cajena. Biji rajane athēbēyo etsia daxitaboēnē pitayotecaenexa. 22 Bajara pijinia itsi palivaisianē tsipaebaponajē comparacióncuenia daxitajivi picani peyapētaenexa. Najumematayatsia apo tsipaebaponaenē. Itsamonae nejumetae ata, aeconoxae abaxē apo nejumeyapētae pajamatabēcuenē xaina tatsipaebilivaisianē. Itsiata itsamatacabi, bexējavabelia, daxitajivi nejumeyapētaena pajamatabēcuenē xaina palivaisianē comparacióncuenia

tsipaebaponajë. ²³ Pajivi jamatabënejumeyapëtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjëre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena.

²⁵ Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicuene yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanajetaruca. ²⁷ Peubinë peubicujinae vemaxëmajitabiaba meravi canacujitsia. Naëcotabiaba matababita. Bajarapacuenia panepapona matababianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva. ²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepíjia vitsaba yabara pelivaisi
(Mt 13.31-32; Lc 13.18-19)

³⁰⁻³¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepíjia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi

ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecu. ³² Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepíjia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi

(Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. ³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

Pacuenia Jesús itaveta joviboxaneto, malataca yajava, pi-ayaijavami yabara pelivaisi

(Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajaramatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pënaponatsi itsajeranëta. ³⁷ Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. ³⁸ Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bजारapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

41 Nexata Jesús pijajivi najunaviaca bajarapacuene petaexae. Ēpamonae najumaitsi:

—¿De meta tsipaji maponėje? ¡Itaveta jovibo, malataca ata! ¡Jumecovënētatsi baja rovia maponėje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponaponaenē, Jesús vecuacapitsapa Gerasa nacuata yabara pelivaisi
(Mt 8.28-34; Lc 8.26-39)

¹ Jesús pijajivi barēpata pucaxaneto itsapanabelia, Gerasa nacuayabelia. ² Nexata Jesús jerajavavetsina nonotajuna. Pebi dovathivi peyajavaponaponaenē, cujtabarenatsi jivimēthēanējavaverena. ³ Bajaraponē ponaponabiaba jivimēthēanējavata. Itsajivi ata apo caējēpaetsi pecētsinexa bajaraponē cadenamaētota ata. ⁴ Cadenamaētonēta picani taxucētabiabatsi anijatonē. Cobecētabiabatsi picani yajava. Itsiata cajena pecobecētsicadenamaētotsi ucutajarababiaba pesaēta. Bajaraxuacujinae petaxucētsicadenamaētotsi pecobeta tsaquibiaxuababiaba. Nexata cadenamaētomi tsiquirijavaxi exanapenetaabiaba. Itsajivi ata cajena apo caējēpaetsi pecētsinexa bajaraponē. Tsipaji bitso asaē. ⁵ Bajaraponē petsutonējava, jivi petēpaevi pemēthēcaejava, maticabijebi, meravijebi yajava, ponaponabiaba. Vavajai tsabiabaponapona. Ibotonējavabelia natsaquibajarababiabaponapona. ⁶ Bajaraponē itsa taetaba Jesús penajetarucaejava, nexata tajēverena cujinaeponarena Jesúsjavaberena. Jesús pitabarata pematatabacabēta nucajunua. ⁷ Bajaraponē aėjai pinijijumeta Jesús pitabarata.

—Jesús, pepo Dioso, athēbētatsia peecaenē, pexēnatomē. ¿Detsa xua jaitame xanējavaberena? Pexaniacuene bitso cavajētatsi Dioso pitabarata. Nejamatabēcuenebejibitsipame, jai dovathivi peyajavaponaponaenē Jesúsjavabelia.

⁸ Bajarapacuenia jumaitsi dovathivi peyajavaponaponaenē tsipaji Jesús jerajavavetsina penonotajunaejavata, dovathivi peyajavaponaponaenē pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponē baja pavecuapitsapare! jai Jesús.

⁹ Nexata Jesús jumaitsi bajaraponējavabelia:

—¿Detsa pavënēmē? jai.

Nexata dovathivi peyajavaponaponaenē navënēpaeba.

—Tavënē raja Legiön. Tsipaji raja bitso paayaibitsaētoxanetonē, jai dovathivi peyajavaponaponaenē.

10 Nexata dovathivi pinijicuenia vajëta Jesúsjavabelia it-sairabelia pejutsiyanivatsi bajarapairavecua. 11 Nexata bajarajota, imoxoyo petsutojavata, marranobitsaëtoxaneto xaevanapa. 12 Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare patajonenexa bajara pamarranobitsaëtoxanetojavabelia, jai dovathivi.

13 Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxanetojavabelia dovathivi junua. Bajara pamarranobitsaëtoxaneto jinavanapa anijamilbeje ponëbeje. Nexata daxita marranobitsaëtoxanetomi cujinaeyeca. Pucaxaneto itapajanituareca othopareca. Nexata daxita marranobitsaëtoxanetomi meneta bubuna.

14 Bajara pamarranobitsaëtoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuene. 15 Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cjunavatsi Jesús. 16 Pamonaen cunenatetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxanetojavabelia. 17 Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cjunavatsi.

18 Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa. 19 Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papini-jicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenëmijavabelia.

20 Nexata baja dovathivi peyajavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebapona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi
(Mt 9.18-26; Lc 8.40-56)

²¹ Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi. ²² Nexata bajarajota napatajopa Jairovënënë. Bajaraponë judíovi penacaetuatabiabibo pevetsiviyajuvënënë. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua. ²³ Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴ Jejai Jesús. Jesús nexata napona Jairo pepëta. Nexata jivibitsaëtoxaneto Jesús pepënaponaevitsi matatoyorotsia cënënanajetarubenatsi. ²⁵ Bajarapajivibitsaëtoxaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶ Bitso nexata bajarapova bejiobi pexainacuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneacuene. Biji caranata pevajënaeyabelia capunaponatsi piavitaneacuene. ²⁷ Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxaneto tuatujëalia. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰ Jesús ata nayapëtane pesaëta pejamatejemayaexanaejava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaitsitsi:

—Taneme rabaja jivibitsaëtoxaneto pecacënënanajetarubenaеjava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penaxatatsijava. ³³ Nexata bajarapova neconecojai tsanucae pecajunavi penayapëtaexae Jesús pejamateje-

mayaexanaejavatsi. Nexata bajarapova najetabarena Jesús pitabarayaberena. Pematabacabêta nucajunua. Nexata daxita pacuene exana, bajarapova tsipaeba Jesúsjavabelia.
³⁴Nexata Jesús jumaitsi bajarapovajavabelia:

—Xamê nesivajamatabêjumaitsimê: “Jesús penaxatatsijava itsa tojayatabianajê, tavitanejavami nevecuaajibi tsane,” nesivajamatabêjamê. Bajaraxuata jamatejemamê baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexênatoyo rabaja têpa. Pêtsa baja matavêjêa jamatabêitonotaponame Jesús, jai bajarapamonae Jairojavabelia.

³⁶Jesús jumetae ata bajarapajume, itsiata jumaitsi Jairojavabelia:

—Jairo, pêtsa najamatabêxainame. Najamatabêcuenecopare saya êxanêjavaberena nexênatovayo pecatoasaênexa, jai Jesús Jairojavabelia.

³⁷ Nexata Jesús, pajivibitsaêtoxaneto pênanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabêxêyoje: Pedro, Juan, Santiago, Jairo jane baja. Juanbeje Santiagobeje nacaebananêbeje.

³⁸ Itsa baja Jesús palia Jairo pijaboyabelia, tane jivibitsaêto pinijijumeta pematantueyabijava petêpaevayo. ³⁹ Jesús itsa joneya boyalia, jumaitsi bajarapamonaejavabelia:

—Pêtsa bitso pematantueyabame. Pejanava raja apo têpae. Saya raja majitanuca, jai Jesús tsipaji yapêtane Jesús piasaêyaexanaejavanexa bajarapovayo.

⁴⁰ Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petêpaevayo boca, Jesús barêjoneya caejiviyobeje saya. Jesús saya barêjoneya mapamatabêxêyoje: petêpaevayo paxa, pena, Jesús pijajivi, acueyabi ponêbeje. Bajarapamatabêxêyo saya Jesús barêjoneya. ⁴¹ Nexata Jesús petêpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijumlah: “Pejanava, nonotapunare,” pejaijumlah.

⁴² Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabêcuenenabenajaca bajarapacuenene itsa tane. ⁴³ Nexata Jesús pinijicuenia jumaitsi:

—Pêtsa itsajivi ata patsipaebame mapacueneje, jai Jesús.

Bajaraxuacujinae Jesús jumaitsi pejanavayo penajavabelia:

—Nexēnatovayo pexaejava rajure, jai.

6

Pacuenia Jesús naviata pijanacuayabelia, Nazaret tomara-belia, yabara pelivaisi

(Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia. ² Judíovi penacueraevetsimatacabita Jesús taxuxuaba jivi livaisi petsipaebijava judíovi penacaetuatabiabibota. Ayaibitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacuenije? ¡Pitsipinijicuene maponë exanaje, vaxaitsi abaxë caeto ata apo taetsi! ¡Matapania matanetsije!

³ Maponëje vaxaitsiyajuvënënë. Carpinteronë. María pexēnato. Bajaraponë peyuyapijivi Santiago, José, Judas, Simón. Papetiriavi ata vajatamarata jinavanapa, bajaraponë peyuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. ⁴ Nexata Jesús jumaitsi bajarapamonaejavabelia:

—Bajara maitsiabiabije. Diosojumepaebivi profetavi it-sanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

⁵ Nexata Jesús bajarajota jivi ayaibitsaëtojavabelia pini-jicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. ⁶ Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Lc 9.1-6)

⁷ Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuenetsi jamatabëcueneaejëpaeaxana dovathi peyajavajinavanapaevi pevecuacapitsapapon-aenexa. ⁸ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, doro ata, palata ata. Ënaeboyo saya pacaponare. ⁹ Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. ¹⁰ Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponae name, bajarapabovecua papitsapaename. ¹¹ Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponae name bajarapatomaravecua. Paneponae vajënae bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuenae apo papecapiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebi-jitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹² Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabëcuenepëñëyorore Diosojavabelia, jai tsaponae.

¹³ Jesús pijajivi dovathi peyajavajinavanapaevi vecuacapisapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinë jivibautisabinëmi beyaxuabatsi yabara pelivaisi

(Mt 14.1-12; Lc 9.7-9)

¹⁴ Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumait-sijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejaijava itsamonae jamatabëcuenenavëxaniabiaya Jesús yabara, Herodes jumetane.

¹⁵ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

¹⁶ Bajarapacuenia itsamonae jamatabëcuenenavëxaniabiaya pejumaitssaponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanjë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

¹⁷ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ¹⁸ Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

¹⁹ Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi. ²⁰ Tsipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuaijai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba.

²¹ Nexata pamatacabi Herodes najamatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaëtöxaneto penabaninexa. Junata Herodes pijajivi, pamonaë tovetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toypëxanepanatsi Juanpijinë pebeyaxuabiaexanaenexatsi.

²² Herodíasva toypëxanepanatsi tsipaji pexënatoyo joneya

Herodes pejunatsivi pebarēnabanecaejavalia pijacujirucuenia caevayo peyavajibinexa. Nexata Herodes pejunatsivi bitso barēitajitsipa pejionēyo peyavajibijava. Nexata Herodes najumecapanepaeya pexaniajaijumeta jumaitsi pejionēyojavabelia:

—Nevajēre xua jitsipame. Carajutsianatsi raja.
 23 Pacuenejava nevajētsianame, carajutsianatsi. Itsa nevajētsianame taneevetsiaexanaenacua ata, tuatuajējava carajutsianatsi, jai Herodes najumecapanepaeya pejionēyojavabelia.

24 Nexata bajarapovayo pitsatabalia. Jumaitsi penajavabelia:

—¿Detsamē ra xua vajētsianajē? jai penajavabelia.

Nexata Herodíasva pexēnatoyojavabelia jumaitsi:

—Juan jivibautisabinē pematabocoto vajēre, jai.

25 Nexata bepījia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajē cajena tanerajutsinexamē platota Juan jivibautisabinē pematabocoto, jai bajarapovayo Herodesjavabelia.

26 Nexata Herodes pinijicuenia bejamatabējiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaitsi pejionēyojavabelia pexaniajaijumeta daxita pejunatsivi pitabarata. 27 Nexata Herodes bepījia itoroba vajabitsaēnē petocarenanexatsi Juan pematabocoto. 28 Vajabitsaēnē nexata pona penaneconitsivi pejebabiabiboyabelia. Juanpijinēmi vēsiucutaxuabatsi. Juanpijinēmi pematabocoto vajabitsaēnē carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapētane capanepaeya baja Juanpijinē pebeyaxuabijavatsi.

29 Nexata Juanpijinē pijajivi itsa vēnētanetsi pebeyaxuabijavatsi, bajarapamonae ponarena Juanpijinē pebocaejavaberenena. Pitatsi petēpaenē. Pepitsicujinaetsi Juanpijinē pijajivi mēthētatsi.

Pacuenia Jesús pexaejava rajuta cinco mil ponēbeje yabara pelivaisi

(Mt 14.13-21; Lc 9.10-17; Jn 6.1-14)

30 Jesús pitorobivi, apóstolevi, naviabanajetarubena Jesúsjavaberenena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. 31 Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënabaninexa, apo cuenecaëjöpabiabitsi.³² Nexata Jesús ëpijajivi jerata yajavapona itsabelia jivi ajibi.³³ Itsiata jivi ayaibitsaëtoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae.³⁴ Itsa baja Jesús bana nonobajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejiobiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia.³⁵ Itsa baja bitso caniviyotsia, Jesús pijajivi cujibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae.³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaenajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiatata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata.

⁴⁰ Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona.⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuenene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Djuaijavaxi ata tsicobetsana jivijavabelia. ⁴² Daxita xaniavaetsia nabane. ⁴³ Bajaraxuacujinae Jesús pijajivi caetuata pan, djuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. ⁴⁴ Pamonae pexaejava xane, ayaibitsaëttoxaneto. Itsiata ëpebijivi namataëjëtatsi cinco mil ponëbeje.

Pacuenia Jesús mene itaboxoya najetaruca yabara pelivaisi (Mt 14.22-27; Jn 6.16-21)

⁴⁵ Jesús jivi ayaibitsaëttoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. ⁴⁶ Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. ⁴⁷ Itsa baja bitso meravi, Jesús pijajivi pucaxaneto itapavecua tajë baja yanajetarubernalia. Jesús abaxë bajarapaepatota caenë nacopatanucarena pucaxanetoitapatarena. ⁴⁸ Nexata Jesús tane pijajivi petoayapëbejevatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matacabijitsia, Jesús pijajivi pecovëvelia imoxoyotana-jetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi itsa tanetsi mene itaboxoya penajetarucaejava, Jesús pijajivi jamatabëjumaitsi:

—iPetëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta. ⁵⁰ Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiaya tane, pan tsiquirijavayomi ata, jivibitsaëttoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuene pexanaenexa. Abaxë bajarapamonae ajamatabëcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

(Mt 14.34-36)

⁵³ Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. ⁵⁴ Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesúsucene. ⁵⁵ Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi pijacamaxita yavëtarapatatsi itsajota jivi jumetane Jesús pepatsijava. ⁵⁶ Jesús pata tsiquiritomaraxijava, pinijit-omaranëjava ata, tomarapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

Pacuenia Jesús tsipaeba xua jivi jamatabëcuenebijianatsi yabara pelivaisi

(Mt 15.1-20)

¹⁻⁴ Daxita judíovi catsiteca pijasalinaivimi pijacuene. Judíoviyajuvënëvi, pamonaë fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinae, bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús pijajivi judíovi

pijasalinaicuenia anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. ⁵ Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

⁶ Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinaelivaisita jumaitsi mapacueniaje:

Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁷ Saya baitsi bajarapamonae pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitsijava paxamë yabara Isaíaspijinë peyaquinaelivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata évajasalinaivi pijacuene pacatsitecame. Nexata vajasalinaivi pijacuena xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹ Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanajë,” pajamatabëjamë tsabiabi. ¹⁰ Bajayata Dioso najumecopata Moiséspijinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ¹¹⁻¹² Itsiata baitsi jane paxamë jivi pamuxubijiapenatabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi

patacarajutsinexabeje,' jamë tsane neyavenonaeyaniva," pajamë tsabiabi jivijavabelia. ¹³ Nexata caranata Dioso pejumaitsijume: "Axa yaiyataema. Ena ata yaiyataema," pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë. ¹⁵ Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi. ¹⁶ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹ Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuenie.

²⁰ Icatsia Jesús jumaitsi:

—Baitsi rajane jivi pejamatabëëthëtovetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi. ²¹ Tsipaji rabaja jivi pejamatabëëthëtovetsina pitsapa pibisiacuenie penajamatabëxainaenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa. ²² Pitsapa penacobetoxotsijamatabëcuenenexa. Pitsapa itsamonae pecobecovë penaxainaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonaejavabelia peyamaxëitorobijamatabëcuenenexa. Pitsapa itsamonae pexainaecuenie pecobecaëbijamatabëcuenenexa. Pitsapa itsajivi pibisiacuenia pebaracuaicuaijai jamatabëcuenenexa.

Pitsapa ayaijamatabëcuenejivi penataejamatabëcuenenexa. Pitsapa saya jema peponaponaejamatabëcuenenexa. ²³ Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijanatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemaayaexana yabara pelivaisi
(Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. ²⁵ Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yaiyataeya Jesús pitabarata pematatabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofenciaciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

²⁷ Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁸ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

Pacuenia Jesús jamatejemayaexana bitso siyanë, apo pejumetaenë, pijajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacujava. Bajaraxuacujinae najetaruca Decápolis nacujava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyanë, bitso apo pejumetaenë, piäjumecëcënë. Nexata bajarapamonae jumait-sitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa benaëcotsia. Jesús athëbë vena-jumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitsi jume: “¡Muxuvojorucaremelia!” pejaijume.

³⁵ Bajarapacuenia Jesús pejumaitsi javata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. ³⁶ Nexata Jesús jumaitsi bajaraponë petocapatsivitsi javabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipae-bapona jivijavabelia. ³⁷ Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijajava, cuaicuaijaiyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi
(Mt 15.32-39)

¹ Itsamatacabi Jesús jivibitsaëtoxaneto muxunanacaetu-atatsi. Nexata bajarapamonae penabaninexa, bajarajota pexaejava apo xainae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaaje. Tsipaji baja ajena acueyabi pamatacabibeje xaina xanëjavata pejinavana-paecujinae. Pemarue baja tovereverecatsi. ³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacaepan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa.

⁷ Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi. ⁸ Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. ¹⁰ Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuayabelia.

Pacuenia fariseovi Jesús itorobatsi Dioso pesaëta pini-jicuene pexanaejava petsitaexanaenexa picaniyabara pelivaisi (Mt 16.1-4; Lc 12.54-56)

¹¹ Fariseovi Jesúsjavaberena pata. Bajarapamonae jamatabëcuenejëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

12 Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacat-sitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

13 Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mt 16.5-12)

14 Jesús pijajivi nacofënëta pamarue. Nexata saya caepanbëyo capona jerata. 15 Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijal-evadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaeavetsinë ata, Herodes, petsipaebilivaisi, Jesús pijajivi pejumecovënëtsiyaniva.

16 Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitisijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijal-evadura,” nacajai. Baja raeta pacuenia Jesús nacajumaitsi pan apo vajacaponaeaxae, najai Jesús pijajivi.

17 Jesús pijajivi jamatabëcueneypëtane bajarapacuenia jamatabëcuenenavëxaniabiaya penajumaitisijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaeaxae,” panajamë? Paxamë abaxë apo panejumeyapëtaemë xua yabara pacajumaitisitsi. Pajamatabëcuenetajamë bitso. 18 Pan yabara raja apo pacajumaitisitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsi-paji pacuenia exanajë pamatacabi pan namatavenonatsi? 19 Pacujinae epatsicacajë cinco papanbëmibeje panetsicobet-sanaenexa cinco mil ponëbejeyavabelia, bajarapacujinae peyajuvënëcopabijavanë, ¿detsa xuabeje pavënëtamë bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

²⁰ Jesús icatsia jumaitsi:

—Pacujinae epatsicacajë siete papanëmibeje panetsicobet-sanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

²¹ Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaevetsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsëcënaenë, apo petaenë tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsëcënaenë, apo petaenë. Pinijicuenia vajëcatsi Jesús pitaxutojayatsinexa bajaraponë pitaxutoxanepanaenexa. ²³ Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

²⁴ Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

²⁵ Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane. ²⁶ Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomara-belia. Pëtsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¿Xamë raja Cristomë! jai yabara pelivaisi

(Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mt 16.21-28; Lc 9.22-27)

³¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpacujinae, acueyabi matakabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuaijamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanuca Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponapona taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. ³⁵ Pajivi exanaponapona penatojitsipaecuenia, apo xainae tsane matabi apo pevereverecejava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matabi apo pevereverecejava. ³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecue ne apo capanepae tsanetsi Diosojavabelia. ³⁷ Tsipaji acuenebi tsane itsajivi ata pematamotsinexa penaxuabiyana Diosovecua. ³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatabi icatsia patsianicajë. Baitsi pamatabi xanë, Daxitajivi Pematapijinënë, ángelevi yajava, patsianicajë, pamatabi yajavapatsianicajëna taxa Dioso pijapenivenivenaecotia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevet-sijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevet-sijava mapanacuataje, tēpaena. Dioso raja pijajivi evetsiana pinijiamatabëcuenesaëta, jai Jesús jivijavabelia.

Pacuenia Jesús caeepatoyo perabënivenivenataba yabara pelivaisi

(Mt 17.1-13; Lc 9.28-36)

² Jesús petëpaejavanexa tajëvelia penavajunupaebicujinae, seis pamatabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo

Jesús barëjunaya pinijitsutoxanetojumabetsia. Nexata petsutojumatatsia Jesús perabënenivenena bajarapamonae pitabarata. ³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjëpaetsi bajarapacuenia peniojaiyaexanaenexa. ⁴ Jesús pijajivi bajarajota tane jemata penaitajëtsijava bajayata petëpaenëmibeje, Elíaspijinëbeje Moiséspijinëbeje. Jesús barëcuaiquaijaisi bajaraponëbeje. ⁵ Nexata Pedro jumaisi Jesúsjavabelia mapacueniaje:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaisi Jesúsjavabelia canaëjëtsinejeva. Tsipaji bitso bajarapamonae najunaviaca. Nexata apo yapëtae pacuenia jumaisijitsia. ⁷ Nexata daxita bajarapamonae pematatsënëvetsica itarërëbo mataacataxuabatsi. Nexata bajarapamonae jumetane bajarapaitarërëbojavavetsica Dioso pejumaisijava.

—Mara ponë taxënato, tasivanëje. Panamuxunaevere bajaraponë, jaisica Dioso Jesús pijajivijavabelia.

⁸ Bajarajota bajarapamonae ita naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi ita barërunanucaponaica petsutojumavetsica, jumeitaveta pijajivi. Jumaisi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponëbeje, jumecovënëta pejumaisicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tсамëra pajamatabëcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaisi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaisi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinē tavajēnaeya jivi jamatabēcuenexanetanajetaruca. Xanē, Daxitajivi Pematapijinēnē, athēbēvetsica Dioso nitoroba jivi tacapanepaenexa. Nexata xanē yabara tajēvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitsi pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Elíaspijinē rabaja patajopa. Pepatsicujinae baja exanatsi daxita pacuenia jamatabēcuanatsi. Nexata exanatsi pacuenia baja cajena Dioso pejumelivaisibaxutota tajēvelia jumaitsi bajaraponēmi yabara, jai Jesús pijajivijavabelia Juanpijinēmi yabara.

Pacuenia Jesús jamatejemayaexana pejevaxinē, dovathi peyajavaponaponaenē, yabara pelivaisi

(Mt 17.14-21; Lc 9.37-43)

¹⁴ Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijaivi pepuenetsivijavabetsica, barēnaviatsica. Nexata Jesús tane pijajivi jivibitsaētoxfaneto pevajēnae pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerēcēpa Jesús, daxita jamatabēcuenēbarēyaya cujinaeyeca Jesúsjavabelia pebajacobinexatsi Jesús. ¹⁶ Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenē bajarapajivi bitsaētoxfanetoyajuvēnēnē jumaitsi Jesúsjavabelia:

—Jesús, mara picani taxēnatonēyo, dovathi peyajavaponaponaenēyo, catocanajetarucatsije. Maponēyoje dovathi apo netonatsipaebiaexanaetsi. ¹⁸ Itsa raja dovathi vaetababiabatsi, irata xuababiabatsi. Nexata bajarajota pecuibothisamu tsabiabi. Vonoquiraquirajainua tsabiabi. Daxitanēyo aperabēbaba tsatababiabireca. Picani raja nijajivijavabelia jumaitsinē: “Panetovecuacapitsapare dovathi,” janē. Itsiata bajarapamonae apo caējēpaetsi tanetovecuacapitsapaenexa, jai bajaraponē Jesúsjavabelia.

¹⁹ Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjêpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaeajê? ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

²⁰ Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tēpajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina.

²¹ Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuabicujinaetsi mapacueneye? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi.

²² Bajayajebi picani isotovalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëjêpa itsacuenia ata taneyavenonaenexamë, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

²³ Nexata Jesús jumaitsi pejevaxinë paxajavabelia:

—Pajivi jumecovënëta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinë paxa aëjai. Jumaitsi:

—¡Jumecovënëtajê baja cajena! ¡Neyavenonare bitso orijibia tajumecovënëtsinexa! jai bajaraponë Jesúsjavabelia.

²⁵ Nexata Jesús itsa tane jivibitsaëtoxaneto penacuetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo nejumetaeyaexanaenënu. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjêa maponëyojavaberena, jai Jesús dovathijavabelia.

²⁶ Nexata dovathi pejevaxinë icatsia aëjaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonae bajarajota jumaitsi:

—Pejevaxinë rabaja tēpa, jai bajarapamonae.

²⁷ Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

²⁸ Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjêpae patavecuacapitsapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxu-abijavanexatsi yabara pelivaisi

(Mt 17.22-23; Lc 9.43-45)

³⁰ Jesús pejevaxinë dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacujava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi. ³¹ Tsipaji Jesús pebeyaxuabijavanexatsi, tajëvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matakabita, icatsia asaënë tsane, jai tsaponae Jesús pijajivijavabelia.

³² Itsiata pijajivi apo jumeyapëtaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponë vaxaitsiyajuvënënë nacavecuayaijamatabëcuenenë bitso?” najai tsanajetarubenaeyabara pelivaisi

(Mt 18.1-5; Lc 9.46-48)

³³ Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumeno-tanajetarubename? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaitsi tsanajetarubenaeyabara:

—¿Detsa ponë vaxaitsiyajuvënënë nacavecuayaijamatabëcuenenë bitso? najai tsanajetarubenaeyabara Jesús pijajivi.

³⁵ Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcueniejivi penaexanaenexa daxitajivi matatoxenetsia, bajarapajivi beveliajamatabëcueniejivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinēyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ —Pajivi copiapita tanejumecovēnētsijiviyo, mapitsipejevaxinēyo ataje, xanē taniji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyjavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vēnēlivaisitane itsanē dovathi jivivecua pecapitsapaejava Jesús pevēnēta yabara pelivaisi

(Mt 10.42; Lc 9.49-50)

³⁸ Jesús pijajivitonē, Juan, jumaitsi Jesúsjavabelia:

—Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanēyajuvēnēnē. Nexata paitavetajē bajaraponē dovathi jivivecua pecapitsapaponaejava, jai Juan.

³⁹ Nexata Jesús jumaitsi Juanjavabelia:

—Pētsa paitavetame bajaraponē. Tsipaji raja pajivi pinijicuene pexanaejava exana tavēnēta, bajaraxuacujinae acuenebi bajarapajivi tanebaranatsipaebinexa pibisiacuena. ⁴⁰ Tsipaji raja pajivi pibisiacuene apo najamatabēxainae vaxaitsijavaberena, bajarapajivi nacajamatabēcueneyavenona. Bajarapajivi bevaxaitsijamatabēcueneyivi. ⁴¹ Xaniajanē pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemē, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mt 18.6-9; Lc 17.1-2)

⁴² Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovēnētsiyajuvēnējiviyo, bajarapajivi Diosojavabelia bitso naneconitsipa. Nexata Dioso ayaicuena naneconitsiaexanaejitsipatsi. Nexata pajivi najamatabēxaina pibisiacuene pexanaeyaexanaenexa tanejumecovēnētsivijavabelia, abaxē pibisiacuene exanaeyaexanaenejeva, bajarapajivi bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatujēareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovēnētsiviyajuvēnēvi. ⁴³ Bajaraxuata panecobeta pibisiacuene itsa paexaname, panacobecacure.

Itsiata xanepana panejonenexa cobemataxucaeaya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. ⁴⁴ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁵ Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeaya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁷ Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁹ Dajubinē jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcuenējēbianatsi mapanacuataje. ⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamē ata pajamatabēcuenēitsimē tsipae Diosojavabelia, itsa apo pavecuapanepaemē tsipae papecajamatabēcuenējētaponaejava. Nexata pajamatabēcuenesaēmēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

10

Pacuenia Jesús jivi livaisi tsipaeba penacojobinē pijava pexuabiyaniva yabara pelivaisi
(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëttoxaneto pata Jesúsjavaberena. Nexata icatsia Jesús livaisi tsipaeba bajaramonae. Tsipaji baja cajena Jesús livaisi petsipaebanajetarucaenē. ² Nexata fariseovi Jesús cujibarenatsi petsipaebilivaisi yabara jamatabēcuenējēbiaya peyanijobinexatsi. Nex-

ata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyaniwa? jai Jesús.

⁴ Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata panea-jamatabēcuenelivaisitajaxae. ⁶ Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. ⁷ Bajaraxuata pebi itsa nacojoba pijavajavabelia, banatsata paxavecua, pena atavecua. ⁸ Nexata Dioso tane anijajivimibeje becaejivi. Nexata Dioso apo tae beani-jajivibeje. Becaejivi saya tane Dioso. ⁹ Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacuenē yabara. ¹¹ Nexata Jesús jumaitsi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi. ¹² Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijajivijavabelia.

*Pacuenia Jesús jumaitsi pejevaxijivixijavabelia yabara peli-
vaisi*

(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponae nexata Jesús pijajivi

itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumait-sijava, Jesús jamatabëcueneanaepanaxuareca. Jumaitsi pijajivi-javabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovënëta Dioso pejumelivaisi. ¹⁵ Xaniajanë pacuenia pacatsipaebi-jitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

¹⁶ Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixi-javabelia jumai tsaponaе:

—Dioso xaniavaetsia caevetsiana, jai tsaponaе.

Pacuenia pevejëato, bitso pexainaenë, cuaicuaijai Jesúsjavabelia yabara pelivaisi

(Mt 19.16-30; Lc 18.18-30)

¹⁷ Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaеjitsia. Nexata baja Jesús itsa naropotsijitsia, pevejëato kujinaerucarena Jesúsjavaberena. Jesús pitabarata pematatabacabëta nucajunua. Jumaitsi pevejëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainaenexa matababi apo peverevere-caejava? jai pevejëato.

¹⁸ Nexata Jesús jumaitsi pevejëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexinaejava. Axa yayiataema. Ena ata yayiataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevejëatojavabelia.

²⁰ Nexata pevejëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

21 Nexata Jesús asivaya tane pevëjëato. Jumaitsi:

—Caejava raja catosaica nexanaenexa. Ponare necana-jetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, niamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevëjëatojavabelia.

22 Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

23 Nexata pevëjëato pecovëta Jesús pijajivi matatoyorotsia naëcota. Jumaitsi:

—¡Pamonae bitso daxitacuene pexainaevi, tsiayapëbejetsi penajamatabëcuenecopatsinexa Diosojavabelia peca-panepaenexatsi Dioso pijanacuayabetsia! jai Jesús pijajivijavabelia.

24 Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexinaejavanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia.

25 Pacuenia camello ayainëxae, acuenebi pejonejava palutaetoitaxutovojojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

26 Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

27 Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

28 Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajê daxitacuene pataxainaejavami. Nexata baja pacapëñajinavanapatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia.

³⁰ Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobi-aexanabiabianatsinua. Itsiata baitsi jane bexëjavabelia xainaena maticabi apo pevereverecaejava. ³¹ Pamonaeeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonaee pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxu-abijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsi-paji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. ³³ Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinua, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. ³⁴ Bajarapamonae necanecaponaena.

Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi maticabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

*Pacuenia Santiagobeje Juanbeje vajëtabeje Jesúsjavabelia pex-
aniacuene petoexanaenexatsibeje yabara pelivaisi*
(Mt 20.20-28)

³⁵ Zebedeo pexënatobeje, Santiagobeje Juanbeje, imoxoyoli-
abeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajara-
pacuenia pajitsipajëbeje patanetoexanaenexamëbeje, jaibeje
Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenex-
abeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetoco-
patsianamebeje patanaecaenexabeje nemuxuneneta
vajanajuaevetsinexa. Itsanë naecaena necujuanenia. Itsanë
naecaena netsavenonenia, jaibeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëtamebeje.
¿Pacacaëjëpabeje tsaja panenacaevetsinexabeje papecabejio-
biaexanaenexabeje pacuenia xanë nacaevetsianajë
tanebejiobiaexanaenexa? ¿Pacacaëjëpabeje tsaja
panenacaevetsinexabeje papecabeyaxuabinexabeje
pacuenia xanë nacaevetsianajë tanebeyaxuabinexa? jai
Jesús pijajivitonëbejejavabelia.

³⁹ Nexata Santiagobeje Juanbeje jumaitsibeje:

—Jājā, panecaëjëpabeje cajena, jaibeje.

Nexata icatsia Jesús jumaitsi Santiagobeje Juanbejejav-
abelia:

—Paxamëbeje pacabejiobiaexanaenabeje pacuenia
xanë nebejiobiaexanaena. Pacabeyaxuabianabejenua
pacuenia xanë nebeyaxuabiana. ⁴⁰ Itsiata baitsi jane
xua panevajëtamebeje panenaecaenexabeje, itsanë
tacujuanenia, itsanë tatsavenonenia, bajaraxua Dioso apo
netocopatsi patacatocopatsinexabeje. Tsipaji raja taxa
Dioso ëpitapetsivinexa abaxë bajaraxua toxaniavaeta, jai
Jesús Santiagobeje Juanbejejavabelia.

⁴¹ Diez ponëbeje, Jesús pijajivi, itsa vënëtane
pepëya bajaraxua Santiagobeje Juanbeje Jesúsjavabelia
pevajëcaejavabeje, nexata bajarapamonae ja-
matabëcuenebaraanaepana Santiagobeje Juanbejejavabelia.

⁴² Nexata Jesús daxita pijajivi junata. Jesús jumaitsi
pijajivijavabelia:

—Payapëtaneme rabaja pacuenia nacuaevetsivi
exana. Eveta caenacua canacujitsia. Nexata
nacuaevetsivi pijajivicuenia eveta pamonaë jinavanapa

pevetsinacuanējáva. Nexata bajarapanacuanē pevetsivi ayaijamatabēcuenevi nataeyabiaba. Xua jamatabēitoroba pevetsinacuanējáva pejinavanapaevi petoexanaenexatsi, ajumesaēya itorobabiaba petoexanaenexatsi. ⁴³ Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuenenē penaexanaenexa daxita paxamēvecua, bajaraponē daxita paxamē bepanijajivitonēcuenia bepacayavenonabiaba. ⁴⁴ Ponē paxamēyajuvēnēnē jitsipa penaexanaenexa papecanamatacaitorobinēnēnē, bajaraponē daxita paxamē bepanijajivitonēcuenia bepacayavenonabiaba. ⁴⁵ Tsipaji rabaja xanē ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenēnē jivi ayaibitsaētoxaneto pibisiacuene pexanaeneconimi taneconimatamotsinēnē, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso pitaxutotsēcēnaenē, apo petaenē, yabara pelivaisi (Mt 20.29-34; Lc 18.35-43)

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaētoxaneto yajava, pitsapa Jericó tomaravecua. Nexata Bartimeovēnēnē, Timeo pexēnato, eca namuto muxuneneta. Bartimeo, bitso pitaxutotsēcēnaenē, apo petaenē. Jivijavabelia amoneya palata pevajēcabiabinē. ⁴⁷ Nexata Bartimeo ita jumetane Nazaret tomarapijinē Jesús imoxoyo penajetarucaejáva, vavajai tsecae.

—¡Jesús, Davidpijinē pemomomē, nitaxutotsoniataema! jai tsecae Bartimeo.

⁴⁸ Nexata picani itsamonaē jumeitavetatsi Bartimeo pemoyanēnē. Itsiata bitsoyo orijibia vavajai tsecae.

—¡Davidpijinē pemomomē, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucojopa. Jumaitsi jivijavabelia:

—Pajunaremena bajaraponē, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabēsaētaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavabarena. ⁵¹ Nexata Jesús yanijoba Bartimeojavabelia.

—¿Detsa xua jitsipame tacaexanaenēnē? jai Jesús.

Nexata Bartimeo bitso pitaxutotsēcēnaenē, jumaitsi Jesúsjavabelia:

—Jesús, jitsipajē taitaxutoxanepanaejava, jai.

⁵² Nexata Jesús jumaitsi:

—Ponare baja. Nesivajamatabējumaitsimē: “Jesús nitaxutoxanepanaeayaexanaena,” nesivajamatabējamē. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponē Jesús pepēta naponā.

11

Pacuenia Jesús pata Jerusalén tomarata yabara pelivaisi (Mt 21.1-11; Lc 19.28-40; Jn 12.12-19)

¹ Jesús baja pijajivi barēimoxoyotanaJETARUCA Jerusalemtomara. Barēpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenē, bajarajota Jesús barēpata. Bajarajota pebarēpatsicujinae Jesús itoroba anijanēbeje pijajivitonēbeje. ² Jesús jumaitsi pijajivitonēbejevavelia mapacueniaje:

—Paponarebeje mapatomarayo ecaliajevavelia. Ajena papatsiaremeliabeje, pataenutsianamebeje burro, pecētanutsinētsi. Bajarapaburro itsajivi ata abaxē apo jumaponae. Paisinaenamebeje. Payamaēcarenamēbeje tsane. ³ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canaviatsiarena,” pajamēbeje tsane, jai Jesús pijajivitonēbejevavelia.

⁴ Nexata Jesús pijajivitonēbeje liabeje. Caxitajara-banutabeje burro baupa muxuneneta. Cētanutatsi burro namuto muxuneneta. Nexata bajaraponēbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponēbeje jumaitsidebeje pacuenia baja Jesús itorobatsibeje. Nexata tocopatatsibeje pecaponaenexabeje.

⁷ Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanē burro tsijumajeba. Bajarapajumata Jesús ecaya. ⁸ Jesús penajetarucaenamutojavarena jivi ayaiBITSaēTOXANETO pijacamisajumavelia penaxatabijavanē namutua tsi-

vajēnaeyerequejebaponatsi. Itsamonaē naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayataeya Jesús pecopiapitsinexatsi. ⁹ Jesús

penajetarucaejavata jivi ayaibitsaëtoخانeto Jesús pevajënaeya namataxainaeya najetarubena. Itsabitsaëtoخانeto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca! ¹⁰ ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubena bajarapamonae.

¹¹ Nexata jane baja Jesús patajopa Jerusalén tomarata. Templobojavalialia joneya. Nexata Jesús templobota naitaxuto-caeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higueranae piacuaijibixae yabara pelivaisi

(Mt 21.18-19)

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piajani. ¹³ Jesús namutovecua tajiyotalia higueranae yabaxua taenuta. Nexata Jesús taeyojopalia bajaraponae pecuai perubenaeyava. Itsa Jesús pata bajaraponaejavabelia, ëpebaxu saya tsanuca. Tsipaji cajena abaxë apo penacuaitsimatacabi. ¹⁴ Nexata Jesús jumaitsi higueranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumait-sijava higueranaejavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalialia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiababiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba. ¹⁶ Jesús apo tocopatsi itsajivi ata itsacuenejava pecaponaenexa templobojava. ¹⁷ Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitisijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubiv-inua, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cjunavatsi Jesús. Tsipaji daxitajivi jamatabëcuenenabenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higeranae tēpanuca yabara pelivaisi
(Mt 21.20-22)

²⁰ Jesús pijajivi barëmajita Betania tomarata. Nexata bajayacunua Jesús icatsia, pijajivi yajava, najetaruca pecovënamutua. Bajarapamonae taenuta higeranae baja petēpanucaejava daxita yatabutopaya. ²¹ Nexata Pedro najamatabēnapita higeranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenë, jica, taema. Pona higeranae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaitsi pijajivijavabelia:

—Paxamë bitso pajumecovënëre Dioso papecatoexanaenexa pacuenia pavajëtame. ²³ Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, pacajumecovënëtsipa mapatsuto ataje. Nexata itsa pajumaitsimë tsipae mapatsutojavabeliaje: “Natixire majotavecuaaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia, pacajumecovënëtsipa. Itsa pajumecovënëtsianame Dioso papecatoexanaejavanexa, itsa panajamatabëxainamenua Dioso ëpapecajumecovënëtsijavanexa, xua pavajëtsianame Diosojavabelia, Dioso pacajumecovënëtsiana. ²⁴ Bajaraxuata pacajumaitsi. Daxita xua pavajëtsianame Diosojavabelia, pasivajamatabëjumaitsimë tsane: “Xua vajëtajë Diosojavabelia, pepacuenene Dioso nejumecovënëtsiana,” pasivajamatabëjamëre. Nexata xua pavajëtsianame Diosojavabelia, Dioso pacajumecovënëtsiana. ²⁵ Itsajivi pibisiacuenepapecaexanaejava, pajamatabëcuenecaevare panevajëtsijavata

Diosojavabelia. Nexata pabarajamatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuenecaeviana paxamë ata pitabarata pibisiacuene paneexanaejava. ²⁶ Paxamë itsa apo pajamatabëcuenecaevimë tsane itsanë pibisiacuene papecaexanaejava, itsa apo pabarajamatabëcuenexanepanaemënu tsane, nexata pijinia paneaxa, athëbëtatsia peecaenë, apo jamatabëcuenecaevi tsane paxamë pitabarata pibisiacuene paneexanaejava. Apo pacabarajamatabëcuenexanepanaenu tsane, jai Jesús pijajivijavabelia.

Pacuenia Jesús caëjëpatsi daxitacuene pexanaenexa yabara pelivaishi

(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamata-caitorobivi, judíovi pecujarubivinu, judíovi pijaancianov-inua, parena Jesúsjavaberena. ²⁸ Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomua-caevinua, capitsapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecaviatsianame, nexata xanë juya pacatsi-paebianatsi ponë nitoroba taexanaenexa bajarapacuene.

³⁰ ¿Jipatsa jane pejamatabëcueneta Juanpijinë jivi bautis-abaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

³¹ Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsi-paetsi, nexata Jesús nacajumai tsipae: “¿Detsa nexata xuajit-sia apo pajumecovënësimë Juanpijinë pepaebilivaishi?” naca-jai tsipae. ³² “Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatomarapijivije ayaibitsaëtoxaneto Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

³³ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

12

Pacuenia exana piagamatabëcuenebejevi, itsanë pijauvabacabo petoevetsivi, yabara pelivaisi

(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuailbarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi ita tonaveretatsi, athëbëyo pevetabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuyabelia pona. ² Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. ³ Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ⁴ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobixuabatsi. Pibisiacuenia tobijatanetsi. ⁵ Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae totsacquibabiatsi. Itsamonae tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi

tajajivi apo netoyaiyatae ata, itsiata meta taxënato netoyaiyataena,” jamatabējai uvabacabo pexainaenē. ⁷ Itsiata uvabacabo petoevetsivitsi uvabacabo pexainaenē pexënato ata, apo toyaiyataetsi. Itsa tane uvabacabo pexainaenē pexënato, bajarapamonae najumaitsi: “Mara ponėje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ⁸ Nexata icatsia uvabacabo pexainaenē pexënato ata tovaetabatsi. Icatsia pexënato ata tobeyaxuabatsi. Petëpaenē xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenē pijauvabacabo petoevetsivitsijavabelia? Uvabacabo raja pexainaenē patsiarena. Verebiabiana daxita bajarapamonaeimi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia.

¹¹ Vajatuxanenë Dioso raja exanaena bajarapacuenia. Nexata nacatsita pexaniacuenia bitso tsane bajarapacuenia,

jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹² Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitzijava bajarapamonae yabara. Itsiata abaxë apo vaetabitsi. Tsipaji cuju-
nava jivi. Nexata baja Jesús bajarapamonae vecuapona.

Pacuenia Jesús jamatabëcuenejëbiaya yanijobatsi impuestomatamo pematamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonae pevetsivitsi

itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevetsinējavabelia. ¹⁴ Nexata bajarapamonae pata Jesúsjavaberena. Bajarapamonae jamatabëcueneējëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavana-paenexa. ¿Xanepana tsaja vajamatamotsinexa impuestom-atamo Romanonacua pepo pevetsinējavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneējëbiaya Jesúsjavabelia.

¹⁵ Itsiata baitsi jane Jesús jamatabëcueneyapëtane bajarapamonae jamatabëcueneējëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneējëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

¹⁷ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaējavanexa yabara pelivaisi

(Mt 22.23-33; Lc 20.27-40)

¹⁸ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

19—Jesús, Moiséspijinē bajayata vajanacatoyaquinaelivaisi, jumaitsi mapacueniaje: “Ponē pematapijinē pepua penacojiobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. 20 Nexata jinavanapa ēnacaemonae siete ponēbeje. Pepo matapijinē copiaya nacojioba. Nexata bajaraponē pijava vecuatēpa pexi xainaenejeva. 21 Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatujēmatapijinē pita bajarapova. Bajaraponē ata icatsia tēpa pexi xainaenejeva bajarapovajavabelia. 22 Bajarapacuenia tēpa daxita siete ponēmibeje nacaemonae, bajarapova pepitaponaevi. Itsiata itsanē ata pexi apo xinae bajarapovajavabelia. Bajaraxuacujinae belia bajarapova ata tēpa baja. 23 “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapamonaeyajuvēnēnē, pijava tsane bajarapova bajarapamatacabi? Daxita pamonaē siete ponēmibeje, nacaemonae, pitapona picani bajarapovami, jai saduceovi Jesúsjavabelia.

24 Nexata Jesús jumaitsi saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. 25 Pamatacabi raja petēpaevimi Dioso icatsia asaēyaexanaenatsi, apo nacojiobi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojiobinexatsi. Bajarapamonaē nacojiobinejeva, jinavanapaena athēbētatsia pacuenia ángelevi jinavanapa. 26 Itsa pepacuene paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuajaitsi tsiquirinaemēyo petajueyecaecotiajavaverena. Abraham baja peputēpae, Isaac ata baja peputēpae, Jacob ata baja peputēpae, bajarapamonaē yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē,

Jacob ata pijaDiosonë,” jai Dioso Moiséspijinëjavabelia bajayata petëpaevimi yabara. ²⁷ Bajarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Nexata paxamë itsa pajumaitsimë: “Petëpaevi rabaja petëpaeujinae, icatsia apo asaë tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi (Mt 22.34-40)

²⁸ Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

²⁹ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemomoximë, pajumetaema. Vajatuxanenë rabaja caenë Dioso. ³⁰ Bajaraponë panijatuxanenë, panijaDioso, daxita panejamatabëëthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita panesaëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia.

³¹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

³² Nexata icatsia judíovi pecujarubinë jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³ Bejumecovënëtatsi Dioso daxita vajajamatabëëthëtojavavetsina, daxita vajanajamatabëxainaesaëta ata, daxita vajasäta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia

vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinē Jesúsjavabelia.

³⁴ Jesús itsa jumetane judíovi pecujarubinē xaniavaetsia pejumecanaviatsijavatsi, nexata Jesús jumaitsi judíovi pecujarubinējavabelia:

—Tsiquirijavayo catosaica Diosojavabelia nenajamatabēcuenecopatsinexa nijatuxanenē Dioso nexanaenexa, jai Jesús judíovi pecujarubinējavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabēcuenējēbiaya livaisi apo yanijobitsi.

Pacuenia Jesucristo yabara Davidpijinē bajayata tajēvelia: “Tajatuxanenē,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovēnētsi Cristo Dioso pexēnatocuene, ponē athēbēvetsica Dioso itorobijitsiatsica jivi pecapanepaenexa? Bajarapamonae saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, Davidpijinē pemomo tsane,” jai tsabiabi. ³⁶ Davidpijinē bajayata Espíritu Santo pejamatabēcueneta tajēvelia jumaitsi Cristo yabara mapacueniaje:

Dioso jumaitsi tajatuxanenējavabelia: “Ecare abaxē tacujua-
nenia. Vecatsivajēnae jumecovēnētsiaexanaenatsi abaxē
copiaya nijavajabitsaē nitorobicueninganexa,” jai Dioso
tajatuxanenējavabelia,

jai bajayata tajēvelia Davidpijinē mapacueniaje Cristo yabara.

³⁷ Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexēnato, nayabara-jai Jesús judíovi pecujarubivi pecanaējētsinexa Cristo Dioso pexēnatocuene.

Nexata jivibitsaētoxaeneto Jesús pejumetaevitsi jumebareyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaētoxaenetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejumecovënëtsiyaniva. Bajarapamonae jitsipabiaba tomara tuatuajëjava piapiajavanë penaxatabiabavanapaenexa jivi peyayataenexatsi. Jitsipabiabanua bitso yaiyataeya pebajacobinexatsi callejava. ³⁹ Bajarapamonae ita najoneyabiaba judíovi penacaetuatabiabibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae ita napatabiaba fiestajava ata, jitsipabiaba penaenexa peyayataevitsi penaenexa petsinubijavanëta. ⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi
(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona. ⁴² Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. ⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mt 24.1-2; Lc 21.5-6)

¹ Itsa baja Jesús, pijajivi yajava, pitsaparena templobove-cua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

⁴ —Patajatuxanenë, pajitsipajë patanetsipaebinxamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

⁵ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁶ Tsipaji raja peyamaxëitojorobivinexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

⁷ 'Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. ⁸ Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëabiana

ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacueni itsa pataename, saya abaxë taxuxuabaponaena piayaicueni, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabiabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi. ¹⁰ Nexata daxitanacuanëpijivijava patsipaebanajetarubenaename pecapanepaelivaisinexatsi. ¹¹ Itsa pacataicaena papecaneconitsinexa nacuaevetsivijavabelia, pëtsa pajamatabëcuenebëjamë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espíritu Santo pacacuaicuaijaiyaexanaena. Paxamë baitsi panejamatabëcueneta apo pacuaicuaijamë tsane. ¹² Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. ¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicueni itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicueni pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicueni

vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacuata pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia. ¹⁵ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepìjia najetabajiraviana. Pëtsa joneya pijaboyalia pejutsinexa pecobcovë. ¹⁶ Pajivi pijinia nacuenebapon- apona pijapabita, itsa vënëlivaisitaena bajarapapiayaicuene penucaejava templobota, bepìjia najetabajiraviana. Pëtsa naviata pijaboyabelia pejutsinexa penaxatabijava. ¹⁷ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ¹⁸ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. ¹⁹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianëminexa, bitso jivi nabejiobitsia pejinavanapaeyaniva. ²⁰ Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

²¹ Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pe- jumecovënëtsivi peyamaxëitojorobinexatsi. Jesús jumaitsi pija- jivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. ²² Itsamonae jumai tsane: “Xanë raja

Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepapacuenie Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.²³ ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42, 44; Lc 21.25-36)

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejibitsiaya jinavanapaena. Nexata jivi nabejibitsiaya pejinavanapaematacabicujinae matacabipijijuameto aitaquiri tsane. Meravipijijuameto ata aitaquiri tsane.²⁵ Tulupu ata othopaenica irabetsica. Daxitacuene, xua rubena athëbëatsia, najëabiana. Xaniavaetsia apo rubenae tsane.²⁶ Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenive-naecotia yajavapatsianicajë.²⁷ Bajaraxuacujinae ángelevi itorobianajë, pamonaepatajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa.²⁹ Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica.³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecæ tsane. Matapania xua yabara

pacatsipaebatsi, itsa baja copiapatsiana, bajarapamonae jane baja vereverecaena. ³¹ “Itaboxo, ira yajava, tsitecaena daxitamatacabijavabelianexa,” jamatabējai ata tsane itsamonae, itsiata jamatabēcuenenavēxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsēnētsinē tsane. Nexata xua yabara pacatsipaebatsi, pacuenia baja najumecapanepaeya jumaitsinē, daxita bajaraxua copiapatsiana, jai Jesús pijajivijavabelia tajēvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapētae pamatacabita, paepatota ata, copiapatsijitsia daxita xua yabara tajēvelia pacatsipaebatsi. Athēbēpijivi ata, ángelevi, apo yapētae. Xanē, Dioso pexēnato atanē, apo yapētaenē. Caenē taxa Dioso yapētane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaeveltavanapaename. Tsipaji raja apo payapētaemē tsane paepatota patsijitsianētsica. ³⁴ Nexata pacuenia bo pexainaenē, pijabo evetsiaexana pijajivi, bajara xanē itsinē tsane. Bo pexainaenē itsa ponaejitsia tajēnacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovēta. Nexata pijajiviya-juvēnēnē itoroba baupa pevetsinēnexa petoebetabiabinexatsi pijabobaupa. Bo pexainaenē jumaitsi bajaraponējavabelia: “Xaniavaetsia netoebetabiabianame baupa matapania tapatsimatacabijavabelianexa,” jai bo pexainaenē. ³⁵ Nexata paxamē ata bajarapacuenia panecopiaeveltavanapaename matapania tapatsimatacabitsicajavabelianexa. Tsipaji raja apo payapētaemē tsane pamatacabita patsijitsianētsica. Ajena meravi, caecanivia, patsipajē. Meravi tuatua-jēta ata patsipajē. Matacabivēpata ata patsipajē. Bajayacunua ata patsipajē. ³⁶ Bajaraxuata xania baja tsane. Daxitamatacabi saya panecopiaeveltavanapaename. Jemata itsa patsipajē, paepatota apo panecopiaeveltavēsimē, pacacaxitarabijitsipatsi panemajitsijavata. ³⁷ Palivaisi pacatsipaebatsi paxamējavabelia, daxitajivinexa jumaitsinē. ¡Daxitamatacabi saya panecopiaeveltavanapaename! jai Jesús pijajivijavabelia.

14

Pacuenia picani Jesús pijavajabitsaē jamatabēvaetabatsi yabara pelivaisi

(Mt 26.1-5; Lc 22.1-2; Jn 11.45-53)

¹ Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabejevajënaeya, sacerdotevi penamatacaitorobivi, judíovi pecujarubivinia, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. ² Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vanacaitacueniabiyaniva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera.

⁴ Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje?

⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae ëpamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ⁷ Daxitamatacabi raja bepejiobivi jinavanapa itsaxuayo pajinavanapame.

Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. ⁸ Mara papetirivaje pexaniacuene netoexana pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae.

Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. ⁹ Xaniajanë pacuenia pacatsipaebijitsiatsi. Daxitanacuanëjava tajajivi itsa

paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi
(Mt 26.14-16; Lc 22.3-6)

¹⁰ Jesús pijajivi doce ponëbejeyajuvënënë pevënë Judas. It-savënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹ Nexata sacerdotevi penamatacaitorobivi itsa tane bajarapacueni, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaeve-taponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi
(Mt 26.17-29; Lc 22.7-23; Jn 13.21-30; 1 Co 11.23-26)

¹² Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponae najë patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³ Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. ¹⁴ Pabota bajaraponë joneyojopaena, bajarapabo pexainaenëjavabelia pajumaitsimëbeje tsane:

“Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia. ¹⁵ Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

¹⁶ Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane

pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

¹⁷ Itsa baja meravitsia, Jesús patajopa bajarajota pijajivi, doce ponëbeje, yajava. ¹⁸ Daxita mesata pexaeyenaefavata, Jesús jumaiti pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tavajabitsaë pecobeyabelia, jai Jesús.

¹⁹ Nexata Jesús pijajivi bejamatabëjiofireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰ Nexata Jesús jumaiti pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane. ²¹ Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaiti. Itsiata ponë tajavajabitsaë pecobeyabelia necanajetsiana, bajaraponë bitso bejio bi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaefavata Jesús pita panbë. Jesús jumaiti Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaiti pijajivijavabelia:

—Paxaema. Mara tavitoje, jai.

²³ Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaiti:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

²⁴ Jesús pijajivijavabelia jumaiti:

—Tajana raja othopaena jivi ayaiBITSaëtoXaneto pecapanepaenexatsi. Nexata tatēpaejava pejamatabëcueneta, jivi yapētaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaiti. ²⁵ Xaniajanë pacuenia pacatsipaebijitsiatsi. Xanë rabaja matavëjēa apo apaenë tsane uvacuaira mapanacuataje, matapania icatsia apaenajë Dioso pijanacuatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi

(Mt 26.30-35; Lc 22.31-34; Jn 13.36-38)

²⁶ Jesús pijajivi barënaxëana Diosojumevajianë. Bajaraxuacujinae Jesús pijajivi barëpona petsutojumabelia. Pat-sutojumata olivonaenë apaaxayo, bajarapatsutojumabelia barëpona. ²⁷ Nexata bajarapatsutojumata Jesús jumaitsi pija-jivijavabelia:

—Daxita raja paxamë ajena, pameravi, panexu-abarëcëpecaename. Tsipaji rabaja patanexu-abarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxu-abinexa, daxita paxamë panexuabarëcëpecaename. ²⁸ Itsiata baitsi jane tatëpacujinae icatsia asaënë tsane. Nexata paxamë panevajënaeyabelia copiata ponaenajë Galilea nacuyabelia, jai Jesús pijajivijavabelia.

²⁹ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiavajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívenëjavata yabara pelivaisi

(Mt 26.36-46; Lc 22.39-46)

³² Jesús, pijajivi yajava, pata Getsemanívenëjavata. Bajara-jota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús

bitso najamatabëxaina. Nexata bejamatabëjibireca. ³⁴ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tana-jamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

³⁵ Nexata Jesús, caenë, pevajënaeyabelia icatsia tsiquiri-javayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyani-vatsi. ³⁶ Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaëjëpae tsabaja rovia caepatoyo ata paneaitavatsenaenexa?

³⁸ Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatabëcuenejëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. ⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jume-canaviatsijitsia Jesúsjavabelia. ⁴¹ Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Lc 22.47-53; Jn 18.2-11)

⁴³ Jesús pijavajabitsaë pevaetabijavatanexatsi, cuaicuaijai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënemi. Judas pënanajetarubenatsi jivi ayaibitsaëtoxaneto. Bajarapamonaeya-juvënëvi itsamonae canajetarubena espadanë. Itsamonae canajetarubena naebonë yajava. Bajarapamonaë itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarërenavajënae bajarapamonaë, copiaya baja cajena Judas tsipaeba pacuenia bajarapamonaë yapëtaejitsia Jesús cuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesús cuene. ⁴⁶ Nexata jane baja Jesús pijavajabitsaë vaetabatsi. Cobecëtsi xaniavaetsia.

⁴⁷ Bajarajota Jesús pijajiviyajuvënënë pijaespada nave-marajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁴⁸ Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonaë yasábanavaetabatsi. ⁵² Nexata pevëjëato sábananaixinaxuaba. Najetabajirava jumasanë.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinē pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. ⁵⁶ Itsamonae saya penajumetsënëtsilivaisi paeba Jesús yabara. Itsiata caelivaisi najuapaebi ata, najumejëpaeya apo paebi bajarapamonae. ⁵⁷ Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸ —Paxanë raja, pamatabëxëyo panubenajë majotaje, pajumetaniji Jesús pejumaitsijava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matcabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiata daxita bajarapamonae najumejëpaeya apo paebi.

⁶⁰ Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanavitsinexa? ¿Xaniajai tsabaja pacuenia mapamonae caneconitsiajumaitsije? jai Jesúsjavabelia sacerdotevi pepo penamatacaitorobinē.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxita-jivi Pematapijinënë, taecaejava Dioso pecujanenia, daxitamatabëcuene pecajëpaenëtsi. Panetaenamenua tanajetarucaejava athëbëvetsica itarërëbota, jai Jesús.

⁶³ Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Pijacuata rabaja pejumaitsiyumeta naneconita. Pematasënëa apo namatavenonaetsi itsamonae vajanacatsipaebinxapa paneconi yabara maponëje naneconitsiaexanaejitsiatsi.

⁶⁴ Paxamë rabaja pajumetaneme maponëje Dioso apo pejitsipaecuenia pecuaicuajijava. Tsipaji Dioso bepexë nato nataeya cuaicuajiai. ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonaeyajuvënëvi Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabiauxuabatsi Jesús.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxë Jesús sacerdotevi pepo penamatacaitorobinë pijabo ënëtuatujëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva.

⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaëya taenucatsi Pedro. Jumaitsi:

—Xamë ata rabaja naponaponame Jesúsata, Nazaret tomarapijinëta, jaitsi.

⁶⁸ Nexata Pedro itsiata nayavajunuaxaina Jesús pijajivitonëcuene. Nexata Pedro jumaitsi bajarapovajavabelia:

—Jume raja. Apo yapëtaenë cajena bajaraponë. Apo yapëtaenë pacuene yabara nejumaitsimë, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënënëje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caeepatoyocujinae, bajarajota penubenaevi Pedro jumaitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuaicuaijaicuenia cuaicuaijamë, jaitsi.

⁷¹ Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitsimë, jai Pedro.

⁷² Itsa baja Pedro najumevereta bajarapacuenia pejumait-sijava, vacara icatsia fiaba. Nexata bajarajota Pedro najamatabënapitajaraba pacuenia Jesús jumaitsi: “Anijajumebeje vacara pefiabivajënaeya, nayavajunuaxainaename taja-jivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumait-sijumetsi yabara. Pedro nexata nua.

15

*Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Lc 23.1-5; Jn 18.28-38)*

¹ Ajena baja matacabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsënëa itsamonae bajarapitsijamatabëcuenevi yajavanacaetuata penabarëcuaicuaijainexa. Bajaraxuacujinae bajarapamonae Jesús cobecëtsiaya caponaliatsi nacuaevetsinë Pilatojavabelia. ² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

³ Sacerdotevi penama itsamonae bajarapitsijamatabēcuenevi yajtaçaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapētaemē nejumecanavitsinexa? ¿Apo jumetaemē mapacuenia pecaneconitsijavaje? jaitsi.

⁵ Itsiata Jesús matavējēa apo jumepitsi Pilatojavabelia. Bajaraxuata Pilato apo yapētae pacuenia exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-31; Lc 23.13-25; Jn 18.38-19.16)

⁶ Nacuaevetsinē Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajēcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenē copatabiaba jivi pesivajamatabēcuene xanepanaenexatsi. ⁷ Pamatacabi Jesús naneconitsiaexanatsi, bajarapamatacabi Barrabásvënēnē jivi pebarēbevi barēnaneconitsiaponapona penaneconitsivi pejebabiabibota. Barrabás, itsamonae yajava, barēnabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota.

⁸ Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenē pepitsapaenexa penaneconitsivi pejebabiabibovecua, bajarapacuenia panetocopare caenē pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimē pepo papecaevetsinē? jai Pilato.

¹⁰ Bajarapacuenia Pilato jumaitsi tsipaji yapētane pajamatabēcuene yabara sacerdotevi penamataçaitorobivi tocaponarenatsi Jesús. Pilato jamatabēcuenyapētane sacerdotevi penamataçaitorobivi Jesús pecueneitoyaxaetsi petocaponaejavatsirena. ¹¹ Nexata bajarapamonae asaēya vajēca Barrabás pecapitsapaenexatsi. Tsipaji baja cajena sacerdotevi penamataçaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

¹³ Nexata bajarapamonae vavajai pinijjumeta.

—¿Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijjumeta vavajai.

—¿Cruzajavabelia cobematabiabarutsiaexanare! jai tsonae.

¹⁵ Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabëcuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

¹⁶ Nexata baja vajabitsaëvi Jesús caponaliatsi nacuaevetsinë Pilato pijaboxanetojavabelia. Nexata bajara-jota nacaetuata daxita vajabitsaëvi. ¹⁷ Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevetsinë banaxatata, bajaraxua xatatatsi benacuaevetsinëcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. ¹⁸ Bajaraxuacujinae quenetsiataeya bajacobaponatsi.

—¿Bajaco, judíovi pepo pevetsinë! jai tsonae bajarapamonae Jesúsjavabelia.

¹⁹ Bajarapamonae caenë canacujitsia mataconibiaxubaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata.

²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Lc 23.26-43; Jn 19.17-27)

²¹ Alejandrobeje Rufobeje paxa, Simónvënënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijitsiatsi, peyavenonaeyacoponaenexa.

²² Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejaijume. ²³ Bajarajota picani Jesús rajutatsi vinora piapaenexa, pematajërëabira mirravënëjavata, bitso penavixaetaeyaniva pecobematabiabiavatatatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia. ²⁶ Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi. ²⁸ Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenëcuenia,” jai baja cajena tajëvelia Dioso pejumelivaisibaxutota Jesús yabara.

²⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xubianicajë templo. Acueyabi matababita icatsia veretetsianajë itsabo,” jamë. ³⁰ Nacapanepare jane baja nijacu-

ata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ēpamonae najumaitsi:

—Maponėje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa, apo caējēpaetsi. ³² Itsa xaniajai pepacuene Cristo, athēbēvetsica Dioso pitorobinētsica jivi pecapanepaenexa, Israel nacuapijivi pepo pevetsinēnexanua, aeconoxae runaenica cruzajavavetsica vajataenexa. Nexata jane baja jumecovēnētsianatsi Cristonēcuene, najai bajarapamonae capocaponaeya Jesús yabara.

Ponēbeje ata Jesús yajavacobematabiabarutatsi, bajaraponēbeje ata, Jesús bijataerucatsibeje.

Pacuenia baja Jesús tēpa yabara pelivaisi

(Mt 27.45-56; Lc 23.44-49; Jn 19.28-30)

³³ Jesús baja itsa tēpaejitsia, ajena matonejejitsia, daxita nacujava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. ³⁴ Nexata icatsia paepatota nacua napebeta, bajarapaepatota pinijicuenia Jesús aėjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsi jume: “Taja Dioso, taja Dioso, ¿detsa xuajitsia baja tajaepato necopatame?” pejaijume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsi java. Nexata saya jamatabēcuenenavēxaniabiaya jumaitsi bajarapamonae:

—Jica, pajumetaema. Mara ponē junata profeta Elíaspijinēmije, Diosojumepaebinēmi, jai bajarapamonae.

³⁶ Nexata bajarapamonae yajuvēnēnē piajatuvinorayalia bepijia jabutaxuaba esponjavēnējava. Bajaraxuacujinae esponjavēnējava naeboupita cētaruta. Toyotsiatsi picani Jesús petsutsuninexa bajaraxua. Ponē picani Jesús toyotsiatsi bajaraxua petsutsuninexa, bajaraponē jumaitsi penajuanubenaevijavabelia:

—Bajarapacuenia abaxē copatarutatsi Jesús. Taenatsi Elíaspijinē itsa najetaruca cruzavecua penutsinexatsitsica Jesús, jai bajaraponē capocaponaeya.

³⁷ Jesús icatsia pinijicuenia aėjai. Bajaraxuacujinae jane baja Jesús tēpanajereca. ³⁸ Paepatota Jesús tēpanajereca, bajarapaepatota templobo enētuaťajēalia peyatuucutarutsipana, ayaipapaēbērēpanaxaneto, titititica tuatuaťajēareca, athēbēvetsicacujinae irabereca. ³⁹ Nexata

paepatota Jesús tēpanajereca, vajabitsaēvi pijacapitán Jesús pitabara canacujitsialia nuca. Nexata bajaraponē taenuca Jesús pinijicuenia peaējaijava. Taenucanua Jesús petēpanajetsijavareca. Nexata vajabitsaēvi pijacapitán jumaitsi:

—Matsaena ponē tēpaje, pepacuene baja rovia Dioso pexēnato, jai.

⁴⁰ Bajarajota petiriavibitsaētoxfaneto tajiyoverena taenubena Jesús petēpaejava. Bajarapapetiriavi tuatuajēta nanubena mapamatabēxēyoje. Itsava Mariávēnēva, Magdala tomarapijiva. Itsava Salomévenēva. Itsava icatsia Mariávēnēva. Bajarapova Santiagobeje Josébeje pena. Bajaraponē Santiago, pevējēato abaxē itsanē Santiagovēnēnēvecua. ⁴¹ Pamatacabi abaxē Jesús ponapona Galilea nacuata, bajarapapetiriavi Jesús pēnajinavanapatsi peyavenonaenexatsi. Papetiriavibitsaētojavata Mariábana nanubena, bajarapapetiriavi ata Mariábana Jesús najuapēnaponarena Galilea nacuaverena Jerusalén tomaraberena.

Pacuenia Jesús petēpaenē mēthētatsi yabara pelivaisi
(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea tomarapijinē, judíovi pevetsinē, peyaiy-ataenētsi. Bajaraponē José copiaevetaponapona pecopiapat-sijava pamatacabi caenē Dioso evetsijitsia daxita pijajivi ma-panacuataje. Judíovi baja penacueraevetsimatacabinexa pe-vajēnaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata ba-jarapaepatota José acueneura ata, najamatabēsaēta. Nexata lia nacuaevetsinē Pilatojavabelia. Nexata José vajēta Pilato-javabelia petocopatsinexatsi Jesús petēpaenē pemēthētsinexa. ⁴⁴ Nexata Pilato jamatabējumaitsi:

—Xaniajai tsamē rabaja Jesús tēpa, jamatabējai tsipaji abaxē bajayajebi Jesús apo rucae cruzajavabelia pecobe-matabiabarutsicujinaetsi.

Nexata Pilato junata vajabitsaēvi pijacapitán. Nexata Pilato yanijoba vajabitsaēvi pijacapitánjavabelia, Jesús petēpacuene Pilato peyapētaenexa. ⁴⁵ Nexata vajabitsaēvi pijacapitán tsi-paeba Pilatojavabelia.

—Jesús rabaja capanepaeya tēpa, jai.

Nexata jane baja Pilato José tocopatatsi cruzajavavetsica pepitsinexa Jesús petēpaenē. ⁴⁶ Nexata José comuata pexani-aviriasábana. Bajaraxuacujinae José jane baja cruzajavavet-sica pitsica Jesús petēpaenē. Daxitanēreca mataquionaeya

matacacëba pexaniaviria piapiasábanapanata. Bajaraxuacujinae itsajota cajena José iboitapajanitovavata pinijibovaju exanaeyaexanabuata petëpaevi pebuataponaenexa, bajarapabovajualia José buata Jesús petëpaenë. Bajaraxuacujinae pinijibopanaxaneto José tixirena. Yavajuvëpaacatabuata. ⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

16

Pacuenia Jesús petëpaecujinae icatsia asaë yabara pelivaisi (Mt 28.1-10; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Mariävënëva, Magdala tomarapijiva. Itsava Salomévenëva. Itsava icatsia Mariävënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë. ² Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucapona, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamonae itsa imoxoyotabuatapona, naëcobarëcëpalia ibovajuvabelia. Nexata taeyabuata ibopanaxanetomi petixitabuatsijavalia ibovajuvëpavecua. Bajarapaibopana bitso pinijibopanaxaneto. ⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevejëato. Bajaraponë naxatateca piapiajava penioponajava. Nexata petiriavi najunaviaca. ⁶ Nexata pevejëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucae majotaje. Pataema jane itsajota picani buatatsi. ⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitajarabianame Jesús pacuenia baja pacajumaitsi,” pajamë tsane pijajivijavabelia, jai pevejëato petiriavijavabelia.

⁸ Nexata saya bajarapapetiriavi rēcēpeca Jesús pebuatsii-
bovajutsivecua. Neconecojai saya pecajunavi. Nexata na-
mutoeapatua apo tsipaebi itsajivijavabelia ata. Tsipaji bitso
junava.

*Pacuenia Jesús petēpaecujinae, icatsia itsa asaē, tsitanaitajēta
María Magdala tomarapijivajavabelia yabara pelivaisi
(Jn 20.11-18)*

⁹ Judíovi baja penacueraevetsimatacabi itsa verevereca,
meravia pitsijavata, ajena baja matacabi tsarucaponae,
Jesús icatsia asaē petēpaecujinae. Bajarapamatacabi copi-
ata Jesús tsitanaitajēta María, Magdala tomarapijivajav-
abelia. Bajarapova cajena copiaya Jesús vecuacapitsapa siete
padovathibeje itsa abaxē Jesús apo beyaxuabitsi. ¹⁰ Nexata
María, Magdala tomarapijiva, Jesús petsitanaitajētsicujinaetsi,
pona Jesús pijajivijavabelia. Nexata María pevajēnae Jesús
pijajivi abaxē vėnueyena Jesús. Nexata María itsa pata Jesús
pijajivijavabelia, tsipaeba pacuenia María tane Jesús. ¹¹ María
jumaitsi Jesús pijajivijavabelia:

—Jesús rabaja icatsia asaē petēpaecujinae. Taniji rabaja
tajacuata, jai.

Itsiata Jesús pijajivi apo jumexaniataetsi María.

*Pacuenia Jesús petēpaecujinae icatsia itsa asaē, tsitanaitajēta
pijajivitonēbejevavabelia yabara pelivaisi
(Lc 24.13-35)*

¹² Jesús pijajivitonēbeje najetarucabeje namutua. Nexata
Jesús pijajivitonēbeje namutua penajetarucavejavatabeje,
Jesús tsitanaitajēta beitsanēcuenia pijajivitonēbejevavabelia.
¹³ Nexata Jesús pijajivitonēbeje itsa tanebeje Jesús,
naviatecabeje. Nexata pacuenia tanebeje Jesús, tsipaebabeje
itsamonae Jesús pijajivijavabelia. Itsiata bajarapamonae apo
jumexaniataetsibeje.

*Pacuenia Jesús petēpaecujinae, icatsia itsa asaē, pijajivi
itoroba pexanialivaisi jivi petsipaebanajetarubenaenexa daxi-
tanacuanējava yabara pelivaisi
(Mt 28.16-20; Lc 24.36-49; Jn 20.19-23)*

¹⁴ Bexējavabelia icatsia Jesús tsitanaitajēta pijajivi once
ponēbejevavabelia penabanenaejavata mesata. Nexata Jesús
pinijicuenia muxujioba pijajivi piamatabēcuenetajaxae.
Muxujiobanua apo pejumecovėnėtsixae petsipaebijavatsi
pamonae tane Jesús icatsia piasaējava petēpaecujinae.
¹⁵ Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebana-
jetarubenaenexa pexanialivaisi pecapanepaelivaisinexatsi.

¹⁶ Pajivi jumecovënëtsiana bajarapalivaisi, nexata pabautis-abianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabi-javabelianexa naneconitsiana Diosojavabelia. ¹⁷ Pamonae peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitsapaponaena dovathi. Itsaviriajumetanua, apo penatsipaebijumemi ata, jemata natsipaebiana. ¹⁸ Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsënēvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petëpaecujinae, icatsia itsa asaë, naviata baja athëbëabetsia yabara pelivaisi
(Lc 24.50-53)

¹⁹ Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujanenia penajuaevetsinexabeje daxitacuene. ²⁰ Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamonae jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovēnējavabelia, yabara pelivaisi

¹⁻² Pamatacabi abaxē Jesús ponapona mapanacuataje, jivi ayaibitsaētoxaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranējava Jesús pelivaisi, pexanialivaisi. Nexata tomaranējava Jesús pelivaisi pejumetaevi, ayaibitsaēto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupae-batsi, bajarapamonae yaquina baja cajena Jesucristo pelivaisi. ³ Nexata xanē ata mapamatacabitaje yanijobaponajē bajarapalivaisi daxita peyapētaevijavabelia. Yanijobaponajē xaniavaetsia tayapētaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamē ata xaniavaetsia neyapētaenexa daxita bajarapalivaisi, Jesucristo pelivaisi. Netsitanepana tacatoyaquinaenexa daxita bajarapalivaisi neyapētaenexa pacuenia jumai tsaponae caelivaisi canacujitsia Jesús pexanaponaejavanē yabara, caejava canacujitsia. ⁴ Copiaya baja picani itsamonae catsipaeba bajarapalivaisi. Itsiata icatsia xanē catoyaquinatsi neyapētaenexa jane baja xaniavaetsia bajarapalivaisi pexanijailivaisicuene.

Pacuenia ángel tajēvelia jumaitsi Zacaríasjavabelia: “Nexēnatonēyo raja xainaename,” jai yabara pelivaisi

⁵ Pamatacabi abaxē Herodes eveta Judeanacua, bajarapamatacabi ponapona sacerdotenē Zacarías. Bajaraponē sacerdotevi Abíasvēnēvijajuvēnēnē. Zacarías pijava pevēnē Elisabet. Bajarapova sacerdotenēmi Aarónpijinē pemomoxijajuvēnēva. ⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovēnētsiaya ponaponabeje pacuenia Dioso itorobatsi judíovi xaniavaetsia pejinavanapaenexa. ⁷ Itsiata bajarapajivibeje pexi apo xinaebeje. Tsipaji Elisabet mavecova. Nexata bajarapajivibeje bitso baja perujiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvēnēvi,

nacobenaevetsijitsia templobo, bajarapasemana Zacarías daxitasemana nanacuenebijitsia templobota. ⁹ Nexata abaxë sacerdotevi petaxuxuabivajënaeya penacuenebijava, pijacujirucuenia exana penayapëtaeponaenexa xua caenë canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapëtane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëjava, petuxujuvijava. Bajaraxuata Zacarías joneya temploboyalía petajuitsinexa jane baja inciensovënëjava temploboënëalia. ¹⁰ Paepatota Zacarías tajuitanuca inciensovënëjava temploboënëalia, jivi ayaibitsaëtoxaneto templobojumavelia vajëcanubena Diosojavabelia. ¹¹ Nexata Zacarías temploboënëalia, altarvënëjava muxuneneta, tsitanaitajëtatsi ángel. Paaltarvënëjavajumata incienso tajuitabiaba Diosonexa, bajarapaaltarvënëjava pecujanenia pamuxunenejavata, Zacarías taenuta ángel. ¹² Nexata Zacarías itsa taenuta ángel, apo yapëtae pacuenia exanaejitsia Zacarías. Bitso jamatabëcuenenajunaviaca. ¹³ Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan. ¹⁴ Pinijicuenia, jivi ayaibitsaëto yajava, barëyamë tsane bajaraponëyo itsa catonaexanaena. ¹⁵ Tsipaji bajaraponëyo ayaijamatabëcuenenë tsane Dioso pitabarata. Apo apae tsane piataneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espíritu Santo. Nexata Espíritu Santo pitorobicueniatsi, exanabiabiana. ¹⁶ Bajaraponë, Juan, Israel nacuapijivi najamatabëcuenecopatsiaexanaena Diosojavabelia. ¹⁷ Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espíritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisiajamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Itsa taxēnato xainaejitsianē, ¿detsa peneta pitsicuene tae-najē tayapētaenexa? Tsipaji rabaja xanē perujunēnē. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanē raja Gabrielnē, Dioso pijajivitonēnē. Dioso baja cajena nitoroba tacatsipaebinexa mapapexanialivaisije. ²⁰ Xamē saya nejumlahame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaējēpae tsane necuaicuajijajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

²¹ Bajarapaepatota jivi templobo jumavelia evetanubegnatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepijia apo pitsapaerena templobovecua? najai bajarapamonae.

²² Itsa jane baja Zacarías pitsaparena templobovecua, apo caējēpaetsi pecuaicuajijajava. Nexata pamonaevetanubegnatsi templobo jumavelia, najumaitsi:

—Zacarías raeta bemajitsinaebota temploboēnēlia itsacuene tane, najai.

Nexata Zacarías apo pecaējēpaexaetsi pecuaicuajijajava, pecobeta tsipaeba besiyānēcuenia jivi peyapētaeyaexanaenexa.

²³ Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. ²⁴ Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava ita yapētane, cinco pajuametobejecuenia itsajavabelia pijabovecua apo ponaponae. ²⁵ Elisabet jamatabējumaitsi:

—Dioso raja taneitaxutotsoniataexae, neyavenona tancoxitsinexa mapacueniaje. Nexata baja apo auranē tsane tacoxibijava yabara, jamatabējai Elisabet.

Pacuenia ángel tajēvelia jumaitsi Maríajavabelia yabara pelivaisi

²⁶ Elisabet baja seis pajuametobeje pepuaxainae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peecaetomarabelia. ²⁷ Dioso itoroba ángel petsipaebinexa Maríajavabelia. María abaxē pebi apo pequenetsiataevatsi. Ángel pepatsivajēnaeya Maríajavabelia, Maríabeje baja cajena Josébeje nabarēcuaicuajiaibeje penapitsinexabeje. Nacuaevetsinēmi Davidpijinē pemomoxiyajuvēnēnē José. ²⁸ Ángel nexata joneya María peponaponae. Ángel jumaitsi Maríajavabelia:

—María, cabajacobatsi. Pexaniajamatabëcuenia Dioso pecataeva. Dioso cayajavaponaponaena. Bitso cayavenonaena xamë daxita nevëna petiriavi matatoxenetsia, jai ángel.

²⁹ Nexata María itsa jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

³⁰ Icatsia ángel tajëvelia jumaitsi Maríajavabelia:

—María, pëtsa junavame. Tsipaji raja Dioso pexaniajamatabëcuenia catane. ³¹ Xamë raja nacoxitsianame. Cavecuanaexanaena raja pebinëyo. Bajaraponëyo vënërubianame Jesús. ³² Bajaraponëyo ayaijamatabëcuenenë tsane. “PinijiDioso, athëbëtatsia peecaenë, mapexënatoje,” jaitsi tsane jivi. Nexata vajatuxanenë Dioso nacuaevetsinë exanaenatsi. Pacuenia pijasalinainëmi Davidpijinë bajayata nacuaevetsinëmi, bajara icatsia itsane. ³³ Bajaraponë evetsiana Israel nacuapijivi daxita matabacijavabelianexa, jai ángel tajëvelia Maríajavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

³⁵ Angel nexata tajëvelia jumaitsi Maríajavabelia:

—Espíritu Santo raja patsianica xamëjavabetsica. Nexata Espiritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Diosonexa. “Dioso ra mapexënatoje,” jaitsi tsane jivi. ³⁶ Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. ³⁷ Dioso raja caëjëpatsi daxitacuene pexanaenexa, jai ángel tajëvelia Maríajavabelia.

³⁸ Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caematabibejecujinae, María pona petsutonënacuada peecaetomarabelia. Bajarapatomara eca Judea nacuata. ⁴⁰ Nexata María joneya Zacarías pijaboyalia. Bajacobanuta pijamonaeva Elisabet. ⁴¹ María itsa bajacobanuta Elisabet, nexata Elisabet peyacotajinaenacuetooyo tsicotonayucutarabatsi. Nexata jane baja Elisabet tsijamatabëvënëcatsi Espiritu Santo. ⁴² Nexata Elisabet

Espíritu Santo itorobatsi pinijjumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. ⁴³ Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? ⁴⁴ Itsa nebajacobanutame, tayacotajinaenacuetoyo nayucutajaraba pebarëyaxae. ⁴⁵ Barëyamë Dioso pecajumaitsicuenia nejumecovënëtsiva. Tsipaji pepacuenë catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

⁴⁶ Nexata María jumaitsi Elisabetjavabelia:

Tajamatabëethëtojavavetsina jumaitsinë Diosojavabelia: “Ayaijamatabëcuenenëmë bitso,” janë. ⁴⁷ Sivajamatabëcuenebarëyanë Dioso tanecapanepaenënexa. ⁴⁸ Sivajamatabëcuenebarëyanë. Tsipaji pijajivitovanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaicuene pexanaejavanë. Dioso raja apo pejitsipaenë jivi pibisiacuene pexanaejava. ⁵⁰ Daxita pamonaë Dioso yaiyataena, bajarapamonae juya Dioso itaxutotsoniataeyabiabiana. ⁵¹ Dioso raja pecaëjëpaenëtsi pinijicuene ata pexanaenexa pecobeta. Pamonaë jamatabëjumaitsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonae Dioso nacayajatsiaexana baja. ⁵² Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata. ⁵³ Pamonaë pijinia bitso piajani, bajarapamonae Dioso rajuta pexanianabanijava. Pamonaë pijinia bitso pexainaevi mapanacuapijicuene, bajarapamonae Dioso apo pejumecovënëtsixae, bajarapamonae Dioso apo rajutsi. ⁵⁴ Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. ⁵⁵ Bajarapacuenia Dioso pijajivi itaxutotsoniataeyabiaba daxitamatacabijavabelianexa. Tsipaji baja cajena bajarapacuenia Dioso najumecapanepaeya

jumaitsi vajasalinainēmi Abrahampijinējavabelia,
daxita pemomoxijavabelianexa ata pitaxutotsoni-
ataeyabiabijavanexa yabara,

jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviata pijaboyabelia.

Pacuenia Juan naexana jivibautisabinēnexa yabara pelivaisi

⁵⁷ Juameto baja ecaica, pajuametota Elisabet penacueto vecuanaexanaejitsiatsi. Penacuetonēyo jane baja vecuanaexanatsi. ⁵⁸ Itsa Elisabet yapētane Dioso pitaxutotsoniataecuenetsi, bitso Elisabet jamatabēcuenenabarēya. Daxita pamonaē ata ena imoxoyo, pijabo muxuneneta, bajarapova pijamonaeyajuvēnēvi ata, sivajamatabēcuenenabarēyatsi. ⁵⁹ Itsa baja penacuetonēyo caesemana xaineca penaexanaecujinae, Elisabetbeje Zacaríasbeje pexēnatonēyo perabēcaucutsiaexanabeje judíoivicuenia. Baitsi boupiperabēcaucutsiaexanabeje. Nexata daxita bajarapamonae pata Elisabetbeje Zacaríasbejejavaberena. Bajarajota picani penacuetonēyo tovēnērubijitsiatsibeje paxa pevēnēcuenia paxa picani pevēnēxainaenexa. ⁶⁰ Itsiata Elisabet jumaitsi pamonaējavabelia picani tovēnērubijitsiatsibeje:

—Jume. Pevēnē raja tsane Juan, jai Elisabet bajarapamonaejavabelia.

⁶¹ Nexata bajarapamonae jumaitsi:

—¿Detsa xuajitsia jitsipame bajarapavēnē? Itsanē ata cājena nijamonaeyajuvēnēnē apo xainae bajarapavēnē, jai bajarapamonae Elisabetjavabelia.

⁶² Nexata bajarapamonae penacuetonēyo jane baja paxa junata. Pecobeta yanijoba pavēnē Zacarías jitsipa petovēnērubinexatsi. ⁶³ Nexata Zacarías vajēta tablapayo peyaquinaenexa. Nexata yaquinaruta: “Juan rabaja pevēnē,” pejaiitane. Nexata daxita bajarapamonae jamatabēcuenenabenajaca. ⁶⁴ Bajarajota jemata icatsia Zacarías cuaicuajai baja. Nexata jivi pitabarata Zacarías jumai tsaponae Diosojavabelia:

—Diosomē, ayaijamatabēcuenenēmē bitso, jai tsaponae.

⁶⁵ Daxita pamonaē bajarapatomarata imoxoyo penaēvi, itsa jumetane pacuenia Zacarías Dioso yavenonaponatsi, pinijicuenia jamatabēcuenenabenajaca. Itsamonae bajarapanacuata petsutonējava penaēvi ata, daxita bajarapamonae ata, vēnēlivaisitane bajarapacuene yabara. ⁶⁶ Daxita pamonaē jumetane bajarapacuene yabara, apo nacofēnētsi. Jamatabēnājinavanapabiaba bajarapacuene. Nexata bajarapamonae nayanijobabiaba.

—¿De meta jamatabëcueneitsi tsane bajarapanacuetonëyo itsa vitsabiana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

Pacuenia Zacarías tajëvelia jumaitsi yabara pelivaisi

⁶⁷ Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vaja-Diosojavabelia. Tsipaji pijajivitsi nacatoitorobianica vajanacacapanepaenënexa vajaneconivecua.

⁶⁹ Dioso cajena nacatoitorobianica pinijicuene pexanaejava pecajëpaenëtsi vajanacacapanepaenexa. Bajaraponë Dioso pijajivitonëmi Davidpijinë pemomoxiyajuvënënë tsane.

⁷⁰ Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaitsi bajaraponë vajanacacapanepaejavanexa yabara. ⁷¹ Tajëvelia profetavimi najumecapanepaeya jumaitsi bajaraponë vajanacacapanepaejavanexa vajavajabitsaëvivecua, daxita vajanacaitoyavi atavecua.

⁷² Dioso nacaitaxutotsoniataena pacuenia tajëvelia najumecapanepaeya jumaitsi vajasalinaivimijavabelia. Dioso cajena apo nacofënëtsi pacuenia najumecapanepaeya jumaitsi vajasalinaivimijavabelia.

⁷³ Bajayata copiaya bajarapacuenie yabara Dioso najumecapanepaeya jumaitsi vajasalinainëmi Abrahampijinëjavabelia.

⁷⁴ Dioso baja najumecapanepaeya jumaitsi vajanacacapanepaenexa vajavajabitsaëvecua. Bajarapacuenia Dioso nacacapanepaena ajunavijibia vajatonacuenebavanapaenexa.

⁷⁵ Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajaasaëtsavanapaepato abaxë mapanacuataje,

jai Zacarías jivijavabelia tajëvelia pevajunupaebijavata Jesús Dioso pitorobijavanexatsitsica vajanacacapanepaenexa.

⁷⁶ Icatsia Zacarías jumaitsi pexënatonëyojavabelia mapacueniaje:

Taxënatonëyo, xamë yabara itsamonae jumai tsabiabi tsane: “Mara ponëje pinijiDioso, athëbëtsia peecaenë, pijaprofetanëje,” jai tsabiabi tsane.

Xamë raja itsaxuayo pepo petuxanenë najetarucaejitsia, pevajënaeya jivi tsipaebanajetarucaename pesivanajamatabëcuenecopatsinexa bajaraponëjavabelia pamatacabi bajaraponë najetarucaena. ⁷⁷ Tsipaebanajetarucaename

jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeneconimi Dioso vecuaajibiaexanaenatsi.

⁷⁸ Dioso vajanacaitaxutotsoniataexae, nexata nacayapëtaeyaexanaena vajanacapanepaenënexa athëbëvetsica pepatsijavanexatsica. ⁷⁹ Nexata

bajaraponë jivijavabelia itsa tsipaebanajetarucaena pexaniajailivaisi, jamatabëcueneitayotsiana daxita piamatabëcueneitaquirivimi. Baitsi pamonae picani kujunava petëpaejava, bajaraponë petsipaebilivaisi pejamatabëcueneta, bajarapamonae yapëtaena jamatabëcuenexanepanaeya pejinavanapaenexa,

jai Zacarías pexënatonëyojavabelia tajëvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

⁸⁰ Nexata jane baja xuacujinae Juan jivibautisabinënexa vitsabanajetaruca. Yajavaajamatabëcuenesaë baja cajena tsanajetaruca Dioso pejumelivaisi yabara. Nexata baja Juan itsa penaveretsinë, ponapona petusato nacuata. Matapania itsa taxuxuabijitsia jivi petsipaebinexa Jesús pelivaisi, naitajëta jivijavabelia pevënëlivaisitaenexatsi daxita Israel nacuapijivi.

2

Pacuenia Jesús naexana yabara pelivaisi

(Mt 1.18-25)

¹ Imoxoyo baja pevajënae Jesús penaexanaejavanexa. Nexata bajarapamatacabijava Romanonacua pepo pevetsinë, Augusto, taxuxuaba pijajivi pitorobijava jivi petonamataëjëtsinexatsi. Jumaitsi pijajivijavabelia:

—Daxitajivi, pamonae taevetsinacuanëjava jinavanapa, panetonamataëjëtsianame, jai.

² Bajarapamatacabi pijinia nacuaevetsinë Cireniövënënë saicaya itsanacua eveta, Siriävënënacua.

³ Nexata nacuaevetsinë Augusto pevetsinacuanëjava penaetomaranëta pejinavanapaevi, apo jinavanapae ëpijatomaranëjava. Itsamonae najinavanapa itsatomaranëjava. Bajaraxuata pamonae najinavanapa itsatomaranëjava, caejivi canacujitsia, pijasalinaivimi pijatomaranëjavabelia

pona. Bajarapamonae pona penamataējētsinexatsi pijasalinaivimi pijatomaranēja.

⁴ Bjaraxuata José ata barëpona Belén tomarabelia. José barënaropota Nazaret tomarata, Galilea nacuata peecae-tomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinaivimi, Davidpijinë, bajayata Belén tomarata ponapona. ⁵ José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaenexatsi. ⁶⁻⁷ Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevajënaebeje baja jivi yavënëca. Nexata apo nayacaējëpaetsibeje bajarapabota penaecaenexabeje. Bjaraxuata patabeje dajubi pevetabiabibota. Nexata dajubi pevetabiabibota María jane baja vecuanaexanatsi penacuetonëyo, copiaya penacoxitsinacueto. Barëca dajubi pevetabiabibota. Jumaquioneta papaëbërëpanaxita. Buateta dajubi pexaejavanexa pemitsaothocabiabimoënëta.

Pacuenia ángelevi patsica Jesús penaexanaelivaisi petsipae-binexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabitsaëtonë. ⁹ Jemata oveja pevetsivi tsitanaitajëtatsi Dioso pijaángel. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia. ¹⁰ Nexata ángel jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. ¹¹ Ajena rabaja, mapameravitaje, naexana baja daxitajivi pecapanepaenënexa. Naexana Belén tomarata, patomarata bajayata nacuaevetsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi pecapanepaenexa. ¹² Paneyapëtaenexa pacuenia pacatsipaebatsi, penacuetonëyo pataeyabuatetsianame mapacueniaje. Penacuetonëyo pataeyabuatetsianame papaëbërëpanaxita pejumaquionaenacuetonëyotsi. Boquecaena dajubi pexaejava pemitsaothocabiabimoënëta, jai ángel oveja pevetsivijavabelia.

¹³ Bajara saya jota jemata oveja pevetsivi tsitanaitajëtatsi ayaibitsaëtoxaneto ángelevi, copiaya petsipaebiángelnëtsijavata. Bajarapamonae ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

14 ¡Dioso, athëbëtatsia peecaenë, pinijicuene rabaja exana! Pamonae Dioso jumecovënëta, Dioso sivajamatabëcuenebarëyatsi. Daxita bajarapamonae jamatabëcuenexanepanaeya jinavanapaeyaexanaena Dioso,

jai ángelevi penaxëanaejavata.

15 Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsi-
java pacuene yabara vajatuxanenë Dioso pitorobiángelnëtsica
nacatsipaeba, najai oveja pevetsivi ángelevi pecovëta.

16 Nexata bajarapamonae bepijiayo ponalia Belén tomarabelia. Pata itsajota Mariábeje Josébeje barëecabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. 17 Oveja pevetsivi itsa taeyabuateta penacuetonëyo pacuenia baja cajena ángelnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuateta.

18 Nexata daxita pamonae jumetane oveja pevetsivi pepaebilivaisi, jamatabëcuenenabenajaca. 19 María baja cajena pejamatabëëthëtota yapëtaeponapona daxita bajarapacuene yabara.

20 Oveja baja pevetsivi naviabaponalia. Oveja pevetsivi namutualia jumai tsanajetarubenaes Diosojavelia:

—Diosomë, bitso ayaijamatabëcuenenëmë. Pexani-
ajamatabëcuene pacarajutatsi patanetoexanaexaemë
pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

Pacuenia Jesúsnyëo caponaliatsi temploboyabelia yabara pelivaisi

21 Jesúsnexta penaexanaecujinae, ocho matakabita, perabëcaucutatsi judíovicuenia. Baitsi boupiperabëcaucutatsi. Vënërubatsinua jane baja pevënë pexainaenexa. Vënërubatsi “Jesús,” pejaivënëta. Tsipaji baja cajena abaxë María nacoxitsinejeva Jesúsnexta, tajëvelia ángel jumaitsi Mariájavavelia: “Bajaraponëyo vënërubianame Jesús,” jai.

22 Nexata jane baja tocopiajopatsibeje Josébeje Mariábeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judíovi pexanaenexa penacuetonëyo itsa tonaexanatsi. Nexata Jerusalén tomarabelia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavelia penajamatabëcuene xaniavaetsinexa Diosojavelia. Rajutabejenua penacuetonëyo Diosojavelia pijajivitonënexa

petonacuenebinexa itsa penaveretsinē. ²³ Bajarapacuenia Josébeje Mariábeje exanabeje tsipaji Dioso Moiséspijinēta penajumecopatsilivaisi jumaitsi: “Penacasabijivibeje pexi itsa xainabeje, nexata copiaya panacuetonēyo xainabeje, totsatsibeje Dioso pijajivitonēnexa,” jai. ²⁴ Josébeje Mariábeje rajutabeje ofrenda Diosojavabelia pacuenia Dioso Moiséspijinēta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

²⁵ Bajarapamatacabi ponapona Jerusalén tomarata Simeónvénēnē. Bajaraponē jumecovēnētsiaponapona pacuenia Dioso pejumelivaisibaxutota jumaitsi. Nexata bajarapamatacabi Israelnacia eveta Romano nacuaverena ēpēpatsivi. Nexata Romano nacuaverena pepatsivi pevetsixae Israelnacia, bejiobiaexanabiabatsi Israel nacuapijivi. Bjaraxuata Simeón copiaevetaponapona Dioso pejamatabēcueneta petovecuajutsinexatsi Israelnacia pevetsivi. Nexata baja Romano nacuaverena pepatsivi, pevecuapitsapaenexa Israelnacia pevetsicuene. Espíritu Santo yajavaponaponatsi Simeón. ²⁶ Nexata Espíritu Santo pejamatabēcueneta Simeón tajēvelia yapētaeyaexanatsi pacuenia Simeón petēpaevajēnae taejitsia Cristo, ponē Dioso athēbēvetsica itorobiapaebica jivi pecapanepaenexa. ²⁷ Nexata Espíritu Santo pejamatabēcueneta Simeón joneyaexanatsi temploboyabelia. Bjaraxuata Simeón tane Mariábeje Josébeje pebarējonejavatabeje Jesúsnyōo temploboyarena pexanaenexabeje pacuenia Dioso Moiséspijinēta penajumecopatsilivaisi itorobatsibeje. ²⁸ Nexata Simeón isapita Jesúsnyōo. Pexaniajamatabēcuenē rajuta Diosojavabelia. Pexaniajamatabēcuenē Simeón perajutsijavata Diosojavabelia, Simeón jumaitsi mapacueniaje:

²⁹ Tajatuxanenē, baja rajane netocopatsianame nijajivitonēnē jamatabēcuenexanepanaeya tatēpaenexa. Tsipaji baja netaeyaexaname pacuenia baja cajena tajēvelia najumecapanepaeya nejumaitsimē. ³⁰ Taitaxutota rabaja taniji maponēje, ponē itorobimica jivi pecapanepaenēnexa xamējavabelia. ³¹ Ponē itorobimica jivi pecapanepaenēnexa, daxitajivi taenatsi. ³² Maponēje petsipaebilivaisita, pamonaē apo judíovi ata, jamatabēcuenēitayotsiana. Yapētaeyaexanaena pacuenia jamatabēcuenēitsimē. Nexata maponēje pejamatabēcueneta apo judíovi yaiyataena nijajivi judíovi,

jai Simeón templobota Diosojavabelia pexaniajamatabēcuenē

perajutsijavata Jesúsñeyo yabara.

³³ Nexata Josébeje Mariábeje itsa jumetanebeje bajarapacuenia Simeón pejumaitsijava Jesúsñeyo yabara, jamatabëcuenenabenajacabeje. ³⁴⁻³⁵ Bajaraxuacujinae Simeón tovajëta Diosojavabelia peyavenonaenexatsibeje Josébeje Mariábeje, Jesúsñeyo yajava. Bajaraxuacujinae Simeón jumaitsi Mariájavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaibitsaëtoxaneto apo jumecovënëtsi tsanetsi. Nexata jivi ayaibitsaëtoxaneto naxuabiana, Israel nacuapijivi. Ayaibitsaëtoxaneto pijinia jumecovënëtsianatsi. Nexata pijinia ayaibitsaëtoxaneto capanepaena. Maponëje Dioso pesaëta pinijicuene pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaibitsaëtoxaneto, caejivi canacujitsia, bëpënëa pibisiajamatabëcuene najamatabëxainabiaba. Jivi ayaibitsaëtoxaneto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëthëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Mariájavabelia Jesús yabara tajëvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavënëva. Bajarapova Fanuelpijinë pexënatoyo, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia. ³⁸ Nexata bajarapova ata pata itsajota Josébeje Mariábeje nucabeje templobota. Simeón pisanucaejavata Jesúsñeyo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsñeyo yabara. Romano nacuaverena pepatsivi Israelnacua pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamona copiaevetavanapa Dioso pejamatabëcueneta petovecuajutsinexatsi Israelnacua pevetsivi, daxita bajarapamonaejavabelia, bajarapova tsipaebabiaba Jesúsñeyo pelivaisi.

Pacuenia Jesús ponapona Nazaret tomarata pe-barënaviatsicujinaetsi templobojavaverena yabara pelivaisi

³⁹ Josébeje Maríabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnëyo barënaviatabeje, Nazaret tomarabelia, Galilea nacuata peecaetomarabelia. ⁴⁰ Nexata jane baja Jesúsnëyo vitsaba Nazaret tomarata. Ajamatabëcuenesaë tsaponae Dioso pijacuene yabara. Jamatabëcuenevitsabaponanua. Dioso yavenonaponatsi ayaicuenia.

Pacuenia Jesúsnëyo templobota barëcuaicuaijai judíovi pecujarubivijavabelia yabara pelivaisi

⁴¹ Caevai canacujitsia Josébeje Maríabeje ponabiababeje Jerusalén tomarabelia. Ponabiababeje pascuavënëfiesta penataeyabiabinexabeje. ⁴² Nexata baja Jesúsnëyo doce pavaibeje itsa xaina, barëponabeje icatsia Jerusalén tomarabelia pascuafiesta penataenexa. ⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnëyo nacopatanucalia Jerusalén tomaratalia. Maríabeje Josébeje abaxë apo yapëtaebeje Jesúsnëyo pevecuanacopatsijavatsiliabeje. ⁴⁴ Jamatabëjumaitsebeje saya:

—Jesúsnëyo raeta nanajetaruca vajanajuaponaevita, jamatabëjaiibeje.

Bajaraxuata caematacabi baja pepuaponaebeje namutua, itaxanabeje Jesúsnëyo. Nexata yanijobabeje pijamonaejavabelia, peyapëtaevitsibejejavabelia ata. ⁴⁵ Itsiata apo caxitararabibeje. Nexata naviatecabeje Jerusalén tomarabelia pejaitsinexabeje Jesúsnëyo.

⁴⁶ Acueyabi matacabita caxitajarababeje templobota. Jesúsnëyo naeca judíovi pecujarubivi tuatujëta. Jumetaeyeca bajarapamonae penabarëcuaicuaijailivaisi. Nexata Jesúsnëyo yanijobapona bajarapamonae penabarëcuaicuaijailivaisi yabara. ⁴⁷ Nexata daxita Jesúsnëyo pejumetaeyenaevitsi, taeyena Jesúsnëyo xaniavaetsia pejumeyapëtaejava judíovi pecujarubivi penabarëcuaicuaijailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonae. ⁴⁸ Josébeje Maríabeje itsa tanebeje bajarajota Jesúsnëyo penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevepënacoparemenabeje? Paxanëbeje patacajaitarutsijavatabeje, bitso pacaitaxanatsibeje, jai María.

⁴⁹ Nexata Jesúsnëyo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja xanë taxa Dioso pijacuene taexanaenexa mapabotaje, nejamatabëcueneenabiaba, jai Jesúsñëyo.

⁵⁰ Itsiata bajarapajivibeje apo jumeyapëtaebeje pajamatabëcuene yabara jumaiti Jesúsñëyo.

⁵¹ María baja cajena pejamatabëëthëtota yapëtaeponapona daxita bajarapacueni yabara. Nexata baja bajarapajivibeje pepëta Jesúsñëyo napona baja Nazaret tomarabelia. Nazaret tomarata Jesúsñëyo xaniavaetsia jumecovënëtsiaponapona pacuenia Josébeje Maríabeje itorobabiababeje. ⁵² Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamonaë Jesúsñëyo yapëtanetsi, pexaniajamatabëcuenia tanetsi.

3

Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Mr 1.1-8; Jn 1.19-28)

¹ Pamatacabi pepo nacuaevevtsinë Tiberiovënënë xaina quince pavaibeje pevetsicujinae Romanonacua, bajara pijinia pamatacabi itsanacuanë eveta itsamonae. Bajarapamatacabi nacuaevevtsinë Poncio Pilato eveta Judeanacua. Bajara pijinia pamatacabi nacuaevevtsinë Herodes eveta Galileanacua. Bajara pijinia pamatacabi Herodes pejuyapijinë, nacuaevevtsinë Felipe, eveta Itureanacua, Traconite-nacua yajava. Bajara pijinia pamatacabi nacuaevevtsinë Lisantias eveta Abilinianacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamat-acaitorobinëbeje tsaponaponae. Bajara pijinia pamatacabi Juan, Zacarías pexënato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanëta pejinavanapaevijava. Juan jumai tsanajetarucæ jivijavabelia:

—Panajamatabëcuenepeñëyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuaajibiaexanaenexa pibisiacuene paneexanaeneconimi, jai tsanajetarucæ Juan jivijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinëmi profeta Isaiáspijinë bajayata tajëvelia yaquina Juan

yabara. Juan jivibautisabinë Dioso pitorobilivaisi jivijavabelia petsipaebanajetarucæjavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumulivaisipaebinë vavajai tsane petusato nacuata. Jumi tsane jivijavabelia: “Jivi baxaneba panamutoverena najetarucæjitsia petuxanenë. Batoroviæexananua namuto. ⁵ Daxita namutua pafotonë rubena, atsa baothoca penamatajÿpaeyaexanaenexa namuto. Daxita petsutonëmi, pinijiibotsutoxanetonëmi ata, banamatajÿpaeyaexana. Baroviayaexananua penatoxorotsinamutomi ata. Banamatajÿpayaexananua namutua pebobenaemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajÿnaeya paxamëjavaberena. ⁶ Nexata daxitanacuanëpijivi yapëtaena Dioso pecapanepæjavanexatsi pijaneconivecua,”

jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucæjavanexa yabara.

⁷ Jivi ayaibitsaëtoxaneto pata Juanjavaberena Juan picani pebautisabinexa bajarapamonæ. Bajarapamonæ apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepæna, jamatabëjai.

Nexata Juan jumaitsi bajarapamonæjavabelia:

—¡Panejamatabëcuenenavëxaniabivi! Pacuenia jomo rëcëpeca itsa tane isoto petajuenajetarucæjava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepænexa Dioso papecananeconitsia exanaematacabinexavecua. ⁸ Itsa pajitsipame Dioso papecacapanepæjava, pacopabare pibisiacuene paneexanabiabijava. Dioso pajumecovënëtsiainavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepæna,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipæ papecacapanepænexa Diosojavabelia. Dioso baja cajena caëjÿpatsi jivi pexanaenexa

mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso. ⁹ Peubinaenë pexainenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae, itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xainae camisa. Pajivi pexaejava xaina, tsicobetsatsi pajiviyojavabelia apo xainae pexaejava, jai Juan.

¹² Gobierno pejamatabëcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi patacopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërètame. Pëtsa najumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan ita tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsictia yajava. Xanë raja saya beveliajamatabëcuenenënë bajara-ponëvecua. Nexata bajaraponë vecuaauranë pijazapato ata tataxujonotsinexa beprijajivitonëcuenianë. ¹⁷ Arrozxainaenë baja ita vereta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapon saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereaeisotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianëta Juan muxujiobapona jivi. Tsipaebanajetaruca pexanialivaisi pecapanepaelivaisinexatsi Diosojavabelia. ¹⁹ Bajaraxuacujinae icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaejavanë ata, itaveta Juan. ²⁰ Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

Pacuenia Juan bautisaba Jesús yabara pelivaisi

(Mt 3.13-17; Mr 1.9-11)

²¹ Juan pevaetabivajënaetsi penaneconitsivi pejebabiabibota peetsinexatsi, jivi bautisabaponapona. Bajarapamatacabi Juan bautisaba Jesús ata. Jesús pebautisabicujinaetsi ita vajëta Diosojavabelia, athëbëtatsia itaboxo napatsia. ²² Athëbëvetsica Espiritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumaitsijavatsi: “Xamë raja taxënatomë,

bitso tacaasivanë. Bitso casivajamatabëcuenebarëyatsi,”
pejajjavatsi.

Jesucristo pijasalinaivimi pevënëanë yabara pelivaisi
(Mt 1.1-17)

²³ Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexënato. José paxapijinë pevënë Elí. ²⁴ Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. ²⁵ José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. ²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá. ²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. ²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. ²⁹ Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. ³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. ³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. ³² Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. ³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. ³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor. ³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. ³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec. ³⁷ Lamec paxapijinë pevënë Matusalén. Matusalén paxapijinë pevënë

Enoc. Enoc paxapijinë pevenë Jared. Jared paxapijinë pevenë Mahalaleel. Mahalaleel paxapijinë pevenë Cainán. ³⁸ Cainán paxapijinë pevenë Enós. Enós paxapijinë pevenë Set. Set paxapijinë pevenë Adán. Adánpijinë Dioso pexanaenëtsi.

4

Pacuenia picani Jesús jamatabëcueneëjëbatsi dovathi yabara pelivaisi

(Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicujinaetsi. Tsijamatabëvënëcatsi bitso Espíritu Santo. Nexata Espíritu Santo ponaeyaexanatsi petusato nacuyabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piajani. Dovathi nexata jamatabëcueneëjëbatsi pibisiacuene picani pexanaenexa.

³ Dovathi jumaitsi Jesúsjavabelia:

—Itsa pepacuenene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae epexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matababi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijit-sutoxanetovabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë. ⁶ Nexata icatsia dovathi jumaitsi Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexinaejava. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë.

⁷ Ayaijamatabëcuenenënë netaeya taitabarata nematabacabëta itsa netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcaepematabacabëta caenë, pepo petuxanenë Diosovabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaitsi Jesúsjavabelia:

—Itsa pepacue ne Dioso pexënatomë, jirevaremeca irabereca. ¹⁰ Bajarapacuenia jirevaremeca irabereca. Tsipaji xamë peitsacueneyaniva pecaevetsinexa, Dioso pejumelivaisibaxutota jumaitsi mapacueniaje:

Dioso itorobianica pijaängelevi pecaevetsinexa. ¹¹ Nexata ängelevi pecobeta cayotsiana pecataxutsaquitsiyaniva ibotonëjavabelia,

jai Dioso pejumelivaisibaxutota xamë pecaevetsinexa ängelevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjëtsianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcueneëjëbiveretatsi pibisiacuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatabëcueneëjëtsinexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja itsa naviata petusato nacuaverena, Galilea nacuyaberena, Espíritu Santo pesaë yajavaponapona. Nexata daxita Galilea nacupijivi vënëlivaisitanetsi Jesús. ¹⁵ Judíovi penacaetuatabiabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcuenenë,” jai tsabiabi.

Pacuenia Jesús naviata pijatomarabelia, Nazaret tomarabelia, yabara pelivaisi

(Mt 13.53-58; Mr 6.1-6)

¹⁶ Nexata Jesús naviata pevitsabitomarabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimatacabita Jesús najoneya judíovi

penacaetuatabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabibota Jesús nonotapuna Dioso pejumelivaisibaxuto pet-simuxulebinexa daxita bajarajota penaevi pejumetaenexa. ¹⁷ Nexata Jesús tsicoberutatsi profeta Isaíaspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaitsi mapacueniaje:

¹⁸ Dioso pijaEspíritu Santo netsijamatabëeca. Tsipaji Dioso nitapeta tatsipaebinxexa pexanialivaisi pibisiacuene pexanabiabijava bepeyajamatabëcuenejiovijavabelia. Nitorobanua tajamatabëcuenexaniavaetsinexa bajaramonae pibisiacuene pexanabiabineconi yabara bepeyajamatabëcuenejiovijavavecua. Nitorobanua tajamatabëcuenexaniavaetsinexa pamonae pija-matabëcueneitaquirivi, pamonae abaxë apo yapëtae pexaniajailivaisi. Nitorobanua tacapanepaenexa pamonae jamatabëcuenebejiohitabiabatsi pijavajabitsaë. ¹⁹ Nitorobanua tatsipaebinxexa pacuenia baja Dioso najamatabëcuenevereta pecapanepaenexa pijajivi,

pejaiitanejavata tajëvelia Jesús yabara Isaíaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabibota penacuenebinëjavabelia. Bajaraxuacujinae Jesús baja icatsia ecareca. Daxita pamonae judíovi penacaetuatabibota ena, Jesús asaëyata taeyenatsi. ²¹ Nexata icatsia Jesús jumaitsi bajarapamonaejavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

²² Nexata daxitajivi pexaniajamatabëcuenia Jesús yabara cuaicuajiai. Jamatabëcuenenabenajaca pexanialivaisi Jesús petsipaebixae. Nexata bajarapamonae Jesús jamatabëcueneaebiatanetsi. Nexata bajarapamonae nayanijobena. Najumaitsi:

—¿Matsa baja ponë Josépjinë apo pexënatoje? najai tsenae bajarapamonae Jesús yabara.

Tsipaji saya bajarapamonae jamatabëjumai tsenae:

—Josépjinë raja pexënato, jamatabëjai tsenae.

²³ Nexata Jesús jamatabëcueneyapëtane pacuenia sivanajamatabëxainatsi bajarapamonaë. Nexata Jesús jumaitsi bajarapamonaëjavabelia:

—Xaniajanë cajena pacuenia pacatsipaëbijitsiatsi. Pacuenia pajumaitsimë tsabiabi pajiviyojavabelia pajamatabëcueneaebiataneme, bajara pijinia pacuenia xanëjavaberena ata panejumaitsimë tsane patanejamatabëcueneaebiataexaemë. Panejumaitsimë tsane mapacueniaje: “Pacuenia pacavënëlivaisitanetsi Dioso pesaëta pinijicuene nexanaëjava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuatabiabibota penaëvijavabelia.

²⁴ Icatsia Jesús jumaitsi bajarapamonaëjavabelia:

—Xaniajanë cajena pacuenia pacatsipaëbijitsiatsi. Itsanë ata Diosojumepaëbinëmi profetanë pijanacuapijivi apo jumecovënëtsitsi petsipaëbilivaisi. Jamatabëcuene aebiataeyabiabatsi pijanacuapijivi.

²⁵ Bajayata profetanëmimeje pinijicuene exanaë atabeje, pinijicuene apo exanaëbeje pijanacuata. Bajara pijinia pacuenia xanë ata pinijicuene apo exanaënë tsane tavitsabitomarata. Bajayata, abaxë pamatacabi profeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabi janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae.

²⁶ Itsiata Elíaspijinë Dioso apo itorobitsi peyavenonaenexa bajarapamonaëyajuvënëva. Elíaspijinë Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata. ²⁷ Bajayata, Elíaspijinë pevënamuto, profeta Eliseopijinë ponapona Israel nacuata. Bajayajebi bitso peperabëtsabanaëvi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaëviyajuvënënë, apo jamatejemayaexanaë. Caenë bajayajebi bitso peperabëtsabanaënë Naamán, Siria nacuaverena pepatsinë, jamatejemayaexana, jai Jesús judíovi penacaetuatabiabibota penaëvijavabelia.

²⁸ Nexata bajarapamonaë itsa jumetane bajarapacuenia Jesús pejumaitsijava, bitso Jesús baraanaëpanatsi bajarapamonaë. ²⁹ Bajarapamonaë nonobapuna. Vaetabatsi Jesús. Caponaliatsi tomarajumabelia. Patsutoyenëpanata

eca Nazarettomara, bajarapatsutojumabetsia Jesús capon-ayatsi pexuabinexatsireca picani bajarapatsuto itapajanitojavareca. ³⁰ Itsiata baitsi jane Jesús bajarapamonae tuatu-ajëta najetarucae ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

Pacuenia pebi, dovathi peyjavaponaponaenë, Jesús jamatejemayaexana yabara pelivaisi
(Mr 1.21-28)

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. ³² Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

³³ Bajarajota judíovi penacaetuatabiabibota pebi, dovathi peyjavaponaponaenë, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyjavaponaponaenë Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuenene exanaenejevatsi. ³⁶ Nexata daxitajivi bajarapacuenene itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsitsica! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi
(Mt 8.14-15; Mr 1.29-31)

³⁸ Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalialia. Nexata bajarajota Jesús pevajënae, Simón pijava pena bitso romaebanucatsi.

Nexata bajarajota itsamonae Jesús tsipaebarecëpatsi bajara-pova peromaebanucaejavatsi. ³⁹ Jesús nexata cujilia peromaebanucaeavatsi. Vecuaitaveta peromaebijavatsi. Nexata bajarajota peromaebanucaeavatsi domae baja vecuaajibi tsanajetsitsireca. Bajarapova baja jamatejema. Nexata bajarapova Jesús bana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitavirivitanane pexainaevi, tocapatatsi Jesús javaberena. Jesús nexata perabëjayatapona caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. ⁴¹ Itsamonae ayaibitsaëto, dovathi peyajavajinavanapevi, Jesús vecuacapsapapona. Nexata dovathi itsa pitsapa, vavajai tsabiabi Jesús javabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuaijainexa petsipaebiyaniwa itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Mr 1.35-39)

⁴² Bajayacunua, ajena baja matabi tsarucapona, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonae Jesús pevecuaponaeyaniwa itsajavabelia. ⁴³ Nexata Jesús jumaitsi bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinxata jivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacuajava livaisi jivi tsipaebanajetaruca judíovi penacaetuatabiabonëjava.

5

Pacuenia dujuai bitso ayajavaxaneto juta peyamatajucajavata yabara pelivaisi

(Mt 4.18-22; Mr 1.16-20)

¹ Itsamatabi Jesús nuca Genesaret pucaxaneto itapata. Nexata jivi ayaibitsaëtoxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje dujuai

peyamatajucaevi Simónbana vecuanonobajunaręcëpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatuajëyojavabelia. Jesús eca jeraënëta. Nexata Jesús jera ënëjavaverena livaisi tsipaebeca bajarapajivi bitsaëttoxanetojavabelia. ⁴ Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubujavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaëucucucuae. ⁷ Nexata itacovaebarena penajuayamatajucaevi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje. ⁸ Nexata Simón Pedro itsa tane bajarapacueni, pematabacabëta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tshipaji xanë pibisiacuene taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tshipaji penajuayamatajucaevi yajava bitso jamatabëcuenenabenajaca, bitso ayaijavaxaneto dujuai peyamatajutsixae. ¹⁰ Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavana-

paejavaximi rajuta itsamonaejavabelia. Bajaraxuacujinae pēnapona baja Jesús.

Pacuenia Jesús jamatejemayaexana bajayajebi bitso peper-abētsabanaenē yabara pelivaisi

(Mt 8.1-4; Mr 1.40-45)

¹² Jesús itsa ponapona tomarata, nexata bajarajota patajopa pebi, bajayajebi bitso peperabētsabanaenē. Itsa bajaraponē tane Jesús, pematabacabēta irataeya bocajunua Jesús pitabarata. Vajēta pinijicuenia Jesúsjavabelia. Jumaitsi:

—Tajatuxanenē, cacaējēpa raja tanejamatejemayaexanaenexamē mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabētsabanaenē Jesúsjavabelia.

¹³ Nexata Jesús pecobeta perabējayalia bitso peperabētsabanaenē. Jumaitsi bajaraponējavabelia:

—Jājā, jitsipajē cajena. Jamatejemamē rabaja, jai Jesús peperabētsabanaenējavabelia.

Bajarapacuenia Jesús pejumaitsijavata peperabētsabanaenēmi baja perabēxanepananajereca. ¹⁴ Nexata Jesús jumeitaveta bajayajebi bitso peperabētsabanaenēmi petsipaebiyaniwa itsajiviyojavabelia ata pacuenia Jesús jamatejemayaexana bajaraponē. Jesús jumaitsi:

—Naitajēremelia jane sacerdotenējavabelia, templobota penacuenebinējavabelia. Nexata sacerdotenē cataena pecavecuajibijava baja niavitanejavami. Diosonexa rajuremelia ofrenda sacerdotenējavabelia pecavecuajibixae niavitanejavami. Bajara tsipaji pacuenia bajayata vajasalinainēmi Moiséspijinē nacaitoroba. Nexata jivi yapētaena pepacuene baja pecavecuajibijava niavitanejavami, jai picani Jesús bajayajebi bitso peperabētsabanaenēmijavabelia jivi ayaibitsaēto pevēnēlivaisitaeyanivatsi.

¹⁵ Itsiata Jesús vēnēlivaisitanetsi daxita bajarapanacuapijivi. Nexata Jesús jivi itsa vēnēlivaistanetsi, ayaibitsaētoxfaneto patapona Jesúsjavaberena penamuxunaevetsinexatsi petsipabilivaisi. Bajarapamonae pata Jesús pejamatejemayaexanaenexanua piavitanejavavecu. ¹⁶ Itsiata Jesús itsajavata jivivecu natixitabiaba pesaicaeyojavabelia. Bajarajota vajētabiaba Diosojavabelia.

Pacuenia Jesús jamatejemayaexana petabusipacuenabinētsi yabara pelivaisi

(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judiovi pecujarubivi ata. Bajarapamonae pata Galilea nacuata penaetomaranējavaverena, Judea nacuata penaetomaranējavaverena ata, Jerusalén

tomaraverena ata. Nexata bajarapamatacabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecua. ¹⁸ Nexata bajarajota Jesúsjavaberena pebijivi camayota yavëtaraparena petabusipacuenabinëtsi. Bajarapamonae picani bajaraponë boyalia yavëtararajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinëtsi camayota yacopatsicatsi jivi tuatuajëatsica Jesús pitabarayatsica. ²⁰ Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajjavatsi Jesús jamatabëcueneyapëtane. Bajaraxuata petabusipacuenabinëtsijavabelia Jesús jumaitsi mapacueniaje:

—Pibisiacuene rabaja nexanaeneconimi cavecuaajibiaexanatsi, jai Jesús bajaraponëjavabelia.

²¹ Nexata judíovi pecujarubivi, fariseovinua, itsa jumetaeyena Jesús pejumaitsijava bajarapacuenia, najamatabëxainena bëpënëa mapacueniaje:

—¿De meta maponëje? Maponëje Dioso apo pejitsipacuenia cuaicuaijai. Itsanë ata cajena apo caëjëpaetsi itsajivi pibisiacuene pexanaeneconimi pevecuaajibiaexanaenexa. Caenë Dioso caëjëpatsi itsajivi pibisiacuene pexanaeneconimi pevecuaajibiaexanaenexa, jamatabëjai tsenae bajarapamonae bëpënëa Jesús yabara.

²² Nexata Jesús jamatabëcueneyapëtane bajarapamonae bëpënëa pesivanajamatabëxainenaejava bajarapacuenia. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconi tavecuaajibiaexanaenexa. ²³ Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa pepacuene apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpacuene

panejamatejemayaexanaenexa bajaraponë, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajê maponëjavabeliaje. Nexata patanecueneyapêtaenexamê tanecaëjêpaejava tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponêje, jai Jesús bajarapamonaejavabelia.

Nexata icatsia Jesús jumaitsi petabusi-pacuenebinëtsijavabelia:

—Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitsijavata, petabusi-pacuenebinëmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetarucacae: “Diosomë, pexaniacuene netoexaname,” jai tsanajetarucacae bajaraponë. ²⁶ Nexata daxita pamonaë tane petabusi-pacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonaë jumaitsi Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonaë najumaitsi:

—Ajena, mapamatacabitaje, tanetsi Dioso pinijicuenë pexanaejava, najai bajarapamonaë.

Pacuenia Jesús pijajivitonënexa junata Levívënënë yabara pelivaisi

(Mt 9.9-13; Mr 2.13-17)

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucaejavata taeyeta Levívënënë. Bajaraponë pematamoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenëbabiaba. Pënapona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesúsnexa. Tsipaji Leví

jamatabëcuenebarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuene. Itsamonae ata Leví pijabota naena mesa muxuneneta. ³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuajaitsi Jesús pijajivijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuene impuestomatamo pematamoyanijob-abiabivijavata, piamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús ita jumetane fariseovi, judíovi pecujarubivinua, pebaracuaicuajajavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. ³² Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëta pona Diosojavabelia pexaejava apo pexaeyabiabixae yabara pelivaisi

(Mt 9.14-17; Mr 2.18-22)

³³ Fariseovi, judíovi pecujarubivinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparacióncuenia jumaitsi bajarapamonaejavabelia:

—Pamonae junatatsi penacasabifiestajavabelia penanabainexa, apo atsohi pexaejava ita abaxë yajavaecatsi pejananacasabinë. ³⁵ Itsiata baitsi jane ita pejananacasabinë tsimaxëpatsipatsi pijavajabitsaë pevecuacaponanexatsi itsajavabelia, nexata pecovëta bajarapamonae apo xae tsi-pae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia

vajëtapona. Itsiata pamatacabi xanë necaponaena bajarapamonaevēcua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

³⁶ Nexata bajarapamonaē perujumatabëcuene baja penavecuacopatsinexa, Jesús livaisi tsipaeba comparacióncuenia, bajarapamonaē pejumecovënëtsinexa ëpejanalivaisi, Jesús petsipaebilivaisi. Bajarapamonaē anijajamatabëcuenebeje pexainaeyaniva, perujumatabëcuene baja penavecuacopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi bajarapamonaējavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaējitsipa pejananaxatatsijava. Apo itajitsipaenua tsipae pejanapana perucaejava perujunaxatatsiesetojavabelia. ³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. ³⁸ Bajaraxuata bepaca pejanavinoranë pejanabocodoruanëjavabelia. ³⁹ Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaējavabelia comparacióncuenia. Bajarapacuenia Jesús jumaitsi comparacióncuenia tsipaji bajarapamonaē catsiteca perujumatabëcuene. Nexata Jesús jitsipa bajarapamonaē pejumecovënëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi
(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi pijañixae, trigoruanë siricanajetarubena. Xunacobenacaquiatanajetarubena. Xuxaeyabuatapona. ² Nexata fariseoviyajuvënëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimat-acabixae, apo bepaexanaemë mapacueniaje, jai fariseovi Jesús pijajivijavabelia.

³ Jesús nexata jumaitsi fariseovijavabelia:

—Ajena, penacueraevetsimatocabita, tajajivi bajara-pacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? ⁴ Bajaraponë Davidpijinë joneya Dioso pijatemploboy-
alia. Nexata Dioso pijatemploboënëta, mesajumata bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Èsacerdotevi picani pexaenexa tocopatatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

⁵ Icatsia pematatsënëa Jesús jumaitsi fariseovijavabelia:

—Xanë, Daxitajivi Pematapijinënë, netoxanepana cajena tatsipaebinxaxa pacuene xanepana jivi pexanaenexa penacueraevetsimatocabita ata, jai Jesús.

Pacuenia Jesús jamatejemayaexana pebi pecobetsaque-naenë yabara pelivaisi
(Mt 12.9-14; Mr 3.1-6)

⁶ Itsamatacabi Jesús joneya judíovi penacaetuatabihiboy-
alia judíovi penacueraevetsimatocabita. Nexata bajara-jota Jesús jivi livaisi tsipaeba. Bajarajota pebi pecujuanea-
nia pecobetsaquenaenë, naeca. ⁷ Nexata Jesús naitaxuto-
caevetenatsi judíovi pecujarubivi, fariseovinua, petaenex-
atsi Jesús pejamatejemayaexanaejava pecobetsaquenaenë
judíovi penacueraevetsimatocabita. Nexata Jesús pecobet-
saquenaenë itsa jamatejemayaexana penacueraevetsimata-
cabita, “Jesús raja pibisiacuene exana,” pejainexa bajarapa-
monae. ⁸ Nexata Jesús yapëtane pacuenia bajarapamonae
sivanajamatabëxainatsi. Nexata Jesús jumaitsi pecobetsaque-
naenëjavabelia:

—Nonotapunare. Nucare majotaje mapamonae
pitabarataje, jai Jesús.

Nexata pecobetsaquenaenë nonotapuna. Nuca bajara-
pamonae pitabarata. ⁹ Nexata Jesús jumaitsi penaitaxuto-
caevetenaevitsijavabelia:

—Penacueraevetsimatacabita ata xanepana vajaex-
anaenexa pexaniacuene. Xanepana vajajamatejemayaex-
anaenexa piavitanevi, jai Jesús penaitaxutocaevetenaevitsi-
javabelia.

¹⁰ Jesús matatoyorotsia naëcoba daxita pamonaē ena ba-
jarajota. Jesús jumaitsi pecobetsaquenaenējavabelia bajara-
pamonaē pitabēnejeva:

—Namaxërovire, jai Jesús.

Nexata baja pecobetsaquenaenē namaxërovita. Bajarajota
cobexanepananajereca baja. Pecobetsaquenaējavami ajibi.

¹¹ Nexata judíovi pecujarubivi, fariseovinua, itsa tane Jesús
pecobexanepanaeyaexanaejava pecobetsaquenaenē, bitso
anaepana. Nexata jane baja najumejaita pacuenia Jesús
beyaxuabijitsiatsi.

*Pacuenia Jesús pijajivi ayaibitsaëtoxanetoyajuvēnēvi itapeta
saya doce ponēbeje apóstolevinexa yabara pelivaisi*

(Mt 10.1-4; Mr 3.13-19)

¹² Jesús pijajivi ayaibitsaëtoxanetoyajuvēnēvi, doce saya
ponēbeje, itapeta apóstolevinexa. Jesús pitapetsivajēnaeya
apóstolevinexa, junaya petsutojumabetsia pevajētsinexa
Diosojavabelia. Nexata Jesús meravijebi bajarapatsuto-
jumatatsia vajētaona Diosojavabelia. ¹³ Bajayacunua,

ajena baja matabi tsarucaponaē, Jesús junata daxita
pijajivibitsaëtoxaneto bajaraponējavabelia. Nexata bajarajota
itapeta pijajivibitsaëtoxanetoyajuvēnēvi, doce saya ponēbeje.
Bajarapamonaē Jesús vënëruba apóstolevi. ¹⁴ Pamonaē Jesús
itapeta apóstolevinexa mapevënēanēje. Copiaya ponē, pevënē
Simón. Bajaraponē Jesús vënëruba itsavënē, Pedro. Itsanē
Andrēs, Simón Pedro jane baja pejuyapijinē. Itsanē Santiago.
Itsanē Juan. Itsanē Felipe. Itsanē Bartolomé. ¹⁵ Itsanē Mateo.
Itsanē Tomás. Itsanē Santiago, Alfeo pexēnato. Itsanē Simón,
celotenē. ¹⁶ Itsanē Judas, Santiago pejuyapijinē. Itsanē Judas
Iscariote. Bajaraponē bexējavabelia Jesús canajetsijitsiatsi
pijavajabitsaë pecobeyabelia pebeyaxuabinexatsi.

*Pacuenia Jesús jivi ayaibitsaëtoxaneto livaisi tsipaeba yabara
pelivaisi*

(Mt 4.23-25)

¹⁷ Jesús baja, pijajivi ayaibitsaëtoxaneto yajava, runaica
petsutojumavetsica. Nexata eputua petsutoyenepanajavata,
itsajota ira namatajēpa, Jesús yajavanuca pijajivi
ayaibitsaëtoxaneto. Bajarajota nexata jivi nacaetuata
ayaibitsaëtoxaneto. Bajarapamonaē Judea nacuapijivi,
itsamonae Jerusalén tomarapijivi, itsamonae Tiro
tomarapijivi, itsamonae Sidón tomarapijivi. Tiro tomarabeje
Sidón tomarabeje, manuameneitapata ecabeje. Daxita

bajarapatomaranëpijivi nacaetuata pejumetaenexa
 Jesús petsipaebilivaisi. Bajarapamonae patanua
 Jesús pejamatejemayaexanaenexa piavitanejavavecua.
 18 Bajarapamonaeyajuvënëvi itsajamatabëcuene tsabiabi
 dovathi pejamatabëcueneta. Bajarapamonaenua Jesús
 jamatejemayaexana. 19 Daxita pamonaë bajarajota
 nacaetuata, Jesús picani jamatabëjayabatsi. Tshipaji Jesús
 daxitajivi piavitanejavavecua jamatejemayaexanapona
 pecaëjëpaejamatabëcuenetatsi.

*Pacuenia Jesús pijajivi tsipaeba Jesús pi-
 jajivi pejamatabëcuenebarëyajavanexa, apo peja-
 matabëcuenebarëyajavanexanua, yabara pelivaisi
 (Mt 5.1-12)*

20 Jesús pijajivi naëcota asaëya. Jumaitsi bajarapamonaejav-
 abelia:

—Panajamatabëcueneocopabame baja Diosojavabelia
 paneponaenexa Dioso pijatomarabetsia. Bajaraxuata
 paxamë bepanejamatabëcuenejiobivimi panijaneconi yabara,
 aeconoxae baja pajamatabëcuenebarëyamë Diosojavabelia.

21 'Pajitsipame Dioso pijacuene. Pajamatabëcuenebarëyamë
 baja. Tshipaji Dioso athëbëtatsia pacarajutsiana daxitacuene
 xua panamatavenoname.

'Paneyanuevimi pibisiacuene paneexanaeneconi yabara,
 pacavecuaajibiaexana baja bajarapaneconi. Bajaraxuata it-
 samatacabi pajamatabëcuenebarëyamë tsane.

22 'Xanë, Daxitajivi Pematapijinënë, patajajivixaemë, itsa
 pacaitoya tsane jivi, itsiata pasivajamatabëcuenebarëyamë
 tsane. Bajarapamonae pacanavecuaitavetsi ata tsane,
 itsiata pasivajamatabëcuenebarëyamë tsane. Pibisiacuenia
 pacabijatae ata tsane, pibisiacuenia pacabaracuaicuaijai
 ata tsane, itsiata pasivajamatabëcuenebarëyamë tsane.

23 Bajarapacuenia pacaexanae ata tsane, itsiata
 pasivajamatabëcuenebarëyamë tsane. Tshipaji raja
 Dioso athëbëtatsia pacarajutsiana bitso pexaniacuene
 jivi papecaitojamatabëcuene. Pamonaë pacaitoya
 tsane, bajarapamonae pijasalinaivimi bajayata itoya
 Diosojumepaebivimi profetavi. Nexata bajarapamonae
 pijasalinaivimi bajayata bejiobiaexanapona Dioso-
 jumepaebivimi profetavi. Bajarapamonae aeconoxae ata
 pijasalinaivimi cuenejëpavanapa. Bajaraxuata paxamë ata
 icatsia bajarapamonae pacaitoya tsane pijasalinaivimi
 pecuenejëpavanapaexae.

24 'Daxitacuene mapanacuata panexainaeivi, Dioso bitso
 ayaicuenia pacabejiobiaexanaena. Tshipaji pacabarëyamë tsa-
 vanapae ëpanexainaejava mapanacuataje.

25 'Bitso bepajamatabëcuenejobimë tsane daxitacuene mapanacuata panenatojitsipaecuene panexainaevi. Pasivajamatabëcuenebarëyamë picani tsavanapae panexainaejava. Itsiata baitsi jane itsamatacabi itsa patëpaename, panetëpaecujinae panajamatabëxainaename ayaicuena.

'Bepajamatabëcuenejobimë tsane panejëajëajitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacuene, panetëpaecujinae bitso payanuenam pibisiacuene paneexanaeneconi.

26 'Mapanacuapijivi pexaniacuena pacabaracuaicuajai tsabiabi saicayacuena Dioso pejumelivaisivecua panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejobimë tsane. Tshipaji pacuenejëpame bajayata pamonami jinavanapa. Bajarapamonaemi bajayata jivi tsipaebabiaba saicayacuena Dioso pejumelivaisivecua. Nexata bajarapamonaemi pexaniacuena baracuaicuajaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuena Jesús pijajivi muxujioba piasivanexa pitoyavi atatsiyabara pelivaisi

(Mt 5.38-48; 7.12)

27 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevet-sivimë. Pasivamëre papecaitojavi ata. Pexaniacuene patoexanare pamonaepacaitoya. 28 Payavenonare pamonaepacabijatane pibisiacuena. Pamonaepacabaracuaicuajai pibisiacuena, patovajëre Diosojavabelia peyavenon-aenexatsi. 29 Itsajivi itsa pacaitabarapacabi axuaba anaeya, nexata icatsia itsanenia ata patonaitabaracaevere papecaitarapacabi axuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisata papeyacajërëtsinexa. 30 Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. 31 Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia, jai Jesús pijajivi ayaibitsaëtoxanetojavabelia.

32 Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia.

Tsipaji piamatabëcuenebejevi ata, pamonaē asivatsi, banamataenetsianasiva. ³³ Pexaniacuene itsa patoexanaē-jitsipame pexaniacuene ëpapecatoexanaēvijavabelia, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, pexaniacuene batoexana penajamatabëcuenejëpaevijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, batsicopata penajamatabëcuenejëpaevijavabelia, pamonaē jamatabëcuene yapëtane baja petocanaviatsinexatsi. ³⁵ Nexata pasivamëre panijavajabitsaë ata. Bajarapamonaējavabelia pexaniacuene patoexanare. Bajarapamonaē patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexanavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë piamatabëcuenebejevi ata. Itsamonae Dioso yavenonaē atatsi, itsiata apo canaējëtsi Dioso peyavenonaējavatsi. Bajarapamonaē apo canaējëtsi ata Dioso peyavenonaējavatsi, itsiata tsiteca Dioso itaxutotsoniataeyabiaba. ³⁶ Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsaëttoxanetojavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonaē ata Dioso itaxutotsoniataenetsi, yabara pelivaisi

(Mt 7.1-5)

³⁷ Icatsia Jesús jumaitsi pijajivi ayaibitsaëttoxanetojavabelia petsutoyenepanajavata:

—Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xani-avaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuaijai tsane pibisiacuene paneexanaejava yabara. Itsamonae pibisiacuene pacaexanaē ata, pajamatabëcuene caevare. Pabarajamatabëcuenexanepanarena. Nexata pijinia Dioso pitabarata pibisiacuene paneexanaejava Dioso jamatabëcuene caeviana. Pacabarajamatabëcuenexanepanaenana. ³⁸ Parajutaponare

itsamonaejavabelia penamatavenonaejavaxi. Nexata juya paxamē Dioso pacarajutaponaena pacuenia jitsipa papecarajutsinexa. Pacarajutsiana xuavajēto itsamonae parajutame matatoxenetsia, jai Jesús daxitajivijavabelia petsutoyenepanajavata.

³⁹ Jesús icatsia comparacióncuenia tsipaeba bajarapamonaejavabelia mapalivaisije:

—Ponē bitso itaxutotsēcēna, apo caējēpaetsi pematacaponaenexa itsanē, ponē pijinia bitso itaxutotsēcēna. Itsa matakaponaejitsipa, nexata najuajopaejitsiparecabeje bajaraponēbeje caemēthēxanetojavareca. ⁴⁰ Itsajivi pijinia itsa nacujaruba, yapētae ata baja penacujarubijava, apo jamatabēcuenematatoxenetsi pecujarubinētsi. Itsa baja penacujarubijivi vereta xaniavaetsia penacujarubijava, nexata saya najamatabēcuenējēpabeje pecujarubinētsibeje, jai Jesús pijajivijavabelia.

⁴¹ Jesús pijajiviyajuvēnēvi pepacuene bepianeconijibivi natane. Nexata itsa cujirutane itsamonae itsacuenejavayo pexanaejava, jumai tsabiabi: “Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaittsabiabixae, Jesús pijajivi piurabinexa jumaitsi mapacueniaje:

—Pētsa paxamē pepacuene bepaneanconijibivi nataeya pamuxujiobame itsajivi pijaneconi yabara. Tsipaji raja apo payapētaemē paxamē ata pijinia paneconivajēto paxainame. ⁴² Nexata paxamē ata ayaineconixaneto itsa paxainame, nexata itsanējavabelia apo bepajumaitsimē: “Tajabanānē, papibisiacuene exaname, copare,” apo bepajamē. Yamaxēitojorobiaya saya bepexaniajamatabēcuenēvi nataeya pacuaicuaijamē tsabiabi. Itsamonae pijaneconi yabara pabaracuaicuaijamē tsabiabi. Itsiata pijinia paxamē ata paneconivajēto paxainame, apo payapētaemē. Paxamē copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenē itsa nacuaita, nayapētane pavirianaecuene yabara pelivaisi

(Mt 7.17-20; 12.34-35)

⁴³ Icatsia Jesús jumaitsi pijajivi ayaibitsaētoxanetojavabelia petsutoyenepanajavata:

—Pexaniavirianaenē itsa ubatsi, nacuaita pijinia pexaniacuai. Apo nacuaitsi pibisiacuai. Ponae pijinia pibisianaē, apo nacuaitsi pexaniacuai. ⁴⁴ Caevirianaē canacujitsia yapētanetsi itsa nacuaita. Higovēnecuaito apo

paucutsimë cucunanaeta. Uvaru pijinia apo paucutsimë saya pejuviënëbotota. ⁴⁵ Bajara pijinia itsi jivi ata. Pexaniajamatabëcuenenë pexaniacuene yabara cuaicuajai. Tsipaji pexaniajamatabëcuene xaina pejamatabëëthëtota. Pibisiajamatabëcuenenë pijinia pibisiacuene yabara cuaicuajai. Tsipaji pibisiajamatabëcuene najamatabëxaina pejamatabëëthëtota. Nexata pacuene yabara pebi pecuaibovojotota cuaicuajai, bajarapacuene pitsapa pejamatabëëthëtojavavetsina, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia? ⁴⁷⁻⁴⁸ Pajivi xanëjavaberena pata tanenamuxunaevetsinexa, tanejumecovënëtsinexanua, bajarapajivi apo nacueratsi tsane. Bajarapajivi piatajairata bo bepexanaenë tsane. Bajarapajivi yabara pacatsipaebianatsi. Bo pexanaenënexa, peyapëtaexae itsajota pijabo exanaejitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mëthëca piatajairata. Nexata bajaraponë apo nacueratsi bo pexanaejava. ⁴⁹ Pajivi nejumetae ata tsane tatsipaebilivaisi, itsiata itsa apo nejumecovënëtsi tsane tatsipaebilivaisi, nacueratsiana. Bajarapajivi tajetabota bo bepexanaenë tsane. Ponë tajetabota pijabo exaneta, yapëtae ata emarapae pecopiapat-sijavanexa, bajaraponë nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi

(Mt 8.5-13)

¹ Jesús baja itsa najumevereta pijajivi ayaibitsaëtoxaneto livaisi petsipaebijava petsutoyenepanajavata, pona baja Jesús Capernaum tomarabelia. ² Capernaum tomarata ponapona Romano nacuapijinë, vajabitsaë pijacapitán. Bajaraponë

pijajivitonë, bitso piasivanë, toavitanetsi. Totëpaejitsiatsi baja. ³ Bajaraponë capitán vënëlivaisitanetsi Jesús pejamatejemayaexanaponaejava piavitanevi. Nexata capitán jumaitsi judíovi pijaancianovijavabelia:

—Panetojunaremelia Jesús. Pabarëpatsiaremena tajaboyaberena tanetojamatejemayaexanaenexa tajajivitonë, jai capitán judíovi pijaancianovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

—Bajaraponë capitán bitso pexaniajamatábëcuenenë. Nexata tojamatejemayaexanaename pijajivitonë. ⁵ Tsipaji raja bajaraponë nacaasiva vaxaitsi judíovitsi. Matamota cajena pijapalatata vajanacatoexanetsinexa vajanacaetuatabi-abibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonae pepëta. Itsa baja imoxoyotanajetarubena capitán pijabo, nexata capitán icatsia peyapëtaevitsi itoroba Jesús pemataenenaenexatsi. Capitán peyapëtaevitsi itoroba Jesúsjavabelia pejumaitsinexa mapacueniaje:

—Petuxanenë, pëtsa paremena tajaboyaberena. Apo caquenetsiataejitsipaetsi. Beveliajamatábëcuenenënë raja saya xanë xamëvecua. Nexata apo xanepanae tsipae nena-jonejava tajaboyaberena. ⁷ Apo nejamatabëcuenecaëjëpaenua taponaejava xamëjavabelia ata. Saya bajaraverena itorobare ënijume. Nexata tajajivitonë netojamatejema tsane. ⁸ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaë, tajajivi, taitorobicuenia tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa maberena, bajaraponë patabiabarena. Itsa itorobajë tajajivitonë tane-toexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, cacaëjëpa. Nexata saya bajaraverena ënijume itorobare saya ënijumeta tajajivitonë tanetojamatejemayaexanaenexamë, jai capitán mapacueniaje petonajumeitorobijume Jesúsjavabelia.

⁹ Jesús itsa jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitajarabaxuabinë xanëjavaberena bitso tanesivanajamatábëcuenecopatsinë pacuenia mapacapitán nesivajamatábëcuenecopatsiaya jumaitsije, jai Jesús capitán yabara. ¹⁰ Nexata baja

pamonae capitán itorobalia Jesús petsipaebinexatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonē pejamatejemanē.

Pacuenia pamonā pevecuatēpaevatsi pexēnato Jesús toasaēyaexana, petēpaenēmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, itsamonae yajava, ayaibitsaētoخانeto. ¹² Itsa baja Jesús patanajetaruca Naín tomara imoxoyojavata, nexata camataenenatsi petēpaenē pecanajetarubenaevi. Bajarapamonae petēpaenē tomaravelia capitsapa pemēthētsinexa tomarapēnēyabelia. Ponē tēpa, bajaraponēmi pamona pevecuatēpaevatsi pexēnato, pepo cainē. Nexata pamona pevecuatēpaevatsi pexēnato, petēpaenē, itsa caponaliatsi pemēthētsinexatsi, tomaraverena jivi ayaibitsaētoخانeto pēnaponatsi. ¹³ Nexata Jesús itsa tane bajarapova, tsitabejibitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús cujitalalia petēpaenē peyacajoniacanajetarubenaevi. Pecobeta jayata cajoni. Nexata petēpaenē peyacajoniacanajetarubenaevi, nubenaothopa. Nexata Jesús jumaitsi petēpaenējavabelia:

—Pevjēato, xanē raja cajumaitsitsi. Namatacore, jai Jesús.

¹⁵ Nexata baja petēpaenēmi namatacota. Cuaicuaijai. Jesús baja tocanaviata piasaēnē penajavabelia. ¹⁶ Nexata daxita petaevitsi jamatabēcuenenabenajaca. Najumaitsi bajarapamonae:

—Dioso bitso ayaijamatabēcuenenē. Pinijijamatabēcuene pexainaenē, profeta, nacatsitanajamatabēcueneitajēta. Dioso pinijicuene pexanaejava ata nacatsitajēta vajataenexa, najai bajarapamonae Jesús yabara.

¹⁷ Daxita Judea nacuapijivi, imoxoyo nacuanējava ata pejivanapaevi, Jesús vēnēlivaisitanetsi xua exana.

Pacuenia Juan jivibautisabinē itoroba pijajivitonēbeje Jesúsjavabelia yabara pelivaisi

(Mt 11.2-19)

¹⁸ Juan jivibautisabinē naneconitsia ponapona penaneconitsivi pejebabiabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanēbeje pijajivitonēbeje pitorobinexa Jesúsjavabelia. ¹⁹ Juan pitorobivajēnae pijajivitonēbeje, jumaitsi bajaraponēbejevabelia:

—Pajumaitsimēbeje tsane Jesúsjavabelia: “ ¿Xamē tsabaja Cristomē? ¿Xamē tsabaja tajēvelia cavajunupaebapona

nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa? jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayani-jobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopi-aevetavanapaenajë itsanë pepatsijavanexatsica?” jai raja Juan, jaibeje jane baja Jesúsjavabelia.

²¹ Nexata bajaraponëbeje pitabëta Jesús jamate-jemayaexanapona ayaibitsaëtoخانeto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexananua pamonaebitso itaxutotsëcëna. ²² Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimi ata itaxutox-aniavaetaponajë xaniavaetsia petaenexa. Petabusipacuen-abivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepae-livaisinexatsi pibisiacuene pexanaeneconimivecua, tsipaebaponajë bepejiobivijavabelia. Daxita bajaraxua taex-anaponaejava patanetaejavamëbeje, patsipaebianamebeje Juanjavabelia. ²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebi-
java Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ²⁵ Itsa apo paponamëlia panetaenexa

musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneye. Pamona naitabëtsiaya pexaniajava naxatabiaba, pamona ata nabanebiaba pexanianabanijavanë, bajarapamona jinavanapa nacuanë pevetsivi pijabonëjava. ²⁶ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan ita pataneme, pepacueneye jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ²⁷ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetaruaejavanexa yabara.

²⁸ Juan ayaijamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajiivi beveliajamatabëcueneyivi ata, ita najamatabëcopata baja Diosojavabelia pijatuxanenë pexanaenexa, bajarapajivi juya Dioso ayaijamatabëcueneyivi exanaenatsi Juan matatoxenetsia, jai Jesús Juan jivibautisabinë yabara.

²⁹ Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamona jumecovënëta palivaisi Dioso najumecopata Juanjavabelia. Nexata Juan bautisaba bajarapamona. ³⁰ Itsiata fariseovi, judiövi pecujarubivina, namuxujemata bajarapalivaisi. Nexata picani pacuenia Dioso tojitsipatsi bajarapamona pexanaenexa, apo exanae. Nexata Juan apo bautisabi bajarapamona.

³¹ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamona xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: ³² “Bajarapamona abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi ita namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi:

‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevixijavabelia. Bajara saya jamatabëcueneitsi pamonaë aeconoxae jinavanapa mapanacuataje,” janë meta tsane paxamë yabara. ³³ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënuu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaë ata piamatabëcuenebejevi, barënajamatabëcuenejëpa,” pajamë tsabiabi xanë yabara. ³⁵ Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonaë yapëtaena pacuenia Dioso paneyapëtaeyaexanabeje pepacuene pepo pexaniajajiamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. ³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuviaceitera. Bajarapova capata bajarapaaceitera Jesús petsitaxuepacaenexa. ³⁸ Nexata bajarapova Jesús petaxusalibënenia, pematatabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematantata taxuiquica. Bajaraxuacujinae yayiyataeya taxutsutsune. Tsitaxuepaca jane

baja petuxujuviaceitera. ³⁹ Nexata Simón, ponë Jesús junatatsi, ita tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Ita peneta pepacueni maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje. ⁴² Nexata bajaraponëbeje apo xainaebeje juya petocanaviatsinexabeje petsicopatsimatamotsibeje. Nexata palata petsicopatsinë jumaitsi bajaraponëbejjavabelia: “Iquinajë baja bajaraxuami pataniamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejjavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junuajë nijaboyaberena. Itsiata yaiyataeya xaniavaetsia apo necopiapitsimë. Apo nerajutsimë mera ata tanataxuquiatsinexa. Mapovaje netaxuquiata baja pitaxutobarëmeneta. Netaxuiquicanua pematana. ⁴⁵ Xamë nijabota patsi atanë, apo nitabaratsutsunimë tanecopiapitsinexamë xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaejava. ⁴⁶ Xamë xaniavaetsia tanecopiapitsinexamë, apo netsimataepanaemë aceitera. Mapovaje netsitaxuepaca pexaniapetuxujuviaceitera. ⁴⁷ Nexata catsipaebatsi neyapëtaenexa mapacuenieje. Mapovaje pinijicuenia nesivajamatabëcuenebarëya. Tsipaji ayaineconi ata pibisiacuene pexanaeneconimi, vecuaajibiaexanjë. Pajivi saya tsiquirineconiyo vecuaajibiaexanjë,

pibisiacuene pexanaeneconi, nayapētane. Tsipaji saya bajarapajivi tsiquirijavayo nesivajamatabēcuenearēya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeconimi cavecuaajibiaexanatsi, jai Jesús.

⁴⁹ Itsamonae ata, pamonae Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponēje? Jamatabēcuenenavēxaniabiaya natane bepejamatabēcuenecaējēpaenētsi jivi pibisiacuene pexanaeneconi pevecuaajibiaexanaenexa, najai tsenae bajarapamonae.

⁵⁰ Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeconimivecua. Tsipaji nesivanajamatabēcuenecopatame xanējavaberena. Jamatejema baja ponare. Cavecuaajibiaexanatsi rabaja pibisiacuene nexanaeconimi, jai Jesús petirivajavabelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

¹ Simón pijabota Jesús penanabanicujinae, najetaruca pinijitomaranējava, tsiquiritomaraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponēbeje, apóstolevi, yajavanajetaruca. ² Jesús yajavanajetaruca petiriavinua, papetiriavi dovathi vecuacapitsapa yajuvēnēvi. Papetiriavi ata piavitanejavavecua Jesús jamatejema exana yajuvēnēvi, Jesús yajavanajetaruca. Bajarapapetiriaviyajuvēnēva, caeva pevēnē María, Magdala tomarapijiva. Bajarapova Jesús vecuacapitsapa siete ponēbeje dovathivi. Bajarapadovathivi Jesús pevecuacapitsapaecuinae, María pēnaponatsi. ³ Itsava pevēnē Juana, Cuzavēnēnē pijava. Bajaraponē Cuzavēnēnē, nacuaevetsinē Herodes pijajivitonē. Itsava pevēnē Susana. Bajarapapetiriavi pematatsēnēa, itsapetiriavi, ayaibitsaēto, yajavanajetaruca Jesús. Bajarapapetiriavi pexainaepalatayajuvēnējava, rajuta Jesúsjavabelia. Nexata xuaxi Jesús pijajivi barēnamatavenona pebarēcomuatsinexa bajarapapalatata.

Pacuenia Jesús jivi livaisi tsipaeba peubinē pelivaisicuenia yabara pelivaisi

(Mt 13.1-9; Mr 4.1-9)

⁴ Jivi naropoba tomaranējavaverena. Pata Jesúsjavaberena petaenexatsi. Itsa baja ayaibitsaēto xaneto nacaetuata

Jesúsjavaberena, nexata Jesús livaisi tsipaeba peubinē pelivaisicuenia. Jesús jumaitsi mapacueniaje:

⁵ —Peubinē pona pabiabelia peubinexa. Nexata itsa pata pabita, peubixu pexucayabajarabicuenia ubanajetaruca. Nexata itsaxu othopa pabi tuatuajējjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva baratsui xane. ⁶ Itsaxu pijinia othopa ibopananējumata, itsajota bitso ira apo aitayaē. Nexata bajarapaxu juvi ata, tsaquenapona. Tsipaji ira tseva. ⁷ Itsaxu pijinia othopa xanēebacabomijavata. Nexata peubixu xanēebotonē caecuenia itsa yajavajuva, bitso xanēebotonē matakēnēnatsi peubijavami. ⁸ Itsaxu pijinia othopa pexani-airata. Bajarapaxu itsa juva, vitsaba. Nexata xaniavaetsia nacuaita. Itsabotonē capitsapa cien paxutoyobeje ata, jai Jesús jivi ayaibitsaētoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabējumeyapētane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuenē yabara Jesús jivijavabelia livaisi tsipaeba ēcomparacióncuenia yabara pelivaisi

(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinē pelivaisicuenia, pajamatabēcuene xaina, patayapētaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamē rabaja xaniavaetsia Dioso pacayapētaeyaexana Dioso papijajivimē papecaevetsijava. Bajarapacuenē abaxē daxitajivi apo yapētae. Bajaraxuata bajarapamonae itsa tsipaebajē livaisi, ēcomparacióncuenia tsipaebaponajē. Nexata bajarapamonae tae ata Dioso pesaēta pinijicuene taexanaejava, itsiata apo yapētae pajamatabēcuene yabara exanajē pinijicuene taexanaejava. Namuxunaevetsi ata tatsipaebilivaisi, itsiata apo jumeyapētae pajamatabēcuene xaina tatsipaebilivaisi, jai Jesús pijajivijavabelia.

Pacuenia Jesús yapētaeyaexana pijajivi pajamatabēcuene xaina palivaisi tsipaeba peubinē pelivaisicuenia yabara pelivaisi

(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

—Mara pajamatabēcuenelivaisi xainaje, palivaisi pacatsipaebatsi pabita peubinē pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi

jivi pejamatabëethëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. ¹² Nexata pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajënaeyabelia Dioso pejumecovënëtsiyaniva, Dioso pecapanepaeyanivatsi pibisiacuene pexanaeneconivecua. ¹³ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caepatoyo jumecovënëta bajarapalivaisi. Nexata paepatota dovathi jamatabëcuenejëtatsi, copaba baja bajarapalivaisi pejumecovënëtsijavami. ¹⁴ Pacuenia pijinia paxu othopa xanëebacabomijavata, itsa juva, bitso matakënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovitsabitsi pejamatabëethëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ¹⁵ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcuenexuirajibi. Èpexaniajamatabëcuene najamatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobiciueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi

(Mr 4.21-25)

¹⁶ Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecaenexa. ¹⁷ Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panejumecanaëjëre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Mr 3.31-35)

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tsi-paji bitso jivi ayaibitsaëto Jesús matatoyorotsia vënëcatsi.

²⁰ Nexata pamonaë Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bajarapamonae pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaejavabelia:

—Pamonae jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús itaveta joviboxaneto, malataca yajava, pi-ayaijavami yabara pelivaisi

(Mt 8.23-27; Mr 4.35-41)

²² Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata piniji-joviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Bubunaejitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba.

²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi itsa tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponanë, Jesús ve-cuacapitsapa Gerasa nacuata yabara pelivaisi

(Mt 8.28-34; Mr 5.1-20)

²⁶ Jesús pijajivi barëyaëta pucaxaneto itsapanabelia, Gerasa nacuyabelia. Gerasanacua boca puca itsapanaverena, Galileanacua pecanacujitsialia. ²⁷ Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponanë. Bajaraponë bajayajebi baja jumasa ponaponabiaba. Pijabota apo ponaponae. Jivimëthëanëjavata saya ponaponabiaba. ²⁸ Nexata bajaraponë itsa pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Ne-jamatabëcuenebejiobitsipame, jai dovathivi peyajavaponaponanë Jesúsjavabelia.

²⁹ Bajarapacuenia jumaitsi dovathivi peyajavaponaponanë tsipaji Jesús jerajavavetsina penonotajunaejavata,

dovathivi peyajavaponaponaeñe pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyajavaponaponaeñe ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia. ³⁰ Nexata Jesús jumaitsi bajaraponëjavabelia:

—¿Detsa pavënëmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoxaneto tsijamatabëjinavanapatsi. ³¹ Bajarapadovathivi vajëta Jesúsjavabelia infernojavabelia Jesús pitorobianiva. ³² Nexata bajarajota, imoxoyo petsutojavata, marranobitsaëtoxaneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxanetojavabelia, jai dovathivi.

Jesús nexata pevajëtsicueniatsi tocopata. ³³ Nexata dovathivi pebi vecuapitsapecatsi. Nexata marranobitsaëtoxanetojavabelia baja junua dovathivi. Nexata daxita bajarapamarranobitsaëtoxanetomi kujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³⁴ Marrano pevetsivi itsa tane bajarapacueni, rëcëpeca. Pona, pacuene tane, petsipaebinxeta tomarapijivijavabelia, petsipaebinxeta vayafotusatojava penaevijavabelia ata.

³⁵ Nexata jivi ponarena petaenexa bajarapacueni. Jivi itsa parena Jesúsjavaberena, taeyeta dovathivi peyajavaponaponaeñemi peecaejava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae kujunavatsi Jesús. ³⁶ Pamonae cuenetanetsi Jesús pejamatejemayaexanaejava dovathivi peyajavaponaponaeñemi, bajarapamonae paeba pepatsivijavabelia daxita pacuenia tane. ³⁷ Bajarapamonae bitso kujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji kujunavatsi.

Nexata baja Jesús runareca jera ënëabereca. Ponaejitsia baja. ³⁸ Nexata dovathivi peyajavaponaponaeñemi bitso picani navajëca Jesúsjavabelia penaponaeñexa picani Jesús pepëta.

—Petuxanenë, netocopare tanaponaenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹—Ponare nijamonaejavabelia. Tsipaebianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi
(Mt 9.18-26; Mr 5.21-43)

⁴⁰Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëtoخانeto copiapitatsi barëyaya. Tsipaji baja cajena copiaevetavanapatsi pepatsijavarena. ⁴¹Nexata bajarajota napatajopa Jairovënënë. Bajaraponë judíovi penacaetuatabiabibo pevetsinë. Jairo pematatababëta yaityataeya Jesús pitabarata nucajunua. Pini-jicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴²Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaiheje. Itsa Jesús napona Jairo pepëta, jivibitsaëtoخانeto Jesús pepënaponaevitsi matatoyorotsia cënënanajetarubenatsi.

⁴³Bajarapajivibitsaëtoخانeto tuatuajëta, itsava pijanacuene pecapunaevatsi nanajetaruca. Bajarapova pijanacuene pecapunaecujinaetsi, doce baja pavaiheje xaina. Beyajiobi tsabiabi bajarapajana. Daxita pexainaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua. ⁴⁴Nexata bajarapova ponataba Jesús pepënevëlia, jivibitsaëtoخانeto tuatuajëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

⁴⁵Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrohana jumaitsi:

—Patajatuxanenë, jivibitsaëtoخانeto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrohana.

⁴⁶Nexata Jesús jumaitsi:

—Itsajiviyo baja cajena tanaxatatsijava netojayataba. Yapētaniji bajarapajiviyo tajamatejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapētane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatuajëta pacuene yabara tojayataba Jesús penaxatatsijava. Navajunupaebanua pacuena jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaibitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonae Jesús pevajënae ena Jairo pijabota, bajarapamonae Jesús pitsapaeyaexana. ⁵² Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapētane Jesús piasaëyaexanae javanexa bajarapovayo.

⁵³ Bajarapacuenia Jesús pejumaitsijava, bajarapamonae saya Jesús jumecapocaponatsi. Tsipaji bajarapamonae yapētane bajarapovayo baja picani pepacuene petëpaejava.

⁵⁴ Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitsijavata, petëpanucaevayomi nonotabapuna. Asaë baja icatsia

petëpaevayomi. Nexata Jesús jumaitsi pejanavayo penajavabelia:

—Nexënatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejejavabelia:

—Pëtsa papaebamebeje itsajivijavabelia ata pacuene paca-toexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi pet-sipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponëbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caëjëpaeyaexanatsi rabaja papeca-caëjëpaejamatabëcuene dovathi peyajavajinavanapaevi ata panevecuacapitsapaponaenexa. Pacajamatabëcuene caëjëpaeyaexanatsinua piavitanevi ata panejamatejemayaexanaponaenexa. ² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame. ⁴ Itsa papatabiabianame tomarata, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papit-sapaename. ⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicuene apo papecacopiapitsixae papecanamuxunaevetsinexa panetsipae-bilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane

baja pexanialivaisi jivi pecapanepaelivaisinexatsi pibisi-acuene pexanaeneconimivecua. Jamatejemayaexanaponanua piavitanevi daxitajava.

Pacuenia Juanpijinë jivibautisabinëmi beyaxuabatsi yabara pelivaisi

(Mt 14.1-12; Mr 6.14-29)

⁷ Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëcueneepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaittsaponaejava Herodes pejumetaexae, najamatabëcueneepatajërërëcaeya najamatabëxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiya-juvënënë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaittsaponaejava Jesús yabara, Herodes jumetane.

⁹ Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pini-jicuene pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

Pacuenia Jesús pexaejava rajuta cinco mil ponëbeje yabara pelivaisi

(Mt 14.13-21; Mr 6.30-44; Jn 6.1-14)

¹⁰ Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. ¹¹ Itsiata baitsi jane jivi ayaibitsaëttoxaneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje cujibarenatsi. Jumaitsitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajara-belia bajarapamonae namajitsiana. Pexaejavanua namit-savajëtsiana. Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

¹³ Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

¹⁴ Bajarapajivibitsaëtoxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja daxita jivibitsaëtoxaneto. ¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacaponae, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. ¹⁷ Daxita xaniavaetsia nabane. Bajaraxuacujinae jivi peyajuvënëcopabejibijavanë, Jesús pijajivi vënëba doce xuabeje bemapirecuenia pexanaejavanë.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi

(Mt 16.13-19; Mr 8.27-29)

¹⁸ Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁹ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Eliaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁰ Nexata icatsia Jesús jumaitsi pijajivijavabelia:

—¿Detsa nexata paxamē pajamatabēitsimē xanē yabara?
¿Detsa xanē ponēnē? jai Jesús pijajivijavabelia.

Nexata Pedro jumaitsi Jesúsjavabelia:

—Xamē raja cajena Cristomē, athēbēvetsica Dioso pecaitorobinētsica jivi necapanapaenexa. Xamē cajena Dioso pexēnatomē, jai Pedro Jesúsjavabelia.

Pacuenia Jesús tajēvelia navajunupaeba pebeyaxuabijavanexatsi yabara pelivaisi

(Mt 16.20-28; Mr 8.30-9.1)

²¹ Jesús jumeitaveta pijajivi. Jumaitsi mapacueniaje:

—Pētsa pajumaitsimē jivijavabelia: “Jesús raja Dioso pexēnato,” pajamē pētsa, jai Jesús.

²² Nexata Jesús pebeyaxuabijavanexatsi, tajēvelia navajunupaeba. Jumaitsi pijajivijavabelia mapacueniaje:

—Xanē, Daxitajivi Pematapijinēnē, pinijicuenia bejiobinē tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovēnētsi tsane xanē Cristonēcuenenē. Nexata bitso nebejibiaexanaena. Bajaraxuacujinae nebeyaxuabiana. Itsiata baitsi jane tatēpaecujinae, acueyabi maticabita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

²³ Bajaraxuacujinae Jesús jumaitsi daxitajivijavabelia:

—Pajivi jitsipa tanepēnaponaejava, bajarapajivi copatsi penatojitsipaecuenia pexanaenexa penajamatabēxainabiabijavami. Exanaponaponae taitorobicuenia. Bajarapajivi caematacabi canacujitsia najamatabēcueneveretsinua, bejibiaexanaejitsia atatsi, beyaxuabijitsia atatsinua, Dioso pejumelivaisi yabara piamatabēcuenesaē tsaponaponaeenexa. Nexata jane baja xuacujinae nepēnaponaena.

²⁴ Pajivi exanaponapona penatojitsipaecuenia, apo xainae tsane maticabi apo peverevereaejava. Pajivi xanē tajamatabēcueneta copata penatojitsipaecuenia pexanaejavami, bajarapajivi xainaena maticabi apo peverevereaejava.

²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneneje, itsiata nacuerata. Tsipaji pexainaecuene apo capanepae tsanetsi Diosojavabelia.

²⁶ Pajivi tajajivitonē ata, navēnēlivaisicaura tsane jivijavabelia xanē tajajivitonēcuene, tanejumecovēnētsijava ata yabara, nexata juya xanē, Daxitajivi Pematapijinēnē, bajarapajivi tajajivitonē ata, tajajivitonēcuene vēnēlivaisicauranē tsane taxa Diosojavabelia. Bajarapajivi vēnēlivaisicauranē

tsane pamatacabi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënuua Dioso pijaängelevi. ²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tëpaena, jai Jesús bajarapamonaejavabelia.

Pacuenia Jesús caeepatoyo perabënivenivenataba yabara pelivaisi

(Mt 17.1-8; Mr 9.2-8)

²⁸ Jesús petëpaejavanexa tajëvelia penayajunupaebicujinae, bejamatabëcuene ocho pamatacabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia. ²⁹ Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajëta anijanëbeje, ponëmibeje bajayata tëpa. Bajaraponëbeje Jesús barëcuaicuaijaitsi. Bajaraponëbeje tsaena Moiséspijinëbeje Elíaspijinëbeje. ³¹ Bajaraponëbeje matatoyorotsia nivenivenabeje. Jesús bana nabarëcuaicuaijai Jesús petëpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuenia yabara nabarëcuaicuaijai. ³² Pedro bana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarëcuaicuaijavatsi Jesús. ³³ Itsa baja Moisésbeje Elíasbeje Jesúsvecua ponaejitsiatsibeje, nexata bajarapapatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro.

Pedro xaniavaetsia najamatabëxainaenejeva, bajarapacuenia jumaitsi. ³⁴ Pedro abaxë itsa cuaicuaijai tsanucuae, itarërëbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarërëbo. ³⁵ Nexata bajarapaitarërëbojavavetsica Dioso jumaitssica:

—Mara ponë taxënato, tasivanëje. Bajaraponë panamuxunaevere, jaittsica Dioso itarërëbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumait-sijavatsica, Jesús pijajivi tane caenë baja Jesús penucaejava bajarajota. Jesús pijajivi tae ata bajarapacueni, moya saya jinavanapa. Bajarapamonae abaxë apo tsipaebi itsamonae-javabelia, tae ata bajarapacueni.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mt 17.14-21; Mr 9.14-29)

³⁷ Jesús pebarëcuaicuaijajucujinae Moisésbeje Elíasbeje, pija-jivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëtoxaneto. ³⁸ Nexata caenë bajarapajivi bitsaëtoxanetoyajuvënënë pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë. ³⁹ Dovathi vaetababiabatsi. Nexata jemata aëjai tsabiabi. Tëpajoneyaexanabiabatsi. Daxitanë neconecojaiya aperabëbaba tsatababiabireca. Nexata bajarajota pecuibohtamu tsabiabi. Bitso bejiobiaexanabiabatsi. Dovathi abaxë apo jamatabëcopatsitsi. ⁴⁰ Picani raja nijajivijavabelia jumaitsinë: “Panetovecuacapitsapare dovathi,” janë. Itsiata apo caëjëpaetsi tanetovecuacapitsapaenexa, jai bajaraponë Jesúsjavabelia.

⁴¹ Nexata Jesús jumaitsi daxita pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! ¿Detsa paepatojebi abaxë paxamëjavabelia ajamatabëcuenesaenë tsaponapona tsane patanejumecovënëtsinexamë? jai Jesús daxita pijajivijavabelia.

Nexata Jesús jumaitsi pejevaxinë paxajavabelia:

—Barërenamëre nexënatonëyo, jai Jesús.

⁴² Ajena pejevaxinë imoxoyotabarena Jesúsjavaberena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaenexatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia. ⁴³ Daxitajivi bitso jamatabëcuenenabenajaca Dioso pesaëta Jesús pevecuacapitsapaexae dovathi bajaraponëyo.

Pacuenia icatsia Jesús tajëvelia navajunupaeba pebeyaxu-abijavanexatsi yabara pelivaisi

(Mt 17.22-23; Mr 9.30-32)

Jivibitsaëtoxaneto Jesús jamatabëcuenenabarëyaya tanetsi daxita Jesús pexanaejava yabara. Nexata Jesús

pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

⁴⁴ —Xaniavaetsia panenamuxunaevere. Pëtsa pana-cofënëtame. Xanë, Daxitajivi Pematapijinënë, necanajetsiana itsamonae pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeypëtae xua yabara Jesús jumaitsi. Baitsi bajarapamonae Dioso apo to-copatsitsi pejumeypëtaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponë vaxaitsiyajuvënëne nacavecuaayaijamatabëcuenenë bitso?” najai tsanajetarubena namutua yabara pelivaisi

(Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nali-vaitsitanajetarubena. Najumaitsi tsanajetarubena bajarapamonae:

—¿Detsa ponë vaxaitsiyajuvënëne nacavecuaayaijamatabëcuenenë bitso? najai tsanajetarubena Jesús pijajivi.

⁴⁷ Nexata Jesús pijajivi jamatabëcueneyapëtane pacuenia namatabëxaina. Nexata Jesús cobepita pejevaxinëyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita. Nexata pëtsa bepaayaijamatabëcuenenimë panataneme. Tsi-paji ponë paxamëyajuvënëne beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi

(Mr 9.38-40)

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënëne. Nexata paitavetajë bajaraponë dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi. Bajaraxuata

pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia. ⁵² Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocovaetsinexabeje pabota picani Jesús patsijitsia. ⁵³ Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia. ⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa pijamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamonaë apo jitsipae pecacopiapitsijava? jaibeje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcueneyapëtaemëbeje Espiritu Santo, ponë pacayajavaponaponabeje. ⁵⁶ Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeneconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi

(Mt 8.19-22)

⁵⁷ Jesús pijajivi namutua peyajavanajetaruaejavata, judióvi pecujarubinë jumaitsi Jesúsjavabelia:

—Jesús, itsabelia poname, capënaponaeatsi cajena, jai judióvi pecujarubinë.

⁵⁸ Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexanua. Baratsui ata pematapananë xaina. Itsiata baitsi jane xanë, Daxitajivi

Pematapijinënë, itsajavabelia ata apo xainaenë, itsajota nacueraevetabiabijitsianë, jai Jesús.

⁵⁹ Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

⁶⁰ Jesús nexata jumaitsi bajaraponëjavabelia:

—Copare matakabi apo peverevereaejava apo pexainaevinexa pemëthëcaenexatsi nijamonaemi itsa tēpa. Xamë saicaya nepënaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

⁶¹ Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaejava. Itsiata abaxë caepatoyo necopare tanapëjiobinexa tajabota pejinavana-paevijavabelia, jai bajaraponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujujamatabëcuene, xua exanabiaba, bajarapajivi apo caëjëpaetsi xaniavaetsia Dioso petonacuenebinexa pitorobicueniatsi. Tsipaji najamatabëcueneepatajërërëcaeya nacueneba, jai Jesús bajaraponëjavabelia.

10

Pacuenia Jesús pijajivi itoroba, setenta ponëbeje, Dioso pejumelivaisi jivi petsipaebanajetarubenaenexa yabara pelivaisi

¹ Jesús icatsia itsamonae itapeta pijajivinexa, setenta ponëbeje. Bajarapamonae Jesús itoroba anijanëbeje tsaponae Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomaranëjava, tsiquiritomaraxijava ata, itsaxuayo Jesús najetarucaejitsia. ² Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainaenë caecuenia uba ayaijava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabëcueneecopabivinexa. Abaxë sajina ayaiBITSaëtOXaneto. Itsiata baitsi jane paxamë Dioso panetonacuenebivi pacaeviviyomëbeje saya. Bajaraxuata Diosojavabelia pavajëre icatsia Dioso pijajivi pematatsënëa itsamonae pitorobinexa papecayavenonaenexa. ³ Paponare baja Dioso pejumelivaisi jivi panetsipaebanajetarubenaenexa.

Panayajivitaeyajinavanapaename. Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane. ⁴ Pëtsa pacaponame itsacuenejava ata, doro ata, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaicuajiamë tsanunubenaë panenajematsiyaniva. ⁵ Itsa pajonejitsiamë itsamonae pijaboyaliala, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeya pejinavanapaenexa,” pajamë tsane copiaya Diosojavabelia. ⁶ Bajarapabo pexainaenë itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsijava, nexata Dioso apo jamatabëcuene xanepanaeyaexanae tsanetsi bajaraponë. ⁷ Itsajota papatabiabianame, caebota pamajitabiabianame. Pëtsa panatixitaponame itsaboxijavabelia. Aurajibia paxaeyabiabianamenua xua pacaabata bajarapabota. Pëtsa pauramë panexaejava papecarajutsijava yabara. Tsipaji panetsipaebixae patacatorobilivaisi, pacarajutsiana panexaejava. Tsipaji itsajivi itsa tonacueneba itsanëjavabelia, barajutatsi pexaejava. ⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata. ⁹ Bajarapatomarata pajamatejemayaexanaename piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimë tsane bajarapatomarapijivijavabelia mapacueniaje: ¹¹ “Panijatomarapijiatsapërë patataxuta rubena. Nexata panavetaxuvarëbajë. Bajarapacuenia panavetaxuvarëbajë panenayapëtaenexa Diosojavabelia pananeconitsijava. Pananeconitame Diosojavabelia. Tsipaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹² Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconit-

siaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, bajarapaneconivajëto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejejavabelia.

Pacuenia Jesús jumaitsi patomarabejepijivi Dioso xuabijitsia infernojavabelia apo pejumecovënëtsixaetsi yabara pelivaisi (Mt 11.20-24)

¹³ Icatsia Jesús jumaitsi pijajivijavabelia, setenta ponëbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi pexanaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi.

¹⁴ Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata. ¹⁵ Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamonaemi apo tanejumecovënëtsixae, Dioso xuabianatsi infernojavabelia, jai Jesús Corazín tomarabeje Betsaida tomarabejepijivi yabara.

¹⁶ Icatsia Jesús jumaitsi pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomaranëjava. Saicaya navecuanajetarubena anijanëbeje tsaponae.

Pacuenia Jesús pijajivi, setenta ponëbeje, naviabana-jetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonae jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejumecovënëtabiaba, jai bajarapamonae Jesúsjavabelia.

¹⁸ Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica. ¹⁹ Xanë baja cajena pacajamatabëcuene caëjëpaeyaexanatsi papecacaëjëpaejamatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. ²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixaemë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejjavabelia.

Pacuenia Jesús jamatabëcuenebarëya yabara pelivaisi (Mt 11.25-27; 13.16-17)

²¹ Jesús bitso jamatabëcuenebarëyayaexanatsi Espíritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tsipaji pamona bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicue

yabaraje. Bajarapacuenia exaname tsipaji baja exaname ne-
jitsipaecuenia, jai Jesús paxa Diosojavabelia pevajëtsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa
daxitacuene. Itsajivi ata apo nejamatabëcueneyapëtae
pacuenia xanë jamatabëcueneitsinë, Dioso pexënatonë.
Caenë, taxa Dioso, nejamatabëcueneyapëtane. Itsajivi ata apo
jamatabëcueneyapëtae pacuenia taxa Dioso jamatabëcueneitsi.
Caenënë, xanë pexënatonë, jamatabëcueneyapëtaniji
pacuenia taxa Dioso jamatabëcueneitsi. Pamona
tojtsipajë tayapëtaeyaexanaenexa pacuenia taxa Dioso
jamatabëcueneitsi, bajarapamona
ata yapëtaeyaexanaenajë,
jai Jesús pijajivijavabelia, jivijavabelia ata.

²³ Nexata Jesús napënëyorota. Ëpijajivijavabelia jumaitsi:

—Paxamë baja pajamatabëcuenebarëyamë panetaexae
pacuene baja pataeponame. ²⁴ Xaniajanë pacuenia
pacatsipaebijitsiatsi. Bajayata ayaibitsaëto profetavimi
necopiaevetavanapa picani tanetaenexa tapatsijavatsica.
Nacuaevetsivimi ata necopiaevetavanapa picani
tanetaenexa tapatsijavatsica. Itsiata netaenejeva
tapatsijavatsica, bajarapamonaemi tëpa baja. Ja-
matabëjumetaeyabiabanua picani palivaisianë baja aeconoxae
paxamë pacatsipaebaponatsi. Itsiata apo jumetaenejeva
bajarapalivaisinë, bajarapamonaemi tëpa baja, jai Jesús
pijajivijavabelia.

*Pacuenia pexaniajamatabëcuenenë, Samaria nacuapijinë,
yavenona itsanë yabara pelivaisi*

²⁵ Itsamatacabi Jesús livaisi tsipaebanuca pijajivijavabelia.
Nexata bajarajota judíovi pecujarubinë nonotapuna. Bajara-
ponë Jesúsjavabelia jamatabëcueneëjëbiaya jumaitsi:

—Jesús, ¿detsa xua exanaenajë Dioso tanerajutsinexa mat-
acabi apo pevereverecaejava? jai judíovi pecujarubinë.

²⁶ Nexata Jesús jumaitsi judíovi pecujarubinëjavabelia:

—¿Detsa jane jumaitsi bajarapacuenia yabara bajayata
Dioso Moiséspijinëta penajumecopatsilivaisi jivi
pejumecovënëtsinexa? jai Jesús.

²⁷ Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi ju-
maitsi mapacueniaje: “Daxita panejamatabëëthëtojavavetsina,
daxita panejamatabëcueneta ata, daxita panesaëta ata, daxita
panenajamatabëxainaesaëta ata, pasivamëre panijatuxanenë
panijaDioso. Pasivamëre itsajivi ata pacuenia paxamë pani-
jacuata panasivamë,” jai bajayata Dioso Moiséspijinëta pena-
jumecopatsilivaisi, jai judíovi pecujarubinë Jesúsjavabelia.

28 Nexata icatsia Jesús jumaitsi judíovi pecujarubinějavabelia:

—Xaniavaetsia nejumecanaviatame. Bajarapacuenia exanapononare. Nexata pepacuenene xainaename matacabi apo pevereverecaeva, jai Jesús.

29 Itsiata baitsi jane judíovi pecujarubině bijiaya jumecovēnēta bajarapalivaisi. Asivaya apo tae itsamonae ata. Bajaraxuata judíovi pecujarubině matavějēa jumaitsi Jesúsjavabelia:

—¿Detsa nexata pitsijivi asivanē tsane? jai judíovi pecujarubině.

30 Nexata icatsia Jesús jumaitsi judíovi pecujarubinějavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajērēbabiabivi, bajaraponē epatua vaetabatsi. Daxita pecobecovē yacajērētatsi. Penaxatabi-javanēmi ata yacajērētatsi. Nexata pinijicuenia conibabiatsi. Puenetabuatatsi picani petēpanucaenexa bajarajota. 31 Nexata bajarapanamutua sacerdotenē najetaruca, templobota penacuenebabiabinē. Nexata sacerdotenē bajaraponē itsa taeyabuata, matavaquetanucapona. Pona baja rovia. 32 Bajaraxuacujinae icatsia bajarapanamutua itsanē, templobota penacuenebabiabinē, najetaruca. Bajaraponē taenucajopa. Bajaraxuacujinae matavaquetanucapona. Pona baja icatsia rovia bajaraponē ata. 33 Bajaraxuacujinae icatsia bajarapanamutua Samaria nacuapijinē najetaruca. Nexata bajaraponē itsa taeyabuata, tsitabejobitsi bitso. 34 Nexata bajaraponē cujilia. Vajēnēvaēba aceiterata, vinorata yajava. Vajēnēcēba papaēbērēpanaxita. Bajaraxuacujinae Samaria nacuapijinē pijaburrojumata buatsia. Nexata bajaraponē capona jivi pepatabiabiboyabelia. Bajarajota Samaria nacuapijinē eveta xaniavaetsia. 35 Meravia pitsijavata Samaria nacuapijinē itsa baja ponaejitsia itsabelia najetaruca, juta anijapalatanēbeje, bitso penamatamotsinēbeje. Matamota bajarapabo pexainaenē. Jumaitsi bajaraponējavabelia: “Netoetsianame maponēje. Itsa matamovereverecaena, pematatsēnēa nevetsimatamo, bajarapapalata icatsia caevēarena camatamotsianatsi,” jai Samaria nacuapijinē bo pexainaenējavabelia, jai Jesús mapacueniaje judíovi pecujarubinějavabelia.

36 Bajaraxuacujinae judíovi pecujarubinějavabelia Jesús yanijoba bajarapalivaisi yabara. Jumaitsi mapacueniaje:

—Pamonae, acueyabi ponëmaxëto, taeyabuata pecobecovë peyacajërëtsinëtsi. ¿Detsa ponë bajarapamonaeyajuvënënë asivaya tane bajaraponë? jai Jesús.

³⁷ Nexata judíovi pecujarubinë jumaitsi Jesúsjavabelia:

—Ponë pitaxutotsoniataexae yavenona, bajaraponë asivaya tane, jai judíovi pecujarubinë Jesúsjavabelia.

Nexata Jesús jumaitsi judíovi pecujarubinëjavabelia:

—Ponare baja. Xamë ata bajarapacuenia asivaya itaxutotsoniataeyabiabianame itsamonae ata, jai Jesús judíovi pecujarubinëjavabelia.

Pacuenia Jesús jumaitsi Martabeje Maríabeje pijabota yabara pelivaisi

³⁸ Jesús, pijajivi yajava, najetaruca pevajënaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavënëva. Nexata Marta pijabota Jesús napata. ³⁹ Marta pejuyapijiva xaina, Mariävënëva. Nexata María eca Jesús pitabarata penamuxunaevetecaenexa Jesús petsipaebilivaisi. ⁴⁰ Nexata Marta bitso jamatabëcueneenatsi penacuenabijava, Jesús pexaejavanexa ata pemitsexanaenexa. Nexata Marta cujilia Jesús. Jumaitsi:

—Tajatuxanenë, tajuyapijiva netocopata caevanë taexanaenexa daxita xua exanaejitsianë. Itorobare taneyavenonaeenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

—Marta, xamë bitso cajamatabëcueneena nexanaenexa daxita xuanë jamatabëexaname. ⁴² Caejava bitso xanepana nexanaenexa, tanenamuxunaevetsinexamë. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi

(Mt 6.9-15; 7.7-11)

¹ Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënënë jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajara pijinia pacuenia xamë

ata panejumecujarubare pavajëtabiabijitsianë Diosojavabelia, jai Jesús pijajiviyajuvënënë.

² Jesús nexata jumaitsi pijajivijavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane:

Taxamë, athëbëtatsia neecaenë, jitsipajë pecayaiyataejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje.

³ Caematacabi canacujitsia panerajure pataxaejavanexa pacuenia panamatavenonajë.

⁴ Panebarajamatabëcuene xanepanarena nitabarata pibisiacuene pataexanaejava. Nexata panevecuaajibiaexanare pibisiacuene pataexanaeneconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcueneceavajë. Nexata pabarajamatabëcuenexanepanajë. Panevecuatsare dovathi patanejamatabëcueneëjëbivaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënënë meravi tuatuajëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje. ⁶ Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso piajani. Itsiata xanë apo xainaenë itsacuenejavayo ata pexaejava tarajutsinexa,” jai tsipae paxamëyajuvënënë meravi tuatuajëta peyapëtaenëtsijavabelia.

⁷ Nexata bo ënëverena bajaraponë jume pitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëtame. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa.

⁸ Xaniajanë pacuenia pacatsipaebijitsiatsi. Bajaraponë apo jamatabënonotapunaë ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita

pacuenia namatavenona ajumesaëya pevajëcaponaexaetsi.
 9 Xaniajanë pacuenia pacatsipaebijitsiatsi. Itsacuenejavayo
 itsa pacatonaxuabijitsipa, nexata bajayajebi ata
 pajaitsipame matapania panecaxitajarabijavabelianexa.
 Bajara pijinia pacuenia bajayajebi ata pavajëtabianame
 Diosojavabelia papecajumecovënëtsinexa. Bo ata itsa baupa
 xatatanuta, nexata asaëyata pabaupadocodocotsipame
 matapania papecatobaupatsijavabelianexa. Bajara pijinia
 pacuenia asaëyata pavajëtabianame Diosojavabelia
 papecajumecovënëtsinexa. 10 Bajarapacuenia asaëyata
 pavajëtabianame Diosojavabelia. Tsipaji pajivi vajëtabiaba,
 rajutabiabatsi. Pajivi ata jaitabiaba, caxitajarababiaba.
 Pajivi ata baupa docodocotabiaba, tobaupatabiabatsi, jai
 Jesús pijajivijavabelia comparacióncuenia.

11-12 Icatsia Jesús jumaitsi pijajivijavabelia:

—Paxamë papebijivimë, panexi panexinaevi.
 Panexënatonëyo itsa pacavajëta panbë, apo panacoxi-
 rajutsimë tsipae iboto. Itsa pacavajëta dujuainëyo,
 apo panacoxirajutsimë tsipae jomo. Itsa pacavajëta
 vacaratobëto, apo panacoxirajutsimë tsipae aqueto.
 13 Paxamë paneajamatabëcuenebejevi ata, payapëtaneme
 panenacoxirajutsinexa pexaniajava. Paneaxa, athëbëtatsia
 peecaenë, bitso biji cajena pexaniajamatabëcuenenë paxamë
 matatoxenetsia. Bajaraponë pacarajutsiana pexaniacuene
 itsa pavajëtame. Bajaraponë rajutsiana Espiritu Santo daxita
 pamonaevajëtatsti, jai Jesús pijajivijavabelia.

*Pacuenia itsamonae Jesús yabara ja-
 matatabëcuenenavëxaniabiaya jumaitsi: “Beelzebú raja pesaëta
 Jesús dovathi jivivecua capitsapapona,” jai yabara pelivaisi
 (Mt 12.22-30; Mr 3.20-27)*

14 Pebi ponapona, dovathi pejamatabëcueneta apo penat-
 sipaebinë. Nexata bajaraponë Jesús dovathi vecuacapit-
 sapa. Pebi baja dovathi Jesús itsa vecuacapitsapa, natsi-
 paeba baja. Jivibitsaëtoxaneto petaevi bajarapacuene, bitso
 jamatabëcuenenabenajaca. 15 Itsiata baitsi jane itsamonae
 fariseovi Jesús baracuaicuaijaitsi pibisiacuena.

—Maponë Jesúsje, dovathi jivivecua capitsapabiaba
 Beelzebú pesaëta. Beelzebú raja daxita dovathivi pepo pena-
 matacaitorobinë, jai fariseovi jamatabëcuenenavëxaniabiaya
 Jesús yabara.

16 Itsamonae icatsia fariseovi Jesús picani ja-
 matatabëcuenenavëxaniabiaya itorobatsi pinijicuene Dioso pesaëta pex-
 anaajava Jesús petsitaexanaenexa. Bajarapacuenia picani
 itorobatsi fariseovi peyapëtaenexa pepacuene Jesús Dioso
 pitorobinëcuenetsitsica. 17 Itsiata Jesús jamatabëcueneyapëta

pacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ¹⁸ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaë taejitsipa pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. ¹⁹ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumait sijava xanë yabara. ²⁰ Espíritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenia jumait si fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonae peyacarëjëtsiyanivatsi pecobecovë. Nexata daxita pecobecovë xaniavaetsia tobobenaejitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumait si mapacueniaje:

—Itsiata baitsi jane itsa najetarucaejitsipa itsanë bitso piasaënë boxainanë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenia dovathi pejamatabëcueneamoneyabijava yabara.

²³ Icatsia Jesús jumait si fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa, jai Jesús fariseovijavabelia.

Pacuenia dovathi jivitonē pevejamatabēpitsapaecujinaetsi, icatsia naviarena pecovēyaberena petsijamatabēecaenexatsi icatsia yabara pelivaisi

(Mt 12.43-45)

²⁴ Icatsia Jesús jumaitsi fariseovijavabelia:

—Dovathi itsa vejamatabēpitsapa jivitonē, nexata dovathi jinaruta petseviiranējava. Jaitapona itsanējavabelia petsijamatabējonenexa dovathi penacueraevetsinexa bajaraponējavata. Itsa apo caxitajarabi, ponējavabelia tsijamatabējonejitsia, nexata dovathi jamatabējumaitsi: “Naviatsianajē meta icatsia tajabomijavabelia, paboverena pitsapajē,” jamatabējai dovathi, ponējavaverena pitsapa icatsia petsijamatabējonenexatsi. ²⁵ Dovathi baja caevēa itsa naviarena, caxitajaraba peyjavaponaponaenēmitsi. Nexata peyjavaponaponaenēmitsi pejamatabēēthēto, dovathi tane bepēnēsajinecaebo, bepēnēxaniavaetetsibo, bepiracajuetetsibo. ²⁶ Nexata dovathi icatsia sivapona peyjavapatsinexarena itsadovathivi, siete ponēbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabējunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxē caenē itsa tsijamatabēcatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabēcuenebarēya yabara pelivaisi

²⁷ Itsa abaxē Jesús livaisi tsipaeba fariseovijavabelia, petiriva bajarapajivi bitsaētoxfanetoyajuvēnēva pinijijumeta vavajai tsaxuabi. Jumaitsi Jesúsjavabelia:

—Jamatabēcuenebarēya baja cajena ena, pecanavitaniabiva, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamē rabaja. Itsiata baitsi jane pamonaē jumetane Dioso pejumelivaisi, nexata itsa jumecovēnēta bajarapali-
vaisi, bajarapamonae jane bitso jamatabēcuenebarēya tsa-
vanapae taena matatoxenetsia, jai Jesús petirivajavabelia.

Pacuenia pibisiajamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi

(Mt 12.38-42; Mr 8.12)

²⁹ Jivi ayaibitsaētoxfaneto Jesús itsa matatoyorotsia nacaetu-
atatsi, nexata Jesús jumaitsi:

—Pamonae aeconoxae jinavanapa, bitso pibisiaja-
matabēcuenevi. Bajarapamonae picani nitoroba Dioso
pesaēta pinijicuene taexanaejava tatsitaexanaenexa,

taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaebinëmi profeta Jonáspijinë exanatsi, bajara ëpitsicuene taneexanaejava, tsitajëtsianajë. ³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tsipaji ayaicuene exanatsi Dioso. Bajara pijinia pacuenia xanë ata, Daxitajivi Pematapijinë, pinijicuene Dioso nexanaena. Nexata daxita pamonaë aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica. ³¹ Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonaë nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaë aeconoxae jinavanapa, Dioso apo pejumecovënëtsivi. Bajarapova neconitsiana tsipaji bajayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë raja majotaje ponaponajë, bitso ayaijamatabëcuenenë Salómonpijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëttoxanetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuenepënëyorota Diosojavabelia. Pamatacabi copiapatsiana Dioso penaneconitsiaexanaemat-acabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaë aeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenë Jonáspijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, tsipaebi atanë Dioso pejumelivaisi, apo najamatabëcuenepënëyorotsi pibisiacuene pexanaejavavecua. Bajaraxuata Dioso naneconitsiaexanaenatsi bajarapamonaë, jai Jesús jivi ayaibitsaëttoxanetojavabelia tajëvelia pevajunupaëbijavata itsamatacabi Dioso jivi penaneconitsiaexanaejavaenexa.

Pacuenia vajaitaxuto belámparabë yabara pelivaisi
(Mt 5.15; 6.22-23)

³³ Icatsia Jesús jumaitsi jivibitsaëttoxanetojavabelia:

—Itsajivi ata lámparabê pitanojotsicujinae, apo mataacatetsi itsacuenejavata. Cajoniênêalia ata apo etsi lámparabê. Biji rajane athêbêyo etsia. Jivi boyaberena pejonevi tsivajênaeitayotecaejitsia. ³⁴ Lámparabê boênêta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajênaetaneme. Itsa paitaxutobejemê tsipae, nexata xaniavaetsia apo panatsivajênaetaemê tsipae. Pacatsitaaitaquiri saya tsipae. Bajara pijinia itsi panejamatabêcuene ata. Dioso itsa pacajamatabêcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabêxainaejitsipame bitso panexainaejava êpaxamênexa, nexata bitso pajamatabêcueneitaquirimê tsipae. ³⁵ Panayajivitaema xua panajamatabêxainabiabame, papecajamatabêcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabêcueneitayotsiana Dioso. Tsiquirijavayo ata apo aitaquiri tsane panejamatabêcuene. Nexata pacuenia lámparabê daxita boênê xaniavaetsia itayoteca pecotiata, bajara pijinia pacuenia paxamê ata pacajamatabêcueneitayotsiana Dioso, jai Jesús jivi ayaibitsaêtoخانetojavabelia.

Pacuenia Jesús tsipaeba fariseovijavabelia, judíovi pecujaru-bivijavabelia ata, pacuenia bajarapamonae naneconita Dioso-javabelia yabara pelivaisi

(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonê junatatsi Jesús penanabaninexa fariseonê pijabota. Jesús nexata najoneya fariseonê pijaboyaliala. Naeca mesa muxuneneta penanabaninexa. ³⁸ Fariseonê itsa tane Jesús penabanijava anijatonê nacobequiatsinejeva, fariseonê jamatabêcuenenabenajaca. Pacuenia daxita judíovi pijacuenia anijatonê nacobequiatabiaba penabanivajênae, apo itsi Jesús. ³⁹ Nexata Jesús jumaitsi fariseovijavabelia:

—Paxamê pafariseovimê panecaxaevajênae plato, taza ata, naniavelia bapaquiatame xaniavaetsia panijacuenia. Tshipaji jamatabêcuenenavêxaniabiaya pajamatabêjumaitsimê tsabiabi: “Itsa caxaejitsipajê xaniavaetsia quiatsinejevanê, Diosojavabelia naneconitsipajê,” pajamatabêjamê tsabiabi. Bajarapacuenia paquiatabiabi atamê xaniavaetsia panecaxaejavanênexa papecajamatabêcuene bijianaeyaniva picani, itsiata pananeconitaponame Diosojavabelia. Tshipaji bajarapacuenia paquiatabiabi atamê, caranata panejamatabêêthêtotata panajamatabêxainabiabame

pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua. ⁴¹ Pejanajamatabëcuene itsa paxinaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

⁴² Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainaemë. Bajaraxua picani paxamë bepanajamatabëxainame panetoexanabiabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayaijamatabëcuenevimë panataeyabiabame! Judíovi penacaetuatabiabi bonëjava itsa panajoneyabiabame, pajitsipabiabame paneenaenexa peyayataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yayiyataeya, jai Jesús fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisiajamatabëcuene panexainaevi ata. Pacuenia itsamonaë pona jivi pemëthëanë matatsënëa apo peyapëtaexae xua xaina bëpënëareca, bajara pijinia itsi pamonaë pacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae

pacayaiyatane tsipaji apo yapëtae bajarapamonae bēpēnēa paneajamatabēcuenebejejava, jai Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitsijavata, judíovi pecujarubiviyajuvēnēnē jumaitsi Jesúsjavabelia:

—Jesús, ita mapacuenia jumaitsimēje, paxanē yabara ata pibisiacuenia jumaitsimē, jai Jesúsjavabelia judíovi pecujarubiviyajuvēnēnē.

⁴⁶ Jesús nexata jumaitsi judíovi pecujarubinējavabelia:

—¡Paxamē ata, judíovi panecujarubivi, ayaineconi panatsixainame Diosojavabelia! Palivaisianē ayapēbeje itsajivi ata pejumecovēnētsinexa, bajarapalivaisianē jivi patsipaebabiabame pejumecovēnētsinexa. Bajarapalivaisianē patsipaebabiabi atamē itsamonae pejumecovēnētsinexa, paxamē itsiata apo panajamatabēxainaemē paneexanaenexa bajarapacuenia, jai Jesús judíovi pecujarubinējavabelia.

⁴⁷ Icatsia Jesús jumaitsi judíovi pecujarubivijavabelia:

—¡Paxamē judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamē bajarapaprofetavimi pemēthēanējumavereca bonē paexanajebame, jivi ita tane bajarapabonē, penajamatabēnapitabiabinexa bajarapaprofetavimi. ⁴⁸ Bajarapacuenia paneexanaexae, pacuenejēpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamē bonē paexanajebame bajarapaprofetavimi pemēthēanējumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacune Dioso peyapētaenēxae, bajayata tajēvelia jumaitsi paxamē yabara mapacueniaje: “Bajarapamonaejavabelia toitorobianajē profetavi. Toitorobianajēnua apóstolevi ata. Bajarapamonae itsiata beyaxuababiabiana tatoitorobiviyajuvēnēvi. Bejiobiaexanabiabiananua tatoitorobiviyajuvēnēvi,” jai baja cajena bajayata tajēvelia Dioso bajarapacuenia paxamē paneexanaejavanexa yabara. ⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamē pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamē aeconoxae mapamatacabitaje panejinavanapaevi.

⁵¹ Panijasalinaivimi profetavimi pebeyaxuabaponaejava,

taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprofetavimi ata. Nexata bexëajavaberena ata icatsia panijasalinaivimi beyaxuaba Zacariáspijinëmi. Zacariáspijinëmi panijasalinaivimi beyaxuaba templobopanabota, baitsi templobobeje altarvënëjavabeje petuatuajëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo bauxatata jivi pejoneyaniva, bajara saya pacuenia paxamë paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë pejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaeavetsinëjavabelia.

12

Pacuenia Jesús tsipaeba jivi pejumecovënëtsiyaniva fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayaibitsaëtoxaneto cagena tsaponae, baitsi miles pajivibeje. Nexata jivi nataxucuetabataxuabapona. Nexata Jesús pijajivijavabelia copiya tsipaeba livaisi, pejumecovënëtsiyaniva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” itsa janë, peyamaxëitojorobilivaisi yabara pacajumaitsiatsi. Fariseovi raja bepacatsita pexaniajamatabëcuenevi itajara tsane, pibisiajamatabëcuene pexainaevi ata. ² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi

yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabi xaniavaetsia yapëtaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

Pacuenia Jesús tsipaeba pijajivi pecujunaviyaniva jivivevi yabara pelivaisi
(Mt 10.26-31)

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinexa. ⁵ Biji rajane pacatsipaebijitsiatsi panecujunavinexa Dioso. Tsi-paji Dioso caëjëpatsi papecaxuabinexa infiernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalantanëyobeje. Tsi-paji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënënë. ⁷ Paxamë rabiji bitso Dioso pacaasiva baratsui matatoxenetsia. Tsi-paji panamatamotame baratsui mata-toxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namataëjëta. Bajaraxuata pëtsa pacujunavame itsacuenejava ata, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi
(Mt 10.32-33; 12.32; 10.19-20)

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaе tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinënë, vajunupaebianajë tajajivicuene Dioso pijaángelevi pitabarata. ⁹ Pamonaе jumai tsane itsamonaеjavabelia: “Xanë cajena Jesús apo pijajivitonënë,” jai tsane, bajarapamonae yabara juya xanë, jumaitsinë tsane: “Mara pamonaе cajena apo tajajivije,” janë tsane Dioso pijaángelevi pitabarata, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi pibisiacuena nebaracuaicuaijai ata, xanë, Daxitajivi Pematapijinënë, bajarapaneconi yabara itsa navajëta

Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuenia baracuaicuaijai Espiritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judíovi penacaetuatabiabiobojavabelia ata, papecyanijobinexa, pëtsa pajamatabëcuenebëjamë panenayajivicuaicuaijajavanexa yabara. ¹² Tsipaji raja bajarapaepatota, Espiritu Santo pacacuaicuaijaiyaexanaena pacuenia panayajivicuaicuaijamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainaeayaniva ayaijava pexainaejava pexainanexa yabara pelivaisi

¹³ Jivi ayaibitsaëtoxanetoyajuvënënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

¹⁴ Jesús nexata jumaitsi bajaraponëjavabelia:

—Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobetsatsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayaijava panexainanexa. Tsipaji jivi pexainaejava ayaijava xainae ata tsipae, bajarapamonae pexainaejava yabara jamatabëcuenexanepanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueniaje:

—Ponapona bitso riconë. Pijapabianë tocapitsapabiabatsi ayaijava pexainaeuene. ¹⁷ Riconë nexata jamatabëjumaitsi: “¿De meta pacuenia exanaenajë? Netoajibi baja rovia taetaponaejavabelianexa taubijava,” jamatabëjai riconë. ¹⁸ Riconë nexata icatsia jamatabëjumaitsi:

“Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava.

¹⁹ Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë.

Pexaniaviriaranënuu matavëjëa apaeyabianajë taitajibinexa. Nexata barëyanë tsabiabi tsane,” jamatabëjai riconë. ²⁰ Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopia-patsianatsi pamonaë ayaijava natocaetuatapona ëpamonae pexainaenexa. Bajarapamonae itsiata pepacuene bepejio-bivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabara peliv-aisi

(Mt 6.25-34)

²² Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. ²³ Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁴ Pacanaëjère pacuenia baratsui apo ubi pexaejavanexa. Apo notsinua penaveretaponaejava. Apo xainaenua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. ²⁵ ¿Detsa jane ponë paxamëyajuvënëne caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcueneueratsipa pejamatabëcuenebëjajava penavitsabiaexanaejavanexa. Tsipaji apo tonamatamotsitsi bajaraxua. ²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

—Pacanaëjère pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevetsinë Salomónpijinë bitso pexainaenëmi. Naitabëtsiaya naxatabiaba bitso pexaniaviriajavanë. Itsiata baitsi jane Salomónpijinë penaitabëtsijava

matatoxenetsia bitso aitabë mapamatonotoxije.
²⁸ Paxamë, bevelia Dioso panejumecovënëtsivi, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatanotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata itsamatacabi Dioso pacaxatabiana piaitabëjava.
²⁹ Bajaraxuata pëtsa pasivanajamatabëxainavanapame ëpanexaejavanexa, ëpanematavëjëaapaejavanexa ata. Biji rajane pajumecovënëtavanapare Dioso. ³⁰ Pamonae Dioso apo pejumecovënëtsivi, bitso sivanajamatabëxainabiaba ëpexaejavanexa, ëpenaxatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua panamatavenoname. ³¹ Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenebavanapaenexa itsamatacabi ayajava pexainaenexa athëbëtatsia yabara pelivaisi
 (Mt 6.19-21)

³² Icatsia Jesús jumaitsi pijajivijavabelia:

—Tajamonae, paxamë patajajivimë pacaevijiyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bajaraponë evetsiana daxitacuene. ³³ Pacanajere panexainaeyajuvënëjava, bitso paneasivajava ata. Nexata bajarapapalata parajutsianame bitso bepejiobivijavabelia. Nexata juya Dioso athëbëtatsia pacarajutsiana bitso penamatamotsijava, apo peverevereaejava. Bajarajotatsia acuenebi pejonejava penacobetoxotsivi papecayacajërëtsinexa. Itsanë ata ajibi papecatoucubaxaenënexa. ³⁴ Panacuatatsia pacatoxaniavaeta panexinaejavanexa, bajarapanacua panejamatabëëthëtovetsina pajamatabënajinavanapaename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijit-siatsica najamatabëcuenexaniavaetsiaya pevajënae pijajivi pecopi-aevetavanapaenexatsi yabara pelivaisi

³⁵ Jesús icatsia pepatsijavanexatsica tajëvelia nava-junupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata naja-matabëcuenexaniavaetsiaya panecopiaevetavanapaename.

36 Payapëtaneme rabaja mapacueneje. Petuxanenë itsa pona penacasabifistajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiaevetavanapatsi. Nexata petuxanenë jemata meravi najetaruae ata, baupa itsa docodocota, nexata bajarapamonae bepimia tobaupata pijatuxanenë. 37 Bajarapamonae barëya pijatuxanenë naëcotsiaya pecopiaevetavanapaejavata pepatsixae. Xaniajanë pacuenia pacatsipaebijitsiatsi. Nexata petuxanenë pijajivi caecuenia petobaupatsixaetsi, petuxanenë pijajivi sivajamatabëcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonae bepijajivitonë nataeya rajuta pexaejava pijajivi. 38 Meravi tuatuajëta petuxanenë patsi ata, itsa jume, matabivëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitajarabixaetsi, petuxanenë pijajivi barëya. 39 Pacanaëjère mapacueneje. Bo pexainanenë itsa yapëtaejitsipa paepatota meravi pijabojavaberena patsijitsia pecobcovë petonacobetoxotsinënexatsi, nexata apo majitsi tsipae. Vajënaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinënexa. 40 Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicuenia, yabara pelivaisi (Mt 24.45-51)

41 Pedro jumaitsi Jesúsjavabelia:

—Tajatuxanenë, ¿palivaisi aeconoxae panetsipaebame, baja tsaja palivaisi ëpaxanë panijajivinexanë? Itsa jume, ¿itsamon-aenexa ata tsaja yajava? jai Pedro.

42 Jesús nexata jumaitsi Pedrojavabelia:

—Mara pejamatabëcueneitsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenebaponapona pijacuene, maitsije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë pepatsimatabijavabelianexa. Bajaraponë pijatuxanenë pijajivi pecovëta tovetaponapona xaniavaetsia.

Toabataponapona pexaejava caematacabi canacujitsia pacuenia itorobatsi pijatuxanenē. ⁴³ Bajaraponē bitso barēya pamatacabi pijatuxanenē pata xaniavaetsia pijajivi pecovēta petoevetaponaponaexae. ⁴⁴ Xaniajanē pacuenia pacatsipaebijitsiatsi. Ponē bajarapacuenia xaniavaetsia tonacueneba pijatuxanenē pecovēta, bajaraponē icatsia evetsiaexanatsi daxita xua xaina pijatuxanenē. ⁴⁵ Petuxanenē pijajivitonē itsa piajamatabēcuenebejenē tsipae, nexata bajaraponē pijatuxanenē pecovēta jamatabējumai tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonae evetsiaexanatsi xaniavaetsia picani petoevetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponē ayaijava pexaejava xaeyabiabijitsipa. Aitajibinua tsabiabi tsipae. ⁴⁶ Nexata itsajota apo jamatabēnajinae tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonae Dioso apo pejumecovēnētsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponē itsanē pijajivitonē, yapētae ata picani pacuenia itorobatsi pijatuxanenē petoexanaenexa, itsiata itsa apo toexanae pijatuxanenē pitorobicueniatsi, bajaraponē pinijicuenia jumaconibabejitsipatsi ayaicuerobocotota. ⁴⁸ Ponē ata pijinia itsanē pijajivitonē, itsa apo jumeyapētae xaniavaetsia petoexanaenexa pacuenia pijatuxanenē itorobatsi, nexata pijatuxanenē pitorobicueniatsi saicayacuenia itsa toexana, bajaraponē ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabējumaitsi: “Juya meta mapajivije ayaijava rajutabiabiana itsamonaejavabelia,” basivajamatabējaitsi. Pajivi pijinia evetsiaexanatsi ayaijava, bajarapajivi pevetsiaexanaenētsi sivajamatabējumaitsi: “Itsa netocanacuenebiana taevetsiaexanaejava, ayaijava netopitsapaena,” sivajamatabējaitsi pevetsiaexanaenētsi, jai Jesús pijajivijavabelia.

Pacuenia Jesús apo penajuajumecovēnētsixae, nacaemonae ata apo najamatabēcuenejēpae tsane yabara pelivaisi
(Mt 10.34-36)

⁴⁹ Icatsia Jesús jumaitsi pijajivijavabelia:

—Xanë raja patajopajë daxitanacuapijivi pibisiacuene pexanaeneconi yabara tasivatëpaenexa. Nexata bajarapamonaeyajuvënëvi itsamonae nejumecovënëtsiana. Nexata nacaemonae ata apo najamatabëcuenejëpae tsane. Itsa baja capanepaeya cruzata daxitajivi sivatëpaejitsipajë, jamatabëcuenebarëyanë baja tsipae.⁵⁰ Itsiata baitsi jane abaxë netosajina bajaraxua yabara tanejamatabëcuenejëtsinexa tanebeyaxuabijavata. ¡Bitso baja rovia najamatabëxainajël! ¡Matapania nebeyaxuabiana, jamatabëcuenecaevianajël!⁵¹ Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavanapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonae ata. Itsamonae napijavajabitsaë tsane. Nexata apo najamatabëcuenejëpae tsane.⁵² Ajena mapamatacabijavaveliacujinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavanapaevi ata, apo najamatabëcuenejëpae tsane xanë apo tanenajuajumecovënëtsixaebeje. Pamonaе cinco pajivibeje nacaemonae, bajarapamonaeyajuvënëvi, acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsiana. Acueyabi pajivibeje apo nejumecovënëtsi tsane.⁵³ Bajarapabopijivi, paxabeje pexënatobeje, apo najamatabëcuenejëpaebeje tsane xanë apo tanenajuajumecovënëtsixaebeje. Petirivabeje pijinia, penabeje pexënatoyobeje ata, apo najamatabëcuenejëpaebeje tsane xanë apo tanenajuajumecovënëtsixaebeje. Pamebeje pecopenabeje ata apo najamatabëcuenejëpaebeje tsane xanë apo tanenajuajumecovënëtsixaebeje, jai Jesús pijajivijavabelia.

Pacuenia Jesús asaëya jivi muxujioba apo pecanaëjëtsixae Jesús Dioso pexënatocuene yabara pelivaisi

(Mt 16.1-4; Mr 8.11-13)

⁵⁴ Jesús icatsia jumaitsi jivi ayaiBITSaëtoXanetojavabelia:

—Itsa pataneme vaëvetsica itarërëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaba.⁵⁵ Itsa pataneme jovibo pepitsapaejava epatajërëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi.⁵⁶ Nexata itsamonae

pacatane bepatsita pexaniajamatabëcuenevimë itajara, papibisiajamatabëcuenevi atamë. Payapëtaeyabiabame pacuenia matabi itsijitsia itarërëbo pepitsapaejava pane-taeyabiabixae. Bajarapacuenia picani payapëtaeyabiabame. Itsiata baitsi jane patae atamë daxita xua Juanpijinëmi jivibautisabinëmi exanapona, patae atamënuu daxita xua xanë ata exanaponajë, caranata xanë apo paneyapëtaemë Dioso athëbëvetsica taneitorobinëcuenetsica, jai Jesús jivi ayaibitsaëtoxanetojavabelia.

Pacuenia penaneconitsijivi xaniavaetsia bebarëcuaicuaijai pajivijavabelia naneconita penasivajamatabëxanepanaenexabeje, peneconitsiyanivatsi jueznëjavabelia, yabara pelivaisi (Mt 5.25-26)

⁵⁷ Jesús icatsia jumaitsi jivi ayaibitsaëtoxanetojavabelia:

—Pacanaëjere panijacuata paneexanaenexa pacuene xanepana. ⁵⁸ Itsa pananeconitame itsajivijavabelia, nexata ita pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuaijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacapon-aenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota ita pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëtoxanetojavabelia.

13

Pacuenia jivi benajamatabëcuenepënëyorota pibisiacuene pexanabiabijavavecua yabara pelivaisi

¹ Itsamonae jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaeavetsinë Pilato pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuata, bajarapacovëta icatsia beyejebatsi bajarapamonaemi. Nexata

bajrapamonaemi pijana namatajërëata bacajana yajava, jai itsamonae Jesúsjavabelia.

² Jesús nexata jumaitsi bajrapamonaejavabelia:

—“Pamonaemi bajrapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja? ³ Jume baja cajena. Bajrapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajrapamonaemi pebeyejebinxatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepënëyorotsimë tsane Diosojavabelia, nexata bajrapacuenia paxamë ata panaxuabianame Diosovecua itsa patëpaename. ⁴ Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tëpa bajrapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja? ⁵ Jume baja cajena. Bajrapamonaemi ata picani bitso pibisiacuene apo exanae pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajrapacuenia panaxuabianame Diosovecua itsa patëpaename, jai Jesús bajrapamonaejavabelia.

Pacuenia Jesús jivi livaisi tsipaeba piacuaijibihigueranae pelivaisicuenia yabara pelivaisi

⁶ Jesús jivi livaisi tsipaeba piacuaijibihigueranae pelivaisicuenia. Jesús jivi piacuaijibihigueranae pelivaisicuenia petsipaebijavata, pijaperujujamatabëcuene apo penavecuacopatsivi yabara Jesús jumaitsi mapacueniaje:

—Pebi pijapabi tuatuajëta caenae peubinae xainanuta, higueravënënae. Nexata picani taeyojopalia bajaraponae penacuaitsijava. Itsiata baitsi jane apo nacuaitsi. ⁷ Nexata jumaitsi pijapabi petoevetsinëtsijavabelia: “Taema maponaeje. Acueyabi picani pavaibeje taeyopajë tacuainotabiabinexa maponaecuaije. Itsiata acuaijibi tsabiabi. Nexata baja netonicataxuare. Apo becopatantsitsi bajaraponae. Ira caranatanuca saya,” jai pijapabi pexainaenë. ⁸ Itsiata

baitsi jane pijapabi petoevetsinëtsi jumaitsi: “Copatanut-sianatsibeje abaxë mapavaije. Nexata bacatuirabianajë bacatasitoxita. ⁹ Baja raeta xuacujinae xanepanaena. Nexata aeconoxae pavai nacuaitsiana. Nexata aeconoxae pavai ata itsa apo nacuaitsi tsane, nexata jane baja catonicataxuabi-anatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonae pijaperujujamatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabi judíovi penacueraevetsimatacabita, Jesús jivi livaisi tsipaeba judíovi penacaetuatabiabibota. ¹¹ Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjëpaetsi tsiquirijavayo ata penaepasirovitsijava. ¹² Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuajibi, jai Jesús bajarapovajavabelia.

¹³ Jesús tsimatanacobebeuata bajarapova. Nexata bajara-jota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayaijamatabëcuenenëxaemë! jai tsaponae bajarapova Diosojavabelia.

¹⁴ Itsiata baitsi jane judíovi penacaetuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsi-paji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibo pevetsinë jamatabëjumaitsi:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuene, jamatabëjai.

Nexata judíovi penacaetuatabiabibo pevetsinë najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxë penacueraevetsimatacabita apo bepatsitsi vajanacajamatejemayaexanaenexa, jai judíovi penacaetuatabiabibo pevetsinë najumejematsiaya jivijavabelia.

¹⁵ Nexata Jesús jumaitsi judíovi penacaetuatabiabibo pevetsinëjavabelia:

—Paxamë saya jivi paneyamaxëitojorobivi. Bepatsita pexaniajamatabëcuenevimë itajara itsamonae, papibisiajamatabëcuenevi atamë. Paxamë ata panacuenebabiabame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa.
¹⁶ Mapovaje Abrahampijinë pemomoxiyajuvënëva jamatejemayaexanjë. Tsipaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanjë piatanecuenevecua, jai Jesús judíovi penacaetuatabiabibo pevetsinëjavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabëcuenebarëyatsi pinijicuene Dioso pesaëta pexanaponaejavanë yabara.

Pacuenia mostazaxutoyo pejuvicujinae, mostazanae bepíjia vitsaba yabara pelivaisi

(Mt 13.31-32; Mr 4.30-32)

¹⁸ Jesús jumaitsi jivijavabelia:

—¿De meta xua pelivaisi jëpa Dioso pijajivi bepíjia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepíjia vitsaba. Bepíjia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepíjia ayaibitsaëtoxaneto naexanaena Dioso pijajivi, jai Jesús jivijavabelia.

Pacuenia pan pexanaematabënexa, levaduravënëjjava fufunaeyaexana yabara pelivaisi

(Mt 13.33)

²⁰ Icatsia Jesús jumaitsi jivijavabelia:

—¿De meta palivaisi jëpa pecacaëjëpaejava Dioso pijajivi pevetsicuene daxitanacuanëjjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicuene peyacaëjëpaejava daxitanacuanëjjava?

²¹ Levaduravënëjjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajërëaba levaduravënëjavata. Nexata pan pexanaematabënexa, ayaimatabë.

Tsiquiribaupayo epatajërëtsialia yabara pelivaisi
(Mt 7.13-14, 21-23)

²² Jesús jivi livaisi tsipaebanajetaruca pinijitomaranëjava, tsiquiritomaraxijava ata, pepatsinexa Jerusalén tomarabelia.

²³ Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëttoxaneto jamatabëjonena tsiquiribaupayojavalia. Itsiata apo caëjëpaetsi tsane pejonenexa. ²⁵ Bo pexainaenë itsa nonotapunaena baupa pexatatsinexa, paxamë bo jumapënevëlia panubenaename. Nexata picani panejonenexa pabaupadocodocotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. ²⁶ Nexata paxamë pajumaitsimë tsane: “Xamë baja cajena panebarënanabame. Panebarëmatavëjëaapamenua. Patajatomaranëjava ata baja cajena jivi livaisi tsipaebabiabame,” pajamë tsane. ²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane. ²⁸ Dioso pijanacuatatsia pataename Abrahampijinë, Isaacpjinë ata, Jacobpjinë ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsiipaji paxamë Dioso pijanacuavecua panenaxuabinexa pacaxuabiana infiernojavabelia. ²⁹ Itsaviriajumevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia. ³⁰ Pamonaeeconoxae mapamatacabitaje ayaijamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso beveliajamatabëcuenevi exanaenatsi. Pamonaepijiniamapamatacabitaje beveliajamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso ayaijamatabëcuenevi exanaenatsi, jai Jesús daxitajivijavabelia.

Pacuenia Jesús najamatabëxainaeya sivanua Jerusalén tomarapijivi yabara pelivaisi
(Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaejetsinë raja Herodes cabeyaxuabiapaeba, jai fariseovi.

³² Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitojorobabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsapaponaenajë dovathi peyavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. ³³ Diosojumepaebivimi profetavimi beyejebabiabatsi Jerusalén tomarata. Tsipaji profetavi acuenebi saicayatomarata petëpaejava Jerusalén tomaravecu. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabëxainaeya sivanua Jerusalén tomarapijivi. Jerusalén tomarapijivi Jesús najamatabëxainaeya pesivanuejavata, jumaitsi mapacueniaje:

—¡PaJerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacacaetuatsinexa, pat-acacapanepaenexa picani panijaneconivecu! ¡Itsiata baitsi jane paxamë apo pajejamë cajena! ³⁵ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponapona. Xanijane pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënua tsane: “Dioso, bitso yavenonare maponë najetarucaje. Bajaraponë nejamatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë,

jai Jesús mapacueniaje najamatabëxainaeya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

¹ Itsamatacabi, judíovi penacueraevetsimatacabita, Jesús pona fariseovi penamatacaitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. ² Nexata Jesús pitabarata eca pebi, daxitanë peyajinaenë. ³ Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. ⁵ Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatacabita ata, bepíjia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyaniva yabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabi-fiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tsipaji itsanë ayaijamatabëcuenenë paxamë matatoxenetsia itsa najunatatsi, napatsipa. ⁹ Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. ¹⁰ Itsa pacajunata, paenaename beveliajamatabëcuenevi

penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuenaevi pacataena papecayai-ataejava papecajunatsinë. ¹¹ Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsi-fariseonëtsijavabelia:

—Itsa junatame itsamonae nebarënanabinexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabinexa ënijamonae. Pëtsa junatame ënijamonaeviriavi ata. Pëtsa junatame ëricovi, pamonae nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarënanabinexa. Nexata bajarapacuenia canamatamotsipa bajarapamonae. ¹³ Itsa junatame itsamonae fiesta nebarëxanaenexa, junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata. ¹⁴ Nexata bajarapacuenia pepacuene jamatabëcuenebarëyamë tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonae tëpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijifiesta pexanaenë pelivaisicuenia yabara pelivaisi

(Mt 22.1-10)

¹⁵ Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënënë jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënënë.

¹⁶ Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nexata tajëvelia junatsiaexana jivi ayaibitsaëtoxaneto petopatsinexatsi. ¹⁷ Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. ¹⁸ Itsiata baitsi

jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ¹⁹ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ²⁰ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamonaë picani fiesta pexanaenë junata, peponaeyaniva saya tonajumeitorobarenatsi pijajivitonëta. ²¹ Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pinijicallexanetonëjava, tsiquiricallexijava ata. Junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. ²² Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanajë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia. ²³ Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. ²⁴ Pamonaë picani copiata junatajë penanabaninexa, caenë ata bajarapamonaeyajuvënë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviyajuvënëjavabelia jivi peyapëtaenexa itsamonae Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús

*jamatabëpënaponatsi, copiaya penajamatabëcueneveretsinexa
Jesús pepënaponaevajënaeyatsi yabara pelivaisi
(Mt 10.37-38)*

²⁵ Jivibitsaëtoxaneto Jesús pënajinavanapatsi. Nexata Jesús napënyorota bajarapamonaejavabelia. Jesús jumaitsi mapacueniaje:

²⁶ —Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piasivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penasivajava ata, matatoxenetsia, nexata bajaraponë apo tajajivitonë tsane. ²⁷ Ponë xanë yabara itsamonae jamatabëpebeyaxuabixaetsi, jamatabëpebejiobiaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane. ²⁸ Paxamëyajuvënënë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya. ²⁹ Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi. ³⁰ Baracuaicuajaitsi tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi. ³¹ Nacuaeavetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya. ³² Nexata bajarapacuenia penajamatabëxainaejitsipa, bajaraponë yapëtaejitsipa apo pebarëcueneceajëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje. ³³ Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepeñeyorotsinexa daxita pexainaejavavecua, nexata acuenebi tajajivi taexanaenexa, jai Jesús jivi ayabitsaëtoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë ita copatsipa Jesús pejumecovënëtsijavami yabara pelivaisi

(Mt 5.13; Mr 9.50)

³⁴ Jesús icatsia comparacióncuenia jumaitsi jivi ayaibit-saëtoxanetojavabelia mapacueniaje:

—Yajo abaxë ita xaica, xanepana. Itsiata yajo pexaicae-javami ita ajibi tsipae, ¿detsa pacuenia icatsia naxaicaeyaex-anaejitsipa? Acuenebi. ³⁵ Itsacuenejavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava pet-sibacathocaebeno, ita tsibacathoca, peubijava naxaniabi-aexana, bajara apo itsi tsipae bajarapayajomi. Pacuenia bacatasi ata ita tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë ita copatsipa Jesús pejumecovënëtsijavami. Nexata Diosovecua naxuabijitsipa.

15

Pacuenia Jesús jivi livaisi tsipaeba oveja penaxuabinë peliv-aisicuenia yabara pelivaisi

(Mt 18.10-14)

¹ Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piajamatabëcuenebejevi. Bajarapamonae pata penamuxunaevetsinexa Jesús petsipaebilivaisi.

² Nexata fariseovibeje judíovi pecujarubivibeje ita tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, ita tanenua piajamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaisi. Bajarapamonae najumaitsi mapacueniaje:

—Mara ponëje naneconita Diosojavabelia. Tsipaji copiap-itabiaba piajamatabëcuenebejevi ata. Naxaeyabiabanua pex-aejava bajarapamonaeta, najai fariseovibeje judíovi pecu-jarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuaijaixaetsi, Jesús bajarapa-monaejavabelia livaisi tsipaeba mapacueniaje:

4 —Paxamëyajuvënënë xainaejitsipa cien ponëbeje oveja. Nexata itsa toyajuvënënaxuabijitsipatsi caenë, oveja pexainaenë petusatota puenetsipa noventa y nueve ponëbeje. Nexata jaitsipa petonaxuabinëtsi matapania pecaxitajarabijavabelianexa. 5 Nexata oveja pexainaenë itsa baja caxitajarabijitsipa petonaxuabinëmitsi, barëyataejitsipa. Boyaberena vëtarapatsipa petonaxuabinëmitsi. 6 Nexata oveja pexainaenë petonaxuabinëmitsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tsipaji tajaovejayo, tanetonaxuabinëyomi picani, caxitajarabajë baja,” jai tsipae oveja pexainaenë bajarapamonaejavabelia. 7 Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, itsa copatsiana pibisiacuene pexanabiabijava, itsa najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtsia pejinavanapaevi. Bजारapajivi, athëbëtsia pejinavanapaevi, sivabarëyatsi tsane noventa y nueve pajivibeje Dioso pitabarata pianeconijibitsavanapaevi pesivabarëyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

8 Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xainaejitsipa diez ponëbeje palatanëanë, bitso penamatamotsinëanë. Nexata itsa toyajuvënënaxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava. 9 Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bजारapova nexata jumai tsipae bajarapamonaejavabelia: “Panecobenabarëyamëre. Tsipaji tajapalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaejavabelia. 10 Xaniajanë pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabëcuenepënëyorotsiananua Diosojavabelia, bajara pijinia pacuenia athëbëtsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinē paxavecuā naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

—Pebi xaina anijanēbeje pexēnatobeje. ¹² Nexata juyapijinē jumaitsi paxajavabelia: “Axa, xuanē picani netocopatame tapitsinexa nevēnamuto, bajaraxuanē abaxē apo tēpae atamē, nerajure baja tajajavanexa,” jai juyapijinē. Nexata pexēnatobeje pexainaenē pexēnatobejejavabelia rajuta daxita pexinaejavanēmi. ¹³ Nexata paxa perajutsicujinaetsibeje, caematacabibejecujinae, juyapijinē canajeta daxita pexinaejavanēmi pecaetuatsinexa palata. Bajaraxuacujinae jane baja pona tajēnacuyavabelia. Bajarajotalia pibisiacuene exanaponapona. Nexata vereta daxita paxa perajutsijavanēmitsi. ¹⁴ Nexata daxita bajarapanacuapijivi janibocuene tsipatatsi. Bajaraponē peveretsicujinae daxita pijapalatami, bitso namatavenona pexaejava. ¹⁵ Nexata jaita penacuenebinexa bajarapanacuata peecaenējavabelia. Bajaraponē itorobatsi pijairanējava petoetaponaponaenexa pijamarrano. ¹⁶ Nexata bajaraponē bitso pijaanaxae, pepenenexa picani ayaijava jamatabēxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavanexa. ¹⁷ Nexata belia bajaraponē xaniavaetsia najamatabēxaina. Jamatabējumaitsi mapacueniaje: “Taxa pijabota pexaejava ayaijava xaina pijajivi ayaibitsaēto piabatsinexa. Tonacopatabiabatsi ayaijava pexaejava. Itsiata xanē majotaje tēpaejitsianē baja tajani. ¹⁸ Nexata taxajavabelia naviatsianajē. Jumaitsinē meta tsane taxajavabelia: ‘Axa, pibisiacuene exanajē Diosojavabelia, xamējavabelia ata. ¹⁹ Abejenē raja. Auranē baja rovia xamējavabelia: “Taxēnato,” tanejamējava. Nexata saya nijajivitonēnē nexanare,’ janē meta tsane taxajavabelia,” jamatabējai juyapijinē. ²⁰ Nexata baja naviata paxajavabelia.

‘Itsa abaxē tajēverena najetaruca, pexēnato pexainaenē copiatane. Nexata bajaraponē pexēnato itaxutobejiobiatane. Mataenetsia cujinaejinalia pexēnato. Nacoxivaetabarucapona. Copiapitsiaya itabaratsutsunexuaba pexēnato. ²¹ Nexata bajaraponē jumaitsi paxajavabelia: “Axa, pibisiacuene raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: “Taxēnato,’ tanejamējava,” jai paxajavabelia. ²² Itsiata baitsi jane pexēnato pexainaenē bajarajota jumaitsi pijajivijavabelia: “Naxanitsia. Bepijiayo taxēnato patocaponaremena daxita matatoxenetsia pexaniapana,

penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare. ²³ Penasitsinë becerro papiremelia. Pabeyaxuabianame vajaxaenexa. ¡Fiesta exanaenatsi vajabarëyanexa! ²⁴ Tsipaji raja maponë taxënatoje: “Tëpa meta baja,” sivajamatabëjanë picani. Itsiata tsaena ponapona. ‘Naxuaba meta baja,’ sivajamatabëjanë picani. Itsiata baja icatsia patajopa,” jai pexënato pexainaenë pijajivijavabelia. Nexata taxuxuaba fiesta pexanaejava.

²⁵ ‘Bजारapamatacabi matapijinë pabiabelia nacuenebaponapona. Nexata penaviatsinë bo itsa imoxoyotanjataruca, jumetane música. Jumetanenua peyavajibijava. ²⁶ Nexata bajaraponë junata paxa pijajiviyajuvënënë. Jumaitsi: “¿Detsa pitsicuene yabara fiesta paexaname?” jai matapijinë. ²⁷ Nexata paxa pijajivitonë jumaitsi: “Nejuyapijinë baitsi patajopa. Axa nexata paneitoroba patabeyaxuabinexa becerro, penasitsinë. Jamatejema tsaena ponapona nejuyapijinë,” jai bajaraponë matapijinëjavabelia. ²⁸ Nexata matapijinë bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexënatojavabelia: “Naxanitsia. Najonemeya,” jai pexënatojavabelia. ²⁹ Nexata matapijinë jumaitsi paxajavabelia: “Jume. Bajayajebi baja rovia catonacuenebaponaponatsi xanë. Caeto ata cajena apo cajumeapajejaitsi. Itsiata baitsi jane caeto ata apo nerajutsimë chivoyo ata fiesta tabarëexanaenexa tayapëtaevi. ³⁰ Itsiata aeconoxae patajopa baja nexënato, ponë vereta nijapalatami petiriavijavabelia. Nexata tobeyaxuabame becerro, penasitsinë,” jai matapijinë paxajavabelia. ³¹ Nexata bajaraponë jumaitsi pexënatojavabelia: “Taxënato, xamë cajena xanëjavata ponaponame daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarëyanexa. Tsipaji nejuyapijinë: ‘Tëpa meta baja,’ tasivajamatabëjainëmi, itsiata tsaena asaë. Penaxuabaponaponaenëmi icatsia baja patajopa,” jai bajaraponë pexënatojavabelia, jai Jesús mapalivaisije fariseovijavabelia, judíovi pecujarubivijavabelia ata.

16

Pacuenia pijatuxanenë pecobecovë petoevetsinë toveretapona pevetsiaexanaejavanëtsi yabara pelivaisi

¹ Jesús pijajivijavabelia livaisi tsipaeba. Jumaitsi mapacueniaje:

—Petuxanenë, bitso pexainaenë, ponapona. Bajaraponë xaina pijajivitonë petoevetsinexatsi pecobecovë. Itsiata pepëya pijajivitonë pecobecovë toveretaponatsi. Nexata itsamonae tsipaebatsi pepëya pijajivitonë pecobecovë petoveretaponaejavatsi. ² Nexata petuxanenë pijajivitonë junata. Jumaiti pijajivitonëjavabelia: “Xamë pina tapëya netoveretaponame tacaevetsiaexanaejava. Pabaxutojavabelia matamoyaquinarubame xuanë canajetaponame tacobecovë, xuanënuu netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjêa apo netoevetsimë tsane tacobecovë,” jai petuxanenë pijajivitonëjavabelia. ³ Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënaejamatabëjumaiti: “¿De tsaeta xua exanaenajë? Tajatuxanenë baja necapitsapaejitsia pecobecovë tatoevetaponaeponaejavavecuu. Apo necaëjêpae tsane tanacuenebinexa pabi tajacuata tanaevetsinexa. Bitso auranënuu tsipae itsamonaejavabelia amoneya tavajëtaponaenexa palata tanamitsacomuatabiabinexa taxaejava. ⁴ Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaecujinae, bajarapamonae pijaboyabelia itsa ponaenajë, xaniavaetsia necopiapitsiana. Nexata bajarapamonaejavata naponaponaenajë,” jamatabëjai bajaraponë. ⁵ Nexata bajaraponë junata daxita pamona abaxë amoneyabatsi. Nexata pamona amoneyabatsi, bajarapamonae, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaiti: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë. ⁶ Nexata ponë amoneyabatsi, jumaiti: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaiti piamoneyabinëtsijavabelia: “Bevelia saya catocopatsianatsi. Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya cuatrocientos pagalónbejenexa bepijia yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. ⁷ Bajaraxuacujinae icatsia itsanë topatatsi. Nexata icatsia jumaiti bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaiti: “Camoneyabatsi abaxë tacarajutsinexa cien pabultobeje trigoxubultonë,” jai.

Nexata bajaraponë jumaitsi piamoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutaponae baxutonëtsi. ⁸ Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaitsi: “Xamë baja rovia pibisiacuene exaname. Itsiata baitsi jane niaitatsacaxae, exaname pacuenia catoxanepanaejitsia nevajënaeyabelia,” jaitsi pijatuxanenë. Nexata pacuenia pijatuxanenë pepëya pecobecovë petocanajetabiabinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi matatoxenetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaitsi pijajivijavabelia:

—Pacamuxujiobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenë pecobecovë petoevetsinë, pesivajamatabëcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenë pecapitsapaecujinaetsi, bajara pijinia pacuenia paxamë ata athëbëtsia paxainaename papecasivajamatabëcuene xanepaenaevi. Nexata pamatacabi patëpame, itsajota apo panamatavenonaemë palata, Dioso pacacopiapitsiana apo pevereverecaebonëjavatatsia, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanë pecobecovë, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanë pecobecovë, bajarapajivi bijiaya toevetsipa ayaijava ata. ¹¹ Itsanë pecobecovë, mapanacuapijicueneje, palata ata, xaniavaetsia itsa apo patoevetsimë tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxenetsiaje. ¹² Itsa xaniavaetsia apo patoevetsimë tsipae itsanë pecobecovë, nexata pitsijava picani pacaevetsiaexana, bajarapitsijava itsajivi ata apo

pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anianëbeje pijatuxanenëbeje. Caenëjavabelia jitsipaejitsipa petonacuenebijava. Itsanëjavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaeivi, jumetaeyena Jesús petsipaebilivaisi pijajivijavabelia. Nexata fariseovi jume-capocaponatsi Jesús. ¹⁵ Jesús nexata jumaitsi fariseovijavabelia:

—Paxamë pajitsipabiabame jivi pejumaitsinexa paxamë yabara: “Fariseovi raja pexaniajamatabëcuenevi,” pejainexa. Itsiata baitsi jane Dioso pacajamatabëcueneypëtane pexaniajamatabëcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinëta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanialivaisi tsipaebaponajë. Tsipaebaponajë Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinëta najumecopata, bajarapacuenia apo vereverecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinë pijava pexu-abiyaniva yabara pelivaisi
(Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponë pijava xuaba, nexata icatsia itsava itsa pita, bajara-ponë pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxë bajaraponë pexuabiva pepo pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajërëta, pova abaxë Dioso tanetsi itsanë pepo pijavacuenia, jai Jesús fariseovijavabelia.

Bitso riconë Lázaro beje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaiti mapacueniaje:

—Bitso pexainaenë, riconë, ponapona. Daxitamatacabi naxatababiaba bitso pexaniaviriajavanë. Pexaejava, pexaniaviriajava, xaeyabiaba. ²⁰ Riconë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiobinë, Lázarovënënë, boquecabiaba. Lázaro daxitanë perabëtsabana. ²¹ Lázaro picani jamatabëxaeyabiaba riconë pexaeyabiabijavata piothopaepërë mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. ²² Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinë petēpaecujinae ponapona. Bajaraxuacujinae riconë ata tēpa. Mëthëtatsi. ²³ Riconëmi petēpaecujinae pata petēpaevi pepatabiabinacuayabelia. Nexata bajarapanacuata riconëmi bitso navixaetaeya bejiobi tsaponapona. Nexata riconëmi athëbëa benaëcotsia. Tajëtatsia taenuta Abraham penucaejava. Lázaro nucaya Abraham pemuxunenetatsia. ²⁴ Nexata riconëmi vavajai. Jumaiti Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarëtocainejebiaexanaejitsia. Bitso jamatabëfaenajë mapatajutaje,” jai riconëmi. ²⁵ Nexata Abraham jumaiti riconëmijavabelia: “Tamomo, najamatabënapire. Pamatacabi pinaena abaxë asaëmë tsaponapona nenaexanaeirata, ëpexaniacuene picani xainame. Lázaro pijinia pamatacabi abaxë asaë tsaponapona, bitso picani bejiobi. Itsiata juya mapamatacabije pexaniacuenia majotaje catsuponapona. Xamë biji navixaetaeya ponaponame. ²⁶ Itsajivi jamatabëponae ata bajarabereca, acuenebi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamë ata apo pacacajëpae panepanepaenexa mabetsinaje,” jai Abraham. ²⁷ Nexata icatsia riconëmi jumaiti Abrahamjavabelia: “Amo

Abraham, pexaniacuene cavajētatsi. Tonajumeitorobianame Lázarota taxa pijaboyabelia. ²⁸ Bajarajotalia xainajē cinco ponēbeje tajuyapijivi. Xaniavaetsia Lázaro tsipaebiana. Muxujiobiana bajarapamonae ata peponaeyaniva mapanavixaetaeyabiabinacuaya berenaje,” jai riconēmi Abrahamjavabelia. ²⁹ Nexata icatsia Abraham jumaitsi riconēmijavabelia: “Bajarapamonae baja xaina Moiséspijinē peyaquinaelivaisianē. Diosojumepaebivimi profetavi ata peyaquinaelivaisianē ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovēnētsiana bajarapamonaemi peyaquinaelivaisianē,” jai Abraham riconēmijavabelia. ³⁰ Riconēmi icatsia jumaitsi Abrahamjavabelia: “Jume raja. Apo jumecovēnētsi tsane cajena bajarapalivaisianē. Itsiata itsajivi itsa asaē tsane petēpaecujinae penaviatsinexa pecovēyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabēcuenepēnēyorotsiana Diosojavabelia,” jai riconēmi Abrahamjavabelia. ³¹ Nexata icatsia Abraham jumaitsi riconēmijavabelia: “Nejuyapijivi itsa apo jumecovēnētsi Moiséspijinē peyaquinaelivaisianē, Diosojumepaebivimi profetavi peyaquinaelivaisi ata, nexata pajivi asaē petēpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovēnētsi tsipae bajarapajivi ata,” jai Abraham riconēmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabēcuenējēbjitsiatsi pibisiacuene pexanaenexa yabara pelivaisi

(Mt 18.6-7, 21-22; Mr 9.42)

¹ Jesús jumaitsi pijajivijavabelia:

—Xanē tajajivixae, itsamonae jamatabēcuenējēbabiabianatsi pibisiacuene pexanaenexa. Nexata itsamonae pejamatabēcueneta tajajivi pibisiacuene exanaena. Nexata pajivi pejamatabēcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijcuenia Dioso naneconitsiaexanaenatsi.

² Itsamonae Dioso pejumecovēnētsivi, abaxē bepejevaxijamatabēcuenē xaina Dioso pejumecovēnētsijava yabara. Nexata apo ajamatabēcuenesaē. Nexata pajivi tajajivijavabelia pibisiacuene jamatabēcuxanaeyaexana, abaxē tajajivijavabelia pibisiacuene exanaeyaexanaenejeva, bajarapajivi bevēsicētatsi ibotoxanetojavabelia. Nexata

bजारपजिवि यामाëया, ibotoxaneto yajava, bexuarecatsi pucaxaneto tuatuajëareca. Bजारपacuena bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia. ³ Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanë Dioso panenajuajumecovënëtsivi pibisiacuene itsa pacaexanaena paxamëjavaberena, bajaraponë xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajaijumeta itsa pacanavajunupaebiana pecopatsijavanexa bajarapacuene, pajamatabëcuenecaevianame pibisiacuene papecaexanaejava. Pabarajamatabëcuenexanepanaename bajaraponë. ⁴ Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajaijumeta itsa pacanavajunupaebiana pecopatsijavanexa bajarapacuene, itsiata pajamatabëcuenecaevianame. Pabarajamatabëcuenexanepanaename bajaraponë, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaëjëpa daxitacuene taexanaenexa,” nejaitsabiabijava orijibia patacajumecovënëtsinexa, jai Jesús pijaapóstolevi.

⁶ Nexata Jesús jumaitsi pijaapóstolevijavabelia:

—Tsiquirijavayo ata xanë yabara itsa pajamatabëjumaitsimë tsipae: “Xaniajai cajena. Jesús caëjëpatsi daxitacuene pexanaenexa,” itsa pajamatabëjamë tsipae, nexata paxamë ata pacacaëjëpaejitsipa ayaicuene paneexanaenexa. Nexata itsa pajumaitsimë tsipae mapanaejavaxanetojavabeliaje: “Yatabutopaya natixire. Nucaename pucaxaneto tuatuajëtalia,” itsa pajamë tsipae, nexata naejava ata pacajumecovënëtsipa cajena, jai Jesús pijaapóstolevijavabelia.

Pacuenia itsajivi pijatuxanenë pitorobicueniatsi toexanabiaba yabara pelivaisi

⁷ Jesús icatsia jumaitsi pijaapóstolevijavabelia:

—Paxamëyajuvënënë xainaejitsipa pijajivitonë. Nexata itorobijitsipa petonacuenebaponaponaenexatsi. Nexata bajaraponë pijatuxanenë ira petocueponaponaecujinae, patsipa pijatuxanenë pijaboyaberena. Itsa jume, baca peto-
evetaponaecujinae patsipa. Nexata paxamëyajuvënënë

petuxanenëxae, pijajivitonëjavabelia apo jumai tsipae: “Jone-mena baja. Ecare nexaejava tacarajutsinexa,” apo jai tsipae pijajivitonëjavabelia. ⁸ Jume baja cajena. Biji rajane jumai tsipae pijajivitonëjavabelia: “Netoexanare taxaejavanexa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia. ⁹ “Xanepana rabaja. Pexaniacueene bitso netoexaname,” apo jai tsabiabinua pijajivitonëjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponaponae. Nexata pacuenia pijatuxanenë itorobatsi, bajaraponë exanabiabijitsipa. ¹⁰ Bajarapacuenia paxamë ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë: “It-sajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijaapóstolevijavabelia.

Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitajarababeje, bajaraxuayo Jesús najetaruca. ¹² Itsa baja Jesús patsijitsia tsiquiritomarayojavabelia, mataenenatsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaothopatsi. ¹³ Bajarapamonae ayaijumeta jumaiti Jesúsjavabelia:

—¡Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaiti bajarapamonaejavabelia:

—Panaitajëtsianame sacerdotevijavabelia papecaperabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaejavata pepatsinexa sacerdotevijavabelia, namutua baja perabëxanepananajetarubena. ¹⁵ Daxita bajarapamonae peperabëxanepanaejava itsa tane, nexata caenë saya bajarapamonaeayajuvënënë naviateca Jesúsjavabelia. Bajaraponë namutua ayaijumeta Diosojavabelia jumai tsanajetaruca: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” jai tsanajetarucae bajaraponë Diosojavabelia.

16 Bajaraponë itsa pata Jesúsjavabelia, pematatabcabëta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitaneyavamivecua, jai Jesúsjavabelia.

Bajaraponë Samaria nacuapijinë. 17 Nexata Jesús jumaitsi bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanjë. ¿Detsa meta xuajitsia daxita apo najuapatsi? 18 Maponëje caenë saicaya nacuapijinë, apo judionë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitaneyavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinë yabara.

19 Nexata Samaria nacuapijinëjavabelia Jesús jumaitsi:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaejavanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi

(Mt 24.23-28, 36-41)

20 Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota. 21 Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamë tuatujëta, jai Jesús fariseovijavabelia.

22 Nexata Jesús itsamatacabi mapanacuaje pevetsijavanexa, tajëvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaename patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevetsicuene. 23 Nexata itsamonae pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame.

Pëtsa pamuxunaponamenua bajarapamonae pepëta.
²⁴ Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁵ Itsiata copiaya ayaicuenia navixaetaeya bejiobinë tsane. Mapanacuataje pejinavanapaevi apo nejumecovënëtsinua tsane Dioso athëbëvetsica taneitorobinëcuenetsica. ²⁶ Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, jemata icatsia patsianicajë. ²⁷ Bajayata pamatacabi Noépijinë ponapona, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bजारapamonae jamatejema saya jinavanapa. Nexata bajarapamatacabi Noépijinë ëpijamonae pinijibarcojavabelia barëjunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinë ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianë. Pijabonë ata exanapona. ²⁹ Itsiata baitsi jane pamatacabi Lotpijinë Sodomatomara vecuapitsapa, jemata athëbëvetsica pinijicuenia isotonë othopaica. Othopaica pitarutsiibotonënuu. Nexata daxita Sodoma tomarapijivimi tajuaitsi. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanë, Daxitajivi Pematapijinënë, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

³¹ Icatsia Jesús jumaitsi pijajivijavabelia:

—Pamatacabi xanë jemata patsianicajë, itsajivi ata pëtsa sivanajamatabëxaina mapanacuapijicueneje. Nexata pajivi athëbëyo bojumatatsia ecaya, perunaecujinaetsica, pëtsa sivanajamatabëxaina pijaboënëalia pebobenaevanë pejutsinexa. Pajivi pijinia pijapabita nacuenebaponapona, pëtsa najamatabëxaina penaviatsinexa pijaboyabelia. ³² Panajamatabënapire pacuenia bajayata Lotpijinë pijavami exanatsi. Lotpijinë pijavami pesivanajamatabëxainaxae mapanacuapijicuene, napijivitaeyojopa. Nexata baja tëpa. ³³ Pajivi exanaponapona penatojitsipaecuenia, apo xainae tsane matacabi apo peverevereceaeva. Itsiata baitsi jane pajivi xanë tajamatabëcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereceaeva, jai Jesús

pijajivijavabelia.

³⁴Icatsia Jesús jumaitsi tajëvelia pijajivijavabelia:

—Xaniajanë pacuenia pacatsipaebijitsiatsi. Pamatacabi patsianicajë, bajarapameravi anijanëbeje majitanucaenabeje caecamata. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatabuatsianatsi. ³⁵Anijavabeje pijinia najuacuabanucaenabeje caejavata. Nexata tanejumecovënëtsiva pitsianatsi. Apo tanejumecovënëtsiva copatanutsianatsi. ³⁶Anijanëbeje pijinia najuanacuenebanucaenabeje pabita. Nexata tanejumecovënëtsinë pitsianatsi. Apo tanejumecovënëtsinë copatanutsianatsi, jai Jesús tajëvelia pijajivijavabelia.

³⁷Jesús nexata pijajivi itsa jumetane bajarapacuenia Jesús pejumaitsijava, bajarapamonae jumaitsi Jesúsjavabelia:

—Patajatuxanenë, ¿detsa jota bajarapacuenia yajuvënëpitsianatsi? jai Jesús pijajivi.

Nexata Jesús jumaitsi tajëvelia pijajivijavabelia:

—Pacuenia quequeremonae bepíjia yapëtane itsajota petuxutsaebinë boca bajarajota penacaetuatsinexa, bajara pijinia pacuenia daxita tajajivi bepíjia yapëtaena tapatsijavatsica penacaetuatsinexa xanëjavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznë pelivaisicuenia yabara pelivaisi

¹Jesús pijajivi livaisi tsipaeba mapacueniaje Jesús pijajivi jamatabëcuenecueranaenejeva pevajëtabiabinexa Diosojavabelia. ²Nexata Jesús jumaitsi pijajivijavabelia:

—Tomarata ponapona jueznë. Bajaraponë pevetsinë jivi penaneconitsiaexanaecuene. Bajaraponë Dioso apo cujunavi. Jivi ata apo cujunavi. ³Bajarapatomarata ponapona pamona pevecuatëpaevatsi. Bajarapova ponabiaba jueznëjavabelia pejumaitsabiabinexa: “Naneconitsiaexanare ponë xanëjavaberena naneconita. Naneconitsiaexanare pacuenia caitoroba nijatuxanenë bajarapitsivi nenaneconitsiaexanaenexa,” pejaitsabiabinexa, bajarapova ponabiaba jueznëjavabelia. ⁴Itsiata abaxë bajayajebi jueznë apo jamatabëcueneyavenonae bajarapova. Belia baja hexëa jueznë jejai. Nexata jueznë jamatabëjumaitsi: “Dioso picani apo cujunavinë. Jivi ata picani apo cujunavinë. ⁵Itsiata mapovaje tanejamatabëitonotabiabixae, yavenonae najë pacuenia nitorobabiaba. Nexata baja bajarapova

matavējēa apo patabiabirena tsane xanējjavaberena tanecueranaeyaexanaenexa,” jamatabējai jueznē, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabēcueneitsi jueznē, pibisiajamatabēcuenenē ata. Yavenona bajarapova asaēya pevajēcabiabixaetsi. ⁷ Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajētabiabiana Diosojavabelia matabijebi, meravi yajava. Dioso cajena apo cuenenajematsi tsane itsa yavenonaena pijajivi. ⁸ Xaniajanē pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuene pexanaeyanivatsi. Pamatacabi xanē, Daxitajivi Pematapijinēnē, icatsia patsianicajē, ¿caxitajarabianajē tsaja abaxē tanecopi-aevetavanapaevi? jai Jesús pijajivijavabelia.

Pacuenia itsanē fariseonē, itsanē impuestomatamo gobierno pejamatabēcuene pematamoyanijobinē, vajētabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabējumai tsabiabi: “Vaxaitsi cajena pexaniajamatabēcuenevitsi itsamonaevecua. Itsamonae bitso nacavecuapibisiajamatabēcuenevi,” jamatabējai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

¹⁰ —Anijanēbeje tsiabeje templobojavabetsia pevajētsinexabeje Diosojavabelia. Caenē fariseonē. Itsanē gobierno pejamatabēcuene impuestomatamo pematamoyanijobabiabinē. ¹¹ Nexata fariseonē

nuca. Fariseonē pevajētsijavata Diosojavabelia, bitso bepexaniajamatabēcuenenē nataeya jumaitsi mapacueniaje: “Diosomē, pexaniajamatabēcuene carajutatsi. Tsipaji pacuenia itsamonae jamatabēcueneitsi tsenae, bajara xanē apo jamatabēcueneitsinē. Yamaxēitojorobiaya jivi apo tavecuanacobetoxotsinē. Apo tacujirubejenē cajena. Apo tajaitsinē itsava tajavavecua. Pacuenia maponēje gobierno pejamatabēcuene impuestomatamo pematamoyanijobabiabinē jamatabēcueneitsije, bajara xanē apo tajamatabēcueneitsinē. ¹² Caesemana canacujitsia, anijamat-acabibeje, najamatabēcuenexaniavaetsiaya ponaponabiabajē xaenejevanē taxaejava tacavajētsinexa xamējavabelia. Daxita pacuene nacanabajē, diez xuabejeyajuvēnējjava, caejava, xamējavabelia carajutabiabatsi ofrendacuenia,” jai mapacueniaje fariseonē templobota pevajētsijavata Diosojavabelia. ¹³ Nexata ponē gobierno pejamatabēcuene

impuestomatamo pematamoyanijobabiabinë, pevajëtsijavata Diosojavabelia tajiyo nucalia piauraxae. Athëbëabetsia ata penavëyotsijava cujunava. Namëpabëbenuca pecobeta pejamatabëbëjaixae pibisiacuene pexanaeneconi yabara. Nexata bajaraponë Diosojavabelia pevajëtsijavata jumaitsi mapacueniaje: “¡Diosomë, nitaxutotsoniataema! ¡Pibisiacuene cajena bitso xanë exanabiabajë!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaitsi bajarapamonaevjavabelia:

—Xaniajanë pacuenia pacatsipaebijitsiatsi. Ponë gobierno pejamatabëcuene impuestomatamo pematamoyanijobabiabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeneconimi. Nexata baja bajaraponë naviata pijaboyabelia planeconijibinë. Ponë fariseonë, navajëtsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaevvecua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaevvecua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

Pacuenia Jesús jumaitsi pejevaxijivixijavabelia yabara pelivaisi

(Mt 19.13-15; Mr 10.13-16)

¹⁵ Itsamonaev pejevaxijivixi tocapataponatsi Jesús pecobeta pejayataponaenexa. Nexata Jesús pijajivi itsa tane bajara-pacuenia, Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

¹⁶ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonaev jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁷ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonaev jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonaev jumeabinejeva xaniavaetsia jumecovënëtsiana Dioso pejumelivaisi,

bajrapamonae jonena Dioso pijanacuayabetsia. Itsiata baitsi jane pamonaē Dioso pejumelivaisi jumeaebinejeva xaniavaetsia apo jumecovēnētsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevējēato, bitso pexainaenē, cuaicuaijai Jesúsjavabelia yabara pelivaisi

(Mt 19.16-30; Mr 10.17-31)

¹⁸ Pevējēato, judiōvi pevetsinē, yanijoba Jesúsjavabelia. Pevējēato jumaitsi mapacueniaje:

—Petuxanenē, pexaniajamatabēcuenenēmē, ¿detsa pitsicuene exanaenajē taxainaenexa matacabi apo pevereverecaejava? jai pevējēato.

¹⁹ Nexata Jesús jumaitsi pevējēatojavabelia:

—¿Detsa xuajitsia: “Pexaniajamatabēcuenenēmē,” nejamē? Ajibi raja itsapebi ata pexaniajamatabēcuenenē. Caenē rabaja Dioso pexaniajamatabēcuenenē. ²⁰ Xamē baja yapētaneme pacuenia Dioso pejumelivaisita itoroba jivi pejumecovēnētsinexa. Jumaitsi mapacueniaje: “Pētsa jaitame itsapetiriva nijavavecua. Pētsa beyaxuabame jivitonē. Pētsa nacobetoxotame. Pētsa itsamonae pexanaejava yabara najumetsēnētsiaya paebame. Axa yaiyataema. Ena ata yaiyataema,” jai Dioso pejumelivaisita. Xamē baja yapētaneme bajarapalivaisi, jai Jesús pevējēatojavabelia.

²¹ Nexata pevējēato jumaitsi Jesúsjavabelia:

—Daxita rabaja bajarapalivaisianē jumecovēnētajē pejevaxinēnējavaveliacujinae, jai pevējēato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevējēatojavabelia:

—Abaxē raja catosaica caejava nexanaenexa. Canajere daxita nexainaevavami. Bajarapamatamomi tsicobetsanaename bepejibivi. Bajaraxuacujinae nepēnaponaename. Nexata bajarapacuenia xainaename bitso nexainaecuene Dioso pijanacuatatsia, jai Jesús pevējēatojavabelia.

²³ Bajarapacuenia Jesús itsa jumaitsi pevējēatojavabelia, nexata pevējēato bitso bejamatabējiobi tsanajetsireca. Tsipaji pevējēato daxitacuene bitso pexainaenē. Nexata pevējēato apo jamatabējumecovēnētsi palivaisi Jesús tsipaeba. ²⁴ Itsa Jesús tane pevējēato bepejamatabējiobi tsanajetsijavareca, nexata pevējēato pecovēta jumaitsi pijajivijavabelia:

—iPamonae bitso daxitacuene pexinaeivi, tsiayapēbejetsi bitso penajamatabēcuenecopatsinexa Diosojavabelia pecapanepaenexatsi Dioso pijanacuayabetsia! ²⁵ Pacuenia camello acuenebi pejonejava palutaetoitaxutovojojotualia, bajara pijinia pacuenia bitso pexainaenē acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexainaevi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacuene jivi apo caējēpaetsi pexanaenexa, bajarapacuene Dioso caējēpatsi pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnainavanapatsi, jai Pedro.

²⁹⁻³⁰ Jesús nexata jumaitsi:

—Xaniajanē pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexējavabelia petēpaecujinae ata Dioso rajutsianatsi matacabi apo peverevereaejava, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxu-abijavanexatsi yabara pelivaisi

(Mt 20.17-19; Mr 10.32-34)

³¹ Jesús itsamonaevecua ēpijajivi, doce ponēbeje, junata pimoxoyotsinexatsi. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi macuenaiaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanē, Daxitajivi Pematapijinēnē, talivaisi tajēvelia yaquina. Pacuenia nexanaejitsia, daxita bajarapalivaisi bajayata profetavimi tajēvelia yaquina. Nexata daxita pacuenia xanē talivaisi bajayata tajēvelia profetavimi yaquina, daxita jane baja bajarapacuene Jerusalén tomaratalia netocopia-patsiana. ³² Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena. Nebijataena pibisiacuenia. Nesuabiana.

³³ Nejumatitibabena penaneconitsivi pejumaconitabi-abimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

³⁴ Itsiata Jesús pijajivi apo jumeypētae pajamatabēcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsēcēnaenē, Jericó tomarapijinē, yabara pelivaisi (Mt 20.29-34; Mr 10.46-52)

³⁵ Jesús imoxoyotanajetaruca Jericótomara. Nexata namuto muxuneneta eca bitso pitaxutotsēcēnaenē, apo petaenē. Bajaraponē amoneya palata vajēcabiabeca jivijavabelia.
³⁶ Nexata bitso pitaxutotsēcēnaenē itsa jumetane jivibitsaētoxaneto pecuaicuaijai tsanajetarubenaejala namutua, bajaraponē epajunateca.

—¿Detsa xua pajaitame? jai tsecae bajaraponē.

³⁷ Nexata jivi jumaitsi bajaraponējavabelia:

—Jesús raja, Nazaret tomarapijinē, maxuayo najetarucaje, jai jivi.

³⁸ Nexata pitaxutotsēcēnaenē vavajai tsecae.

—¡Jesús, Davidpijinē pemomomē, nitaxutotsoniataema! jai tsecae bajaraponē.

³⁹ Nexata picani itsamonaē, Jesús pevajēnaeya penajetarubenaēvi, jumeitaveta bajaraponē pemoyanexa. Itsiata biji bitsoyo orijibia vavajai tsecae.

—¡Davidpijinē pemomomē, nitaxutotsoniataema! jai tsecae pitaxutotsēcēnaenē.

⁴⁰ Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsēcēnaenē, jai Jesús. Itsa baja imoxoyo tocanajetarubenatsi, Jesús jumaitsi pitaxutotsēcēnaenējavabelia:

⁴¹ —¿Detsa xua jitsipame tacaexanaenexa? jai Jesús.

Nexata bitso pitaxutotsēcēnaenē jumaitsi Jesúsjavabelia:

—Jesús, jitsipajē taitaxutoxanepanaejava, jai pitaxutotsēcēnaenē.

⁴² Jesús nexata jumaitsi pitaxutotsēcēnaenējavabelia:

—Itaxutoxanepaname rabaja. Tsipaji nesivajamatabējumaitsimē mapacueniaje: “Jesús nitaxutoxanepanaeyaexanaena,” nesivajamatabējamē, jai Jesús pitaxutotsēcēnaenējavabelia.

⁴³ Bajarapacuenia Jesús pejumaitsijavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetarucaē Diosojavabelia:

—¡Diosomē, bitso pexaniacuene netoexaname! jai tsanajetarucaē bajaraponē.

Pamonaē ata tane bajaraponē pitaxutoxanepanaejava baja, daxita bajarapamonaē ata Diosojavabelia jumai tsanajetarubenaē:

—¡Diosomë, bitso ayaijamatabëcuenenëmë! jai tsanajetarubenaë Diosojavabelia.

19

Pacuenia nabarëcuaicuaijaibeje Jesúsbeje Zaqueobeje yabara pelivaisi

¹ Jesús najetaruca Jericó tomarajava. ² Jericó tomarata ponapona Zaqueovënënë. Bajaraponë gobierno pejamatabëcuene impuestomatamo pematamoyanijobabiabivi penamatacaitorobinë. Zaqueo bitso pexainaenë pexainaejava. ³ Nexata Zaqueo jamatabëtane Jesús. Itsiata apo caëjëpaetsi petaejava. Tsipaji Zaqueo petoyaecaenëyo. Jivibitsaëtoxaneto matatoyorotsia nubenatsi Jesús Zaqueo pevajënae. ⁴ Nexata Zaqueo cujinaeponalia jivibitsaëtoxaneto pevajënaeyabelia Jesús peponaenamutuabelianexa. Junaya naejavatsia athëbëvetsica petaenucaenexa Jesús penajetarucajava. ⁵ Nexata Jesús namutua itsa imoxoyotanajetaruca, itsa ponaeta Zaqueo athëbëyo nucaya, bajaraponaejavatsia Jesús naëcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja pat-sijitsianë, jai Jesús.

⁶ Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús. ⁷ Daxita pamonaë Jesús matatoyorotsia najetarubenatsi, itsa tane bajarapacuene, Jesús baracuaicuaijaitsi tsanajetarubenaë. Èpamonaë najumaitsi tsanajetarubenaë Jesús yabara:

—Jesús raja naponaponaëjitsia Zaqueo pijabota, caranata pibisiacuene pexanaenë pijabota, najai tsanajetarubenaë bajarapamonaë Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenë nejumetaema. Tsatsianejë namatajëpaeya taxainaijava tarajutsinexa bepejiobivijavabelia. Pamonaë yamaxëitojorobiaya vecuanotajë tamatamoyanijobijavata impuestomatamo, bajarapamonaë tocanaviabianajë. Nexata tayamaxëitojorobijamatabëcuene bajarapamonaë rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.; ⁹ Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonaë yajava, nijaneconivecua pecacapanepaejavanexa Diosojavabelia. Tsipaji baja nijamonaë barëjumecovënëtame Dioso. Zaqueo, xamë Abrahampijinë pemomo

atamē, abaxē picani Dioso apo catae Abrahampijinē pemomomēcuenia. Itsiata baitsi jane ajena baja Diosojavabelia nenajamatabēcuenecopatsixae, Dioso jane baja catane pepacuene Abrahampijinē pemomomēcuenia. ¹⁰Xanē, Daxitajivi Pematapijinēnē, sivapatajopajē tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

Oro palatanēanē, diez ponēbeje, yabara pelivaisi
(Mt 25.14-30)

¹¹ Zaqueo pijabota itsamonae namuxunaevetena Jesús petsipaebilivaisi Zaqueojavabelia. Pamonaē namuxunaevetena, jamatabēcuenenavēxaniabiaya jamatabējumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabējai tsenae bajarapamonae. Bajarapacuenia jamatabējumai tsenae tsipaji baja Jerusaléntomara imoxoyo ecalia Jesús pepatsinexa. ¹² Bajaraxuata Jesús livaisi tsipaeba bajarapamonaejavabelia. Jesús jumaimatabēcuenenavēxaniabiaya jamatabējumai tsenae: “Imoxoyo rabaja ecaliatsi mapacueniaje:

—Petuxanenē ponapona pijanacuata. Nexata pepo nacuaevetsinē tonajumeitorobarenatsi tajēnacuaaverena. Petonajumeitorobijumetsirena jumaitsirena mapacueniaje: “Ponaename maberenaje nacua nevetsinēnexa tacaexanaenexa nijanacua nevetsinexa. Bajaraxuacujinae naviatsiaremelia nijanacua jane baja nevetsinexa,” jaitsirena petonajumeitorobijumetsirena. ¹³ Nexata

petuxanenē peponaevajēnae, junata pijajivi, diez ponēbeje. Nexata petuxanenē pijajivi evetsiaexana pijapalatanēanē, oronēanē, bitso penamatamotsinēanē. Caenē canacujitsia caepalatanē evetsiaexanapona. Nexata petuxanenē

pijajivi jumaitsi pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayajjava tsaponae tsane tajapalata,” jai petuxanenē pijajivijavabelia. Bajaraxuacujinae pona jane baja.

¹⁴ Itsiata baitsi jane pevetsinacuatanaexa pejinavanapaevi, bitso itoyatsi petuxanenē. Nexata bajarapamonae petuxanenē pecovēvelia itsamonae itorobalia, itsajotalia petuxanenē nacua pevetsinēnexa exanaejitsiatsi, bajarajotalia pejumaitsinexa: “Apo pajitsipaenē bajaraponē patanevetsinēnexa patajanacuata,” pejainexa petuxanenē yabara. ¹⁵ Itsiata baitsi jane petuxanenē pijanacua baja pevetsinēnexa exanatsi. Nexata baja

naviarena pijanacuayaberena pevetsinexa jane baja pijanacua. Nexata baja parena. Nexata petuxanenē pepatsicujinaerena, junata icatsia pijajivi peyapētaenexa jane baja pacuenia caenē canacujitsia pijapalatanēanē pijajivi tocanacuenebatsi pecovēta. ¹⁶ Copiaya pepatsinē jumaitsi pijatuxanenējavabelia: “Tajatuxanenē, nijapalatanē, taneevetsiaexanaenēmē, catopitsapa baja diez ponēbeje. Nexata baja daxitata once ponēbeje,” jai. ¹⁷ Nacuaevevtsinē nexata jumaitsi pijajivitonējavabelia: “Xanepana rabaja. Xaniavaetsia netoebetaponaponame. Tsiquirijavayo ata xaniavaetsia netoebetame. Nexata icatsia diez patomarabeje netoebetaponaponaename,” jai nacuaevevtsinē pijajivitonējavabelia. ¹⁸ Icatsia itsanē pijatuxanenē pijapalatanē petoevetsinē pata. Nexata bajaraponē jumaitsi: “Tajatuxanenē, nijapalatanē, taneevetsiaexanaenēmē, catopitsapa baja cinco ponēbeje pematatsēnēa,” jai. ¹⁹ Nacuaevevtsinē nexata jumaitsi pijajivitonējavabelia: “Xamē icatsia cinco patomarabeje netoebetaponaponaename,” jai nacuaevevtsinē pijajivitonējavabelia. ²⁰ Nexata icatsia itsanē pijatuxanenē pijapalatanē petoevetsinē pata. Jumaitsi pijatuxanenējavabelia: “Tajatuxanenē, mara nijapalatanēje, taneevetsiaexanaenēmē. Pañuelopanayota yamatacētsiaya catoebetatsi. ²¹ Bajarapacuenia catoebetatsi tsipaji cacujunavatsi. Nijamatābēcuenesaēnē. Xamē apo itaxuto-bejiobiataeyabiabimē nijajivi, pamonaē catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenē pijapalatanē petoevetsinē. ²² Nexata nacuaevevtsinē jumaitsi pijajivitonējavabelia: “¡Acujirubejemē xamē! Bijiaya netoebetame. Naneconitame bajarapacuenia tanejumatšijavamē yabara. Xamē baja cajena yapētaneme tajamatābēcuenesaēnējava tajajava yabara. Pacuenia itorobabiabajē tajajivi tanetopitsinexa apo tajajava ata, yapētaneme baja. Pacuenia ata itorobabiabajē tanetonotsinexa apo taubiaexanaejava ata, yapētaneme baja. ²³ Xanepanaejitsipa xamē banco pevetsivi itša netocanacuenebiaexanaejitsipame tajapalatanē. Nexata banco pevetsivi aeconoxae tajapalatanē netocanaviatsipa. Nexata pecacovaetsijamatābēcuenē itsajava palata netoyajavacanaviatsipa,” jai nacuaevevtsinē pijajivitonējavabelia. ²⁴ Nexata nacuaevevtsinē jumaitsi pijajivijavabelia: “Tajapalatanē panetovecuapire maponēje. Nexata juya parajure ponē xaniavaetsia netoeveta tajapalatanē. Bajaraponē xaniavaetsia netocanacueneba. Nexata baja pematatsēnēa diez papalatanēbeje

netopitsapaeyaexana. Nexata taevetsiaexanaenëta once ponëbeje,” jai nacuaevetsinë. ²⁵ Nexata nacuaevetsinë pijajivi jumaitsi pijatuxanenëjavabelia: “Patajatuxanenë, bajaraponë xaina baja ayaijava. ¿Detsa xuajitsia rajutsijitsiamë pematatsënëa?” jai pijajivi. ²⁶ Nexata nacuaevetsinë jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsënëa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaë, pamonaë picani apo jitsipae mapanacua taevetsijavaje, bajarapamonaë pacaponaremena maberenaje patanevecuaverebiabinexamë taitabëta,” jai nacuaevetsinë pijajivijavabelia, jai Jesús livaisi petsipaebijavata Zaqueo pijabota.

Pacuenia Jesús pata Jerusalén tomarata yabara pelivaisi (Mt 21.1-11; Mr 11.1-11; Jn 12.12-19)

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. ²⁹ Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonëbeje bajarapatomarayobejejavabelia. ³⁰ Jesús jumaitsi pijajivitonëbejejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamebeje tsane. ³¹ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona,” pajamëbeje tsane, jai Jesús pijajivitonëbejejavabelia.

³² Nexata Jesús pijajivitonëbeje liabeje. Pacuenia Jesús jumaitsi, bajarapacuenia caxitajarabanucabeje burro. ³³ Nexata itsa isinabeje, burro pexainaevi jumaitsitsibeje:

—¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonëbeje jumaitsibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaibeje.

³⁵ Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya. ³⁶ Jesús itsa yanajetaruca burrota, panamutovelialia

Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanë namutua tsivajënaeyerequejebaponatsi yayyataeya pecopiapitsinexatsi. ³⁷ Patsutojumata olivonaenë nubena, bajarapatsutojavatsica namuto namatononocarucaica. Nexata bajarapanamutu-atsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaëtoxaneto, Jesús pijajivi yajava, vavajai tsanajetarubenaë. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubenaë bajarapamonae.

Bajarapacuenia vavajai tsanajetarubenaë tsipaji bajarapamonae cujirutaeyabiaba Jesús Dioso pesaëta ayaicue ne pexanaponaejavanë. ³⁸ Bajarapamonae jumai tsanajetarubenaë Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaeya jinavanapa daxita pamonaë athëbëtatsia jinavanapa! ¡Pinijicue ne rabaja exana Dioso! jai tsanajetarubenaë namutua daxita Jesús pijajivi.

³⁹ Nexata fariseovi najetarubena bajarapajivibitsaëtoxaneto tuatujëta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

⁴⁰ Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaeje moya itsa najetarubenaëjitsipa, nexata juya ibotonë vavajai tsenaë tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacue ne jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacue ne. ⁴³ Nexata tocopiapatsianatsi pibisiamatacabi. Pijavajabitsaë tsimaxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë. ⁴⁴ Nexata irabetsica topenetsianatsi pijabonëmi. Nexata daxita Jerusalén

tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo boca tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinu, yabara pelivaisi

(Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivinu. Nexata daxita bajarapamonae Jesús pitsapaeyaexana templobovecua. ⁴⁶ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivinu, tomaraevetsivinu, najumejaita picani Jesús pebeyaxuabinexatsi. ⁴⁸ Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yaiyatanetsi. Jesús jivi petsipaebilivaisianë xaniavaetsia namuxunaevetabiabatsi.

20

Pacuenia Jesús caëjëpatsi daxitacuene pexanaenexa yabara pelivaisi

(Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivinu, judíovi pijaancianovinua. ² Nexata bajarapamonae jumaitsi Jesúsjavabelia:

—Panetsipaebare cajena. ¿Jipatsa pejamatabëcueneta pecanajetabiabivi, pecomuacabiabivinu, capitsapame mapatemplobovecuaje? jai.

³ Jesús nexata jumaitsi bajarapamonaejavabelia:

—Xanë copiaya caejumeyo pacayanijobianatsi patane-jumecanaviatsinexamë. ⁴ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

⁵ Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsi-paetsi, nexata Jesús nacajumai tsipae: “¿Detsa nexata xua-jitsia apo pajumecovënëtsimë Juanpijinë pepaebilivaisianë?” nacajai tsipae. ⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata dax-itajivi anaeya ibotonëta nacatseconaejitsipa vajanacabeye-jebinexa. Bajarapacuenia nacabeyejebijitsipa tsipaji dax-itajivi Juanpijinë yabara sivajamatabëjumaitsi: “Juanpijinë raja pepacuenë Diosojumepaëbinëmi,” sivajamatabëjai, najai sacerdotevi penamatacaitorobivi, judíovi pecujarubivinua, judíovi pijaancianovinua.

⁷ Nexata saya bajarapamonae jumaiti Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

⁸ Nexata Jesús jumaiti bajarapamonaejavabelia:

—Nexata xanë ata apo pacatsipaëbi tsanetsi ponë nitoroba tacapitsapaenexa bajarapamonae templobovecua, jai Jesús.

Pacuenia exana piajamatabëcuenebejevi, itsanë pijauvabacabo petoëvetsivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaëbijava jivijavabelia. Jumaiti mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae itsamonae evetsiaexana pijauvabacabo. Jumaiti bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoëvetsivitsijavabelia. Nexata uvabacabo pexainaenë tajënacuyabelia pona bajayajebi piajibitsarucaenexa. ¹⁰ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoëvetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ¹¹ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi.

Bajaraponē ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliatsi. ¹² Itsiata uvabacabo pexainaenē icatsia itoroba itsanē pijajivitonē. Icatsia bajaraponē ata tomatajorobabiatsi. Uvabacabopēnyabelia xuabatsi.

¹³ 'Nexata uvabacabo pexainaenē jamatabējumaitsi: "¿Detsa nexata xua exanaenajē? Itorobianajē cajena taxēnato, tasivanē. Itsa raeta itorobianajē taxēnato, bajarapamonae netoyaiyataena," jamatabējai uvabacabo pexainaenē. ¹⁴ Itsiata baitsi jane uvabacabo petoevetsivitsi, uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonae najumaitsi: "Mara ponėje itsamatacabi paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi. ¹⁵ Nexata uvabacabo pexainaenē pexēnato ata tovaetabatsi. Caponaliatsi bajarapauvabacabo pepēnyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainaenē pijauvabacabo petoevetsivitsijavabelia? ¹⁶ Uvabacabo raja pexainaenē, patsiarena. Verebiabiana daxita bajarapamonae. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaitsijava, bajarapamonae jumaitsi:

—¡Dioso pētsa copata bajarapacuenia pexanaenexa paxanējavaberenal jai bajarapamonae.

¹⁷ Nexata Jesús asaēyata naēcota bajarapamonaejavabelia. Jumaitsi bajarapamonaejavabelia:

—Payapētaneme rabaja pacuenia Dioso pejumelivaisibaxutota tajēvelia jumaitsi xanē yabara. Iboto pelivaisicuenia Dioso pejumelivaisibaxutota jumaitsi xanē yabara mapacueniaje:

Paiboto itsamonae boexanaevi naitaxutojematabuatsiana
 petsitaabejexaetsi itajara, bajarapaiboto itsanē
 pitsiana. Nexata bajarapaibotota xaniavaetsia
 nayaētsiana botabu daxita itsaibo matatoxenetsia,
 jai tajēvelia Dioso pejumelivaisibaxutota xanē yabara.

'Bajarapacuenia tajēvelia Dioso pejumelivaisibaxutota itsa jumaitsi, judíovi penamatacaitorobivi apo tanejume-covēnētsijavanexa yabara jumaitsi. Dioso taneitapetsijava daxitajivi tacapanepaenēnexa yabara ata jumaitsi, jai Jesús.

18 Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenenë, bajarapamonae bitso bejamatabëjiobi tsane apo tanejume-covënëtsixae. Pacuenia ibotojumata pefirapecaejiivi, itsa tsapatcatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuene naxu-abiana daxitamatacabijavabelianexa. Pacuenia iboto pemat-acënëbinëtsi apo asaë, bajara itsane, jai Jesús bajarapamonae-javabelia.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

(Mt 22.15-22; Mr 12.13-17)

19 Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapëtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tsipaji cujunava jivi. ²⁰ Nexata itsamatacabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuaevetsinëjavabelia peneconitsinexatsi. ²¹ Nexata bajarapamonae jamatabëcueneëjëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacuene pexaniajailivaisi netsipaebijava. Daxitajivi, ricovi ata, bepejiobivi ata, najëpaeya yaiyataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

²³ Itsiata baitsi jane Jesús jamatabëcuenyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcueneëjëbame?

²⁴ Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënuu, ruca mapapalatanëyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënuu, jai.

²⁵ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumenaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejume-naviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Mr 12.18-27)

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

²⁸—Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁹ Nexata jinavanapa ënacaemonae, siete ponëbeje. Pepo matapijinë copiata nacojioba. Nexata bajaraponë pijava vecuatëpa pexi xainaenejeva. ³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. ³¹ Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bajarapacuenia daxita siete ponëmibeje tëpa. Verevereca baja.

³² Belia baja bajarapova ata tëpa. ³³ “Jivi raja petëpaecujinae,

Dioso icatsia asaëyaexanaenatsi,” jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatacabi? Daxita pamonaе siete ponëmibeje, nacaemonaemi, pitapona picani bajarapovami, jai saduceovi Jesúsjavabelia.

³⁴ Nexata Jesús jumaitsi saduceovijavabelia:

—Aeconoxae mapanacuataje pebijivi, petiriavi ata, nacojobapona. Itsamonae pexënatoyonë pexainaevi pebijavabelia canajetapona petonacojobinexatsi.

³⁵ Itsiata baitsi jane pamonaе Dioso itapetatsi, apo pevereverecaenacuatatsia jinavanapaena. Bajarapamonaе petëpaecujinae, Dioso icatsia asaëyaexanaenatsi. Bajarapamonaе bajarapanacuatatsia apo nacojobi baja tsane. Bajarajotatsia itsajivi ata pexënatoyo apo canajetsi tsane pebijavabelia petonacojobinexatsi.

³⁶ Bajarapamonaе acuenebi tsane petëpaejava. Tsipaji bajarapamonaе jinavanapaena athëbëtatsia pacuenia ángelevi jinavanapa. Bajarapamonaе baja Dioso pexi tsane. Tsipaji baja petëpaecujinae Dioso icatsia asaëyaexanaenatsi.

³⁷ Moiséspijinë bajayata yaquina pacuenia Dioso tsipaebatsi tsiquirinaemëyo petajueyecaecotijavaverena. Nexata Moiséspijinë peyaquinaelivaisita, jumaitsi pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaexana Dioso icatsia piasaëyaexanaejavanexa petëpaevimi. Tsipaji baja Abraham peputëpae, Isaac ata baja peputëpae, Jacob ata baja peputëpae, bajarapamonaе yabara bajayata Moiséspijinë peyaquinaelivaisita jumaitsi mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. ³⁸ Bajarapacuenia Dioso pejumaitsixae, nayapëtane bajarapamonaе bajayata tēpae ata, Diosovecua apo penaxuabijava. Aeconoxae ata bajarapamonaе Dioso yajavajinavanapa athëbëtatsia. Daxita petëpaevi Dioso cajena apo tsitatëpaetsi, jai Jesús saduceovijavabelia.

³⁹ Nexata judíovi pecujarubivi jumaitsi Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinae saduceovi cjunava baja icatsia peyanijobijava Jesúsjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaitsi judíovi pecujarubivi-javabelia mapacueniaje:

—¿Detsa xuajitsia jivi apo canaējētsi Cristo Dioso pexēnatocuene? Jivi saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, saya Davidpijinē pemomo tsane,” jai tsabiabi.⁴² Davidpijinē bajayata tajēvelia pejumaitsijava Cristo yabara Salmosvēnēbaxutota, jumaiti mapacueniaje:

Dioso jumaiti tajatuxanenējavabelia: “Ecare abaxē tacujua-
nenia.⁴³ Vecatsivajēnae jumecovēnētsiaexanatsi abaxē
copiaya nijavajabitsaē nitorobicuenianexa,” jai Dioso
tajatuxanenējavabelia,

jai Salmosvēnēbaxutota Davidpijinē bajayata pejumaitsijava
Cristo yabara.

⁴⁴ Nexata Davidpijinē bajayata Cristo yabara: “Tajatux-
anenē,” itsa jai, nexata Cristo Davidpijinē apo pemomo.
Tsipaji baja cajena Cristo saicaya Dioso pexēnato, nayabara-
jai Jesús judíovi pecujarubivijavabelia, judíovi pecujarubivi
pecanaējētsinexa Cristo Dioso pexēnatocuene.

*Pacuenia Jesús tsipaeba pijajivijavabelia judíovi pecujaru-
bivi penaneconitsijava Diosojavabelia yabara pelivaisi
(Mt 23.1-36; Mr 12.38-40; Lc 11.37-54)*

⁴⁵ Itsa abaxē daxitajivi namuxunaevetatsi Jesús petsipae-
bilivaisi, Jesús jumaiti pijajivijavabelia:

⁴⁶ —Xania, panayajivitaema palivaisi judíovi
pecujarubivi tsipaebapona panejumecovēnētsianiva.
Bajarapamonae jitsipabiaba tomara tuatuajējava
piapiajavanē penaxatababiabavanapaenexa jivi
peyaiyataenexatsi. Jitsipabiabanua bitso yaiyataeya
pebajacobinexatsi callejava. Bajarapamonae itsa
najoneyabiaba judíovi penacaetuatabiabibonējava,
jitsipabiaba penaenexa pexaniavirijavanēta. Nexata
natsiitapetabiaba penaenexa peyaiyataevitsi penaenexa
petsinubijavanēta. Bajarapamonae itsa napatabiaba
fiestajava ata, jitsipabiaba penaenexa peyaiyataevitsi
penaenexa petsinubijavanēta.⁴⁷ Bajarapamonae
yamaxēitorobiaya vecuanotabiabanua pamonajivi
pevecuatēpaevanētsi pecobecovējavaxi. Bajarapamonae
itajara pinijicuenia vajēcabiaba Diosojavabelia. Itsiata pepo
pexaniajaijamatabēcueneta apo vajēcabiabi. Bajarapacuenia
vajēcabiaba saya jivi petaenexatsi Dioso itajara bitso
bepejumecovēnētsivi. Nexata bajarapamonae bitso
pinijicuenia Dioso naneconitsiaexanaenatsi pamatacabi
Dioso naneconitsiaexanaena daxita pamonaē Dioso
apo pejumecovēnētsivi, jai Jesús pijajivijavabelia judíovi
pecujarubivi yabara.

21

Pacuenia ofrenda rajuta Diosojavabelia pamonā pevecuatēpaevatsi yabara pelivaisi
(Mr 12.41-44)

¹ Templobota Jesús cobetane bitso pexainaevi ayaijava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia. ² Bajarajota Jesús cobetanenua pamonā pevecuatēpaevatsi, bepejiobiva, penajejava anijapalatanēyobeje. Bajarapova najia anijapalatanēyobeje piamatamobinēyobeje. ³ Jesús nexata jumaitsi pijajivijavabelia:

—Xaniajanē pacuenia pacatsipaebijitsiatsi. Mapovaje pamonā pevecuatēpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabēcuenebarēya daxita xua itsamonae jia bajarapacajonita matatoxenetsia. ⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajēvelia tsipaeba pijajivi itsamatacabi itsanacuapijivi pexuabijavanexatsica templobo yabara pelivaisi
(Mt 24.1-2; Mr 13.1-2)

⁵ Jerusalén tomarata templobo itabētsiaya exaneta pexaniaviriaibotonēta. Jivi Diosojavabelia ofrendacuenia perajutsijavanē ata, templobota itabētsiaya ruba templobo pitaitabētsecaenexa. Nexata Jesús pijajiviyajuvēnēvi nabarēcuaicuaijai tsaponae templobo pitabētetsijava yabara. Nexata Jesús tajēvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabēcuene yajava. Jesús jumaitsi pijajivijavabelia mapacueniaje:

⁶ —Itsamatacabi itsanacuapijivi xuabianica mapatemplobomije. Nexata daxita xua pataneme, pitabēcuene yajava, penetsianica. Nexata templobopijiiibotonē caiboto ata pejumavereca apo boca tsane, jai Jesús pijajivijavabelia.

Pacuenia itsijitsia Jerusalén tomarata, daxitanacuanējava ata, mapanacua pecopiarucaevajēnaeje yabara pelivaisi
(Mt 24.3-28; Mr 13.3-23)

⁷ Jesús pijajivi jumaitsi:

—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

⁸ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. Tsipaji raja peyamaxëitojorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. ⁹ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰ Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuaje pevereverecaevajënae, peneta copiaya it-saviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. ¹¹ Ira najëabiana ayaicuenia nacuanëjava. Nacuanëjava ayaijaniboxaneto najetarucaena, piavitane cuene yajava. Itaboxotatsia pitsapaena piayaijunavicuene, pinijicuene pexanaejavanë yajava, jai Jesús pijajivijavabelia.

¹² Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenie pecopiajopaevajënaeya patajajivixaemë, pacataicaena. Pacabejiobiaexanaena. Pacacaponana judíovi penacaetuatabibonëjavabelia papecaneconitsinexa. Penaneconitsivi pejebabiabibota pacajebiana. Patajajivixaemë, pacanubiana presidente vi pitabarata, nacuaevetsivi pitabarata ata. ¹³ Nexata bajarajota xanë talivaisi, pexanialivaisi, patsipaebiana name xaniavaetsia. ¹⁴ Nexata pëtsa tajëvelia panatsinajamatabëxainame pacuenia panayajivicuaicuaijamëjitsia

bajarapamonaejavabelia. ¹⁵ Tsipaji paepatota panayajivicuaicuaijamëjitsia, bitso peyapëtaevicuenia pacacuaicuaijaiyaexanaenatsi. Nexata caenë ata panijavajabitsaënë apo caëjëpaetsi tsane papecajumecanaviatsinexa. ¹⁶ Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonaе caranata pacacanajetsiana. Nexata pacayajuvënëbeyaxuabiana. ¹⁷ Daxitajivi pacaitoya tsabiabi tsane patajajivixaemë. ¹⁸ Itsiata baitsi jane pepo panejamatabëcuenelivaisi bajarapamonaе apo itsacueniabi tsane. ¹⁹ Itsa pajamatabëcuenesaëmë tsavanapae tsane, nexata matacabi apo peverevereцаejava paxainaename, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

²⁰ Icatsia Jesús tajëvelia vajunupaeba papiayaicueene itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara peverevereцаenexa,” pajamatabëjamë tsane. ²¹ Nexata bajarapamatacabi Judea nacuata pejinavanapaeви, itsa tane bajarapacuene, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecua. Itsamonae pijinia, Jerusalén tomarapijivi, bajarapamatacabi Jerusalén tomarapënëyabelia itsa jinavanapa, apo benaviabirena pijaboyaberena. ²² Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota. ²³ Bajarapavajabitsaëmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatacabi bitso nabejiobitsiaya peponaexae tsane! ¡Papetiriavi ata mitopaenacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. ²⁴ Bajarapavajabitsaëmatacabi itsanacuaverena Jerusalén tomarapijivi vajabitsaë tsimaxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapijivimi, caponaenatsi itsanacuanëjavabelia.

Nexata bajaraxuacujinae itsanacuanëpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi
(Mt 24.29-35, 42-44; Mr 13.24-37)

²⁵ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Matacabipijjuametotatsia, xua naitajëtsiana, meravipijjuametotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cjunaviana. Daxita nacuanëpijivi bitso najunaviacaena itsa jumetaena manuameneta pinijimalataca bitso penajumetsijava.

²⁶ Daxitanacuanëjava bitso jivi najamatabëxainaena itsa taena piayaicuene petocopiajopaejavatsi. Nexata daxita nacuanëjava jivi tëpajoneyabiabiana pecajunavi. Daxita xua athëbëtatsia rubena, najëabiana. Xaniavaetsia apo rubenae tsane.

²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenivenaecotia yajavapatsianicajë.

²⁸ Itsa pataename pecopiajopæjava bajarapacuenae, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabejiochia exanaebiabijavamivecua, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higueranae, itsavirianaenë ata.
³⁰ Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuenia payapëtaneme vai baja imoxoyo pevajënae pejonejavanexa.
³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaname

imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. ³³ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneje. Belia bajarapacuenia paneexanavanapaejavata, jemata copiapatsipa tapatsimat-acabinexatsica. ³⁵ Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimat-acabinexatsica, jemata daxitanacuanëjava copiapatsiana. ³⁶ Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaponanexa, panevecuapanepaponaenexa daxita papibisiacuene pacatocopiapataponanena. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinë, patsianicajë, papecacaëjëpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapat-sutojumata Jesús majitabiaba. ³⁸ Daxita bajayacunua canacujitsia jivi patabiaba templobota penamuxunaevetabiabinexatsi Jesús petsipaebilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan. ² Sacerdotevi penamatacaitorobivi, judíovi pecujarubivinuua, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

³ Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. ⁴ Judas yapëtane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuai cuaijainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata bajarapamonae barëya. Rajutsiapaebatsi palata. ⁶ Jejai Judas. Nexata Judas Jesús naitaxutocaevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajaramatacabi ovejaxi babia pexaenexa pascua fiestamatacabi.

⁸ Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejejavabelia:

—Paponarebeje paneexanaenexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje Juanbeje jumaitsi beje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xaenatsi? jai beje.

¹⁰ Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxitajarabienamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje. ¹¹ Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaitsi: ‘¿Detsa jota

pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja Jesús,” pajamëbeje tsane bajarapabo pexainaenëjavabelia. ¹²Nexata athëbëabetsia anijairabeje pexainaebojavata, pacatsitajëtsianabeje. Bajarapaboënëta, athëbëyotsia paira, ayaiënëtuatuajë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitarababeje daxita pacuenia Jesús jumaitsi. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

¹⁴Itsa baja copiajopa pexaeepatotanexa, Jesús, pijajivi doce ponëbeje, apóstolevi, yajava, eca mesa muxuneneta. ¹⁵Nexata Jesús jumaitsi pijajivijavabelia:

—Tatëpaevajënae bitso jitsipajë patacayajavaxaejava mapascua fiestamatacabi pexaejavaje. ¹⁶Xaniajanë pacuenia pacatsipaebijitsiatsi. Matavëjëa rabaja mapanacuataje apo xaenë tsane pascua fiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuataatsia xaenajë pascua fiestamatacabi pexaejava, jai Jesús pijajivijavabelia.

¹⁷ Nexata Jesús copavënëjavata yapita pijajivi pebarëapaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamë mapacopataje. ¹⁸Xaniajanë pacuenia pacatsipaebijitsiatsi. Matavëjëa rabaja mapanacuataje apo apaenë tsane uvacuaيرا. Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

¹⁹Bajaraxuacujinae Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabiabianameje patanenajamatabënapitabiabinexamë, jai Jesús pijajivijavabelia.

²⁰ Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëapaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeneconimivecua. Mapacapaejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponëjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunentaje. ²² Xanë, Daxitajivi Pematapijinënë, tëpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

—¿De meta ponë vaxaitsiyajuvënë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënë nacavecuaayaijamatabëcuenenë bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënë nacavecuaayaijamatabëcuenenë? najai Jesús pijajivi.

²⁵ Nexata Jesús jumaitsi pijajivijavabelia:

—Nacuae vetsivi pacuenia jamatabëpacaitoroba panetoexanaenexa, ajumesaëya pacaitorobabiaba papijajivimë, bajarapamonae pevetsinacuanëjava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayanacuae vetsinë, bitso pexaniacuene nacatoexanabiaba,” panejainexa. ²⁶ Pëtsa paxamë

bajarapamonae cuenëjëpaeya bepaayaijamatabëcuenevimë panataneme. Ponë raja peneta paxamëyajuvënë daxita paxamë pacavecuaayaijamatabëcuenenë, bajaraponë peneta daxitajivi bepijajivitonëcuenia yavenonaena.

²⁷ Mapanacuata petuxanenë itsa xaeyeca mesata, petuxanenë jamatabëcuenevetatsi pijajivitonë. Tsi paji petuxanenë ayaijamatabëcuenenë pijajivitonë matatoxenetsia. Itsiata xanë bajarapitsijamatabëcuene apo xainaenë. Ponaponajë

paxamëjavata daxita paxamë bepanijajivitonënëcuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiohiaexananua, bajarapacuenia paxamë ata patajajivixaemë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame. ²⁹ Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa. ³⁰ Nexata paxamë pacajamatabëcuenecaëjëpaena taevetsinacuatatsia tajamesata panenanabaninexa, panenamatavejëapaenexanua. Paenaename jueznëcuenia pananeconitsiaexanaenexa pijaneconi pexainaevi. Nexata pananeconitsiaexanaename Israelpijinëmi pexi, doce ponëmimeje, pemomoxiyajuvënëvi, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaname tajajivitonëcuenemë,” jai yabara pelivaisi

(Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso cajamatabëcueneëjëbiana tanenavecuacopatsinexamë. Pacuenia arrozxainanë arrozxu jëba pesi pevecuaxuabinexa, bajara pijinia pacuenia pecaxuabinexa xanëvecua cajamatabëcueneëjëbiana dovathi. ³² Itsiata baitsi jane catovajëtatsi Diosojavabelia necopatsiyaniva tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponaename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayajavatëpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiabivajënaeya nayavajunuaxainaname tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

Pacuenia baja itsa imoxoyo pevajënae Jesús pebeyaxuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeyaniva doro, palata ata, zapato ata. ¿Bajarapamatacabi panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenejava ata bajarapamatacabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada. ³⁷ Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconitsiaexanaenatsi bepibisiacuene pexanaenëcuenia,” jai tajëvelia xanë yabara Diosojumelivaisibaxutota. Nexata bajarapacueni imoxoyo baja pevajënae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajëta Diosojavabelia Getsemanivënëjavata yabara pelivaisi

(Mt 26.36-46; Mr 14.32-42)

³⁹ Jesús pitsapa bovecua. Pacuenia ponabiaba, bajarapacuenia icatsia pona petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. ⁴⁰ Jesús pijajivi itsa barëpata bajarapatsutojumabelia, Jesús jumaitsi pijajivijavabelia:

—Pacajamatabëcuenejëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyaniya patanejumecovënëtsijavamë, jai Jesús.

⁴¹ Nexata Jesús pijajivi vecuanatixilia bejamatabëcuene treinta metro. Jesús nucajunua pematabacabëta pevajëtaponae Diosojavabelia. ⁴² Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajibicueneta. Itsa jitsipame, necapanepare bajarapabejibicuenecua. Itsiata xanë apo tajitsipaecuene ata,

pacuenia xamē jitsipame, netocopatsianame, jai Jesús pe-
vajětsijavata Diosojavabelia.

⁴³ Nexata Jesús athěběpijiángel tsitanaitajětatsi
pejamataběcuene asaěyaexanaenexatsi. ⁴⁴ Jesús pebeyaxu-
abijavanexatsi yabara, bitso natsinajamataběxaina. Nexata
Jesús bitso orijibia asaěyata vajětapona Diosojavabelia.
Jesús bitso janetatsi. Pacuenia itsi pijana, bajara itsi Jesús
pejanetsibarěmenetsi. Topitopijai irabereca.

⁴⁵ Jesús pevajětsicujinae itsa nonotapuna, lia pijajivijav-
abelia. Nexata Jesús pijajivi caxitajaraba pemajitanube-
naevi. Tsipaji Jesús pijajivi bitso penajamataběxainaejava,
cuerana. ⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare.
Pavajětaponare Diosojavabelia, dovathi pejamataběcueneta
pacajamataběcueneějěbi ata paneajamataběcuenesaěnexa, jai
Jesús pijajivijavabelia.

Pacuenia Jesús vaetabatsi pijavajabitsaě yabara pelivaisi
(Mt 26.47-56; Mr 14.43-50; Jn 18.2-11)

⁴⁷ Jesús pijavajabitsaě pevaetabijavatanexatsi, cuaicuaijai
tsanucae pijajivijavabelia. Nexata bajarapaepatota
jivi ayaibitsaětoxaneto, Jesús petsimaxěponaevitsi,
najetarubena. Poně vėnėrubatsi Judas, Jesús pijajivi doce
poněbejeyajuvėnėnėmi, matacanajetaruca bajarapamonae.
Nexata Judas najetabalia Jesúsjavabelia. Itabaratsutsuniaya
bajacobatsi. ⁴⁸ Nexata Jesús bajarajota jumaitsi
Judasjavabelia.

—Judas, ¿matsa pacuenia nitabaratsutsuniaya
nebajacobame xaně, Daxitajivi Pematapijinėnė,
tanecanajetsinexamě tajavajabitsaě pecobeyabeliaje? jai
Jesús.

⁴⁹ Jesús pijajivi itsa tane pacuenia Jesús exanaejitsiatsi,
nexata bajarapamonae jumaitsi Jesúsjavabelia:

—Tajatuxanenė, ¿namaxėvanitsianatsi tsaja espadata? jai
Jesús pijajivi.

⁵⁰ Nexata caenė Jesús pijajiviyajuvėnėnė namaxėvanita.
Sacerdotevi pepo penamatacaitorobinė pijajivitonė muxu-
yoropaebiaxuaba pecujanenia pamuxuyoroto. ⁵¹ Nexata
Jesús jumaitsi pijajivitonėjavabelia:

—Copabare baja, jai Jesús.

Nexata Jesús bajaraponė muxuyororoyataba. Jesús baja
muxuyororuta icatsia bajaraponė. ⁵² Pamonae Jesús tsi-
maxěpatatsi, itsamonae sacerdotevi penamatacaitorobivi, it-
samonae templobopijipolicíavi penamatacaitorobivi, itsa-
monae judíovi pijaancianovi. Bajarapamonae caponaejitsiat-
silia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁵³ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piamatabëcuene itaquiriyaexanaenë, papecaitorobixae, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicuujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonae pecovëvelia tajiyo pënanajetaruca. ⁵⁵ Nexata pabota Jesús capatatsi, bajarajota, panabo tuatuajëta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxutocaevetsiaya naeca bajarapamonaejavata. ⁵⁶ Nexata bajarapabota penacuenebiva, Pedro itsa taeyetatsi penanonopecaejavata isoto muxuneneta, naitaxutobabatsia asaëya taenucatsi. Nexata itsamonaejavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesúsna naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba. ⁶¹ Nexata Jesús boverena namuxufeta Pedrojavaberenä. Taeyerenatsi Pedro. Nexata bajarapaepatota Pedro najamatabënapitajaraba Jesús pejumaitsijavatsi: “Pedro,

ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, najamatabënapitajaraba Pedro. ⁶² Nexata baja Pedro pitsapalia bopanabovëcua. Pinijicuenia nua.

Pacuenia Jesús pijavajabitsaë capocaponatsi yabara pelivaisi

(Mt 26.67-68; Mr 14.65)

⁶³ Pamonaë Jesús vaetabatsi, capocaponatsi. Itabarat-saquiababeponatsi pecobethaitonëta. ⁶⁴ Papaëbërëpanata itaxutocëtatsi. Pitaxutocëtsicujinaetsi icatsia itabarat-saquiababeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquiababa! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.59-66; Mr 14.55-64; Jn 18.19-24)

⁶⁶ Ajena baja matabi tsarucaponae, nacaetuata judíovi pi-jaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumaitsi Jesúsjavabelia:

⁶⁷ —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaitsi bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenëxa,” pacajai atatsi tsipae, itsiata apo panejumecovënëtsimë tsipae.

⁶⁸ Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënu tsipae. ⁶⁹ Itsiata baitsi jane tavajënaeyabelia xanë, Daxitajivi Pematapijinëne, ecaenajë taxa Dioso pecujuanenia patanajuaevetsinexabeje daxitacuene. Bajaraponë pecaëjëpaenëtsi daxitajamatabëcuene, jai Jesús bajarapamonaejavabelia.

⁷⁰ Nexata daxita bajarapamonae jumaitsi Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jājā, xanë rabaja pacuenia panejumaitsimë. Bajaronëne, jai Jesús.

⁷¹ Nexata bajarapamonae najumaitsi:

—Ajibi rabaja abaxë vajaanetapona Java jivi neconitsiaya vajanacatsipaebaponaenexa pacuene yabara naneconitsiaexanaejitsiatsi maponëje. Vaxaitsi rabaja vajacuata jumetanetsi pacuenia maponëje cuaicuaijai Dioso apo pejitsipaecuenia. Tsipaji beDioso pexënato natane, najai bajarapamona.

23

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Jn 18.28-38)

¹ Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamona Jesús caponaliatsi itsaboyabelia, Judeanacua pevetsinë Pilato pijaboyabelia.

² Bajarajota Pilato pitabarata bajarapamona neconitsiaya jumaiti Jesús yabara:

—Mara ponëje naneconita. Tsipaji muxubijiapeneta-pona jivi pianaepanaenexa nacuaevetsivijavabelia. Paneitavetaponanua patamatamotsiyaniva Romanonacua pepo pevetsinë pejamatabëcueneta impuestomatamo pataneyanijobijava. Jumai tsaponaenua: “Xanë raja Cristonë, nacua taevetsinë,” jai tsapona maponëje, jai bajarapamona Jesús yabara neconitsiaya Pilatojavabelia.

³ Nexata Pilato jumaiti Jesúsjavabelia:

—¿Xamë tsaja judíovi pepo nevetsinë? jai.

Nexata Jesús jumaiti Pilatojavabelia:

—Jājā, xanë rabaja pacuenia nejumaitimë, jai Jesús Pilatojavabelia.

⁴ Pilato nexata jumaiti sacerdotevi penamatacaitorobivijavabelia, jivi ayaibitsaëtoxanetojavabelia ata:

—Apo caxitajarabinë cajena itsacujiruneconi ata pexaina Java maponëje, paneconi yabara naneconitsijitsia, jai Pilato.

⁵ Itsiata bajarapamona ajumesaë. Orijiibia neconitsia jumaiti Jesús yabara:

—Bajaraponë daxita Judea nacuapijivi muxubijiapeneta-pona bajarapamona pianaepanaenexa Judeanacua pevetsivijavabelia. Taxuxuaba cajena bajaraponë bajarapacuenepexana Java Galilea nacuata. Nexata maberena ataje bajarapacuenia icatsia exanapona, jai bajarapamona Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamona peneconitsijavatsi Jesús, nexata Pilato jumaiti bajarapamona Java:

—¿Matsa ponëje Jesús, Galilea nacuapijinëje? jai Pilato.

⁷ Nexata bajarapamonae tsipaeba Pilatojavabelia Jesús Galilea nacuapijinēcuene. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinē. Bajarapamatacabi Herodes ponapona Jerusalén tomarata. ⁸ Nexata Herodes itsa tane Jesús, barēya. Tsipaji Herodes vënëlivaisitaeyabiaba Dioso pesaëta Jesús pinijicuene pexanaponaejavanē. Nexata Jesús pinijicuene pexanaejava Dioso pesaëta jamatabētane Herodes. ⁹ Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata. ¹⁰ Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. ¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinē banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinēcuenia petaenexatsi. Bajaraxuacujinae icatsia canaviabarenatsi Pilatojavaberena. ¹² Pilatobeje Herodesbeje naitoyabeje picani. Itsiata bajarapamatacabi nabarajamatabēcuenexanepanabeje. Naxaniababeje baja.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-26; Mr 15.6-15; Jn 18.39–19.16)

¹³ Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata. ¹⁴ Nexata Pilato jumaitsi bajarapamonaejavabelia Jesús yabara:

—Paxamē panetocapatame maponēje. “Mara ponēje naneconita. Tsipaji muxubijiapeneta pona jivi pianaepanaenexa nacuaevetsivijavabelia,” panejamē. Itsiata baitsi jane xanē picani tajacuata yanijobajē xaniavaetsia paneitabēta. Nexata xua yabara paneconitame, ajibi picani. Maponēje itsacujiruneconi ata apo xainae, paneconi yabara naneconitsijitsia. ¹⁵ Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponēje, paneconi yabara beyaxuabijitsiatsi. ¹⁶ Nexata tajajivi itorobianajē bajaraponē saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajē, jai Pilato bajarapamonaejavabelia.

¹⁷ Caevai canacujitsia, pascuavēnē fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pilato copatabiaba

ponë jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. ¹⁸ Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai Jesús yabara. Bajarapamonae pevavajaijavata, Jesús yabara jumaitsi Pilatojavabelia mapacueniaje:

—¡Majane ponë beyaxuareje! ¡Barrabás jane panetocapitsapare! jai bajarapamonae.

¹⁹ Bajaraponë Barrabás Jesús pevajënaeya bajarapatomarata barënbias gobierno pijajivijavabelia. Nexata Barrabás jivitonë beyaxuaba. Bajaraxuata naneconitsiaponapona penaneconitsivi pejebabiabibota. ²⁰ Pilato picani jamatabëcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. ²¹ Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

²² Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë peponaenexa baja, jai Pilato.

²³ Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajaitsaponaexae, belia baja Pilato jejai. ²⁴ Nexata baja Pilato tocopata pacuenia bajarapamonae vajëtatsi. ²⁵ Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, pi-aneconijibinë, pebeyaxuabinexatsi Pilato itoroba pijajivi.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Jn 19.17-27)

²⁶ Vajabitsaë itsa caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabarutsijitsiatsi,

petocaponaenexa. Nexata bajarapacruza Simón tovëtaranajetaruca Jesús pecovëya.

²⁷ Jesús pënanajetarubenatsi, jivi ayaibitsaëtoخانەتو. Bajarapamonaeyajuvënëvi, petiriavi ayaibitsaëto, Jesús bitso pënuëyabauataponatsi ayaijumeta. ²⁸ Nexata Jesús napënëyorota. Jumaitsi bajarapapetiriavijavabelia:

—Paxamë petiriavi, paJerusalén tomarapijivimë, pëtsa panepënuëyabame xanë. Paxamë jane panatsinuema. Panexi ata patsinuema. ²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso itsa nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejiitsipa pinijibotsutonë itsa nacamatacënëbajarabijitsipa,” najai tsane jivi. ³¹ Xanë itsacujiruneconi apo xainae atanë, nebejiobiaexanaena itsa necobematabiabarutsiana cruzajavabelia. Nexata pamonaë pibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabi, jai Jesús bajarapapetiriavijavabelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje piamatabëcuenebejenëbeje vajabitsaë caponatsibeje Jesús peyjavabeyaxuabinexatsibeje. ³³ Itsa baja capaliatsi Jivimatasipavënë tsutojavabelia, nexata cruzajavabelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujanenia. Itsanë rutatsi itsacruzata Jesús petsavenonenia. ³⁴ Jesús baja cruzajavabelia pepuacobematabiabarutsi, jumaitsi paxa Diosojavabelia:

—Axa, mapamonaëje itaxutotsoniataema. Vecuaxuare paneconi xaina pibisiacuene taneexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaë, pamonaë Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaëjitsia caejava canacujitsia Jesús penaxatatsijavami, xua jumaponapona. ³⁵ Bajarajota daxitajivi taenubena. Judíovi pevetsivi Jesús capocaponatsi. Bajarapamonaë capocaponaëya jumaitsi Jesús yabara:

—Ëitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai

pepacuene Cristo, Dioso athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocapon-
aeya cujibarenatsi. Rajutsijitsiatsi piajatuvinora piapaenexa
Jesús. ³⁷ Nexata vajabitsaë jumaiti Jesúsjavabelia:

—Itsa xamë judíovi pepo nevetsinë, nexata nacapanepare
nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsënëyo tablapa-
jumata, Pilato pijajivi yaquinaruta acueyabi paviriavibeje
pijajumeta. Itsaitane yaquinaruta griegojumeta. Itsai-
tane yaquinaruta latinjumeta. Itsaitane yaquinaruta hebre-
ojumeta. Peyaquinarubiitane jumai tsarubi mapacueniaje:
“Mara ponëje judíovi pepo pevetsinëje,” jai tsarubi Jesús
yabara. ³⁹ Itsanë pijamatabëcuenebejenë cruzajavabelia
pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso
pecaitorobinëtsica jivi necapanepaenexa, nijacuata
nacapanepare. Paxanëbeje ata panecapaneparebeje, jai
tsarucac Jesúsjavabelia.

⁴⁰ Itsanë pijinia itsacruzajavabelia pecobematabi-
abarutsinëtsi, jumeitavetaruca. Jumai tsarucac
penajuananeconitsinëbejejavabelia:

—¿Dioso tsaja apo cujunavimë netëpaenexa, cacobematabi-
abi ata nijaneconi yabara mapacueniaje? ⁴¹ Vaxaibeje rabiji
vajaneconi xainatsibeje vajatëpaenexabeje. Nacarutabeje ma-
pacueniaje pibisiacuene vajaexanaexaabeje. Mabiji ponëje
caeto ata pibisiacuene apo exanae, jai tsarucac bajaraponë
jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaiti Jesúsjavabelia:

—Jesús, xanë nenajamatabënapitsianame pamatacabi xamë
evetsianame mapanacuaje, jai bajaraponë Jesúsjavabelia.

⁴³ Nexata Jesús jumaiti bajaraponëjavabelia:

—Xaniajanë pacuenia catsipaebijitsiatsi. Ajena, pamata-
cabi, neyjavaponaponaename paraísojavatatsia, jai Jesús ba-
jaraponëjavabelia.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Jn 19.28-30)

⁴⁴ Jesús baja itsa tēpaejitsia, matonejeepatota, daxita
nacuanëjava aitaquiri tsajuni. Matapania acueyabi pa-
horabejecujinae, caniviyojavabelia, nacua napebeta icatsia.

⁴⁵ Paepatota Jesús tēpanajereca, bajarapaepatota templobo
ënëtuatujëalia pënëyatuucutarutsipana, ayaipapaëbërëpana,
tuatujëatsica titititicaica. ⁴⁶ Nexata Jesús ayaijumeta jumaiti
Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinē, vajabitsaē pijacapitán, itsa tane daxita bajarapacuenē, bajaraponē Diosojavabelia jumaitsi:

—Diosomē, bitso ayaijamatabëcuenenēmē. Xaniajai tsaena baja. Maponē tēpaje, planeconijibinē, jai vajabitsaē pijacapitán.

⁴⁸ Daxita pajivibitsaētoxaneto taenubena pacuenia Jesús jumaliverevereca, bajarapamonae bitso najamatabëxainae naviaba pijabonëjavabelia. ⁴⁹ Daxita pamonaē Jesús peyapëtaevitsi, pebijivi, petiriavi ata, pamonaē Galilea nacuaverena pēnaponatsi, tajiyojavaverena taenubena, petaenexa Jesús pebeyaxuabijavatsi.

Pacuenia Jesús petëpaenē buata tsi ibovajualia yabara pelivaisi

(Mt 27.57-61; Mr 15.42-47; Jn 19.38-42)

⁵⁰ Jerusalén tomarata ponapona José, Arimatea tomarapijinē. Bajaraponē pexaniajamatabëcuenenē, xaniavaetsia peponaponaenē Dioso pitabarata. Bajaraponē judíovi pevetsinē. ⁵¹ José copiaevetaponapona pecopiajopaejava pamatacabi caenē Dioso evetsijitsia daxita pijajivi mapanacuataje. Nexata José apo jamatabëcuenejēpae pacuenia judíovi exana Jesúsjavabelia. ⁵² José nexata lia nacuaeavetsinē Pilatojavabelia. Vajëta petocopatsinexatsi pemëthëtsinexa petëpaenē Jesús. ⁵³ Bajaraxuacujinae José cruzajavavetsica pitsica Jesús petëpaenē. Daxitanëreca mataquionaeya matacacëba pexaniaviria piapiasábanapanata. Nexata cajena itsajota José iboitapajanitojavata pinijibovaju toexanabuatatsi petëpaeivi pebuataponaenexa, bajarapaibovajualia buata Jesús petëpaenē. Bajarapavajualia abaxë itsajiviyo ata petëpaejiviyo José apo buatsi. ⁵⁴ Pamatacabi José bajarapacuenia vajëta Pilatojavabelia Jesús petëpaenē pemëthëtsinexa, bajarapamatacabi judíovi penacuenebijava banacuenevereta baja pecopiajonevajënaeya penacueraevetsimatacabinexa. Nexata paepatota José ibovajualia buata Jesús petëpaenē, bajarapaepatota José baja tocopiapataponatsi penacueraevetsimatacabinexa.

⁵⁵ Papatiriavi Jesús pēnaponatsi Galilea nacuaverena, bajarapapetiriavi tajiyo José pecovëya najetarubena. Nexata bajarapapetiriavi tane Jesús petëpaenē José pebuatsi- java bajarapaibovajualia. ⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae

pijaboyabelia, bajarapapetiriavi xaniavaeta pexaniapetux-
ujuvira, pexaniapetuxujuvitsapato yajava, Jesús petēpaenē
peperabēexabinexa. Nexata abaxē bajarapapetiriavi nacuer-
aeveta judíovi penacueraevetsimatacabita pacuenia itoro-
batsi Dioso Moiséspijinēta bajayata penajumecopatsilivaisi.

24

Pacuenia Jesús petēpaecujinae icatsia asaē yabara pelivaisi
(Mt 28.1-10; Mr 16.1-8; Jn 20.1-10)

¹ Judíovi baja penacueraevetsimatacabi verevereca. Nex-
ata meravia pitsijavata, ajena juameto pitsapaina, pape-
tiriavi xaniavaeta pexaniapetuxujuvijava, icatsia ponalia
Jesús petēpaenē pebuatsiibovajutsijavabelia. Patuxujuvi-
java xaniavaeta Jesús petēpaenē peperabēexabinexa, capona-
lia Jesús petēpaenē peperabēexabinexa jane baja picani. It-
sapetiriavi yajava ponalia peyanabinexatsi. ² Itsa baja palia,
nexata bajarapapetiriavi tane Jesús petēpaenē pebuatsi-
bovajutsi peyavēpaacatsiibopanaxanetomi petixitanutsijavalia.
³ Bajarapamonae joneya picani Jesús pebuatsiibovajutsi-
javalia. Itsiata baitsi jane apo caxitajarababuatsi petēpaenē,
pepo petuxanenē Jesús. ⁴ Nexata bajarapapetiriavi bitso
jamatabēcuenenajunaviaca. Apo yapētae pacuenia exanaejit-
sia. Bajarajota nexata bajarapapetiriavi taenuta anijanēbeje
ángelnēbeje. Bajaraponēbeje penaxatatsijavabeje nivenivena
bitso. ⁵ Bajarapapetiriavi bitso cununava bajarapaángelnēbeje.
Nexata pecajunavi pematabacabēta irataeya bobena. Nexata
bajarapaángelnēbeje jumaitsi petiriavijavabelia:

—¿Detsa xuajitsia petēpaenē pebuatsijavatatsi, pajaitame?
Bajaraponē asaē baja icatsia. ⁶ Bajaraponē majotaje
ajibi baja tsarucae. Dioso rabaja icatsia asaēyaexanatsi.
Panajamatabēnapire pacuenia pacatsipaeba Galilea nacuata
pamatacabi abaxē asaē tsaponaponae. ⁷ Bajaraponē
baja cajena tajēvelia pacajumaitsi: “Xanē, Daxitajivi
Pematapijinēnē, necanajetsiana pibisiajamatabēcuenevi
pecobeyabelia. Nexata bajarapamonae cruzajavabelia
necobematabiabarutsiana tanebeyaxuabinexa. Itsiata
baitsi jane tanebeyaxuabicujinae, acueyabi matacabita,
icatsia asaēnē tsane,” pacajai baja cajena tajēvelia Jesús
itsa abaxē pamatacabi pacayajavaponapona, jai ángelnēbeje
petiriavijavabelia.

⁸ Nexata bajarapapetiriavi najamatabēnapita pacuenia
Jesús tajēvelia jumaitsi. ⁹ Nexata baja bajarapapetiriavi
naviabarena Jesús petēpaenē pebuatsiibovajutsijavaverena.
Nexata bajarapapetiriavi tsipaeba daxita bajarapacuenia
yabara once ponēbeje, Jesús pijaapóstolevijavabelia.

Tsipaebanua daxita itsamonae Jesús pijajivijavabelia ata.
 10 Bajarapapetiriaviyajuvënëvi itsava Mariávënëva. Bajara-
 pova Magdala tomarapijiva. Itsava pijinia Juanavënëva.
 Itsava pijinia icatsia Mariávënëva. Bajarapova Santiago
 pena. Itsapetiriavi yajava tsipaeba bajarapacue ne yabara
 apóstolevijavabelia. 11 Bajarapapetiriavi apóstolevijavabelia
 tsipaebi ata bajarapacue ne yabara, itsiata apóstolevi apo
 jumexaniataetsi. Apóstolevi saya bajarapalivaisi yabara
 jamatabëjumaitsi: “Saya meta bajarapapetiriavi pijacuata
 exana bajarapalivaisi,” jamatabëjai apóstolevi.

12 Itsiata baitsi jane Pedro pitsapalia bovecua. Nexata
 kujinaejinalia Jesús petëpaenë pebuatsiibovajutsijavabelia.
 Nexata Pedro bajarapaibovaujalia itsa naëcolia, taeyejeba
 pebobenaeyava bajarajota daxitanëreca Jesús mataquionaeya
 pematacacëbipanamitsireca. Nexata baja Pedro naviata boy-
 aberena. Najamatabëxaina bajarapacue ne yabara.

*Pacuenia Jesús petëpaecujinae icatsia itsa asaë, pijajivi-
 tonëbeje pëcaxitajarabaxuaba, Emaús tomarabelia peponaenëbeje,
 yabara pelivaisi*

(Mr 16.12-13)

13 Pamatacabi bajarapapetiriavi tane ángelnëbeje,
 bajarapamatacabi Jesús pijajivitonëbeje Jerusalén
 tomaravelia naropotabeje. Ponabeje Emaús tomarabelia.
 Bajarapatomara eca once pakilómetrobeje Jerusalén
 tomaravecua. 14 Bajaraponëbeje baracuaicuaijaiibeje

tsanajetarucæ daxita pacuene copiapata. 15 Itsa abaxë
 bajarapalivaisi cuaiicuaijai tsanucaponaëbeje, Jesús
 pëcaxitajarabalia. Nexata Jesús muxunenianajetaruca
 bajaraponëbeje. 16 Bajaraponëbeje tae atabeje Jesús, itsiata
 apo yapëtaëbeje Jesús cuene. 17 Nexata Jesús yanijoba
 bajaraponëbejejavabelia. Jesús jumaitsi:

—¿Detsa pitsicuene pabaracuaicuaijamëbeje tsanucaponaë
 namutua? ¿Detsa xuajitsia bepajamatabëcuenejiobimëbeje? jai
 Jesús bajaraponëbejejavabelia.

18 Bajaraponëbeje itsanë pevënë Cleofas. Nexata Cleofas
 jumaitsi Jesúsjavabelia:

—Daxitajivi baja cajena yapëtane pacuene copiapata
 Jerusalén tomarata mapamatacabitaje. ¿Xamë tsaja caenëmë
 apo nijanayapëtae bajarapacue ne, naponaponaë atamë
 bajarapatomarata? jai Cleofas caranata Jesúsjavabelia.

19 Nexata Jesús jumaitsi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitsi Jesúsjavabelia:

—Jesús pijinë raja, Nazaret tomarapijinëmi, profe-
 tanëmi. Piniycuene exanapona Dioso pesaëta. Bitso

xaniavaetsia jivi pexanialivaisi tsipaebapona. Nexata daxitajivi sivajamatabëcuenebarëya bajaraponëmi. Dioso ata sivajamatabëcuenebarëyatsi. ²⁰ Nexata sacerdotevi penamatacaitorobivi, vajanacaevetsivi yajava, canajetatsi Jesúspijinëmi. Canajetaxuabatsi Jesúspijinë cruzajavabelia pecobematabiabarutsinexatsi pebeyaxuabinexatsi. ²¹ Paxanë picani bajaraponëmi yabara pajamatabëjumaitsinë: “Bajaraponë nacavecuacapitsapaena itsanacuaverena pepatsivi, pamonaë apo judíovi, vajanacayanacuaevetsijavavecua pepitsapaenexa,” pajamatabëjanë tsavanapae picani Jesúspijinë yabara. Nexata Jesúspijinë pebeyaxuabicujinaetsi, ajena baja xaina acueyabi pamatacabibeje. ²² Paxanëyajuvënëvi, petiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petëpaenë pebuatsiibovajutsijavabelia. ²³ Itsiata apo caxitajarababuatsi bajarajota Jesús petëpaenë. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnëbeje. Ángelnëbeje pina nexata jumaitsibeje petiriavijavabelia: “Jesús rabaja asaë tsaponaponae icatsia,” jai pina. ²⁴ Nexata itsamonae paxanëjувënëvi pona Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petëpaenë apo taeyabuatsi, jai beje Jesúsjavabelia Emaús tomarabelia peponaenëbeje.

²⁵ Nexata Jesús jumaitsi bajaraponëbejevavabelia:

—¡Paxamëbeje saya paneajamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë. ²⁶ Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta peecaenexa, nayabarajai Jesús bajaraponëbejevavabelia.

²⁷ Nexata Jesús xaniavaetsia navajunupaeba bajaraponëbejevavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaitsi Jesús yabara.

²⁸ Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaiejitsia

bajaraponëbejevecua. ²⁹ Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsibeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. ³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. ³¹ Bajarajota matapania bajaraponëbeje yapëtanebeje Jesúscuene. Itsiata baitsi jane bajarajota vecuacaevatsibeje Jesús. Apo taebeje baja matavëjëa.

³² Nexata bajaraponëbeje najumaitsibeje:

—Nanutua vajanacanavajunu paebanucaponaejavatabeje pacuenia jumaitsi Diosojumelivaisibaxutota, bitso muxunajamatabëcuenebarëyatsibeje, najaiibeje bajaraponëbeje.

³³ Nexata bajarajota bepijia naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonae yajava Jesús pijajivi. ³⁴ Nexata penacaetuatsivi jumaitsi bajaraponëbejevabelia:

—Xaniajai baja cajena. Vajatuxanenë icatsia asaë tsaponaponae. Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabëjenua pacuenia matapania yapëtanebeje Jesúscuene, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi

(Mt 28.16-20; Mr 16.14-18; Jn 20.19-23)

³⁶ Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajëta pijajivijavabelia. Jesús jemata nuca pijajivi tuatuajëta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

³⁸ Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota pajumeaebame icatsia tasaëjava?

³⁹ Panecobetaema. Tataxubeje ata pataema. Xanë rabaja maje. Panejayabare. Paneyorobarena xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaitsi mapacueniaje, nacobeitajëta pijajivijavabelia. Nataxuitajëta yajava. ⁴¹ Jesús pijajivi bitso tsi-tapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesús cuene. Jesús nexata jumaitsi pijajivijavabelia:

—¿Paxainame tsabaja itsacuenejavayo patanerajutsinexamë taxaenexa? jai Jesús.

⁴² Nexata Jesús pijajivi rajutatsi pesebidujuaijavayo, jabëperiyo yajava. ⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús jumaitsi pijajivijavabelia:

—Mapacuene taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaitsi Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacuene netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara. ⁴⁶ Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecua. ⁴⁷ Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaename daxitajivi penajamatabëcuenepënëyorotsinexa Diosojavabelia, pibisiacuene pexanaeiconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaename daxitanacuanëjava. ⁴⁸ Paxamë rabaja pataneme daxita pacuene netocopiapata. Nexata jivi patsipaebaponaename daxita bajarapacuene yabara. ⁴⁹ Espiritu Santo, ponë taxa Dioso najumecapanepaeya pacarajutsiapaeba,

pacatoitorobianicatsi papecatsijamatabëjonenexa. Abaxë pajinavanapaename majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuene paneexanaponaenexa, paponanename jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

(Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso. ⁵¹ Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—iVajatuxanenë bitso ayajamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia. ⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajara-pacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacuenejavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisiitajëtsinë jivijavabelia. Cristo-beje paxa Diosobeje najuaponaponabeje. Cristo ata rabaja Dioso baja cajena. ² Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. ³ Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneitayota pexaniajailivaisita. ⁵ Pacuenia pecotia itayota piaitaquirijavata, bajarapacuenia Cristo petsipaebilivaisita jivi jamatabëcueneitayota. Nexata dovathi, jivi piajamatabëcuene itaquiriyaexanaenë, apo caëjëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaebinexa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. ⁸ Juan raja jivi apo pejamatabëcueneitayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. ⁹ Bajaraponë Cristo jamatabëcueneitayotsiana daxitajivi. Bajaraponë xaniajai jivi pejamatabëcueneitayotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocuene. ¹² Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae

itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënato cuene, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatuajëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuene. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuaijai ëpexaniajailivaisi. ¹⁵ Bajaraxuata Juan, Jesús itsa vajunupaebanajetaruca jivijavabelia, jumai tsanajetarucæ mapacueniaje:

—Baja rajane maponë yabara pacajumaitsitsije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetarucæ Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuene nacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. ¹⁸ Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuapononabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijavabelia yabara pelivaisi (Mt 3.11-12; Mr 1.7-8; Lc 3.15-17)

¹⁹ Judíovi, Jerusalén tomarapijivi, Juanjavabelia itoroba sacerdotevi, itsamonae templobo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia rovia alia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacopiaevetavanapatsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinxamë xaniavaetsia patayapëtaenexa ponëcuenëmë patatsipaebinxexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsi javanexa, bajayatami tajëvelia yaquina profeta Isaíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Elíaspijinëmënuua, apo profetanëmënuua, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonae.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë. ²⁷ Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapantalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuene, meravia pitsijavata, Juan taetaba Jesús penajetarucaejava Juanjavaberena. Nexata Juan jumaitsi jivijavabelia:

—Pataema, mara ponėje, Dioso athëbëvetsica pitorobinëtsitsicaje. Bajaraponë Dioso bepijaovejayo tsane. Pacuenia jivi ovejayo babeyaxuaba pevi ofrendacuenia perajutsinexa Diosojavabelia, bajara itsanetsi maponėje. Nacaevetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuene pexanaeneconimi. ³⁰ Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatabëcuenenë bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹ Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucavata.

³² Icatsia Juan jumaitsi jivijavabelia Jesús yabara:

—Xanë taniji Espíritu Santo perunaejavatsica athëbëvetsica beucucuto. Nexata tsimatanacopatsicatsi bajaraponë. ³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espíritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espíritu Santo,” nejai baja cajena copiata Dioso. ³⁴ Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

Pamonae copiaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶ Itsa Juan tane Jesús pexenetanajetarucavatsi, nexata Juan jumaitsi pijajivitonëbejevabelia:

—Pataemabeje. Mara ponë najetarucaje, Dioso bepijaovejayo tsane, jai Juan pijajivitonëbejevabelia Jesús pebeyaxuabijavanexatsi yabara, tsipaji Jesús tocopiapatsijitsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitsijava, Juan pijajivitonëmibeje pënaponabeje Jesús. ³⁸ Jesús napënëyorotojopa. Taenucajopa. Yanijoba bajaraponëbejevabelia.

—¿Detsa xua pajaitamebeje? jai Jesús.

Nexata bajaraponëbeje jumaitsibeje:

—Petuxanenë, ¿detsa jota ecame? jaibeje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoepatota. Nexata baja tanebeje itsajota ponapona Jesús. Nexata bajarapamatacabi nayacaniyobeje tsaponapona Jesúsjavata.

⁴⁰ Bajaraponëbejeyajuvënënë itsanë pevënë Andrés. Andrés raja Simón Pedro peyuyapijinë. ⁴¹ Andrés nexata bepíjia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonaë pijajumeta: “Mesías,” itsa jai, mapajumetaje pejumaitsiyume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaiyume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonaë pijajumeta mapajumetaje pejumaitsiyume: “Pedro,” pejaiyume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaëjitsia Galilea nacuyabelia. Jesús nexata peponaëvajúnaë, caxitajarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje. ⁴⁵ Felipe nexata pona pejaitsinexa Natanael. Itsa baja Felipe caxitajaraba, jumaitsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponaë, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucaejavatsi, nexata Jesús Natanael yabara jumaitsi pijajivijavabelia:

—Mara ponë najetarucaje, Israelpijinë pemomo, Dioso pitabarata xaniavaetsia peponaponaenë. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljvabelia:

—Felipe cajena pecajunatsivajënaeya, catanetsi neecaejava higueranae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacua pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higueranae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacuenne matatoxenetsia Dioso pesaëta pinijicuenne taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenne jane baja neyapëtaename Dioso pexënatocuenenë, jai Jesús Natanaeljvabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaángelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinënëjavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinë nacasaba yabara pelivaisi

¹ Jesús pebarëcuaicuaujaicujinae Natanael, acueyabi pamatacabibejecujinae, Caná tomarapijinë exana penacasabifistanexa. Galilea nacuata eca Canátomara. Jesús pena naponapona fiesta pexanaejavata. ² Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia. ³ Fiesta pexanaenë itsa baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatojavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajarapacuenē? Abaxē raja apo netocopiapatsi paepatota exanaejitsianē bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxēnato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonē. Caecanalitota mera caējēpaponā bejamatabēcuene quince pagalónbeje. Nexata bajarapacanalitonēta peyaenaemeranēta, judíovi pijacuenia anijatonē xaniavaetsia nacobequiatabiaba penabanivajēnae. ⁷ Jesús nexata jumaitsi mesa pevetsivijavabelia:

—Pavēnēbare mera mapacanalitonē nubenaje, jai Jesús.

Nexata mesa pevetsivi xaniavaetsia mera vēnēba bajarapacanalitonē. Piupiyorotoxijava copabapona.

⁸ Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinē pepajaninexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinē pajane bajarapora, merami pexanaevinora. Bajaraponē abaxē apo yapētae itsaverena capitsapa bajarapavinora. Itsiata mesa pevetsivi yapētane mera pevēnēbixae bajarapacanalitonēta. Pepajanicujinae vinora, fiesta pevetsinē junata fiesta pexanaenē, ponē pejananacasabinē. ¹⁰ Nexata fiesta pevetsinē jumaitsi pejananacasabinējavabelia:

—Mapavinoraje bitso xanepana. Daxita pamonae fiesta pexanaevi, copiaya batsanaeyaexana pexaniavinora. Nexata baja fiesta pexanaenē pejunatsivi itsa apa ayaijava, cotocaevi batsanaeyaexana bevelia penamatamotsivinoranē. Tsipaji baja ayaijava piapaexae, cotocaevi apae ata beveliarā, apo yapētae beveliaracuene. Itsiata baitsi jane xamē bajarapacuenia apo exanaemē. Evetame abaxē cotocaevi patanerajutsinexamē pexaniavinora, jai fiesta pevetsinē pejananacasabinējavabelia.

¹¹ Bajarapapinijiuene Dioso pesaēta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaēta pinijicuene pexanaponaejava. Bajarajota jane baja Jesús najamatabēcueneitajēta Dioso pesaēta ayaicuene pexanaejava pecaējēpaenēcuenetsi. Nexata pijajivi orijibia sivanajamatabēcuenecopabaponatsi. Jesús pijajivi jamatabējumaitsi:

—Xaniajai rabaja. Pepacuene Cristo, ponë copiaeve-tavanapatsi pepatsijavatsica vajanacacapanepaenexa, jamatabējai.

¹² Bajaraxuacujinae Jesús baja pona Capernaum tomabela. Yajavapona pena, pejuyapijivinuua, pijajivinuua. Capernaum tomarata caematacabibeje jinavanapa.

Pacuenia Jesús Jerusalén tomarata templovecua pitsapaeyaexana pecanajetsivi, pecomuacaevinua, yabara pelivaisi

(Mt 21.12-13; Mr 11.15-18; Lc 19.45-46)

¹³ Judíovi baja pijafiesta pexanaenexa, toimoxoyotsi pascuavēñefiesta. Bajaraxuata Jesús pona Jerusalén tomarabela. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. ¹⁵ Jesús ita tane bajarapacuene, nexata quiobataba peyorotsimacanexa. Nexata Jesús daxitajivibitsaëto capitsaparena temploboēñeverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayabajabaraba. Pijamesaxi ata topēñeyorobajaraba. ¹⁶ Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pëtsa pacanajetame mapaboēñetaje, taxajavabelia jivi penavajëcaebota! jai Jesús.

¹⁷ Nexata Jesús pijajivi ita jumetane bajarapacuenia Jesús pejumaitsijava, jumenajamatabēnapita pacuenia Dioso pejumelivaisibaxutota jumaitsi. Bajarapacuenia Jesús pexanaponaejavanexa yabara, tajëvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajë Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi ita tane Jesús jivi pecapitsapaejava temploboēñeverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboēñevecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

¹⁹ Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matababita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeyapëtae xua yabara Jesús jumaitsi. Bajaraxuata judíovi jumaitsi mapacueniaje:

—Xamë acueyabi matabita apo matabotsimë tsipae. It-samona baja cajena mapatemploboxanetoje peveretsinexa, nacueneba cuarenta y seis pavaibeje, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebijava mapacueniaje: “Itsiata baitsi jane tatëpaecujinae, acueyabi matabita, icatsia asaënë tsane,” pejajava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

Pacuenia Jesús jamatabëcueneyapëtane daxitajivi yabara pelivaisi

²³ Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuene xaniavaetsia apo jumecovënëtsi. ²⁴ Bajaraxuata Jesús apo yjavaponapona bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. ²⁵ Jesús apo namatavenonae itsajivi petsipaebinexatsi peyapëtaenexa pacuenia jamatabëcuenetsi jivi. Tsipaji Jesús pejamatabëcueneyapëtaenë pacuenia daxitajivi jamatabëcuenetsi.

3

Pacuenia Jesús barëcuaicuaijai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënënë. ² Nexata Nicodemo meravi pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayjavaponapona tsi-pae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjëpaetsi rabaja icatsia pejonenexa pena pecototalia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espíritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. ⁷ “Xamë ata baja cajena icatsia benaexaname bepejananaexanaejiviyocuenia,” tacajajava yabara, pëtsa jamatabëcuenenabenajacame. ⁸ Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeyaexanatsi bepejanaexanaejivicuenia, jai Jesús Nicodemojavabelia.

⁹ Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰ Jesús nexata jumaitsi:

—Xamë picani Israel nacuapijivi necujarubinë. ¿Itsiata tsaja apo jumeyapëtaemë palivaisi catsipaebatsi? ¹¹ Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi patsipaebaponajëbeje. Xua pepacuene patanijibeje, bajaraxua ata jivijavabelia patsipaebaponajëbeje. Itsiata baitsi jane patatsipaebilivaisianëbeje, apo panejumecovënëtsimë. ¹² Catsipaebi atatsi xua Dioso exanapona mapanacuataje, itsiata apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtatsia? jai Jesús.

¹³ Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabet-sia icatsia pepatsinexatsica mapanacuayabetsicaje petsipae-binexa jivijavabelia pacuenia itsi athëbëtatsia. Caenë, Dax-itajivi Pematapijinë, caëjëpatsi jivi petsipaebinexa pacuenia itsi athëbëtatsia. Tsipaji baja cajena bajaraponë athëbëvetsica pepatsinë. Tsipaji baja cajena athëbëtatsia peponaponaenë.

¹⁴ Bajayata petusato nacuata jivi ayaibitsaëto yatëpaponä jomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. ¹⁵ Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena maticabi apo pevereverecaejava, nayabarajai Jesús pijacuata Nicodemojavabelia.

Pacuenia Dioso exana piasivaxae mapanacuapijivije yabara pelivaisi

¹⁶ Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexënato mapanacuayabetsicaje mapanacuapijivije Diosovecua penaxuabiyaniya. Pamonae sivanajamatabëcopata Dioso pexënatojavabelia, apo naxuabi tsane. Bajarapamonae maticabi apo pevereverecaejava, Dioso rajutsianatsi. ¹⁷ Dioso apo itorobitsica pexënato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexënato, pejamatabëcueneta Dioso pecapanepaenexa mapanacuapijivije pibisiacuene pexanaeneconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeneconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabëcopatsi pepo caenë Dioso pexënatojavabelia. ¹⁹ Ponë Daxitajivi Pematapijinë, bepecotia picani. Tsipaji jivi tsipaebapona pexaniajailivaisi jivi pejamatabëcueneitayotsinexa. Itsiata mapanacuapijivi apo jitsipae pejamatabëcueneitayotsinexatsi. Jitsipa saya piaitaquirijamatabëcuene. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. ²⁰ Daxita pamonae pibisiacuene pexanavanapaevi, apo jitsipae Daxitajivi Pematapijinë pejamatabëcueneitayotsinexatsi. Bajaraxuata Daxitajivi Pematapijinëjavabelia apo patsi. Tsipaji cjunava peyapëtaeyaexanaeyanivatsi penaneconitsijava Diosojavabelia

pibisiacuene pexanaeneconi yabara. ²¹ Pamonaē jumecovēnēta Dioso pexaniajailivaisi, bajarapamonae apo cujunavi. Bajarapamonae pata Daxitajivi Pematapijinējavabelia pejamatabēcueneitayotsinexatsi. Bajarapamonae jitsipa daxitajivi peyapētaenexatsi Dioso peyavenonaponaejavatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinē vajunupaeba Jesús yabara pelivaisi

²² Jesúsbeje Nicodemobeje pecuaicuajiaicujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barēponapona. Bajarapamonae bautisabapona jivi. ²³ Juan pijinia itsamonae bautisabapona Enón tomarata. Enóntomara eca Salimtomara imoxoyojavata. Bajarajota Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. ²⁴ Bajarapacuenia Juan jivi bautisabapona abaxē ita apo etsitsi penaneconitsivi pejebabiabibota.

²⁵ Nexata Juan pijajiviyajuvēnēvi anaeya najumenotsiaya cuaicuajiai judiónējavabelia. Juan pijajivi jumaitsi:

—¿De meta ponē ita nacabautisaba, nacajamatabēcuenexaniavaetsiana Dioso vajanacabarajamatabēcuene xanepanaenexa? jai Juan pijajivi judiónējavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponē caxitajarabame Jordánmene itsapanatalia, ponē vajunupaebame paxanējavaberena, bajaraponē ata aeconoxae jivi bautisabapona. Nexata daxitajivi bajaraponējavabelia pona, jai Juan pijajivi.

²⁷ Nexata Juan jumaitsi pijajivijavabelia:

—Xuavajēto xaina caejivi canacujitsia, Dioso perajutsix-aetsi xaina. ²⁸ Pamatacabi jumaitsinē tsabiabi jivijavabelia: “Xanē raja apo Cristonē, ponē Dioso athēbēvetsica itorobi-jitsiatsica jivi pecapanepaenexa. Saya raja taneitorobinē Cristo pevajēnaeya, talivaisipaebanajetarucaenēnexa,” ita janē, paxamē ata panejumetaeyabiabame. ²⁹ Ponē pita petiriva pijavanexa, nacasaba. Nexata pejananacasabinē peyapētaenētsi, namuxunaevetanuca imoxoyo. Bajaraponē ata nabarēya ita jumetane pejananacasabinē pebarēyajava. Bajara pijinia pacuenia xanē ata aeconoxae bitso jamatabēcuenebarēyanē, ita vēnēlvaisitaniji jivi peponaejava Jesúsjavabelia. ³⁰ Pevajēnaeyabelia jivi ayaibitsaētoxaeto Jesús pēnaponaenatsi. Xanē nexata tanepēnaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi

³¹ Icatsia Juan jumaiti pijajivijavabelia:

—Athëbëvetsica pepatsinë, bitso cajena ayaijamatabëcuenenë daxitajivi matatoxenetsia. Pamona naexana mapanacuataje, bajarapamona saya mapanacuapijivije. Nexata saya cuaicuaijai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi matatoxenetsia bitso ayaijamatabëcuenenë.

³² Bajaraponë picani tsipaeba jivijavabelia pacuene tane athëbëtatsia. Tsipaebanua picani palivaisi ata jumetane athëbëtatsia. Itsiata baitsi jane daxitajivi jumeabatsi petsipaebilivaisianë.

³³ Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaiti: “Dioso cajena pexaniajailivaisi pepaebinë,” jamatabëjai.

³⁴ Ponë Dioso itorobatsi, bajaraponë tsipaeba jivijavabelia Dioso pitorobilivaisi. Tsipaji Dioso rajutatsi Espíritu Santo. Yajavaponaponaeyaexanatsinua Espíritu Santo ayaicuenia. ³⁵ Dioso bitso asiva pexënato. Tocopata daxitacuene pevetsinexa, pitorobinexanua.

³⁶ Pajivi najamatabëcopata Dioso pexënatojavabelia, xainaena matabi apo peverevereaejava. Pajivi apo najamatabëcopatsi Dioso pexënatojavabelia, matabi apo peverevereaejava apo xinae tsane. Bajarapajivi Dioso naneconitsiaexanaenatsi daxita matabijavabelianexa, jai Juan pijajivijavabelia.

4

Pacuenia Jesús barëcuaicuaijai Samaria nacuapijiva yabara pelivaisi

¹ Fariseovi jumetane jivi pejumaitisijava: “Jesús baja pijajivi ayaibitsaëttoxaneto xainaponapona. Bautisabaponanua jivi ayaibitsaëto Juan matatoxenetsia,” pejaijava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapëtane fariseovi pevënëlivaisitaejavatsi pacuenia jivi baracuaicuaijaitsi, nexata naviata Judea nacuaverena. Pona Galilea nacuayabelia.

⁴ Nexata Galilea nacuayabelia peponaenë, Jesús, pijajivi yajava, patanajetaruca Samaria nacuajava. Tsipaji bajaraxuayo namuto najetaruca. ⁵ Nexata Jesús ecojopa Samaria nacuata pecaetomarata, Sicarvënë tomarata. Sicar tomaravecua imoxoyo boca pairayo Jacobpijinë bajayata rajuta pexënato Josépijinë. ⁶ Bajarapairayota eca meramëthë, pamëthë Jacobpijinë bajayata cueyeta. Jesús sicuerana peponaejava namuto. Nexata Jesús ecojopa meramëthë muxuneneta. Matonejeepatota Jesús ecojopa. ⁷⁻⁸ Jesús caenë

eca meramëthëjavata. Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapamëthëta. Nexata Jesús jumaiti Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaiti:

—¿Detsa xuajitsia mera nevajëtame niapaenexa? Xamë judíonëmë. Xanë saicaya Samaria nacuapijivanë, jai bajarpova Samaria nacuapijiva Jesúsjavabelia.

Bajarapacuenia Samaria nacuapijiva jumaiti Jesúsjavabelia tsipaji judíovibeje Samaria nacuapijivibeje naitajitsibiaya nanaëcotabiaba. ¹⁰ Nexata Jesús jumaiti Samaria nacuapijivajavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcuenyapëtaemë. Itsa nejamatabëcuenyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi piaitavamera, jivi pejamatabëcueneasaëyaexanaamera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaiti Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piaitavamera tanerajutsinexamë? ¹² Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmë? jai Samaria nacuapijiva Jesúsjavabelia.

¹³ Jesús nexata jumaiti:

—Jivi apaeyabiabi ata mapamëthëpijimeraje, itsiata mera pejitsipaejava apo tovereverecabiabitsi. ¹⁴ Pajivi apaena xanë tarajutsimera, bajarapajivi xainaena matababi apo peverevereaejava. Nexata pacuenia meramëthë eca daxitamatacabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaiti Jesúsjavabelia:

—Bajarapamera nerajure icatsia mera tanamatavenonaponaeyaniva. Nexata baja mera apo puanabiabinë tsane mapamëthëabereneje, jai Samaria nacuapijiva.

¹⁶ Jesús nexata jumaiti Samaria nacuapijivajavabelia:

—Amona junaremelia. Yajavarenamë tsane, jai Jesús.

¹⁷ Nexata Samaria nacuapijiva jumaiti:

—Apo xainaenë raja tamona, jai.

Nexata Jesús jumaiti:

—“Apo xainaenë raja tamona,” itsa jamë, apo najumetsënëtsimë cajena. ¹⁸ Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús pejumaitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaebinëmë profetanëmë? ²⁰ Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudíovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovinë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënënë. ²³ Ajena mapamatacabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonae xaniavaetsia vajëtsiana daxita pejamatabëëthëtojavavetsina. Pepo pexaniajaijamatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. ²⁴ Dioso cajena apo vajataenë. Pamonaе vajëta Diosojavabelia, xaniavaetsia pexaniajaijamatabëcueneta bevajëta, pepo pejamatabëëthëtojavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

²⁶ Jesús nexata jumaitsi Samaria nacuapijivajavabelia:

—Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuajaitsanucaexae Samaria nacuapijivajavabelia.

Itsiata itsanë ata: “¿Detsa xua jitsipame?” apo jai Samaria nacuapijivavabelia. Jesúsjavabelia ata apo yanijobi: “¿Detsa xuajitsia bajarapova barëcuaicuajiamë?” apo jai itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

²⁹ —Panataemelia ponë netsipaeba daxita pacuenia ex-anajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

³⁰ Nexata bajarapamonae pijatomaravelia ponalia. Taeothopalia Jesús. ³¹ Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

³² Nexata Jesús jumaitsi pijajivijavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonae, nayanijoba.

—¿Itsanë tsamëra tsipaji vajacovëta Jesús pexaejava tocap-atatsi penabaninexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. ³⁵ Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, maticabi apo pevereverecaejava jivi pexainaenexa, bajarapajivi sivajamatabëcuenebarëya tsane ayaibitsaëto itsa jumecovënëtsianatsi. Itsamonae baja picani namataxainaeya tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatabëcuenebarëya tsane. ³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebineja, pacaitorobatsi. Nexata pamonae

copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuenecopaba baja Diosojavabelia panetsipaebixae talivaisi, jai Jesús pijajivijavabelia.

³⁹ Samaria nacuapijiva, pova Jesús barëcuaiquaijai mera mëthëjavata, pijatomarapijivijavabelia tsipaeba ayaibitsaëtoxanetojavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtoxaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanajë, Jesús netsipaeba,” pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponaponaenexa bajarapamonaejavata. Nexata Jesús bajarapamonaejavata naponapona anijamatacabibeje. ⁴¹ Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëtoxaneto jumecovënëta Cristocuene. ⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaeneconimivecua, jai bajarapamonae penavajunupaebivajavabelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuyabelia. ⁴⁴ Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiy-ataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuyabelia, bajaranacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae kujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. ⁴⁷ Nexata gobierno pijajivitonë vënëlivaisitanetsi Jesús Judea nacujavaverena pepatsijava, Galilea nacuyaberena. Nexata bajaraponë lia Jesúsjavabelia.

Piniijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. ⁴⁸ Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicueno Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijajivitonë jumaitsi:

—Jesús, naxanitsiayo tapëta ponare taxënatonëyo abaxë petëpaevajënaeya, jai.

⁵⁰ Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia. ⁵¹ Itsa bajaraponë patanajetarucalia, nexata pijajivi mataenenarenatsi. Nexata pijajivi jumaitsitsi:

—Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeepatota, vecuaajibitsi baja peromaebi-javatsi, jai pijajivi.

⁵³ Nexata bajaraponë jamatabëjumaitsi:

—Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacuajavaverena, Galilea nacuajavaberena, cotocaevi bajarapapiniijicueno Dioso pesaëta exana Galilea nacuaata.

5

Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi

¹ Judíovi fiesta exana Jerusalén tomarata. Nexata Jesús nalia. ² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërëtobeje eca. ³ Bajarapabobërëtonëjavata piavitanevi ayaibitsaëttoxaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena

pucayo pemenenacujirubijava. ⁴ Athëbëvetsica ángel jemata runabiabica pucayojavabetsica. Nexata pucayo mēnacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitanecuene capunatsi, vecuaajibiaexanabiabatsi. ⁵ Bajarajota naboca treinta y ocho pavaibeje piavitanetsanucaenē, petabusipacuenabinētsi. ⁶ Itsa Jesús taeyabuata bajaraponē, nexata yapētaeyabuata bajayajebi piavitanenēcuene. Nexata Jesús jumaitsi bajaraponējavabelia:

—¿Jitsipame tsaja nejamatejemajava? jai Jesús.

⁷ Nexata bajaraponē jumaitsi:

—Itsajivi ata apo xainaenē tanecopatsinexareca pucayojavabereca itsa mene nacujiruba. Ajena narunabiabijitsianēreca, bajarapaepatota itsajivi netsurunabiabareca copiyaya, jai piavitanetsanucaenē.

⁸ Jesús nexata jumaitsi piavitanetsanucaenējavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitanetsanucaenēmi. Pita baja pijapanayo. Ponaexanepana baja. Bajarapacuenia petabusipacuenabinētsi Jesús jamatejemayaexana judíovi penacueraevetsimatacabita.

¹⁰ Nexata judíovi jamatabēcuenenavēxaniabiaya jumaitsi petabusipacuenabinēmitsijavabelia:

—Ajena raja vajanacueraevetsimatacabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenējavayo ata penacueraevetsimatacabita.

¹¹ Nexata petabusipacuenēbinēmitsi jumaitsi judíovijavabelia:

—Tanejamatejemayaexanaenē raja nejumaitsi: “Nijapanayo pire. Ponare baja,” nejai, jai petabusipacuenabinēmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata baitsi jane bajaraponē apo vēnyapētae pavēnēnē jamatejemayaexanatsi. Apo vēnyapētae Jesús. Tsiipaji bitso jivi ayaibitsaētoxaneto bajarajota jinavanapa. Jesús baja cajena pepuaponae itsajavabelia, yanijobatsi.

¹⁴ Bajaraxuacujinae icatsia Jesús caxitajarabaxuaba bajaraponē templobota. Nexata Jesús jumaitsi bajaraponējavabelia:

—Taema. Aeconoxae baja jamatejemamē. Icatsia pētsa baja matavējēa exaname pibisiacuene. Icatsia raja itsa exaname, bitsomē tsipae, jai Jesús bajaraponējavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita. ¹⁷ Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexënato jamatabëcuenecaëjëpatsi daxitacuenepexanaenexayabara pelivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacueneyavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa niasiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaexanaponae na bajarapacuenemata toxenetsia ayaicuene taexanaponae nexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaename. ²¹ Taxa petëpaevimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo pevereverecaejava. Nexata bajarapajivi apo naneconitsiaexanaenë tsane pibisiacuene pexanaeneconi yabara. Bajarapajivi tēpae

ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonaë apo xainae maticabi apo peverevereceaëjava, pijamaticabi baja tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena maticabi apo peverevereceaëjava. ²⁶ Taxa raja caëjëpatsi jivijavabelia perajutsinexa maticabi apo peverevereceaëjava. Nexata xanë ata taxa necaëjëpaëyaexana jivi tarajutsinexa maticabi apo peverevereceaëjava. ²⁷ Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapijinënë. ²⁸ Pëtsa pajamatabëcuenenabenajacame patacatsipaebilivaisi yabara. Itsamaticabi nejumetaena daxita petëpaëvimi ata tatsipaebilivaisi. ²⁹ Nexata bajarapamonaë pemëthëanëmi vecuapitsapaena. Pamonaë pexaniacuene pexanaevimi, Dioso icatsia asaëyaexanaenatsi. Nexata bajarapamonaë xainaena maticabi apo peverevereceaëjava. Pamonaë pibisiacuene pexanaevimi, icatsia Dioso asaëyaexanaë atatsi tsane, bajarapamonaë naneconitsiaya jinavanapaena daxitamaticabijavabelianexa, jai Jesús judíovijavabelia.

Pacuenia Jesús jivi tsitanajamatabëcueneitajëta pecaëjëpaenëcuenetsi daxitacuene pexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexainaevi naneconitsiaya jinavanapaëyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caëjivi canacujitsia, bajarapaneconivajëtota caëjivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonaë saya nejumeeabijitsipa. ³² Itsiata baja Juanpijinë jivibautisabinëmi nevajunupaëba xaniavaetsia. Yapëtaniji bajaraponë tanevajunupaëbijava pexaniajajamatabëcueneta. ³³ Paxamë itsamonaë paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaëba paneitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaëba panejumecovënëtsinexa patacacapanepaëjavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcueneitayota. Caepatoyo picani

pasivajamatabëcuenebarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacune Dioso athëbëvetsica pitorobinëtsitsicaje.” tanesivajamatabëjainexa. ³⁷ Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënu. ³⁸ Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. ³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana maticabi apo pevereverecejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. ⁴⁰ Paxamë itsiata apo panejumecovënëtsimë panexainaenexa maticabi apo pevereverecejava, jai Jesús judíovijavabelia.

⁴¹ Icatsia Jesús jumaitsi judíovijavabelia:

—Apo exanaenë ayaicuene taexanaejava saya jivi tanesivajamatabëjumaitsinexa: “Jesús raja ayaijamatabëcuenenë,” tanesivajamatabëjainexa. ⁴² Pacajamatabëcuenyapëtanetsi. Yapëtaniji cajena apo panejitsipaejava Dioso. ⁴³ Xanë athëbëvetsica patsicajë mapanacuayabetsicaje taxa Dioso taneitorobixaetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuene pijilivaisi papecatsipaebinexa, nexata pajumecovënëtsianame. ⁴⁴ Paxamë pajitsipame mapanacuata ëjivi papecasivabarëyanexa, papecayaiyataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacaëjëpae panejumecovënëtsinexa Dioso pejumelivaisi. ⁴⁵ “Mara ponëje nacaneconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabëjumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata

nacacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. ⁴⁶ Itsa pepacuene pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. ⁴⁷ Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

6

Pacuenia Jesús pexaejava rajuta cinco mil ponëbeje yabara pelivaisi

(Mt 14.13-21; Mr 6.30-44; Lc 9.10-17)

¹⁻⁴ Bitso baja imoxoyo pevajënae pejonenexa judíovi pijafiesta, pascuavënëfiesta. Bajarapamatacabi Jesús pona Galilea pucaxaneto itsapanabelia. Bajarapapuca itsavënë Tiberiaspuca. Nexata jivi ayaibitsaëtoханeto Jesús pënaponatsi. Tsipaji Dioso pesaëta Jesús ayaicueene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatsia. ⁵ Itsa Jesús tane jivibitsaëtoханeto pecujibijavatsirena, Jesús jumaitsi Felipejavabelia:

—¿Detsa belia comuatsianatsi pexaejava pexaenexa mapabitsaëtoханetoje? jai Jesús.

⁶ Bajarapacuenia Jesús jumaitsi tsipaji jamatabëyapëtane pacuenia Felipe jumecanaviatsijitsiatsi. Jesús baja cajena picani yapëtane pacuenia pexaejava mitsaexanaejitsia bajarapajivibitsaëtoханeto. ⁷ Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo yacajëpaetsi tsipae pexaenexa daxita mapajivibitsaëtoханetoje, jai Felipe.

⁸ Itsanë Jesús pijajivitonë Andrés, Simón Pedro pejuyapijinë, jumaitsi Jesúsjavabelia:

⁹—Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo cajëpae tsipae cajena vajarajutsinexa mapajivibitsaëtoханetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtoханeto bejamatabëcuene

cinco mil meta ponëbeje. ¹¹ Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxae-javanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaejivibitsaëtoxfanetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxae-javanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaejivibitsaëtoxfanetojavabelia. Daxita bajarapamonae xaniavaetsia nabane. ¹² Itsa baja bajarapamonae penia, Jesús jumaitsi pijajivijavabelia:

—Pacaetuae baja peyajuvënënacopabenaëjavanë penaxu-abenaeyaniva, jai Jesús pijajivijavabelia.

¹³ Nexata Jesús pijajivi caetuata peyajuvënënacopabenaëjavanë. Vënëba doce xuabeje bemapirecuenia pexanaëjavanë. Cinco papanbëmibeje picani cebadavënëbenota pexanaëpanbëanë. ¹⁴ Nexata bajarapajivibitsaëtoxfaneto itsa tane Jesús ayaicuene Dioso pesaëta pexanaëjava, najumaitsi Jesús yabara:

—Diosojumepaëbinë profeta, ponë vaxaitsi copiaeve-tavanapatsi pepatsijavanexatsica, bajara jane maponëje. ¹⁵ Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi (Mt 14.22-27; Mr 6.45-52)

¹⁶ Itsa baja meravi, Jesús pijajivi puca itapayabereca pona. ¹⁷ Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸ Jesús baja pijajivi pepuaponae jerata, taxuaba jovibo pebubujaijava. Nexata malataca bitso ayai. ¹⁹ Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaëlia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi. ²⁰ Nexata Jesús jumaitsi pijajivijavabelia:

—¡Xanë raja najetarucajè! ¡Pëtsa panecujunavame! jai Jesús pijajivijavabelia.

²¹ Nexata Jesús pijajivi jamatabëcuenebarëya. Jesús baja nexata nonorena jera ënëberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²² Pamonaë Jesús pexaejava rajuta, abaxë nacopabilia puca itsapanatalia. Nexata meravigia pitsijavata bajarapamonae najumaitsi:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatanuca majotaje, najai bajarapamonae.

²³ Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayaibitsaëttoxaneto, bajarajota vecuaimoxoyo yaëba. ²⁴ Nexata pamonaë Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitsinexatsi Jesús.

Pacuenia Jesús bepitavapan yabara pelivaisi

²⁵ Jesús pepëjaitshivitsi itsa pata Capernaum tomarabelia, caxitajarabatsi Jesús. Nexata bajarapamonae jumaitsi Jesúsjavabelia:

—Jesús, ¿detsa pacujinae patame baja maberénaje? jai.

²⁶ Jesús nexata jumaitsi bajarapamonaejavabelia:

—Xaniajanë pacuenia pacatsipaebijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Patae atamë ayaicueene Dioso pesaëta taexanaejava, apo panejumecovënëtsimë. ²⁷ Pëtsa pacajamatabëcueneena ëpevereverecaejava yabara. Pacuenia panexaejava baverevereca, bajarapitsijava. Biji rajane pacajamatabëcueneenaë apo pevereverecaejava yabara. Nexata xanë, Daxitajivi Pematapijinënë, pacarajutsianatsi maticabi apo pevereverecaejava. Taxa Dioso baja cajena nitoroba patacarajutsinexa maticabi apo pevereverecaejava, jai Jesús bajarapamonaejavabelia.

²⁸ Nexata bajarapamonae jumaitsi Jesúsjavabelia:

—¿Detsa nexata xua bepaexanajë Dioso pejitsipaecue? jai bajarapamonae.

²⁹ Nexata Jesús jumaitsi bajarapamonaejavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

³⁰ Nexata icatsia bajarapamonae jumaitsi Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacajumecovënëtsinexa Dioso pecaitorobicuenetsica? ³¹ Vajasalinaivimi pina bajayata baxaevanapa manávënëjava petusato nacuata pacuenia baja Dioso pejumelivaisibaxutota jumaitsi. Dioso baja cajena pejumelivaisibaxutota jumaitsi mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³² Jesús nexata bajarapamonaejavabelia jumaitsi:

—Xaniajanë pacuenia pacatsipaebijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamë ata Dioso pacarajutsiana athëbëpijipan, pepacuenie pexaniajaipan. ³³ Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matakabi apo peverevereaejava, nayabarajai Jesús pijacuata bajarapamonaejavabelia.

³⁴ Nexata bajarapamonae jumaitsi:

—Jesús, bajarapapan panerajutaponaename daxitamatacabi canacujitsia, jai.

³⁵ Nexata Jesús jumaitsi bajarapamonaejavabelia:

—Papan jivi rajutsianatsi matakabi apo peverevereaejava, xanë rabaja bajarapannë. Pajivi xanëjavaberena pata, apo piajani cajena tsane pejamatabëthëtota. Pajivi nesivanajamatabëcopata xanëjavaberena, apo jitsipae tsane icatsia mera. ³⁶ Paxamë apo panejumecovënëtsimë, patae atamë Dioso pesaëta pinijicuene taexanaejava. ³⁷ Daxita pamonaë taxa tanerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. ³⁸ Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica. ³⁹ Mara pacuene taxa Dioso jitsipa tatoexanaenexaje. Apo jitsipae cajena tatoxuabijava caejivi ata tanerajutsiviyajuvënëvi. Pamatacabi icatsia patsianicajë, daxita bajarapamonae toasaëyaexanaenajë icatsia petëpaejavamivecua. ⁴⁰ Mara pacuene taxa Dioso jitsipaje. Daxita pamonaë tanetaevi Dioso pexënatonë, nexata itsa nesivanajamatabëcopata, bajarapamonae xainaena matakabi apo peverevereaejava. Bajarapamonae icatsia asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

41 “Xanë rabaja athëbëvetsica tapatsipan,” penayabarajai-
java Jesús jivijavabelia, judíovi baracuaicuajaitsi pepënëvelia.

42 Nexata judíovi najumaitsi:

—Mara ponë Jesús, Josépijinë pexënatuje. Vaxaitsi baja
cajena yapëtanetsi paxapijinë, pena ata. Nexata bajaraponë
acuenebi pejumaitsijava: “Athëbëvetsica tapatsinë,” pejai-
java, najai judíovi Jesús yabara.

43 Nexata Jesús jumaitsi bajarapamonaejavabelia:

—Jamatabëcuenenavëxaniabiaya pëtsa panebaracuaicuai-
jamë tapënëverena. 44 Itsajivi ata raja apo caëjëpaetsi
pijacuata xanëjavaberena tanesivanajamatabëcopatsinexa.
Matapania taxa Dioso, taneitorobinëtsica, itsa
caëjëpaeyaexanaenatsi, nesivanajamatabëcopatsiana.
Pajivi nesivanajamatabëcopatsiana, asaëyaexanaenajë
petëpaejavamivecua pamatacabi icatsia patsianicajë.

45 Bajayata Diosojumepaebivimi peyaquinaelivaisi jumaitsi
mapacueniaje: “Dioso cajena yapëtaeyaexanaena daxitajivi
pexaniajailivaisi,” jai. Nexata pajivi jumecovënëta
taxa peyapëtaeyaexanaelivaisi, bajarapajivi xanë ata
nesivanajamatabëcuenecopatsiana, jai Jesús judíovijavabelia.

46 Icatsia Jesús jumaitsi judíovijavabelia:

—Itsajivi ata cajena taxa apo tae. Xanë raja caenënë
taxa Dioso taniji. Tshipaji bajaravetsica tapatsinë.

47 Xaniajanë pacuenia pacatsipaebijitsiatsi. Pajivi
nesivanajamatabëcopatsiana, xainaena matacabi apo pev-
ereverecajava. 48 Xanë rabaja pitavapannënë. Nexata jivi
rajutsianajë matacabi apo pevereverecajava. 49 Bajayata
panijasalinaivimi xaevanapa picani manávënëjava
petusato nacuata. Itsiata baitsi jane bajarapamonae
bajayajebi bajaraxua xaevanapae ata, tēpa itsiata. 50 Xanë
raja pacanavajunupaebatsi athëbëvetsica tapatsinë.
Pajivi nesivanajamatabëcuenecopatsiana, pepacuene apo
tēpae tsane. 51 Xanë rabaja cajena pitavapannënë,
athëbëvetsica tapatsinë. Pajivi jumecovënëtsiana
tasivatēpaejava pijaneconi yabara, jamatabëcueneaitava
tsaponaponae tsane daxitamatacabijavabelianexa. Papan
rajutsianajë tanejumecovënëtsivi, tavito rabaja tsane.
Navirajutsianajë daxitanacuapijivi pexainaenexa matacabi
apo pevereverecajava, nayabarajai Jesús judíovijavabelia.

52 Nexata judíovi najumeanaenota ëpamonae bajarapacue-
nia Jesús pejumaitsijava yabara. Najumaitsi bajarapamonae:

—¿Detsa pacuenia maponë nacanavirajutsipa
vajavixaenexaje? Acuenebi raja vajanacnavirajutsijava
vajavixaenexa, najai judíovi.

53 Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënuua tsane, nexata maticabi apo peverevereaejava, apo paxainaemë tsane. ⁵⁴ Pajivi nevixaena, nejanaapaenanua, xainaena maticabi peverevereaejava. Pamaticabi icatsia patsianicajë, bajarapajivi icatsia asaëyaexanaenajë petëpaejavamivecua. ⁵⁵ Tavito rabaja cajena pepo pexaniajaijava jivi pexaenexa. Tajana rabaja pijinia pepo pexaniajaijava jivi piapaenexa. ⁵⁶ Pajivi nevixaena, nejanaapaenanua, bajarapajivi yajavaponaponaenajë. Bajarapajivi ata pijinia neyjavaponaponaena. ⁵⁷ Taxa, ponë nitorobica, bajaraponë daxitamaticabijavabelianexa piasaëtsaponaponaenë. Bajaraponë pejamatabëcueneta xanë ata daxitamaticabijavabelianexa asaënë tsaponaponaë. Nexata pajivi nevixaena, bajarapajivi pijinia tajamatabëcueneta asaë tsaponaponaë tsane daxitamaticabijavabelianexa. ⁵⁸ Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonaemi itsiata tēpa baja cajena. Biji rajane pajivi xanë nevixaena, ponaponaena daxitamaticabijavabelianexa, jai Jesús judíovijavabelia.

⁵⁹ Bajarapacuenia Jesús jumaitsi judíovijavabelia livaisi pet-sipaebijavata Capernaum tomarata, judíovi penacaetuatabi-abibota.

Maticabi apo peverevereaejava yabara pelivaisi

⁶⁰ Ayaibitsaëto, pamonaë Jesús pepëta najinavanapa, itsa jumetane Jesús petsipaebilivaisi, apo jumexaniataë. Najumaitsi ëpamonae:

—Penajumetsënëtsilivaisi saya nacatsipaeba. ¿Jipatsa jumecovënëtsiana? Ajibi cajena, najai ëpamonae.

⁶¹ Nexata Jesús jamatabëcueneyapëtane pacuenia pepënëvelia baracuaicuajaitsi. Nexata Jesús yanijoba pepënaponaevitsijavabelia. Jumaitsi:

—¿Apo bepexaniajailivaisi tsaja pajumetaneme patacatsipaebilivaisi? ⁶² Xanë Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëabetsia taponaponaenacuamijavabetsia? ⁶³ Espíritu Santo baja cajena pejamatabëcueneta jivi xaina maticabi apo peverevereaejava. Ëjivi raja pejamatabëcueneta apo caëjëpaetsi pexainaenexa maticabi apo peverevereaejava. Patacatsipaebilivaisi baja cajena papecatsijamatabëjonenexa picani, panexainaenexa maticabi apo peverevereaejava. ⁶⁴ Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabëcueneyapëtane pamonaе apo jumecovënëtsijitsiatsi. Jamatabëcueneyapëtanenua tajëvelia ponë canajetsijitsiatsi pijavajabitsaë pecobeyabelia. ⁶⁵ Nexata Jesús icatsia jumaitsi pepënaponaevitsijavabelia:

—Bajaraxuata cajena pacajumaitsitsi: “Itsajivi ata raja apo caējëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caējëpaeyaexanaenatsi, nesivanajamatabëcopatsiana,” pacajaitsi, jai Jesús pepënaponaevitsijavabelia.

⁶⁶ Bajara nexata jota ayaibitsaëto Jesús pepënaponaevitsi vepënnaviabatsi baja. Nexata bajarapamonaе pematatsënëa baja apo pënaponaeitsi Jesús. ⁶⁷ Nexata Jesús yanijoba doce ponëbeje pijajivijavabelia. Jumaitsi:

—¿Paxamë ata tsabaja pajamatabënaviabame? jai Jesús.

⁶⁸ Nexata Simón Pedro jumaitsi Jesúsjavabelia:

—Tajatuxanenë, itsa panaviabajë, ¿jipatsa nexata papënaponaejitsipajë xamëvecua? Xamë rabaja caenëmë panetsipaebame maticabi apo pevereverecaejava pataxainaenexa. ⁶⁹ Paxanë rabaja pacajumecovënëtatsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponaenë daxitamatacabijavabelianexa pexënatomë, jai Simón Pedro Jesúsjavabelia.

⁷⁰ Jesús nexata jumaitsi pijajivijavabelia:

—Xanë rabaja pacaitapetatsi doce paponëmëbeje. Itsiata baitsi jane paxamëyajuvënënë, itsanë, dovathi pijajivitonë tsaponaponaе, jai Jesús.

⁷¹ Bajarapacuenia Jesús itsa jumaitsi, Judas Iscariote, Simón pexënato, yabara jumaitsi. Judas Jesús canajetsijitsiatsi pijavajabitsaë pecobeyabelia. Judas rabaja picani Jesús pijajivitonë, doce ponëbejeyajuvënënë.

7

Pacuenia Jesús pejuyapijivi apo jumecovënëtsitsi yabara pelivaisi

¹ Jesús ponapona Galilea nacuajava. Apo jitsipae peponaponaеjava Judea nacuajava. Tsipaji bajarajota judíovi jamatabëbeyaxuabatsi. ² Imoxoyo baja pevajënae pejonenexa fiesta, pafiestamatacabi judíovi bobërëtonë exanabiaba. Nexata judíovi bajarapabobërëtonëta jinavanapabiaba bajarapafiestamatacabi. ³ Nexata Jesús pejuyapijivi junatatsi penaponaenexa bajarapafiestajavabelia. Jesús pejuyapijivi jumaitsi:

—Pëtsa nacopatame majotaje. Judea nacujavabelia liamëre. Bajarajotalia pijinia Dioso pesaëta pinijicuene nexanaponaejava nijajivi tsitaexanaename. ⁴ Pajivi pexanaejava yabara jitsipa pevënëlivaisitaenexatsi daxitanacuapijivi, bajarapajivi pexanaejava muetsia apo exanae. Nexata pepacuene Dioso pesaëta pinijicuene itsa exanaponame, nexata icatsia pinijicuene tsitaexanaename fiestajavata daxitanacuapijivi pitabarata. Nexata daxitajivi cayapëtaena, jaitsi Jesús pejuyapijivi.

⁵ Jesús pejuyapijivi ata apo jamatabëjumeconvënëtsi Cristocuene. Bjaraxuata bajarapacuenia pejuyapijivi ata jumaitsi. ⁶ Nexata Jesús jumaitsi pejuyapijivijavabelia:

—Abaxë raja tajamatacabi apo netocopiapatsi tanaitajëtsinexa daxitajivijavabelia. Itsiata paxamë apo paitsimë. Paepatota jamatabëpaponame, pacatoxanepana paneponaenexa. ⁷ Mapanacuapijivi cajena acuenebi paxamë papecaitojava. Itsiata baitsi jane xanë nitoya. Tsi-paji itavetaponajë pibisiacuene pexanavanapaejava. ⁸ Paxamë baja paponare fiestajavabelia. Xanë ra abaxë apo ponaenë. Tsi-paji abaxë apo netocopiapatsi paepatota ponaejitsianë, jai Jesús pejuyapijivijavabelia.

⁹ Bajarapacuenia Jesús pejumaitsicujinae, abaxë Jesús nacopatanuca Galilea nacuata pecotocaevinexa.

Pacuenia Jesús napona fiestajavabelia yabara pelivaisi

¹⁰ Jesús pejuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatuajëta apo naponae muetsia pepatsinexa. ¹¹ Jesús picani jaitatsi judíovi pevetsivi fiestajava. Najumaitsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

¹² Ayaibitsaëto jivi vëpaxapaxajaiya baracuaicuaijaiti Jesús. Itsamonae jumaitsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaitsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

¹³ Itsajivi ata apo cuaijai ayaijumeta Jesús yabara. Tsi-paji jumejunava judíovi pevetsivi pejumetaeyanivatsi.

¹⁴ Itsa baja fiesta epatua tsaponae pevereverecaenexa, nexata Jesús joneya temploboyalia. Taxuxuaba jane baja livaisi petsipaebijava. ¹⁵ Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenae judíovi pevetsivi Jesús yabara.

¹⁶ Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. ¹⁷ Pajivi jamatabëexana Dioso pejitsipaecuenia, bajarapajivi yapëtaena pepacuene Dioso pejumelivaisi tatsipaebijava. Nexata yapëtaenanua tajamatabëcuenepijilivaisi itsa tsipaebajë. ¹⁸ Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tspaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹ Jesús icatsia jumaitsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabianiva, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

²⁰ Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabëcabeyaxuabi, jai judíovi.

²¹ Jesús nexata jumaitsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacueraevetsimatacabita. Nexata itsa pataneme bajarapacuene, daxita paxamë pajamatabëcuenenabenajacame penacueraevetsimatacabita taexanaexae bajarapacuene. ²² Paxamë ata penacueraevetsimatacabita ata panacuenebabiabame. Tspaji penacuetonëyo paperabëcaucutabiabame penacueraevetsimatacabita ata ocho pamatacabibeje itsa xaina penaexanaecujinae. Baitsi paboupiperabëcaucutabiabame, Moiséspijinë baja cajena papecaitorobicuene. (Itsiata Moiséspijinë apo taxuxuabi bajarapacuene. Bajaraponëmi cajena pevajënaeya ata, panijasalinaivimi taxuxuaba bajarapacuene.)

²³ Bajarapacuenia penacuetonëyo paperabëcaucutabiabame penacueraevetsimatacabita ata, panejumecovënëtsinexa Moiséspijinë pitorobicuenia. ¿Detsa nexata xuajitsia xanë panebaraanaepaname penacueraevetsimatacabita pebi tajamatejemayaexanaejava yabara? ²⁴ Xaniavaetsia abaxë payapëtaenejevamë itsajivi pibisiacuene pexanaejava, pëtsa

abaxë pananeconitsiaexaname. Matapania xaniavaetsia payapëtaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapaevi najumaitsi Jesús yabara:

—¿Matsa ponë apo jaitarutsitsi pebeyaxuabinexatsije?
²⁶ ¡Pataema! Bajaraponë cuaicuaijai tsanucæ daxitajivi pitabarata. Itsiata itsajivi ata apo jumeitavetsi. Vajanacævetsivi ata meta jumecovënëta bajaraponë pepacuene Dioso athëbëvetsica pitorobijavatsitsica jivi pecapanepaenexa. Bajaraxuata bajarapamonæ apo jumeitavetsi. ²⁷ Vaxaitsi cajena yapëtanetsi itsaverena pata maponëje. Nexata acuenebi pijacuata: “Cristonë raja,” pejaijava. Tsipaji Cristo yabara tajëvelia jumaitsi mapacueniaje: “Itsajivi ata apo yapëtae tsane itsaverena patsijitsia Cristo,” jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamonæ pebaracuaicuaijijavatsi. Nexata Jesús ayaijumeta jumaitsi bajarapamonæjavabelia:

—Xanë yabara pajumaitsimë: “Yapëtanetsi bajaraponë. Yapëtanetsinua itsaverena pata bajaraponë,” pajamë. Itsiata baitsi jane apo patsinë tajamatabëcueneta. Biji rajane taneitorobinëtsica ponapona athëbëtatsia. Paxamë cajena apo payapëtaemë bajaraponë. ²⁹ Xanë yapëtaniji bajaraponë. Tsipaji athëbëvetsica tapatsinë. Bajaraponë baja cajena nitobica mapanacuayabetsicaje, jai Jesús bajarapamonæjavabelia.

³⁰ Nexata picani Jesús bajarapamonæ jamatabëvaetabatsi penaneconitsiaexanaenexatsi. Itsiata abaxë itsajivi ata apo vaetabitsi. Tsipaji abaxë Jesús apo tocopiapatsitsi pijamat-acabi pevaetabinexatsi. ³¹ Itsiata baitsi jane bajarapamonæyajuvënëvi ayaibitsaëto jumecovënëta Cristocuene. Nexata bajarapamonæ najumaitsi:

—Itsa pina Cristo patsianica, Dioso pesaëta pinijicuene pexanaejava exanaena. Bajara maponë pepacuene Cristoje, ponë Dioso athëbëvetsica itorobijitsiatsica jivi pecapanepaenexa. Tsipaji nacatsitajëta pesaë. Pinijicuene pexanaejava exana Dioso pesaëta. Tsipaji cajena itsanë ata mapanacuata apo cajëpaetsi bajarapitsipinijicuene pexanaenexa, najai bajarapamonæ Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaitsijava: “Pepacuene rabaja maponë Cristoje,” pejajjava Jesús yabara. Nexata fariseovibeje judíovi penamatacaitorobivibeje najamatabëcuenejêpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxë Jesús apo vaetabitsi. ³³ Jesús nexata templobota jumaiti judíovijavabelia:

—Abaxë raja bajayayo itsiata pacayajavaponapon-aenatsi. Bajaraxuacujinae jane baja naviatsianiajë taneitorobinëtsicajavabetsia. ³⁴ Paxamë picani panejait-sianame. Itsiata apo panecaxitajarabimë tsane. Tsipaji apo pacacaëjêpae tsane paneponaenexa itsabetsia poneajitsianë, jai Jesús judíovijavabelia.

³⁵ Nexata judíovi nayanijoba êpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranëjavabelia, itsabelia judíovi jinavanapa. Griegovi raeta livaisi tsipaebijitsia Jesús. ³⁶ Jesús naca-jumaiti: “Paxamë picani panejait-sianame. Itsiata apo panecaxitajarabimë tsane. Tsipaji apo pacacaëjêpae tsane paneponaenexa itsabetsia poneajitsianë,” nacajai. ¿De tsaeta pitsijamatabëcuene yabara bajarapacuenia Jesús naca-jumaiti? najai judíovi.

Apo pevereverecaemera yabara pelivaisi

³⁷ Pafiestamatacabi judíovi bobërëtonë exanabiaba, pecopi-arucaematacabi, jivi bitso najamatabëcuenereviabiaya bajinavanapa. Nexata bajarapamatacabi jivi ayaibitsaëto pitabarata Jesús nonotabapuna. Ayajumeta Jesús jumai tsanucæ:

—Pajivi mera jitsipa, xanëjavaberena ponae piapaenexa. ³⁸ Dioso pejumelivaisibaxutota jumaiti mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabëcueneyavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo pevereverecæjava,” jai Jesús judíovijavabelia.

³⁹ “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepit-saparucaemera,” itsa jai Jesús, jumaiti Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitsi jane abaxë

Espíritu Santo apo patsitsica. Tsipaji abaxë Jesús apo ponae athëbëabetsia.

Pacuenia daxitajivi Jesús yabara apo najamatabëcuenejëpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucamera,” pejaijava Jesús, jivi itsa jumetane, itsamonae jumaitsi:

—Xaniajai rabaja. Maponë Diosojumepaebinë profetanëje, ponë copiaevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaitsi:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaitsi:

—¡Apo Cristo raja! Tsipaji Cristo Galilea nacuaverena apo patsi tsipae. ⁴² Dioso baja cajena pejumelivaisibaxutota jumaitsi pacuenia Davidpijinë pemomoxiyajuvënënë naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

⁴³ Bajarapacuenia nexata jivi ayaibitsaëto apo najamatabëcuenejëpae Jesús yabara. ⁴⁴ Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi

⁴⁵ Papoliciávi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

⁴⁶ Nexata policíavi jumaitsi:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policíavi.

⁴⁷ Nexata fariseovi jumaitsi:

—¿Paxamë ata tsabaja pacayamaxëitojoroba bajaraponë? ⁴⁸ Caenë ata vajanacaevetsiviyajuvënënë, fariseoviya-juvënënë ata, apo jumecovënëtsi baja cajena bajaraponë Cristonëcuene. ⁴⁹ Pamonae jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi

pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënënë. Nicodemo nexata jumaitsi pevëna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaitsi Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaitsi. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

Petiriva pibisiacuene pexanaeva pamona pepëya yabara pe-livaisi

⁵³ Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

8

¹ Jesús pona Olivovënë tsutojavabelia. ² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia. ³ Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseovi yajava, jumaitsi Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. ⁵ Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaitsi bajarapacuenia Jesús saya pejamatabëcuenejÿetsinexatsi. Nexata Dioso Moiséspijinÿeta penajumecopatsilivaisivecua, saicayacuenia, Jesús itsa jume-canaviata, bajarapamonae neconitsijitsiatsi picani. Itsi-ata Jesús jamatabëcueneyapÿetane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. ⁷ Bajarapamonae bitso yani-jobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponÿ paxamÿyajuvÿenÿenÿ pibisiacuene apo pexanaenÿ, bajaraponÿ copiata iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquineca icatsia. ⁹ Nexata bajarapamonae itsa jumetane bajarapacuenia Jesús pejumaitsijava, bajarapamonae najamatabÿnapita, caenÿ canacujitsia, pibisiacuene pexanavana-paejava. Nexata bajarapamonae, caenÿ canacujitsia, templobovecua pitsapapona. Copiaya perujuvi pitsapa. Bajarax-uacujinae pevÿÿÿavi pitsapa. Itsa baja daxita pitsapa, caenÿ Jesús templobota nacopateca petiriva yajava. Bajarapova abaxÿ nuca bajarajota. ¹⁰ Nexata Jesús itsa nonotapuna, caeva taenuta. Nexata Jesús jumaitsi petirivajavabelia:

—¿Detsa belia pona pamonaе caneconita picani? ¿It-sanÿ ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaitsi:

—Jume raja. Caenÿ ata apo nebixanae ibotota, jai bajarapová.

Nexata Jesús jumaitsi:

—Xanÿ ata apo cananeconitsiaexanaetsi. Ponare baja. Pÿtsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailivaisita pejamatabëcueneitayotsinÿ yabara pelivaisi

¹² Jesús icatsia templobota jumaitsi jivijavabelia:

—Xanÿ raja pexaniajailivaisita daxitanacuapijivi jamatabëcueneitayotsianajÿ. Pajivi nepÿnagonaena, bajarapajivi jamatabëcueneitayotsianajÿ. Nexata xainaena matababi apo peverevereaejava. Bajarapajivi itsamatababijavabelia ata apo ajamatabëcueneitaquiri tsane, jai Jesús jivijavabelia.

¹³ Nexata fariseovi jumaitsi Jesúsjavabelia:

—Xamÿ saya nijacuata najamatabëcuenelivaisipaebame. Nexata apo payapÿetaenÿ nexaniajaicuene. Bajaraxuata apo pacajumecovÿnÿÿetsi, jai fariseovi.

¹⁴ Jesús nexata jumaitsi fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajê. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajê. Itsabelia ata ponaejitsianë, apo payapëtaemë. ¹⁵ Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacuene paneconivajêto xaina. Xanë abaxë apo naneconitsiaexanaenë itsajivi ata. ¹⁶ Itsiata itsamatacabi, itsa naneconitsiaexanaenajê Diosojavabelia pijaneconi pexainaevi, naneconitsiaexanaenajê paneconivajêtota xaina. Tsipaji caenënë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanaematacabi. ¹⁷ Dioso Moiséspijinëta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejêpaeya paebabeje, bajarapalivaisi bepajumecovënêtame,” jai. ¹⁸ Xanë baja cajena najamatabëcuenelivaisipaebajê. Taxa ata, ponë nitorobica, nevajunupaeba. Nexata baja panijanënêbeje najumejêpaeya pacatsipaebatsibeje xanë talivaisi, jai Jesús fariseovijavabelia.

¹⁹ Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabelia.

²⁰ Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabica-jonianë bobena, bajarajota Jesús livaisi tsipaebanuca. Itsi-ata abaxë itsajivi ata Jesús apo vaetabitsi penaneconitsiaex-anaenexatsi. Tsipaji abaxë pijamatacabi apo tocopiapatsitsi pevaetabinexatsi.

Pacuenia Jesús tajêvelia jumaitsi: “Paxamë apo pacacaêjêpae tsane paneponaenexa itsabelia ponaejitsianë,” jai yabara pelivaisi

²¹ Jesús icatsia templobota tajêvelia jumaitsi fariseovijavabelia:

—Xanë pacavecuaponaenatsi. Nexata paxamë panejaitsonianame. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatêpaename. Bajaraxuata paxamë apo pacacaêjêpae tsane paneponaenexa itsabelia ponaejitsianë, jai Jesús fariseovijavabelia.

²² Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjêpae tsane paxamë paneponaenexa itsabelia ponaejitsianë,” nacajai, najai judíovi.

²³ Nexata Jesús jumaitsi judíovijavabelia:

—Paxamë baja cajena mapanacuapijivimêje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinënêje.

²⁴ Bajaraxuata pacajumaitsi: “Paxamë pibisiacuene paneexanaeneconi, Dioso apo pacavecuaajibiaexanae tsane. Nexata panijaneconi payajavatêpaename,” pacajaitsi. Nexata paxamë panijaneconi payajavatêpaename itsa apo panejumecovënëtsimë patacavecuaajibiaexanaejavanexa pibisiacuene paneexanaeneconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

—¿Detsa xamë ponëmê? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. ²⁶ Paxamë bitso pibisiacuene paexanabiabame. Nexata ayailivaisi xainajë itsamonaejavabelia patacavajunupaebinexa pibisiacuene paneexanaejava. Nexata pibisiacuene paneexanaeneconi yabara, necaëjêpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapêtae bajarapacuenia Jesús petsipaebijava paxa Dioso yabara.

²⁸ Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinënë, paneyotarutsi-aexanaename cruzajavabelia patanebeyaxuabiaexanaenexamë, nexata matapania bajarapamatacabi paneyapêtaename ponëcuenenë. Nexata bajarapamatacabi payapêtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. ²⁹ Taxa, ponë nitorobica, neyjavaponapona baja cajena. Tajaepato apo neponaponaeaxanae. Tspaji exanabiabajë pacuene yabara taxa nesivajamatabëcuenearëyajitsia, jai Jesús bajarapamonaejavabelia.

³⁰ Itsa Jesús jumaitsi bajarapacuenia, ayaibitsaëttoxaneto judíovi jumecovënëtatsi Cristonëcuene: “Xaniajai cajena.

Maponëje Dioso itorobicatsi,” jamatabëjai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudíovi jumecovënëta Cristonëcuene, bajarapajudíovijavabelia Jesús jumaitsi:

—Itsa paxamë tsiteca pajumecovënëtavanapaename patacatsipaebilivaisi, nexata baja pepacuene patajajivimë tsane. ³² Nexata palivaisi pacatsipaebatsi, payapëtaename baja pexaniajailivaisicuene. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuena panetoexanabiabijavami, jai Jesús bajarapajudíovijavabelia.

³³ Nexata pajudíovi apo jumecovënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemomoxinë. Paxanë dajubicuena apo panecanajetsi itsanëjavabelia amoneya patatonacuenebabibinexa. “Pacopabianame baja itsanë papecaitorobicuena panetoexanabiabijavami,” itsa panejamë, ¿detsa pitsilivaisi yabara panejumaitsimë? jai Jesúsjavabelia pajudíovi apo jumecovënëtsi Cristonëcuene.

³⁴ Jesús nexata jumaitsi bajarapajudíovijavabelia:

—Xaniajanë pacuena pacatsipaebijitsiatsi. Daxita pamonaepibisiacuene pexanaevi, jamatabëcueneitorobabiabatsi dovathi pejamatabëcueneta. ³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënatotsaponaponaep. ³⁶ Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatacabijavabelianexa. Nexata baja dovathi apo pacaitorobabiabitsane matavëjêa pibisiacuene paneexanaenexa. ³⁷ Yapëtaniji cajena Abrahampijinë papemomoxicuenemë. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsipaebilivaisi. ³⁸ Xanë rabaja pacuena taxa netsitajêta, jivi tsipaebabiabajë. Paxamë ata paexanabiabame pacuena paneaxajivi pacaitoroba, jai Jesús judíovijavabelia.

³⁹ Nexata judíovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi. ⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpaneboxuabame. ¡Abrahampijinë cajena caeto ata apo exanae bajarapitsicuene! ⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamona.

⁴² Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya panetaejitsipame. Tsipaji Diosojavavetsica tapatsinë. Majotaje ponaponajë. Xanë raja saya tajamatabëcueneta apo patsinëtsica. Dioso raja nitorobica. ⁴³ ¿Detsa xuajitsia paxamë apo panejumeypätaemë patacatsipaebilivaisi? Apo pajitsipaemë patanenamuxunaevetsinexamë bajarapalivaisi. ⁴⁴ Paxamë rabaja cajena paneaxa dovathi. Papijajivimë. Pejitsipaecuenia jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. ⁴⁵ Xanë baja cajena pexaniajailivaisi pacatsipaebatsi. Itsiata apo panejume-covënëtsimë. ⁴⁶ ¿Jipatsa paxamëyajuvënënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejume-covënëtsimë? ⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaitsi Jesúsjavabelia:

—Paxanë itsa pacajumaitsi: “Xamë raja Samaria nacupijinëmë, dovathi neyjavaponaponaenë,” itsa pacajaitsi, paxaniajanë cajena, jai judíovi Jesúsjavabelia.

⁴⁹ Jesús nexata jumaitsi judíovijavabelia:

—Xanë cajena dovathi apo yajavaponaponaenë. Xanë taxa Dioso yayyataeya ponaponajë. Itsiata paxamë apo paneyaiy-ataemë. ⁵⁰ Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonaë apo neyayataë. ⁵¹ Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matacabi apo peverevereceaëjava, jai Jesús judíovijavabelia.

⁵² Nexata judíovi jumaitsi:

—Aeconoxae pepacuene dovathi pecayajavaponaponaëjava, payapētaniji. Tsipaji Abrahampijinēmi tēpa. Daxita Diosojumepaebivimi profetavi ata, tēpa. Itsiata xamë jumaitsimē tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. ⁵³ Vamopijinēmi Abrahampijinē, ayaijamatabēcuenenēmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinēmi matatoxenetsia beayaijamatabēcuenenēmē nataneme? ¿Detsa beponēmē nataneme? jai judíovi.

⁵⁴ Jesús nexata jumaitsi judíovijavabelia:

—Itsa xanë tajacuata najumaitsinē tsipae: “Xanë bitso ayaijamatabēcuenenēnē,” itsa janē tsipae, nexata ajumemata-mobinē tsipae. Itsiata baitsi jane taxa Dioso, ponē yabara paxamë ata: “PatajaDioso raja,” pajamë, bajaraponë neyaiyatane. ⁵⁵ Itsiata paxamë apo payapētaemē bajaraponë. Xanë cajena yapētaniji. Nexata xanë Dioso yapētaë atanē, itsa yavajunuaxainaejitsipajë, “Apo yapētaenē cajena bajaraponë,” itsa janē tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuene Dioso yapētaniji. Jumecovënëtajēnua pacuenia Dioso nitorobabiaba. ⁵⁶ Bajayata Abrahampijinē panijasalinainēmi jamatabēcuenēbarēya. Tsipaji tajēvelia yapētane mapanacuayabetsicaje tapatsijavanexatsica. Nexata Abrahampijinēmi nesivajamatabēcuenēbarēya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxē raja xamë apo xainaemē cincuenta pavaibeje ata. ¿Detsa pacuenia nexata taejitsipame Abrahampijinē? Abrahampijinē baja cajena pepo bajayatami tēpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinē pevajēnaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuatujëalia. Jesús baja nexata judíovi itsavabelia vecuapona.

9

Pacuenia Jesús itaxutoxanepanaeyaexana ecënaenë yabara pelivaishi

¹ Jesús najetaruca namutua. Nexata tane penaexanaejavaveliacujinae bitso pitaxutotsëcënaenë. ² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petaenexatsi Dioso icatsia pitaxutoxanepanaeyaexanaejavatsi. ⁴ Payapëtaneme rabaja mapacueneje. Matacabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanepana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa.

⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. ⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayo-javabelia, Siloëvënë pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsi jume: “Pitorobinëtsitsica,” pejaijume.

Nexata bitso pitaxutotsëcënaenë lia baja. Naitaxutoquia-tojopalia. Naviarena baja pitaxutoxanepanaenë. ⁸ Nexata itsajota ponapona bitso pitaxutotsëcënaenëmi, imoxoyo penaevi, pamonae ata taeyabiabatsi, daxita bajarapamonae nayanijoba.

—¿Matsa ponë palata amoneya pevajëcabiabecaenëmije? na-jai bajarapamonae.

⁹ Nexata itsamonae jumaitsi:

—Jājā, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsëcënaenëmi pijacuata jumaitsi:

—Jājā, xanë rabaja, jai bajaraponë.

¹⁰ Nexata bajarapamonae jumaitsi pitaxutotsëcënaenëmijavabelia:

—¿Detsa nexata pacuenia taneme baja? jai.

¹¹ Nexata pitaxutotsëcënaenëmi jumaitsi:

—Ponë raja Jesúsvenënë, exana tsorobojavayo. Nitaxutoexaba. Nexata nejumaitsi: “Liamëre pecueyetsipucayojavabelia, Siloëvënë pucayojavabelia. Naitaxutoquiaremelia,” nejai Jesús. Nexata baja lianë. Itsa naitaxutoquiatajë bajarapapucayota, taniji baja, jai pitaxutotsëcënaenëmi.

¹² Nexata bajarapamonae jumaitsi:

—¿Detsa jota bajaraponë ponapona? jai.

Nexata icatsia pitaxutotsëcënaenëmi jumaitsi:

—Apo yapëtaenë itsajota ponapona, jai.

Pacuenia bitso pitaxutotsëcënaenëmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsëcënaenëmi pitaxutoxanepanaejava jivi itsa tane, yanijobatsi peyapëtaenexa pacuenia itaxutoxanepana. Pamonaeyanijobaponatsi, bajarapamonae pitaxutotsëcënaenëmi caponaliatsi fariseovijavabelia.

¹⁴ Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsëcënaenëmi, bajarapamatacabi judíovi penacueraevetsimatacabi. ¹⁵ Nexata jane baja fariseovi yanijoba pitaxutotsëcënaenëmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsëcënaenëmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajë. Nexata aeconoxae taniji baja, jai pitaxutotsëcënaenëmi fariseovijavabelia.

¹⁶ Nexata fariseovi najumaitsi:

—Ponë bajarapacuene exana, Dioso apo pitorobinëtsi cajena. Tsipaji apo yayatae penacueraevetsimatacabi, najai fariseovi.

Itsiata bajarapamonaeyajuvënëvi itsamonae najumaitsi:

—Itsa pibisiacuene pexanaenë tsipae, apo caëjëpae tsi-paetsi bajarapitsipiniñcuene pexanaenexa, najai itsamonae.

Nexata daxita fariseovi apo najamatabëcuenejëpae.
 17 Nexata icatsia fariseovi yanijoba pitaxutotsëcënaenëmijavabelia.

—¿Detsa jane xamë bejamatabëitsimë ponë caitaxutox-
 anepanaeyaexana yabara? jai fariseovi.

Nexata pitaxutotsëcënaenëmi jumaitsi:

—Bajaraponë cajena Diosojumepaebinë profeta, jai.

18 Judíovi apo jumexaniatae pitaxutoxanepanaeyaexanae-
 javatsi yabara. Nexata bajarapamonae junata pitaxu-
 totsëcënaenëmi paxa, pena yajava. 19 Judíovi jane baja yani-
 joba pitaxutotsëcënaenëmi paxabeje penabejevavabelia. Ju-
 maitsi:

—¿Baja tsa maponë panexënatobeje, ponë penaexanae-
 javaveliacujinae pitaxutotsëcënaenëmije? ¿Detsa pacuenia ae-
 conoxae baja tane? jai judíovi.

20 Nexata pitaxutotsëcënaenëmi paxabeje penabeje jumait-
 sibeje:

—Maponëje pataxënatobeje payapëtanijibeje cajena.
 Payapëtanijibejenua penaexanaejavaveliacujinae
 pitaxutotsëcënaejava. 21 Itsiata baitsi jane aeconoxae apo
 payapëtaenëbeje pacuenia baja itaxutoxanepana. Apo
 payapëtaenëbejenua ponë itaxutoxanepanaeyaexanatsi.
 Bajaraponë taxënato payanijobare. Penaveretsinë rabaja.
 Pijacuata pacatsipaebiana, jai pitaxutotsëcënaenëmi paxabeje
 penabeje judíovijavabelia.

22 Judíovi baja cajena najamatabëcuenejëpa pe-
 vajënaeitavetsinexa penajoneyaniva judíovi penacaetuatabi-
 abibojavaberena pajivi jumaitsi: “Jesús rabaja cajena
 Cristo, ponë Dioso athëbëvetsica itorobijitsiatsica jivi peca-
 panepaenexa,” pejaijivi. Bajaraxuata pitaxutotsëcënaenëmi
 paxabeje penabeje bajarapacuenia jumecanaviatabeje
 pecujunavixaebeje judíovi. 23 Bajaraxuata bajarapajivibeje
 jumaitsiibeje: “Taxënatojavabelia payanijobare. Penaveretsinë
 rabaja,” jaiibeje.

24 Nexata judíovi icatsia junata pitaxutotsëcënaenëmi. Ju-
 maitsi bajaraponëjavabelia:

—Panetsipaebare xaniavaetsia Dioso pitabarata. Pax-
 anë baja cajena payapëtaniji bajaraponë pibisiacuene pex-
 anaenëcuene, jai judíovi Jesús yabara.

25 Nexata pitaxutotsëcënaenëmi jumaitsi:

—Pibisiacuene meta pexanaenë. Xanë apo yapëtaenë.
 Itsiata baitsi jane nitaxutoxanepanaeyaexana taitaxu-
 totsëcënaenëmi, jai pitaxutotsëcënaenëmi.

26 Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

²⁷ Nexata pitaxutotsēcēnaenēmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovēnētsimē. ¿Detsa xuajitsia pajitsipame patacat-sipaebaponaenexa icatsia? ¿Paxamē ata tsaja pajitsipame panejumecovēnētsinexa bajaraponē papijajivinexamē? jai pitaxutotsēcēnaenēmi judíovijavabelia.

²⁸ Nexata judíovi bijatanetsi pitaxutotsēcēnaenēmi. Jumait-sitsi:

—Xamē raeta baja cajena bajaraponē pijajivitonēmē. Paxanē raja saicaya Moiséspijinē petsipaebilivaisi pajumecovēnētavanapajē. ²⁹ Paxanē baja cajena payapētaniji pepacuene Dioso pebarēcuaicuaijajjavatsi Moiséspijinē. Itsiata baitsi jane ponē cabarēcuaicuaijai, apo payapētaenē itsaverena pata, jai judíovi.

³⁰ Nexata pitaxutotsēcēnaenēmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapētaemē itsaverena pata bajaraponē? ³¹ Yapētanetsi baja cajena mapacueneje. Diosojavabelia vajētsi ata pamonae pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaeveta itsa vajētatsi pejitsipaecuenia yaiyataeya petojinavanapaevitsi.

³² Caeto ata mapanacuapijivi apo vēnēlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsēcēnaenē.

³³ Peneta bajaraponē itsa apo patsi tsipae Diosojavavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsēcēnaenēmi judíovijavabelia.

³⁴ Nexata judíovi jumaitsi:

—Xamē cajena pibisiacuene exaname nenaexanae-javaveliacujinae. ¿Itsiata tsaja caranata pibisiacuene nexanaenē jamatabēpanemuxujiobame? jai judíovi pitaxutotsēcēnaenēmijavabelia.

Nexata torotajarabaxuabatsi judíovi penacaetuatabiabibo pevecuapitsapaenexa.

Pacuenia Dioso apo pejumecovēnētsivi jamatabēcueneaitaquiri tsavanapae yabara pelivaisi

³⁵ Jesús vēnēlivaisitane pitaxutoxanepanaeyaexanaenē judíovi petorobajarabijjavatsi judíovi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenē, Jesús jumaitsi pitaxutox-anepanaeya exanaenējavabelia:

—¿Najamatabēcopatame tsabaja Dioso pexēnatojavabelia? nayabarajai Jesús.

³⁶ Nexata ponē Jesús itaxutoxanepanaeyaexana, jumaitsi:

—¿Detsa ponë Dioso pexënato tanajamatabëcopatsinexa bajaraponëjavabelia? jai.

³⁷ Jesús nexata pijacuata nayabarajumaitsi:

—Ponë rabaja cabarëcuaicuaijai, Dioso rabaja pexënato, nayabarajai Jesús.

³⁸ Nexata ponë Jesús itaxutoxanepanaeyaexana, pematabacabëta nuca Jesús pitabarata. Jumaitsi Jesúsjavabelia:

—Tajatuxanenë, casivanajamatabëcopatatsi baja cajena, jai.

³⁹ Nexata Jesús jumaitsi pitaxutoxanepanaeya exanaenëjavabelia:

—Xanë patajë mapanacuayabetsicaje jivi penayapëtaenexa pijaneconi pexinaejava. Nexata pamonaë pexaniajailivaisi tatsipaebijavata najamatabëcueneyapëtaena piamatabëcueneitaquirijava, bajarapamonae jamatabëcueneitayotsianajë pexaniajailivaisita. Pamonaë jemajai. Apo yapëtae ata pexaniajailivaisi, jamatabëjumaitsi: “Vaxaitsi rabaja yapëtanetsi pexaniajailivaisi,” jamatabëjai, bajarapamonae apo jamatabëcueneitayotsinë tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitsijava. Nexata fariseovi jumaitsi Jesúsjavabelia.

—¿Paxanë ata tsabaja pajamatabëcueneitaquirinë tsavana-pae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabëcueneitaquirimë tsavanapae. Tsi-paji jamatabëcuenenavëxaniabiaya pajamatabëjumaitsimë tsabiabi: “Vaxaitsi rabaja jumecovënëtatsi Dioso,” pajamatabëjamë tsabiabi. Nexata Dioso pejumelivaisi payapëtae atamë, itsiata pibisiacuene paexanabiabame. Nexata bitso pananeconitame Diosojavabelia. Paxamë Dioso pejumelivaisi apo paneyapëtaexae, itsa pajamatabëcueneitaquirimë tsipae, nexata bitso apo pananeconitsimë tsipae Diosojavabelia, jai Jesús fariseovijavabelia.

10

Oveja pecajoneyabiabicorral yabara pelivaisi

¹ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabicorral ënëabelia saicayanë pejonenexa, apo jone corral baupajava. Junaya saya peyenepanatsia pejonenexalia. Bajaraponë penacobetoxotsinënexa oveja. ² Ponë peneta joneya corral baupayalia, bajaraponë cajena oveja pevetsinë.

³ Nexata corral baupa pevetsinë tobaupatatsi pijaoveja

pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junataponna pijaoveja caenë canacujitsia pevënëta. ⁴ Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tsipaji jumeyapëtanetsi pijaoveja. ⁵ Oveja apo pënaponae tsipae saicayanë. Tsipaji apo jumeyapëtae. Vecuarëcëpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ënëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. ⁸ Itsamonae xanë tavajënaeya penajumetsënëtsilivaisi jivi tsipaebapona. Bajaramonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae. ⁹ Xanë rabaja cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababiabinexanua. Bajarapacuenia oveja peveretaponnaenexa bapata. Bajara pijinia jamatabëcueneitsi pamonae pata penajumetsënëtsilivaisi jivi petsipae-baponaenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa matababi apo pevereverecejave, bitso jamatabëcuenebarëyaya pejinavanapaenexanua. ¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabiyani tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia

xanë ata jamatabëitsinë tajajivi yabara. ¹² Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya tovetaponaponaejitsipa pematamotsinexatsi. Nexata nevëthë oveja itsa tsimaxënajetarucaejitsipa, bajaraponë xuabatabajiravijitsipa ovejabitsaëtomî. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtomî. ¹³ Oveja pevetsinë najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamona taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. ¹⁶ Xainajë baja itsabitsaëto tajajivi. Itsiata abaxë bajarapamonae apo yajavajinavanapae mapabitsaëtojavataje. Itsiata itsamatacabi capatsianajë bajarapamonae mapabitsaëtojavaberanaje. Nexata daxita bajarapamonae nejumecovënëtsiana taitorobicuenia. Caebitsaëtoxaneto jane baja tajajivi netonaexanaena. Bajarapamonae xanë caenënë evetsianajë, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. ¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitsi-
java, judíovi apo najamatabëcuenejëpae. ²⁰ Judíovi ayaibitsaëto najumaitsi Jesús yabara:

—Dovathi raja bajaraponë yjavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

²¹ Itsiata bajarapamonae yajuvënëvi itsamonae najumaitsi:

—Ponë dovathi yjavaponaponatsi, apo caëjëpaetsi tsipae cajena pecuaicuaijainexa mapacueniaje. Apo caëjëpaetsinua tsipae pitaxutoxanepanaeyaexanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

Pacuenia Jesús judíovi navecuaitavetatsi yabara pelivaisi

²² Emarapaeta Jerusalén tomarata fiesta exana. Bajarapafiesta exana judíovi penajamatabēnapitsinexa bajayata judíovi pijasalinaivi templobo pexanebetsijava. ²³ Nexata pamatacabi fiesta exana, Jesús ponapona bajarapatemplojavata, Portal de Salomónvēnējavata. ²⁴ Nexata Jesús judíovi matatoyorotsia nacaetuatsi. Judíovi jumaitsi Jesúsjavabelia:

—Apo payapētaenē pacuenia panajamatabēxainaejitsianē xamē yabara. ¿Detsa pacujinae paneyapētaeyaexanaename patacayapētaenexa pepacuene ponēmē? Itsa pepacuene Cristomē, Dioso athēbēvetsica pecaitorobinētsica jivi necapanepaenexa, panetsipaebare cajena roviaia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani roviaia. Itsiata apo panejumecovēnētšimē. Taxa Dioso pesaēta pinijicuene exanajē. Bajara papinijicuene exanajē taxa taneitorobicuenia. Nexata itsa exanajē bajarapapinijicuene, pacatsitaexanatsi picani taxa taneitorobicuene. ²⁶ Itsiata baitsi jane apo panejumecovēnētšimē Cristonēcuenenē. Tšipaji paxamē apo patajajivimē. ²⁷ Tajajivi, pamonae taniji beovejacuena, bajarapamonae nejumeyapētane. Bajarapamonae pijinia yapētaniji. Nexata nepēnapona. ²⁸ Bajarapamonae rajutsianajē matacabi apo pevereverecaejava. Bajarapamonae taxa Diosovecua apo naxuabi tsane. Itsajivi ata apo neyacajērētsi tsane tajajivi. ²⁹ Taxa baja cajena ayaijamatabēcuenenē daxitajivi matatoxenetsia. Bajaraponē nerajuta bajarapamonae. Nexata itsajivi ata apo caējēpaetsi tsane taxa pecobevecua pepitsinexa bajarapamonae. ³⁰ Taxa, xanē, caenē rabaja panaexanajēbeje, jai Jesús judíovijavabelia.

³¹ Nexata picani bajarajota judíovi jamatabēbeyaxuabatsi Jesús. Judíovi nota ibotonē Jesús picani petseconaenexatsi ibotonēta. ³² Jesús nexata jumaitsi judíovijavabelia:

—Ayaijava pexaniacuene taxa Dioso pesaēta exanaponajē paxamē paneitabarata. ¿Detsa nexata pitsineconi yabara panetseconaiejitsiamē ibotonēta? jai Jesús judíovijavabelia.

³³ Judíovi nexata jumaitsi:

—Pexaniacuene raja nexanaejava yabara apo pacatseconaiejitsiatsi. Pacatseconaiejitsiatsi raja nenaneconitsixae Diosojavabelia. Tšipaji pibisiacuena, Dioso apo pejitsipaecuena, cuaicuaijamē. Xamē saya jivitonē atamē, beDiosonēmē nataneme, jai judíovi Jesúsjavabelia.

³⁴ Jesús nexata jumaitsi judíovijavabelia:

—Dioso pejumajitsijava, Dioso pejumelivaisibaxutota jumaitsi mapacueniaje: “Paxamē ata rabaja padiosovimē,” jai Dioso pejumelivaisibaxutota Dioso pejumecovēnētšivi

yabara. ³⁵ Nexata Dioso pejumelivaisibaxutota bajarapacuenia itsa jumaitsi Dioso pejumecovënëtsivi yabara, acuenebi bajarapamonae yabara vajajumaitsinexa: “Bajarapamonae apo diosovi,” vajajainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitsimë: “Xamë raja naneconitame Diosojavabelia. Pibisiacuenia cuaicuaijamë Dioso apo pejitsipaecuenia. Tsi-paji jumaitsimë: ‘Xanë raja Dioso pexënatonë,’ jamë,” panejamë. ³⁷ Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. ³⁸ Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtame Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuenie Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuenia Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatolia copiaya Juanpijinë jivi bautisababiaba. Bajarajotalia Jesús ponapona. ⁴¹ Jivi ayaibitsaëtoxaneto ponalia petaenexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaëtoxaneto jumecovënëta Jesús Dioso athëbëvetsica pitorobinëcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinë, avitane tsanucae Betania tomarata. Bajarapatomarata ponaponabeje pematapijivabeje, Mariabeje Martabeje. ² Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematánata taxuiquicaenanua. ³ Nexata pamatacabi Lázaro avitane tsanucae, Mariabeje Martabeje tonajumeitorobaliabeje Jesús. Jumaitsiabeje:

—Tajatuxanenë, niasivanë raja Lázaro catoavitane, jaiabeje.

⁴ Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabēcueneta jivi yapētaena Dioso pinijicuene pexanaenexa pecaējēpaenēcuenetsi. Yapētaenanua xanē ata, Dioso pexēnatonē, pinijicuene taexanaenexa tanecaējēpaenēcuenē, jai Jesús pijajivijavabelia.

⁵ Jesús bitso asivaya taeyabiaba Martabana, Mariábana, Lázarobana. ⁶ Jesús vënëlivaisitae ata Lázaro bitso piavitanejava, itsiata abaxē apo ponae Betania tomarabelia. Anijamatacabibeje abaxē ponapona Jordánmene itsapanatalia. ⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaitsi:

—Patajatuxanenē, canivita saya judíovi bajarajotalia jamatabēcatsēcona picani ibotonēta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matcabita ponapona, apo firapectae. Tsipaji icotiata napebeta xaniavaetsia. ¹⁰ Itsiata pajivi meravi ponapona, firapecta. Tsipaji meravi apo napebetsi xaniavaetsia. Bajara pijinia xanē ata itsinē. Ponae ata tsanetsi Betania tomarabelia, itsiata apo nitsacueniabi tsane. Tsipaji abaxē tajamatacabi apo netocopiapatsi, jai Jesús pijajivijavabelia petēpaejavanexa yabara.

¹¹ Bajaraxuacujinae Jesús peponaevajēnae jumaitsi pijajivijavabelia:

—Vajayapētaenē rabaja Lázaro majitanuca. Nexata baja ponajē. Itavabijitsianē Lázaro, jai Jesús.

¹² Nexata pijajivi jumaitsi:

—Patajatuxanenē, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapētaenē rabaja Lázaro majitanuca,” itsa jai Jesús, Jesús picani pejumaitsi jume, “Lázaro rabaja tēpa,” pejai jume. Itsiata Jesús pijajivi apo jumeyapētaetsi. Bajarapamonae Jesús pijajivi jamatabēcuenenavēxaniabiaya jamatabējumaitsi: “Lázaro meta saya majitanuca pacuenia majitanucabiaba meravi,” jamatabējai. ¹⁴ Bajaraxuata nexata Jesús roviaalia jumaitsi pijajivijavabelia:

—Lázaro rabaja tēpa. ¹⁵ Paepatota Lázaro tēpa, bajarajotalia apo ponaponaenē. Bajaraxuata barēyanē paxamē yabara. Barēyanē tsipaji Lázaro petēpaexae, xaniavaetsia panejume-covēnētsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvënënë, Tomás, ponë icatsia itsavënë vënërubatsi Sapalanë. Bajaraponë jumaitsi penajuaponaevi-javabelia:

—Naponatsi Jesús pepëta. Ibotonëta itsa tseconatsi, vajaya-javatëpaenexa bajaraponë, jai Tomás.

Pacuenia Jesús caëjëpatsi petëpaevi ata icatsia piasaëyaexanaenexa yabara pelivaisi

¹⁷ Pepuaxainae baja cuatro pamatacabibeje Lázaro pijinë pemëthëtsicujinaetsi, Jesús matapania patajopa Betania tomarata.

¹⁸ Betaniatomara eca imoxoyo Jerusalén tomaravecua. Bejamatabëcuene anijakilómetrobeje epatua navecuacabeje bajarapatomarabeje.

¹⁹ Jesús pepatsivajënaeya Betania tomarata, ayaibitsaëtoxaneto judíovi pata Martabeje Maríabejevaberena Lázaro petëpaexae. Bajarapamonae jumaitsi bajarapovabejevavabelia:

—Paxanë itsiata pacayanabatsi. Panajamatabëxainajë paxanë ata papecavecuatëpaexaebeje panejuyapijinëbeje, Lázaro, jai bajarapamonae.

²⁰ Itsa Marta vënëlivaisitane Jesús penajetarucaejava, pit-sapa pijabovecua pemataenenaenexa Jesús. María itsiata bota nacopateca. ²¹ Nexata Marta itsa mataenenatsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapijinë. ²² Itsiata yapëtaniji aeconoxae ata Dioso carajutsiana daxita pacuene vajëtame Diosojavabelia, jai Marta.

²³ Nexata Jesús jumaitsi Martajavabelia:

—Nejuyapijinë raja itsiata icatsia asaë tsaponaponae tsane, jai Jesús.

²⁴ Nexata Marta apo jumeyapëtae Jesús pi-asaëyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

²⁵ Nexata Jesús jumaitsi Martajavabelia:

—Xanë rabaja petëpaevi ata icatsia tasaëyaexanaenë, tarajutsinë matababi apo pevereverecejava. Pajivi nejumecovënëtsiana Cristonëcuenenë, bajarapajivi tēpae

ata, itsiata icatsia asaë tsane. ²⁶ Pajivi abaxë pamatacabi asaë tsaponaponae mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matababi apo pevereverecejava. ¿Xamë tsabaja bajarapalivaisi jumecovënëtame? jai Jesús Martajavabelia.

²⁷ Marta nexata jumaitsi:

—Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopiaevetavana-pajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

Pacuenia Jesús vënu Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuyapijiva María. Nexata Marta muetsia jumaitsi Maríajavabelia:

—Vajanacacujarubinë rabaja pata. Cajunalia raja bajara-ponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. ³¹ Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabijavalia bove-cua. Nexata bajarapamonae María pënaponatsi. Tsipaji bajarapamonae jamatabëjumaitsi:

—María raeta pejuyapijinëmi pemëthëjavabelia pona pe-matanueyabinexa, jamatabëjai:

³² Itsa María palia, itsajotalia Jesús ecojopa, nexata María pematabacabëta nucajunua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapatsivi penuejava itsa tane, Jesús nexata bitso najamatabëxainaxuaba. ³⁴ Nexata Jesús jumaitsi bajarapamonaejavabelia:

—¿Detsa jota pamëthëtame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamëthëtajë Lázaro, jai.

³⁵ Jesús nexata vënu Lázaro. ³⁶ Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaitsi Jesús yabara:

—Mara ponëje itaxutoxaniavaeta bitso pitaxu-totsëcënaenëmi ataje xaniavaetsia petaenexa. ¿Apo caëjëpaetsi tsamëra tsipae Lázaropíjinë pejamatejemayaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asaëyaexana yabara pelivaisi

³⁸ Jesús bitso sivanajamatabëxaina Lázaropíjinë. Nexata Jesús cujilia Lázaropíjinë pemëthëtsilbovajutsijavabelia.

Ibopanaxanetota Lázaro yamëthëvëpa acatabuatatsi. ³⁹ Jesús nexata jumaitsi bajarajota penapatsivijavabelia:

—Pavecuatixiremelia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsi-paji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaicueene pexanaejava ita jumecovënëtame Dioso, jai Jesús.

⁴¹ Nexata bajarapamonae Lázaropijinë pemëthëvëpavecua tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëcuene carajutatsi tanejumetaex-aemë. ⁴² Yapëtaniji cajena tanenamuxunaevetabiabijavamë. Itsiata icatsia cavajëtatsi mapamonaeje ayaibitsaëtoxaneto pe-jumecovënëtsinexa taneitorobinëcuenemëtsica, jai Jesús Dioso-javabelia.

⁴³ Bajarapacuenia Jesús pejumaitsicujinae, ayaijumeta jumaitsi Lázaro pebuatsiibovajutsijavabelia:

—¡Lázaro, bajara jane mëthëvecua pitsaparemena! jai Jesús.

⁴⁴ Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacat-sipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi

(Mt 26.1-5; Mr 14.1-2; Lc 22.1-2)

⁴⁵ Judíovi, pamonae María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeyajuvënëvi ayaibitsaëto jumecovënëta Jesús Dioso pexënatocuene. ⁴⁶ Itsiata itsamonae bajarapamonaeyajuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. ⁴⁷ Nexata fariseovi, sacerdotevi penamatacaitorobivi yajava, nacaetuata.

Nexata bajarapamonae junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonae najumaitsi:

—¿Detsa meta vaxaitsi itsanetsi? Bajaraponë Dioso pe-saëta pinijicuene pexanaejava exanapona. ⁴⁸ Itsa vaxaitsi cuenecopatsipatsi bajarapacueni pexanaponaejava, daxitajivi jumecovënëtaponaëjitsipa bajaraponë. Apo jumecovënëtsi

tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemplobo naca-toxuabijitsipaica. Nacaverebiabijitsipanua, najai bajarapamonaë.

⁴⁹ Bajarapamonaeyajuvënënë pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponaponae. Nexata Caifás jumaitsi penajuanacaetuatsivijavabelia:

—Paxamë raja apo payapëtaemë. ⁵⁰ Nexata Romanonacua pevetsivi vajabitsaë itsa itorobarena, vajanacaverebiabiyanima, bepanajamatabëxainame mapacueniaje. Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

⁵¹ Itsiata baitsi jane Caifás apo jumaitsi bajarapacuenia pijacuata penajamatabëxainacuenia. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitsiayaexanatsi. Bajarapacuenia Caifás tajëvelia jumaitsi tsipaji Jesús sivatëpaejitsia daxita judíovi. ⁵² Itsiata Jesús apo sivatëpae tsane ëjudíovi. Daxitanacuanëjava, pamonaë nacayajataruta Dioso pexi, bajarapamonaë ata pecaetuatsinexa, sivatëpaena Jesús. ⁵³ Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamonaë Jesús beyaxuabijitsiatsi.

⁵⁴ Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonacua imoxoyojavabelia, Efraïnvënë tomarajavabelia. Nexata bajarapatomarata Jesús ponapona pijajivi yajava.

⁵⁵ Imoxoyo baja pevajënaë judíovi pijafiesta pejonematacabinexa, pascuavënëfiesta. Nexata jivi ayaibitsaëtoxaneto pona Jerusalén tomarabelia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamonaë naropoba tsiquiritomaraxijavaverena. ⁵⁶ Nexata bajarapamonaë jaitarutatsi Jesús. Itsa bajarapamonaë nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonaë.

⁵⁷ Nexata fariseovibeje sacerdotevi penamatacaitorobivibeje najumecopata jivijavabelia petonaitaxuto-caevetsinexatsi Jesús. Nexata pajivi yapëtane itsajota Jesús

ponapona, petsipaebinexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapētane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi

(Mt 26.6-13; Mr 14.3-9)

¹ Pejonenexa baja pascuavēnēfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajarapatomarata ponapona Lázaro, ponē Jesús asaēyaexana petēpaenēmi. ² Bajarajota Jesús pexaejava toexanatsi caniviyopijijava. Bajarajota Marta pexaejava tsanaponapona. Lázaro nanabaneca pamesata Jesús nabaneca. ³ Nexata María carena epatuabotellabēyota petuxujuviaceitera, nardovēnēra. Bajarapora bitso penamatamot-sira. Nexata bajarapaaceitera María tsitaxuepana Jesús. Bajaraxuacujinae icatsia pematnata taxuiquica. Daxita bo tuatujē tuxudereecaruta. ⁴ Nexata Jesús pijajiviyajuvēnēnē, Judas Iscariote, Simón pexēnato, ponē itsamatacabi Jesús canajetsijitsiatsi pijavajabitsaē pecobeyabelia, jumaitsi:

⁵—¿Detsa xuajitsia apo canajetsi bajarapatuxujuvira. Mata-mopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabēxainaexae bepejiobivi. Judas raja penacobetoxotsinē. Jesús bana pijapalatadoro pevetsiaexanaenēxaetsi, Judas nacobetoxotabiaba bajarapapalatayajuvēnējava. ⁷ Nexata Jesús jumaitsi Judasjavabelia petiriva yabara:

—Copare bajarapova xanējavaberena pexanaenexa bajarapacuenia. Itsamonae petēpaejivi batsiperabēepana petuxujuviaceitera peperabēxaniavaetsinexa pemēthētsivajēnae. Bajara pijinia pacuenia mapovaje xaniavaeta bajarapora tanetsiperabēepanaenexa, apo tēpae atanē, taneperabēxaniavaetsinexa itsamonae tanemēthētsivajēnae. Tsipaji baja imoxoyo tavajēnae tanemēthētsinexa. ⁸ Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanē daxitamatacabi apo ponaponaenē tsane paxamējavata, jai Jesús Judasjavabelia.

Pacuenia judíovi najamatabēxaina pebeyaxuabinexatsi Lázaro yabara pelivaisi

⁹ Ayaibitsaëtoخانeto judíovi vënëlvaisitanetsi Jesús pepsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ës Jesús. Ponalia petaenexanua Lázaro, ponë Jesús asaëyaexana, petëpaenëmi. ¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹ Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaejava petëpaecujinae. Nexata bajarapajudíovi jumecovënëtapona Jesús Dioso pexënatocuene.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Lc 19.28-40)

¹² Jivi ayaibitsaëtoخانeto pata Jerusalén tomarata pascuafiesta petaenexa. Nexata bajarapamonae Jesús vënëlvaisitanetsi pepatsijavanexa Jerusalén tomarata. Jesús naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubenaе bajarapamonae Jesús yabara.

¹⁴ Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucaejavanexa Jerusalén tomarata, Dioso pejumelivaisibaxutota tajëvelia jumaitsi mapacueniaje:

¹⁵ PaJerusalén tomarapijivimë, pëtsa pajunavame. Pataename pepo papecaevetsinënexa penajetarucaejava. Pejanaburroyota yapatanajetarucaena, jai tajëvelia Dioso pejumelivaisibaxuto Jesús burrojumata pepatanajetarucaejavanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaitsi Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapat-sijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaitsi Jesús yabara.

17-18 Pamonaē tane pamatacabi Jesús Lázaro asaēyaexana petēpaenēmi, bajarapamonaē tsipaeba Jerusalén tomarapijivijavabelia. Tsipaeba pacuenia bajarapamonaē tane Jesús Lázaro piasaēyaexanaejavata petēpaenēmi. Bajaraxuata jivi ayaibitsaēto pitsapa tomaravelia pecopiapitsinexatsi Jesús. 19 Nexata fariseovi ita tane bajarapacuene, najumaitsi:

—Pataema. Daxitajivi pēnaponatsi Jesús. Vaxaitsi baja nexata acuenebi vajaexanaejava Jesús jivi pepēnaponaejavatsi yabara, najai fariseovi.

Pacuenia Grecia nacuapijivi Jesús jamatabētanetsi yabara pelivaisi

20 Ayaibitsaēto jivi pata Jerusalén tomarata Diosojavabelia pevajētsinexa pascuavēnē fiestamatacabita. Bajarapamonaeayajuvēnēvi itsamonaē Grecia nacuapijivi. 21 Nexata Grecia nacuapijivi cujibaliatsi Felipe. Felipe Betsaida tomarapijinē. Betsaidatomara eca Galilea nacuata. Nexata Grecia nacuapijivi jumaitsi Felipejavabelia:

—Felipe, pajamatabētaniji raja Jesús, jai.

22 Felipe nexata pona Andrésjavabelia petsipaebinexa pacuenia Grecia nacuapijivi jumaitsi. Nexata Felipebeje Andrésbeje ponabeje petsipaebinexabeje Jesúsjavabelia. 23 Nexata Jesús jumaitsi bajaraponēbejejavabelia:

—Xanē, Daxitajivi Pematapijinēnē, tjamatacabi baja netocopiapata tanaviatsinexa baja athēbēabetsia ayaijamatabēcuenenēnē Dioso taneexanaenexa. 24 Xaniajanē pacuenia pacatsipaebijitsiatsi. Trigoxuto ita apo ubitsi irabelia, saya tsitecanuca caexutoyo. Itsiata ita ubatsi, pejuvicujinae xutsabana vajaubixutoyomi penacopatsinexa pejanaboto. Nexata ita nacuita bajarapaboto, ayaijava pexu capitsapa. 25 Bajara pijinia itsi jivi ata. Pajivi jamatabējumaitsi ata tsane petēpaeyaniva: “Xanē nayajivitaeyaponaponaenajē tanebejiobiaexanaeyaniva, tanebeyaxuabiyoniva ata,” jamatabējai ata tsane, itsiata tēpaena. Nexata Diosovecua naxuabiana. Biji rajane pajivi nesivanajamatabēcopatsiaya jamatabējumaitsi tsane: “Jema nebejiobiaexanaena. Jema nebeyaxuabiananua Jesús pijajivitonēxaenē,” jamatabējai tsane, bajarapajivi xainaena matacabi apo peverevereaejava. 26 Pajivi jamatabēnetonacueneba, bajarapajivi nepēnaponena. Nexata pajivi netonacuenebiana, neyjavaponaponaena itsajota ponaponaenajē. Pajivi netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabēcuenearēyanē,” jai tsane, jai Jesús Felipebeje Andrésbejejavabelia.

Pacuenia Jesús tajëvelia navajunupaeba pacuenia beyaxu-abijitsiatsi yabara pelivaisi

²⁷ Jesús bëpënëa jamatabëjumaitsi:

—Aeconoxae bitso najamatabëxainajë. ¿Detsa meta jumaitsinë tsane taxajavabelia? Jumaitsinë meta tsane: “Taxa, betajobicuenia tanebeyaxuabijavaminexa, vecuanecapanepaenaxa,” janë meta tsane taxajavabelia. Jume raja. Bajarapacuenia meta apo vajëtsinë tsane. Tsipaji betajobicuenia tanebeyaxuabinexa, patajë mapanacuayabetsicaje, jamatabëjai Jesús.

²⁸ Nexata Jesús Diosojavabelia jumaitsi:

—Taxa, pacuenia jitsipame nexanaenexa jivi pecayaiy-ataenexa, exanare, jai Jesús.

Nexata bajarajota Jesús jumetane athëbëvetsica ayaijume. Jumaitסיםica mapacueniaje:

—Jivi rabaja cajena neyaiyatane. Itsiata matavëjëa neyaiy-ataena, jaitsica.

²⁹ Jivibitsaëto bajarajota penubenaevi jumetane bajarapajume. Nexata bajarapamonae jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaicuajiaitsi Jesús, jai.

³⁰ Nexata Jesús jumaitsi bajarapamonaejavabelia:

—Xanë raja tajumetaenexa bajarapajume apo jumaitסיםica. Paxamë raja panejumetaenexa jumaitסיםica.

³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabiaba pibisiacuene pexanaenexa.

³² Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

³³ Bajarapacuenia Jesús tajëvelia jumaitsi jivijavabelia jivi peyapëtaenexa pacuenia Jesús tëpaejitsia. ³⁴ Nexata bajarapamonae jumaitsi Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinënë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matacabijavabelianexa asaë tsaponaponae tsane? jai bajarapamonae Jesúsjavabelia.

³⁵ Nexata Jesús jumaitsi bajarapamonaejavabelia:

—Imoxoyo rabaja pevajënae taponamatacabinexa. Abaxë raja itsiata taponaponaematacabibeje, pacatsipaebianatsi pexaniajailivaisi patacajamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquiriyaniva. Pajivi ajamatabëcueneitaquiri, apo xainae tsane matacabi apo peverevereaejava. ³⁶ Xanë rabaja pexaniajailivaisita pacajamatabëcueneitayotsianatsi. Taponaponaematacabibeje abaxë mapanacuataje, panesivanajamatabëcopatsianame. Bajarapacuenia nexata jamatabëcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona peve-cuanamatayabinexa bajarapamonae.

Pacuenia judíovi jamatabëjumaitsi Jesús yabara: "Maponëje apo Cristo, ponë copiaevetavanapatsi vajanacacapanepaenexa," jamatabëjai yabara pelivaisi

³⁷ Jesús ayaicuene pexanaejava Dioso pesaëta judíovi pitabarata exanapona. Judíovi tae ata bajarapacuenia, itsiata apo jumecovënëtsi Cristocuene. ³⁸ Nexata judíovi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Diosojumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane, tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta pexanaejava, itsiata bajarapamonae apo yapëtae tsane pajamatabëcuenelivaisi xaina petaejava. Nexata bajarapamonae Diosojavabelia apo najamatabëcuenepënëyorotsi tsane perujujamatabëcuenevecua. Nexata apo jamatabëcuenexaniavaetsinë tsane, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

41 Bajarapacuenia Isaíaspijinē yaquina tsipaji bajayata Isaíaspijinē bemajitsinaebota tane Jesús ayaijamatabēcuene pexainaenēcuene. Bjaraxuata bajayata Isaíaspijinē bajarapacuenia Jesús vajunupaeba baja cajena.

42 Itsiata judíoviyajuvēnēvi ayaibitsaēto jumecovēnēta Cristocuene. Judíovi pevetsivi ata jumecovēnēta Cristocuene. Bjarapamonae judíovi pevetsivixae, apo navajunupaebi pejumecovēnētsijava Cristocuene. Tsipaji cjunava fariseovi. Bjarapamonae bēpēnēa jamatabējumaitsi:

—Apo navajunupaebinē tsane tajumecovēnētsijava Cristocuene tanecapitsapaeyaniva fariseovi judíovi penacaetuatabibovecua, jamatabējai bēpēnēa bjarapamonae.

43 Tsipaji bjarapamonae jitsipa penajuaeavetsivi pesivabarēyajavatsi Dioso pesivabarēyajavatsi matatoxenetsia.

Pacuenia jivi naneconitsijitsia Diosojavabelia itsa apo jumecovēnētsi Jesús petsipaebilivaisi yabara pelivaisi

44 Jesús jumaitsi ayaijumeta jivijavabelia:

—Pajivi jumecovēnētsiana Cristocuenenē, bjarapajivi ēxanē yabara apo jumecovēnētsi tsane. Taxa, ponē nitorobica, bjaraponē yabara ata jumecovēnētsiana.

45 Pajivi necueneyapētaena, bjarapajivi taneitorobinētsica ata cueneyapētaena.

46 Xanē rabaja pexaniajailivaisita jamatabēcueneitayotsianajē mapanacuapijivije. Nexata pajivi jumecovēnētsiana Cristocuenenē, apo ajamatabēcueneitaquiri tsane.

47 Pajivi jumeyapētae ata tsane tatsipaebilivaisi, itsiata itsa apo jumecovēnētsi tsane bjarapalivaisi, bjarapajivi naneconitsiana Diosojavabelia. Itsiata xanē bjarapajivi apo naneconitsiaexanaenē tsane.

Tsipaji xanē apo patsinētsica tananeconitsiaexanaenexa mapanacuapijivije. Biji rajane xanē patsicajē tacapanepaenexa mapanacuapijivije.

48 Pajivi nenayajiviitavetsiana, apo nejumecovēnētsinua tsane tatsipaebilivaisi ata, bjarapajivi taxa Dioso naneconitsiaexanaenatsi.

Bjarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexinaevi tatsipaebilivaisi apo pejumecovēnētsixae.

49 Tsipaji xanē tajamatabēcueneta apo paebinē bjarapalivaisi. Taxa raja, ponē nitorobica, nitoroba bjarapalivaisi jivi tatsipaebinexa.

50 Yapētaniji baja cajena jivi pexinaejavanexa matacabi apo peveverecaejava itsa jumecovēnēta taxa pitorobilivaisi. Nexata bjarapalivaisi itsa tsipaebaponajē jivijavabelia, tsipaebaponajē pacuenia taxa Dioso nitoroba tatsipaebinexa, jai Jesús jivijavabelia.

13

Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi

¹ Caematacabi baja saica pejonenexa pascuavënëfiesta. Jesús nexata yapëtane pamatacabita pijavajabitsaë beyaxu-abijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcueneitajëta piasivacuene.

² Jesús pijajivi barë nabane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainaeyaexanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia.

³ Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata naviatsijitsia paxa Diosojavabetsia, yapëtane. ⁴ Nexata Jesús pijajivi pebarë nabanijavata, Jesús nonotapuna mesajavata. Najumajonota penaxatatsijava. Nexata toalla naepacëta. ⁵ Jesús mera epata penacobequiatsinëjavabelia petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipaenë tanetaxuquiatsijavamë. Tshipaji ayaijamatabëcuenenëmë, jai Simón Pedro Jesúsjavabelia.

⁷ Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsiata baitsi jane bexëjavabelia yapëtaename, jai Jesús.

⁸ Nexata Pedro jumaitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹ Simón Pedro nexata jumaitsi:

—Tajatuxanenë, ëtataxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

¹⁰ Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tshipaji baja daxitanë axuirajibi. Paxamë

rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

11 “Pajamatabëcuenexuirajibimë. Itsiata baitsi jane apo padaxitamë,” jai Jesús. Tsipaji yapëtane tajëvelia ponë canajetsijtsiatsi pijavajabitsaë pecobeyabelia.

12 Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatatsi? ¹³ “Vajanacacujarubinë,” pajamë tsabiabi itsa panabarëcuaicuaijamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tsipaji taitsinë. ¹⁴ Xanë, patacacujarubinë ata, panijatuxanenë atanënuua, beveliajamatabëcuenenënë nataeya pacataxuquiatatsi bepanijajivitonënëcuenia. Nexata bajarapacuenia paxamë ata beveliajamatabëcuenevi nataeya panataxuquiatabiabianame namataenetsia. ¹⁵ Pacatsitaexanatsi bajarapacuenia paxamë ata bajarapacuenia namataenetsia panenatoexanaenexa. ¹⁶ Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tsipaji itsanë ata apo jamatabëcuenematatoxenetsi pitorobinëtsi. ¹⁷ Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya itsa panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

18 Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijtsia. Tsipaji xanë patacaitapetsivi patajajivinexamë, pacajamatabëcuenyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana. ¹⁹ Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. ²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana.

Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabitsaë pecobeyabelia yabara pelivaisi
(Mt 26.20-25; Mr 14.17-21; Lc 22.21-23)

²¹ Jesús pejamatabëëthëtota bëpënëa bitso natsinajamatabëxaina. Nexata roviafia Jesús jumaitsi pijajivijavabelia: —Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaitsi. ²³ Jesús pijajiviyajuvënënë, caenë bitso asivaya tane. Bajaraponëbeje Jesúsbeje namuxunenixaeye-cabeje. ²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, ¿jipatsa yabara jumaitsimë? jai bajaraponë Jesúsjavabelia.

²⁶ Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocjabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatojavabelia. ²⁷ Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaë najuaxaeyena bajarapame-sata, apo jumeyapëtae xua yabara Jesús jumaitsi Judasjavabelia. ²⁹ Judas toevetabiaba bajarapamonaë pijapalatadoro. Bajaraxuata Judas yabara Jesús pijajivi jamatabëjumaitsi:

—Jesús raeta itoroba Judas pecomuatsinexa vajaxaejavanaxa fiestajavata. Itsa jume, itoroba meta perajutsinexa itsacuenejavaxi bepejiobivijavabelia, jamatabëjai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivat-savanapaenexa yabara pelivaisi

³¹ Pabota Jesús pijajivi barënacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaitsi pijajivjavabelia:

—Aeconoxae rabaja xanë, Daxitajivi Pematapijinënë, namatabëcueneitajëtsianajë ayaijamatabëcuene taxainaejava. Taxa Dioso ata bajarajota yajavajamatabëcueneitajëtsianajë ayaijamatabëcuene pexainaejava. ³² Nexata taxa Dioso juya nejamatabëcueneitajëtsiana ayaijamatabëcuene taxainaejava. Bajarapacuene baja naxanitsiayo taxa Dioso exanaena. ³³ Bepataximë patacataevi. Bajara maapo pacayajavapononaetsi tsane bajayajebije. Paxamë panejaitsoniane. Pacuenia jumaitsinë itsamonae judíovijavabelia, bajarapacuenia paxamëjavabelia ata paca-jumaitsiijitsiatsi. Apo pacacaëjëpae tsane paneponaenexa itsabelia ponaejitsianë. ³⁴ Pacatsipaebijitsiatsi icatsia pejanalivaisi. Paexanavanapaename mapacueniaje. Pasivamë tsavanapae tsane itsamonae ata. Pacuenia xanë pacaasivatsi, bajarapacuenia namataenetsia panaasivamë tsavanapae tsane. ³⁵ Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivjavabelia.

Pacuenia Jesús tajëvelia jumaitsi Pedrojavabelia: “Pedro, xamë nayavajunuaxainaename tajajivitonëcuenemë,” jai yabara pelivaisi

(Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

—Tajatuxanenë, ¿detsa belia ponaejitsiamë? jai Pedro.

Nexata Jesús jumaitsi Pedrojavabelia:

—Itsa belia ponaejitsianë, aeconoxae apo cacaëjëpae tanepënaponaenexamë. Itsiata baitsi jane itsamatacabi nepënaponaename, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenë, ¿detsa xuajitsia apo necaëjëpae aeconoxae tacapënaponaenexa? Daxita pacuenia nitorobame, catoex-anaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamë tsaja? ¿Nacaevetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiabivajënaeya, nayavajunuaxainaename taja-jivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

14

Pacuenia Jesús benamuto paxa Diosojavabetsia yabara pelivaisi

¹ Jesús jumaitsi pijajivijavabelia:

—Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata. ² Taxajavatatsia pexaniabobitsaëtonë xaina panejinavanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë. ³ Xanë taponaeujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacacaponanexatsia jane baja. Nexata bajarajotatsia pacayajavaecaenatsi, itsajota ecaenajë. ⁴ Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaejitsianë, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponanexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

—Xanë rabaja benamutonë. Tshipaji xanë taja-matabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponanë. Xanë rabaja xainajë matacabi apo peverevereaejava tarajutsinexa pamonae nesivanajamatabëcopata. Itsajivi ata apo patsicapanepe tsane taxajavabetsia xanë itsa apo nejumecovënëtsi. ⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸ Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹ Jesús nexata jumaitsi:

—Felipe, bajayajebi rabaja pacayajavaponaponatsi. ¿Itsia ta tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? ¹⁰ Taxa baja cajena neyjavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipaebatsi, tjamatabëcueneta baja cajena bajarapalivaisi apo pacatsipaebitsi. Taxa raja,

ponë neyjavaponapona, bajaraponë pejamatabëcueneta bajarapalivaisi neyapëtaeyaexana. Nexata bajarapalivaisi pacatsipaebatsi. ¹¹ Panejumecovënëre taxa tayjavaponaponaejava. Panejumecovënërenua taxa ata taneyjavaponaponaejava. Patacatsipaebilivaisianë apo panejumecovënëtsi atamë, itsiata ayaicuene Dioso pesaëta taexanaexae, panejumecovënëre taxa tayjavaponaponaejava. ¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicuene taexanaejava matatoxenetsia bajarapajivi exanaena. Tsipaji xanë naviatsianiajë taxajavabetsia. ¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenebarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espíritu Santo jivijavabetsica yabara pelivaisi

¹⁵ Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. ¹⁶ Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatacabijavabelianexa. Bajaraponë Espíritu Santo. ¹⁷ Espíritu Santo cajena pepo pexaniajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëecaetsi. Tsipaji bajarapamonae apo nejumecovënëtsi. Nexata apo yapëtae ponë Espíritu Santo. Apo yapëtaenua cajena Espíritu peponaponaejava ata. Itsiata baitsi jane paxamë Espíritu Santo payapëtaneme baja. Tsipaji baja bajaraponë pacayjavaponapona. Espíritu Santo cajena pacatsijamatabëecaena daxitamatacabijavabelianexa. ¹⁸ Ponaë atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayjavaponaponaejava. ¹⁹ Caematacabibejecujinae baja jivi apo netae tsane. Itsiata icatsia paxamë panetaename. Paxamë paxainaename matababi apo peverevereaejava. Tsipaji tatëpaecujinae icatsia asaënë tsaponaponae tsane. ²⁰ Pamatababi Espíritu Santo patsianica paxamëjavabetsica, bajarapamatababi payapëtaename taxa tayjavaponaponaejavanexa. Payapëtaenamenua pataneyjavajinavanapaejavanexamë. Payapëtaenamenua xanë ata patacayjavaponaponaejavanexa. ²¹ Pajivi yapëthane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

22 Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

23 Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavapon-aenajëbeje. 24 Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

25 Icatsia Jesús jumaitsi pijajivijavabelia:

—Abaxë patacayajavaponaponaeepato pacatsipaebijitsiatsi mapacueniaje. 26 Taxa tajamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeyaexanaena daxitacuene. Pacanajamatabënapitsiaexanaenanua daxita palivaisi pacatsipaebaponatsi, jai Jesús.

27 Icatsia Jesús jumaitsi pijajivijavabelia:

—Pacanapëjiobatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepijia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. 28 Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajajjava. Itsa bitso panejitsipaejitsipame, nexata pasivajamatabëcuenebarëyamë tsipae taponaejavanexa taxajavabetsia. Tsipaji taxa nevecuaayajamatabëcuenenë. 29 Bajarapacuenia pacajumaitsi taponaejavënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

30 Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picaní bajaraponë jitsipa. Apo caëjëpaetsinua taneitsacueniabinexa. 31 Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava.

Panonobapunare. Ponatsi baja mapacovëvecuaje, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacaucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipa, panevajënaeyabelia paexanavanapaename. ³ Paxamë rabaja panejumecovënëtame patacatsipaebilivaisi. Bajaraxuata taxa baja pacavecuaxuaba pibisiajamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yajavaponaponaenajë. Bajarapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaë apo neyjavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamë tsitecaeya panejumecovënëtavanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua panevajëtame. ⁸ Itsa paxamë jivi patsitaexanavanapaename taxa Dioso pejitsipaecuenia, jivi yaiyataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuene Jesús pijajivi,”

jai tsane. ⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavanapaename pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. ¹² Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. ¹³ Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo caëjëpaetsi bajarapacuenia pexanaejivi matatoxenetsia piasivanexa peyapëtaejivitsi. ¹⁴ Itsa paexanavanapaename patacaitorobicuenia, nexata baja patajamonamë tsane. ¹⁵ Aeconoxae baja cajena saya bepatajajivicueniamë apo pacataetsi. Bepatajamonamë baja bitso pacatanetsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. ¹⁶ Paxamë raja apo panejunatsimë. Biji rajane xanë pacajunatatsi patanepënaponanexamë. Nexata xanë pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo pevereverecaejavanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. ¹⁷ Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapitsianame xanë copiaya

taneitoyajava bajarapamonae. ¹⁹ Mapanacuapijivi, pamonaē Dioso apo pejumecovēnētsivi, namataenetsia nasiva tsavanapae. Paxamē ata bajarapamonae itsa pajamatabēcuenejēpa vanapaejitsipame, nexata paxamē ata bajarapamonae pacaasiva tsipae. Itsiata baitsi jane xanē baja pacajunatatsi bajarapamonaevecua. Nexata baja paxamē apo pajamatabēcuenejēpaemē bajarapamonae. Bajaraxuata pacaitoya tsane bajarapamonae. ²⁰ Panajamatabēnapitabiabianame najumecapanepaeya patacajumaitisijava: “Itsanē ata apo jamatabēcuenematatoxenetsi pijatuxanenē,” patacajaijava. Nebejiobiaexana itsamonae. Nexata paxamē ata itsamonae pacabejiobiaexanaena. Itsamonae nejumecovēnēta tatsipaebilivaisi. Nexata pijinia paxamē ata itsamonae pacajumecovēnētsiana panetsipaebilivaisi. ²¹ Bajarapacuenia pacaexanaena mapanacuapijivije xanē patajaijivixaemē. Tsipaji bajarapamonae apo yapētae Dioso, ponē nitorobica, jai Jesús tajēvelia pijajivijavabelia.

²² Icatsia Jesús jumaitsi pijajivijavabelia:

—Xanē itsa apo patsinētsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tsipaji bajarapamonae Dioso apo peyapētaexae, pibisiacuene exanaejitsipa. Nexata xanē tapatsixaetsica mapanacuayabetsicaje, bajarapamonae yapētane baja Dioso. Nexata bajarapamonae yapētae ata Dioso, pibisiacuene pexanaexae, nexata naneconita Diosojavabelia. Nexata acuenebi bajarapamonae pejumaitisijava pibisiacuene pexanaejava yabara: “Apo tayapētaexae Dioso, pibisiacuene exanajē,” pejaijava. ²³ Nexata pamonaē nitoya, bajarapamonae taxa ata itoya. ²⁴ Bajarapamonaejavata Dioso pesaēta pinijicuene taexanaejava exanabiabajē. Bajaraxua itsajivi ata apo exanae mapanacuata. Bajarapamonaejavata pinijicuene taexanaejava itsa apo exanaenē tsipae, apo naneconitsi tsipae Diosojavabelia. Tsipaji bajarapamonae apo yapētae tsipae Dioso. Bajarapamonae tae ata Dioso pesaēta pinijicuene taexanaejava, itsiata apo nejumecovēnētsi. Bajarapamonae nitoya. Taxa ata itoya. Nexata naneconita Diosojavabelia. ²⁵ Bajarapacuenia nitoya tsipaji baja cajena bajayata tajēvelia bajarapamonae taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamonae, ajibi taneyabaraitoyajava ata,” jai tajēvelia Dioso pejumelivaisibaxutota xanē yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajētsianajē taxajavabelia pitorobinexatsica Espiritu Santo, pexaniajailivaisi pepaebinēnexa. Itsa patsianica

Espíritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espíritu Santo xanë nevajunupaebiana xaniavaetsia. ²⁷ Paxamë baja cajena tataxuxuabijavaveliacujinae jivi livaisi tatsipaebijava, paneyajavajinavanapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

16

¹ Icatsia Jesús jumaitsi pijajivijavabelia:

—Bjarapacuenia pacatsipaebatsi panecopabiyaniya patanejumecovënëtsilivaisimë. ² Paxamë papecaitoiyavi, paca-capitsapabiabiana judíovi penacaetuatabibibovecua. Belia jane baja itsamatacabijavabelia pacabeyejebiana. Nexata pamonaë pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejebajë mapamonaëje,” jai tsane. ³ Bjarapamonaë xanë apo neyapëtae. Apo yapëtae cajena taxa ata. Bjaraxuata bjarapacuenia pacaexanaena. ⁴ Bjarapacuenia tajëvelia pacatsipaebatsi baja cajena. Nexata jane baja pamatacabi pacatsipatsiana bjarapacuene, panajamatabënapitsianame pacuenia baja cajena tajëvelia pacatsipaebatsi, jai Jesús pijajivijavabelia.

Pacuenia Espíritu Santo exanaejitsia jivijavabelia yabara pelivaisi

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacatsipaebitsi mapacuene yabaraje. Bjarapacuenia apo pacatsipaebitsi tsipaji abaxë pacayajavaponaponatsi. ⁵ Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënënë apo neyanijobi. “¿Detsa belia ponaëjitsiamë?” apo nejai. ⁶ Pacanavajunupaebatsi baja cajena tanaviatsijavanexa. Bjaraxuata bitso panajamatabëxainame. ⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaë tsipaetsi, apo pacatopatsitsica tsipae Espíritu Santo papecayajavaponaponanexa. Espíritu Santo pacayavenonabiabiana. Pacajamatabëcuene asaëyaexanaenanua. Itsa ponaenajë taxajavabetsia, nexata Espíritu Santo pacatoitorobianicatsi. ⁸ Nexata Espíritu Santo patsianica. Nexata Espíritu Santo pejamatabëcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaë

tsipaetsi, apo pa, pamonaē Dioso apo pejumecovēnētsivi, nacueneyapētaena pibisiacuene pexanaejava. Yapētaenanua pacuene xanepana pexanavanapaenexa Dioso pitabarata. Yapētaenanua pacuenia Dioso naneconitsiaexanaejitsiatsi bajarapamonae pibisiacuene pexanaeneconi yabara. ⁹ Espiritu Santo pejamatabēcueneta, bajarapamonae nacueneyapētaena pibisiacuene pexanaevicuene. Tsipaji xanē bajarapamonae apo nejumecovēnētsi pibisiacuene pexanaeneconi tavecuaajibiaexanaejavanexa. ¹⁰ Nexata Espiritu Santo pejamatabēcueneta, bajarapamonae yapētaena pacuene xanepana pexanavanapaenexa Dioso pitabarata. Tsipaji baja xanē naviatsianajē taxajavabetsia. Nexata baja bajarapamonae pematatsēnēa apo netae tsane. ¹¹ Bajarapamonae Espiritu Santo pejamatabēcueneta, yapētaena pacuenia Dioso naneconitsiaexanaejitsia daxita pamonaē pibisiacuene pexanaevi dovathi pejamatabēcueneta. Tsipaji Dioso naneconitsiaexanaena dovathi, ponē mapanacuapijivi itorobabiaba pibisiacuene pexanaenexa, jai Jesús pijajivijavabelia.

¹² Icatsia Jesús jumaitsi pijajivijavabelia:

—Ayailivaisi picani abaxē xainajē patacatsipaebinea. Itsiata baitsi jane abaxē apo pacajamatabēcuenecaējēpae bajara-palivaisi panejumeyapētaenexa. ¹³ Matapania pamatacabi patsianica Espiritu Santo, ponē pexaniajailivaisi pepaebinē, bajaraponē pacayapētaeyaexanaena daxita pexaniajailivaisi. Espiritu Santo raja apo pacayapētaeyaexanae tsane saicaya pejamatabēcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapētaeyaexanaena. Nexata tajēvelia Espiritu Santo pacayapētaeyaexanaena pacuene pevajēnaeyabelia copiapataponaejitsia. ¹⁴ Espiritu Santo pejamatabēcueneta jivi neyayataena. Tsipaji xanē talivaisi, pexaniajailivaisi, Espiritu Santo pacayapētaeyaexanaena. ¹⁵ Daxita taxa pexinaejava, xanē ata rabaja tajajava. Bajaraxuata pacajumaitsi: “Xanē talivaisi, pexaniajailivaisi, Espiritu Santo pacayapētaeyaexanaena,” pacajaitsi, jai Jesús pijajivijavabelia.

Pacuenia *bepejamatabēcueneniobivimi* *ja-*
matabēcuenēbarēyajitsia yabara pelivaisi

¹⁶ Icatsia Jesús jumaitsi pijajivijavabelia:

—Caematacabibejecujinae rabaja apo panetaemē tsane. Itsiata icatsia itsamatacabibejecujinae panetaename. Bajara jane xuacujinae ponaenajē baja taxajavabetsia, jai Jesús.

¹⁷ Nexata pijajiviyajuvēnēvi nayanijoba ēpamonae.

—¿Detsa majumaitsi pajumeje? Jesús nacajumaitsi: “Caematacabibejecujinae rabaja apo panetaemē tsane. Itsiata

icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai. ¹⁸ ¿De tsaeta pejumaitsijume: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaiti, najai Jesús pijajivi.

¹⁹ Jesús jamatabëcueneyapëtane pacuenia picani pijajivi jamatabëyanijobatsi. Nexata Jesús tajëvelia jumaiti pijajivijavabelia:

—Pacajumaititsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaiti. ¿Baja tsa pajume yabara panayanijobame? ²⁰ Xaniajanë pacuenia pacatsipaebijitsiatsi. Xanë itsa tēpaenajë, paxamë panue-name. Bitso xanëjitsia panajamatabëxainaename. Itsiata baitsi jane pamonae apo nejumecovënëtsi, barëya tsane tatēpaejava yabara. Itsiata baitsi jane xuacujinae paxamë icatsia bitso panesivajamatabëcuenenbarëyamë tsane itsa panetaename icatsia. ²¹ Pamatacabi petiriva vixaenotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo namatabënapitsi. Panacueto baja vecuanaexanatsi, sivajamatabëcuenenbarëya. ²² Bajara pijinia pacuenia paxamë ata bitso panajamatabëxainaename itsa tēpaenajë. Itsiata icatsia itsa panetaename, bitso panesivajamatabëcuenenbarëyamë tsane. Nexata itsajivi ata apo cajëpaetsi tsane papecavecuaajibiaexanaenexa panejamatabëcuenenbarëyajava, jai Jesús pijajivijavabelia.

²³ Icatsia Jesús jumaiti pijajivijavabelia:

—Pamamatacabi icatsia panetaename, apo paneyanijobimë baja tsane itsacuenejavayo ata. Tsipaji baja Espiritu Santo pacayapëtaeyaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuenenbarëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba mapanacuapijivije pibisiacuene pexanaenexa, yabara pelivaisi

²⁵ Icatsia Jesús jumaiti pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi

livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. ²⁶ Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. ²⁷ Paxamë paneasivamë. Panejumecovënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. ²⁸ Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsianiajë baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcueneyapëtanetsi daxitacuene neyapëtaenëcuene. Xamë panejamatabëcueneyapëtaneme palivaisi picani jamatabëpacayanijobatsi. Bajaraxuata pacajumecovënëtatsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtame taxa Dioso athëbëvetsica taneitorobinëcuenetsica? ³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenënë. Itsiata baitsi jane apo caenënë tsane. Tsipaji taxa yajavaponaponajë. ³³ Bajarapacune tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuenecopatsixae, ajunavijibia pajinavanapaename. Mapanacuata panejinavanapaeepato mapanacuapijivije pacabejiobiaexanabiabiana. Itsiata pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë,

bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. ² Xamë rabaja netocopatame daxitajivi taevetsinexa. Nexata necaëjëpa tarajutsinexa matacabi apo pevereverecejava daxita pamonaë nerajutame. ³ Matacabi apo pevereverecejava pexainaevinexa, cayapëtane baja caenëmë pepo Diosonëcuenëmë. Bajarapamonae neyapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa. ⁵ Taxa, pamatacabi abaxë ajibi mapanacuaje, itsa cayajavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanajuavevetaponaponaenexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

—Xamë itapetame itsamonae mapanacuataje tanesivana-jamatabëcopatsinexa. Xanë nexata yapëtaeyaexanajë bajarapamonae pacuenia jamatabëcueneitsimë. Bajarapamonae nijajivi nerajutame. Xaniavaetsia cajumecovënëta nijumelivaisi. ⁷ Aeconoxae baja bajarapamonae nijajivi yapëtane xamë nejamatabëcueneta taexanaponaejava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonae. Nexata nejumecovënëta. Nexata yapëtane bajarapamonae pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuenëmëtsica, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

—Cavajëtatsi bajarapamonaeenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. ¹⁰ Daxita pamonaë nijajivi, bajarapamonae xanë ata tajajivi. Daxita pamonaë tajajivi, bajarapamonae xamë ata nijajivi. Daxitajivi neyapëtane ayaijamatabëcuene taxainaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

—Xanë baja apo ponaponaenë tsane mapanacuataje. Tsipaji baja ponaejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisi-

acuenevecua. Vaxaitsibeje caejamatabëcuene xainatsibeje. Nexata bajarapamonae ata tojitsipajë caejamatabëcuene pexainaenexa. Pacuenia vaxaitsibeje jamatabëcueneitsitsibeje, bajara pejamatabëcueneitsinexa. ¹² Itsa abaxë yajavaponaponajë bajarapamonae mapanacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsi-paji tocopiapatsianatsi pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. ¹⁴ Xanë baja tajajivi tsi-paebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsi-paji apo jamatabëcuenejëpae. ¹⁵ Apo cavajëtsitsi raja nejutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije. ¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaename penatsatsinexa dovathi pejamatabëcuenevecua. Nexata bajarapamonae exanavanapaena xamë netojitsipaecuenia nijumelivaisi baja petsijamatabëecaexaetsi. ¹⁸ Pacuenia xamë nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje. ¹⁹ Pacuenia xamë netojitsipame, tajajivi yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojitsipame, catoexanavanapaena. Tsi-paji baja bajarapamonae yapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëjavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsi-paebaponaena tajumelivaisi, nexata bexëjavabelia bajarapamonae nejumecovënëtsiana. ²¹ Nexata cavajëtatsi daxita

bajrapamonae penajamatabëcuenejëpaenexa. Xamë neyjavaponaponame. Xanë ata pijinia cayjavaponaponatsi. Bajara pijinia pacuenia tojitsipajë daxita bajrapamonae ata vajanacayajavajinavanapaenexabeje. Tojitsipajë bajrapamonae penajamatabëcuenejëpaenexa. Nexata bajrapamonae najamatabëcuenejëpaeya pejinavanapaejava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. ²² Pacuenia xamë yapëtaeyaexaname tajajivijavabelia xanë bitso ayaijamatabëcuene taxinaejava, bajara pijinia pacuenia xanë ata bajrapamonaejavabelia yapëtaeyaexanajë baja bajrapamonae ata ayaijamatabëcuenevi baja penaexanaejava tanejumecovënëtsixae. Nexata bajrapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. ²³ Tajajivi yjavaponaponajë. Xamë pijinia neyjavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajrapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajrapamonae xamë nerajutame. Nexata jitsipajë bajrapamonae ata penajinavanapaenexa itsabelia ponaejitsianë. Jitsipajë bajrapamonae taneyajavajinavanapaenexa, taneyapëtaenexa bitso ayaijamatabëcuene taxinaejava. Tsipaji nacua nexanaevajënaeya ata, xamë niasivamë. Bajraxuata ayaijamatabëcuenenënë nexaname. ²⁵ Taxa, itsaneconi ata apo nexainaenë. Mapanacuapijivi, pamonaе apo cajumecovënëtsi, apo cayapëtae. Itsiata xanë cayapëtanetsi. Mapamonaеje, tajajivi, yapëthane baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajrapamonae ata namataenetsia penaasivanexa, yapëtaeyaexanaponaenajë. Xanë bajrapamonae yjavaponaponaenajë, jai Jesús paxa Diosojavabelia.

18

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi

(Mt 26.47-56; Mr 14.43-50; Lc 22.47-53)

1 Jesús pevajëtsicujinae paxa Diosojavabelia, pijajivi barëpona Cedrónvënënajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. 2 Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba. 3 Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënuua capona. Beisotabuqueranënuua capona penatsivajënaeitayotsinexa. 4 Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabalia. Jumaitsi bajarapamonaejavabelia:

—¿Jipatsa pajaitame? jai Jesús.

5 Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. 6 “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata. 7 Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

8 Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaeje peponaenexa, jai Jesús pijajivi yabara.

9 Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenia jane baja copiajopa. 10 Nexata Jesús pijajivitonë, Simón Pedro, namaracëtaaponapona espada. Nexata Simón Pedro espada navesmarajonotaxuabina. Pecujanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco. 11 Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejiobiaexanaenexa. Bajaraxuata

nacaevetsianajë tanebejiobiaexanaenexa, jai Jesús Pedrojavabelia.

Pacuenia Jesús nutatsi sacerdot. Pecujuanenia pamuxuyorotomi, muxuyoropaebiaxuaba sacerdotevi pepo penamataevi pepo penamatacaitorobinë pitabarata yabara pelivaisi

(Mt 26.57-58; Mr 14.53-54; Lc 22.54)

¹² Vajabitsaëvi pijacapitán, pijajivi yajava, judíovi pijapolicíavinua, nacobenavaetabatsi Jesús. Nexata cobecëtatsi. ¹³ Caponatsi baja Anásvënënë pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinë tsaponaponae. ¹⁴ Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-70; Mr 14.66-68; Lc 22.55-57)

¹⁵ Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajiyo pënanajetarucabeje. Ponë Simón Pedro yanatatsi, bajaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. ¹⁶ Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuaijai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. ¹⁷ Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenebivi, policiavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonopanuca.

Pacuenia sacerdotevi pepo penamatacaitorobinē Jesús yanijobatsi yabara pelivaisi

(Mt 26.59-66; Mr 14.55-64; Lc 22.66-71)

¹⁹ Anás jane baja sacerdotevi pepo penamatacaitorobinē jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

²⁰ Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. ²¹ ¿Detsa xuajitsia nexata neyanijobame? Yanijobare pamonaejavabelia tsipaebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapëtane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

²² Itsa bajarapacuenia Jesús jumaitsi, nexata bajarajota penucaenë templobopijipolicíanë itabarapacataxuabatsi. Policíanë jumaitsi Jesúsjavabelia:

—Pëtsa bajarapacuenia cuaicuaijamë sacerdotevi pepo penamatacaitorobinëjavabelia, jai.

²³ Jesús nexata jumaitsi policíanëjavabelia:

—Itsa pibisiacuenia cuaicuaijanë, netsipaebare papibisiacue ne yabara cuaicuaijanë. ¿Detsa xuajitsia saya xaniavaetsia tajumaitsijava yabara, nebiame? jai Jesús.

²⁴ Nexata Anás itoroba Jesús cobecëtsiaya tsiteca pecapon-aenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi

(Mt 26.71-75; Mr 14.69-72; Lc 22.58-62)

²⁵ Pedro abaxë nanonopanuca isotojavata. Nexata bajarajota penubenaevi jumaitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

²⁶ Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsijava, vacara baja fiaba.

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Lc 23.1-5)

²⁸ Itsa baja ajena matakabi tsina, Jesús capitsapatsi Caifás pijabovecua. Nexata Jesús caponaliatsi nacuaeavetsinë Pilato pijaboyabelia. Judíovi, pamonaе najetarubena Jesús peneconitsinexatsi, apo najonelia nacuaeavetsinë Pilato pijaboyalia. Tsipaji Pilato apo judíonë. Judíovi apo joneyabiabi apo judíonë pijaboyalia. Bajarapamonae itsa jonejitsipa Pilato pijaboyalia, bajarapamonae judíovixae, jamatabëjumai tsipae: “Najamatabëcuenebijnajë Dioso pitabarata apo judíonë pijaboyalia tanajonexae. Nexata tavëna judíovi apo netocopatsi tsane tanaxaenexa pascua fiestamatakabi pexaejava,” jamatabëjai tsipae bajarapamonae. ²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenë tsipae, apo pacatocapatsi tsipaetsi maberenaje, jai judíovi.

³¹ Nexata icatsia Pilato jumaitsi:

—Paca ponaremelia caevëalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamë baitsi jane apo panetocopatsimë patabeyaxuabinexa itsanë ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajëvelia pijajivijavabelia navajunupaebapona pebeyaxuabijavanexatsi. ³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamë tsaja judíovi pepo nevetsinë? jai.

³⁴ Jesús nexata jumaitsi Pilatojavabelia:

—¿Xamë tsaja nejamatabëcueneta neyanijobame? Jume. ¿Catsipaeba tsaja itsamonae xanë judíovi pepo taevetsinëcuene? jai Jesús.

³⁵ Pilato nexata jumaitsi:

—Xanë raja apo judíonënë. Bajarapacuenia apo tacasivana-jamatabëxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanëjavaberena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanë apo taevetsinëje. Itsa ra peneta mapanacua taevetsinë tsipaeje, nexata paepatota judíovi

nevaetaba, daxita tajajivi neyapijivinamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

³⁷ Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Baraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapëtane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-31; Mr 15.6-20; Lc 23.13-25)

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinë cajena itsacujiruneconi ata pexanaejava, paneconi yabara bajaraponë naneconitsijitsia.

³⁹ Penaneconitsivi pejebabiabibota naneconitsia peponaponaenë pepitsapaenexa itsa panevajëtame, nexata pascua fiestamatacabi caenë pacatocapitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimë papecaevecsinë? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pëtsa abaxë copatame bajaraponë! ¡Panetocapitsapaename jane Barrabás! jai judíovi.

Bajaraponë Barrabás bitso penacobetoxotsinë. Baraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumatatitibabenexatsi penaneconitsivi pejumaconitabiabimacata. ² Nexata pejumatatitibabecujinaetsi vajabitsaë Jesús becoronacuenia tsimataexanatsi pejuvitoyoroto. Mataxatatatsi bajarapaejuvitoyoroto. Baraxuacujinae quenetsiataeya benacuaevetsinëcuenia xatatatsi peraënaeyatsautsaucaejava.

³ Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponaē Jesúsjavabelia:

—¡Bajaco, judíovi pepo pevetsinë! jai tsabuataponaē.

Vajabitsaë pecobeta Jesús itabarapacababeyabuataponatsi.

4 Pilato nexata icatsia pitsapalia. Jumaitsi judíovijavabelia:
 —Pacatocanaviarenatsi icatsia maberenaje paneyapëtaenexa. Apo caxitajarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

5 Nexata peejuvitoyoroto Jesús namataxatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

6 Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamë pacaponaremelia. Cruzajavabelia pacobematabiabarutsianame. Tsipaji raja xanë apo caxitajarabinë itsacujiruneconi ata pexanaejava, jai Pilato.

7 Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsiije: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

8 Pilato itsa jumetane bajarapamonae pejumaitsijava: “Mara ponë Dioso apo pejitsipaecuenia jumaitsiije: ‘Xanë raja Dioso pexënatonë,’ jai,” pejaijava Jesús yabara, nexata bitso Pilato junava. 9 Nexata icatsia Pilato pijaboyalía barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

10 Nexata Pilato jumaitsi:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcueneje? Nejamatabëcuenecaëjëpa raja taitorobinexa tajajivi cruzajavabelia pecacobematabiabarutsinexa. Nejamatabëcaëjëpanua taitorobinexa pecacopatsinexa ata, jai Pilato.

11 Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacaëjëpae tsipae taneit-sacueniabinexamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë mata-toxenetsia, jai Jesús Pilatojavabelia.

12 Itsa bajarapacuenia Jesús jumaitsi, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:

—¡Itsamonae raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevetsinëjavabelia jane baja! ¡Nexata maponëbejeje nijatuxanenëbeje naitoyabeje tsane! jai judíovi Pilatojavabelia.

¹³ Nexata Pilato itsa jumetane bajarapacuenia judíovi pejumaitsijava, Pilato eca tribunalvënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua. ¹⁴ Pascuavënëfiesta pejonematacabinexa pevajënaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevetsinëje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema tēpael! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinëmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenë raja Romanonacua pevetsinë paxainajë pepo patanevetsinë. Paxanë raja apo paxainanë itsanë pematatsënëa pepo patanevetsinë, jai sacerdotevi penamatacaitorobivi.

¹⁶ Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponaenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaë itsa caponaliatsi, caponaeyaexanatsi cruza, pacruzajavabelia Jesús cobematabiabarutsijitsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujuanenia

ruca. Itsanë Jesús petsavenonenia ruca. ¹⁹ Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumai tsarucæ bajarapaitane mapacueniaje: “Mara ponëje Jesús, Nazaret tomarapijinëje, judíovi pepo pevetsinë,” jai tsarucæ bajarapaitane. ²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaëtoxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetana, latínjumetana. ²¹ Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judíovi pepo pevetsinëje,” pejaiitane. Biji rajane icatsia yaquinarutsiaexanare pejumaitsiitane mapacueniaje: “Mara ponë jumaitsije: ‘Xanë raja judíovi pepo taevetsinë,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanajë, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapijavareca. Bajaraxua apo xainae pecaucutsiajoronaejava. Pecuejava saya caepanacujinae. ²⁴ Nexata vajabitsaë najumaitsi:

—Apo titicæ tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bajarapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaitsi Jesús penaxatatsijava yabara. Dioso baja cajena pejumelivaisibaxutota, tajëvelia jumaitsi Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapijavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMaríavënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva. ²⁶ Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaitsi penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

²⁷ Bajaraxuacujinae icatsia Jesús jumaitsi pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Lc 23.44-49)

²⁸ Jesús baja yapëtane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaitsi:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvinora. Nexata vajabitsaënë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsiuiborutatsi Jesús petsutsuninexa.

³⁰ Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tēpanajereca.

Pacuenia Jesús becuererebota yenecacuatatsi yabara pelivaisi

³¹ Pascuavënë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesúsbana baja matavëjëa perubenaejava cruzata. Tsiipaji pascuavënë fiestamatacabi itsa junua judíovi penacueraevetsimatacabinexa, judíovi bitso banajamatabëcuenereviaba daxita penacueraevetsimatacabinë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëepatsicababenexatsi Jesúsbana, cruzata perubenaevi, bepíjia bajarapamonae petëpaenexa. Itsa baja bajarapamonae tēparubena, penotsinexatsitsica cruzavecua pecaponaenexatsi itsajavabelia. ³² Nexata vajabitsaë itsa ponalia, Jesús peyajava cobematabiabarutsinëtsibeje asaëbeje abaxë tsarucae. Bajaraxuata copiaya itsanë

thaëpatsicabiabatsi. Bajaraxuacujinae icatsia itsanë thaëpatsicabiabatsi. ³³Nexata Jesús vajabitsaë itsa cajibaliatsi, taerutatsi baja Jesús petëpaenë. Bajaraxuata Jesús apo thaëpatsicabiabitsi.

³⁴ Itsiata baitsi jane vajabitsaëviyajuvënënë becuererebota Jesús yencacuatatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuenë. Nexata xanë yapëtaniji bajarapacuenë pexaniajaicuenë. Nexata bajarapalivaisi pacatoyaquinatsi panejumecovënëtsinexa paxamë ata. ³⁶ Bajarapacuenia Jesús apo thaëpatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsivajënëtsi,” jai baja cajena itsabaxutota Jesús peyencacuatsijavanexatsi yabara.

Pacuenia Jesús petëpaenë mëthëtatsi yabara pelivaisi
(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviyajuvënënë. Nexata José jumecovënëtaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsipaji cjunava penajuaevetsivi judíovi. Nexata baja Jesús itsa tëpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. ³⁹ Nicodemo, ponë meravi pona pebarëcuaicuaijainexa Jesús, bajaraponë ata judíovi pevetsiviyajuvënënë. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothocaecujinaebeje petuxujuvibenonë, pexaniaviria piapiasábanapanata mataquionaeya daxitanëreca matakacëbabeje. Bajarapacuenia exanabeje tsipaji judíovi baxaniavaeta petëpaejiviyo pemëthëtsinexa bajarapacuenia. ⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenë ayaiabacoboxaneto eca. Bajarapabacobojavata Jesús petëpaevajënaeya, José cajena exanaeyaexanabuata iboitapajanitovjavata pinijiibovaju. José pijamonaejivi

itsa totëpatsi, pebuatsinexa bajarapaibovajulia. José ata itsa tēpa, pebuatsinexatsi bajarapaibovajualia. Nexata bajarapaibovajualia abaxë itsajiviyo ata petëpaejiviyo apo buatsitsi. ⁴² Nexata bajarapaibovajualia Josébeje Nicodemobeje Jesús petëpaenë buatabeje. Tsipaji bajarapaibovaju boca imoxoyo. Judíovi ata baja penacueraevetsimatacabinexa, bitso baja imoxoyo pejonenexa. Bajaraxuata bajarapaibovajualia Jesús petëpaenë buatatsi.

20

Pacuenia Jesús petëpaecujinae icatsia asaë yabara pelivaisi
(Mt 28.1-10; Mr 16.1-8; Lc 24.1-12)

¹ Judíovi baja penacueraevetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. ² Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejevabelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. ⁴ Najuacujinaejinaliabeje. Itsiata itsanë Jesús pijajivitonë bitsojinaeya cujinaejina Pedro mata-toxenetsia. Bajaraponë copiaya palia Jesús pebuatsiibovajutsijavabelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajualia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matacëtatsi, apo yajavabocae bajarajota. Saicayajavata xaniavaetsia quionabuta. ⁸ Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapit-sapa bajarapaibovaju. Nexata jane baja bajaraponë jume-covënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanexa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyabelia.

Pacuenia Jesús petëpaecujinae tsitanaitajëta María Magdala tomarapijivajavabelia yabara pelivaisi
(Mr 16.9-11)

¹¹ María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. ¹² Nexata María taeyelia anijanëbeje ángelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavavereca. Itsanë eca Jesús petaxumijavatsina. ¹³ Nexata ángelnëbeje jumaitsibeje Maríajavabelia:

—¿Detsa xuajitsia nuame? jaiibeje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ángelnëbejejavabelia.

¹⁴ María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta Jesús penucaejava bajarajota. Itsiata abaxë María apo yapëtae Jesús cuene.

¹⁵ Nexata Jesús jumaitsi Maríajavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsijitsianë tacaponaenexa, jai María.

¹⁶ Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pija-jumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsijume: “Xamë tanecujarubinëmë,” pejaijume.

¹⁷ Jesús nexata icatsia jumaitsi Maríajavabelia:

—Pëtsa nejayaremena. Tsipaji raja abaxë apo ponaenë taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríajavabelia.

¹⁸ Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavabelia yabara pelivaisi

(Mt 28.16-20; Mr 16.14-18; Lc 24.36-49)

¹⁹ Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judíovi cjunava. Jesús itsiata joneya. Jemata nuca pijajivi tuatuajëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. ²¹ Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

²² Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa. ²³ Nexata itsamonae pibisiacuene pexanaeneconi itsa pavecuajibiaexanaename, nexata baja pibisiacuene pexanaeneconimi pepacuene vecuajibitsi tsane. Itsa apo pavecuajibiaexanaemë tsane itsamonae pibisiacuene pexanaeneconi, nexata pibisiacuene pexanaeneconi apo vecuajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

²⁴ Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. ²⁵ Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacuene taenajë cruzajavabelia clavota pecobematabiabarutsivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

²⁶ Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabau-paxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobe-sibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpaecujinae. Tsipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamonaepo apo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

Pajamatabëcuene yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalatojaje. ³¹ Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaename matacabi apo pevereverecejave Jesús pejamatabëcueneta.

21

Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbejejavabelia, yabara pelivaisi

¹ Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia itsanëbeje icatsia pematatsënëa. Natanael ata naponapona bajarajota. Canävënë tomarapijinë Natanael. Canátomara eca Galilea

nacuata. ³ Nexata Simón Pedro jumaitsi penajuajinavana-paevijavabelia:

—Djuuai raja yamatajucaejsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajarapameravi caenë ata dujuainë bajarapamonae apo yamatajutsi. ⁴ Ajena baja matabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesúscuene. ⁵ Nexata Jesús jumaitsi pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Djuuai paneyamatajucaejava, panecujanenia pamuxunene, pacoparemeca jerayenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarpacuenia copareca. Bajaraxuacujinae pejutsinexatsina menvecua apo caëjëpaetsi. Tsipaji bitso ayaijava dujuai tojunuatsi. ⁷ Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, jumasa penucaenë, naxatataxuba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapavecua tajë apo yarubenaë. Cien metrocuenia saya yarubenalialia. Nexata itsamonae Pedrojana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. ⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. ¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuaberena peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucuae. ¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tsipaji baja bajarapamonae yapëthane pijatuxanenë Jesús cuene. ¹³ Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

Pacuenia Jesús petëpaecujinae itsa naitajëta cuaicuaijai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoebetabiabianame tajajivi, pamonae tanepejanajumecovënëtsivi. Bajarapamonae taniji betajaovejacuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai.

Pedro nexata icatsia jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoevetsianame tajajivi, pamonae nesivanajamatabëcopata xanëjavaberena. Bajarapamonae taniji betajaovejacuenia, jai Jesús.

¹⁷ Icatsia matavëjëa Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai icatsia.

Pedro nexata bejamatabëjibireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme daxitacuene. Nexata baja nejamatabëcueneyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoevetsianame tajajivi, pamonae taniji betajaovejacuenia. ¹⁸ Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatatabiabame

nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunēmē tsane, pacuenia bitso perujunēyo banamaxēcaeveta itsajivi pijacamisa pexatatsinexatsi, bajarapacuenia namaxēcaevetsianame itsamonae pecacobecēsinea pecacaponanexa itsabelia picani apo jitsipaemē tsane neponaejava, j Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatai Jesús tajēvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajēvelia peyapētaenexa pacuenia beyaxuabijitsiatsi Dioso pejumelivaisi pejumecovēnētsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepēnaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonē, ponē bitso Jesús asiva, penavajunupaebijava yabara pelivaisi

²⁰ Xanē Juannē, Jesús pijajivitonēnē, bitso taneasivanē. Pamatacabi caniviyopijijava panabaniji Jesús pebeyaxuabivajēnaetsi, xanē Jesús pemuxuneneta ecajē. Nexata bajara-jota yanijobecajē. “Tajatuxanenē, ¿jipatsa cacanajetsiana nijavajabitsaē pecobeyabelia?” janē Jesúsjavabelia. Nexata Jesús pebeyaxuabicujinaetsi, icatsia itsa asaē, panetsitanaitajēta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanē pecovēvelia cotocaevajē. Nexata Pedro Jesús pecovēya najetaruca. Pedro itsa napēnēyorotaba caevēarena, netaetaba bajaraponēbeje pecovēya tanajetarucajava. ²¹ Nexata Pedro itsa netane, xanē tatēpaejavanexa yabara, yanijoba Jesúsjavabelia.

—Tajatuxanenē, ¿detsa pacuenia tēpaena maponēje? jai Pedro Jesúsjavabelia.

²² Jesús nexata jumaitsi Pedrojavabelia xanē yabara:

—Itsa xanē tojitsipaejitsipajē bajaraponē pi-asaētsaponaponanexa, asaē tsaponaponae tsipae matapania icatsia tapatsimatacabitsicajavabelianexa. Pētsa bajaraponē tatocopatsijava yabara, najamatabēxainame. Tsipaji xua bajaraponē tocopatsipajē, apo xamēnexa tsipae. Nexata xamē saicaya caasaēmē tsaponaponae tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanē yabara jamatabēcuenenavēxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanē tojitsipaejitsipajē bajaraponē

piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

²⁴ Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tane-sivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

²⁵ Jesús pinijicuene pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuaje.

Pacuenia exanavanapa Jesús pitorobivi, apóstolevi

*Pacuenia Jesús tajëvelia vajunupaeba Espíritu Santo pepatsi-
janexatsica mapanacuayabetsicaje yabara pelivaisi*

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiyapijibaxutota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoyaquinatsi.

² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiyapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaxanatsi pacuenia itorobijitsia pijajivi, apóstolevi.

³ Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë Espíritu Santo. Bajaraponë yabara taxa Dioso najumecapanepaeya jumaitsi papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanapaenexa.

⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pija-jivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaeje pecopatsinexa, xamë vecuapitsapaeyaexanaename mapamatacabitaje? ¿Nexata tsaja vajaviriavi judíovi juya evetsiaexanaename vajanacayanacuaevetsinexa? jai Jesús pijajivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copia-patsijitsia. Caenë taxa Dioso yapëtane pamatacabi bajaraxua copiapatsijitsia. ⁸ Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabëpatsianica paxamëjavabetsica. Nexata panelivaisipae-banajetarubenaename Jerusalén tomarajava, Judea nacua-java ata, Samaria nacujava ata, tajënacuatubujava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pija-jivi acuenebi matavëjëa petaejava. ¹⁰ Nexata Jesús pija-jivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje, Jesús pijajivi jemata bajarajota tsitanaitajëtatsi. ¹¹ Nexata ángelnëbeje jumaitsidebeje Jesús pijajivijavabelia:

—PaGalilea nacuapijivimë, ¿detsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnëbeje Jesús pijajivijavabelia.

Pacuenia Jesús pijajivi natsicueyaitapeta Matíasvënënë apóstolenëxaya abara pelivaisi

¹² Jesús baja peponaecujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bajarapatsuto eca caek-ilómetrocuenia Jerusalén tomaravecua. ¹³ Nexata Jesús pija-jivi pata Jerusalén tomarata. Nexata pabota Jesús pijajivi najinavanapa, athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavana-paenexa. Pamona Jesús pijajivi apóstolevi, mapevënëanëje.

Itsanē pevēnē Pedro. Itsanē Santiago. Itsanē Juan. Itsanē Andrés. Itsanē Felipe. Itsanē Bartolomé. Itsanē Mateo. Itsanē Santiago, Alfeo pexēnato. Itsanē Simón. Bajaraponē celotenē. Itsanē pevēnē Judas, Santiago pejuyapijinē. ¹⁴⁻¹⁵ Pabota Jesús pijajivi apóstolevi najinavanapa, athēbēyo pexanaeirajavatatsia, nacaetuatabiaba caejavata pevajētabiabinexa Diosojavabelia. Jesús pena María, Jesús pejuyapijivi ata, itsapetirivi ata yajava, nacaetuatabiaba pevajētabiabinexa Diosojavabelia. Bajarapajivibitsaēto ciento veinte pajivibeje. Nexata penacaetuatsijavata bajarapamonae tuatuajēta Pedro nonotapuna. Pedro nexata jumaitsi penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajēvelia jumaitsi Dioso pejumelivaisibaxutota. Pacuenia bajayata Davidpijinē Espiritu Santo pejamatabēcueneta tajēvelia vajunupaebiaexanatsi Judaspijinē pexanaejavanexa, copiapata jane baja. Tsipaji Judaspijinē itsa matacaponā pamonae Jesús vaetabijitsiatsi, Judaspijinē tocopiapatatsi baja pacuenia Davidpijinē tajēvelia jumaitsi. ¹⁷ Judaspijinē picani paxanēyajuvēnēnēmi. Jesús picani bajaraponēmi itapeta penanacuenebinexa paxanēta. ¹⁸ Judaspijinē ira comuata pibisiacuene pexanaematamopalatata. Bajaraponēmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pēnēmi pitsatajarabarena. ¹⁹ Daxita Jerusalén tomarapijivi vēnēlivaisitanetsi daxita xua tocopiapatatsi Judaspijinēmi. Nexata Judaspijinēmi pecomuatsiira, Jerusalén tomarapijivi vēnēruba Acéldama. “Acéldama,” itsa jai bajarapamonae pijajumeta, mapajumetaje pejumaitsijume: “Papalata pejamatabēcueneta jivitonē beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaitsi penacaetuatsivijavabelia:

—Salmosvēnēbaxutota tajēvelia Judaspijinē yabara comparacióncuenia jumaitsi mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota,

jai tajēvelia Salmosvēnēbaxutota Judaspijinē apóstolenē penaexanaejavavecua pepitsapaejavanexa yabara.

Itsajavata Salmosvēnēbaxutota icatsia tajēvelia jumaitsi Judaspijinē yabara mapacueniaje:

Bajaraponēmi penacuenebijavami, itsanē pitsiana, jai itsajavata Salmosvēnēbaxutota itsanē icatsia apóstolenē penaexanaejavanexa yabara Judaspijinē pepitsapaejamatabēcuenē, jai Pedro penacaetuatsivijavabelia.

²¹ Icatsia Pedro jumaitsi:

—Caenē panetsicueyaajibi doce paponēbejenexanē Jesús petēpaecujinae Dioso icatsia piasaēyaexanaejavatsi patataejava patanajuapaebinxā. Bajaraxuata bitapetatsi itsanē patanayanabinexa. Paxamē tuatuaĵeta ena patanajuapēnājinavanapaevi vajatuxanenē Jesús pamatacabi abaxē ponapona mapanacuataje. ²² Juanpijinē raja bautisaba Jesús. Bajara pamatacabijavaveliacujinae, panajuapēnājinavanapajē Jesús, matapania athēbēabetsia Dioso patanevecua caponaematacabitsijavabelia. Nexata bajarapitsinē bitapetatsi Jesús petēpaecujinae Dioso icatsia piasaēyaexanaejavatsi patataejava patanajuapaebinxā, jai Pedro penacaetuatsivijavabelia.

²³ Nexata pamonae nacaetuata, Dioso pejumecovēnētsivi, anijanēbeje itapeta, Pedrohana jane baja Jesús penajuapēnājinavanapaevi. Bajaraponēbejeyajuvēnēnē caenē acueyabi pavēnēbeje xaina. Itsavēnē José. Itsavēnē Barsabás. Itsavēnē Justo. Itsanē caevēnē xaina. Bajaraponē pevēnē Matías. ²⁴ Bajaraxuacujinae bajarapamonae najumaitsi:

—Vajētsianatsi Diosojavabelia vajanacayapētaeyaexanaenexa, najai.

Nexata jane baja bajarapamonae peyapētaenexa, ponē Dioso itapetsijitsiatsi apóstolenēnēxā, vajēta Diosojavabelia. Bajarapamonae pevajētsijavata Diosojavabelia, jumaitsi mapacueniaje:

—Patajatuxanenē, daxitajivi nejamatabēcueneyapētaenē. Maponēbejeyajuvēnēnēje, ponē itapetame apóstolenēnēxā, panetsitajere. ²⁵ Nexata ponē itapetame, pitsiana xua Judaspijinē vecuapitsapa. Bajaraxua Judaspijinē vecuapitsapa peponaexae infiernojavabelia, jai bajarapamonae pevajētsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapētaenexa jane baja ponē apóstolenēnēxā. Nexata bajarapamonae yapētane Matías apóstolenēnēxā. Nexata baja Matías najunua once ponēbeje Jesús pijajivi apóstolevijavabelia. Nexata baja apóstolevi doce ponēbeje.

2

Pacuenia jane baja athēbēvetsica Espírītu Santo patsica Jesús pijajivi petsijamatabējonenexatsi yabara pelivaisi

¹ Itsa baja panepa cincuenta pamatacabibeje pascuavēnēfiesta peveverecaecujinae, icatsia junua Pentecostēsvēnēfiesta. Nexata bajarapamatacabi daxita Jesús pijajivi nacaetuata caejavata. ² Nexata bajarapamatacabi athēbēvetsica jemata najumeta bepiniĵoviboxaneto. Nexata

pabota Pedrohana nacaetuatena, daxitabo najumeteca.
³ Bajarapamonae tane athëbëvetsica perunaejavatsica bepi-
 tarunutsicotia. Nexata bajarapamonae caejivi canacujitsia
 bajarapacotia tsimatanatsanaeyarunaicatsi. ⁴ Nexata
 daxita bajarapamonae tsijamatabëvënëcatsi Espíritu Santo.
 Nexata bajarapamonae jemata taxuxuaba penatsipaebijava
 itsaviriajumenëta, apo penatsipaebijumemi picani.
 Espíritu Santo saya pejamatabëcueneta bajarapacuenia
 itsaviriajumenëta natsipaebiaexanatsi.

⁵ Bajarapamatacabita Jerusalén tomarata jinavanapa
 ayaibitsaëtöxaneto judíovi. Bajarapamonae saicaya daxi-
 tanacuanëjava penaexanaevi. Bajarapamonae saya napata
 Jerusalén tomarata penataenexa Pentecostésvënëfiesta.
 Bajarapamonae bitso pejumecovënëtsivi Dioso. ⁶ Nexata
 bajarapamonae itsa jumetane bepinijioviboxaneto
 athëbëvetsica penajumetsijava, nexata pabota Jesús
 pijajivi nacaetuatena, bajarapabota muxunanacaetuana
 ayaibitsaëtöxaneto bajarapamonae. Paviriajumenëta
 Jesús pijajivi Espíritu Santo pejamatabëcueneta natsi-
 paebiaexanatsi, bajarapamonae pijajumenë. Nexata
 bajarapamonae xaniavaetsia jumetane xua yabara Jesús
 pijajivi tsipaebapona. Bajaraxuata bajarapamonae
 bitso jamatabëcuenenabenajaca. Tsipaji bajarapamonae
 caenacuapijivi canacujitsia xaniavaetsia jumetaepona
 pepo pijajumeta Jesús pijajivi petsipaebilivaisianë.
⁷ Athëbëvetsica bepinijioviboxaneto penajumetsijava
 pemuxunanacaetuanavei, pinijicuenia najamatabëxainaeja
 jamatabëcuenenabenajaca. Nexata bajarapamonae
 najumaitsi:

—Daxita mapamonae nacatsipaebanubenaje, Galilea
 nacuapijivi. Apo penatsipaebivi picani vajajumenë.
⁸ Vaxaitsi itsaverena patatsi, caenacuapijivitsi canacujitsia
 saicaya xainatsi vajajumenë, apo penatsipaebijumenë mapa-
 monaeje. ¿Detsa pacuenia itsiata vaxaitsi, caenacuapijivitsi
 canacujitsia, vajanaexanaejavaveliacujinae vajanatsipaebijumenëta
 caëjëpatsi penatsipaebinexa mapamonaeje?
⁹ Vaxaitsiyajuvënëvi raja itsamonae Partia nacuapijivi.
 Itsamonae Media nacuapijivi. Itsamonae Elam nacuapijivi.
 Itsamonae Mesopotamia nacuapijivi. Itsamonae Judea
 nacuapijivi. Itsamonae Capadocia nacuapijivi. Itsamonae
 Ponto nacuapijivi. Itsamonae Asiavënë nacuapijivi.
¹⁰ Itsamonae Frigia nacuapijivi. Itsamonae Panfilia
 nacuapijivi. Itsamonae Egipto nacuapijivi. Itsamonae
 Africa nacuapijivi, Cirene tomarapënëverenapijivi. Itsamonae
 vaxaitsiyajuvënëvi judíovi, Roma tomarapijivi. Itsamonae

apo judíovi, Roma tomarapijivi. Bajarapamonae apo judíovi ata, Dioso jumecovënëtanapa pacuenia vaxaitsi judíovitsi jumecovënëtanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi canacujitsia bajarapamonae Dioso pinijicuene pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetuaevivi.

¹² Nexata daxita bajarapamonae jamatabëcuenenajunaviacanubena Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijijoviboxaneto penajumetsijava pemuxunanacaetuaevijavabelia yabara pelivaisi

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijijumeta jumaitsi athëbëvetsica bepinijijoviboxaneto penajumetsijava pemuxunanacaetuaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. ¹⁵ Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamonaevivi apo aitajibije. Bajayacunuaepato raja abaxë maje. Bajarapaepatota jivi apo aitajibi tsabiabi. ¹⁶ Mara pamonaevivi paxamë panijajumenëta Espíritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Diosojumepaebinëmi vajunupaeba. Bajaraxua yabara Dioso pejumatsijava Joelpijinë bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënaevivi tsane mapanacua pevereverecaenexaje, itorobianicajë Espíritu Santo daxitanacuapijivi, pamonaevivi tajajivi petsijamatabëjonenexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë.

¹⁸ Nexata daxita pamonaevivi tanetonacuenebivi,

pebijivi, petiriavi ata, bajarapamatacabi Espiritu Santo toitorobianicajë petsijamatabëjonenexatsi. Nexata bajarapamonae paebiana xanë talivaisi. ¹⁹ Tsitajëtsianajë itaboxotatsia pinijicuene taexanaejava. Daxita mapanacuajava ata pinijicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. ²⁰ Nexata matacabipijjuameto aitaquiri tsane. Meravipijjuameto bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatacabinexatsica pepo petuxanenë. Bajarapamatacabi bajaraponë pinijicuene pexanaejava pecaëjëpaenëcuenetsi, tsitajëtsiana daxitajivijavabelia. ²¹ Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso,

jai bajayata tajëvelia Joelpijinë Diosojumepaebinëmi Dioso pejumaitzijava bajaraxua yabara, jai Pedro athëbëvetsica bepinijjoviboxaneto penajumetsijava pemuxunanacaetua-naevijavabelia.

²² Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatujëta. Nexata Jesús pacayapëtaeyaexana Dioso ayaicuenepexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapinijicuene. ²³ Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tsipaji patocopatame piamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajëvelia najamatabëxaina bajarapacuenia Jesús panebeyaxuabinexa. ²⁴ Itsiata baitsi jane Jesús petëpaecujinae Dioso icatsia asaëyaexanatsi. Dioso capanepatsi petëpaejavavecu. Tsipaji Jesús Dioso pexënatoxae, acuenebi pematatoxenetsijavatsi petëpaejava. ²⁵ Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaecujinae. Davidpijinë itsa yaquina Jesús pejumaitzijava Diosojavabelia icatsia piasaëjavanexa petëpaecujinae, yaquina mapejumaitsiitaneje:

Yapëtaniji Dioso taneyajavaponaponaejava. Tamuxuneneta ponapona, tacujanenia. Bajaraxuata apo junavinë

tsane. ²⁶ Bajaraxuata jamatabëcuenebarëyanë tsane. Nexata jivijavabelia tsipaebianajë tajamatabëcuenebarëyajava. Bajaraxuata yapëtaniji tatëpaecujinae icatsia tasaëjavanexa. ²⁷ Xamë, Diosomë, apo necopatsimë tsane petëpaevi peponaenacuayabelia. Apo necopatsimënu tsane taperabëtsabanaenexa nexënatonë. ²⁸ Netsitajëtime baja cajena taponamutonexa taxainaenexa maticabi apo pevereverecejava. Nejamatabëcuenebarëyaexaname itsa neyjavaponaponame,

pejaiitane bajayata Davidpijinë yaquina Dioso pejumelivaisibaxutota Jesús pejumaitisijava Diosojavabelia, jai Pedro athëbëvetsica bepinijijoviboxaneto penajumetsijava pemuxunanacaetuanaevijavabelia.

²⁹ Icatsia Pedro jumaitsi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtatsi. Yapëtanetsi itsajota mëthëtatsi. ³⁰ Davidpijinëmi raja Diosojumepaebinëmi profetanëmi. Davidpijinëmi baja cajena yapëtanë pacuenia Dioso pexaniajaijumeta najumecapanepaeya jumaitsi. Davidpijinëmijavabelia Dioso najumecapanepaeya jumaitsi mapacueniaje: “Pacuenia xamë evetame Israelnacua, bajara icatsia pacuenia bexëjavabelia caenë nemomoxiyajuvënënë evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinëmijavabelia Jesús yabara. ³¹ Davidpijinë baja cajena tajëvelia yapëtanë Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanënu Jesús petëpaecujinae Dioso icatsia piasaëyaexanaejavanexatsi. Bajaraxuata bajayata Davidpijinë tajëvelia cajena vajunupaeba Jesús petëpaecujinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumaitsi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara. ³² Bajaraxuata Jesús baja icatsia Dioso asaëyaexanatsi petëpaecujinae. Jesús Dioso piasaëyaexanaejavatsi, daxita baja paxanë pataniji. Bajaraxuata pacatsipaebatsi. ³³ Jesús caponatsi athëbëabetsia Dioso pecujanënia peecaenexa. Nexata baja paxa Dioso rajutatsi Espiritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorobica Espiritu Santo paxanëjavabetsica. Nexata xua pinijicue ne pexanaejava,

aeconoxae pataenubename, pajumetanemenua, palivaisianē mapamonae panijajumenēta pacatsipaebaje, bajaraxua Espíritu Santo pejamatabēcueneta exana. ³⁴ Itsiata baitsi jane ponē athēbēabetsia Dioso caponatsi, apo Davidpijinē. Davidpijinē bajayata tajēvelia Jesús yabara jumaitsi mapacueniaje:

Dioso jumaitsi tajatuxanenējavabelia: “Evetecare abaxē tacu-juanenia. ³⁵ Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia, jai bajayata tajēvelia Davidpijinē Jesús yabara.

³⁶ Bajaraxuata daxita Israel nacuapijivi xaniavaetsia beyapētane Jesús pelivaisi, ponē paxamē pacobematabi-abarutame cruzajavabelia. Bajaraponē Jesús, Dioso exanatsi pepo petuxanenē. Bajaraponē Jesús, Cristo cajena, ponē Dioso itorobica vajanacacapanepaenexa, jai Pedro athēbēvetsica bepinijijoviboxaneto penajumetsijava pemuxunanacaetuaanaevijavabelia.

³⁷ Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabējjobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicuene paexanaenajē pata-janeconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamē pibisiacuene paneexanaejava pacopabare. Panajamatabēcuenepēnēyorore Diosojavabelia. Nexata pacabautisabiana Jesucristo pejamatabēcueneta papecavecuaajibiaexanaenexa daxita pibisiacuene paneexanaeconi. Bajara jane xuacujinae Dioso pacarajutsiana Espíritu Santo papecatsijamatabējonenexa. ³⁹ Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa itsanacuanēpijivi, tajēnacuanējava pejinavanapaevi ata, perajutsinexa Espíritu Santo. Daxita pamonaē Dioso junatsiana pijajivinexa, tsijamatabējonenatsi Espíritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsēnēa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamē ata

bajrapamonae paneyajavanaxuabiyaniwa, pavecuanajamatabëcuenepënyorore Diosojavabelia, jai Pedro.

⁴¹ Nexata Pedro petsipaebilivaisi bajrapamatacabi jume-covënëtsi tres mil pajivimaxëto. Nexata daxita bajrapamonae Jesús pijajivi bautisaba. Nexata bajrapamonae najunua baja Jesús pijajivijavabelia. ⁴² Nexata bajrapamonae jumecovënëta palivaisi Jesús pijajivi apóstolevi tsipaebapona. Daxita bajrapamonae Jesús pijajivi yajava, apóstolevinua yajava, najamatabëcuenejëpaeya jinavanapa. Daxita nacaetuatabiaba pevajëcabiabinexa Diosojavabelia. Nacaetuatabiabanua caejavata pexaenexa, penajamatabënapitabiabinexa xua yabara Jesús sivatëpatsi.

Pacuenia jinavanapa pamonaë copiaya Jesús pelivaisi jumecovënëta yabara pelivaisi

⁴³ Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaëta pinijicue pexanaejava, exanabiaba. ⁴⁴ Daxita pamonaë jumecovënëta Jesús pelivaisi, nacaetuatabiaba najamatabecuenejëpaeya. Bajrapamonae daxita pexinaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajrapamonaeyajuvënëvi pexinaejava canajetapona. Pijairanë ata canajetapona. Pijabonë ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajrapamonae caematacabi canacujitsia nacaetuatabiaba templobota. Daxita bajrapamonae pijabonëjava jamatabëcuenëbarëyaya xaeyabiaba pexaejava najamatabëcuenejëpaeya. ⁴⁷ Nexata bajrapamonae jumai tsabiabi Diosojavabelia: “Diosomë, bitso ayaijamatabëcuenenëmë. Paneyavenonabiabame,” jai tsabiabi. Nexata daxita Jerusalén tomarapijivi, bajrapamonae pexaniacuenia yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovënëtapona pecapanepaenexatsi pibisiacue pexanaeneconivecua. Bajrapamonae najonepona Jesús pelivaisi pejumecovënëtsivijavabelia.

3

Pacuenia apóstolenëbeje Jesús pejamatabëcueneta xanepanaeyaexanabeje apo pecajëpaenëtsi peponaponaejava yabara pelivaisi

¹ Judíovi caniviyoepatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. ² Ponë apo pecajëpäenëtsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarpabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonae. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. ³ Nexata itsa bajaraponë taeyeca Pedrobeje Juanbeje pejone-najetarucaejavabeje templobojavaberena, vajëqueca palata. ⁴ Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

⁵ Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaraponë.

⁶ Pedro nexata jumaitsi bajaraponëjavabelia:

—Palata raja apo xainanë. Itsiata baitsi jane xua xainajë, carajutsianatsi. Jesucristo, Nazaret tomarapijinë, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponë pecujanenia pacobe, Pedro cobevaetabiyotsia. Bajarajota bajaraponë daxitaneniabeje asisaëreca baja. ⁸ Nexata bajaraponë jirevajunua. Petaxuta nuca. Ponapona baja. Nexata bajaraponë templobo ënëabelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetaruca Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruca Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. ¹⁰ Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatuajëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaeenëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatuajëta, Portal de Salomónvënëjavata, ponë Pedro xanepanaeyaexana,

Pedrobeje Juanbeje najuamaxēvaetabanucatsibeje. Nexata jivi ayaibitsaēto itaxutuaothopatsi. Jamatabēcuenenabenajaca bajarapamonae. ¹² Nexata Pedro itsa tane bajarapamonae pejamatabēcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xuajitsia pajamatabēcuenenabenajacame maponē yabaraje? ¿Detsa xuajitsia bitso panenaēcobamebeje mapacueniaje? Paxanēbeje yabara meta pajamatabējumaitsimē mapacueniaje: “Maponēbeje xanepanaeyaexanabeje apo pecaējēpaenēmitsi peponaponaejava. Tsipaji baja caējēpatsibeje bajarapacue pexanaenexabeje. Bajarapacue caējēpatsibeje tsipaji meta Dioso pitabarata aneconijibia ponaponabeje,” pajamatabējamē meta paxanēbeje yabara. Paxanēbeje raja patajamatabēcuenetabeje apo paexanaenēbeje bajarapacue. Jesús raja exana bajarapacue. ¹³ Vajasalinaivi baja cajena Abrahampijinē, Isaacpijinē, Jacobpijinē. Bajarapamonae pijaDioso pexēnato Jesús. Nexata Dioso jivi yapētaeyaexana Jesús bitso ayaijamatabēcue pexainaenēcue. Bajaraponē Jesús paxamē parajutame vajanacayanacuaevetsivi pecobeyabelia. Vajanacayanacuaevetsinē Pilato copatsijitsia ata Jesús, itsiata paxamē pajumesaēmē. Apo pajitsipaemē Pilato pecopatsijava Jesús. ¹⁴ Apo pavajēcaemē Pilatojavabelia pecopatsinexatsi Jesús, itsacueneneconiyo apo pexainaenē, pepo planeconijibinē. Caranata biji pibisiacuene pexanaenē, jivibenē, pecopatsinexatsi, pajumesaēmē. Pavajēcame Pilatojavabelia jivibenē pepitsapaenexa penaneconitsivi pejebabiabibovecua. ¹⁵ Ponē Dioso itorobica vajanacarajutsinexa matakabi apo peverevereaejava, bajaraponē caranata pabeyaxuabame. Itsiata baitsi jane Jesús petēpaecujinae, Dioso icatsia asaēyaexanatsi. Bajarapacue patataexae, pacatsipaebatsi. ¹⁶ Bajaraponē Jesús pejamatabēcueneta xanepanaeyaexanatsi baja maponēje, apo pecaējēpaenēmitsi peponaponaejava. Maponēje najamatabēcuenecopata Jesúsjavabelia. Bajaraxuata maponēje Jesús baja xanepanaeyaexanatsi paneitabarata, panetaeyabiabinē, paneyapētaenē, jai Pedro bajarapamonaejavabelia Portal de Salomónvënējavata.

¹⁷ Icatsia Pedro jumaitsi bajarapamonaejavabelia:

—Tajamonae, yapētaniji pacue pacabarēexana itsamonae, papecaevetsivi yajava. Tsipaji apo payapētaemē xaniavaetsia. Bajaraxuata pabeyaxuabame Jesús. ¹⁸ Bajayata Diosojumepaebivimi profetavi tajēvelia vajunupaeba Jesús athēbēvetsica Dioso pitorobijavanexatsi jivi pecapanepaenexa. Profetavimi tajēvelia

vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarapacuenene Jesús baja tocopiapatatsi itsa pabeyaxuabame. Tshipaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujujamatabëcuenemi. Panajamatabëcuenepënëyorore baja Diosojavabelia. Nexata pibisiacuenene paneexanaeneconimi, Dioso pacavecuajibiaexanaena. Nexata pacajamatabëcuene asaëyaexanaena Dioso. ²⁰ Tshipaji raja icatsia itsamatacabi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatacabi Dioso xanebijitsia daxitacuenene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspijinë Jesús yabara jumaitsi mapacueniaje: “Pacuenia nitoroba xanë profetanënexanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. ²³ Tshipaji daxita pamonaë apo jumecovënëtsi tsane bajaraponë profeta petsipaebilivaisi, pepacuene Dioso pijajivivecu tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi papemomoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. ²⁶ Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica

paxamë pacaejivimë canacujitsia papecayavenonaenexa panenajamatabëcuene pënëyorotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

4

Pacuenia Pedrobeje Juanbeje Jesús pelivaisi tsipaebabeje tomaraevetsivijavabelia yabara pelivaisi

¹ Pedrobeje Juanbeje abaxë Jesús pelivaisi tsipaebabeje bajarapamonaejavabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajaraponë capitán templobopijipolicíavi pevetsinë. ² Daxita bajarapamonaë baraanaepanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaibeje tsaponae.

³ Nexata bajarapamonaë vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. ⁴ Itsiata baitsi jane baja jivibitsaëtoخانetonë capanepaeya jumecovënëtatsibeje pevaetabivajënaeyatsibeje. Nexata daxita pamonaë jumecovënëta Jesús pelivaisi, ëpebijivi namatajëtatsi cinco mil ponëbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonaë nacaetuata Jerusalén tomarata. ⁶ Nexata bajarajota napata sacerdotenë Anás. Bajaraponë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. ⁷ Nexata Pedrobeje Juanbeje nutatsibeje daxita bajarapamonaë pitabarata. Nexata bajarapamonaë jumaitsi Pedrobeje Juanbejejavabelia:

—¿Jipatsa pejamatabëcueneta paxanepanaeyaexanamebeje apo pecaëjëpaenëmitsi peponaponaejava? jai bajarapamonaë Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabëcueneavenonatsi. Nexata Pedro jumaitsi bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapëtaenexa ponë pejamatabëcueneta paxanepanaeyaexanajëbeje apo

pecaējēpaenēmitsi peponaponaejava. Paneyanijobamebejenua paneyapētaenexa pacuenia paxanepanaeyaexanajēbeje bajaraponē. ¹⁰ Nexata pacatsipaebianatsi daxita paxamē paneyapētaenexa daxita Israel nacuapijivi ata peyapētaenexa. Jesús, Nazaret tomarapijinē, ponē paxamē pacobematabiabarutame cruzajavabelia, bajaraponē icatsia Dioso asaēyaexanatsi petēpaecujinae. Bajaraponē Jesús pejamatabēcueneta maponē paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponē Jesús yabara Dioso pejumelivaisibaxutota bajayata tajēvelia jumaitsi comparacióncuenia mapacueniaje: Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia yaētsiana botabu daxita itsaibo matatoxenetsia, jai tajēvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovēnētsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. ¹² Caenē Jesús caējēpatsi vajanacacapanepaenexa pibisiacuene vajaexanaeneconivecua. Bajaraxuata Dioso itorobica Jesús. Tsipaji baja ajibi pematatsēnēa mapanacuataje itsanē ata pejamatabēcueneta vajanacacapanepaenexa Diosojavabelia, jai Pedro bajarapamonaejavabelia.

¹³ Bajarapamonae yapētane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonae yapētanenua bajaraponēbeje bajayajebi apo penacujarubinēbeje peyaquinaejava. Itsiata bitso yapētanebeje pexanialivaisi. Saya bajaraponēbeje penacuenebinēbeje. Nexata judíovi pevetsivi jamatabēcuenenabenajaca. Bajarapamonae nexata jamatabējumaitsi Pedrobeje Juanbeje yabara:

—Bajaraponēbeje cajena penaponaponaenēbeje Jesússta. Bajaraxuata bitso baja yapētanebeje bajarapalivaisi, jamatabējai.

¹⁴ Bajarapamonae tane apo pecaējēpaenēmitsi peponaponaejava penanucaejava Pedrobeje Juanbejevavata. Nexata bajarapamonae acuenebi pejumaitsijava: “Jume raja. Jesús raja pejamatabēcueneta apo xanepanae maponēje,” acuenebi pejaijava. Tsipaji apo pecaējēpaenēmitsi peponaponaejava Jesús pejamatabēcueneta ponapona baja. ¹⁵ Nexata bajarapamonae Pedrobeje Juanbeje caeepatoyo navecuacapitsapatsibeje pecovēta ēpamonae penabarēcuaicuaijainexa.

¹⁶ Nexata Pedrobeje Juanbeje pecovëta caeepatoyo penavecuacapitsapaejavatatsibeje, bajarapamonae najumaitsi:

—¿Detsamë raja pacuene exanaenatsi bajaraponëbejejavabelia? Daxita Jerusalén tomarapijivi xaniavaetsia yapëtane bajaraponëbeje pexanepanaeyaexanaejavabeje apo pecaëjëpaenëmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaebeje raja bajaraponëbeje,” vajajaijava. ¹⁷ Pinijicuenia vaxaitsi bajaraponëbeje itavetsianatsi petsipaebiyavabeje matavëjëa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonae Pedrobeje Juanbeje pecovëta caeepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevëalia pejonexaliabeje, junaliatsibeje. Nexata jane baja bajarapamonae jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipaebaponaebeje Jesús pelivaisi. Pacoparebeje baja jivi panetsipaebaponaejavabeje Jesús pelivaisi, jai bajarapamonae.

¹⁹ Nexata Pedrobeje Juanbeje jumaitsiibeje bajarapamonaejavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. ²⁰ Acuenebi cajena patacopatsijavabeje jivi patatsipaebaponaejavabeje xua patanijibeje, palivaisi ata pajumetanjibeje, jaiibeje Pedrobeje Juanbeje bajarapamonaejavabelia.

²¹ Icatsia judíovi pevetsivi orijibia itavetatsibeje jivi petsipaebaponaeyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexaebeje apo pecaëjëpaenëmitsi peponaponaejava. ²² Ponë xanepanaeyaexanatsi Dioso pesaëta pinijicuenie pexanaejavata, bajaraponë penaexanaecujinae xaina baja cuarenta pavaibeje pematatsënëa.

Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara pelivaisi

23 Itsa baja Pedrobeje Juanbeje judíovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judíovi pijaancianovi ata pitavetsijavatsibeje. 24 Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejēpaeya vajēca Diosojavabelia. Daxita bajarapamonae pevajēcaejavata Diosojavabelia, jumaitsi mapacueniaje:

—Xamē pinijiDiosomē, nexanaenē cajena itaboxo. Nexanaenē daxita itaboxopijicuene ata. Nexanaenē ira ata. Nexanaenē daxita irapijicuene ata. Nexanaenē manuamene ata. Nexanaenē daxita manuamenepijicuene ata. 25 Xamē Diosomē, bajayata Espíritu Santo pejamatabëcueneta tajëvelia yapētaeyaexaname patajasalinainēmi Davidpijinē. Nexata nijajivitonē Davidpijinē tajëvelia nexēnato Jesús yabara jumaitsi mapacueniaje:

Itsanacuanēpijivi, pamonae apo judíovi, bitso anaepanabiabiana. Saya jema najamatabëxainabiabiana pexanaenexa picani xua apo caējēpaetsi pexanaenexa. 26 Pinjinacuanē pevetsivi nacaetuatsiana. Tomaranē pevetsivi ata nacaetuatsiana. Bajarapamonae najamatabëxainaena, xamē Diosomē, nijacuene pecatobijianaenexa. Najamatabëxainaenanua pebejiobiaexanaenexa Cristo, ponē itorobianimica jivi pecapanepaenexa,

jai bajayata tajëvelia Davidpijinē Espíritu Santo pejamatabëcueneta, Jesús pebejiobiaexanaejavanexatsi yabara, jai Pedrobana pevajēcaejavata Diosojavabelia.

27 Icatsia Pedrobana jumaitsi pevajēcaejavata Diosojavabelia:

—Mapatomarataje Herodesbeje, Poncio Pilatobeje, barēnacaetuatabeje itsanacuanēpijivi. Barēnacaetuatabeje apo judíovi. Barēnacaetuatabeje judíovi ata yajava. Bajarapamonae nacaetuata penajumejaitsinexa pacuenia beyaxuabijitsiatsi nexēnato Jesús, ponē athëbëvetsica itorobimica. Bajarapacuenia itsa barēnacaetuatabeje, copiapata jane baja xua bajayata tajëvelia Davidpijinē vajunupaeba. 28 Bajarapamonae nacaetuata pexanaenexatsi daxita pacuenia baja cajena bajayata nexēnato tocopatame pexanaenexatsi. 29 Patajatuxanenē, yapētaneme judíovi

pevetsivi patanitavetsijava jivi patatsipaebaponaeyaniva nexēnato pelivaisi. Paxanē panijajivinē. Nexata panerajutsianame patanecaējēpaejamatabēcuene ajumejunavijibia jivi patatsipaebaponaenexa nexēnato pelivaisi. ³⁰ Itsa patomarata patsipaebianajē nexēnato pelivaisi, jamatejemayaexanaename piavitanevi. Pinijicuene nexanaejava exanaename jivi peyapētaenexa bitso ayaijamatabēcuene nexainaenēcuene. Bajarapapiniijicuene exanaename nexēnato Jesús pejamatabēcueneta, jai Pedrobana pevajēcaejavata Diosojavabelia.

³¹ Itsa baja bajarapamonae vereta pevajēcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabēvënēcatsi. Nexata bajarapamonae Espíritu Santo petsijamatabēvënēcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënētsivi, xua xaina, daxita nacobenaxainaeyaveta yabara pelivaisi

³² Ayaibitsaētoxaneto Dioso pejumecovënētsivi najamatabējēpaeya jinavanapa. Bajarapamonae xua xaina, apo najamatabēxainae caejivi pexainaenexa. Nexata daxita bajarapamonae xua xaina, nacobenaxaina daxita.

³³ Nexata apóstolevi asaēya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaēyaexanatsi vajatuxanenē Jesús petēpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovënētsivi caenē ata apo yajuvënēbejiobi pexinaejava yabara. Tsipaji pamonae bitso xaina iranē, bonē ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonaeyajuvënēnē itsanē pevënē José, Chiprevënē tunaetota penaexanaenē. Bajaraponē Levípijinē pemoxoyajuvënēnē. Bajaraponē apóstolevi vënērubatsi itsavënē, Bernabé. Bajarapavënē hebreojumeta pejumaitsijume: “Jivi pejamatabēcuenebarēyayaexanaenē,” pejaijume. ³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia tēpabeje Ananíasbeje pijava Safirabeje, penajumetsēnētsixaebeje apóstolenē Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje yajuvënëcanajetabeje pijaira. ² Nexata Ananíasbeje pijavabeje pijairamatamoyajuvënëpalata muetsia copatabeje. Bajaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamatamopalata panetsicobetsanaenexa vajana-juajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecayamaxëitorobijava nenajumetsënëtsinexa Espiritu Santojavabelia? Xamë baja rovia nijairamatamopalata yajuvënëcopatame. ⁴ Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitorobijava najamatabëxainameje? Ëpaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitsijava, Ananías petëpaenë irata jopa. Nexata daxita pamonaë vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca. ⁶ Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananiaspijinë pijava jonena. Bajarapova abaxë apo yapëtae pamona pevëcuatëpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajëbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenëjëpamebeje panenajumetsënëtsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bajarapamonae icatsia xamë ata cacaponaelia pecamëthëtsinexa, jai Pedro.

¹⁰ Nexata bajarajota Pedro pitabarata bajarapova ata icatsia petëpaeva irata jopa. Itsa jonena pevëjëavi penaviabanajetarubenaevi, Ananiaspijinë pemëthëcaevilia, caxitarababuata petëpanucaeava. Nexata icatsia

bajarapamonae capitsapalia bajarapova pemëthëtsinexa pamonami pemëthë muxuneneta. ¹¹ Nexata daxita Dioso pejumecovënëtsivi, itsamonae ata, pamonaе bajarapajivibeje petëpaejava vënëlvaisitanetsi, bitso junava.

Pacuenia apóstolevi pinijicuene pexanaejavanë exanapona Dioso pesaëta yabara pelivaisi

¹² Apóstolevi Dioso pesaëta exanapona pinijicuene pexanaejavanë Jerusalén tomarapijivi pitabarata. Daxita Dioso pejumecovënëtsivi nacaetuatabiaba templobo ënëtuatuajëta, Portal de Salomónvënëjavata. ¹³ Itsamonae, pamonaе Dioso apo pejumecovënëtsivi, junava penanacaetuatsijava bajarapamonaeta. Itsiata daxita Jerusalén tomarapijivi pexanicuena yaiyataeyabiaba Dioso pejumecovënëtsivijavabelia. ¹⁴ Pevajënaeyabelia jivibitsaëtoxaneto jumecovënëtaпona Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovënëtsivijavabelia. ¹⁵ Apóstolevi Dioso pesaëta pinijicuene pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecua. ¹⁶ Nexata jivibitsaëtoxanetonë patabiaba Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

Pacuenia apóstolevi taicatsi penaneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinë yajavaponapona saduceovi. Nexata daxita bajarapamonae pinijicuena anaepana apóstolevijavabelia. Tsipaji cuenecaëbatsi. ¹⁸ Bajaraxuata taicatsi apóstolevi. Jebatsi penaneconitsivi pejebabiabibota. ¹⁹ Itsiata baitsi jane bajarapameravi Dioso pijaáγγελ apóstolevi tobaupanatsi penaneconitsivi pejebabiabibo baupanë. Nexata áγγελ apóstolevi matakapitsapaliatsi. Angel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayajavaponaponaejava, jai áγγελ apóstolevijavabelia.

²¹ Apóstolevi itsa jumetane bajarapacuenia ángel pejumait-sijava, nexata ajena matabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena mabere-naje, jai.

²² Nexata templobopijipolicíavi itsa ponalia, apo caxitarabi apóstolevi penaneconitsivi pejebabiabibota. Nexata apo pecaxitarabixae, naviabarena cobesa petsipaebinexa penacaetuatsivijavabelia. ²³ Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenaevi baupanē. Itsiata baitsi jane itsa pabaupatajē, caenē ata apo ecae bajarapabo ēnētuatuaajēalia, jai policíavi.

²⁴ Nexata templobopijipolicíavi pijacapitán, sacerdotevi penamatacaitorobivinu, itsa jumetane bajarapacuenia policíavi pejumait-sijava, bajarapamonae jamatabējumaitsi:

—¿Detsamēra nexata itsi apóstolevi? jamatabējai bajarapamonae.

²⁵ Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapomonejavabelia:

—¡Panejumetaema! Pamonae pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponē.

²⁶ Nexata templobopijipolicíavi pijacapitán barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaiejitsipa ibotonēta, jamatabējai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinu pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

28 —Paxanë baja cajena pacajumaitsitsi: “Pëtsa baja matavëjëa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovënëtsimë? Pataema jane pacuenia Jerusalén tomarata yacaëjëpapona panetsipaebilivaisi. Paxamë jamatabëpaneneconitame Jesús pebeyaxuabijavatsi yabara, jai sacerdotevi pepo penamatacaitorobinë apóstolevijavabelia.

29 Nexata sacerdotevi pepo penamatacaitorobinë bajara-pacuenia pejumaitsixae, Pedro, itsaapóstolevi yajava, jumaiti bajarapamonaejavabelia:

—Namatavenonatsi vajajumecovënëtsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovënëtsitsi.

30 Paxamë Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaëyaexanatsi petëpaecujinae. 31 Nexata Dioso jumaiti Jesúsjavabelia: “Ecare tacujuanenia. Xamë rabaja ayaijamatabëcuenenëmë. Jivi nevetsinë tsane. Necapanepaenënu tsane,” jai Dioso Jesúsjavabelia. Bajarapacuenia Dioso jumaiti Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaiti. Vajanajamatabëcuene pënëyorotsijavanexa ata Diosojavabelia yabara jumaiti. Tsipaji Dioso jitsipa Jesús pejamatabëcueneta daxitajivi aneconijibia petaenexa. 32 Nexata bajarapacuenia yabara jivijavabelia itsa patsipaebaponajë, Espíritu Santo paneyajava tsabiabi. Dioso cajena rajutapona Espíritu Santo pamonaejumecovënëta Dioso, jai Pedro, itsaapóstolevi yajava, daxita bajarapamonaejavabelia.

33 Nexata daxita bajarapamonaejumetane bajarapacuenia Pedrohana pejumaitsijava, nexata bitso anaepana. Jamatabëbeyejebatsi picani apóstolevi. 34 Itsiata apo beyejebitsi. Tsipaji bajarapamonaeyajuvënënë judíovi pecujarubinë, Gamalielvënënë, nonotapuna daxita penajuavi pitabarata. Bajaraponë fariseonë, Dioso Moiséspijinëta penajumecopatsilivaisi pecujarubinë. Daxitajivi peyaiyataenëtsi. Nexata Gamaliel itoroba apóstolevi caepatoyo pepitsapaenexalia. 35 Nexata apóstolevi caepatoyo pepitsapaejavatalia, pecovëta, Gamaliel jumaiti penajuavijavabelia:

—Tajamonae judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. 36 Panajamatabënapire pacuenia Teudasvënënëmi bajayata exanatsi. Bajaraponëmi picani nacua pevetsinënexa, ayaijamatabëcuenenë bitso jamatabënaexana. Nexata picani pijajivinexa pënajinavanapatsi

cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepënjajinavanapaevitsi, pamonaе pijajivinexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabi gobierno pejamatabëcueneta daxitajivi namataëjëtsi, Judasvënënëmi, Galilea nacuapijinëmi, bajarapacuenia pijinia jivi ayaibitsaëtoxaneto pënjajinavanapatsi. Bajaraponëmi ata beyaxuabatsi. Nexata daxita pepënjajinavanapaevitsi nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaеje apóstolevi yabara pacat-sipaebijitsiatsi. Pëtsa paitsacueniabame bajarapamonaе. Itsa bajarapamonaе saya mapanacuapijivi pejamatabëcueneta tsipaebavanapaje, bepimia peneta bajarapamonaе petsipaebilivaisi vereverecaena. ³⁹ Itsa jume, Dioso pejamatabëcueneta bajarapamonaе bajarapalivaisi jivi itsa tsipaebavanapa, nexata acuenebi tsipae paxamë bajarapacuene panevereverecaeyaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonaе jumecovënëtatsi Gamaliel. Apóstolevi icatsia caevëlia pejonenexalia junaliatsi. Bajaraxuacujinae apóstolevi, caenë canacujitsia, ayaicuenia jumatitibabeponatsi penaneconitsivi pejumaconitabiabimacata. Itavetatsi icatsia matavëjëa jivi petsipaebiyanima Jesús pelivaisi. Bajaraxuacujinae copabatsi jane baja peponaenexa. ⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae. ⁴² Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

6

Pacuenia itapetatsi siete ponëbeje díaconovinexa yabara pelivaisi

¹ Jesús pelivaisi pejumecovënëtaponaеvi, pevajënaeyabelia ayaibitsaëtoxanetonë tsaponaе. Bajarapamatacabi Jesús pelivaisi jumecovënëtapona griegovi, judíovi ata. Nexata pamonajivi pevecuatëpaevanëtsi, pamonaе bitso bejiobi, bajarapamonaеjavabelia apóstolevi rajutabiaba penamatavenonaеjavanë. Nexata Jesús pelivaisi penajuajumecovënëtsivi, pamonaе griegovi, jumaitsi judíovijavabelia:

—Caematacabi canacujitsia apóstolevi pamonajivi peve-cuatēpaevanētsijavabelia, tsicobetsanabiaba pexaejavanexa. Nexata xuavajētonē panijavirivijavabelia rajutabiaba, bajaraxuavajētonē patajavirivijavabelia apo rajutabiabi, jai griegovi judíovijavabelia.

² Doce ponēbeje, apóstolevi, najamatabēcuenejēpa pacuenia exanaejitsia judíovibeje griegovibeje penacobecaēbabiabixae. Nexata apóstolevi junata penacaetuatsinexa daxita pamonae Jesús pelivaisi pejumecovēnētsivi. Nexata baja itsa nacaetu-ata daxita bajarapamonae, apóstolevi jumaitsi bajarapamon-aejavabelia:

—Tajamonae, paxanē itsa patsicobetsanabiabijitsipajē pexaejava bitso penamatavenonaevijavabelia, nexata apo panecuenecaējēpabiabi tsipae jivi patatsipaebinexa Dioso pitorobilivaisi. ³ Nexata paitapetsianame siete ponēbeje, paxamēyajuvēnēvi. Paitapetsianame papebijivi caejamatabēcuene pexainaevi, bitso petsijamatabēvēnēcaevitsi Espíritu Santo, bitso peyapētaeayaexanaevitsi Espíritu Santo pejamatabēcuene. Bajarapamonae paitorobianame bepejiobivijavabelia petsicobetsanabiabinexa penamatavenonaecuene. ⁴ Nexata paxanē saicaya patsitecavanapaenajē patavajēcabiabijava Diosojavabelia. Patsipaebabiabianajēnua Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovēnētsivijavabelia.

⁵ Nexata daxita pamonae nacaetuata, itsa jumetane bajarapacuenia apóstolevi pejumaitsijava, tsitaxanepanatsi. Nexata bajarapamonae itapeta mapamatabēxēyoje. Itapeta Estebanvēnēnē, ponē bitso Dioso pejumecovēnētsinē, Espíritu Santo petsijamatabēvēnēcaenētsi. Itapeta Felipevēnēnē. Itapeta Prócorovēnēnē. Itapeta Nicanorvēnēnē. Itapeta Timónvēnēnē. Itapeta Parmenasvēnēnē. Itapeta Nicolásvēnēnē. Nicolás itsanacuapijinē, Antioquía tomarapijinē. Bajaraponē apo judíonē. Itsiata judíovicuenia Dioso najumecovēnētaponapona. ⁶ Daxita bajarapamatabēxēyo pitapetsicujinaetsi, nubatsi apóstolevi pitabarata. Nexata pamonae itapetatsi, caenē canacujitsia pematabocotojumavereca apóstolevi nacobebuatanubena Diosojavabelia petovajētsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaētoxaneto tsaponae Jesús pelivaisi pejumecovēnētsivi. Sacerdotevi ata ayaibitsaēto jumecovēnētapona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaëta pinijicuene pexanaejava, exanabiaba. Daxitajivi pitabarata Dioso pesaëta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabibota. Bajarapabo pevënë Esclavos Libertos. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonaeyajunënëvi Esteban anaeya jumenotatsi. ¹⁰ Nexata bajarapamonaeyajuvënëvi Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicapanepaetsi juya. ¹¹ Nexata pamonaë Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaë matamotatsi penajumetsënëtsinexa Esteban yabara, najumetsënëtsia jane baja jumaitsi jivijavabelia:

—Pajumetaniji pibisiacuenia Esteban pebaracuaicuaijaitsabiabijava Moiséspijinë. Pajumetanijinua pibisiacuenia pebaracuaicuaijaitsabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumaitsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamonaë jane baja matamota najumetsënëtsiaya peneconitsinexatsi Esteban. Nexata bajarapamonae itsa pata, jumaitsi Esteban yabara:

—Mara ponëje Esteban apo cueranaë Dioso apo pejitsipacuenia pebaracuaicuaijaitsabiabijava templobo. Apo cueranaenua Dioso Moiséspijinëta penajumecopatsilivaisi ata pebaracuaicuaijaitsabiabijava. ¹⁴ Pajumetaniji maponëje pejumaitsijava: “Jesús, Nazaret tomarapijinë, xuabianica mapatemploboje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonaë matamotatsi.

15 Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpaejavatatsi, betsita ángelnëitabara tsarucæ Esteban.

7

Pacuenia Esteban jumeكانيااا sacerdotevi pepo penamatacaitorobinë yabara pelivaisi

¹ Sacerdotevi pepo penamatacaitorobinë jumaitssi Esteban-javabelia:

—¿Xaniajai tsabaja? ¿Jumaitssimë tsabiabi pacuenia mapamonae caneconitsiajumaitssije? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaitssi mapacueniaje:

—Tajamonae, patanevetsivimë, panenamuxunaevere. VajaDioso bitso ayaijamatabëcuenenë. Tsitanaitajëta baja cajena bajayata vajasalinainë Abrahampijinëjavabelia. VajaDioso tsitanaitajëta Abrahampijinëjavabelia abaxë Abrahampijinë itsa ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuayabelia. ³ Dioso jumaitssi Abrahampijinëjavabelia:

“Nijairavecua ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinëjavabelia. ⁴ Bajaraxuata Abrahampijinë Caldea nacujavaverena pona. Nexata pata Harán nacuyaberena. Bajarapanacuata Abrahampijinë itsa ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaecujinaetsi, Dioso icatsia Abrahampijinë varapaeyaexanatsi mapairajavaberena, itsajota vaxaitsi aeconoxae jinavanapatsi. ⁵ Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaitssi Abrahampijinëjavabelia:

“Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi itsa apo xinae, bajarapacuenia Dioso najumecapanepaeya jumaitssi Abrahampijinëjavabelia. ⁶ Icatsia Dioso tajëvelia jumaitssi Abrahampijinëjavabelia:

“Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejibicuenia nacuenibiaexanabianatsi. Cuatrocientos

pavaibeje nemomoxi bepejibicuenia jinavanapaena bajarapanacuatalia. ⁷Xanë nexata naneconitsiaexanaenajë panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberenaje patsiana. Nexata mapanacuataje xanëjavaberenaja naja matabëcuenecopatsiaya navajëcabiabiana,” jai baja cajena tajëvelia Dioso Abrahampijinëjavabelia. ⁸Nexata Abrahampijinë Dioso itorobatsi peperabëcaucutaponaenexa daxita papebinacuetoxi naexana Abrahampijinë pijabota, baitsi peboupiperabëcaucutaponaenexa. Bajarapacuenia Abrahampijinë pexanaenexa Dioso itorobatsi Abrahampijinë penajamatabënapitabiabinexa Dioso peyavenonaeyapaebijavatsi. Nexata Abrahampijinë pijava vecuanaexanatsi pebinëyo. Bajaraponëyo pevënë Isaac. Nexata baja penacuetonëyo penaexanaecujinae, ocho pamatacabibeje itsa xaina, Abrahampijinë boupiperabëcaucuta pexënatonëyo pacuenia Dioso itorobatsi. Bajaraxuacujinae icatsia juya Isaacpijinë pexënato xaina. Isaacpijinë pexënato pevënë Jacob. Bajara icatsia pacuenia Isaacpijinë ata boupiperabëcaucuta pexënatonëyo. Bajaraxuacujinae icatsia Jacobpijinë pexi xaina doce ponëbeje. Bajara icatsia pacuenia Jacobpijinë ata boupiperabëcaucuba pexi. Bajarapadoce ponëbejejavaverena penaexanaponaevi doce pabitsaëtobeje naexana, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹Icatsia Esteban jumaitsi bajarapamonaejavabelia:

—Nexata Jacobpijinë pexi, ponëbeje nacaemonaemi, vaxaitsi vajasalinaivi. Bajarapamonaemi pejuyapijinë Josépijinë. Nexata Josépijinë cuenecaëbatsi pematapijivi. Bajaraxuata Josépijinë pecaponaenexatsi Egipto nacuyabelia, canajetaxuabatsi pematapijivi. Itsiata Josépijinë Dioso yajavaponaponatsi. ¹⁰Nexata Josépijinë bepejibiaexanaejavaminexatsi Egipto nacuata, vecuapanepaponapona. Dioso daxitacuenë Josépijinë Egipto nacuata yapëtaeyaexanaponatsi. Bajaraxuata Egiptonacua pevetsinëmi, Josépijinë pexaniajamatabëcuenia tanetsi. Nexata Egiptonacua pevetsinëmi tocopatatsi Josépijinë pecobenaevetsinexa Egiptonacua. Egiptonacua pevetsinëmi pijabo ata petoevetsinexa, Josépijinë tocopatatsi, jai Esteban bajarapamonaejavabelia.

¹¹Icatsia Esteban jumaitsi bajarapamonaejavabelia:

—Nexata pinijijaniboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexajava. ¹²Itsiata Egipto nacuata janibovajënaeya, Josépijinë

pecomuaquejebijava ayaijava xaniavaetejeba trigoxu. Nexata Jacobpijinē vënētane Egipto nacuata pexaejava pexainaejava trigoxu. Nexata Jacobpijinē pexi itoroba Egipto nacuajavelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinē pexi, pamonae jane baja vajasalinaivi. Itsiata Jacobpijinē pexi pejuyapijinējavata comuacae ata, apo yapētae pejuyapijinēcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinē jumaitsi pematapijivijavelia: “Xanē raja Joséné panejuyapijinēnē,” jai Josépijinē. Bajaraxuata nexata Egipto nacuaevetsinēmi yapētane bajarapamonae Josépijinē pijamonaecuene. ¹⁴⁻¹⁵ Nexata Josépijinē tonajumexuaba paxa Jacobpijinē penavarapaenexa Egipto nacuayavelia. Nexata Jacobpijinē daxita pexi, pemomoxi yajava, varapa Egipto nacuayavelia. Nexata Jacobpijinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpijinē tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexējajavelia vajasalinaivimi jane baja petēpaevimi pesijebinexatsi ibovajuta, Siquem tomarata, sicaponatsi Siquem tomaravelia. Bajara-paibovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpijinē pexita comuata bajarapaibovaju, jai Esteban sacerdotevi penamatacaitorobivijavelia, judíovi pijaancianovijavelia ata, judíovi pecujarubivijavelia ata.

¹⁷ Icatsia Esteban jumaitsi bajarapamonaejavavelia:

—Nexata baja itsa panepapona bejamatabēcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayaibitsaētoخانето tsaponae Egipto nacuata. Nexata jane baja pijinia imoxoyo pevajēnae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinējavavelia, baitsi jane baja Dioso pejamatabēcueneta vajasalinaivimi pejutsinexatsi Egipto nacuaverena pejinavanapaenexa Canaán nacuata. ¹⁸ Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē apo yapētae Josépijinē Egiptonacua pevetsinēmicuene. Tsipaji baja bajayata, bajaraponē pevajēnaeya, tēpa baja Josépijinē. ¹⁹ Nexata Egiptonacua pejanaevetsinē, vajasalinaivimi apo itaxutotsoniataetsi. Ayaicuenia nacuenibiaexanabiabatsi. Bejiobiaexanabiabatsinua.

Vajasalinaivi pexi pebinëyo ita tonaexanatsi, nacuaevetsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. ²⁰ Bajarapamatacabi naexana Moiséspijinë. Moiséspijinë bitso pexanianacuetonëyo. Dioso barëya tanetsi. Nexata Moiséspijinë penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspijinë paxabeje penabeje xuabatsi baja. Nexata nacuaevetsinë pexënatoyo Moiséspijinë pitatsi nacoxyabijitsiatsi. Nexata nacuaevetsinë pexënatoyo Moiséspijinë vitsatatsi pexënatonëyocuenia. ²² Nexata Moiséspijinë cujarubatsi daxitacuene, xua Egipto nacuapijivi yapëtane. Nexata Moiséspijinë bitso yapëtane livaisi petsipaebinea jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Ita baja Moiséspijinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. ²⁴ Nexata baja Moiséspijinë pona petaenexa pijamonae. Nexata baja Moiséspijinë ita ponapona panacuata pijamonae jinavanapa, Moiséspijinë pitabëta Egipto nacuapijinë tobejiobiaexanatsi pijamonaenë. Nexata Moiséspijinë bajarajota pijamonaenë yamatamobeyaxuaba Egipto nacuapijinë. ²⁵ Moiséspijinë nexata jamatabëjumaitsi: “Daxita tajamonae, Israelpijinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moiséspijinë. Itsiata baitsi jane Moiséspijinë pijamonae bajarapacuenia apo sivajamatabëjumaitsi. ²⁶ Moiséspijinë pebeyaxuabicujinae Egipto nacuapijinë, icatsia meravia pitsijavata, Moiséspijinë caxitajaraba anijanëbeje penabejavatabeje. Bajaraponëbeje Moiséspijinë ëpijamonaenëbeje, Israelpijinë pemomobeje. Nexata Moiséspijinë xaniavaetsia itaveta penabeyanivabeje matavëjëa. Jumaitsi: “¡Panabejitsipamebeje! Panapijamonaenëmëbeje raja. ¿Detsa xuajitsia panabiamebeje?” jai Moiséspijinë. ²⁷ Nexata ponë matapita penabejavabeje, torotajarabatsi Moiséspijinë. Bajaraponë jumaitsi Moiséspijinëjavabelia: “¿Jipatsa catocopata patanevetsinëexamë? ¿Jipatsa catocopata, pibisiacuene ita paexanjë, pataneconitsiaexanabiabinexamënuu? ²⁸ ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi

Moiséspijinē pijamonaenē. ²⁹ Nexata Moiséspijinē itsa jumetane bajarapacuenia pejumaitsijavatsi pijamonaenē, nexata Moiséspijinē najetabajirava Madián nacuyabelia. Bajarapanacuatalia ponapona. Nexata bajarapanacuatalia Moiséspijinē nacojioba. Xaina anijanēbeje pexēnatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moiséspijinē peponaponaecujinae Madián nacuata, Dioso tsitanaitajētatsi beángelnēcuenia. Bajarapacuenia tsitanaitajētatsi petusato nacuata, Sinaivēnētsuto canacujitsita.

Tsiquirinaemēyo petajueyecaecotia tuatuajēta, tsitanaitajētsitsi Dioso Moiséspijinē. Itsiata tsiquirinaemēyo apo veriajavitsi. ³¹ Moiséspijinē itsa tane, jamatabēcuenenabenajaca.

Nexata cujitalia xaniavaetsia imoxoyo petaenexa tsiquirinaemēyo petajueyecaecotia. Nexata bajarapacotiajavaverena Dioso jumaitsi Moiséspijinējavabelia: ³² “Xanē raja nijasalinaivimi pijaDiosonē. Abrahampijjinē, Isaacpijinē ata, Jacobpijinē ata, pijaDiosonē,” jai Dioso. Nexata bajarajota Moiséspijinē neconecojai pecajunavi. Apo naēcotsilia baja icatsia matavējēa. ³³ Nexata icatsia bajarapacotiajavaverena Dioso jumaitsi Moiséspijinējavabelia:

“Nataxujonore nijazapato. Tsipaji raja taitabarata nucame. ³⁴ Taniiji rabaja tajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsin-ueyabiabijava. Nexata runaicajē bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuyabelia,” jai Dioso Moiséspijinējavabelia tsiquirinaemēyo petajueyecaecotiajavaverena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moiséspijinē Dioso itorobatsi peponaenexa Egipto nacuyabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moiséspijinē peponaevajēnaeya Egipto nacuyabelia, pamatacabi abaxē Moiséspijinē ponapona panacuata vajasalinaivimi jinavanapa, bajarapamatacabi vajasalinaivimi Moiséspijinē navecuaitavetatsi. Vajasalinaivimi jumaitsi Moiséspijinējavabelia:

“¿Jipatsa catocopata patanevetsinēexamē? ¿Jipatsa catocopata, pibisiacuene itsa paexanjē, pataneconitsiaexanabiabinexamēnua?”

jai vajasalinaivimi. Bajarapacuenia vajasalinaivimi navecuaaitavetsi ata, itsiata Dioso itorobatsi Moiséspijinē peponaenexa vajasalinaivimijavabelia. ³⁶ Moiséspijinē nexata pona Egipto nacuayabelia. Nexata Egipto nacuata Moiséspijinē Dioso pesaēta pinijicuene pexanaejava, exanapona. Bajaraxuacujinae Moiséspijinē Egipto nacuaverena vajasalinaivimi jane baja matacanajetaruca. Nexata Moiséspijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanē icatsia Dioso pesaēta pinijicuene pexanaejavanē, Moiséspijinē exanapona. ³⁷ Bajarapamatacabi cajena Moiséspijinē jumaitsi vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipaebinēnexa profetanēnexanē, bajarapacuenia Dioso pacatoitorobianica itsanē profetanē Diosojumelivaisi papecatsipaebinēnexa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moiséspijinē bajayata tajēvelia vajasalinaivimijavabelia Jesús yabara. ³⁸ Moiséspijinē barēnacaetuata vajasalinaivimi petusato nacuata, Sinaivēnē tsutomuxuneneta. Nexata Sinaivēnē tsutojumabetsia caenē Moiséspijinē junaya. Nexata Sinaivēnē tsutojumatatsia Moiséspijinē ángeljavabelia tocaicuajai vajasalinaivimi. Nexata Moiséspijinēta Dioso penajumecopatsilivaisi jivi pejumecovēnētsinexa, Sinaivēnē tsutojumatatsia tonajumecopatatsi. Bajarapalivaisi Dioso najumecopata Moiséspijinēta vaxaitsi ata bajarapalivaisi vajaxainaenexa mapamatacabijavaberena je, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:

—Vajasalinaivimi apo jamatabējumecovēnētsi Moiséspijinē. Apo jitsipae cajena matavējēa penamatacaitorobinēnexatsi. Vajasalinaivimi picani najamatabēxaina epatua Moiséspijinē pevpepēnaviabinxatsi Egipto nacuayabelia. ⁴⁰ Moiséspijinē bajayajebi ponaponaya Sinaivēnē tsutojumatatsia. Nexata Moiséspijinē pecovēta vajasalinaivimi jumaitsi Aarónpijinējavabelia: “Exanare diosovi vajanacamatacaponaenexa. Apo yapētaetsi rabaja pacuenia exanatsi Moisés vajanacamatacaponaenē Egipto nacuaverena,” jai. ⁴¹ Nexata vajasalinaivimi becerro jumapecataeya exana oronē. Nexata bajarapajumapenējavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabēcuenebarēyaya

fiesta exana pecobeta pexanaexae oronë. Tsipaji bajarapajumapenë vajasalinaivimi bepijadosonë tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabëcuenecopatsiaya penavajëcabiabinexa itaboxopijitulupujavabelia. Diosojumepaebinë profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinë papemomoximë, pamatacabi abaxë pajinavanapame cuarenta pavaibeje petusato nacuatatia, pabeyabiabi atamë baca, oveja yajava, bajarapavi xanë apo panerajutabiabimë ofrendacuenia. ⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadosonë panetaenë Molocvënëdiosonë pijabonexa. Pacajinavanapamenua tuluputo, jumapecataeya panenatoexanaetuluputo, Renfánvënëtuluputo. Nexata bajarapatuluputo pataneme bepanijadoso. Panecobeta saya paneexanaediosovi, pacajinavanapame najamatabëcuenecopatsiaya bajarapadiosovijavabelia panenavajëcabiabinexa. Bajaraxuata panijanacuavecua pacacaponaeayaexanaenatsi Babilonianacua pënëyabelia pairajavabelia,

jai Dioso pejumaitsijava mapacueniaje profetanë peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia:

—Bajayata vajasalinaivimi itsa jinavanapa petusato nacuatata, cajinavanapa Dioso pijacarpaboxaneto, bajarapabota Diosojavabelia pevajëtabiabinexa. Nexata Dioso Moiséspijinëta penajumecopatsilivaisi, Dioso peyaquinaeibopanayobeje, vajasalinaivimi xaniavaetabuatabiaba bajarapacarpabo ënëtuatujëta. Copiaya Moiséspijinë jumapecataeya Dioso tsitajëtatsi pacuenia bajarapacarpabo exanetsijitsia. Nexata juya Moiséspijinë itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajëtatsi Moiséspijinë. ⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaenexa. Nexata vajasalinaivimi itsabelia varapa, caponabiaba bajarapacarpabo. Moiséspijinë baja itsa tëpa, Josuépijinë juya matakaponaeaya vajasalinaivimi. Josuépijinë nexata pamatacabi vajasalinaivimi matakanajetaruca,

caparena bajarapacarpabo mapanacuayaberenaje. Nexata vajasalinaivimi vajabitsaë exana mapanacuataje pejinavanapaevimijavabelia. Nexata vajasalinaivimi mapairaje yacajërëta. Pamatacabi Josuépijinë vajasalinaivimi matacanajetaruca mapanacuayaberenaje, Dioso rëcëpecaeyaexanatsi mapanacuapijivimije Josuébana pevajënaetarena. Nexata bexëjavaberenata, pamatacabi Davidpijinë mapanacua evetaje, vajasalinaivimi abaxë cajanavanapa bajarapacarpabo. ⁴⁶ Nexata Dioso pexaniajamatabëcuenia tanetsi Davidpijinë, mapanacua je pevetsinëmi. Nexata picani Davidpijinë bitso jitsipa Dioso pijabonexa templobo pexanaeyaexanaenexa. Baitsi paDioso bajayata Jacobpijinë jumecovënëta, Davidpijinë jane baja pamopi jinëmi. ⁴⁷ Itsiata baitsi jane Davidpijinë Dioso apotocopatsitsi templobo pexanaeyaexanaenexa. Davidpijinë pexënato, Salomónpijinë, Dioso pijabonexa templobo exanaeyaexana, Davidpijinë baja pepuatëpae. ⁴⁸ Pepo Dioso athëbëtatsia pecaenë, bajaraponë apo ponaponae bota, jivi pexanaebota. Diosojumepaebinë profetanë bajayata jumaitsi mapacuenia je Dioso pejumaitsijava:

⁴⁹ Athëbëtatsia daxitacuene taevetsinë. Mapanacuajava ata taevetsinë. ¿Detsa nexata xuajitsia bo panetoexanetsipame? Apo namatavenonaenë cajena bo tanacuer aevetsinexa. ⁵⁰ Xanë daxitacuene taexanaenë, jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabëcuenetajavi. Paneamatabocotajavinua. Apo pajumecovënëtsimë Dioso pejumelivaisi. Apo pacopatsimë Espiritu Santo papecatsijamatabëjonenexa. Pacuenia panijasalinaivimi bajayata itsi, bajara saya icatsia paxamë paitsimë. ⁵² Diosojumepaebivi profetavi tajëvelia vajunupaebapona Cristo, pepo planeconijibinë pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamë pijavajabitsaë pecobeyabelia pacanajetaxuabame. Bajarapacuenia Cristo pabeyaxuabame. ⁵³ Angelevi pacarajutsi ata Dioso Moiséspijinëta penajumecopatsilivaisi jivi pejumecovënëtsinexa, itsiata paxamë apo pajumecovënëtsimë bajarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. ⁵⁵ Itsiata Esteban bitso jamatabëcuenevënëca Espíritu Santo. Esteban athëbëa benaëcotsia. Nexata tane Dioso pijapenivenivenaectotia. Taenutsianua Jesús penucaejava paxa Dioso pemuxuneneta, pecujanenia. ⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita caecuenia cujibarenatsi Esteban pevaetabinexatsi. ⁵⁸ Bajarapamonae Esteban caponaliatsi tomarapënëyabelia. Nexata tomarapënëtalía Esteban tseconatsi ibotonëta. Nexata daxita pamonaе jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënëne evetsiaexanatsi. ⁵⁹ Petseconanubenaеjavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaеje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tëpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinë baja itsa beyaxuabatsi, Saulo tsitaxanepanatsi. Nexata pebijivi, pamonaе Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaejava Jesús pelivaisi

pejumecovënëtsivi Jerusalén tomarata. Saulo jane baja jaitaruta Jesús pelivaisi pejumecovënëtsivi Jerusalén tomarata. Caebo canacujitsia jonepona. Nexata taicaona pebejivi, petiriavi ata, pamonae Jesús pelivaisi pejumecovënëtsivi. Penaneconitsivi pejebabiabiboyabelia Saulo cajonepona bajarapamonae. Nexata ayaibitsaëtoxaneto Jesús pelivaisi pejumecovënëtsivi, Jerusalén tomarapijivi, rēcēpeca itsatomaranējavabelia. Itsamonae rēcēpeca Samaria nacuayabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënëtsivi, tsipaebapona Samaria nacuajava yabara pelivaisi

⁴ Pamonae Jesús pelivaisi pejumecovënëtsivi, rēcēpeca Jerusalén tomaravecu. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. ⁵ Pamonae rēcēpeca yajuvënënë, pevënë Felipe. Bajaraponë lia Samaria nacuata peecaetomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsaponae Felipe Samaria nacuata peecaetomarapijivijavabelia.

⁶ Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetuatabiaba. Daxita bajarapamonae xaniavaetsia namuxunaevetabiaba Felipe ita tsipaebabiaba Jesús pelivaisi. Bajarapamonae tane Felipe Dioso pesaëta pinijicuene pexanaejavanë. ⁷ Pamonae dovathi peyajavajinavanapaevi, Felipe vecuacapitsapabiaba. Dovathi pinijijumeta aējai tsabiabi ita vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamonae ata petabusipacuenabivitsi, pejayujayunaevi ata, jamatejemayaexanapona Felipe. ⁸ Bajaraxuata daxita bajarapatomarapijivi jamatabëcuenebarëya.

⁹ Bajarapatomarata Simónvënënë ponapona. Bajaraponë jivi pejorobabiabinë. Bajayajebi daxita Samaria nacuapijivi yamaxëitojorobaponapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

¹⁰ Daxitajivi, petuxanevi ata, Simón pejumaitsijava namuxunaevetabiabatsi. Bajarapamonae nexata Simón yabara jumai tsabiabi:

—Maponëje Simón pinijicuene pexanaejava caējëpatsi. Dioso raeta yavenonatsi, jai tsabiabi bajarapamonae Simón yabara.

¹¹ Bajarapacuenia Samaria nacuapijivi xaniavaetsia jume-covënëtabiaba tsipaji Simón pejorobicueneta bajayajebi jivi yamaxëitorobabiaba. ¹² Nexata Felipe Samaria nacuapijivi-javabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jume-covënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

¹³ Nexata jane baja Simón jivi pejorobabiabinë ata jume-covënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta napon-pona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanapon-aejavanë.

¹⁴ Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënebejevavelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaraponëbeje patabeje Samaria nacuayabelia, tovajëtabeje Diosojavabelia Espíritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. ¹⁶ Bajarapacuenia tovajëtabeje tsipaji abaxë Samaria nacuapijivi Espíritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsimatanacobeuatabeje Samaria nacuapijivi. Nexata jane baja Samaria nacuapijivi Espíritu Santo tsijamatabëpatsicatsi.

¹⁸ Nexata Simón itsa tane Samaria nacuapijivi Espíritu Santo petsimatarunaevavatsitsica apóstolenëbeje Samaria nacuapijivi tsimatanacobeuatsiaya petovajëtsijavatabeje Diosojavabelia, nexata Simón palata tsipaeba apóstolenëbejevavelia. ¹⁹ Simón jumaitsi:

—Panerajurebeje mapacaëjëpaejamatabëcueneje. Pajivi tsimatanacobeuatajë tatovajëtsijavata Diosojavabelia, bajara-pajivi petsimatarunaenexatsitsica Espíritu Santo, jai Simón apóstolenëbejevavelia.

²⁰ Nexata Pedro jumaitsi Simónjavabelia:

—Xamë cajena Dioso caxuabiana infiernojavabelia. Nexata vereverecaename nijapalata yajava. Tsipaji najamatabëxainame necomuatsinexa épalatata Dioso amoneya jivi perajutsijavatsica. ²¹ Tsipaji pepacuene apo najamatabëcuenecopatsimë xaniavaetsia Diosojavabelia.

Nexata Dioso patajumecovënëtsivita, apo nanacuenebimë tsane. ²² Copare baja papibisiacuene najamatabëxainame. Najamatabëcuenepënëyorore Diosojavabelia. Vajëre Diosojavabelia pecavecuaajibiaexanaenexa papibisiacuene najamatabëxainame. ²³ Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcuenecënënaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajërebeje Diosojavabelia tanevecuaajibiaexanaenexa paneconi xainajë Dioso tanexuabiyaniava infiernojavabelia pacuenia panejumaitsimëbeje, jai Simón.

²⁵ Bjaraxuacujinae Pedrobeje Juanbeje bajarapatomara-pijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bjaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinë yabara pelivaisi

²⁶ Dioso pijaángel jumaitsi Felipejavabelia:

—Nonotapunare. Maxuayolia roviafia liamëreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jai ángel Felipejavabelia.

Bjarapanamuto petusato nacuajava rucalia pepatsinexa Gaza tomarabelia. ²⁷ Nexata Felipe xaniavaeta pijjavaxi peponaenexa baja. Bjaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinë. Bjaraponë palata pevetsinë. Etiopíanacua pevetsiva pijapalata toevetabiaba. Bjaraponë, Etiopía nacuapijinë, Jerusalén tomarajavabelia pona najamatabëcuenecopatsiava pevajëtsinexa Diosojavabelia templobota. ²⁸ Nexata baja Etiopía nacuapijinë Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavënëmoyota, yanajetaruca. Nexata lebanajetaruca Diosojumelivaisipaebinë profeta Isaíaspijinë bajayata peyaquinaebaxuto. ²⁹ Nexata Espíritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunenia nucaponaenama, jai Espíritu Santo.

³⁰ Felipe nexata cujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë peleanajetarucaejava profeta Isaíaspijinë peyaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënëmoyo ënëabetsia Felipe penajunaenexatsia penamuxuneniaecaenexabeje.

³² Profeta Isaíaspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi. ³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitsi tsane: “Mara pamonaaje bajaraponëmi pemomoxije,” apo jai tsane. Tsipaji beyaxuabianatsi,

jai tajëvelia mapacueniaje Isaíaspijinë peyaquinaebaxutota Jesús yabara, palivaisi Etiopía nacuapijinë lebanajetaruca.

³⁴ Nexata Etiopía nacuapijinë jumaitsi Felipejavabelia:

—Pexaniacuene netoexanare. Netsipaebare ponë yabara yaquina profeta Isaíaspijinë mapacueniaje. ¿Baja tsa ponë pijacuata nayabarajumaitsi? Itsa jume, ¿itsanë yabara tsaja jumaitsi? jai Etiopía nacuapijinë Felipejavabelia.

³⁵ Nexata palivaisi Etiopía nacuapijinë lebanajetaruca, bajarapalivaisi Jesús yabara pejumaitsijava copiaya Felipe yapëtaeyaexana. Bajaraxuacujinae icatsia tsipaeba pexanialivaisi, Jesús pelivaisi. ³⁶ Penajetarucaejavatabeje bajarapana-mutua, patabeje itsajota merayo eca. Nexata Etiopía nacuapijinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

³⁷ Nexata Felipe jumaitsi:

—Itsa jumecovënëtame xaniavaetsia daxita nejamatabëëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexënato, jai Etiopía nacuapijinë Felipejavabelia.

³⁸ Nexata bajaraponë pijamo nucojopaeyaexana. Bajara-ponëbeje Felipebeje runarecabeje merajavabereca. Felipe bautisaba Etiopía nacuapijinë. ³⁹ Nexata penonotajunaecu-jinaetsinabeje, Espíritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espíritu Santo. Bajaraxuacujinae Etiopía nacuapijinë apo taetsi baja Felipe matavějëa. Itsiata Etiopía nacuapijinë pona baja barëyaya pijanacuayabelia. ⁴⁰ Felipe Espíritu Santo caliatsi Azoto tomarabelia. Felipe nexata daxita tomanëjjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovënëta Jesús yabara pelivaisi
(Hch 22.6-16; 26.12-18)

¹ Saulo cajena Jerusalén tomarata apo copatsi petaicapon-aejava daxita pamona Jesús pelivaisi jumecovënëta pebeye-jebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. ² Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judíovi penacaetuatabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaenexa Damasco tomarabelia. ³ Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica. ⁴ Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaex-anapona? jai Jesús.

⁵ Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsñë. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunavia-canubena. Nexata moya nubena. Tsipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë. ⁸ Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxutomervabatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca.

¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsimatanacobebuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlvivaisitaniji pacuenia bajaraponë Saulo exanaponapona. Vënëlvivaisitaniji bajaraponë pebejiobiaexanaponaajava Jerusalén tomarata daxita pecajumecovënëtsivi. ¹⁴ Maberena ataje icatsia itorobatsi sacerdotevi penamatacaitorobinë petotaicaenexa daxita pamonae pecajumecovënëtsivi jinavanapa mapatomarataje, jai Ananías Jesúsjavabelia.

15 Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinexa itsanacuanëpijivijavabelia, tanelivaisipaebinexanua bajarapanacuanë pevetsivijavabelia ata, tanelivaisipaebinexanua Israel nacuapijivijavabelia.

16 Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

17 Bajaraxuacujinae Ananías jane baja lia. Joneya pabota Saulo ponapona. Ananías nexata nacobebeuata Saulo pe-matabocotojumavereca. Ananías jumaitsi Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucaejavata, bajaraponë nitoroba. Bajaraponë nitoroba tacatsimatanacobebeuatsinexa pecavecuajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatana-cobebeuatsinexa pecatsijamatabëvënëcaenexa Espíritu Santo, jai Ananías Saulojavabelia.

18 Bajarapacuenia Ananías pejumaitsijavata Saulojavabelia, Saulo veitaxutoothopatsi xua itaxutocaranatatsi, bedujuitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. 19 Bajaraxuacujinae pexaejava baja xane. Nexata baja icatsia Saulo aperabësaëreca. Saulo nexata Damasco tomarata caematacabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

20 Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacaetuatabiabinëjjava. Saulo jivi itsa tsipae-bapona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

21 Nexata daxita pamonaë jumetane Saulo petsipaebilivaisi, jamatabëcuenenabenajaca. Najumaitsi bajarapamonae Saulo yabara:

—Mara ponëje bejiobiaexanapona Jerusalén tomaratalia daxita pamonaë jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonaë jumecovënëta Jesús pelivaisi. Nexata itsa taica, pecapon-aenexa picani Jerusalén tomarabelia, sacerdotevi penamat-acaitorobivijavabelia, najai bajarapamonae Saulo yabara.

22 Itsiata Saulo ajumejunavijibia bitso asaëyata tsipae-bapona Jesús pelivaisi. Nexata Saulo xaniavaetsia jivi

yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaebaponaejava, bexëjavabelia judíovi sivanajamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabaupaxanetojavalialia jivi pitsapabiaba Damasco tomaravelialia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxuata Saulo bajarapabaupaxanetojavalialia apo pitsapaelialia. ²⁵ Damascotomara matatoyorotsia yacaranata piaitayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto yenepanata athëbëyo perucaeventanavojotualialia, Saulo yacoparecatsi irabereca Damasco tomarapënëyabelialia. Bajarapacuenialia Saulo Damasco tomarata judíovivecua panepa pebeyaxuabiyanivatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaejava Jesús pelivaisi pejumecovënëtsivijavata. Itsiata daxita bajarapamonae Saulo cjunavatsi. Tsipaji apo jumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelialia apóstolevi peyapëtaenexatsi Saulo. Nexata Bernabé tsipaeba apóstolevijavabelialia pacuenialia Saulo namutua penajetarucaejavata tane Jesús bemajitsinaebota. Pacuenialia ata Saulo Jesús barëcuaicuaijaitsi, Bernabé tsipaeba apóstolevijavabelialia. Pacuenialia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelialia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsipaebapona ajumejunavijibia Jesús pelivaisi. Saulo barëcuaicuaijai tsabiabi judíovi, griegojume

penatsipaebivi. Barēnajumenotabiaba bajarapamonae. Itsiata baitsi jane bajarapamonae najamatabēxaina pacuenia beyaxuabijitsiatsi Saulo. ³⁰ Jesús pelivaisi pejumecovēnētsivi, jumetane Saulo pebeyaxuabiapaebijavatsi. Nexata Jesús pelivaisi pejumecovēnētsivi, Saulo pēnaxuabatsi Cesarea tomarabelia. Bajarajotacujinae Saulo itorobatsi pevajānaeyabelia penajetarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovēnētsivi jinavanapa, xaniavaetsia baja jinavanapa. Copabatsi baja pebejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovēnētsivi caebitsaēto canacujitsia xaniavaetsia jinavanapa. Nexata daxita jamatabēcuenevitsabapona Jesús pelivaisi pejumecovēnētsijava. Bajarapamonae xaniavaetsia jumecovēnētavanapa Jesús pelivaisi pibisiacuene pexanaeyaniva. Espiritu Santo yavenonaponatsi. Nexata itsamonae ata Jesús pelivaisi apo pejumecovēnētsivimi, ayaibitsaētoxaneto jumecovēnētapona Jesús pelivaisi.

Pacuenia Jesucristo pejamatabēcueneta Pedro jamatejemayaexana Eneasvēnēnē yabara pelivaisi

³² Pedro najetaruca daxitatomaranējava pesivaxainaenexa Dioso pejumecovēnētsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovēnētsivi. ³³ Nexata Pedro Lida tomarata taeyabuata Eneasvēnēnē. Bajaraponē ocho pavaibeje xaina camata peboacaecujinae. Tsipaji tabusipacuenabatsi. ³⁴ Pedro nexata jumaitsi bajaraponējavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujumatabēcuene pecatsitecaejavami, copaba baja. Najamatabēcuene copaba baja Jesucristojavabelia.

Pacuenia Pedro Dorcasvēnēva petēpaecujinae icatsia asaēyaexana yabara pelivaisi

³⁶ Jope tomarata ponapona Dioso pejumecovēnētsiva, Tabitavēnēva. Bajarapova pevēnē griegojumeta Dorcas. Dorcas daxita matabi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. ³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas

tëpa Jope tomarata. Peperabëquatsicujinaetsi petëpaeva buatatsi anijairabeje pexainaebo ënëtuatujëta. Athëbëyo pairatsia, bajarapaënëtuatujëtatsia buatatsi. ³⁸ Jopetomara eca imoxoyo Lida tomaravecu. Dioso pejumecovënëtsivi vënëlvivisitansetsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

³⁹ Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecuatëpaevanëtsi, Dorcaspijiva pevënuvitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcaspijiva pejorocaejevanë, penaxatabijavanë, penajumaacabipananë ata, xuanë Dorcaspijiva rajuta bajarapamonaejavabelia pamatacabi abaxë asaë tsaponaponae. ⁴⁰ Nexata paënëtuatujëta petëpaeva boca, bajarapaënëtuatujëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematatabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaejavabelia petëpaevami icatsia pi-asaëjava. ⁴² Nexata Dioso pesaëta bajarapapinjicueene Pedro pexanaejava, daxita Jope tomarapijivi yapëtane. Nexata jivibitsaëtoxaneto jumecovënëta Jesús Dioso pexënatocuene. ⁴³ Nexata Pedro bajayajebi ponapona Jope tomarata. Simón bacabocotonë peyacueyacuëcaeyaexanaenë, pijabota Pedro naponapona.

10

*Pacuenia Pedro barëcuaicuaijai Corneliovënënë yabara peliv-
aisi*

¹ Cesarea tomarata ponapona Corneliovënënë. Apo judiónë. Bajaraponë Italia nacuaverena pepatsivi vajabitsaëvi pija-capitán. ² Cornelio pijabopijivi barëjumecovënëtaponapona

Dioso. Dioso bitso yaiyataeya Cornelio ponapona. Cornelio palata ayaijava rajutabiaba judíovijavabelia peyavenon-aenexa judíovi bepejiobivi. Cornelio vajëtabiaba Diosojavabelia. ³ Itsamatacabi caniviyopatota, bejamatabëcuene a las tres, Cornelio bemajitsinaebota tane Dioso pijaáγγελ pejonejavarena pijaboyarena. Nexata junataxuabatsi.

—¡Cornelio! jaitsi.

⁴ Cornelio nexata naëcota áγγελjavabelia. Bitso cujunava. Nexata Cornelio jumaitsi áγγελjavabelia:

—¿Detsa xua jitsipame? jai.

Nexata áγγελ jumaitsi:

—Nevajëtabiabijava Diosojavabelia, nerajutabiabijava ata penamatavenonaecuene bepejiobivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai áγγελ Corneliojavabelia bemajitsinaebota.

⁷ Bajarapacuenia áγγελ bemajitsinaebota pejumaitsicujinae Corneliojavabelia, áγγελ baja pona. Nexata Cornelio junata anijanëbeje pijabota petonacuenebaponapon-aenëtsibeje. Pematatsënëa junata caenë vajabitsaënë. Bajaraponë vajabitsaënë Dioso peyaiyataenë. Bajaraponë Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi áγγελ. Bajaraxuacujinae Cornelio itoroba bajarapamonae pepon-aenexa jane baja Jope tomarabelia, Simón pesivaponaenexa. Nexata baja bajarapamonae naropoba.

⁹ Meravia pitsijavata, matonejeepatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajëpaebo. Pedro junaya bajarapabojumatatsia pevajëtsinexa Diosojavabelia. ¹⁰ Pedro bitso piajani. Jamatabë nabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athëbëvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaëtota beje namataenetsia upicëta. Bajarapacuenia yamaëya

copatsica. ¹² Bajarapapanaxaneto tuatuajëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. ¹³ Nexata Pedro jumetane athëbëvetsica pejumaitsijava: “Pedro, nonotapunare. Beyaxuare daxita mapamonaeye nexaenexa,” pejajava athëbëvetsica, Pedro jumetane.

¹⁴ Nexata Pedro jumaitsi:

—Jume raja. Caeto ata raja xanë apo xaenë bajarapavirianëxi tanejamatabëcuenebijiñaeayaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xaenë raja bajarapavirianëxi tanejamatabëcuenebijiñaeayaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëabetsia baja icatsia yapëcaevaya. ¹⁷ Pedro nexata najamatabëxainaeja jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamona. Bajarapamona namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacuecaeyaexanaenë, pijabo. ¹⁸ Nexata bajarapamona pepatarëcëpacujinae, baupa pënëvelia ayaijumeta yanijoba. Jumaitsi:

—¿Baja tsa mapabota Simón naponaponaje, ponë vënërubatsi itsavënë, Pedro? jai bajarapamona.

¹⁹ Pedro abaxë bojumatatsia athëbëyo najamatabëxainecaya bemajitsinaebota petaejava yabara. Nexata Espiritu Santo jumaitsi Pedrojavabelia:

—Taema. Acueyabi ponëbeje casivaparena. ²⁰ Nexata nonotapunare. Runaremecca baja nenaponaenexa bajarapamona pepëta. Jamatejema saya ajamatabëcuene covëbia naponaname. Tsipaji raja xanë itorobarenajë bajarapamona, jai Espiritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponē pajaitame, xanē rabaja maje. ¿Detsa xuajitsia pane-sivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaēvi raja pijacapitán Cornelio pejamatabēcuene panajetarubenajē. Bajaraponē pexaniajamatabēcuenenē. Dioso bitso pejumecovēnētsinē. Nexata bajaraponē Dioso-javabelia vajēcabiaba. Daxita judíovi yaiyatanetsi. Nexata judíovi jumai tsabiabi bajaraponē yabara: “Pexania-jamatabēcuenenē raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuta paxanē pacasivaponarenatsi Cornelio pijaboyabelia ne- naponae nexa. Cornelio cajumetaejitsia palivaisi tsipaebi- jiitsiamē bajaraponējavabelia, jai Cornelio pijajivi Pedrojavabelia.

²³ Nexata Pedro copiapita boyaberena pejonenexa bajara- pamonaē. Bajarapamonaē abaxē namajita bajarapabota. Bajayacunua jane baja Pedro napona bajarapamonaē pepēta. Pedro pēyanatatsi itsamonaē Jope tomarapijivi, Dioso pejumecovēnētsivi. Itsiata abaxē bajarapamatacabi apo patsilia. Epatua abaxē majitaothopa.

²⁴ Nexata meravia pitsijavata Pedrojana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonaē, pamonaē bitso Cornelio peyapētaevitsi. Pedro jane baja barēvajēnaeevetanucatsi. ²⁵ Pedro itsa patanajetaruca Corne- lio pijabopanabota, Cornelio copiapitatsi. Nexata Cornelio pematabacabēta nucajunua Pedro pitabarata. Tsipaji bitso yaiyataeya copiapitsijitsia picani. ²⁶ Nexata Pedro apo jit- sipae bajarapacuenia bitso yaiyataeya pecopiapitsijavatsi. Nexata Pedro maxēvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamē ja- matabēcueneitsimē, bajara saya xanē ata jamatabēcueneitsinē, jai Pedro.

²⁷ Nexata Pedro Cornelio barēcuaicuaijai tsanucaponae panabojavarena. Pedro itsa najoneya Cornelio pijaboy- alia, tane jivibitsaētoxaneto Cornelio pijabota penacaetu- atsivi. ²⁸ Nexata Pedro jumaitsi Cornelio pijabota penacaetu- atsivijavabelia:

—Paxamē baja cajena xaniavaetsia payapētaneme mapacueneje. Paxanē pajudíovinē patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajē apo judíovi. Apo panetocopatsinua patajonenexa apo judíovi pijaboyalia. Itsiata baitsi jane aeconoxaeta baja Dioso nitaveta tacopatsinexa

baja bajarapajamatabëcuene. Nexata Dioso netocopata tayajavaponaponaenexa apo judíovi ata. Netocopatanua tanajonenexa apo judíovi ata pijaboyalia. ²⁹ Bajaraxuata itsa nejunata taponaeenexa maberenaje, narenanë bepíjia ajamatabëcuenecovëbia. Nexata jamatabëyapëtaníjii xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, caniviyoepatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuene tataecujinae. Angel penaxatatsijava nivenivena. ³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëthane baja nerajutabiabijava bepejiobivijavabelia penamatavenonaecuene. ³² Nexata nijajivi itorobare Jope tomarajavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacucaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepíjii-ayo casivaponaeyaexanatsi. Xamë baja nexata pexaniajamatabëcuenia netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabelia.

Pacuenia Pedro livaisi tsipaeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaníjii. Najëpaeya tsaena Dioso nacajitsipa daxitaviriavitsi. ³⁵ Caenacuapijivi canacujitsia, pamona Dioso yaiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonae Dioso jitsipa. ³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeeneconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. ³⁷ Payapëtaneme rabaja mapacueneje. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. ³⁸ Payapëtaneme rabaja

mapacueneje. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús caëjëpatsi daxitacuene pexanaenexa. Nexata Jesús jamatejemayaexanapona daxita pamonaë dovathi pejamatabëcueneta avitane. Bajarapacuenia Jesús exanapona tsipaji Dioso yajavaponaponatsi. ³⁹ Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemëthëtsicujinaetsi, acueyabi matakabita, Dioso icatsia asaëyaexanatsi. Dioso Jesús caëjëpaeyaexanatsi patanetsitanaitajëtabiabinexa paxanëjavaberena. ⁴¹ Itsiata Jesús apo tsitanaitajëtsi daxitajivijavabelia. Ëpaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë. Bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë nabane. Panebarëmatavëjëaapanua. ⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexainaevi. Itsamatacabi Jesús naneconitsiaexanaena piasaëvi, petëpaevimi ata. ⁴³ Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevecuaajibiaexanaejavanexa pibisiacuene pexanaeconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espíritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanucaejavata Corneliobanajavabelia, Espíritu Santo tsijamatabëjunuatsi daxita pamonaë jumetaeyena Pedro petsipaebilivaisi. ⁴⁵ Nexata judíovi Dioso pejumecovënëtsivi, Pedro peyajavapatsivi, itsa tane bajarapacuenë, jamatabëcuenenabenajacanubena. Jamatabëcuenenabenajaca tsipaji apo judíovi ata Espíritu Santo tsijamatabëjunuatsi. ⁴⁶ Nexata Pedro peyajavapatsivi yapëtane Espíritu Santo petsijamatabëjonejavatsi Corneliobana. Tsipaji Corneliobana cuaicuaijai itsaviriajumenëta, apo penatsipaebijumenëmi. Corneliobana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamonae ataje Dioso rajutatsi Espíritu Santo. Bajaraxuata itsajivi ata acuenebi pejumaitsijava bajarapamonae yabara: “Pëtsa mapamonaeje pabautisabame merata,” pejajjava, jai Pedro.

⁴⁸ Nexata Jesucristo pevënëta Pedro bautisaba Corneliobana. Pedro pebautisabicujinae Corneliobana, asivatsi abaxë Pedro penaponaponanexa bajarajota caematacabibeje.

11

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

¹ Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamonae jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi. ² Nexata pamatacabi Pedro pata Jerusalén tomarata, judíovi, pamonae jumecovënëta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajarapacue ne yabara. Pedro jumaitsi judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuecaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniji athëbëvetsica perunaejavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutobabatsia naëcotajë xaniavaetsia tataenexa xua yajavanajetaruca bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivinua, pianaepanaevi. Taniji pecotobëxëta pejinavanapaevinua. Taniji pepunaevinua. ⁷ Nexata jumetaniji athëbëvetsica tanejumaitsijava: “Pedro, nonotapunare. Beyaxuare daxita mapamonaeje nexaenexa,” nejai.

⁸ Nexata jumaitsinë: “Jume raja. Caeto ata raja xanë apo xaenë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumaitsi: “Pavirianëxi caitorobatsi nexaenexa, xaema.

Pëtsa jumaitsimë: ‘Apo xaenë raja bajarapavirianëxi tanejamatabëcuenebijianaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacuenia athëbëvetsica napëna nejumaitsi. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. ¹¹ Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. ¹² Nexata Espíritu Santo nitoroba bajarapamonae pepëta ajamatabëcueneconvëbia tanaponaenexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalia. ¹³ Nexata Cornelio panetsipaeba pijabota petsitanaitajëtsijavatsi ángel. Angel pina jumaitsi Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë itsa patsiarena, catsipaebiana pacuenia exanaejitsiamë Dioso pecavecuajibiaexanaenexa daxita pibisiacuene nexanaeconimi, daxita nijabopijivi yajava,” jai pina ángel Corneliojavabelia. ¹⁵ Nexata jane baja itsa taxuxuabajë livaisi tatsipaebijava Corneliobanajavabelia, Espíritu Santo tsijamatabëpatsicatsi Corneliobana. Pacuenia vaxaitsi copiaya nacatsijamatabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu Santo. ¹⁶ Nexata najamatabënapitajë Jesús patanejumaitsijava mapacueniaje: “Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo,” patanejajava Jesús, najamatabënapitajë. ¹⁷ Xaniajai baja cajena. Dioso rajutapona Espíritu Santo apo judíovi ata pacuenia vaxaitsi nacarajuta Espíritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espíritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

—Xaniajai rabaja. Dioso bajarapacuenia exana apo judíovi ata matababi apo pevereverecejava pexainaenexa, itsa copaba pibisiacuene pexanabiabijava penajamatabëcuenepeñëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

19 Pamatacabi Estebanpijinē beyaxuabatsi, Dioso pejumecovēnētavanapaevi Jerusalén tomarata rēcēpeca daxitanacuanējava. Bajarapacuenia rēcēpeca tsipaji bitso bejioabiaexanaponatsi. Jesús pelivaisi pejumecovēnētsixae, itoyatsi. Itsamonae tajēbelia rēcēpeca Fenicia tomarabelia. Itsamonae rēcēpeca Chipre tunaetota peecaetomarabelia. Itsamonae rēcēpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranējava ějudíovijavabelia. Itsaviriavijavabelia apo tsipaebaponae. 20 Itsamonae Jesús pelivaisi pejumecovēnētsivi, Chipre tunaetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. 21 Pamonaē apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaibitsaētoxaNETO jumecovēnēta Jesús pelivaisi. Najamatabēcuenepēnēyorota Diosojavabelia pibisiacueNE pexanabiabijavavecua.

22 Jerusalén tomarata pejinavanapaevi, Jesús pelivaisi pejumecovēnētsivi, vēnēlvaisitane apo judíovi ata Antioquía tomarapijivi Jesús pelivaisi pejumecovēnētsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovēnētsijava. 23 Nexata Bernabé ita pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabēcuenebarēya apo judíovi ata. Nexata Bernabé muxujioba apo judíovi ata daxita bajarapamonae pejamatabēĕthĕtovetsina ajamatabēcuenesaēya peyajavajinavanapaenexa Dioso. 24 Bernabé bitso pexaniajamatabēcuenenē. Jamatabēcuenevēnēca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovēnētsinē Bernabé. Bajaraxuata nexata jivibitsaētoxaNETO jumecovēnēta Dioso.

25 Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitajaraba Saulo, barērena Saulo Antioquía tomaraberena. 26 Nexata Antioquía tomarata caevai naponaponabeje Dioso pejumecovēnētsivijavata. Jivi ayaibitsaētoxaNETO livaisi tsipaebabiababeje. Antioquía tomarata daxita pamonaē Jesús pelivaisi jumecovēnētavanapa, bajarapamonae pijatomarapijivi pepo copiaya jane baja vēnērubatsi Cristianovi.

27 Pamatacabi abaxĕ Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. 28 Bajarapaprofetavijavuvēnēnē pevēnē Agabo.

Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo peyapëtaeyaexanaexaetsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanëjava, jai tajëvelia Agabo.

Bajarapajaniboxaneto bexëa copiapata Agabo pejumaitsicuenia pamatacabi nacuaeavetsinë Claudio evetaponapona Romanonacua. ²⁹ Bajaraxuata cajena janibovajënaeya, Antioquía tomarapijivi daxita Dioso pejumecovënëtsivi najamatabëcuenejëpa peyavenonaenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. ³⁰ Nexata baja Antioquía tomarapijivi itsa tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

12

Pacuenia Pedro etatsi penaneconitsivi pejebabiabibota yabara pelivaisi

¹ Nacuaeavetsinë Herodes bejiobiaexanapona Jesús pelivaisi pejumecovënëtsivi. ² Herodes pijajivi itoroba espadata pebeyaxuabinexatsi Santiago, Juan pematapijinëmi. ³ Herodes itsa tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaevetabiatatsi. Itsabitsaëto itsa pitsapa, juya itsabitsaëto evetabiatatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabau-paevetabiatatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatuajëta Pedro majitanuca anijanëbeje vajabitsaënëbeje, pevetsinëtsibeje, petuatuajëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabaupaevetatsi. ⁷ Jemata Dioso pijaáγγελ naitajëta Pedrojavata. Nexata penaneconitsivi pejebabiabibo ënëtuatuajëta naitayota. Pedro pemajitanucaenë áγγελ yenejayatabatsi Pedro penaëcotsinexa. Angel jumaitsi Pedrojavabelia:

—Naxanitsiayo nonotapunare, jai áγγελ.

Nexata Pedro pecobecëtsicadenamaëtotsibeje vecobejoparecatsi baja. ⁸ Nexata icatsia áγγελ jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai áγγελ.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia áγγελ jumaitsi:

—Naxatare nijacamisajumavelia nenaxatatabiabijava. Nepënaponare, jai áγγελ Pedrojavabelia.

⁹ Pedro nexata napona áγγελ pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene áγγελ pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ënëtuatuajëtareca peyabaupaevetecaevajabitsaënëtsi. Icatsia xenetabeje pecotocaevi ënëtuatuajëtatsina peyabaupaevetecaevajabitsaënëtsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatatsibeje pijacuata. Pitsatabaliabeje jane baja callejavabelia. Nexata callejavareca penajetarucejavatabeje, áγγελ jemata ajibi tsojopae. ¹¹ Pedro jane baja xaniavaetsia najamatabëcueneyapëtanee. Nexata Pedro jamatabëjumaitsi:

—Baja rajane matapania aeconoxae xaniavaetsia najamatabëcueneyapëtaniji. Dioso tsaena itorobica pijaáγγελ tanecapanepaenexa Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabëjai Pedro.

¹² Pedro najamatabëxaina pacuenia exanaejitsia. Nexata lia María pijaboyabelia. Bajarapova María, Juan pena, ponë vënërubatsi itsavënë, Marcos. María pijabota ayaiBITSaëtOXaneto Dioso pejumecovënëtsivi nacaetuata

Diosojavabelia petovajëcaenexatsi Pedro. ¹³ María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. ¹⁴ Nexata Rode itsa jumeyapëtane Pedrocuene, nexata abaxë apo tobaupatsi. Rode cujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nucalia baupa pënëverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacue! Pedro raja nucalia baupa pënëverena, jai Rode.

Bajarapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

¹⁶ Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabëcuenenajunaviaca. ¹⁷ Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matabi tsina, vajabitsaëvi, pamona Pe dro evetabiabatsi pananeconitsivi pejebabiabibota, bitso jamatabëcuenebëjai. Tsipaji bajarapamonae apo yapëtae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamona Pedro evetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinxatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuae vetsinë Herodes Judea nacuavecua pona. Pona Cesarea tomarabelia peponapon-aenexa Cesarea tomarata.

Pacuenia tēpa nacuaevetsinē Herodes yabara pelivaisi

20 Nacuaevetsinē Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabēcueneyanaba xaniavaetsia pebarēcuaicuaijainexa nacuaevetsinē Herodesjavabelia. Tsipaji bajarapatomarabejepijivi jitsipa icatsia pexaejava petocapatabiabinexatsi pijatomarabejejavaberena Herodes pevetsinacuajavaverena. Nacuaevetsinē Herodes pijabo petoevetsinētsi pevēnē Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatābēcūene petoxainaenexa petocuaicuaijainexa Herodesjavabelia. Nexata Blasto jejai. Tocuacuaijai Herodesjavabelia Herodes icatsia pebarajamatabēxanepanaenexa bajara patomarabejepijivijavabelia. 21 Nexata Herodes tocaējēta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocaējēta bajarapamonae pepatsinexa, Herodes naitabētsia naxatata nacuaevetsinē penaxatatsicuenia. Nexata jane baja bajarapatomarabejepijivi pata pebarēcuaicuaijainexa Herodes. Nexata daxita bajarapamonae pitabarata nacuaevetsinē pecaejavata, Herodes eca. Nexata Herodes xaniavaetsia barēcuaicuaijai bajara patomarabejepijivijavabelia. 22 Nexata bajarapatomarabejepijivi Herodes yabara pinijijumeta yamaxēitojorobiaya jumai tsaponae pebarajamatabēxanepanaenexatsi:

—¡Maponēje nacabarēcuaicuaijaije, apo jivitonē! ¡Diosonē tsaena! ¡jai tsaponae bajarapatomarabejepijivi Herodes yabara.

23 Bajarapacuenia pejumaitsijava bajarapatomarabejepijivi Herodes apo pejumeitavetsixae, Dioso pijaángel naneconitsiaexanatsi Herodes. Avitaniayaexanatsi. Herodes nexata oro ēnēverenetsi. Herodes nexata oro pēnēverenijavatsi yatēpa.

24 Nexata Dioso pejumecovēnētsivi, daxitanacuanējjava tsi-paebapona Dioso pitorobilivaisi. Nexata Dioso pitorobilivaisi pejumecovēnētsivi ayaibitsaētōxaneto tsaponae.

25 Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja

Antioquía tomarabelia. Barëliabeje Juan, ponë vënërubatsi itsavënë, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi

¹ Antioquía tomarata Dioso pejumecovënëtsivijavata, jivanavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivinia. Herodes Galileanacua pevetsinë. Herodesbeje Manaénbeje pena juavitsabinëbeje. ² Itsamatacabi daxita bajarapaprofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espíritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenebinexabeje, jai Espíritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsimatanacobebuatatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjava yabara pelivaisi

⁴ Bernabébeje Saulobeje Espíritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia. ⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabiabinëjava. Juan napona Bernabébeje Saulobeje pepëta peyavenonabiabinexa. ⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judíonë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabibajë Dioso taneitorobicuenia,” jai tsabiabi. ⁷ Nexata Barjesúbeje

najuaponaponabiababeje Sergio Paulobeje. Sergio Paulo Chipre tunaetoxaneto pevetsinē. Sergio Paulo cajena bitso bepijia peyapētaenē palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabējumetane Dioso pitorobilivaisi. ⁸ Itsiata baitsi jane Barjesús, jivi pejorobinē, ponē vënērubatsi itsavënē, Elimas, najamatabēcuene epatajērērēcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabēcuene epatajērērēcaeyaexana Sergio Paulo pejumecovënētsiyaniva Dioso pitorobilivaisi. ⁹ Nexata Saulo, ponē vënērubatsi itsavënē, Pablo, tsijamatabēvënēcatsi Espíritu Santo. Nexata Pablo naēcota asaēyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamē jivi neyamaxēitojorobinē, pibisiacuene nexanaenē, dovathi pijajivitonēmē, pexaniajamatabēcuene pexanaejava nitoyanē! Apo jamatabēcopatsimē nenajumetsēnētsijava pejumecovënētsiyaniva pamonaē picani jamatabējumecovënēta Dioso pijapexaniajailivaisi. ¹¹ Dioso raja aeconoxae cananeconitsiaexanaena. Nexata apo natsivajēnaetaemē tsane. Matapania anijajuametonē panepaena, icatsia natsivajēnaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsanē pecobeveatabinexatsi pecomacaponanexatsi pijaboyabelia. ¹² Sergio Paulo itsa tane bajarapacuenē, nexata jumecovënēta Jesús pelivaisi. Sergio Paulo bitso jamatabēcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata peecaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuyabelia. Nexata Panfilia nacuatatalia pata Perge tomarata. Juan baja Perge tomarata itsajamatabēcuene najamatabēxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacaetuatabibibota. Bajarajota naecabeje. ¹⁵ Nexata daxita bajarapabota pejonevi, namuxunaeveta Dioso Moiséspijinēta penajumecopatsilivaisi. Namuxunaevetana Diosojumepaebivimi profetavi bajayata peyaquinaelivaisi ata. Bajaraxuacujinae

judíovi penacaetuatabiabibo pevetsivi, pijajivitonë itoroba. Nexata bajaraponë jumaitsi Pablobeje Bernabébejevavelia:

—Tajabananébeje, itsa payapëtanemebeje itsalivaisiyo panetsipaebinxabeje, aeconoxae patsipaebianamebeje jivi piamatabëcuenesaënexa Diosojavelia, jai bajaraponë Pablobeje Bernabébejevavelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabëcueneta vajasalinaivimi pexi ayaibitsaëttoxaneto xainapona. Nexata vajasalinaivimi ayaibitsaëttoxaneto tsaponae pamatacabi jinavanapa Egipto nacuata. Nexata Dioso pesaëta vajasalinaivimi matakaponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaávnënë nacuata pejinavanapaevimi. Nexata baja Dioso vajasalinaivimi totsatatsi bajarapanacuanëjava juya pejinavanapaenexa. ²⁰ Bajaraxuacujinae Dioso itoroba vajasalinaiviyajuvënënëvi juezmonae penaexanaponaenexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinë evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijinë pecotocaevijueznë. ²¹ Nexata vajasalinaivimi jumaitsi profeta Samuelpijinëjavavelia: “Pajitsipajë nitorobijava vajayajuvënënë penaexanaenexa vajanacayanacuaevetsinënexa,” jai. Nexata profeta Samuelpijinë Dioso pejamatabëcueneta itoroba Saúlpjinë vajasalinaivimi cuarenta pavaibeje peyanacuaevetaponaponaenexatsi. Bajaraponëmi Saúlpjinë, Cispjinë pexënato, vajasalinainëmi Benjamínpijinë pemomoxiyajunënënë. ²² Bajaraxuacujinae Saúlpjinë Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinë vajasalinaivimi peyanacuaevetsinexatsi. Dioso jumaitsi Davidpijinë yabara mapacueniaje: “Isái pexënato, David, jamatabëcueneyapëtaniji. Bajarapitsinë jitsipajë. Bajaraponë David daxita pacuenia jitsipajë, netoexanaena,” jai Dioso Davidpijinë yabara. ²³ Davidpijinë

raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajëvelia najumecapanepaeya jumaitsi vajasalinaivimijavabelia. ²⁴ Jesús petaxuxuabivajënaeya jivi livaisi petsipaebaponaejava, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetarucæ Juanpijinë: “Pacopabare baja daxita pibisiacuene paneexanabi-abijava. Panajamatabëcuenepënëyorore Diosojavabelia. Bajaraxuacujinae pacabautisabianatsi,” jai tsanajetarucæ Juanpijinë. ²⁵ Juanpijinë abaxë itsa apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponë. Xanëcujinae rajane bajaraponë najetarucaena. Xanë raja saya beveliajamatabëcuenenënë bajaraponëvecua. Nexata bajaraponë bepijajivitonënëcuenia ata tataxujonotsinexa pijazapato, vecuaauranë,” jai tsaponae Juanpijinë Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaitsi judíovijavabelia judíovi penacaetuatabiabibota:

—Tajamonæ Abrahampijinë papemomoximë, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. ²⁷ Itsiata Jerusalén tomarapijivi apo yapëtae Jesús pecapanepæjavanexatsi. Jerusaléntomara pevetsivi ata apo yapëtae Jesús pecapanepæjavanexatsi. Bajarapamonæ apo jumeyapëtaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabianë canacujitsia lebabibi ata bajarapabaxuto judíovi penacaetuatabiabibota, itsiata bajarapamonæ apo jumeyapëtae. Bajarapamonæ itsa neconita Jesús pebeyaxuabinexatsi, nexata judíovi exana pacuenia baja cajena Diosojumepæbivi profetavi tajëvelia vajunupaeba Jesús pexanaejavanexatsi. ²⁸ Judíovi apo caxitajarabi ata Jesús itsacueneneconi pexainæjava, itsiata bajarapamonæ vajëta nacuaevetsinë Pilatojavabelia Jesús pebeyaxuabinexatsi. ²⁹ Nexata jane baja Jesús ita beyaxuabatsi, copiapata jane baja daxita pacuenia Jesús yabara tajëvelia jumaitsi Dioso pejumelivaisibaxutota. Bajaraxuacujinae Jesús petëpaenë pitsicatsi cruzajavavetsica. Bajaraxuacujinae mëthëtatsi. ³⁰ Itsiata baitsi jane Dioso icatsia asaëyaexanatsi Jesús petëpaecujinae. ³¹ Jesús petëpaecujinae Dioso icatsia ita asaëyaexanatsi, bajayajebi anijatonë tsitanaitajëtabiaba pijajivijavabelia, pamonæ yanatatsi pamatacabi Jesús pona Galilea

nacuajavaverena Jerusalén tomaraberena. Bajarapamonae nexata maparucaeye tsipaebaona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaitsi bajarapamonaejavabelia judíovi penacaetuatabiabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaitsi pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajëvelia najumecapanepaeya jumaitsi vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaitsi Salmosbaxutota. Dioso pejumaitzijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitzijava Jesúsjavabelia.

³⁴ Dioso baja asaëyaexanatsi Jesús petëpaejavavecu. Jesús baja nexata icatsia apo tēpae tsane itsamatacabijavabelia ata. Bajarapacuenie yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinë Davidpijinëjavabelia,” jai Dioso pejumelivaisibaxutota bajayata Dioso pejumaitzijava Jesúsjavabelia. ³⁵ Bajaraxua yabara Jesús pejumaitzijava Diosojavabelia Salmosbaxutota icatsia jumaitsi mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota. ³⁶ Davidpijinë abaxë itsa asaë tsaponaponae, jumecovënëtsiaponapona pacuenia Dioso itorobatsi. Bajaraxuacujinae Davidpijinë tēpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana baja. ³⁷ Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. ³⁸ Tajamonae, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuajibiaexana pibisiacuene paneexanaeconimi. ³⁹ Pajivi Jesús jumecovënëtsiana, bajarapajivi daxita pibisiacuene pexanaeconini Dioso vecuajibiaexanaenatsi Jesús pejamatabëcueneta. Pajivi apo jumecovënëtsicapanepae ata Dioso Moiséspijinëta penajumecopatsilivaisi, jamatabëjumaitsi: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene

taexanaeneconi Dioso nevecuaajibiaexanaena,” jamatabējai, itsiata bajarapajivi pibisiacuene pexanaeneconi Dioso apo vecuaajibiaexanaetsi tsane. Tshipaji Dioso Moiséspijinēta penajumecopatsilivaisi itsajivi ata apo jumecovēnētsicapanevae. ⁴⁰ Xania baja tsane. Xaniavaetsia pajinavanapaename papecatocopiapatsiyaniva pacuenia Diosojumepaebivi profetavi peyaquinaebaxutota tajēvelia jumaitsi. Tshipaji raja profetavi peyaquinaebaxutota, tajēvelia jumaitsi mapacueniaje:

⁴¹ Panecapocaponaevi, ¡xania baja pataename! Panajunavicaename raja. Tshipaji raja panevecuanaxuabianame. Panejinavanapaeeapatota xanē, Diosonē, exanaenajē ayaicuene taexanaejavanē. Nexata taexanaejavanē pelivaisi, itsamonae xaniavaetsia pacatsipaebi ata tsane, itsiata apo pajumecovēnētsimē tsane,

jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamonaē Dioso apo pejumecovēnētsivi, jai Pablo bajarapamonaejavabelia judíovi penacaetuatabiabiabota.

⁴² Pablobeje baja Bernabébeje pitsapaejitsiabeje judíovi penacaetuatabiabiabivecua. Nexata bajarajota pamonaē apo judíovi, junatatsibeje icatsia itsamatacabi judíovi penacueraevetsimatacabita petsipaebinxabeje bajarapalivaisi. ⁴³ Penacaetuatsivi baja naviaba judíovi penacaetuatabiabiabivecua. Nexata Pablobeje Bernabébeje judíovi penacaetuatabiabiabivecua itsa pitsapabeje, jivi ayaibitsaēto pēnaponatsibeje. Bajarapamonaeyajuvēnēvi itsamonae judíovi, itsamonae apo judíovi. Pamonaē apo judíovi, bajarapamonaē catsiteca judíovicuenia Dioso pejumecovēnētsijava. Nexata Pablobeje Bernabébeje muxujibabeje bajarapamonaē pevajēnaeyabelia ajamatabēcuenesaēya pejumecovēnētavanapaenexa Dioso pítaxutotsoniataejavatsi.

⁴⁴ Bajara jane xuacujinae icatsia judíovi penacueraevetsimatacabita, bajarapatomarapijivi muxunanacaetuatsibeje ayaibitsaētoxanetonē Dioso pitorobilivaisi penamuxunaevetsinexatsibeje. ⁴⁵ Nexata judíovi itsa tane bajarapajivibitsaētoxanetonē Pablobeje Bernabébeje pemuxunanacaetuatsijavatsibeje, judíovi bitso cuenecaēbatsi. Nexata judíovi jumaitsi jivijavabelia pejumecovēnētsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuaijaitsi Pablo. ⁴⁶ Itsiata Pablobeje Bernabébeje ajumejunavijibia

tsipaebaponabeje Dioso pitorobilivaisi. Jumaitsibeje tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamē pajudiovimējavabelia. Itsiata apo pajitsipaemē bajarapalivaisi panejumecovēnētsinexa. Tsipaji apo pajitsipaemē panexainaenexa matababi apo peverevere-caejava. Paxanēbeje baja nexata pacavecuaponatsibeje patatsipaebinexabeje bajarapalivaisi apo judiovijavabelia.⁴⁷ Bajarapacuenia pacavecuaponatsibeje tsipaji baja pepo petuxanenē bajarapacuenia paneitorobabeje. Dioso cajena pejumelivaisibaxutota tajēvelia jumaitsi mapacueniaje:

Caitorobianatsi nejamatabēcueneitayotsinexa pamonaē apo judiovi. Baitsi jane tsipaebanajetarucaeneme tajumelivaisi daxitanacuanējava, nacuatabujava ata pejinavanapaevi, pecapanepaenexatsi pibisiacuene pexanaeneconivecua,

jai Dioso pejumelivaisibaxutota, jai Pablo judiovijavabelia.

⁴⁸ Apo judiovi itsa jumetane bajarapacuenia Pablo pejumaitsijava, nexata apo judiovi jamatabēcuenebarēya. Nexata apo judiovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judiovi ata jumecovēnēta Dioso, pamonaē baja cajena tajēvelia Dioso itapeta matababi apo peverevere-caejava pexainaenexa.⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi.⁵⁰ Itsiata baitsi jane pajudiovi Pablobeje Bernabébeje cueneitoyatsibeje, muxubijiapenetsiaya barēcuaiacuajai tomaraevetsivijavabelia, petuxanevi pijavajivijavabelia ata. Nexata bajarapamonaē anaepana Pablobeje Bernabébejevavabelia. Nexata baja Pablobeje Bernabébeje capitsapatsibeje bajarapanacuavecua.⁵¹ Nexata Pablobeje Bernabébeje bajarapatomarata nataxuatsapērēvarēbabeje. Bajarapacuenia nataxuatsapērēvarēbabeje bajarapatomarapijivi peyapētaenexa penaneconitsijava Diosojavabelia, apo pejumecovēnētsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje.⁵² Itsiata daxita pamonaē Dioso pejumecovēnētsivi, Antioquía tomarata pejinavanapaevi, jamatabēcuenebarēya. Espiritu Santonua jamatabēcuenevēncavanapa. Nexata exanabiaba pacuenia Espiritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

1 Iconio tomarata Pablobeje Bernabébeje judíovi penacaetuatabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëtoxaneto judíovi, apo judíovi ata, jumecovënëta Jesús pelivaisi. 2 Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. 3 Bajarapacueneyapapëtaexaebaje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyajavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniatæjavatsi bajarapamonae. Nexata daxita bajarapamonae yapëtane Jesús pelivaisi pexaniajailivaisicuene. Tsipaji bajaraponëbeje ayaicuene pexanaejava Dioso pesaëta exanaponabeje. 4 Itsiata bajarapatomarapijivi apo najamatabëcuenejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. 5 Nexata judíovi, apo judíovinua, tomara pevetsivinua, jamatabëbijatanetsibeje Pablobeje Bernabébeje. Jamatabëtseconatsibejenua ibotonëta. 6 Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Lистра tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. 7 Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Lистра tomarata yabara pelivaisi

8 Lистра tomarata naeca petaxucuenabinëtsi. Penaexanaejavaveliacujinae apo ponaponae caeto ata. 9 Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcueneyapëtane petaxucuenabinëtsi pejamatabëjumaitisijava: “Dioso pepacueney cajëpatsi tanetaxuanepanaeyaexanaenexa,” pejamatabëjaijava. 10 Nexata Pablo pinijijumeta jumaiti petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. 11 Jivibitsaëtoxanetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae pijajumeta, Licaoniajumeta, pinijijumeta jumaiti mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamonae.

12 Bajarapanacuapijivi xaina pijadiosovi. Itsiata apo pepo diosovi. Nexata Bernabé tanetsi beZeusvënëdionsonë. Pablo pijinia tanetsi beHermesvënëdionsonë. Tsipaji Pablo penamatacanajetarucaenë. Nexata jivi barëcuacuajai tsabiabi. 13 Zeusvënëdionsonë pijatemplobo eca Listratomara jumaverena, Litra tomarabelia pejonebaupa imoxoyovecua. Nexata sacerdotenë, Zeusvënëdionsonë pijatemplobota penacuenebabiabinë, capata torobitsaëto Litra tomarabelia pejonebaupajavaberena. Bajarapatorobitsaëto matabo-coitabëtsiaya tsmataruba pematono. Nexata sacerdotenë, Litra tomarapijivi yajava, tobejitsiatsibeje picani bajarapatorobitsaëto Pablobeje Bernabébeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bedionsonëbeje tanetsibeje. 14 Nexata Bernabébeje Pablobeje itsa jumetanebeje bajarapacueni petoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsipaji Dioso apo pejitsipacuena bajarapamonae toexanaejitsiatsibeje. Nexata kujinaejinaliabeje jivibitsaëtoxanetonë penacaetuanajavabelia. Nexata bajarapajivibitsaëtoxanetonë tuatuajëta nucabeje. Pinijijumeta Pablo jumaitsi:

15 —¿Detsa xuajitsia bajarapacueni panetoexanaejitsiamë? Paxanëbeje ata raja saya pajivitonënëbeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinexabeje pexanialivaisi. Panajamatabëcuenepeñëyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiavereverecaenë. Dioso raja daxitacuene pexanaenë. Exana mapanacuae, mapanacuapijicuene yajava. Exana itaboxo ata, itaboxopijicuene yajava. Exana manuamene ata, manuamenepijicuene yajava. 16 Dioso copata vajavajënaeya daxitanacuapijivi pejinavanapaenexa pijacuata penatojitsipacuena. 17 Nexata Dioso daxitacuene pexanaejava, nacobecovëtaeyaexanabiaba daxitajivijavabelia. Nexata picani bajarapamonae becanaëjëta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vajaanbijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabëcuenebarëyayaexananua, jai Pablo pamonaejavabelia picani torobitsaëto tobejitsiatsibeje.

18 Bajarapacuenia Pablo jumaitsi ata, itsiata picani bajaramonae jamatabētobiatsibeje torobitsaēto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja belia copatsiaexanabeje.

19 Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomarapënëyabelia robobocaliatsi. Tsipaji baja bepetëpaenë taeyabuatatsi. 20 Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabébeje ponabeje baja Derbe tomarabelia.

21 Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtatsibeje jivibitsaētoxaneto. Bajaraxuacujinae icatsia naviatanajetarucabeje Listra tomarajava, Iconio tomarajava ata, Antioquía tomarajava ata. 22 Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaenexabeje Dioso pejumecovënëtsivi. Muxujiobaponabeje bajarapamonae pevajënaeyabelia ajamatabëcuenesaëya pecatsitecaenexa Dioso pejumecovënëtsijava. Pablobeje Bernabébeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenejëtaponae na daxita vajajonevinexa Dioso pijanacuayabetsia, jaiibeje tsaponae Dioso pejumecovënëtsivijavabelia.

23 Caebitsaēto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaētojavata toitapetsijitsiabeje, penacaetuatsivajënaeya apo xaeyabiabeje pexaejava. Nexata penacaetuatsijavata itsa toitapetabeje, japasa tovajëtabiabeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaanianovije xaniavaetsia pecatoevetsinexa nijajivi, jaiibeje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata peecaetomarabelia, yabara

pelivaisi

²⁴ Pablobeje Bernabébeje Pisidianacua pexenetsicujinaebeje, patabeje Panfilia nacuyabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsimatanacobebuatatsibeje Dioso peyavenonaponaenexatsibeje jivi petsipaebanajetarucaejavatabeje Dioso pitorobilivaisi. Pablobeje Bernabébeje Antioquía tomarata patabeje. Tsipaji baja toveretabeje daxita pacuenia Dioso itorobatsibeje. ²⁷ Itsa baja Antioquía tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaitsi mapacueni-aje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje

Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacuajava, Samaria nacuajava ata. Bajaraxuayo Dioso pejumecovënëtsivijavabelia tsipaebapona apo judíovi ata pijaperujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetaru-cabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. ⁷ Bajayajebi baja namataenetsia penabarëcuaicuaijaicujinae, nexata Pedro nonotapuna. Jumaitsi:

—Tajamonae, payapëtaneme rabaja mapacuenieje. Xanë baja cajena bajaya Dioso nitapeta, paxamëyajuvënënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta. ⁸ Dioso cajena daxitajivi pejamatabëcueneypëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacuenie tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi.

Tsipaji bajarapalivaisi vaxaitsi ata apo nacacaējēpae vajakumecovēnētsinexa. Vajasalinaivimi ata apo caējēpaetsi pekumecovēnētsinexa bajarapalivaisi. ¹¹ Vaxaitsi baja jume-covēnētatsi Jesús pelivaisi. Nexata vajatuxanenē Jesucristo pejamatabēcueneta Dioso vajanacaitaxutotsoniataexae, nacacapanepaena pibisiacuene vajaexanaeneconivecua. Bajara pijinia pacuenia apo judíovi ata Jesucristo pejamatabēcueneta Dioso capanepaenatsi pibisiacuene pexanaeneconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaēta pinijicuene pexanaejavanē exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. ¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. ¹⁴ Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeneconivecua Jesús pelivaisi itsa jumecovēnēta. ¹⁵ Bajarapacuenia apo judíovi ata aneconijibia Dioso petaejavanexa yabara, bajayata tajēvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

¹⁶ “Bajayata abaxē pamatacabi Davidpijinē evetaponapona Israelnacua, xaniavaetsia jivi nejumecovēnētavanapa. Bajara icatsia pacuenia jivi xaniavaetsia tanejumecovēnētavanapaenexa, yavenonaenajē.

¹⁷ Nexata apo judíovi ata, daxita pamonae junatsianajē tajajivinexa, bajarapamonae ata jitsipaena tanejumecovēnētsinexa,” jai bajayata Dioso mapacueniaje. ¹⁸ Dioso baja cajena tajēvelia yapētaeyaexana daxita mapacuene yabaraje, jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹ Icatsia Santiago jumaitsi apóstolevijavabelia, ancianovijavabelia ata:

—Nexata xanē jamatabēitsinē mapacueniaje. Apo jamatabēitonotsi tsanetsi baja matavējēa apo judíovi, pamonae baja najamatabēcuenepēnēyorota Diosojavabelia. ²⁰ Itsiata baitsi jane caelivaisiyobeje toyaquinaenatsi cuyalatobaxutota vajayapētaeyaexanaenexa bajarapamonae. Itsamonae xaina pecobeta saya jumapecataeya pexanaenēanē bepija-diosovi petaenexa. Nexata bajaraxuanējavabelia ofrendacue-

nia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibiyani-vatsi itsavajavabelia pijavavecua. Papebijivi pijinia abaxë apo nacojiobi, pematayajibiyani-vatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibiyani-vatsi itsanëjavabelia pamonavecua. Papetiriavi pijinia abaxë apo nacojiobi pematayajibiyani-vatsi pebijavabelia. Toyaquinaenatsinua bajarapamonae pexaeyaniva cuibocuetsacaeya pebeyaxuabinë pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabëcuenebijianaeyaniva judíovijavabelia.²¹ Tsipaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacueni. Itavetabiabatsi bajarapacueni penacueraevetsimatacabianë canacujitsia penacae-tuatabiabibonëjava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovinua, daxita Dioso pejumecovënëtsivinua, najamatabëjêpa penaitapetsinexa bajarapamonaeyajuvënëvi pitorobinexa Antioquía tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaronëbeje Dioso pejumecovënëtsivi penamatacaitorobivi yajuvënënebeje.²³ Pacuyalatobaxuto bajaraponëbeje tocaponeajitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënajinaliatsi. Vajamonae ancianovi ata pacajamatabënajinalia. Pacajamatabënajinaliatsi daxita apo pajudíovimë, Antioquía tomarata panejinavanapaevi. Paxamë ata Siria nacuata panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi.²⁴ Pavënëlivaisitaniji pacuenia pacajumaitsi paxanëyajuvënëvi papecasivaxainaevilla. Bajarapamonae pina nexata pacanajamatabëcuene epatajërërëcaeyaexanapona. Tsipaji pina bajarapamonae pacajumaitsi: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamona pacajumaitsi

bajarapacuenia, paxanë cajena apo paitorobinë paxamëjavabelia. ²⁵ Nexata paxanë patanacaetuatsijavata, panajamatabëcuenejëpajë pataitapetsinexa ponëbeje paitorobijitsianë paxamëjavabelia pecaponaenexabeje patacatoyaquinaelivaisi. Bajaraponëbeje naliabeje Bernabébeje Pablobeje pepëta. ²⁶ Vajabananëbeje, Bernabébeje Pablobeje, bitso vaxaitsi asivatsi. Bajaraponëbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, itsiata ajamatabëcuenesaëbeje tsaponaponae. ²⁷ Nexata bajaraponëbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸ Itsa panacaetuatajë Espíritu Santo paneyavenona patayapëtaenexa peyapëxanepanaelivaisi patacatoitobinexa panejumecovënëtsinexa. Nexata baja apo panamatavenonae më panejumecovënëtsinexa piayapëbejelivaisi, palivaisi daxita pajudíovinë pajumecovënëtajë. Pacaitorobatsi palivaisi bitso panamatavenoname panejumecovënëtsinexa. ²⁹ Pecobeta saya jumapecataeya pexanaenëanëjavabelia ofrendacuena pevi perajutsinexa itsamonae itsa tobía baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuena petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepëta. Nexata baja naponabeje. Bajarapamonae pata Antioquía tomaravelia. Nexata Antioquía tomarapijivi junata daxita Dioso pejumecovënëtsivi penacaetuatsinexa. Nexata penacaetuatsijavata rajutabeje bajarapacuyalatobaxuto. ³¹ Antioquía tomarapijivi itsa leba bajarapacuyalatobaxuto, bajarapamonae bitso jamatabëcuenebarëya. ³² Judasbeje Silasbeje Diosojumepaebinëbeje profetanëbeje. Nexata ayailivaisi

tsipaebabeje Antioquía tomarapijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjiobabeje penaviatsinexabeje baja pitorobivitsijavabelia. ³⁴ Pepuanapëjiobibeje baja, Silasbeje abaxë itsiata icatsia nacopatabeje bajarajota. ³⁵ Pablobeje Bernabébeje ata abaxë ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquía tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. ³⁸ Itsiata baitsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. ³⁹ Nexata Pablobeje Bernabébeje apo najamatabëcuenëjëpaebeje Marcos pebarëponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuayabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetarucaejavabeje. ⁴¹ Nexata Pablobeje Silasbeje Siria nacuajava, Cilicia nacuajava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Listra tomarata nanaropota Pablobeje Silasbeje pepēta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovēnētsinē, Timoteo. Timoteo pena judíoiva, Dioso pejumecovēnētsiva. Itsiata baitsi jane Timoteo paxapijinē griegonē. ² Daxita Dioso pejumecovēnētsivi, Listra tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovēnētaaponapona, jai tsabiabi.

³ Pablo jitsipa Timoteo pebarēponaejava. Nexata Pablo Timoteo pebarēponaejavāe, judíoivi pijacuenia perabēcaucutsiaexana. Baitsi boupiperabēcaucutsiaexana. Bajarapacuenia Pablo perabēcaucutsiaexana pebaraanaepanaeyanivatsi pevēna judíoivi. Tsipaji itsaxuayo barēnajetaruaejitsia, judíoivi penaperabēcaucubivi jinavanapa. Nexata judíoivi apo jitsipae peyajavajinavanapaejava apo peperabēcaucutsinētsi. Nexata Pablo Timoteo perabēcaucutsiaexanaenejeva itsa barēnajetaruaejitsipa bajarapamonaejava, yapētaejitsipatsi Timoteo, apo peperabēcaucutsijavatsi. Tsipaji Timoteo paxapijinē griegonē, apo peperabēcaucutsinētsi. ⁴ Pablobana tomaranējjava itsa najetarubena, caetomarapijivi canacujitsia, tsipaebapona Dioso pejumecovēnētsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovēnētsinexa pacuenia apóstolevi, ancianovi ata, itorobatsi Jerusalén tomaraverena. ⁵ Bajaraxuata Dioso pejumecovēnētsivi, caebitsaēto canacujitsia, bitso ajamatabēcuenesaē tsaponae Diosojavabelia. Caematacabi canacujitsia Dioso pitorobilivaisi ayaibitsaēto jumecovēnētapona.

Pacuenia Pablo bemajitsinaebota tane Macedonia nacuapijinē yabara pelivaisi

⁶ Espíritu Santo apo tocopatsitsi Pablobana petsipaebinexa Dioso pitorobilivaisi Asiavēnē nacuata. Bajaraxuata Pablobana najetarubena Frigia nacuajava, Galacia nacuajava ata. ⁷ Pablobana itsa najetarubena Misianacua muxubērēa, jamatabēpata picani Bitinia nacuajava. Itsiata baitsi jane Espíritu Santo apo tocopatsitsi pepatsinexa Bitinia nacuajava. ⁸ Nexata Misianacua canacujitsialia roviaalia ponalia. Pata Troas tomarabelia. ⁹ Nexata Troas tomarata meravi Pablo bemajitsinaebota taenuta Macedonia nacuapijinē. Macedonia nacuapijinē asaēyata jumaitsi Pablobjavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinë.

¹⁰ Pablo bemajitsinaebota petaenutsicujinae Macedonia nacuapijinë, bepijia paxaniavaetajë patajajavaxi patanicabinexalia Macedonia nacuayabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropobajë. Panaponajë barcota. Roviaalia panayanicabaliajë patapatsinexa Samotrasiatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis tomarabelia.

¹² Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayaibitsaëtoxaneto Roma tomaraverena pepatsivi. Bajarapatomarata panajinavanapajë caematacabimaxëto.

¹³ Nexata abaxë itsa panajinavanapajë Filipos tomarata, judíovi penacueraevetsimatocabita papitsapajë tomarapënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya itsa pajaitanajetarubenajë, petiriavi penacaetuatenaevi mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petiriavijavabelia.

¹⁴ Bajarapapetiriavijavajuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipaëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi.

¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

¹⁶ Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova tajëvelia jumai tsabiabi itsajivijavabelia, xaniajai tsabiabi. Nexata papalata mata-motabiabatsi petsipaebabiabijamatabëcuene, pijatuxanevi pitabiaba. ¹⁷ Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtatsia peecaenë Dioso pijajivi. Pacatsipaebapona papecacapanepaelivaisinexa pibisi-acuene paneexanaeneconivecua, jai tsanajetarucabiabi petiriva paxanë yabara.

¹⁸ Bajarapacuenia najumatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitisjavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia. ²⁰ Jivi penaneconitsiaexanabiabivi, juezmonae, pitabarata nutatsibeje. Pamonaë Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanapona-beje vajatomarapijivi. ²¹ Tsipaebapona-beje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

²² Nexata jivi ayaibitsaëtoxañeto baraanaepanatsibeje Pablobeje Silasbeje. Nexata juezmonae itoroba

vajabitsaë Pablobeje Silasbeje penaxatatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota.
²³ Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatujëta. ²⁴ Penaneconitsivi pejebabiabibo pevetsinë juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarëretatsibeje cepovënëjavata.

²⁵ Nexata meravituatujëta Pablobeje Silasbeje vajëtabeje Diosojavabelia. Diosojumevajianë naxëanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxëanecaejavabeje.
²⁶ Nexata jemata bajarapaepatota ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëtonëta cobecëbejebatsi, vecobeothopatsi. ²⁷ Penaneconitsivi pejebabiabibo pevetsinë naëcotapuna pemajitecaenëmi. Nexata itsa tane daxita baupanë penabaupanaejava, navemarajonotaxuabina pijaespada penabeyaxuabinexa picani. Tsipaji jamatabëjumaitsi:

—Daxita meta baja penaneconitsivi rëcëpeca. Nexata bajarapajamatabëcuene yabara nenaneconitsiaexanaena tomara pevetsivi, jamatabëjai.

²⁸ Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

²⁹ Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematabacabëta nucajunua Pablobeje Silasbeje pitabarata.
³⁰ Bajaraxuacujinae penaneconitsivi pejebabiabibo pevetsinë barëpitsapaliatsibeje Pablobeje Silasbeje. Penaneconitsivi pejebabiabibo pevetsinë jumaitsi:

—¿Detsa xua exanaenajë tanecapanepaenexa Diosojavabelia? jai Pablobeje Silasbejevavabelia.

³¹ Nexata Pablobeje Silasbeje jumaitsibeje:

—Najamatabëcuenecopare pepo petuxanenë Jesucristojavabelia pecacapanepaenexa Diosojavabelia. Xamë nijabota pejinavanapaevi ata Jesucristojavabelia najamatabëcuenecopatsi pecapanepaenexatsi Diosojavabelia, jaibeje.

³² Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata. ³³ Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquiatatsibeje. Nexata bajaraponë, pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenebarëya Dioso pejumecovënësixae.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa. ³⁶ Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejevavaberena ata. Tsipaji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. ³⁹ Nexata juezmonae parena. Jumaitsi Pablobeje Silasbejevavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujiobabeje bajarapamonae piamatabëcuenesaënexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevetsimatacabianë canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabiabibota:

—Dioso baja cajena pejumelivaisibaxutota tajëvelia vajunupaebatsi Cristo, ponë baja Dioso itorobica jivi pecapanepaenexa. Tajëvelia baja cajena Dioso pejumelivaisibaxutota Cristo vajunupaebatsi pijavajabitsaë ayaicuenia pebejioaexanaejavanexatsi. Vajunupaebatsinua baja cajena Cristo petëpaecujinae icatsia piasaëjavanexa. Bajaraponë raja Jesús, ponë pelivaisi pacatsipaebatsi. Bajaraponë raja Cristo, ponë Dioso itorobica jivi pecapanepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabiabibota.

⁴ Nexata judíoviyajuvënëvi jumecovënëta Pablo petsipaebabiabilivaisi. Ayaibitsaëto griegovi ata, Dioso pejitsipaevi, jumecovënëta Pablo petsipaebabiabilivaisi. Ayaibitsaëto petiriavi ata, petuxanevi pijavajivi, jumecovënëta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejejavata. ⁵ Nexata judíovi, pamonae apo jumecovënëtsi Pablo petsipaebabiabilivaisi, Pablo cuenecaëbatsi. Tsipaji Pablojavabelia jivi ayaibitsaëto jonepona. Nexata bajarapajudíovi junata

jivi ayaibitsaëtoxaneto pibisiajamatabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barënacaetuata. Nexata daxita bajarapajudíovi, pejunatsivi jane baja yajava, barënajamatabëcueneyanaba. Nexata itoroba bajarapatomarapijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënënë pijabota. Nexata daxita pamona anaepana bajarapatomarata, Pablobeje Silasbeje jemata tsimaxëpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixaetsibeje, nexata pamona anaepana, vaetabatsi Jasón, itsamonae yajava, pamona Dioso pejumecovënëtsivi. Robobocaponaliatsi Jasónbana tomara pevetsivijavabelia. Nexata pamona anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavana-paevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponë nucaje, tocopata pijabota penaponapon-aenexabeje Pablobeje Silasbeje. Daxita pamona Jasón mayajavanucaje, Pablobana ata, daxita bajarapamona, apo jumecovënëtsi cajena Romanonacua pepo pevetsinë pitorobili-vaishi. Daxita bajarapamona jumai tsabiabi: “Romanonacua pepo pevetsinë rabaja apo nacayanacuaevetsi. Itsanë rabaja nacayanacuaeveta. Bajaraponë pevënë Jesús,” jai tsabiabi daxita bajarapamona, jai najumetsënëtsiaya tomara pevetsivijavabelia pamona anaepana.

⁸ Nexata bajarapacuenia pejumaitsijava itsa jumetane, daxita tomarapijivi tomara pevetsivinua bitso anaepana. ⁹ Nexata Jasón, Dioso pejumecovënëtsivi yajava, palata mata-motsiaexanatsi tomara pevetsivijavabelia, Pablobeje Silasbeje pevecuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponëbeje mapatomarave-cuaje, pacatocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

Pacuenia Pablobeje Silasbeje ponaponabeje Berea tomarata yabara pelivaishi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepijia itorobatsi

Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabiabibojavabelia. ¹¹ Ajamatabëcuenetaja pajudíovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabëcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabibota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapëtaenexa xaniajai bajarapacuenia itsa jumaitsi Pablo petsipaebabiabilivaisi. ¹² Berea tomarapijivi judíovi ayaibitsaëto jumecovënëta Pablo petsipaebabiabilivaisi. Ayaibitsaëto pijinia griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. ¹³ Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojavabelia. ¹⁴ Nexata Berea tomarapijivi, pamonae jumecovënëta Pablo petsipaebabiabilivaisi, bajarapamonae Pablo bepijia itorobatsi peponaenexa manuamene itapata peecaetomarabelia. Silasbeje abaxë Timoteobeje nacopatabeje Berea tomarata. ¹⁵ Pamonae Pablo yanataponaliatsi, pënaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuenecaëjëpaenatsibeje, bepijia renabeje tsane tanecaxitajarabinexabeje Atenas tomarata, jai Pablo bajarapamonaejavabelia.

Bajaraxuacujinae pamonae Pablo pënaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tuatujëjava. Nexata Atenas tomarapijivi pematabacabëta nubenabiaba pevajëcabiabinexa bajarapajumapecataevijavabelia. Nexata Pablo itsa tane

bajarapacuenē, bejamatabējiobi bitso. ¹⁷ Nexata judíovi penacaetuatabiabibota Pablo Dioso pitorobilivaisi yabara barēnajumenotabiaba pevēna judíovi. Barēnajumenotabiabanua apo judíovi ata, pamonaē Dioso pejitsipaēvi. Caematacabi canacujitsia barēnajumenotabiabanua pamonaē Pablo caxitajarabatsi tomara tuatuaĵēta. ¹⁸ Nexata Pablo caxitajaraba pebijivi, epicúreomonaē pecujarubilivaisi pejumecovēnētavanapaēvi. Caxitajarabanua itsapebijivi, estoicosmonaē pecujarubilivaisi pejumecovēnētavanapaēvi. Bajarapamonaē ata Pablo barēnajumenota. Nexata Pablo pebarēnajumenotsijavata, bajarapamonaeyajuvēnēvi Pablo yabara muetsia najumaitsi:

—¿Detsa meta pitsilivaisi maponēje namatatsapatsia nacabarēcuaicuaiĵaije? najai bajarapamonaē Pablo yabara.

Itsamonaē pijinia Pablo yabara najumaitsi:

—Itsanacuapijivi racovē pijadioso vi pelivaisipaēbinē, najai bajarapamonaē.

Bajarapacuenia najumaitsi tsipaji Pablo tsipaebapona pexanialivaisi, Jesús pelivaisi. Tsipaebaponanua petēpaevimi icatsia itsamatacabi piasaēĵavanexa petēpaecujinaē. ¹⁹ Nexata bajarapamonaē Pablo barēponaliatsi Areópagovēnē tsutoĵavabelia, patsutoĵavabelia tomara pevetsivi nacaetuatabiaba penabarēcuaicuaiĵainexa. Itsa baja palia bajarabelia, bajarapamonaē jumaitsi Pabloĵavabelia:

—Panetsipaebare patayapētaenexa papeĵanalivaisi tsipaebaponaē. ²⁰ Panetsimuxuaitothia abaxē palivaisi tsipaebaponaē. Nexata pajitsipajē patayapētaenexa pajamatabēcuenelivaisi xaina palivaisi tsipaebaponaē, ĵai Atenas tomarapijivi Pabloĵavabelia.

²¹ Atenas tomarapijivi, itsanacuaverena pepatsivinua, pamonaē bajarapatomarata najinavanapa, daxita bajarapamonaē jamatabēcuenēnabiabatsi peĵanalivaisi pejumetaeyabiabinexa. Jamatabēcuenēnabiabatsinua petsipaebabiabinexa itsamonaēĵavabelia ata.

²² Nexata Pablo nonotapuna bajarapamonaē tuatuaĵēta Areópagovēnē tsutoĵavata. Jumaitsi:

—PaAtenas tomarapijivimē, pacatanetsi rabaja panijadioso vi bitso papeĵamatabēcuenēnabiabijava.

²³ Tanajetarucabiabijavata panijatamaracalleĵava, taeyabiabajē itsaxuayo pavajēcabiabame panijadiosovijavabelia. Nexata caxitajarabajē altarvēnēĵava, itsajota jivi vajēcabiaba abaxē apo yapētaē ata padiosoĵavabelia vajēcabiaba. Bajarapaaltarvēnēĵavata peyaquinarutsiitane jumai tsarucaē mapacueniaĵe: “Padioso abaxē apo yapētaetsi, bajarapadiosoĵavabelia vajēcabiabianatsi mapaaltarĵavataĵe,” ĵai

tsarucae peyaquinarutsiitane. PaDioso yabara yaquinaruta bajarapaaltarvënëjavata, nexata bajarapaDiosojavabelia paxamë baja najamatabëcuenecopatsiaya panavajëcabiabame, abaxë apo payapëtae atamë bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuene yajava. BajarapaDioso pepo pevetsinë jane baja daxita mapanacuaje. Pevetsinë itaboxo ata. BajarapaDioso cajena apo ponaponae jivi pexanaetemplota. ²⁵ BajarapaDioso apo namatavenonae jivi peyavenonaenexatsi. Tsipaji apo namatavenonae it-sacuenëjavayo ata. Biji rajane bajaraponë nacarajuta caep-atoyo vajaasaëtsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athëbëtsia peecaenë, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenë pebi exana. Bajaraxuacujinae bajarapapebijavaverena naexanapona daxitavirijumevi pijasalinaivimi. Nexata bajarapapebijavaverena penaexanaponaevi yacaëjëpa pejinavanapaejava daxitanacuanëjava. Nexata Dioso caevirijumevi canacujitsia tocopatapona pamatacabibeje asaë tsavanapaejitsia. Tocopataponanua panacuanëjava jinavanapaejitsia. ²⁷ Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabëcuenecopatsinexa Diosojavabelia. Dioso cajena tajë apo nacavecuaponaponae. ²⁸ Dioso raja pejamatabëcueneta asaë tsavanapaetsi. Bajarapacuenia Dioso pejamatabëcueneta asaë tsavanapaetsi tsipaji baja cajena paxamëyajuvënëvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitsiatsi mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucæje Dioso itoroba daxitajivi daxitanacuanëjava pejinavanapaevi

pibisiacuene pexanabiabijava pecopabinexa baja, penajamatabëcuenepënëyorotsinexa Diosojavabelia.
³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaëjëtaruta. Pamatacabi Dioso tocaëjëtaruta, itsa copiapatsiana, naneconitsiaexanaena daxitanacuanëpijivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsijava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:
 —Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona.
³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonae jumecovënëta Pablo petsipaebilivaisi yajuvënënë, pevënë Dionisio. Bajaraponë Dionisio, Areópagovënë tsutojavata penacaetuatabiabiivi pevetsiviyajuvënënë. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecuinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitajaraba judíonë, Aquilavënënë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapona daxita judíovi pepitsapaenexa Roma tomaravequa. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpabonë. ⁴ Judíovi penacaetuatabiabiibota, penacueraevetsimatacabianë canacujitsia, Pablo

judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palívaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacueene Cristo, ponë copiaevetavanapatsi pepatsijavatsica vajanacacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaejava Jesús yabara, judíovi baraanaepanatsi. Pablo pibisiacuenia bi-jatanetsi. Nexata Pablo penaxatatsijava najumajonotaxu-aba. Nënëbabia bajarapamonae peyapëtaenexa penaneconit-sijava Diosojavabelia. Tsipaji apo jumecovënëtsitsi, Pablo tsi-paebi ata Jesús yabara. Pablo nexata jumaiti judíovijavabelia:

—Paxamë saya panejamatabëcueneta panaxuabianame Diosovecua. Xanë tajamatabëcueneta apo panaxuabimë tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovënëtsimë. Aeconoxae rabaja copatajë patacatsipaebabiabijava paxamëjavabelia bajarapalívaisi. Tavajënaeyabelia baja ponaenajë tatsipaebaponaenexa bajarapalívaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabiabibovecua pitsapa. Nexata pona Justovënënë pijaboyabelia. Nexata Justo pijab-ota Pablo naponapona. Bajaraponë Justo penavajëcabiabinë Diosojavabelia. Pijabo eca judíovi penacaetuatabiabibo muxuneneta. ⁸ Nexata Crispovënënë, judíovi penacaetu-atabiabibo pevetsinë, daxita pijabopijivi barëjumecovënëta Jesús pelívaisi. Ayaibitsaëto Corinto tomarapijivi, pamonaе jumetane Pablo petsipaebabiabilívaisi, jumecovënëta. Nex-ata bajarapamonae nabautisaba. ⁹ Nexata meravi bemajitsi-naebota Dioso jumaiti Pablojavabelia:

—Pëtsa junavame. Pëtsa copatame netsipaebaponaеjava tajumelívaisi. ¹⁰ Xanë raja cayajavatsi. Nexata itsajivi ata apo caitsacueniabi tsane. Tsi-paebaponaename tajumelívaisi. Tsi-paji rabaja tajajivi ayaibitsaëto tsaponae mapatamarataje, jai Dioso.

¹¹ Nexata Pablo ponapona Corinto tomarata dieciocho pa-juametobeje. Tsi-paebaponaпona Dioso pitorobilívaisi Cor-into tomarapijivijavabelia.

¹² Pamatacabi Galiónvënënë Acayanacua evetaponapona, judíovi najamatabëcuenejēpaeya tsimaxēnacaetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevetsinē Galión pitabarata. ¹³ Nexata judíovi jumaitsi nacuaevetsinē Galiónjavabelia:

—Mara ponēje jivi livaisi tsipaebaponaje pejumecovënëtsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanē cajena bajarapacuenia apo panetonajumecopatsi Dioso Moiséspijinēta penajumecopatsilivaisi, jai judíovi nacuaevetsinē Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuaevetsinē Galión jumaitsi judíovijavabelia:

—Paxamē pajudíovimē, bepapyapētaneme mapacuenije. Itsa maponēje nacobetoxotsipa, jivitonē ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajē. ¹⁵ Paxamē saya pabarēnajumenotame maponēje papecatsipaebaponaelivaisi yabara. Pabarēnajumenotamenua panijasalinaivi pijalivaisi yabara ata. Nexata saya paxamē panijacuata bajaraxua yabara pabarēcuaicuaijamēre pacuenia pajitsipame. Xanē raja apo evetsinē bajarapalivaisi, jai nacuaevetsinē Galión judíovijavabelia.

¹⁶ Nexata baja nacuaevetsinē Galión navecuapitsapaeyaexana judíovi. ¹⁷ Nacuaevetsinē Galión judíovi navecuapitsapaeyaexanae ata, caecuenia abaxē judíovi apo ponae pijabonējavabelia. Nexata griegovi, bajarajota penubenaevi, nacobenavaetaba judíoviyajuvënënë, Sóstenesvënënë. Bajaronē Sóstenes judíovi penacaetuatabiabibo pevetsinē. Nexata griegovi Sóstenes conibabia nacuaevetsinē Galión pitabarata, ajibi ata peyabaraconibabejava. Nexata nacuaevetsinē Galión tae ata bajarapacuenie, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxē bajayajebi ponapona Corinto tomarata. Bajaraxuacujinae Dioso pejumecovënëtsivita napējioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matabacasibatsi jivi peyapētaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. ¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabiboyalia. Nexata

bajarajota barënalivaisita judíovi. ²⁰ Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai. ²¹ Nexata Pablo itsa napëjioba, bajarapamonaejavabelia jumaitsi:

—Naxanetajë tapatsinexa Jerusalén tomarabelia tataenexa pafiesta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquía tomarabelia. ²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomanëjava. Najetaruca Galacia nacuata penaetomaranëjava, Frigia nacuata penaetomaranëjava ata. Bajarapatomaranëjava pejinavanapaevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judionë Apolosvënënë pata Efeso tomarata, Alejandría tomarapijinë. Bajaraponë xaniavaetsia Dioso pitorobilivaisi jivi tsipaebabiaba. Jumeyapëtane bitso pacuenia Dioso pejumelivaisibaxutota jumaitsi. ²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaejava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata jamatabëcuenesaëya xaniavaetsia tsipaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tsipaeba judíovi penacaetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tsicobeyaquinatsi

Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuayabelia, Apolos bitso yavenona Acaya nacuapijivi Dioso pejumecovënëtsivi. ²⁸ Daxitajivijavabelia Apolos tsi-paebapona Jesús pelivaisi. Nexata pacuenia Dioso pejumeliv-aisibaxutota jumaitsi Jesús yabara, Apolos tsipaebapona dax-itajivijavabelia. Nexata Apolos daxitajivi yapëtaeyaexanapona Jesús pepacuenia Dioso athëbëvetsica pitorobijavatsitsica jivi pecapanepaenexa. Nexata baja judíovi moya ena. Tsipaji acuenebi judíovi: “Jume raja,” pejajava Apolos petsipaebili-vaishi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamatacabi pijinia Pablo ibotsutonë nacuajavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejvibeje Jesús pelivaisi pejumecovënëtsivi. ² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espiritu Santo. Apo pavënëtaenë cajena Espiritu Santo ata, jai bajarapamonae Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamonaie baja copaba pibisiacuene pexanaejava, pamonaie baja najamatabëcuenepeñëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta.

⁶ Nexata Pablo pevajëtsijavata Diosojavabelia, tsimatanacobe- buata bajarapamonae. Nexata bajarapamonae Espiritu Santo

tsijamatabējunuatsi. Nexata bajarapamonae itsa cuaicuajiai, ajumeithia pecuaicuajijai. Tsipaji itsaviriajumenēta, apo penatsipaebijumenēmi, cuaicuajiai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia. ⁷Daxita meta bajarapamonae bejamatabēcuene doce ponēbeje.

⁸ Efeso tomarata Pablo acueyabi pajumetobeje ponapona. Nexata Pablo Efeso tomarata, judíovi penacaetuatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barēnajumenotabiaba Dioso pijajivi pevetsijavanexa yabara. Bajarapacuenia Pablo barēnajumenotabiaba judíovi pejumecovēnētsinexa Dioso pijajivi pevetsijavanexa. ⁹ Itsamonae itsiata amatabocotaja. Apo jitsipae pejumecovēnētsijava bajarapalivaisi. Bajarapamonae daxitajivi pitabarata pibisiacuenia baracuaicuajiai pexanialivaisi, Jesús pelivaisi. Nexata baja Pablo vecuansatsata bajarapamonae apo pejumecovēnētsixae Jesús pelivaisi. Pablo nexata, Jesús pelivaisi pejumecovēnētsivi yajava, pona Tirannovēnēnē pijaescuelabojavabelia, bajarapabota penacaetuatabiabinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebapona ana anijavaibeje. Nexata daxita Asiavēnē nacuapijivi, judíovi, apo judíovi ata, jumetane petuxanenē Jesús pelivaisi. ¹¹ Dioso yavenonatsi Pablo Dioso pesaēta pinijicuene pexanaejavanē pexanaponaenexa. ¹² Nexata pamonaē toavitaneysi, pijamonae Pablo penaxatabijavanē, pijapañueloxi ata, daxita xuaxi Pablo naperabēcajayaba, tocaponabiaba piavitanevi peperabēcajayabinexa. Nexata piavitanevi bajaraxua itsa tsiperabēbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranējava najetarubena. Bajarapamonae Jesús pelivaisi apo jumecovēnētsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponēbeje tsavana-pae. Bajarapamonae Escevavēnēnē, sacerdotevi penamat-acaitorobinē, ēpexi tsavanapae. Nexata bajarapamonae vēnētane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenē Jesús pevēnēta, najai.

Nexata jane baja itsa tane dovathi peyajavaponaenē, bajarapamonae jumaitsi:

—Dovathi, pacaitavetatsi, ponē Pablo vajunupaebapona, petuxanenē Jesús pevēnēta. Vecuapitsapare baja

maponëje, jai Escevavënënë pexi dovathi peyjavaponapon-aenëjavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë papamonaemë? jai dovathi.

¹⁶ Nexata bajarajota dovathi peyjavaponaponae, tsi-maxëjirevarenatsi bajarapamona. Pinijsaëta dovathi peyjavaponaponae biatsi. Nexata amoneyabatsi. Pinijicuenia tsaquibabiatsi. Vejumatiticatsi penaxatabijavanëmi. Nexata bajaraponë pijabovetua bajarapamona yarëcëpeca pebejavatsi. Jumasa nexata rëcëpeca. ¹⁷ Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyjavaponaponae exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamona yayiatane Jesús pevënë.

¹⁸ Nexata ayaibitsaëto xaneto Dioso pejumecovënëtsivi, patapona Pablobanajavaberena. Nexata bajarapamona daxitajivi pitabarata navecuapaebapona pibisiacuene pexanabiabijava. ¹⁹ Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamona comuaca bajarapabaxutonë, ayaimatamota comuaca. Nexata daxita bajarapamona bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapalatanëanë bitso penamatamotsinëanë. ²⁰ Nexata bajarapacuenia Dioso pitorobilivaisi yacajëpaponaja baja daxitanacuanëjava. Nexata ayaibitsaëto tsapona Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacujava, Acaya nacujava ata, petaenajetarucanexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajë icatsia Roma tomarabelia ata, jai Pablo.

²² Nexata Pablo itoroba Macedonia nacuyabelia anjanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia.

24 Efeso tomarapijivi anaepana Pabloanajavabelia Demetrio pejamatabēcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarēnacuenebivi bitso ayaicuenia palata barēpitabiaba bajarapaboximatamo. 25 Nexata Demetrio junata pebarēnacaetuatsinexa daxita pebarēnacuenebibi bajarapaboxi. Junatanua itsamonae ata, pamonae pijinia jumapecataeya pexanaejavanē nacuenebibi. Nexata Demetrio jumaiti bajarapamonaejavabelia:

—Paxamē rabaja payapētaneme mapacueneje. Jumapecataeya vajaexanabiabijavanē vajacanajetabiabixae, ayaijava palata xainaponatsi. 26 Pataneme rabaja. Pajumetanemenua baja Pablo pejumaitisaponaejava mapacueniaje: “Jivi raja pecobeta jumapecataeya pexanaenēanē, apo diosovi cajena,” pejaitisaponaejava. Nexata jivi ayaibitsaētoxaneto mapatomarapijivije jumecovēnētaPona Pablo bajarapacuenia petsipaebaponaejava. Itsiata apo ēmapatomarapijivije. Daxita Asiavënë nacuapijivi ata jumecovēnētaPona. 27 Bajarapacuenia jivi ayaibitsaēto pejumecovēnētaPonaejava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuene vajanacuenebijava. Pinijijamatabēcuenē pexainaediosova Artemisa pijatemplobo ata, apo yaiyatae tsipae. Baitsi padiosova daxita Asiavënë nacuapijivi, daxitanacuanēpijivi ata, pematabacabēta tonubenabiaba pevajēcabiabinexa bajarapovajavabelia, vereverecaejitsipa. Nexata baja bajarapovajavabelia jivi apo vajēcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

28 Nexata bajarapamonae itsa jumetane bajarapacuenia Demetrio pejumaitisijava, nexata bitso bajarapamonae anaepana. Pinijijumeta vavajai tsaponae. Jumaiti:

—¡Pinijijamatabēcuenē raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

29 Nexata daxita Efeso tomarapijivi itsa jumetane, bitso anaepana Pabloanajavabelia. Nexata ponēbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponēbeje Macedonia nacuapijinēbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita

tomarapijivi nacaetuatabiaba. ³⁰ Pablo picani jumaitsi Dioso pejumecovënëtsivijavabelia:

—Xanë najonejitsianë mapaboyalijaie taneyanatsinëbeje tayajivicuaicuaijainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. ³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyantivatsi. ³² Efeso tomarapijivi penacaetuatsijavata, nalivaisijëpaeya apo cuaicuaijai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaëtoxaneto apo yapëtae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjavabelia Alejandro peyapëtaenexa xua yabara jivi ayaibitsaëto nacaetuata. Tsipaji Alejandro ata judíonë. Nexata Alejandro pevëna judíovi pënatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pianaepanaeyaniva daxita judíovijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapëtane Alejandro judíonëcuene, nexata daxita vavajaiya jumai tsaponae anijahorabejecuenia mapacueniaje:

—iPinijijamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaxana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtane vajanacatocopatsijava vajeavetsinexa mapatomarataje peecaëbo, pinijijamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane diosojumapeibotova, Artemisa, athëbëvetsica pejopaejava mapatomarataje. ³⁶ Nexata bajarapadiosojumapeibotova athëbëvetsica pejopaejava yabara, acunebi itsajivi ata: “Jume,” pejaijava. Nexata pajamatejemamëre. Pëtsa abaxë itsacuene paexaname copiaya panajamatabëxainaejevamë xaniavaetsia. ³⁷ Mapapebibeje paxamë pacapatameje, apo penacobetoxotsinëbeje templobopijijava. Pibisiacuenia apo baracuaicuaijaibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

38 Icatsia tomara pevetsinē jumaitsi bajarapamonaejavabelia:

—Demetriobana itsa jamatabēneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa. 39 Itsa apo paneconitsijitsiamē jivi, saya itsa panacaetuatame itsacuenelivaisiyo yabara, nexata saya roviaalia papaebare xaniavaetsia daxitajivi penacaetuatsijavata, pacuenia gobierno nacaitoroba. 40 Xaniajanē pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatatsije, jai Efeso tomara pevetsinē penacaetuatsivijavabelia.

41 Itsa baja Efeso tomara pevetsinē najumevereta bajarapacuenia petsipaebijava, itoroba baja daxitajivi penaviabinexa pijabonējavabelia.

20

Pacuenia Pablo najetaruca Macedonia nacujava, Grecia nacujava ata, yabara pelivaisi

1 Itsa baja Efeso tomarapijivi jamatabēcaeva pianaepanaejava, nexata Pablo junata penacaetuatsinexa daxita Dioso pejumecovēnētsivi. Nexata Pablo muxujioba Dioso pejumecovēnētsivi pevajēnaeyabelia piamatabēcuenesaē tsavanapaenexa Dioso pejumecovēnētsijava. Pablo nexata pexaniacuenia napējioba bajarapamonae. Bajaraxuacujinae Pablo baja pona Macedonia nacuyabelia. 2 Nexata Pablo itsa pata Macedonia nacuyabelia, pexanialivaisi tsipaebanajetaruca Macedonia nacupijivi Dioso pejumecovēnētsivi pevajēnaeyabelia piamatabēcuenesaē tsavanapaenexa Dioso pejumecovēnētsijava. Bajaraxuacujinae icatsia Pablo pata Grecia nacuyabelia. 3 Nexata Grecia nacuata Pablo ponapona acueyabi pajuametobeje. Bajaraxuacujinae picani Pablo barcota naponaejitsia Siria nacuyabelia. Nexata Pablo nayajumetane Siria nacuata judíovi pevajēnaeevetsijavatsi pebeyaxuabinexatsi. Bajaraxuata Pablo najamatabēxaina icatsia pecovēya penaviatsinexa matatsēnēa Macedonia nacujava. 4 Pamonae Pablo yanatatsi, mapevēnēanēje. Sópater, Berea tomarapijinē. Aristarcobeje pijinia Segundobeje, Tesalónica tomarapijinēbeje. Gayo pijinia Derbe tomarapijinē. Timoteo pijinia Listra tomarapijinē. Tíquicobeje pijinia Trófimobeje, Asiavēnē nacupijinēbeje. Bajarapamonae

Pablo yanatatsi. Nexata Pablo itsa barëpata Filipos tomarata, xanë Lucasnë, necaxitajaraba. ⁵ Nexata daxita pamonaë Pablo yanatatsi, namataxainaëya baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacuata peecaetomarata. Nexata pamonaë namataxainaëya baja ponalia, paneevetavanapabeje Troas tomaratalia. ⁶ Nexata paxanëbeje Filipos tomarata barcota pananaropotajëbeje pepuavereverecae baja pafiestamatacabi judíovi baxane levadurata matajërëabinejeva pexanaëpan. Panaponajëbeje jane baja Troas tomarabelia. Cinco matacabita panapaliajëbeje Troas tomarabelia. Nexata pamonaë paneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajë daxita Dioso pejumecovënëtsivi yajava, patanamamatabënapitsinexa xua yabara Cristo sivatëpa. Pablo nexata livaisi tsipaëba. Meravia baja pitsijavata Pablo Mileto tomarabelia naropot-sijitsia. Bajaraxuata Pablo livaisi tsipaëba meravijebi. ⁸ Panacaetuatajë athëbëabetsia pënëyatuucubibota. Nexata athëbëyo paira paenayajë, itsajotatsia pitayotsijavanë ayaijava rubena xaniavaetsia pitayotsinexa. ⁹ Nexata pevëjëato ventanajavata eca, Euticovënënë. Pablo nexata bajayajebi livaisi tsipaëba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejejavavereca. Nexata pevëjëato itsa sivarunarecatsi, petëpaenë baja pitatsi. ¹⁰ Nexata Pablo sivarunareca. Pematabacabëta ecaëya isapita petëpaenë. Nexata Pablo jumaitsi Dioso pejumecovënëtsivijavabelia:

—Pëtsa panamamatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. ¹¹ Nexata Pablo icatsia caevëa junaya. Pejunaecujinaetsia epatsënëca jane baja pan. Tsicobetsana jane baja daxita Dioso pejumecovënëtsivi pexaenexa. Pexaecujinae abaxë icatsia Pablo bajayajebi cuaicuajjai. Pecuaicuajjainë belia yamatacabibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevëjëato piasaënë barënaviabatsi pijaboyabelia. Barëya bitso bajarapamonaë piasaëxae pevëjëato petëpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

13 Paxanë Pablo paneitoroba barcota menia namatax-ainaeya patanaponanexa Asón tomarabelia. Bajarapacue-
nia Pablo paneitoroba tsipaji Pablo matatsënëa najetaruc-
caejitsia pepatsinexa Asón tomarabelia. Nexata Pablo
itsa pata Asón tomarata, bajarapatomarata patayapitsinexa.
14 Nexata jane baja Pablo itsa pata Asón tomarata, Pablo
baja nanonorena barco ënëaberena. Nexata baja panaponajë
Mitilene tomarabelia. 15 Bajaraxuacujinae icatsia Mitilene
tomarata pananaropobajë. Nexata meravia pitsijavata pana-
patajë Quiotomara canacujitsialia peecaetomarabelia. Bajara-
patomarata icatsia patananaropobicujinae, meravia icatsia
pitsijavata, panapatajë Samos tunaetota peecaetomarabelia.
Bajarapatomarata icatsia patananaropobicujinae, panap-
atajë icatsia Trogilio tomarabelia. Nexata abaxë Trogilio
tomarata panacueraevetajë. Nexata icatsia Trogilio tomarata
patananaropobicujinae, caematacabicujinae, icatsia pana-
patajë jane baja Mileto tomarabelia. 16 Pablo rovia ja-
matabëxeneta Efesotomara, Asiavënë nacuata peecaetomara.
Tsipaji apo jamatabëponaponae bajayajebi Asiavënë nacu-
ata. Pablo bepijia jamatabëpata Jerusalén tomarabelia Pente-
costésvënë fiestavajënaeya.

*Pacuenia Pablo Mileto tomarata livaisi tsipaeba Efeso
tomaraverena pepatsivi, ancianovijavabelia, yabara pelivaisi*

17 Mileto tomaravelia Pablo tonajumeitoroba Efeso
tomarapijivi ancianovi pepatsinexarena Mileto tomaraber-
ena. 18 Nexata baja ancianovi itsa parena Pablojavaberena,
Pablo jumaitsi bajarapaancianovijavabelia:

—Paxamë baja cajena payapëtaneme mapacueneye.
Asiavënë nacuata tapatsimatacabicijavaveliacujinae,
Dioso pitorobilivaisi tsipaebaponaponajë Asiavënë
nacuata. Daxitamatacabi tonacuenebajë Dioso pijacuene.
19 Dioso pijacuene itsa tonacuenebaponaponajë, apo
jamatabëjumaitsinë: “Xanë bitso ayaijamatabëcuenenënë,”
apo jamatabëjanë. Itsa taeyabiabajë itsamonae
pecopabijava Dioso pejumecovënëtsijavami, bitso
sivanueyabiabajë. Bitso bejiobinënua tsabiabi tsipaji judíovi
jamatabënebeyaxuababiaba. 20 Daxita Dioso pitorobilivaisi
pacatsipaebabiabatsi papecajamatabëcueneyavenonaenexa.
Caelivaisi ata apo pacavecuacopatsitsi. Pacatsipaebabiabatsi
baja cajena daxitajivi pitabarata. Pacatsipaebabiabatsinua
baja cajena panijabonëjava ata. 21 Asaëya tsipaebabiabajë
judíovi, apo judíovi ata, daxita bajarapamonae
pecopabinexa pibisiacuene pexanabiabijava penaja-
matabëcuenepënëyorotsinexa Diosojavabelia. Bajaraxuacu-
jinae jane baja pejumecovënëtsinexa vajatuxanenë Jesucristo

pelivaisi. ²² Mara jotacujinaeje ponaenajë Jerusalén tomarabelia Espíritu Santo taneitorobixae bajarabelia taponae nexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. ²³ Itsiata caejavayo yapëtaniji. Caetomara canacujitsia Dioso pitorobilivaisi tatsipaebanajetaruaejavata Espíritu Santo nejumai tsabiabi: “Caetsiana raja penaneconitsivi pejebabiabibota. Xamë bitso benejiobicuene taename,” nejai tsabiabi Espíritu Santo. ²⁴ Itsiata baitsi jane cajena apo junavinë bajarapacuene yabara. “Belia nebeyaxuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetaruaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamëjava naponaponajë patacatsipaebinxexa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa. ²⁶ Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. ²⁷ Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaeneme daxita pamona Dioso pejumecovënëtsivi. Espíritu Santo raja pacaitoroba panetoevetsinexa vajatuxanenë Jesús pijajivi, pamona comuata pijanata. ²⁹ Tajëvelia baja cajena yapëtaniji tacovëya penajetarubenaejavanexa saicayacuena Dioso pejumelivaisivecua petsipaebivi. Bajarapamona najetarubenaena jivi Dioso pejumecovënëtsijava peverevere-caeyaexanaenexa. Pacuenia nevëthë pianaepanaevi verene oveja, bajara jamatabëcueneitsane bajarapamona peverevere-caeyaexanaenexa jivi Dioso pejumecovënëtsijavami. ³⁰ Paxamëyajuvënëvi ata saicayacuena Dioso pejumelivaisivecua tsipaebaponaena peyamaxëitojorobinxexa Dioso pejumecovënëtsivi. Nexata Dioso pejumecovënëtsivi navecuanatsanaena pepënaponaenexa bajarapamona. ³¹ Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacueneje. Xanë baja cajena acueyabi pavaibeje, caematacabi

canacujitsia, meravi yajava, caeto ata apo copatsinë patacamuxujiobijava bitso patacaasivaxae. Itsajavata tanuejavata ata pacamuxujiobabiabatsi, jai Pablo Efeso tomarapijiancianovijavabelia.

³² Icatsia Pablo jumaitsi bajarapamonaejavabelia:

—Tajamonae, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcuene yavenonaena. Bajarapalivaisi caëjëpatsi papecajamatabëcuene asaëyaexanaenexa Dioso javabelia. Dioso pacacapanepaena pacuenia Dioso capanepaena daxita pamona Dioso aneconijibia tane. ³³ Xanë itsa naponaponajë paxamëjavata, apo najamatabëxainaenë tanaxainaeyabinexa itsanë pijapalata, penaxatabijava ata. ³⁴ Payapëtaneme baja cajena mapacueneje. Tacobeta nacuenebajë tanamatavenonaejavaxi tacomuataponaenexa, tayajavaponaponaevi ata tatocomuatsinexa. ³⁵ Pacatsitanacueneitajëtatsi baja cajena pacuenia paxamë ata bepanacuenebame. Bepayavenonamenua itsamonae bitso bepejiobivi. Tsipaji baja cajena vajatuxanenë Jesús jumaitsi mapacueniaje: “Xanepana bitso itsamonaejavabelia vajarajutabiabijava vaxaitsi itsamonae vajanacarajutabiabijava matatoxenetsia. Tsipaji bitso jamatabëcuenebarëyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematabacabëta barënuca pebarënavajëtsinexa Dioso javabelia. ³⁷ Bajaraxuacujinae Pablo baja pona. Nexata ancianovi pënuueyabatsi. Nexata Pablo itsa napëjioba ancianovi, yaitaxutonueya vaetabiaya itabaratsutsuneponatsi. ³⁸ Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinae Pablo barcojavabelia peponaejavata, bajarapamonae pënaxuabaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapëjiobiveretajë ancianovi, panarunarecajë baja barco ënëabereca. Pananicabaliajë roviaalia patapatsinexalia Cos tomarabelia. Bajaraxuacujinae, meravia pitsijavata, panapatajë abaxë epatua Rodas tomarata. Bajaraxuacujinae abaxë icatsia panapatajë Pátara tomarabelia. ² Nexata

Pátara tomarata icatsia pacaxitajarabajë itsabarco. Bajara-pabarco ponaejitsia Fenicia nacuayabelia. Nexata icatsia bajarapabarcota patanaponaenexa, panarunarecajë bajara-pamo ënäabereca. Panaponajë jane baja. ³ Nexata bar-cota patanajetarubenaevavata, pataeyetajë patatsavenone-nia Chipretunaeto. Paxenetanajetarubenaevavata rovia. Paponajë Siria nacuayabelia. Nexata baja papatajë Siria nacuayabelia Tiro tomarata. Nexata Tiro tomarata juteta barcoënëta pecaponaevava. ⁴ Nexata Tiro tomarata pacaxitajarabajë Dioso pejumecovënëtsivi. Bajarapamonaejavata pajinavapajë siete pamatacabibeje. Bajarapamonae tajëvelia Espíritu Santo pejamatabëcueneta yapëtaeyaexanatsi Pablo pebejiobi-aexanaevavanexatsi Jerusalén tomarata. Nexata bajarapamonae jumaitsi Pablojavabelia:

—Pëtsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajë. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaevava. Nexata mene itapatalia, tajetabota, daxita bajarapamonae yajava, panubenaevavata patamatabacabëta patavajëtsinexa Diosojavabelia. ⁶ Bajaraxuacujinae panapëjiobajë baja daxita Dioso pejumecovënëtsivi. Icatsia baja panarunarecajë barco ënäaberena. Bajarapamonae baja naviabalia pijabonëjavabelia.

⁷ Tiro tomarata patananaropobicujinae, panapatajë Tole-maida tomarabelia. Bajarapatamarata pabajacobajë Dioso pejumecovënëtsivi. Bajarapamonaejavata panajinavanapajë caematacabi. ⁸ Meravia icatsia pitsijavata panananaropobajë. Panapatajë icatsia Cesarea tomarabelia. Cesarea tomarata patapatsicujinae, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diáconoviyajuvënënë. Bajaraponë pijabota panajinavanapajë. ⁹ Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espíritu Santo pejamatabëcueneta yapëtaeyaexanatsi. ¹⁰ Itsa baja paxainajë anijamatacabianë Felipe pijabota patanapatsicujinae, Judea nacuaverena pata Diosojumepaebinë profeta, Agabovënënë. ¹¹ Bajaraponë pata paxanëjavaberena Felipe pijabota. Nexata Agabo Pablo pijacorreaocoto veepajonotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espíritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia

cëtsianatsi mapacorreabocoto pexainaenëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espíritu Santo, jai Agabo Pablo yabara.

¹² Nexata itsa pajumetaniiji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaeyaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainaeya exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaeyava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaenexatsi, beexanaenatsi baja, pajanë.

¹⁵ Caematacabibejecujinae paxaniavaetajë patacobe-covëjavaxi. Nexata jane baja panaropobajë Jerusalén tomarabelia. ¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënënë.

Pacuenia Pablo Jerusalén tomarata Santiago barëcuaicuajiai yabara pelivaisi

¹⁷ Itsa papatajë Jerusalén tomarabelia, Dioso pejumecovënëtsivi panecopiapita jamatabëcuenebarëyaya.

¹⁸ Nexata meravia pitsijavata Pablo panebarësivaxaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonae bajacoba.

Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. ²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacueni, pexaniajamatabëcuene rajuta Diosojavabelia. Nexata Santiagobana jumaitsi Pablojavabelia:

—Patajabanänë, yapëtaneme baja cajena mapacueneje. Judíovi bitso ayaibitsaëtoxaneto, miles pajivibeje Dioso pejumecovënëtsivi. Yapëtanemenua baja mapacueneje. Daxita bajarapajudíovi jumecovënëtsi ata Jesús pelivaisi, itsiata abaxë tsiteca jumecovënëtavanapa Dioso Moiséspijinëta

penajumecopatsilivaisi. ²¹ Pajudíovi apo jumecovënëtsi Jesús pelivaisi, xamë netsipaebaponaelivaisi cayabarana-jumetsënëtabiaba. Nexata bajarapajudíovi najumetsënëtsiaya jumai tsabiabi Jesús pelivaisi pejumecovënëtsijudíovijavabelia: “Itsa raja Pablo livaisi tsipaebapona judíovijava, itsanacuanëjava pejinavanapaevi, Pablo itavetabiaba judíovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

²² Icatsia Santiagobana jumaitsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovënëtsivi, cavënëlivaisitane nepatsijava, nacaetuatsiana penabarëcuaicuaijainexa xamë yabara. ²³ Nexata daxitajivi pecayapëtaenexa nejumecovënëtsijava Dioso Moiséspijinëta penajumecopatsilivaisi, exanaename pacuenia pacaitorobijitsiatsi. Majotaje cuatro ponëbeje paxanëyajuvënëvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonaeta temploboyabelia. Nexata templobota nanajamatabëcuenexaniavaetsianame nijamatabëcuenesaënexa Diosojavabelia. Pacuenia bajarapamonae najamatabëcuenexaniavaetsijitsia pija-matabëcuenesaënexa Diosojavabelia, bajarapacuenia nanajamatabëcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponëjavabelia notsiana, bajaraxua xamë daxita cobecovëmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judíovi cayapëtaena nejumecovënëtsijava Dioso Moiséspijinëta penajumecopatsilivaisi. Nexata daxita judíovi yapëtaena najumetsënëtsiaya pecabaracuaicuaijai tsabiabijava pajudíovi apo jumecovënëtsi Jesús pelivaisi. ²⁵ Pamonae apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonae apo judíovi ata, Dioso pejumecovënëtsivi, pataitavetsinexa, caelivaisiyobeje patoyaquinajë cuyalatota. Itsa patoyaquinajë, pajumaitsinë mapacueniaje: “Pecobeta saya pexanaenëanëjavabelia pevi perajutsinexa ofrendacuenia itsa

tobia baca oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia,” pajanë itsa patoyaquinajë apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pe-jebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponëbeje pepëta pacuenia Santiagobana itorobatsi. Pablo nexata najamatabëcuenexaniavaetapona piamatabëcuenesaënexa Diosojavabelia cuatro ponëbeje yajava. Bajaraxuacujinae Pablo temploboyalia joneya sacerdotevijavabelia, petsipaebinxeta pamatacabi copiarucaejitsia Pablobana penajamatabëcuene xaniavaetsijava Diosojavabelia. Bajarapamatacabi cuatro ponëbeje Diosojavabelia ofrenda perajutsijavanënexa templobota notsijitsia. Nexata picani daxita bajaraxua Pablo cobecovëmatamotsijitsia bajaraxua pecanajetsivijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponëbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavënë nacuaverena pepatsivi. Nexata bajarapajudíovi itoroba daxita Jerusalén tomarapijivi pianaepanaenexa Pablojavabelia. Nexata Jerusalén tomarapijivi, Asiavënë nacuaverena pepatsivi yajava, nacobenavaetabatsi Pablo. ²⁸ Nexata bajarapamonae vavajai pinijijumeta. Najumetsënëtsiaya jumaitsi:

—¡Tajamonae judíovi, naxanitsia! ¡Paneyavenonare! Maponëje daxitanacuanëjyava livaisi tsipaebanajetaruca daxitanacuanëpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinëta penajumecopatsilivaisi jivi pejumecovënëtsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barëjoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarëponaponaejava Jerusalén tomarata apo judiónë, Trófimovënënë, Efeso tomarapijinë. Nexata jamatabëcuenenavëxaniabiaya bajarapamonae jamatabëjumaitsi:

—Pablo raeta apo judiónë barëjunua mapatemploboyare-naje, jamatabëjai Trófimo yabara.

Pablo cajena Trófimo apo barëjone temploboyalialia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae kujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboënëvecua. Nexata templobobaupaxanetonë bepíjia vecuabaupaxatabatsi.

³¹ Bajarapamonae picani Pablo jamatabëbeyaxuabatsi. Nexata bajarapaepatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa.

³² Nexata comandante bepíjia barëlia pijajivi vajabitsaëvi, vajabitsaëvi pijacapítánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaëvi pebarëpatsijava, nexata judíovi copaba pebejavatsi Pablo. ³³ Nexata comandante Pablo kujirenantsi. Vaetabiaexanatsi pijajivi. Comandante itoroba pijajivi Pablo pecëtsinexatsi anijacadenamaëtotabeje. Bajaraxuacujinae yanijoba judíovijavabelia.

—¿Detsa maponëje? ¿Detsa xua exana maponëje? jai comandante.

³⁴ Nexata bajarapajivi bitsaëtoxanetonëyajuvënëvi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaë Pablo pecaponaenexatsi vajabitsaë pijaboyabelia. ³⁵ Pablo capatatsi vajabitsaë pijaboitapata. Vajabitsaë pijabo pepënëvelia xaina beescaleracuenia pexanaejava. Nexata bajarajota Pablo vajabitsaë nacobenayotsiaya cajunayatsi vajabitsaë pijaboyalialia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaëtoxanetonë Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaëtoxanetonëjavabelia yabara pelivaisi

³⁷ Itsa baja Pablo vajabitsaëvi pijaboyalialia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamë tsaja natsipaebame griegojume? ³⁸ ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmaxëto apo barënajetabajiravimë petusato nacuyabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

22

¹ —Tajamonae, panenamuxunaevere. Paxamë ata vanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³ —Xanë raja judíonënë. Naexanajë Tarso tomarata, Cilicia nacuata peeaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaitsi:

—Xanë abaxë picani bajayata barajinabiabajë pamonae jumecovënëta pexanialivaisi, Jesucristo pelivaisi. Pamonae jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamonae penaneconitsivi pejebabiabibota. Jitsipajë picani pebeyejebinexatsi daxita bajarapamonae. ⁵ Sacerdotevi pepo penamatacaitorobinë, daxita judíovitsi vajaancianovi

ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaejavabelia vajětajë tanetsicobeyaquinaenexa cuyalato tatocaponaenexa pamona judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, tacapatsinexa picani maberenaje Jerusalén tomaraberena penaneconitsiaexanaenexatsi, jai tsanucae Pablo judíovijavabelia.

Pacuenia Pablo navajunupaeba pacuenia taxuxuaba Jesús pelivaisi pejumecovënëtsijava yabara pelivaisi
(Hch 9.1-19; 26.12-18)

⁶ Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatoyorotsia naitayota athëbëvetsica. ⁷ Nexata bajarajota irataeya bocajunuajë irata. Jumetaenucajë athëbëvetsica tanejumaitsiyava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaiyava. ⁸ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja tajajivi netobejiobiaexanaponame,” nejai. ⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaiyai athëbëvetsica. ¹⁰ Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. ¹¹ Nexata bajarapacotia tataecujinae bitso nitaxutomeraviba. Apo necaëjëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. ¹³ Nexata bajaraponë Ananías xanëjavaberena patajopa tanetaenexa. Nexata nejumai tsanucae: “Tajabanänë Saulo, icatsia rabaja itaxutoxanepaname,” nejai. Bajarapacuenia

tanejumaitsijavata icatsia baja itaxutoxanepanjë. Nexata baja taniji Ananías. ¹⁴ Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanua netaenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi. ¹⁵ Nexata ponaename daxitanacuanëpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcuenecopatsixae, daxita pibisiacuene nexanaeconimi cavecuaajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipae-baponaenexa apo judíovijava yabara pelivaisi

¹⁷ Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. ¹⁸ Nexata Jesús nejumaitsi: “Naxanitsiayo bepijia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. ¹⁹ Nexata xanë jumaitsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaetuatabiabinëjjava tataicaponaejava daxita pamonaе cajumecovënëta taconibabeyabiabinexa naebota. ²⁰ Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaе Estebanpijinë beyaxuabatsi, penajumajonejebijavanë toevetanucajë,” janë pepo petuxanenë Jesúsjavabelia. ²¹ Nexata pepo petuxanenë nejumaitsi: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

Pacuenia Pablo exanatsi vajabitsaë pepo pevetsinë comandante yabara pelivaisi

²² Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba,

nexata icatsia judíovi vavajai tsaponae pinijjumeta. Jumai tsaponae:

—¡Maponėje pabeyaxuare! ¡Mara pitsinë apo becopatsitsi peponaponaenexa matavějěaje! jai tsaponae judíovi Pablo yabara.

²³ Bajarapamonae pinijjumeta vavajai tsaponae. Pijacamisajumavelia penaxatabijavaně, vebabia bitso pianaepanaexae. Atsabenoně cayajabajarabarena Pablojavaberena pebaraanaepanaexaetsi. ²⁴ Nexata vajabitsaě pepo pevetsinë, comandante, pijajivi itoroba Pablo pecajonenexatsi vajabitsaě pijaboyalía. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo petsipaebinxaxa vajabitsaějavavelia xua yabara judíovi neconitsiaya pinijicuenia vavajai tsaponae Pablo yabara. ²⁵ Nexata jane baja Pablo itsa cětetatsi vajabitsaě picani pejumatitibabenexatsi, nexata Pablo jumaitsi bajarajota penucaeně vajabitsaě pijacapitánjavavelia:

—Xaně raja Romano nacuapijině. Nexata itsa panejumaconibabejitsipame abaxě copiaya neneconitsinejeva juezmanae pitabarata, nexata panevemaxěnaneconitsipame. Tsipaji nijatuxaneně, Romanonacua pepo pevetsinë, pacaitaveta bajarapacuenia paneexanaeyaniva, jai Pablo vajabitsaě pijacapitánjavavelia.

²⁶ Capitán itsa jumetane bajarapacuenia Pablo pejumaitsijava, nexata capitán lia vajabitsaě pepo pevetsinë comandantejavavelia. Capitán jumaitsi comandantejavavelia:

—Xania baja tsane pacuene exanaejitsiamě Pablojavavelia. ¡Maponėje Pablo Romano nacuapijině baja cajena! jai capitán comandantejavavelia.

²⁷ Nexata comandante rena Pablojavaberena. Jumaitsi Pablojavavelia:

—¿Xaniajai tsabaja? ¿Xamě Romano nacuapijiněmě? jai comandante.

—Jājā, jai Pablo.

²⁸ Nexata comandante jumaitsi Pablojavavelia:

—Xaně ata baja maparucaeje Romano nacuapijině naexanajě. Tsipaji baja matamotajě ayaimatamota bepepo Romano nacuapijině tanaexanaenexa, jai comandante.

Bajarapacuenia jumaitsi tsipaji comandante saicayanacuatana penaexanaeně.

Pablo nexata jumaitsi comandantejavavelia:

—Xaně apo matamotsinë. Tsipaji baja cajena pepo Romano nacuapijině. Naexanajě cajena Romano nacuata, jai Pablo comandantejavavelia.

²⁹ Nexata picani pavajabitsaë Pablo jumaconibabejitsiatsi, vecuaponatsi baja. Vajabitsaëvi pepo pevetsinë ata, comandante, Pablo cjunavatsi itsa yapëtanetsi Pablo Romano nacuapijinëcuene. Cjunavatsi pecëtsiaexanaexaetsi cadena-maëtonëta.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinëcuene, meravia pitsijavata, vajabitsaë pepo pevetsinë, comandante, jamatabëyapëtane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaëto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naëcota daxita penacaetuatsivi. Nexata Pablo jumaitsi bajarapamonaejavabelia:

—Tajamonaë, xaniavaetsia cajena ponaponabiabajë namatabëcuenebijianaenejevanë Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinë, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinë.

³ Nexata Pablo jumaitsi Ananíasjavabelia:

—¡Dioso rajane juya pepacuene xamë catsaquibiaxubiana! Xamë majotaje ecame taneneconitsinexamë. Tsipaji xamë xanë yabara jamatabëcuenenavëxaniabiaya jamatabëjumaitsimë: “Maponëje Pablo naneconita Diosojavabelia,” jamatabëjamë. Nexata xamë nijacuata naneconitame nijagobiernojavabelia. Tsipaji itorobame mapamonaëje tanetsaquibiaxubinexa taaneconijibinë, jai Pablo Ananíasjavabelia.

⁴ Bajarajota penubenaëvi jumaitsi Pablojavabelia:

—Xamë raja jumeitavetame Dioso pijajivitonë, sacerdotevi pepo penamatacaitorobinë, jai bajarapamonaë Pablojavabelia Ananías yabara.

⁵ Nexata Pablo jumaitsi:

—Tajamonaë, xanë apo yapëtaenë Ananías sacerdotevi pepo penamatacaitorobinëcuene. Itsa yapëtaejitsipajë, apo

jumaitsinē tsipae bajarapacuenia. Tsipaji Dioso pejumeliv-aisibaxutota jumaitsi mapacueniaje: “Pētsa jumeitavetame pecaevetsinē,” jai Dioso pejumelivaisibaxutota, jai Pablo Ananías yabara.

6 Nexata Pablo jamatabēcueneyapētane penacaetu-atsivi. Tsipaji penacaetuatsivi caelivaisi apo xainae. Jamatabēcueneyapētaneme itsamonae pecatsitecaejava saduceovi pecujarubicuene. Jamatabēcueneyapētane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

—Tajamonae, xanē raja fariseonēnē. Fariseovi pecujarubicuene jumecovēnētajē. Taxapijinē baja cajena fariseonē. Tamojivimi ata cajena fariseovi. Majotaje neneconitsijitsia. Tsipaji jivi petēpaecujinae Dioso icatsia piasaēyaexanaejavanexa, jumecovēnētajē, jai Pablo.

7 Bajarapamonae itsa jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabēcuenejēpae baja. Nexata anaeya bajarajota navecuanatsana baja. 8 Saduceovi jumeaebabiaba fariseovi pejumecovēnētsilivaisi. Nexata saduceovi jumai tsabiabi:

—Jivi petēpaecujinae, acuenebi icatsia Dioso piasaēyaexanaejava. Ajibi raja cajena ángelevi. Ajibi raja cajena petēpaevi ata pejumape, jai tsabiabi saduceovi.

Fariseovi jumecovēnēta jivi petēpaecujinae Dioso icatsia piasaēyaexanaejavanexa. Jumecovēnētanua ángelevi ata pejinavanapaejava. Jumecovēnētanua petēpaevi ata pejumape pejinavanapaejava. 9 Apo penajamatabēcuenejēpaexae, daxita bajarapamonae bajarajota pinijijumeta vavajai tsaponae. Nexata pamonaē judíovi pecujarubivi, fariseoviyajuvēnēvi, nonobapuna. Anaeya jumaitsi saduceovijavabelia:

—Itsacuene ata cajena pibisiacuene apo exanae maponē Pabloje. Xaniajai meta cajena. Petēpaejivi pejumape tsi-paebatsi. Itsa jume, ángel meta tsipaebatsi. Paxanē nexata itsacuene ata apo paexanaenē tsane Pablojavabelia Diosojavabelia patananecotsiyaniva, jai fariseovi saduceovijavabelia.

10 Nexata bajarapamonae pinijicuenia nabijataeya najumeanaenotapona. Nexata vajabitsaē pepo pevetsinē, comandante, belia jamatabējumaitsi: “Pablo meta baja bajarapamonae beyaxuabianatsi,” jamatabējai. Nexata comandante junata pijajivi peponaenexa. Pablo baja jutatsi bajarapamonaevecua. Comandante itoroba pijajivi Pablo pecapon-aenexatsi vajabitsaē pijaboyabelia.

11 Nexata bajarapameravi Jesús tsitanaitajētatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsi-paebame xanë talivaisi majotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pabloyabelia.

Pacuenia picani Pablo judíovi jamatabëbeyaxuabatsi yabara pelivaisi

¹² Pablo petsitanaitajëtsicujinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

¹³ Pamona picani Pablo jamatabëbeyaxuabatsi, cuarenta ponëbeje pematatsënëa. ¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuaten. Nexata pamona cuarenta ponëbeje, pamona picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanë. ¹⁵ Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaicuajainexa. Nexata daxita paxamë patonajumeitorobianame cuyalatota vajabitsaë pepo pevetsinë, comandantejavabelia. Pavajëtsianame comandantejavabelia papecatocarenanexa Pablo. Pajumaitsimë tsane yamaxëitorobiaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epatotalia pavajënaeevetsianajë Pablo. Itsa rena, patabeyaxuabinexa patsinejeva maberanaje, jai pamona cuarenta ponëbeje, pamona picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata baitsi jane Pablo pematapijiva pexënato jumetane Pablo pevajënaeevetsiapaebijavatsi pebeyaxuabinexatsi picani. Nexata bajaraponë pona vajabitsaë pijaboyabelia. Itsa baja

bajaraone joneya vajabitsaë pijaboyalía, bajarapalivaisi tsi-paeba Pablojavabelía. ¹⁷ Nexata bajaraxuacujinae Pablo junata caenë vajabitsaë pijacapitán. Pablo jumaitsi:

—Barëponare mapapevëjëatoje papecanamatacaitorobinë, comandantejavabelía. Itsalivaisiyo xaina petsipaebínexa, jai Pablo.

¹⁸ Nexata Pablo piopaxa capitán barëponatsi vajabitsaë pepo pevetsinë, comandantejavabelía. Nexata capitán jumaitsi comandantejavabelía:

—Naneconitsia raja peponaponaenë Pablo nejunata. Nexata nitoroba tabarëponaenexa mapapevëjëatoje xamëjavaberena. Tsi-paji pina catsipaebijitsia itsalivaisiyo, jai capitán comandantejavabelía.

¹⁹ Nexata comandante cobepitatsi pevëjëato. Barëliatsi pesaicaeyojavabelía. Comandante nexata jumaitsi pevëjëatojavabelía:

—¿Detsa pitsilivaisi xainame tanetsipaebínexamë? jai.

²⁰ Nexata pevëjëato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcuenyanaba pecavajëtsínexa meravia netocalíanexa Pablo bajarapamonaejavabelía. Bajarapamonae cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonae. ²¹ Itsiata pëtsa jumecovënëtime bajarapamonae. Tsi-paji cuarenta ponëbeje pematatsënëa namatayabiaya epatota Pablo vajënaeevetsiapaebatsi pebeyaxuabínexatsi. Bajarapamonae daxita najumecapanepaeya najumaitsi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabíanatsi, nabaníanatsi. Mera ata apaenatsi,” najai baja capanepaeya bajarapamonae. Aeconoxae saya bajarapamonae eveta Pablo necalíajava, jai pevëjëato comandantejavabelía.

²² Nexata comandante jumaitsi pevëjëatojavabelía:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinae pevëjëato baja itorobatsi caevëalía.

Pacuenia Pablo itorobatsi nacuaevetsinë Félixjavabelía yabara pelivaisi

²³ Vajabitsaë pepo pevetsinë, comandante, junata aníjanëbeje, vajabitsaë pijacapitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia

ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejaya. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaenexa Pablo nacuaevetsinë Félixjavabelia, jai comandante capitánbejajavabelia.

²⁵ Bajaraxuacujinae comandante tsicobeyaquina cuyalatoxuto pitorobinexa nacuaevetsinë Félixjavabelia. Comandante peyaquinaecuyalatoxutota jumaitsi mapacueniaje:

²⁶ “Félix, pecayaiyataenë, nacua nevetsinë. Xanë raja Claudio Lisiasvënënënë catoyaquinatsi. Cabajacobatsi. ²⁷ Judíovi raja vaetabatsi ponë catoitorobaliatsi, Pablovënënë. Beyaxuabijitsiatsi picani. Nexata itsa vënëlivaisitaniji Pablo Romano nacuapijinëcuene, sivalianë. Tajajivi vajabitsaë taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanjë tajajivi vajabitsaë pijaboyabelia. ²⁸ Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanjë. Bajarapacuenia nutsiaexanjë bajarapamonae pitabarata tayapëtaenexa jane baja picani paneconi yabara Pablo judíovi neconitsijitsiatsi. ²⁹ Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara. ³⁰ Nexata itsajivi netsipaeba judíovi namutoepatota Pablo pevajënaevetsiapaebijavatsi pebeyaxuabinexatsi. Bajaraxuata nexata najamatabëxainanjë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinë Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyaberena. Pamonae caballojumata peponaevi, pevajënaeyabelia abaxë caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponaecuyalatoxuto nacuaevetsinë Félixjavabelia. Yajavarajutanua Pablo bajaraponë pecobeyabelia. ³⁴ Nexata nacuaevetsinë Félix

leba baja petocapatsicuyalatobaxutotsi. Bajaraxuacujinae nacuaevetsinē Félix jumaitsi Pablojavabelia:

—¿Detsa panacuapijinēmē? jai.

Nexata Pablo jumaitsi:

—Xanē raja Cilicia nacuapijinēnē, jai.

Nexata yapētanetsi Pablo Cilicia nacuapijinēcuene.

³⁵ Nexata icatsia nacuaevetsinē Félix jumaitsi Pablojavabelia:

—Cajumetaenatsi abaxē itsa parena judíovi pecaneconit-sivinexa, jai nacuaevetsinē Félix.

Bajaraxuacujinae nacuaevetsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinē pexanaeyaexanaebota.

24

Pacuenia Pablo navajunupaeba nacuaevetsinē Félix pitabarata yabara pelivaisi

¹ Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinē, parena Cesarea tomaraberena. Parena judíovi pijaancianovi yajava, Tértulovēnēnē yajava. Tértulo abogadonē, jivi peneconitsicuene peyapētaenē. Bajaraxuata judíovi junata bajaraponē petocuaicuajainexatsi nacuaevetsinē Félixjavabelia. Nexata judíovi, Tértulo yajava, nubena nacuaevetsinē Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinē Félixjavabelia mapacueniaje:

—Pecayaiyataenē nacua nevetsinē. Xaniavaetsia nevet-sixae mapanacuaje, bajayajebi xaniavaetsia pajinavanapajē. Xamē nejamatabēcueneta daxita mapanacuapijicuene, xua abeje picani, xanebiaexanaponame pevajēnaeyabelia.

³ Nexata pabarēyanē patanetoexanaejavamē yabara daxita mapanacuajavaje. Bajaraxuata pexaniajamatabēcuenepacarajutatsi.

⁴ Caepatoyo saya pacajamatabēitonotatsi. Pexaniacuene panetoexanare. Panenamuxunaevere caejumeyobeje.

⁵ Payapētaniji baja cajena maponēje Pablo bitso piacujirubejenēcuene. Daxitanacuanējava, itsaxuayo judíovi jinavanapa, itorobapona pianaepanaenexa judíovi penavecuanatsanaenexa. Mara ponēje Nazaret tomarapijinēmi petsipaebilivaisi pejumecovēnētsivi, penamatacaitorobinēje.

⁶ Mara ponēje Dioso pijatemplobo Jerusalén tomaratalia jamatabēbijiana picani. Tsipaji apo judíovi barējoneya temploboēnēalia. Bajaraxuata pavaetabajē. Nexata pacuenia paneitoroba pajudíovinē patajalivaisi, jamatabēpabeyaxuabajē picani penaneconitsixae.

⁷ Itsiata

baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinë Félixjavabelia.

⁹ Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinë Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judíovi nacuaevetsinëjavabelia.

¹⁰ Nacuaevetsinë Félix nacobeyota juya Pablo pitorobinexatsi Pablo jane baja penavajunupaebinexa nacuaevetsinë Félix pitabarata. Nexata Pablo jumaitsi nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabiabijava. Bajaraxuata barëyanë tacatsipaebinexa xua exanajë. ¹¹ Nexata taxaniajaijumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota. ¹² Bajarapatemplobota judíovi apo

netae tabarëcuaiquaijajava itsajivi ata. Apo netaenua judíovi penacaetuatabiabibonëjava jivi taitorobijava pianaepanaenexa. Apo netaenua tomaranëjava ata taitorobijava jivi pianaepanaenexa. ¹³ Nexata acuenebi itsajivi ata pejumaitsijava xanë yabara: “Xanë raja pepacuene taniji xua Pablo exana,” pejajava. Tsipaji itsajivi ata apo netae pibisiacuene taexanaejava. ¹⁴ Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneta Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaponaponajë. Bajayata Diosojumepaebivi

profetavi peyaquinaelivaisianē ata jumecovēnētajē.
¹⁵ Mapajudíovi nubenaje, jumecovēnēta mapacuenia peju-
 maitsilivaisije: “Dioso icatsia asaēyaexanaena petēpaevimi,”
 pejailivaisi. Xanē ata bajarapalivaisi jumecovēnētajē.
 Baitsi daxita pamonae tēpa, pexaniajamatabēcuenevimi,
 pibisiajamatabēcuenevimi ata, itsamatacabi icatsia Dioso
 asaēyaexanaena. ¹⁶ Bajaraxuata bitso jitsipajē xaniavaetsia
 taponaponaejava tanajamatabēcuenebijianaeyaniva Dioso
 pitabarata, tanajamatabēcuenebijianaeyaniva daxitajivi ata
 pitabarata, jai Pablo nacuaevetsinē Félixjavabelia.

¹⁷ Icatsia Pablo jumaitsi nacuaevetsinē Félixjavabelia:

—Caevaimaxēto baja cajena ajibinē tsarucae
 Jerusalén tomaravecua Dioso pitorobilivaisi jivi
 tatsipaebinxaxa daxitanacuanējava. Bajaraxuacujinae icatsia
 naviatajē Jerusalén tomarabelia. Tocapaliajē ofrenda
 tarajutsinexa bepejibivi. Patajē picani templobota
 ofrenda tarajutsinexa Diosojavabelia. ¹⁸ Itsa baja
 veretajē templobota tanajamatabēcuenexaniavaetsijava
 Diosojavabelia tajamatabēcuenesaēnēxaxa, tarajutsinexa picani
 bajarapaofrenda Diosojavabelia, nexata bajarapaepatota
 judíovi, Asiavēnē nacuapijivi, necaxitajaraba templobota.
 Nexata nevaetaba tanenaneconitsiaexanaenēxaxa. Itsa
 necaxitajaraba templobota, apo yajavanucaenē ayaibitsaēto.
 Daxita templobopijivi yāijai. Templobopijivi ajumejibia
 jinavanapa. ¹⁹ Bajara baitsi jane pamonae judíovi, Asiavēnē
 nacuapijivi, tanetaevi templobota, bepatsirena maberēnaje
 taneneconitsinexa jane baja itsa necuenetane pibisiacuene
 taexanaejava. ²⁰ Itsa jume, nexata mapamonaeje, nitabarata
 penubenaevi, vecae taitabēta catsipaebi, itsa netane
 pibisiacuene taexanaejava pamatacabi nucajē sacerdotevi
 penamatacaitorobivi pitabarata, judíovi pijaancianovi ata
 pitabarata, judíovi pecujarubivi ata pitabarata. ²¹ Saya meta
 caelivaisiyo bajarapamonae catsipaebiana xanē talivaisi.
 Tsipaji pamatacabi nucajē judíovi pijaancianovi pitabarata,
 ayaijumeta jumaitsinē: “Mapamatacabitaje neneconitsiana.
 Tsipaji jivi petēpaecujinae Dioso icatsia piasaēyaexanaejavanēxaxa,
 jumecovēnētajē,” janē. Nexata meta bajarapacuenia
 tajumaitsijava yabara bajarapamonae jamatabēneneconita
 xamējavabelia, jai Pablo nacuaevetsinē Félixjavabelia.

²² Nacuaevetsinē Félix xaniavaetsia yapētane
 daxitanacuanējava jivi pejumecovēnētaaponaejava Jesucristo
 pelivaisi. Nexata nacuaevetsinē Félix pejumetaecujinae
 Pablo petsipaebilivaisi, nacuaevetsinē Félix naviabiaexana
 baja pamonae picani Pablo neconitsijitsiatsi. Nexata
 nacuaevetsinē Félix jumaitsi Tértulobanajavabelia, Jerusalén

tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtaenajë pacuenia exanaejitsianë Pablojavabelia, jai.

²³ Nexata nacuaevetsinë Félix jumaitsi vajabitsaë pijacapitánjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacëtsinejevamë. Tocopatsianamenua peyapëtaevitsi pesivaxainaenexatsi perajutsinexatsinua penamatavenonaevaxi, jai nacuaevetsinë Félix vajabitsaë pijacapitánjavabelia.

²⁴ Bajaraxuacujinae, caematacabibejecujinae, nacuaevetsinë Félix icatsia pata pijava yajava, Drusilavënëva. Drusila judíova. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinë Félixjavabelia. Pablo tsipaeba jivi penajamatabëcuenecopabaponaevaxi Jesucristojavabelia.

²⁵ Pablo tsipaebanua Dioso pitorobijava jivi pejinavanapaenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevetsinë Félix itsa jümetane bajarapacuenia Pablo petsipaebilivaisi, najunaviaca. Nexata bajarajota nacuaevetsinë Félix jumaitsi Pablojavabelia:

—Pitsapare baja abaxë. Icatsia cajunatsianatsi itsajota cuenesajinajë, jai nacuaevetsinë Félix.

²⁶ Nacuaevetsinë Félix jamatabëjumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabëjai.

Bajaraxuata Félix anijatonë pijajivi itorobabiaba Pablo petojunatsinexatsi pebarëcuaiquaijainexatsi. ²⁷ Anijavaibeje bajarapacuenia Félix pijajivi itorobabiaba Pablo petojunatabiabinexatsi. Belia baja Félix vecuapitsapa nacua pevetsicuene. Nexata juya itsanë, Porcio Festovënënë, tocopatatsi bajarapanacua pevetsinexa. Félix baja pitsapae ata, itsiata Félix pejamatabëcueneta Pablo apo tocopatsitsi pepitsapaenexa penaneconitsijavavecua. Bajarapacuenia Félix exana judíovi pesivajamatabëcuene barëyanexatsi.

25

Pacuenia Pablo navajunupaeba pejananacuaevetsinë Festo pitabarata yabara pelivaisi

¹ Festo patajopa Cesarea tomarata pexanaenexatsi nacuaevetsinënexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia. ² Nexata Jerusalén tomaratalia sacerdotevi penamatacaitorobivi Pablo neconitatsi pepëya nacuaevetsinë Festojavabelia. Neconitatsinua judíovi ata, pamona petuxanevi. ³ Bajarapamonae pinijicuenia vajëta nacuaevetsinë Festojavabelia petocapatsinexatsirena Pablo Jerusalén tomaraberena. Bajarapacuenia vajëta tsipaji baja cajena bajarapamonae najamatabëcuenevereta picani Pablo pebeyaxuabiaexanaenexatsi namutoepatota. ⁴ Nexata nacuaevetsinë Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanë raja caematacabibejecujinae ponaejitsianë Cesarea tomarabelia. ⁵ Pablo pibisiacuene itsa exana, nexata papecanamatacaitorobivi tapëta naponaeana Cesarea tomarabelia peneconitsinexa Pablo, jai nacuaevetsinë Festo bajarapamonaejavabelia.

⁶ Bajarapacuenia nacuaevetsinë Festo pejumaitsicujinae, nacuaevetsinë Festo abaxë ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevetsinë Festo eca itsajota nacuaevetsinë ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsënëtsiaya neconitatsi beayaineconi pexainaenëcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenë. Nexata xanë judíovi pitorobilivaisijavabelia, templojavabelia ata, Romanonacua pepo pevetsinëjavabelia ata, apo naneconitsinë, jai Pablo nacuaevetsinë Festojavabelia.

⁹ Nexata nacuaevetsinë Festo yanijoba Pablojavabelia judíovi pejamatabëcuenebarëyanexa nacuaevetsinë Festojavabelia. Nacuaevetsinë Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevetsinë Festo Pablojavabelia.

¹⁰ Pablo nexata jumaitsi:

—Nucajë rabaja majotaje xamë nitabarata. Tsipaji niatuxanenë, Romanonacua pepo pevetsinë, itoroba majotaje

peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judíovijavabelia. Bajarapacue ne xamē xaniavaetsia yapētaneme baja cajena. ¹¹ Itsa pepacue ne naneconitsipajē, nexata itsa nebeyaxuabijitsia tajaneconi yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonae neneconitsiajumaitsije, apo xaniajai cajena. Nexata acuenebi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevetsinē Festojavabelia.

¹² Nexata nacuaevetsinē Festo barēcuaicuaijai pijajivi, pejamatabēcueneyavenonaevitsi. Bajaraxuacujinae nacuaevetsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevetsinē Festo Pablojavabelia.

Pacuenia Pablo navajunupaeba nacuaevetsinē Agripajavabelia yabara pelivaisi

¹³ Pablo pevajētsicujinae nacuaevetsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaevetsinē Agripa, pijava Berenicevēnēva yajava, parena Cesarea tomaraberena. Parenabeje pebajacobinexabeje nacuaevetsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevetsinē Festo tsipaeba nacuaevetsinē Agripajavabelia Pablo yabara. Nacuaevetsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua itsa evetaje, bajaraponē naneconitsiaexanatsi. ¹⁵ Nexata itsa ponajē Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanējavaberena. Bajarapamonae nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaitsinē bajarapamonaejavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē

paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuaijainexa paneconi yabara neconitatsi,” janë bajarapamonaevjavabelia, jai nacuaevetsinë Festo nacuaevetsinë Agripajavabelia.

¹⁷ Icatsia nacuaevetsinë Festo jumaitsi nacuaevetsinë Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajë taecaenexa itsajota ecabiabajë jivi itsa naneconitsiaexanaejitsianë. Nexata itorobajë tajajivi tanetocapatsinexa Pablo xanëjavaberena. Tsipaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë.

¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabëxainajë.

¹⁹ Saya judíovi jumeanaenotatsi Pablo Dioso pejumecovënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeucujinae baja icatsia Dioso asaëyaexanatsi,” jai Pablo bajarapajudíovijavabelia.

²⁰ Nexata xaniavaetsia apo yapëtaenë pacuenia exanaejitsianë bajarapacueni yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaecaneconita,” janë picani.

²¹ Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaeyaexanajë. Nexata pamatacabi necuenecaëjēpaena, itorobianajë vajatuxanenëbejejavabelia, jai nacuaevetsinë Festo nacuaevetsinë Agripajavabelia.

²² Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:

—Meravia rabaja jumetaename Pablo penavajunupaebijava, jai nacuaevetsinë Festo.

²³ Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiabiboxanetojavabelia. Pëyanatatsibeje vajabit-

saë pepo pevetsivi. Pëyanatatsibeje Cesarea tomarapijipetux-
anevi ata. Penacaetuatsiboxanetojavalia barëjoneyabeje. Nex-
ata nacuaevetsinë Festo pijajivi itoroba petocaponaenex-
atsirena Pablo. ²⁴ Nexata nacuaevetsinë Festo jumaitsi
nacuaevetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje
vajanajuanacaetuatsivi. Pataneme rabaja mapapebi
nuca paneitabarataje. Ayaibitsaëto judíovi, Jerusalén
tomarapijivi, bajaraponë neconitatsi xanëjavaberena
Jerusalén tomaratalia. Bajara icatsia pamonaë tapëta
naponarena Cesarea tomaraberena. Bajara icatsia pacuenia
neconitatsi xanëjavaberena. Bajarapamonae vavajaiya
nejumai tsabiabi: “Pajitsipajë Pablo pebeyaxuabinexatsi,”
nejai tsabiabi. ²⁵ Itsiata baitsi jane xanë apo yapëtaenë
paneconi yabara beyaxuabijitsiatsi. Maponë nevajëta picani
titorobinexa tajatuxanenëjavabelia, Romanonacua pepo
pevetsinëjavabelia, bajaraponë pitabarata peneconitsinexatsi
itsa pibisiacuene exana. Bajaraxuata itorobijitsianë
Romanonacua pepo pevetsinëjavabelia. ²⁶ Itsiata baitsi
jane apo yapëtaenë pacuene yabara toyaquinaejitsianë
cuyalatobaxutota tajatuxanenëjavabelia. Bajaraxuata
xamë Agripa, nacua nevetsinë, mapamonae ataje, daxita
paxamë paneitabarata Pablo penucaenexa pacatocapatatsi
maberena. Pacatocapatatsi paneyanijobinexa paneconi
yabara naneconita. Nexata meta paneyanijobicujinae xanë
yapëtaenajë paneconi yabara naneconita. Nexata bajarajota
yapëtaenajë tajatuxanenëjavabelia tatoyaquinaenexa
cuyalatobaxutota paneconi yabara judíovi Pablo
neconitsijitsiatsi tajatuxanenëjavabelia. ²⁷ Tsipaji acuenebi
titorobijava maponëje Pablo tajatuxanenëjavabelia
toyaquinaenejevanë cuyalato xaniavaetsia peyapëtaenexa
paneconi yabara judíovi neconitsijitsiatsi, jai nacuaevetsinë
Festo nacuaevetsinë Agripajavabelia.

26

*Pacuenia Pablo navajunupaeba nacuaevetsinë Agripa
pitabarata yabara pelivaisi*

¹ Nacuaevetsinë Agripa jumaitsi Pablojavabelia:

—Catocopatatsi rabaja nenvajunupaebinexa paneconi
yabara judíovi caneconita, jai nacuaevetsinë Agripa Pablojav-
abelia.

Nexata Pablo yaiyataeya bajacoba nacuaevetsinë Agripa.
Nexata Pablo jumaitsi nacuaevetsinë Agripajavabelia ma-
pacueniaje:

² —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia. ³ Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi

⁴ Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamonae neyapëtane pacuenia ponaponajë patajanacuata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata. ⁵ Judíoviyajuvënëvi itsamonae naexana fariseovi. Nexata bajarapamonae Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene. ⁶ Bajarapamonae neneconitsijitsia tsipaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë. ⁷ Daxita raja paxanë, Israelpijinëmi pexi doce ponëmibeje papemomoxinë. Pacopiaevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuenecopatsiaya pavajëtabiabajë Diosojavabelia. Patonacuenebavanapajënu caematacabi canacujitsia, meravi yajava. Agripa, nacua nevetsinë, abaxë nenamuxunaevere. Dioso icatsia petëpaevimi piasaëyaexanaejavanexa, copiaevetaponaponajë. Bajaraxuata judíovi neneconitsijitsia. ⁸ Pëtsa pajamatabëjumaitsimë Dioso yabara: “Dioso raja apo cajëpaetsi petëpaevi icatsia piasaëyaexanaenexa,” pajamatabëjamë pëtsa, jai Pablo bajarapamonaejavabelia.

Pacuenia Pablo navajunupaeba petaicaponaejava Jesús pejumecovënëtsivi pejebinexa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinē Agripajavabelia:

—Xanē abaxē Jesús itsa apo jumecovēnētsinē, jamatabējumaitsinē tsabiabi: “Xanē bejiobiaexanaenajē daxita pamonaē jumecovēnēta Jesús, Nazaret tomara-pijinē, pelivaisi,” jamatabējanē tsabiabi. ¹⁰ Nexata bajarapacuenia exanajē Jerusalén tomarata. Sacerdotevi penamatacaitorobivi taneitorobixae, ayaibitsaēto Jesús pelivaisi pejumecovēnētsivi jebaponajē penaneconitsivi pejebabiabibota. Itsa bajarapamonaē naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. ¹¹ Pamonaē Jesús pelivaisi jumecovēnēta, anijatonē jumaconibabeyaexanabiabajē judíovi penacatuatabihibonējava. Bajarapacuenia picani exanaponajē bajarapamonaē pecopabinexa Jesús pelivaisi pejumecovēnētsijava. Xanē picani cueneitoyanē bajarapamonaē. Nexata itsanacuajava penaetomaranējava ata, jaitarutajē Jesús pelivaisi pejumecovēnētsivi tataicaenexa tajebinexa penaneconitsivi pejebabiabibota, jai Pablo nacuaevetsinē Agripajavabelia.

Pacuenia icatsia Pablo navajunupaeba pacuenia Jesús pelivaisi jumecovēnēta yabara pelivaisi
(Hch 9.1-19; 22.6-16)

¹² Pablo icatsia jumaitsi nacuaevetsinē Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovēnētsivi, ponajē picani Damasco tomarabelia. Nitoroba sacerdotevi penamatacaitorobivi. Bajarapamonaē pejamatabēcueneta nitoroba tataicaenexa picani Jesús pelivaisi pejumecovēnētsivi tajebinexa penaneconitsivi pejebabiabibota. ¹³ Agripa, nacua nevetsinē, abaxē nenamuxunaevere. Nexata jane baja ponajē Damasco tomarabelia. Nexata tanajetaruaejavata namutua, taniji matonejeepatota athēbēvetsica pinijicotia tanematatoyorotsianaitayotsijava. Naitayota matabipijijuametocotia matatoxenetsia. Daxita tayajavaponaēvi tayajavanajetaruaejavata, panematatoyorotsia naitayota. ¹⁴ Nexata daxita paxanē irata pabobenajunuajē. Bajarajota irata jumetaenucajē hebreo-jumeta athēbēvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamē nijacuata najamatabēcuenebijianaponame,” tanejajjava, jumetaenucajē irata. ¹⁵ Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesúsne. Xanē raja tajajivi netobejiobiaexanaponame. ¹⁶ Nonotabapunare. Catsitanaitajētatsi raja tacaitapetsinexa tajajivitonēnexamē. Xamē nexata tsipaebianame

itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajëtsianatsi bexëa itsamatacabijavabelia. ¹⁷ Cacapanepaenatsi raja judíovi pecobevecua pecaitsacueniabiyanima. Caitorobianatsi apo judíovi pijanacuanëjavabelia. Apo judíovi ata pecobevecua cacapanepaenatsi pecaitsacueniabiyanima. ¹⁸ Caitorobatsi rabaja netsipaebinexa apo judíovijavabelia pexanialivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piaitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeconimi,” nejai Jesús mapacueniaje athëbëvetsica, jai Pablo nacuaevetsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaitsi nacuaevetsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyanima. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuene pënëyorotsijava Diosojavabelia. ²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani. ²² Itsiata baitsi jane neyjavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiobivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi

profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso ita asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso ita asaëyaexanatsi petëpaecujinae, namataxainaeya jane baja asaëyaexanatsi daxita petëpaevivecua. Nexata pamona Dioso pepuajumecovënëtsi tēpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamona ita jumecovënëta bajarapalivaisi, pecapanepaenexatsi Diosojavabelia, jai Pablo nacuaevetsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai nacuaevetsinë Festo.

²⁵ Pablo nexata jumaitsi:

—Festo, pecayaiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë, xamë baja cajena jumecovënëtime profetavi bajayata peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamona peyaquinaelivaisi, jai Pablo nacuaevetsinë Agripajavabelia.

²⁸ Nexata nacuaevetsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexanam jai nacuaevetsinë Agripa.

²⁹ Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeyenaevimë, jitsipajë panejumecovënëtsijava Jesús pelivaisi. Pacuenia baja

xanë jamatabëcueneitsinë, Jesús pelivaisi tajumecovënëtsinë, bajara paxamë ata panejamatabëcueneitsinexa. Itsiata apo pacatojitsipaetsi papecacëbinexa mapitsicadenamaëtonëtaje pacuenia xanë necëtanuta, jai Pablo.

³⁰ Itsa baja Pablo najumevereta bajarapacuenia petsipae-bijava, nacuaeavetsinë Festo nonotapuna. Nacuaeavetsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa.

³¹ Pepitsapaecujinaelia bajarapamonae najumaitsi:

—Maponëje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabib-ota, najai bajarapamonae Pablo yabara.

³² Nacuaeavetsinë Agripa jumaitsi nacuaeavetsinë Festojavabelia:

—Itsa apo cavajëtsi tsipae nitorobinexa vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaeavetsinë Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaeavetsinë Festobana najamatabëcuenevereta baja pitorobinexatsi Pablo Italia nacuyabelia, Romanonacua pepo pevetsinëjavabelia. Nexata Pablo caponaejitsiatsi vajabitsaë pijacapitán, Juliovënënë. Itsamonae naneconitsia pejinavanapaevi, Pablo yajava, caponaejitsiatsi. Ponë Romanonacua pepo pevetsinë, bajaraponë pevënë Augusto. Nexata Augusto pijajivi vajabitsaë pijacapitánmonaeyajuvënënë Julio. ² Xanë Lucasnë, naponajë Pablota. Adramitio tomaraverena pepatsibarco ënëabereca parunarecajë. Bajarapamo yaëtanajetarucaejitsia manuamene muxubërëa penaetomaranëjava, pepatsinexa Asiavënë nacuyabelia. Payajavaponajëbeje Aristarco, Tesalónica tomarapijinë. Tesalónicatomara eca Macedonia nacuata. ³ Meravia pitsijavata epatua panapatajë Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoënëvecua, penasivaxainaenexa peyapëtaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajë Sidón tomaravecua. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërëa patanajetarubenaenexa. Nexata Chipretunaeto

patatsavenonenia paxenetanajetarubenajë. Tsipaji bajarapamuxubërëvelia jovibo beyajetayo. ⁵ Cilicia nacuabeje Panfilia nacuabeje canacujitsialia papaliajë. Nexata payaëtajë Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandria tomaraverena pepatsimo. Bajarapamo ponaejitsia Italia nacuayabelia. Nexata baja pabarcota pananajetarubenajë, pavecuanonobajunajë. Nexata icatsia capitán Julio panerunaeyaexana Alejandria tomaraverena pepatsibarco ënëabelia. ⁷ Anijamatacabianë bajarapabarcota pananajetarubenajë. Tsipaji beaxayo najetaruca. Pinijicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tsipaji bajarapaitapavelia jovibo beyajetayo. ⁸ Piayapëbejecuenia panajetarubenajë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecuapanepapona baja. Nexata baja bitso panetsiyayi menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniaje:

—Xanë raja yapëtaniji nacatsiyayi baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitsideje barco pexainaenë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota.

Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

Pacuenia pinijijoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caepatoyocujinae pinijijoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco tortaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo. ¹⁶ Paponajë tsiquiritunaeto, Claudavënë tunaeto, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva malat-acata. Bajarapamonae junava barco patayayaëyaëcaeyaniva Sirtevënë irtsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota. ¹⁸ Meravia abaxë pitsijavata tsiteca pinijijovibo piyaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë. ²⁰ Bajayajebi baja cajena apo pataenë matabipijijuameto, tulupu ata. Tsipaji bajayajebi pinijijovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

²¹ Pamatacabibeje bajarapacuene pataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatuajëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberenjaje apo yaponae tsipaetsi Cretatunaetovecua. Apo bejiobitsinua tsipae. ²² Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ebarco rajane baja

naxuabiana. ²³ Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë. ²⁴ Nexata ángel nejumaitsi: “Pablo, pëtsa junavame. Itsiata raja apo tēpaemē tsane. Tsipaji raja naitajëtsijitsiamē Romanonacua pepo pevetsinë pitabarata. Xamē raja nejamatabëcueneta Dioso capanepaenatsi petēpaeyaniva daxita pamonaē yajavanajetarucame mapabarcotaje,” nejai ángel. ²⁵ Nexata daxita paxamē panajamatabëcuenesaēre panejamatabëcuenebējaijavavecua. Najamatabērutajë Diosojavabelia vajanacacapanepaenexa Dioso. Yapētaniji Dioso vajanacacapanepaejavanexa pacuenia baja ángel netsipaeba. ²⁶ Itsiata baitsi jane cajena jovibo nacayacaponae na itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covē payapataponajë, jamatabëjai.

²⁸ Nexata bajarapamonae pemaëtota caējëtapona xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubujava irabereca. Bajaraxuacujinae, caepatoyocujinae, icatsia caējëta. Veintisiete icatsia pametrobeje xaina mene piavajubujava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtojopaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepíjia peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapítanjavabelia, capítan pijajivijavabelia ata:

—Mapamonaeye barcota penacuenebivi itsa ponaena mapajerataje, paxamē pavajabitsaēmē panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaē caucutaxuaba jera pecētarutsimaēto. Jera baja nexata pona barcovecua.

³³ Ajena baja matakabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaeyavabelia:

—Catorce baja cajena pamatacabibeje xaniavaetsia apo pamajitsimē. Panexaejava ata apo paxaemē. ³⁴ Bajaraxuata pacaitorobatsi panexaejava panexaenexa, panesaē panexainaenexa panepanepaenexa. Itsiata raja daxita apo pait-sacuenemē tsane, jai Pablo bajarapamonaeyavabelia.

³⁵ Bajarapacuenia Pablo pejumaitсийavata, panbē pita. Panbē yabara Pablo pexaniajamatabēcuene rajuta Diosojavabelia daxita bajarapamonaey pitabarata. Bajaraxuacujinae Pablo epatsēnēca panbē. Pablo nexata xane pexaejava.

³⁶ Daxita nexata bajarajota ajamatabēcuenesaēreca baja. Nexata bajarapamonaey ata xane pexaejava. ³⁷ Doscientos setenta y seis papajivinēbeje daxitata paponajē bajarapabar-cota. ³⁸ Nexata daxita xaniavaetsia penabanicujinae, menia penereca trigoxu sacuanē pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matakabi tsarucaponaey, barcota penacuenebivi taeyelia petunaeto. Itsiata apo yapētae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonaey najamatabēxaina peyaētsinexa barco bajarapatajetabojavabelia. ⁴⁰ Xuanē anclavēnējavanē, yamaēya copabareca, bajaraxuanē irabelia itsa vaetaba, barco patayarucojopaenexa. Bajaraxuanēmi yamaēcaucubapenereca. Sarasaranaeyaxananua barco petabufecajēbanajetarubenaepabeje. Nexata barcoupitatsia penucaenaeta velapana upicētarutsia. Velapana nexata jovibota nayerebajaraba. Barco jane baja imoxoyotanjeta-ruca tajetabo. ⁴¹ Nexata itacarajeta barco pata itsajota anijamenebeje pesaē namataenetsia patabeje. Barco baja payajumanayaētajarabajē iratsaubojumata. Nexata bajarajota barcoupi mēthēmēthēcajunua iratsaubojavabelia. Ataja tsanucaey. Barco petabufejavavetsina malataca pesaēta tabufesarabajarabatsi. ⁴² Nexata picani vajabitsaē bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaē pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonaey

yapētane pejuejava, copiaya pejuenexa pitapayabelia copiaya pepatsinexa matatsēnēabelia. ⁴⁴ Bajaraxuacujinae pamonaē apo yapētaē pejuejava, cotocaevi itoroba tablapanējumata, barcopanēmijumatana, pejuenexa. Bajarapacuenia daxita panepa matatsēnēabelia.

28

Pacuenia Pablo ponapona Maltavēnē tunaetojavata yabara pelivaisi

¹ Itsa baja daxita paxanē xaniavaetsia papanepajē matatsēnēabelia, nexata pavēnētaniji bajarapatunaeto. Bajarapatunaeto Malta vēnētunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanucaē. Nexata bitso cainejeba. Panejunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenē, bebula, pitsatabijirava isotojavaverena piatajuyavavecua. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi ita tane Pablo jomo pecobesinerucaejavatsi, nexata najumaitsi bajarapamonae:

—Maraeta ponē jivibenēje. Bajaraxuata manumene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabēcuene, jomo pesinijavatsi peyatēpaenexa, najai Maltatunaetopijivi Pablo yabara.

⁵ Nexata Pablo nacobenēnēbiaxuaba jomo pejopaenexa isotojavabelia. Pablo itsiata apo itsacuene. ⁶ Nexata daxita Maltatunaetopijivi jamatabējumaitsi Pablo yabara:

—Aeconoxae meta Pablo cobeyajinaena. Itsa jume, irata meta petēpaenē jopaena, jamatabējai.

Nexata bajarapamonae bajayaepato evetanubenae ata Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonae itsacuenia najamatabēxaina Pablo yabara. Nexata najumaitsi bajarapamonae:

—¡Maraeta papebi diosonēje! najai.

⁷ Maltatunaeto pevetsinē pevēnē Publio. Nexata itsajota panubenajē, imoxoyo bobena Publio pijairanē. Nexata bajaraponē panecopiapita pexaniacuenia. Bajaraponē pijabota panajinavanapajē acueyabi pamatacabibeje. ⁸ Publio paxa avitane tsanucaē camata. Romaebanucatsi. Bitso suliabatsi. Nexata Pablo taeyojopalia. Vajēta Diosojavabelia. Bajaraxuacujinae piavitanenē pematabocotojumavereca Pablo nacobebuata. Nexata baja Pablo jamatejemayaexana piavitanenēmi. ⁹ Bajarapacuenia Pablo ita exana, nexata

daxita piavitanevi Maltatunaetopijivi pata Pablojavaberena. Daxita bajarapamonae ata jamatejemayaexana Pablo.¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexëajavabelia itsabarcota panaponajë, nexata Maltatunaetopijivi panerajuta daxita patanamatavenonaejavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vënëtunaetota panajinavanapajë acueyabi pajuametobeje. Bajaraxuacujinae baja icatsia panaponajë barcota. Bajarapabarco patavajënae pata Alejandria tomaraverena. Bajarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa.¹² Bajarapabarcota panaponajë. Nexata jane baja panapatajë Italia nacuyabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje.¹³ Bajaraxuacujinae icatsia panaropobajë. Paponajë manumene muxubërëa. Nexata icatsia papatajë Regio tomarata. Nexata meravia pitsijavata patacovëverena pexaniajovibo najetaruca. Nexata bajarapajovibo paneyacapona patavajënaeyabelia. Nexata icatsia anijamatacabibejecujinae papatajë Puteoli tomarata.¹⁴ Puteoli tomarata pacaxitajarabajë Dioso pejumecovënëtsivi. Bajarapamonae paneasiva caesemana patanajinavanapaenexa bajarapamonaejavata. Bajaraxuacujinae jane baja matatsënëa paponajë Roma tomarabelia.¹⁵ Roma tomarapijivi, Dioso pejumecovënëtsivi, patavajënaelia panevënëlivaisitane patanajetarubenaeyava. Nexata bajarapamonae panecopiajairena. Nexata penamataxainaebitsaëto panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata.¹⁶ Nexata jane baja papatajë Roma tomarabelia. Nexata Roma tomarata capitán Julio rajuta baja pamonaenaneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinë pecobeyabelia. Itsiata Pablo tocopatatsi saicayabota peponaponaenexa. Caenë vajabit-saënë evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

17 Pablo baja itsa xaina acueyabi pamatacabibeje pepat-sicujinae Roma tomarata, tonajumexuaba judíovi penamat-acaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacuenae apo exanae atanë vajavëna judíovijavabelia, vajasalinaivi pecujarubicuene jume-covënëtsiaponaponae atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuenae pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia. ¹⁹ Itsiata baitsi jane vajavëna judíovi, pamonae neneconita, apo jitsipae Romano nacuapijivi tanecopatsinexa. Jitsipa picani tanebeyaxu-abinexa. Nexata xanë vajëtajë taneitorobinexa maberena je Romanonacua pepo pevetsinë pitabarata tananeconitsinexa pibisiacuene itsa exanajë. Itsiata xanë apo jitsipae nã juya bajarapamonae taneconitsijava tajanacuapijivijavabelia. ²⁰ Bajaraxuata nexata pacajunatatsi patacataenexa patacabarëcuaiacuajainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetona-jumeitorobi Judea nacuaverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsipajë patanetsipae-binexamë pacuenia Jesús pelivaisi jumecovënëtame. Daxitanacuanëpijivi baja cajena baracuacuajai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi caëjëta matacabi icatsia nacaetuatsijitsia pabota Pablo ponapona. Nexata

jane baja icatsia itsa nacaetuata, bajarapamonae ayaibitsaëtoxfaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaitsi Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. ²⁴ Itsamonae bajarapamonaeyajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinë Espíritu Santo pejamatabëcueneta tajëvelia yapëtaeyaexanatsi paxamë apo panejumecovënëtsijavanexa Jesús pelivaisi. Nexata profeta Isaíaspijinë Espíritu Santo itorobatsi petsipaebinexa vajasalinaivimijavabelia mapacueniaje:

Paxamë raja picani pajumetaeyabiabianame palivaisi pacatsipaebabiabiana. Itsiata apo pajumeyapëtaemë tsane xua yabara bajarapalivaisi pacatsipaebabiabiana. Paxamë raja picani pataeyabiabianame xua pacatsitaexanabiabiana. Itsiata apo payapëtaemë tsane pajamatabëcuene yabara bajaraxua pacatsitaexanabiabiana,

jai profeta Isaíaspijinë vajasalinaivimijavabelia.

²⁷ Bajarapacuenia jumaitsi profeta Isaíaspijinë tsipaji baja cajena Dioso tajëvelia jumaitsi paxamë apo panejumecovënëtsijavanexa yabara mapacueniaje:

Bajarapamonae ajamatabëcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipanua palivaisi tsipaebatsi. Pejamatabëëthëtojavavetsina jumeyapëtaejitsipa. Nexata najamatabëcuenepënëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë pibisiacuenevecua,

jai baja cajena Dioso bajayata tajëvelia paxamë apo panejumecovënëtsijavanexa yabara, jai Pablo judíovijavabelia Roma

tomarata.

²⁸ Pablo icatsia jumaitsi judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxu-naevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebi-
java, nexata jane baja daxita judíovi naviaba. Nexata bajara-
palivaisi yabara bajarapamonae namutua nabarëcuaicuaijai
tsanajetarubena.

³⁰ Pablo penacovaetsibota anijavaibeje ponapona
Roma tomarata. Pablo matamotapona bo pecovaet-
sijamatabëcuene. Pablo xaniavaetsia copiapitabiaba
daxita pamona sivaxainabiabatsi. ³¹ Pamona Pablo
sivaxainabiabatsi, tsipaebabiaba Dioso pijajivi pevetsijava
mapanacuataje. Tsipaebabiabanua pepo petuxanenë
Jesucristo pelivaisi. Tsipaebabiaba ajumejunavijibia. Itsajivi
ata Pablo apo jumeitavetsitsi petsipaebabiabilivaisi.

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejume-covënëtsivi, Roma tomarapijivijavabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebapon-aenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi. ³ Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacua pepo pevetsinëmi. ⁴ Vajatuxanenë Jesucristo petëpaecujinae, Espíritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënatocuene. Yapëtanetsinua piasaënëcuene ata. ⁵ Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonae apo judíovijava, apo judíovi ata pejumecovënëtsinexa Dioso. ⁶ Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinexamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenebarëyanë bitso bajarapamonae Jesucristo

pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajunupaeba xaniavaetsia panejumecovënëtavanapaejava Dioso. ⁹ Xanë daxita tajamatabëcuenesaëta Dioso pijacuene tonacuenebaponaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtsijavata Diosojavabelia. ¹⁰ Vajëtabiabajë Diosojavabelia taponaeenexa paxamëjavabelia. Nexata Dioso itsa netocopatsiana taponaeenexa, ponaenajë paxamëjavabelia. Bajayajebi picani bitso jamatabëponabiabajë patacataenexa. ¹¹ Nexata jitsipajë patacataenexa, patacatsipaebinxanua palivaisi Espiritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. ¹² Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi panejamatabëcuenesaënexa Diosojavabelia. Paxamë ata juya paneyavenonaename bajarapacuenia.

¹³ Tajamonae, pacatojitsipatsi paneyapëtaenexa mapacueneye. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponaeenexa. Jitsipajë patacatsipaebinxanua Jesucristo pelivaisi paxamëyajuvënëvi, pamonae abaxë apo jumecovënëtsi, pejumecovënëtsinexa Jesucristo. Pamonae ata baja jumecovënëta, Jesucristo piamatabëcuenesaënexa pevajënaeyabelia. Pacuenia apo judíovi ata jumecovënëta taponae pevajënaeyabelia itsaxuayo tsipaebanajetarucajë, bajara paneitsinexa paxamë ata. ¹⁴ Dioso nitoroba tatsipaebaponaeenexa Dioso pejumelivaisi daxitajivijava. Nexata Dioso pejumelivaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyaëtaevijava ata, apo peyapëtaevijava ata. ¹⁵ Bajaraxuata bitso jitsipajë paxamë, Roma tomarata panejinavanapevi ata, patacatsipaebinxanua pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaicuepe pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponajë bajarapalivaisi judíovi. Bajaraxuacujinae icatsia cotocaevi patsipaebaponajë apo judíovi. ¹⁷ Bajarapalivaisi nacayapëtaeyaexana pacuenia

Dioso nacatoexana aneconijibia Dioso vajanacataenexa. Aneconijibia baja Dioso nacatane Jesucristojavabelia vajavajënaeyabelia vajanajamatabëcuene copataponaexae. Dioso ra pejumelivaisibaxutota jumaiti mapacueniaje: “Pajivi jamatabëjumaiti: ‘Xanë pepacuene Dioso neyavenonaena pacuenia najumecapanepaeya jumaiti,’ jamatabëjai, bajarapajivi Dioso aneconijibia tanetsi. Bajarapajivi xainaena matababi peverevereceaeva,” jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëtatsia peecaenë, vaxaitsi jamatabëcueneypëtanetsi. Yapëtanetsi mapacueniaje. Dioso baranaepanapona daxita pibisiacuene pexanaevijavabelia. Bajarapamonae pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. ¹⁹ Bajarapamonae xaniavaetsia beyapëtanë picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaejavabelia. ²⁰ Jivi apo caëjëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baiti jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatabacijavabelianexa Dioso bitso piasaëtsaponaponaeva. Bajaraxua picani jivi caëjëpatsi pijacuata peyapëtaenexa, itsa canaëjësipa Dioso pexanaejavanë mapanacuataje. Nexata bajarapamonae acuenebi pejumaitsinexa: “Apo payapëtaenë cajena pacuenia Dioso jamatabëcueneitsi,” pejainexa. ²¹ Bajarapamonae yapëtae ata Dioso peponaponaeva, itsiata apo yaiyatae. Caeto ata cajena Diosojavabelia pexaniajamatabëcuene apo rajutsi. “Pexaniacuene rabaja panetoexaname,” apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcueneitaquiri tsaponae. ²² Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baiti jane cajena apo yapëtae. ²³ Bajarapamonae apo najamatabëcuenecopabi ayaijamatabëcuenenë Diosojavabelia, ponë apo petëpaenënexa daxitamatabacijavabelianexa. Caranata saya jivi pecobeta jumapecataeya pexanaenëjavabelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëjavabelia. Navajëcabiabanua itsamonae

pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba.

²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënëtsilivaisi, jivi pecobeta jumapecataeya pexanaenëanë pelivaisi. Bajarapamonae apo yaiyatae pepo Dioso, ponë daxitacuene exana mapanacuataje. Caranata yaiyataeya navajëcabiaba Dioso pecobecovëjavanëjavabelia. Najamatabëcuenecopabanua ëbajaraxuanëjavabelia. Bajarapamonae nexata saya namuxujemata caranata pepo Dioso, ponëjavabelia jivi daxitamatacabijavabelianexa jumaitsijitsia: “Diosomë, bitso ayaijamatabëcuenenëmë,” jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsiexanaexae, Dioso ayaicuenia naneconitsiaexanaponatsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainaenexa ëpibisiacuene pexanaejava. ²⁹ Bajarapamonae exanavanapa bitso daxita pibisiacuene. Ëpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainayababiabanua itsamonae pecobecovë. Pibisiacuene jamatabëexanabiabanua itsamonaejavabelia. Cuenecaëbabiabanua itsamonae pexainaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Ëpamonae ata bitso

naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuajai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayaijamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuene pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapëtane picani pacuenia Dioso itorobatsi pexanaenexa. Yapëtanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijibia sivabarëya tsabiabi itsamonae ata pibisiacuene itsa exana.

2

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

¹ Paxamë pajudíovimë, pacatsipaebianatsi mapacueniaje. Pajudíovimë pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tsipaji paxamë ata pibisiacuene paexaname bajarapacuenia itsa pajumaitsimë tsabiabi itsajivi yabara. ² Yapëtanetsi baja cajena mapacuenije. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena. ³ Bajara pijinia pacuenia paxamë ata pibisiacuene paexanabiabi atamë, pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuene paneexanabiabixae, pëtsa

pajamatabējumaitsimē tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabējamē pētsa. Tsipaji Dioso naneconitsiaexanaena daxita pibisiacuene pexanaevi. ⁴ Bepacanaējētame xaniavaetsia pacuenia Dioso jamatabēcueneitsi. Dioso cajena abaxē bepījia apo naneconitsiaexanae pibisiacuene pexanaevi ata. Dioso raja abaxē jamatabēcueneevetaponapona pibisiacuene pexanaevi ata pevajētsinexatsi pevecuaajibi-aexanaenexa pijaneconi. Paxamē ata Dioso pacatojitsipa panecopabinexa pibisiacuene paneexanabiabijava, panenajamatabēcuene pēnēyorotsinexa Diosojavabelia. Bajaraxuata abaxē Dioso pacaitaxutotsoniatane. ⁵ Itsiata paxamē pajamatabēcuenetajamē bitso. Apo pajamatabēcopatsimē pibisiacuene paneexanaejava. Nexata ayaineconi panatoexanaponame panevajēnaeyabelia. Nexata ayaicuenia Dioso pacananeconitsiaexanaena pamatacabí Dioso naneconitsiaexanaena daxita pijaneconi pexainaevi. ⁶ Bajarapamatacabí Dioso naneconitsiaexanaponaena caejivi canacujitsia. Paneconivajēto natoexanaponapona itsa abaxē asaē tsaponaponae mapanacuataje, bajarapaneconivajētota Dioso caejivi canacujitsia naneconitsiaexanaponaena. ⁷ Itsamonae jamatabēcueneenabiabatsi ēpexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatatsia. Jitsipabiabanua Dioso pesivajamatabēcuenebarēyanexatsi. Jitsipabiabanua pexainaenexa matacabí apo pevereverecaejava. Bajarapamonae Dioso rajutsianatsi matacabí apo pevereverecaejava. ⁸ Itsamonae natojitsipa daxitacuene pexinaejava ēbajarapamonaenexa. Apo jumecovēnētsinua pexaniajailivaisi. Saya exanavanapa ēpibisiacuene. Bajarapamonae Dioso anaeya ayaicuenia naneconitsiaexanaenatsi. ⁹ Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yanajamatabēxainaenanua pijaneconi. ¹⁰ Itsiata baitsi jane daxita pamonaē pexaniacuene pexanaevi, judíovi, apo judíovi ata, Dioso pijapenivenivenaenacuatatsia jinavanapaena. Dioso sivajamatabēcuenebarēya tsanetsi. Jinavanapaenanua jamatabēcuenexanepanaeya.

¹¹ Dioso itsa naneconitsiaexanaena daxita pijaneconi pexainaevi, najēpaeya naneconitsiaexanaena. Paneconivajēta xaina caejivi canacujitsia, bajarapaneconivajētota Dioso naneconitsiaexanaponaena caejivi canacujitsia. ¹² Pamonaē apo judíovi, yapētae ata xua pibisiacuene, itsiata

bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamonaē judíovi, yapētae ata pacuenia Dioso Moiséspijinēta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. ¹³ Dioso raja judíovi aneconijibia apo tae saya jema judíovi peyapētaejava yabara, palivaisi Dioso tonajumecopata Moiséspijinēta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinēta petonajumecopatsilivaisita. ¹⁴ Pamonaē apo judíovi, apo tsipaebitsi Dioso Moiséspijinēta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinēta penajumecopatsilivaisita. Apo judíovi apo muxujiobi atatsi, yapētane pejamatabēēthētota xua pexaniacuene pexanaenexa. Yapētanenua xua ata pibisiacuene pexanaeyaniva. ¹⁵ Pamonaē pexaniacuene exanavanapa tsipaebinejevatsi Dioso Moiséspijinēta penajumecopatsilivaisi, bajarapamonaē exanavanapa pejamatabēēthētota peyapētaecuenia, pacuenia itorobatsi Dioso Moiséspijinēta penajumecopatsilivaisita. Daxita apo judíovi yapētane pejamatabēēthētota pexaniacuene pexanaenexa. Yapētanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenanua papibisiacuene ata muetsia daxitajivi najamatabēxainavanapa yabara. Nexata bajarapamatacabi daxitajivi nayapētaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajē Dioso pitorobilivaisi itsa tsipaebaponajē.

Judíovi yabara, Dioso Moiséspijinēta penajumecopatsilivaisi ata, yabara pelivaisi

¹⁷ Pajudíovimē, pajumaitsimē tsabiabi: “Vaxaitsi raja judíovitsi. Vaxaitsi yapētanetsi Dioso Moiséspijinēta penajumecopatsilivaisi. Bajaraxuata Dioso nacacapanepaena. Dioso raja ējudíovitsi vajaDioso,” pajamē tsabiabi. ¹⁸ Payapētaneme baja cajena xua Dioso pacatojitsipa paneexanaenexa. Payapētanemenua Dioso Moiséspijinēta penajumecopatsilivaisi. Bajaraxuata payapētaneme xua pexaniacuene paneitapetsinexa paneexanavanapaenexa. ¹⁹ Pajamatabējumaitsimēnua tsabiabi: “Vaxaitsi cajena bitso

yapëtanetsi Dioso pejumelivaisi, vajatsipaebinexa pamonae jumetae ata Dioso pejumelivaisi, abaxë apo pejumeyapëtaevi pexaniajailivaisicuene. Vaxaitsi jamatabëcueneitayotsianatsi pamonae piamatabëcueneitaquirivi, Dioso pejumelivaisivecua saya pejinavanapaevi,” pajamatabëjamënuua tsabiabi. ²⁰ Pajamatabëjumaitsimënuua tsabiabi: “Vaxaitsi cajena nacacaëjëpa vajayapëtaeyaexanaenexa pamonae abaxë apo yapëtae pacuenia Dioso jamatabëcueneitsi. Nacacaëjëpanua vajayapëtaeyaexanaenexa pamonae ata pejanajumecovënëtsivi Dioso. Nacacaëjëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia,” pajamatabëjamë tsabiabi. ²¹ Bajarapacuenia paxamë patsipaebabiabi atamë itsamonaejavabelia, itsiata paxamë ata apo paexanaemë bajarapacuenia. “jPëtsa panacobetoxotame,” pajamë tsabiabi itsamonaejavabelia. Itsiata paxamë panacobetoxotabiabame. ²² “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaejavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: “Jumapecataya pexanaenëanëjavabelia penavajëcaecuene bitso abeje. Itsa pajonejitsipame jumapecataeya pexanaenëanë penubenaebota, pacajamatabëcuene bijianaejitsipa,” pajamë tsabiabi. Itsiata paxamë pajoneyabiabame jumapecataeya pexanaenëanë penubenaebota penamatamotsijavanë, ofrendacuenia pejebijavanë, panenacobetoxotabiabinexa. ²³ Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanaelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yaiyatae Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaeba. Dioso pejumelivaisibaxutota tajëvelia itsa pacavajunupaeba, jumaitsi paxamë yabara mapacueniaje: “Pamonae apo judíovi, pibisiacuenia Dioso baracuaicuajai tsane judíovi xaniavaetsia apo petsitajinavanapaexae,” jai tajëvelia Dioso pejumelivaisibaxutota paxamë Dioso apo panejumecovënëtsijavanexa yabara.

²⁵ Paxamë pajudíovimë papebijivimë, pacaperabëcaucuba itsa abaxë patsiquirinacuetoximë. Baitsi pacaboupiperabëcaucuba. Bajarapacuenia pacaperabëcaucuba panenayapëtaenexa Dioso papijajivicuenemë. Bajarapacuenia pacatonamatamota matapania itsa pajumecovënëtavanapame

Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. ²⁶ Pamonaē apo judíovi ata, apo peperabëcaucubivi atatsi, pejumecovënëtavanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonaē ata Dioso pijajivicuenia tanetsi. ²⁷ Pamonaē apo judíovi, apo peperabëcaucubivi atatsi, itsiata pejumecovënëtavanapaexae Dioso Moiséspijinëta penajumecopatsilivaisi, bajarapamonaē itsamatacabi pacaaurabiana Diosojavabelia. Bajarapacuenia pacaaurabiana Diosojavabelia tsipaji Dioso Moiséspijinëta penajumecopatsilivaisi payapëtaē atamē, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. ²⁹ Pajivi pepacuene Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponaponaē saya mapanacuapijivi pesivabarëyanexatsi.

3

¹ ¿Detsa xua judíovi xaina Diosojavabelia, pamonaē apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua?

² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaējavabelia. ³ Itsamonaē judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuene yabara pajamatabëjumaitsimë mapacueniaje: “Dioso meta itsiata apo exanaē tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje:

Xamë Diosomë, pexaniajailivaisi jivijavabelia tsipae-babiabame. Jivi cajumeaeabi ata, itsiata daxitajivi peyapëtaenexa, xamë apo nenajumetsënëtsinë, jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaenëcuene pibisiacuene pexanaejava. Bajaraxuata pamonaenaneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexainaevi,” itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanae tsipae pijaneconi pexainaevi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. ⁶ Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae ëpijaneconi pexainaevi. Nexata caejivi canacujitsia pibisiacuene pexanaeneconi yabara, paneconivajëto xainapona, bajarapaneconivajëtota Dioso apo naneconitsiaexanapona tsipae.

⁷ Itsamonae meta jamatabëcuenenavëxaniabiaya jumaitsi tsane mapacueniaje: “Daxitajivi pecanaëjëtsinexa Dioso apo penajumetsënëtsinëcuene, vaxaitsi yamaxëitojorobiaya jivi livaisi tsipaebabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaitsi yamaxëitojorobiaya jivi livaisi vajatsipaebabibijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajanajumetsënëtabibijava yabara,” jai meta tsane itsamonae jamatabëcuenenavëxaniabiaya. ⁸ Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaitsi tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vajaexanabibijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane

itsamonae najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitsvi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ëjudíovi saicaya aneconijibia Dioso tane daxita mapanacuapijivi vecuaje? Jume raja. Jumaitsinë baja cajena mapacueniaje. Daxitatsi mapanacuapijivitsije pibisiacuene ëvajaexanaevi. Judíovi, apo judíovi ata, bajara itsi. ¹⁰ Daxitatsi pibisiacuene vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata.

¹¹ Ajibi peyapëtaejivi pacuenia Dioso jamatabëcueneitsi.

Ajibi pepacuene pejamatabëëthëtovetsina pejumecovënëtsijivi Dioso. ¹² Daxita Diosovecua naxuabiaya jinavanapa.

Daxita ajamatabëcuenebeje. Ajibi pexaniacuene pexanabiabijivi. ¹³ Pacuenia petëpaenë pemëthë tuxutsaeba, bajara itsi bajarapamonae pecuibovojotota pecuaicuaijajava pibisialivaisi.

Pijumeta jivi yamaxëitojorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsënëtsilivaisi. ¹⁴ Pecuibovojotota cuaicuaijai ëpibisialivaisi pianaepanaenexa. ¹⁵ Itsacuene apo exanae atatsi, bepíjia jitsipa jivi pebeyaxuabinexa.

¹⁶ Itsabelia jinavanapa, bejiobiaexanabiaba itsamonae. ¹⁷ Bajarapamonae apo yapëtae xaniavaetsia peyajavajinavanapaenexa jivi.

¹⁸ Bajarapamonae apo canaëjëtsi pejunavinexa Diosojavabelia,

jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapëtanetsi mapacuenieje. Bajayata Dioso pejumelivaisi tonajumecopata ëjudíovi picani pejumecovënëtavanapaenexa. Itsiata judíovi apo jumecovënëtsicapanepae bajarapalivaisi. Bajaraxuata judíoviyajuvënë, caenë ata, acunenibi pejumaitsinexa: “Xanë cajena apo tonaneconitsinë Dioso,” pejainexa. Daxita mapanacuapijivi, judíovi, apo judíovi ata, beyapëthane penaneconitsijava Diosojavabelia. Tsipaji itsajivi ata apo caëjëpaetsi pejumecovënëtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vajaexanavanapaejava vajasivajamatabëjumaitsinexa mapacueniaje: “Xaniajai rabaja.

Xanë ata pibisiacuene taexanaenë,” vajajamatabëjainexa bajarapalivaisi pejamatabëcueneta.

Pacuenia Dioso aneconijibia tane pajivi najamatabëcuenecopata Jesucristo javabelia yabara pelivaisi

²¹ Aeconoxae baja mapamatacabitaje Dioso nacayapëtaeyaexana pacuenia nacatoexana aneconijibia vajanacataenexa. Dioso apo jamatabëjumaitsi: “Pamonae jumecovënëtsicapanepe Moiséspijinëta tanajumecopatsilivaisi, bajara ëpamonae aneconijibia taenajë,” apo jamatabëjai. Pacuenia Dioso capanepaejitsia Dioso pejumecovënëtsivi, bajayata Diosojumepaebivi profetavi tajëvelia yaquina Dioso pejumelivaisibaxutota. ²² Mara pacuenia Dioso jivi aneconijibia taneje. Pajivi jamatabëjumaitsi: “Xaniajai. Jesucristo itsa tëpa cruzata, pibisiacuene taexanaeneconi yabara tëpa,” jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamonae jumecovënëta Jesucristo cruzata pesivatëpaejavatsi pijaneconi yabara. Tsipaji Dioso daxitajivi najëpaejatane. ²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipaecuenia apo toponaponae. Daxitajivi Diosovecua naxuabiaya jinavanapa. ²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamonae jumecovënëta Jesucristo cruzata pesivatëpaejavatsi pijaneconi yabara. Jivi apo namatavenonae pijacuata penaneconimata-motsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuene pexanaeneconivecua. ²⁵ Dioso copata Jesucristo petëpaenexa cruzata vajanacaneconimatamotsinexa, pibisiacuene vajaexanaeneconimi. Nexata itsa jumecovënëtatsi Jesucristo cruzata vajanacasivatëpaejava, nacavecuaajibiaexana pibisiacuene vajaexanaeneconimi. Bajarapacuenia Dioso copata Jesucristo cruzata vajanacasivatëpaenexa mapanacuapijivitsi. Tsipaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacanecanimatamota, pibisiacuene vajaexanaeneconimi. Pepo bajayata pejinavanapaevimiyajuvënëvi ata, najamatabëcuenecopaba Diosojavabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsipaji Dioso tajëvelia yapëtane Jesucristo pesivatëpaejavanexa bajarapamonaemi ata pibisiacuene pexanaeneconi yabara. ²⁶ Ajena, mapamatacabitaje, Dioso jivi tsitanajamatabëcueneitajëta jivi pibisiacuene pexanaejava Dioso apo pejitsipaenëcuene. Tsitanajamatabëcueneitajëtanua aneconijibia petaejavanexa

pamonaē jumecovēnēta Jesucristo pesivatēpaejavatsi cruzata pijaneconi pevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovēnētsixae Jesucristo vajanacasivatēpaejava cruzata vajaneconi yabara. Nexata ayaijamatabēcuenējivitsi vajanacataenexa, acuenēbi vajajumaitsinexa itsajivijavabelia: “Xanē taexanaejava pejamatabēcueneta, Dioso aneconijibia netane,” vajainexa acuenēbi. ²⁸ Vaxaitsi baja cajena yapētanetsi mapacueneje. Dioso aneconijibia tane pajivi jumecovēnēta Jesucristo pesivatēpaejavatsi cruzata pijaneconi yabara. Bajarapajivi apo jumecovēnētsi ata Dioso Moiséspijinēta penajumecopatsilivaisi, Dioso itsiata aneconijibia tanetsi pejumecovēnētsixae Jesucristo pesivatēpaejavatsi cruzata pijaneconi yabara.

²⁹ Dioso raja ējudíovi apo pijaDioso. Dioso raja apo judíovi ata pijaDioso. ³⁰ Caenē rabaja Dioso. Pematatsēnēa baja itsanē Dioso ajibi. Bajaraponē Dioso judíovi aneconijibia tane, pamonaē jumecovēnēta Jesucristo pesivatēpaejavatsi cruzata pijaneconi yabara. Bajara pijinia pacuenia Dioso aneconijibia tane pamonaē apo judíovi ata. ³¹ Vaxaitsi baja xaniavaetsia Jesucristo jumecovēnētatsi vajanacasivatēpaejava cruzata vajaneconi yabara. Nexata Dioso Moiséspijinēta penajumecopatsilivaisi yabara, apo bejamatabējumaitsitsi: “Dioso Moiséspijinēta penajumecopatsilivaisi tajumecovēnētsijavami, copatajē baja. Tsipaji baja jumecovēnētajē Jesucristo tanesivatēpaejava cruzata tajaneconi yabara,” apo bejamatabējaitsi. Biji rajane Jesucristo vajanacasivatēpaejava cruzata, itsa jumecovēnētatsi, Dioso Moiséspijinēta penajumecopatsilivaisi ata bajarajota yajavajumecovēnētatsi.

4

Pacuenia Abrahampijinē bajayata Dioso aneconijibia tanetsi pejumecovēnētsixae pacuenia Dioso najumecapanepaeya jumaitsitsi yabara pelivaisi

¹ Pacatsipaebijitsiatsi pajamatabēcuenelivaisi yabara Abrahampijinē Dioso aneconijibia tanetsi. ² Abrahampijinē pijacuata ēpexaniacuene itsa exanabiabijitsipa, nexata jumaitsi tsipae Diosojavabelia: “Ēpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinē Diosojavabelia apo jumaitsi bajarapacuenia. Tsipaji Abrahampijinē ēpexaniacuene pijacuata exanabiabi

ata tsipae, bajaraxua yabara Dioso aneconijibia apo taetsi tsipae. ³ Biji rajane Dioso pejumelivaisibaxutota Abrahampijinē yabara jumaiti mapacueniaje: “Abrahampijinē najamatabēcopatsiaya Diosojavabelia pejamatabējumaitisabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaiti,’ pejamatabējaitisabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinē yabara. ⁴ Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabējumaiti: “Dioso, ponē penaneconitsivi pijaneconivecua ajibiaexanabiaba, bajaraponē pepacuene necapanepaena pacuenia najumecapanepaeya jumaiti tanecapanepaenexa,” jamatabējai, bajarapajivi Dioso aneconijibia taenatsi pecapanepaenexatsi pijaneconivecua. ⁶ Pepo bajayata Davidpijinē vajunupaeba pejamatabēcuenenarēyajava pamona baja Dioso aneconijibia tanetsi. Bajarapacuenia Dioso aneconijibia tanetsi bajarapamona pejumecovēnētsixae Dioso najumecapanepaeya pejumaitisicueniatsi. Bajarapamona Dioso aneconijibia apo taetsi, pijacuata ēpexaniacuene exanabiabi ata. ⁷ Davidpijinē pepo bajayata tajēvelia bajarapamona yabara jumaiti mapacueniaje:

Jamatabēcuenenarēya baja tsavanapae pamona
 picani naneconita Diosojavabelia. Baraja-
 matabēcuenexanapanatsi baja Dioso. Tsipaji baja
 pibisiacuene pexanaeconimi, vecuaajibiaexanatsi.
⁸ Jamatabēcuenenarēya baja tsaponapona pajivi
 pibisiacuene pexanaejivi ata, itsiata Dioso
 aneconijibia itsa tanetsi,
 jai mapacueniaje Davidpijinē bajayata.

⁹ Bajarapacuenia Davidpijinē itsa jumaiti, pejamatabēcuenenarēyatsavanapaevi baja, ējudiōvi, peperabēcaucubivitsi yabara, apo jumaiti. Pamona apo judiōvi, apo peperabēcaucubivi atatsi, yabara jumaiti. Xaniajanē pacuenia pacatsipaebijitsiatsi. Abrahampijinē bajayata Dioso jumecovēnēta najumecapanepaeya pejumaitisicueniatsi. Nexata baja Abrahampijinē Dioso aneconijibia tanetsi pibisiacuene pexanaeconimivecua. ¹⁰ ¿Abrahampijinē tsajane baja pepuaperabēcaucutsitsi, Dioso aneconijibia tanetsi? Jume raja. Abaxē apo perabēcaucutsinejeva atatsi, aneconijibia tanetsi pejumecovēnētsixae Dioso najumecapanepaeya pejumaitisicueniatsi. ¹¹ Dioso baja aneconijibia pepuataetsi, Abrahampijinē perabēcaucutatsi. Bajarapacuenia Abrahampijinē perabēcaucutatsi daxitajivi

peyapëtaenexatsi Dioso aneconijibia petaejavatsi. Bajaraxuata daxita pamonaē apo peperabëcaucubivi atatsi, itsa jamatabëjumaitsi: “Xaniajai. Pepacuene Dioso netoexanaena pacuenia najumecapanepaeya jumaitsi,” itsa jamatabëjai, bajarapamonae Abrahampijinë bepexi Dioso tanetsi, apo peperabëcaucubivi atatsi. Abrahampijinë abaxë apo perabëcaucutsi atatsi, Dioso pejumecovënëtsixae, aneconijibia tanetsi. ¹² Xaniajai rabaja. Abrahampijinë bepexi Dioso tanetsi daxita pamonaē peperabëcaucubivitsi. Bajarapamonae Abrahampijinë bepexi Dioso tanetsi apo ëpeperabëcaucubijavatsi yabara. Biji rajane Abrahampijinë bepexi Dioso tanetsi tsipaji bajarapamonae ata abaxë apo perabëcaucubi atatsi, jumecovënëta pacuenia Dioso najumecapanepaeya jumaitsi.

Pacuenia tocopiapatatsi pajivi jumecovënëta pacuenia Dioso najumecapanepaeya jumaitsi petoexanaenexatsi yabara pelivaisi

¹³ Bajayata Dioso najumecapanepaeya jumaitsi Abrahampijinëjavabelia: “Carajutsianatsi daxita mapairaje nijairanexa. Nevënamuto ata, nexi, nemomoxi ata, pijairanexa,” jai Dioso Abrahampijinëjavabelia. Bajarapacuenia Dioso jumaitsi Abrahampijinëjavabelia tsipaji Dioso aneconijibia tanetsi Abrahampijinë pejumecovënëtsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinë Dioso aneconijibia tanetsi tsipaji jumecovënëta Dioso Moiséspijinëta penajumecovënëtsilivaisi,” vajajainexa. Tsipaji baja Abrahampijinë pepuatëpae, bexëa Moiséspijinë ponapona. ¹⁴ Dioso najumecapanepaeya itsa jumai tsipae perajutsinexa bajarapaira ëpamonae jumecovënëtapona Dioso Moiséspijinëta penajumecopatsilivaisi, nexata bajarapamonae, Abrahampijinë pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvënëjivi, apo jumecovënëtsicapanepe Dioso Moiséspijinëta penajumecopatsilivaisi. Bajarapamonae Dioso pejumecovënëtsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. ¹⁵ Tsipaji daxita pamonaē apo jumecovënëtsi pacuenia Dioso itoroba Moiséspijinëta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶ Dioso cajena najumecapanepaeya jumaitsi Abrahampijinëjavabelia amoneya perajutsinexa bajarapaira.

Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumait-sijavatsi Abrahampijinē pejumecovēnētsixae. Bajarapaira Dioso najumecapanepaeya ita rajutsiapaeba pamonaē jumecovēnēta Dioso Moiséspijinēta penajumecopatsilivaisi, bajara ēpamonaē itsiata apo rajutsiapaebi. Biji rajane rajutsiapaeba pamonaē ata jumecovēnēta pacuenia Dioso najumecapanepaeya jumaitsi, pacuenia bajayata Abrahampijinē jumecovēnēta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovēnētsivi, Dioso nacatane Abrahampijinē bepexitsi. ¹⁷ Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitsijava Abrahampijinējavabelia Dioso pejumelivaisibaxutota tajēvelia jumaitsi mapacueniaje: “Ayaibitsaētoخانەتو jivi bepijasalinainēmē cataeyaexanaenatsi,” jai Dioso pejumelivaisibaxutota tajēvelia Dioso pejumaitsijava Abrahampijinējavabelia vaxaitsi yabara. Dioso baja cajena icatsia piasaēyaexanaenē petēpaevimi ata. Xua picani abaxē ajibi mapanacuataje, Dioso baja exana pijumeta.

¹⁸ “Abraham raeta baja pexi apo xinae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitsicueniatsi. Evetaponapona jivi ayaibitsaētoخانەتو pamo pexanaenexatsi pacuenia Dioso najumecapanepaeya jumaitsi. ¹⁹ Bajarapamatacabi Abrahampijinē imoxo pexinae cien pavaibeje. Bajaraponē pijava Sara, mavecova. Perujuvayo baja pijinia. Pexi picani pexinaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacueneyapētae ata, itsiata jumecovēnēta Dioso pacuenia najumecapanepaeya jumaitsi petoexanaenexatsi. ²⁰ Apo jumeaebi pacuenia Dioso najumecapanepaeya jumaitsi. Bitso biji pevajānaeyabelia jamatabēcuenevetaponapona pacuenia Dioso najumecapanepaeya jumaitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso ayaijamatabēcuenenē,” jai tsabiabi. ²¹ Abrahampijinē xaniavaetsia yapētane Dioso pecaējēpaenēcuenetsi petoexanaenexatsi daxita pacuenia najumecapanepaeya jumaitsi. ²² Abrahampijinē Dioso jumecovēnēta petoexanaenexatsi pacuenia najumecapanepaeya jumaitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaitsi pacuenia Dioso

aneconijibia tanetsi Abrahampijinē pejumecovēnētsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapētaenexa Abrahampijinē pelivaisi. ²⁴ Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovēnētatsi pacuenia Dioso najumecapanepaeya jumaitsi, aneconijibia Dioso nacatane. Bajaraponē Dioso vajatuxanenē Jesucristo icatsia asaēyaexanatsi petēpaecujinae. ²⁵ Dioso athēbēvetsica itorobica Jesús vajanacasivatēpaenexa mapanacuataje. Nexata Jesús itsa nacasivatēpa, nacaneconimatamota pibisiacuene vajaexanaeneconimi. Bajaraxuacujinae Dioso icatsia asaēyaexanatsi petēpaejavavecua vajanacavecuaajibi-aexanaenexa vajaneconimi. Nexata baja Dioso aneconijibia nacatane Jesús pejamatabēcueneta.

5

Pacuenia jamatabēcuenearēya pajivi Dioso aneconijibi-atanetsi yabara pelivaisi

¹ Dioso aneconijibia nacatane vajajumecovēnētsixae pacuenia Dioso najumecapanepaeya jumaitsi. Nexata sivajamatabēcuenearēyatsi tsavanapae Dioso. Vajatuxanenē Jesucristo vajanacasivatēpaexae vajaneconi yabara, bajaraponē pejamatabēcueneta nacajamatabēcuenearēyayaexana. ² Vajajumecovēnētsixae Jesucristo vajanacasivatēpaejava, Dioso nacaitaxutotsoniataeyabiaba. Nexata Dioso sivajamatabēcuenearēyatsi. Tsipaji yapētanetsi itsamatacabi Dioso vajayajavajinavanapaejavanexa penivenivenae-nacuatatsia. ³ Mapanacuapijivi nacabejiobiaexanabiabi ata, itsiata sivajamatabēcuenearēyatsi tsabiabi. Tsipaji yapētanetsi vajanacabejiobiaexanabiabicueneta, nacajamatabēcuenesaēyaexanapona Diosojavabelia. Nexata nacajamatabēcuenecaējēpa vajanajamatabēcuenesaētsinexa, daxita pibisiacuene nacatocopiapatsi ata. ⁴ Itsa najamatabēcuenesaētatsi, nacatocopiapatsi ata pibisiacuene, Dioso pijinia nacasivabarēya. Nexata itsa yapētanetsi Dioso vajanacasivabarēyajava, nexata jamatabēcueneevetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabēcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espiritu Santo vajanacatsijamatabēcenaenexa. Nexata Espiritu Santo xaniavaetsia nacayapētaeyaexana Dioso vajanacaasivajava.

6 Vaxaitsi bitso ajamatabëcuenesaëjibitsi pibisiaja-matabëcuenevixaetsi. Acuenebi vajacuata vajanacapanepaenexa Dioso javabelia vajaneconi yajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeneconi yabara. 7 Mapanacuataje itsajivi itsa jamatabëcueneyavenona itsanë, nexata itsa beyaxuabiapaebatsi pejamatabëcueneyavenonaexae, pecajunavi baja apo jamatabëcueneyavenonae tsipae. Itsajivi meta itsiata jamatabëcueneyavenonaejitsipa, beyaxuabijitsia atatsi. Bajarapacuenia jamatabëcueneyavenonaejitsipa itsa bitso pexaniajamatabëcuenenë, ponëjavabelia jamatabëcueneyavenonaejitsia. 8 Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje. 9 Jesucristo vajanacasivatëpaexae, nexata baja maparucaeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacacapanepaejavanexa vajanacananeconitsia exanaejavanexamivecua. 10 Vaxaitsi picani Dioso pijavajabitsaëvitsi. Nexata pexënato vajanacasivatëpaexae, Dioso baja nacabarajamatabëcuenexanepana. Bajaraxuata maparucaeje yapëtanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsipaji pexënato asaë tsaponaponae vajanacatocuaicuajainënexa paxajavabelia. 11 Orijibia vaxaitsi bitso sivajamatabëcuenebarëyatsi Dioso vajanacaasivajava. Tsipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

Adánpijinë Cristo ata yabara pelivaisi

12 Copiaya caenë, Adánpijinë, pibisiacuene exana. Nexata mapanacuataje daxisajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tsipaji daxitanacuapijivi pibisiacuene exana. 13 Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumaitsijavatsi: “Pananeconitame raja Dioso javabelia,” pejaijavatsi pibisiacuene pexanaejava yabara. 14 Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponae. Bajarapamonae pibisiacuene itsa exana, itsiata Adánpijinë papibisiacuene exana,

cuenejēpaeya apo exanae. Cristo, ponē tajēvelia vajunupaebatsi pepatsijavanexatsica, Adánpijinēbeje, apo najamatabēcuenejēpaebeje. Adánpijinē pejamatabēcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabēcueneta, jivi ayaibitsaētoxaneto Dioso aneconijibia tanetsi.

¹⁵ Nexata Adánpijinē papibisiacuene exana, apo najēpaebeje papexaniacuene Dioso nacatoexana Jesucristo pejamatabēcueneta. Caenē, Adánpijinē, pibisiacuene pexanaejava pejamatabēcueneta, daxitajivi tēpaponā. Biji rajane Dioso vajanacaitaxutotsoniataejava, bitso pexaniacuene. Tsipaji Dioso athēbēvetsica itorobica vajatuxanenē Jesucristo vajanacasivatēpaenexa mapanacuataje, vajanacavecuajibi-aexanaenexa daxita vajaneconimi. Nexata bajarapacuenia caenē, Jesucristo, pexaniacuene exana pecapanepaenexa jivi ayaibitsaētoxaneto. ¹⁶ Caenē saya picani Adánpijinē. Itsiata pibisiacuene itsa exana, yacājēpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata bailsi jane Jesucristo xaniavaeta daxita xua Adánpijinē pejamatabēcueneta bijiana picani. Jesucristo pejamatabēcueneta Dioso aneconijibia tane daxita pamonaē jumecovēnēta Jesucristo pesivatēpaejavatsi pibisiacuene pexanaeneconi yabara. ¹⁷ Caenē Adánpijinē pibisiacuene pexanaexae, daxitajivi tēpaponā bajarapamonae ata pibisiacuene pexanaexae. Itsiata caenē Jesucristo vajanacasivatēpaexae, maparucaeje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamonaē jumecovēnēta Jesucristo pejamatabēcueneta Dioso aneconijibia petaejavatsi, bajarapamonae ajamatabēcuenesaē tsavanapae tsane Dioso pejumecovēnētsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenē, Adánpijinē, copiaya pibisiacuene pexanaexae. Caenē pijinia, Jesucristo, pexaniacuene pexanaexae, daxita pamonaē jumecovēnēta Jesucristo pesivatēpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonae Dioso rajutsianatsi matababi apo peverevereaejava. ¹⁹ Caenē, Adánpijinē, copiaya apo jumecovēnētsi Dioso pitorobicueniatsi. Nexata bajaraponē pejamatabēcueneta, jivi ayaibitsaētoxaneto pibisiacuene exana. Nexata icatsia bexēa caenē, Jesucristo, xaniavaetsia jumecovēnēta Dioso pitorobicueniatsi. Nexata Jesucristo pejamatabēcueneta, jivi ayaibitsaētoxaneto Dioso aneconijibia tanetsi.

²⁰ Bajayata Dioso Moiséspijinēta najumecopata jivi pejume-

covënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caējēpaetsi penajamatabēcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapētane pibisiacuene pexanaejava. Nexata jivi pevajēnaeyabelia pibisiacuene itsa exana, Dioso pijinia pevajēnaeyabelia bitso itaxutotsoniataeponatsi. ²¹ Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matacabi apo peverevereaejava vajatuxanenē Jesucristo vajanacasi-vatēpaexae.

6

Pacuenia Dioso pejumecovënëtsivi pejanajamatabēcuenē yajavajinavanapa yabara pelivaisi

¹ Itsajivi meta jamatabēcuenenavēxaniabiaya jamatabējumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajēnaeyabelia pibisiacuene exanavanapaenatsi,” jamatabējai meta tsane jamatabēcuenenavēxaniabiaya. ² Jume raja! Pētsa baja vaxaitsi pibisiacuene exanatsi pematatsēnēa. Petēpaenē baja apo najamatabēxainae pibisiacuene pexanaenexa. Bajara pijinia pacuenia vaxaitsi ata bejamatabēcuenēitsitsi pibisiacuene vajaexanaeyaniva. ³ Paxamē bepayaapētaneme pajamatabēcuenē yabara nabautisabatsi. Itsa nabautisabatsi, becaeperabēto nacaexana Jesucristojavabelia. Nexata vaxaitsi bejamatabējumaitsitsi mapacueniaje: “Jesucristo cruzata itsa tēpa, xanē ata betaneyajavatēpae cruzata,” bejamatabējajitsi. Bajarapajamatabēcuenē yabara nabautisabatsi. ⁴ Itsa Jesucristo bevajanacayajavatēpae, nexata bevajanacayajavamēthētsitsi. Nexata Jesucristo petēpaecujinae, Dioso pesaēta icatsia itsa asaēyaexanatsi, bevajanacayajavaasaēyaexanaetsi icatsia. Vaxaitsi pejanajamatabēcuenē vajayajavajinavanapaenexa, copatatsi baja vajaperujamatabēcuenēmi. Bajarapajamatabēcuenē yabara nabautisabatsi.

⁵ Becaeperabēto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatēpae. Nexata Jesucristo petēpaecujinae, Dioso icatsia itsa asaēyaexanatsi, bevajanacayajavaasaēyaexanaetsi.

⁶ Jesucristo itsa rutatsi cruzata pebeyaxuabinexatsi,

vajaperujamatabëcuenemi yajavarutatsi vajanacave-
cuaajibiaexanaenexa pibisiacuene vajanacaexanaeya
exanaejamatabëcuenemi. Bजारapacuenia vajanaca-
toexanaexae, pematatsënëa baja apo bexanaetsi
pibisiacuene. ⁷ Pacuenia baja petëpaenë pibisiacuene apo
exanae, bajara pijinia vaxaitsi ata bejamatabëcueneitsitsi
pibisiacuene vajaexanaeyaniva. ⁸ Jesucristo cruzata
bevajanacayajavatëpaexae, nexata bejamatabëjumaitsitsi
mapacueniaje: “Yajavajinavanapaenatsi Jesucristo daxi-
tamatacabijavabelianexa,” bejamatabëjaitsi. ⁹ Yapëtanetsi
vajatuxanenë Jesucristo Dioso icatsia piasaëyaexanaejavatsi
petëpaecujinae. Nexata baja icatsia Cristo pematatsënëa apo
tëpae tsane. ¹⁰ Itsa baja Cristo tëpa daxitajivi pibisiacuene
pexanaeconi yabara, caecuenia copiarutsiaya sivatëpa
daxitamatacabijavabelianexa. Nexata baja Cristo icatsia
pematatsënëa apo tëpae tsane. Biji rajane Dioso yajava
daxitamatacabijavabelianexa asaë tsaponaponae tsane
athëbëtatsia, itsajotatsia ajibi petëpaecuene. ¹¹ Nexata paxamë
panejamatabëëthëtota pajamatabëjumaitsimëre tsavanapae:
“Tajaperujamatabëcuenemi baja navecuatëpaeyabajë.
Nexata baja pibisiacuene apo exanaenë tsane. Biji
rajane asaënë baja tsaponaponae Dioso taneitorobicuenia
tatoexanabiabinexa. Tsipaji baja tajatuxanenë Jesucristo
neyajavaponapona,” pajamatabëjamëre tsavanapae.

¹² Bजारaxuata pëtsa baja panajamatabëxainabiabame
pibisiacuene paneexanaenexa panijacuata panenatojitsi-
paecuenia. ¹³ Pëtsa panacopatame daxita xua pibisiacuene
paneexanaenexa. Tsipaji paxamë bepanetëpaecujinae,
Dioso icatsia bepapecaasaëyaexanaevi. Nexata paju-
maitsimëre tsabiabi Diosojavabelia: “Tajatuxanenë,
catonucatsi majotaje. Cajamatabëcueneevetaponaponaenatsi
daxitamatacabijavabelianexa pacuenia xamë jitsipame
tacatoexanabiabinexa,” pajamëre tsabiabi Diosojavabelia.
¹⁴ Nexata pacacaëjëpaena panenajamatabëcuenesaëtsinexa
icatsia caevëalia paneexanaeyaniva papibisiacuene
panijacuata panatojitsipame. Tsipaji Dioso papecaitaxu-
totsoniataexae, Dioso pacayavenonabiabiana. Nexata baja
apo paexanavanapaemë tsane pacuenia pacaitoroba Dioso
Moiséspijinëta penajumecopatsilivaisi.

*Pacuenia itsane pajivi nacopata ëpibisiacuene pexanaejav-
abelia yabara pelivaisi*

¹⁵ Itsajivi meta jamatabëcuenenavëxaniabiaya jamatabëjumai
tsane: “Dioso vajanacaitaxutotsoniataexae, aneconijibia
necatane. Nexata baja tsiteca apo exanavanapae
tsanetsi pacuenia nacaitoroba Dioso Moiséspijinëta

penajumecopatsilivaisi. Nexata baja itaxutojema pibisiacuene exanavanapaenatsi,” jamatabējai meta tsane itsajivi jamatabēcuenenavēxaniabiaya. ¡Jume raja! Pibisiacuene apo bexanavanapaetsi. ¹⁶ Paxamē rabaja xaniavaetsia payapētaneme mapacueneje. Itsa panacopatsipame itsanē papijajivinexamē, nexata pacuenia bajaraponē pacaitorobabiaba, pajumecovēnētabiabijitsipame. Bajara pijinia paitsimē tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenia, pacuenia pacajamatabēcueneyitorobabiaba, paexanavanapaejitsipame. Nexata bajarapaneconi pejamatabēcueneta papitsipame panetēpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovēnētavanapaename Dioso, nexata pacuenia Dioso pacatojitsipa, patoexanavanapaename. ¹⁷ Bajayajebi picani panacopatame pibisiacuene paneexanavanapaenexa. Nexata pibisiacuene bepapijajivimēcuenia, pacuenia pacajamatabēcueneyitorobabiaba, ēpibisiacuene paexanavanapame. Nexata itsiata maparucaeje daxita panejamatabēcueneta pajumecovēnētavanapame baja papexaniajailivaisi itsamonae pacatsipaeba. Bajaraxuata paxamē yabara Diosojavabelia jumaitsinē tsabiabi: “Xanepana rabaja. Ayaicuenia yavenoname bajarapamonae,” janē tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabēxainame ēpexaniacuene paneexanavanapaenexa. ¹⁹ Peyapēxanepanaecuenia pacatoyaquinatsi mapalivaisije xaniavaetsia panejumeyapētaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimēcuenia pacuenia pacajamatabēcueneyitorobabiaba, ēpibisiacuene picani paexanavanapame panevajēnaeyabelia. Itsiata baja aeconoxae panajamatabēcueneyajure Diosojavabelia ēpexaniacuene paneexanavanapaenexa panevajēnaeyabelia. Bajarapacuenia Dioso pacatojitsipa paneexanavanapaenexa.

²⁰ Pamatacabi picani abaxē ēpibisiacuene paexanavanapame, Dioso papecattojitsipaecuenia apo paexanavanapaemē. Saya jamatejema pajinavanapame.

²¹ Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramē tsabiabi pibisiacuene paneexanaejava. Pamonaē tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²² Paxamē rabaja Dioso pacacapanepa pibisiacuene pa-

neexanaeneconimivecua. Bajaraxuata Diosojavabelia panajamatabëcuenerajutame baja Dioso papijajivinexamë. Nexata apo panacueratsimë tsane. Dioso papecatojitsipaecuenia pajinavanapaename. Panetëpaecujinae paxainaename matabi apo peverevereaejava. ²³ Pamona pibisiacuene pexanaevi, Dioso rajutsianatsi petëpaejavanexa, Diosovecua penaxuabinexa daxitamatabijavabelianexa. Pamona jumecovënëta vajatuxanenë Jesucristo pesivatëpaejavatsi pijaneconi yabara, bajarapamona itsamatabi Dioso amoneya rajutsianatsi matabi apo peverevereaejava.

7

Pacuenia Dioso pejumecovënëtsivi Dioso Moiséspijinëta penajumecopatsilivaisi apo bejumecovënëtsi pecapanepaenexatsi yabara pelivaisi

¹ Tajamona, payapëtaneme rabaja Dioso Moiséspijinëta penajumecopatsilivaisi. Nexata baja pijinia payapëtaneme pacuenia jivi bajarapalivaisi bejumecovënëtaavanapa itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajarapalivaisi pejumecovënëtaavanapaenexa. ² Pova baja pamona pexainaeva, acuenebi pevecuanaviatsinexa pamona, penacojiobinexa icatsia itsanëjavabelia. Tsipaji Dioso Moiséspijinëta penajumecopatsilivaisi itaveta bajarapacueni. Itsiata baitsi jane pova baja pamona vecuatëpatsi, nexata matapania tocopatatsi penacojiobinexa icatsia itsanëjavabelia itsa jitsipa penacojiobijava. ³ Pova pamona pexainaeva, itsa nacojiobijitsipa itsanëjavabelia, pamona abaxë itsa asaë tsaponaponae, nexata bajarapova ayaineconi natsiexanaejitsipa Diosojavabelia. Tsipaji pamonavecua itsanëjavabelia naperabëquenetsiatae ponaponaejitsipa. Itsiata baitsi jane baja pova baja pamona vecuatëpatsi, Dioso Moiséspijinëta penajumecopatsilivaisi apo itavetsitsi penacojiobijava itsanëjavabelia. Nexata pova baja pamona vecuatëpatsi, nacojiobi ata icatsia itsanëjavabelia, ayaineconi apo natsiexanae tsipae Diosojavabelia.

⁴ Tajamona, bajara pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, bajara pijinia pacuenia pajumecovënëtabiabame picani Dioso Moiséspijinëta penajumecopatsilivaisi papecaitorobicuenia. Jesucristo bepaneyajavatëpaexae, nexata Dioso Moiséspijinëta penajumecopatsilivaisi bepanevecuatëpae. Nexata baja icatsia apo pajumecovënëtaavanapaemë bajarapalivaisi papecaitorobicuenia. Maparucaeje Cristo baja papijajivimë, ponë icatsia Dioso asaëyaexanatsi petëpaeujinae. Cristo

icatsia Dioso bepapecayajavaasaëyaexanae pacuenia Dioso pacatojitsipa paneexanavanapaenexa. ⁵ Pamatacabi abaxë Cristo pelivaisi apo jumecovënëtsitsi, pibisiacuene exanavanapatsi vajacuata vajanatojitsipaecuenia. Nexata bajarapamatacabi itsa nacaitaveta Dioso Moiséspijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabiajinavanapatsi. ⁶ Itsiata baja maparucaeje palivaisi Dioso Moiséspijinëta najumecopata, bajarapalivaisi vajajumecovënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinëta penajumecopatsilivaisi. Jume baja cajena. Espiritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

Dioso Moiséspijinëta penajumecopatsilivaisi, pacuenia ata Pablo pibisiacuene pexanaenexa najamatabëxaina, penavajunupaebijava, yabara pelivaisi

⁷ Itsajivi meta jamatabëcuenenavëxaniabiaya jamatabëjumaitsi tsane: “Dioso Moiséspijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tsipaji Dioso Moiséspijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexainaejava,” jai. Nexata itsa apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava, itsajivi pexainaejava cobecaëbi atanë. ⁸ Dioso Moiséspijinëta penajumecopatsilivaisi, itsa nitaveta itsamonae pexainaejava tacobecaëbiyaniva, nexata caranata bitso betanitorobi tacobecaëbinexa itsamonae pexainaejava. Pamatacabi abaxë apo yapëtaenë Dioso Moiséspijinëta penajumecopatsilivaisi, apo jitsipaenë picani taexanaenexa bajarapacuene. ⁹ Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaexae, Diosovecua naxuabiaya tatëpaejavanexa picani. ¹⁰ Bajarapalivaisi Dioso najumecopata Moiséspijinëta jivi picani jamatabëcuenebarëyaya xaniavaetsia

pejinavanapaenexa. Itsiata xanë bajarapalivaisi pejamatabëcueneta apo jamatabëcuenebarëyanë. Tsipaji pibisiacuene taexanaexae, bajarapalivaisi pejamatabëcueneta yapëtaniji Diosovecua tanaxuabijavanexa picani. Nexata bitso najamatabëxainajë. ¹¹ Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecua tanaxuabinexa.

¹² Palivaisi Dioso Moiséspijinëta najumecopata, pexanialivaisi cajena. ¹³ Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tsipaji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaexae xua bajarapalivaisita itaveta, naneconitajë Diosojavabelia. Bajarapalivaisi itsa yapëtaniji, nexata tajamatabëëthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

¹⁴ Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipaecuenia exanaponaponajë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëëthëtota xainajë taneitorobabiabicuenia. ¹⁵ Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipaenë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. ¹⁶ Itsa exanabiabajë papibisiacuene picani apo jitsipaenë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. ¹⁸ Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecaëjëpabiabi pexaniacuene taexanabiabinexa. ¹⁹ Papexaniacuene

jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. ²⁰ Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tsipaji papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

²¹ Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisiajamatabëcuene xainajë, abaxë yajavaponaponajë.

²² Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujujamatabëcuene saya bepijajivitonënëcuenia toponaponajë.

²⁴ ¡Xanë bitso bejiobinë! Bajarapapibisiajamatabëcuene yabara Dioso picani nenaneconitsiaexanaeajitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. ²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecaëjëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

8

Pacuenia Espiritu Santo nacajamatabëcueneyavenona yabara pelivaisi

¹ Pamonaë baja Jesucristo yajavajinavanapa, bajarapamonaë Dioso baja apo naneconitsiaexanaetsi tsane. Bajarapamonaë penatojitsipaecuenia, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi. ² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisiajamatabëcuene picani nenaneconitsiaexanabiaba daxitamatacabijavabelianexa picani

tananeconitsiaponaponaenexa, bajarapajamatabëcuenemi Espíritu Santo baja nevecuaajibiaexana. ³ Vaxaitsi vajacuata apo nacajamatabëcuenecaējēpae vajajumecovēnētšinexa Dioso Moiséspijinēta penajumecopatsilivaisi. Bajaraxuata apo nacacaējēpae vajacuata vajanacapanepaenexa Diosojavabelia. Itsiata Dioso caējēpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabējēpa picani pibisiacuene vajaexanaevi. Bajaraponë vaxaitsi pibisiacuene vajaexanaeneconi yabara, nacasivatēpa. Nexata baja nacavecuaajibiaexana papibisi-ajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuenecaējēpaenexa pexaniacuene vajaexanaejava pacuenia Dioso Moiséspijinēta penajumecopatsilivaisi jumaitsi. Nexata nacacaējēpa vajaexanaenexa pexaniacuene. Tsipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espíritu Santo nacatojitsipa.

⁵ Pamona exanavanapa pijacuata penatojitsipaecuenia, bajarapamonae jamatabëcueneenabiabatsi ëpibisiacuene pexanaenexa. Pamona pijinia exanavanapa Espíritu Santo pejitsipaecuenia, bajarapamonae jamatabëcueneenabiabatsi Espíritu Santo pejitsipaecuenia pexanavanapaenexa. ⁶ Pamona saya exanavanapa pijacuata penatojitsipaecuenia, bajarapamonae bepejamatabëcuenetēpaevi Dioso pitabarata. Nexata Diosovecua naxuabiaya jinavanapa. Pamona pijinia exanavanapa Espíritu Santo pejitsipaecuenia, bajarapamonae jamatabëcuenebarëyaya jinavanapa Dioso pitabarata. Bajarapamonae itsamatacabi xainaenana matacabi apo pevereverecejava. ⁷ Pamona saya exanavanapa pijacuata penatojitsipaecuenia, bajarapamonae itoya Dioso. Tsipaji apo exanae pacuenia Dioso penajumecopatsilivaisi itorobatsi. Apo jamatabëcuenecaējēpaetsi pejumecovēnētšinexa bajarapalivaisi. ⁸ Pamona saya exanavanapa pijacuata penatojitsipaecuenia, bajarapamonae apo jamatabëcuenecaējēpaetsi pexanaenexa Dioso pejitsipaecuenia.

⁹ Maparucaeje paxamë apo paexanavanapaemë pacuenia panijacuata panatojitsipame. Espíritu Santo, ponë Cristo itorobica, pepacuene pacatsijamatabëca. Nexata Espíritu Santo pejitsipaecuenia, paexanavanapame. Pajivi Espíritu Santo apo tsijamatabëcaetsi, bajarapajivi Cristo apo pijajivitonë. ¹⁰ Paneperabëto tēpaena pibisiacuene paneexanaejamatabëcuene. Itsiata Cristo papijajivixaemë, nexata pepo

panejamatabëcuene athëbëtatsia jinavanapaena daxitamatabijavabelianexa. Tshipaji Dioso aneconijibia pacatane. ¹¹ Dioso asaëyaexanatsi Jesús petëpaecujinae. Nexata paxamë Espíritu Santo itsa pacatsijamatabëeca, pacuenia Jesús Dioso asaëyaexanatsi petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espíritu Santo papecatsijamatabëecaexae.

¹² Tajamonae, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja vajacuata vajanatojitsipacuenia vajaexanabiabijavami. ¹³ Tshipaji pibisiacuene itsa paexanavanapaejitsipame panijacuata panenatojitsipacuenia, nexata itsa patëpame, Diosovecua panaxuabijitsipame daxitamatabijavabelianexa. Itsiata baitsi jane Espíritu Santo papecayavenonaejamatabëcueneta itsa pacopatame panijacuata panenatojitsipacuenia pibisiacuene paneexanabiabijavami, nexata itsamatacabi paxainaename matacabi apo peververeceaeva.

¹⁴ Pamonaexanavanapa Espíritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabëjunua Espíritu Santo, Dioso pexitsi nacaexana. Saya beprijavivicueniatsi apo nacaexanae cujunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espíritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. ¹⁶ Vajajamatabëëthëtota Dioso pijaEspíritu Santo nacayapëtaeyaexana Dioso pexicuenetsi. ¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuataatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tshipaji baja yapëtanetsi itsamatacabi bitso vajajamatabëcuenebarëyajavanexa Dioso pijanacuataatsia. ¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajumecovënëtsivi, Dioso baja

nacajamatabëcuenexaniavaeta. ²⁰ Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava. ²¹ Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. ²² Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsipaji xaina piavitaneuene, petëpaecuene ata. Nexata abaxë tsitecapona bajarapabejiobicuene mapamatacabijavaberena ataje. ²³ Daxita xua tanetsi mapanacuataje, bajaraëxua bajarapacuenia apo bejiobi piavitaneuene yabara. Vaxaitsi ata cajena bejiobitsi tsavanapae. Espíritu Santo vajanacatsijamatabëecaexae, yapëtanetsi mapacueneje. Dioso pexixaetsi itsamatacabi nacaperabëithianaena pacuenia Cristo perabëithianatsi. Nexata bitso jitsipatsi vajajamatabëëthëtovetsina Dioso vajanacaperabëithianaenexa vajaperabëevererecaejavavecua. ²⁴ Jumecovënëtatsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëithianaejavanexa. Bajarapacuenie nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapaetsi tsipae vajanacarajutsinexa. Tsipaji baja ajibi tsipae vajayabaracopiaevetavanapaejava itsa baja nacarajutsipa. ²⁵ Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajaajamatabëcuenesaëjibixae, Espíritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espíritu Santo bëpënëa bitso nacasivanajamatabëxainaeya ncatovajëtabiaba asaëyata Diosojavabelia. Xua apo vënëjonecapanepaetsi, Espíritu Santo ncatovajëtabiaba. ²⁷ Dioso cajena vajanacajamatabëcueneyapëtaenë pacuenia najamatabëxainatsi. Nexata Dioso yapëtane xua Espíritu Santo

nacatovajëtsijitsia. Tsipaji Dioso vajanacatojitsipaecuena, Espiritu Santo nacatovajëtabiaba Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene to-copiapatsi atatsi, bejamatabëcuenematatoxeneta daxita bajara-papibisiacuene Jesucristo peyavenonabiabixaetsi yabara pelivaisi

²⁸ Yapëtanetsi mapacueneye. Daxita xua apo vajajitsipaecuene, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcuenejëtsinexa. Nexata bajaraxua itsa nacajamatabëcuenejëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcuenejëtsijava pejamatabëcueneta vajanacajamatabëcuene asaëyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina.

²⁹ Vajanaexanaevajënaeya ata, Dioso yapëtane pexitsi vajanacaexanaejavanexa. Nexata vajanaexanaevajënaeya ata, Dioso nacasivanajamatabëcuenevereta vajanacaexanaenexa pacuenia pexënato jamatabëcueneitsi. Nexata vajanaexanaevajënaeya ata, Dioso nacasivanajamatabëcuenevereta Dioso pexënato pejuyapijivitsi ayaibitsaëtotsi vajanacaexanaenexa.

³⁰ Bajarapacuenia vajanaexanaevajënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuaajibiaexana pibisiacuene vajaexanaeneconimi. Nexata baja aneconijibia Dioso nacatane. Nexata itsamatacabi Dioso yajavajinavana-paenatsi Dioso pijapenivenivenaenacuatatsia.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonaenë. Nexata itsajivi ata apo caëjëpaetsi vajanacajamatabëcuene matatoxenetsinexa,” bejaitsi. ³² Dioso baja cajena apo nacavecuaasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsi-javanexa daxita vajanamatavenonaecuene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caëjëpaetsi vajanacaneconitsinexa Diosojavabelia pibisiacuene vajaexanaejava yabara. ³⁴ Itsajivi ata cajena apo caëjëpaetsi vajanacaneconitsiaexanaenexa

pibisiacuene vajaexanaejava yabara. Tspaji baja capanepaeya Jesucristo nacasivatëpa vajanacaneconimatamotsinexa. Nexata Cristo petëpaecujinae Dioso icatsia asaëyaexanatsi. Maparucaeje Jesucristo eca athëbëtatsia, Dioso pemuxuneneta, pecujanenia. Cristo pijajivitsi Diosojavabelia nacayajivicuaicuaijai. ³⁵ Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecucopiarucaeyaexanaenexa. Nacabejiobiaexanae ata tsipae, piayapëbejecuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. ³⁶ Vaxaitsi yabara mapajamatabëcuenelivaisi jëpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaitsi mapacueniaje:

Xamë Diosomë, panijajivixaenë, daxitamatacabi itsamonae
 jamatabëpanebejejababiaba picani. Pacuenia
 oveja pebeyaxuabinexa capona, bajarapacuenia
 jamatabëpaneexanabiaba,
 jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. ³⁷ Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene matatoxenetabiabianatsi. Tspaji Cristo vajanacaasivanë, nacayavenonabiabiana. ³⁸ Nexata yapëtaniji mapacuenije. Itsacuenejavayo ata apo caëjëpaetsi Cristo vajanacaasivacuene vajanacavecucopiarucaeya exanaenexa. Vajatëpaecuene ata, vajaasaëtsavanapaecuene ata, ángelevi ata, dovathivi penamatacatorobivi ata, apo caëjëpaetsi Cristo vajanacaasivacuene vajanacavecucopiarucaeya exanaenexa. Piayapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecucopiarucaeya exanaenexa. ³⁹ Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecucopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene

vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

9

Pacuenia Dioso pijajivinexa itapeta judíovi yabara pelivaisi

¹ Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo tajamatabëëthëtota neyapëtaeyaexana. ² Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasi-vanajamatabëxainaejava bajarapamonae. ³ Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi,” jamatabëjanë belia tavëna judíovi yabara. ⁴ Bajarapamonae judíovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecovënëtavanapaenexa. Dioso picani itorobanua bajarapamonaemi pexanaenexa templobo, bajarapabota pevajëcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenënexatsi pibisiacuene pexanaeconimivecua. ⁵ Bajarapamonaemi pijasalinaivimi, pevënëjonevimi Dioso pejumecovënëtsijava. Cristo itsa naexana mapanacuataje, judíonëcuenia naexana. Cristo nexata pijamonae judíovi. Bajaraponë Cristo, Diosonë baja cajena, daxitacuene pevetsinë. Nexata bajaraponëjavabelia jivi jumai tsabiabi tsane: “Xamë Cristomë, bitso baja cajena ayaijamatabëcuenenëmë,” jai tsabiabi tsane daxitamatacabijavabelianexa. Bajara itsi tsane.

⁶ Itsiata daxita judíovi apo jumecovënëtsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso

najumecapanepaeya jumaitsi. Nexata Dioso yabara vaxaitsi jamatabëcuenenavëxaniabiaya apo bejumaitsitsi mapacueniaje: “Pacuenia Dioso najumecapanepaeya jumaitsi judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia,” apo bejaitsi vaxaitsi jamatabëcuenenavëxaniabiaya Dioso yabara. Bajarpacuenia Dioso yabara vaxaitsi jamatabëcuenenavëxaniabiaya apo bejumaitsitsi. Tsipaji Dioso tajëvelia apo itapetsi daxita judíovi pijajivinexa. Bajaraxuata pacuenia Dioso tajëvelia najumecapanepaeya jumaitsi, apo toexanae daxita judíovijavabelia. ⁷ Tsipaji bajayata Abrahampijinë pemomoxi ayaibitsaëto xainae ata, daxita itsiata Dioso apo totaetsi Abrahampijinë pepo pemomoxicuenia. Dioso tajëvelia jumaitsi Abrahampijinëjavabelia mapacueniaje: “Anijanëbeje nexënatobeje xainae atamë tsane, taitapetsinëxae, caenë nexënato, Isaac, pexi catotaenatsi pepo nemomoxicuenia,” jai Dioso. ⁸ Bajaraxuata yapëtanetsi mapacuenieje. Pajivi naexanae ata Abrahampijinë pemomoxiyajuvënëjivi, itsiata bajarapajivi Dioso apo taetsi Abrahampijinë pepo pemomojivicuenia. Matapania pajivi jumecovënëta pacuenia Dioso najumecapanepaeya jumaitsi, bajarapajivi jane baja Abrahampijinë pepo pemomojivicuenia tanetsi Dioso. ⁹ Dioso tajëvelia najumecapanepaeya jumaitsi Abrahampijinëjavabelia mapacueniaje: “Icatsia caevaicujinae patsianajë. Nexata nijava, Sara, xainaena pexënatonacueto,” jai Dioso Abrahampijinëjavabelia Isaacpijinënexa yabara.

¹⁰ Nexata jane baja xuacujinae Isaacpijinë naexana. Bajaraxuacujinae icatsia bexëa Isaacpijinë baja pepuanacujibi, Dioso icatsia tajëvelia jumaitsi vajasalinainë Isaacpijinë pijava Rebecapijivajavabelia, Rebecapijiva baja pepuayacotaponaponae sapalanëbejenexa. ¹¹⁻¹³ Itsa abaxë bajaraponëbeje apo naexanaebeje, pexaniacuene ata abaxë itsa apo exanaebeje, pibisiacuene ata abaxë itsa apo exanaebeje, bajarapamatacabi Dioso tajëvelia jumaitsi Rebecapijivajavabelia mapacueniaje: “Panacuetonëyo copiaya cavecuaanaexanaena, bajaraponëyo jamatabëcueneevetsiana pejuyapijinë pitorobabiabinexatsi pijajivitonëcuenia,” jai Dioso tajëvelia Rebecapijivajavabelia. Bajarapacuenia Dioso pejumaitsijava Rebecapijivajavabelia najumejëpabeje pacuenia jumaitsi Dioso pejumelivaisibaxutota. Rebecapijiva pexënatobeje yabara Dioso pejumelivaisibaxutota jumaitsi mapacueniaje: “Asivanë juyapijinë Jacob, matapijinë Esaú matatoxenetsia,” jai Dioso pejumelivaisibaxutota Dioso pejumaitsijava. Nexata bajaraponëbeje tocopiapatatsibeje pacuenia Dioso

tajëvelia jumaitsi pacuenia Dioso itapetsijitsiatsi juyapijinë. Baitsi Jacob Dioso pijajivitonënexa itapetatsi matapijinëvecua. Nexata bajarapacuenia yapëtanetsi mapacueneje. Dioso cajena baitapeta pajivi jamatabëitapeta pijajivitonënexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajëvelia itapeta juyapijinë matapijinëvecua penaexanaevajënaeyabeje ata cajena.

¹⁴ Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitsitsi mapacueniaje: “Dioso baja pacuenia exana, apo xanepanae,” apo bejaitsi vaxaitsi. ¹⁵ Tsipaji cajena Dioso bajayata jumaitsi Moiséspijinëjavabelia: “Pajivi jamatabëitaxutotsoniataniji, itaxutotsoniataenajë,” jai Dioso. ¹⁶ Nexata pajivi Dioso jamatabëitaxutotsoniatane, itaxutotsoniatane. Nexata itsajivi apo jamatabëjumaisi ata: “Jitsipajë xanë Dioso taneitaxutotsoniataejava,” apo jamatabëjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejisipaecuenia apo exanabiabi ata, itsiata Dioso itaxutotsoniatanetsi. ¹⁷ Palivaisi bajayata Dioso jumaitsi Egiptonacua pevetsinëjavabelia, bajarapalivaisi Dioso pejumelivaisibaxutota ruca. Jumai tsarucæ mapacueniaje: “Xanë catocopatatsi nevetsinexa nijaira. Pinijicuene taexanaejava exanaenajë paxamë tuatuajëta. Itsiata baitsi jane apo nejumecovënëtsimë tsane. Nexata daxita nacuapijivi neyapëtaena tasaënëcuene,” jai tsarucæ Dioso pejumelivaisibaxutota Egiptonacua pevetsinëjavabelia Dioso pejumaisijava. ¹⁸ Nexata pajivi Dioso jamatabëitaxutotsoniatane, itaxutotsoniatane. Pajivi pijinia Dioso jamatabëjamatabëcuenetajayaexana pejumecovënëtsiyanivatsi, ajamatabëcuenetajayaexana.

¹⁹ Nexata meta Dioso yabara pajumaitsimë tsane: “Bajarapacuenia Dioso jivi itsa ajamatabëcuenetajayaexana pejumecovënëtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovënëtsi Dioso piagamatabëcuenetajaya exanaexaetsi” pajamë meta tsane Dioso yabara. ²⁰ Tajamonæ, pëtsa bajarapacuenia pajumaitsimë. Dioso yabara cajena bajarapacuenia apo bepajumaitsimë. Tsipaji Dioso pacaexana. Canalito itsa caëjëpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaitsi tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia. ²¹ Tsipaji atsananitota canalito pefaratsiva caëjëpatsi canalito pefaratsinexa pacuenia jamatabëfarata. Nexata caëjëpatsi pefaratsinexa copiaya pexaniacanalito bo tuatuajëta itabëtsiaya peetsinexa. Bajaraxuacujinae bajara paat-

sananitoyajuvënëjavata caējēpatsi pefaratsinexa itsacanalito, beveliacanalito, pecajayababiabinexa saya.

22 Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabēnaneconitsiaexana daxita pamonaē naneconita bajaraponējavabelia. Jamatabēsitajētānua pesaē bajarapamonaējavabelia. Itsiata baitsi jane abaxē bajayajebi Dioso najamatabēcuenecataita peverebiabivijavabelianexa. 23 Biji rajane pamonaē Dioso jamatabēcapanepa, bajarapamonaē capanepaena. Bajarapacuenia Dioso jamatabēcexana vaxaitsi vajanacaitaxutotsoniataevijavaberena, vajanacatsitanajamatabēcuenē itajētsinexa ayaijamatabēcuenē pexainaejava. Tsipaji baja cajena vajanaexanaevajēnaeya ata, Dioso nacaitapeta vajayajavajinavanapaenexa athēbētatsia.

24 Vaxaitsi judíoviyajuvënëvitsi. Itsamonae vaxaitsiyajuvënëvi apo judíovi. Itsiata Dioso nacajunata daxitatsi pijajivinexatsi.

25 Dioso pejumelivaisibaxutota, bajayata Oseaspijinē peyaquinaebaxutota, Dioso pejumaitsijava apo judíovi yabara, tajēvelia jumaitsi mapacueniaje:

Pamonaē picani apo tajajivi, bajarapamonaē yabara jumaitsinē tsane: “Tajajivi raja mapamonaēje,” janē tsane. Bajarapamonaē picani apo jitsipaenē.

Itsiata bajarapamonaē yabara jumaitsinē tsane: “Tajajivi raja mapamonaēje, tasivavi,” janē tsane.

26 Panacuapijivijavabelia picani jumaitsinē tsane: “Paxamē raja apo patajajivimē,” janē tsane picani, itsiata bajarapanacuapijivi bexēa nejumecovēnētsiana. Nexata bajarapanacuapijivi yabara itsamonae jumai tsane: “Mara pamonaēje Dioso piasaētsaponaponaenē pexije,” jai tsane,

jai Oseaspijinē bajayata peyaquinaebaxutota, pamonaē apo judíovi ata, Dioso pijajivi pexanaejavanexatsi yabara.

27 Isaíaspijinē pijinia bajayata tajēvelia judíovi yabara jumaitsi mapacueniaje: “Israelpijinē pemomoxi bitso ayaibitsaētoخانeto tsane. Pacuenia manuamenepijitajetaboatsapērē itsi, bajara itsane. Itsiata baitsi jane bajarapamonaeyajuvënëvi, caejiviyobeje saya, Dioso capanepaenatsi. 28 Daxita pamonaē naneconita Diosojavabelia, bajarapamonaē naxanitsiayo Dioso naneconitsiaexanaena,” jai Isaíaspijinē peyaquinaebaxutota.

29 Itsabaxutota pijinia Isaíaspijinē peyaquinaebaxutota, icatsia jumaitsi mapacueniaje:

Dioso raja ángelevi ayaibitsaētoخانeto penamatacaitorobinē. Bajaraponē Dioso itsa apo nacaitaxutotsoniatae tsipae, nexata daxitatsi vaxaitsi, Israelpijinē pemomoxitsi,

nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isaíaspijinë peyaquinaebaxutota.

Pacuenia judíovi apo jumecovënëtsi pexanialivaisi jivi pecapanepaelivaisinexatsi yabara pelivaisi

³⁰ Vaxaitsi yapëtanetsi mapacueneje. Apo judíovi picani apo jumecovënëtsi ata Dioso aneconijibia petaenexatsi, itsiata Dioso aneconijibia tanetsi, pejumecovënëtsixae Jesucristo pesivatëpaejavatsi pibisiacuene pexanaeneconi yabara. ³¹ Itsiata baitsi jane judíovi jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caëjëpaetsi pejumecovënëtsicapanepaenexa bajarapalivaisi. ³² Apo caëjëpaetsi Dioso aneconijibia petaenexatsi. Tsipaji judíovi apo jumecovënëtsi Jesucristo pesivatëpaejavatsi pibisiacuene pexanaeneconi yabara. Biji rajane jamatabëcuenenavëxaniabiaya jumai tsabiabi. “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijavanapa, Cristo Dioso athëbëvetsica pitorobijavatsitsica, apo pejumecovënëtsixae. Caranata saya anaepanabiaba bajarapalivaisi yabara. ³³ Dioso tajëvelia Cristo yabara pejumaitsijava, Dioso pejumelivaisibaxutota jumaitsi mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane,

jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

10

¹ Tajamonae, jitsipajë bitso tajamatabëëthëtovetsina judíovi Dioso pecapanepaenexatsi. Bajaraxuata tovajëtabiabajë Diosojavelia. ² Judíovi picani Dioso ayaicuenia bitso jamatabëtonacuenebabiaba Dioso pesivabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavanapaenexa. Judíovi saya jamatabëcuenenavëxaniababiaba. ³ Bajarapamonae

apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënëtavapanaenatsi Dioso Moiséspijinëta pena-jumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi. ⁴ Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bajaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

⁵ Pamonaе jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaitsi mapacueniaje: “Pajivi jumecovënëtsicapaneпаena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinë bajayata peyaquinaelivaisita. ⁶ Nexata baja pamonaе jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaitsi mapacueniaje: “Pëtsa pajamatabëjumaitsimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. ⁷ Pëtsa pajamatabëjumaitsimënuа: ‘¿Jipatsa meta ponaena, itsabereca petëpaevi jinavanapa, piасаëyaexanaenexa petëpaevivecua vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tsipaji baja Cristo athëbëvetsica patsica vajanacasivatëpaenexa mapanacuataje. Petëpaecujinae ata baja icatsia Cristo asaë petëpaejavavecua vajanacacapanepaenexa. ⁸ Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaicuajiamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi pane-jumecovënëtsinexa Cristo papecasivatëpaejava pibisiacuene paneexanaeneconi yabara. ⁹ Itsamatacabi Diosojavabelia papecacapanepaevi tsane itsa paexanavanapaenename mapacueniaje. Panavajunupaebabiabare itsamonaеjavabelia panejumecovënëtsijava Jesús Dioso pexënatocuene.

Pajumecovënërenua panejamatabëëthëtojavavetsina Jesús petëpaecujinae icatsia Dioso piasaëyaexanaejavatsi. ¹⁰ Tsipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneonijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

¹¹ Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. ¹² Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonae vajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jit-sipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jume-

covënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjava. Nexata baja Dioso pejumelivaisi yacaëjëpa daxitanacuanëjava, jai Dioso pejumelivaisibaxutota.

¹⁹ Judíovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jume-covënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitzijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbiaanaepanaename, jai Moiséspijinë bajayata peyaquinaebaxutota Dioso tajëvelia pejumaitzijava judíovijavabelia.

²⁰ Isaíaspijinë ata bajayata ajumejunavijibia jumaitsi Dioso tajëvelia pejumaitzijava. Apo judíovi yabara Dioso pejumaitzijava, Isaíaspijinë jumaitsi mapacueniaje:

“Pamonae picani apo nejitsipae, apo nejumecovënëtsinua, bajarapamonae itsiata itsamatacabi nejumecovënëtsiana. Nexata baja neyapëtaena. Bajarapamonae apo nevënëlvivaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia, jai bajayata Isaíaspijinë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata.

²¹ Biji rajane judíovi yabara Dioso pejumaitzijava, Isaíaspijinë bajayata jumaitsi mapacueniaje: “Daxitamatacabi junatabi-abajë pamonae apo nejumecovënëtsi. Bajarapamonae apo exanae taitorobicuenia,” jai bajayata Isaíaspijinë Dioso pejumaitzijava judíovi yabara. Nexata nayapëtane mapacueneje. Judíovi junatsi atatsi Dioso, itsiata apo jumecovënëtsi Dioso pecapanepaenexatsi.

11

Pacuenia judíovi, Israel nacuapijiviyajuvënëvi, Dioso capanepaejitsiatsi yabara pelivaisi

¹ ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë

ata raja judíonënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënë. ² Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapëtaneme rabaja pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje: ³ “Tajatuxanenë, mapamonaeje, Israel nacuapijivi, cato-bepona daxita pecajumelivaisipaebivimi profetavi. Toxobabianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebeyaxuaba,” jai pina profeta Elíaspijinë Diosojavabelia Israel nacuapijivi yabara. ⁴ Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamonae xaniavaetia nejumecovënëtavanapa. Pematabacabëta apo tonubenae penavajëcaenexa Baalvënë, jumapecaetaeya pexanaenëtsi, pitabarata,” jai pina Dioso bajayata profeta Elíaspijinëjavabelia. ⁵ Bajara pijinia itsi maparuae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi ëpexaniacuene Dioso petoexanavanapaejava yabara, nexata saya bajarapamonae Dioso itapetsipatsi ëpexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovënëtsivi. Bajarapamonae apo jumecovënëtsi Dioso pecapanepaejavanexatsi. Itsiata baitsi jane bajarapamonaejajuvënëvi, caejiviyobeje, Dioso itapetatsi pijajivinexa. Bajarapamonae jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovënëtsi bajarapalivaisi. Tsipaji jamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebiabiabi ata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. ⁹ Israel nacuapijivi,

Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba, jamatabëcuenenavëxaniabiaya jamatabëjumai tsabiabi: “Dioso cajena nacasivabarëya. Bajaraxuata ayaijava vajaxainaejava xainatsi,” jamatabëjai tsabiabi. Itsiata baitsi jane pebarëyajavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. ¹⁰ Bजारapamonae apo yapëtae pijaneconi peyajavajinavanapaejava daxitamatacabi. Pacuenia bitso piarevejava pecaponaevi, nabëxëtsutsiaya bacapona, bajara itsi bajarapamonae pejamatabëëthëtota pijaneconi yabara. Bitso yanajamatabëxaina pijaneconi, jai bajayata Davidpijinë Israel nacuapijivi, Dioso apo pejumecovënëtsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia. ¹² Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bजारapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumaitsinë: “Dioso cajena netocopata ayaijamatabëcuene pexainaelivaisi jivi tatsipaebaponaenexa,”

jamatabējanē. ¹⁴ Bajarapacuenia Dioso pejumelivaisi pacatsipaebaponatsi tsipaji jitsipajē tajaviriavi ata, judíovi, Dioso petoexanaenexatsi pacuenia paxamē ata Dioso pacatoexana papecacapanepaenexa. Nexata meta bajarapacuenia judíoviyajuvēnēvi ata jumecovēnētsiana Cristo pelivaisi pecapanepaenexatsi Diosojavabelia. ¹⁵ Judíoviyajuvēnēvi Cristo navecuaitaveta. Nexata juya pamonaē apo judíovi, Dioso barajamatabēcuenexanepanaeyatane. Pamatacabi judíovi jumecovēnētsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetēpaevi Dioso tanetsi apo pejumecovēnētsixae Cristo pelivaisi. Nexata pamatacabi judíovi jumecovēnētsiana Cristo pelivaisi, Dioso taenatsi petēpaecujinae bepiasaēyaexanaevitsi. ¹⁶ Panbē jivi ofrendacuenia itsa rajuta Diosojavabelia, copiaya pexanaepanbē barajuta. Nexata bajarapapanmatabēta cotocaevi pexanaepan ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxērananē ata Dioso pijamaxērananēcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuenia tane.

¹⁷ Dioso tane judíovi, beolivonaemaxērananē. Olivonaenē pexainaenē, pepo olivonaemaxērananē caucuba juya saicayaviria olivonaemaxēranaxi perubinexa bajarapacovēta. Nexata pepo olivonaē ēnētuatuajēpijimera junua bajarapamaxēranaxi ēnētuatuajējava pejuvarubenaenexa pepo olivonaemaxēranajavaberena. Bajara pijinia pacuenia Dioso pacatoexana paxamē apo pajudíovimē. Judíovi apo pejumecovēnētsixae Cristo pelivaisi, paxamē juya, apo pajudíovimē, Dioso papijajivimē pacaexana. ¹⁸ “Judíovivecua Dioso papijajivinē paneexana. Nexata paayajamatabēcuenevinē judíovivecua,” pajamē pētsa. Tsipaji payapētaneme mapacueneje. Naejava, petabunepe pejamatabēcueneta, xaniavaetsia nuca. Pemaxērana pejamatabēcueneta, xaniavaetsia apo nucae. Bajara pijinia paxamē ata paitsimē. Apo pacacājēpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovēnētsi Cristo pelivaisi. Nexata judíovi apo pejumecovēnētsixae, Cristo pelivaisi juya paxamē Dioso pacaitaxutotsoniatane. Nexata pacatocopata Cristo pelivaisi panejumecovēnētsinexa Dioso papecacapanepaenexa panijaneconivecua.

¹⁹ Nexata meta pajumaitsimē: “Pacuenia olivonaenē

pexainaenē, olivonaemaxērananē caucuba, bajarapacovēta juya perubinexa itsaviriaolivonaemaxēranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi,” pajamē meta. ²⁰ Pacuenia olivonaenē pexainaenē, pibisiamaxērana caucuta, bajara pijinia itsi Dioso. Dioso navecuatsata judíovi apo pejumecovēnētsixae Cristo pelivaisi. Pacuenia olivonaenē pexainaenē, pecaucutsimaxērana pecovēta juya itsaviriaolivonaemaxērana ruta, bajara pijinia pacuenia paxamē ata judíovi pejamatabēcuenemi, pacapita Dioso papijajivinexamē panejumecovēnētsixae Cristo pelivaisi. Bajaraxuata pētsa panataneme paayaijamatabēcuenemimē. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovēnētsijava. ²¹ Pacuenia olivonaenē pexainaenē, pibisiamaxērana bacaucuta, bajara pijinia pacuenia Dioso judíovi navecuatsata apo pejumecovēnētsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovēnētsixae, Dioso navecuatsata pitapetsivimi ata. Nexata bajarapacuenia paxamē ata Dioso pacanavecuatsatsipa panevajēnaeyabelia itsa apo pajumecovēnētavanapaemē tsipae Cristo pelivaisi. ²² Bajaraxuata pacanaējēre mapacuejeje. Dioso bitso papecaitaxutotsoniataexae, pacatocopata Cristo pelivaisi panejumecovēnētsinexa. Pacanaējērenua mapacuejeje. Apo pejumecovēnētsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaē apo jumecovēnētsi Cristo pelivaisi. Itsiata paxamējavabelia Dioso pacaitaxutotsoniatane. Nexata panevajēnaeyabelia tsiteca Dioso pajumecovēnētavanapare. Itsa pacopabijitsipame Dioso panejumecovēnētsijava, nexata pacuenia olivonaenē pexainaenē, pibisiamaxērana bacaucuta pexuabinexa, bajara pijinia pacuenia paxamē ata Dioso pacanavecuaxuabijitsipa. ²³ Judíovi Dioso pejumeaebijava itsa copatsiana, nexata jumecovēnētsiana Cristo pesivatēpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenē pexainaenē, pecaucutsimaxēranami icatsia caevēarena pecovēta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxērana ruta pepo olivonaemaxēranacovēta, bajarapacovēta pejuvarucaenexa, bajara pijinia pacuenia Dioso pacapita paxamē apo pajudíovi atamē Dioso papijajivinexamē. Paxamē apo pajudíoviriavi atamē, itsiata Dioso pacapita papijajivinexamē. Judíovi biji

toyapëxanepanatsi icatsia pepitsinexatsi Dioso pijajivinexa. Tsipaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

²⁵ Tajamonae, panejamatabëjumaitsiyaniva mapacueniaje: “Vaxaitsi bitso vajayapëtaevi,” panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja.

Nexata bajarapamonae apo jumecovënëtsi Cristo pelivaisi. Nexata ayaibitsaëtoxaneto apo judíovi, itsa jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi.

²⁶ Nexata daxita pamonaе judíovi, itsamatacabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxitajivi pecapanepaenënexa. Bajaraponë daxita judíovi, pamonaе Israelpijinë pemomoxi, vecuaajibiaexanaena pibisiacuene pexanaeconimi.

²⁷ Itsa bajaraponë vecuaajibiaexanaena pibisiacuene pexanaeconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonae pijasalinaivimijavabelia,

jai tajëvelia Dioso pejumelivaisibaxutota Dioso pejumaitsi-
java judíovi pecapanepaejavanexa Cristo pejamatabëcueneta.

²⁸ Judíoviyajuvënëvi Dioso pijavajabitsaë naexana. Tsi-
paji apo jumecovënëtsi Cristo pelivaisi pecapanepaenexatsi
Diosojavabelia. Itsiata abaxë tsiteca Dioso asiva judíovi.

Tsipaji bajayata copiata Dioso itapeta bajarapamonae pi-
jasalinaivimi pijajivinexa.

²⁹ Xua Dioso rajuta judíovijavabelia, apo vecuacnaviatsi. Pamonaе pijinia Dioso junata pija-
jivinexa, apo navecuaxuabi tsane. Nexata itsamatacabi ba-
jarapamonae Dioso athëbëtatsia yajavaecaena daxitamata-
cabijavabelianexa.

³⁰ Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pe-
livaisi, nexata apo pajudíovi atamë, Dioso pacaitaxutotso-
niatane. Papijajivimë baja pacaexana.

³¹ Bajara pijinia pacuenia itsane judíovi ata. Maparucaeje abaxë judíovi apo jumecovënëtsi Cristo pelivaisi. Itsiata itsamatacabijavabelia
judíovi ata Dioso itaxutotsoniataenatsi pacuenia paxamë ata
Dioso pacaitaxutotsoniatane.

³² Dioso tocopata daxitajivi pijacuata penatojitsipaecuenia pexanavanapaenexa Dioso

pitorobicueniatsi apo pejumecovënëtsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonae.

³³ ¡Dioso baja cajena pitaxutotsoniataenë daxitajivi pecapanepaenexa! ¡Dioso cajena bitso peyapëtaenë! ¡Daxitalivaisi bitso pejumeyapëtaenënu! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneypëtaetsi. ³⁴ Dioso pejumelivaisibaxutota jumaitsi mapacueniaje. “Vaxaitsi apo jamatabëcueneypëtaetsi xua najamatabëxaina Dioso. Apo nacacaëjëpaenua vajamuxujiobinexa ata. ³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. ³⁶ Tsipaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomë, bitso ayaijamatabëcuenenëmë!” bejaitsi tsabiabi daxitamatacabijavabelianexa. Bajara itsi tsane.

12

Pacuenia Dioso pejumecovënëtsinë benajamatabëcuenerajuta Diosojavabelia pijajivitonënexa daxitamatacabijavabelianexa yabara pelivaisi

¹ Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. ² Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuene copare Diosojavabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

3 Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumait-sitsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayaijamatabëcuenevimë bitso. Biji rajane pacaejivimë canacujitsia, xuavajëto Dioso pacajamatabëcuene caëjëpaeyaexanapona paneexanabi-abinexa panenajamatabëcuenecopatsixae Diosojavabelia, bajarapacuenia saya baja panataema. 4 Jivi itsa naexana, yajavanaexana peperabëto, caeperabëtoreca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. 5 Bajara pijinia pacuenia vaxaitsi ata itsitsi, Jesucristojavabelia vajanajamatabëcuenecopatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabiansi.

6 Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabi-abinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa naca-jamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaebabiabatsi xaniavaetsia pacuenia nacajamatabëcuene caëjëpaeyaexana. 7 Itsa pijinia Dioso nacajamatabëcuene caëjëpaeyaexana vajayavenonabi-abinexa itsamonae Dioso pejumecovënëtsivi, nexata xani-avaetsia beyavenonabiabatsi Dioso pejumecovënëtsivi. Pa-jivi pijinia Dioso jamatabëcuene caëjëpaeyaexanatsi Dioso pe-jumelivaisi jivi petsipaebabiabinexa, xaniavaetsia betsipae-babiaba daxita pejamatabëcuenesaëta. 8 Pajivi pijinia Dioso jamatabëcuene caëjëpaeyaexanatsi itsamonae pemuxujioba-biabinexa pejamatabëcueneasaëyaexanaenexa Dioso pejume-covënëtsijava, bajarapajivi bemuxujiobabiaba xaniavaetsia bajarapamonaejavabelia. Pajivi pijinia rajutabiaba pex-ainaeyajuvënëjjava bepejiobivijavabelia, berajutabiaba itsa-jamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pi-jinia yavenonabiaba piavitanevi, pamonae ata bitso naja-matabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

9 Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. 10 Pacuenia nacaenapijivi bitso nasiva, bajarapacuenia panaasivamëre tsavanapae Cristo papijajivixaemë.

Itsamonae Dioso pejumecovënëtsivi, patojitsipare itsamonae petaenexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

11 Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

12 Pasivabarëyamëre tsavanapae. Tsipaji rabaja payapëtaneme itsamatacabi panexainaejavanexa matacabi apo peverevereaejava. Itsamonae itsa pacabejiobiaexana Cristo papijajivixaemë, bajayajebi ata, pëtsa pacopatame. Daxitamatacabi pavajëtabiabare Diosojavabelia pacopatsinejevamë.

13 Itsajota Dioso pejumecovënëtsivi namatavenona, payavenonabiabare. Pamonaе pacasivaxaina panijaboy- aberena, xaniavaetsia pacopiapitabiabare.

14 Pamonaе pibisiacuene pacaexana, patovajëtabiabare Diosojavabelia Dioso peyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

15 Pamonaе barëya petocopiapatsixaetsi pexaniacuene, bajarapamonaе paxamë ata pajamatabëcueneyavenonaeya barëyamëre. Pamonaе pijinia nua petocopiapatsixaetsi apo pejitsipaecuene, bajarapamonaе paxamë ata pajamatabëcueneyavenonaeyanuema.

16 Najamatabëcuenejëpaeya pajinavanapare. Pëtsa panataneme paayaijamatabëcuenevimë. Pamonaе beeveliajamatabëcuenevi ata, xaniavaetsia pataema. Xaniavaetsia payajavajinavanaparena. “Xanë bitso tayapëtaenë itsamonae matatoxenetsia,” pajamatabëjamë pëtsa.

17 Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi. 18 Xua Dioso pacajamatabëcuenecajëjpaeyaexana paneexanaenexa, bajaraxua paexanabiabare xaniavaetsia panejinavana-paenexa, daxitajivijavabelia itsacuene paexanaenejevamë.

19 Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonaе Dioso penaneconitsiaexanaenexatsi. Tsipaji Dioso pejumaitsijava, Dioso pejumelivaisibaxutota jumaitsi mapacueniaje: “Pamonaе pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota. 20 Dioso pejumelivaisibaxutota

itsabaxutota pijinia jumaitsi mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivais-ibaxutota. ²¹ Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaiejitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuene caeviaexanaename.

13

¹ Daxita pamonaе gobierno pijajivi, papecayanacuaevetsivi, pacuenia bajarapamonaе pacaitoroba, xaniavaetsia pajumecovënëtabiabarë. Tsipaji bajarapamonaе, caenë canacujitsia, Dioso pejamatabëcueneta pacayanacuaeveta. Daxita pamonaе nacua pevetsivi, pacaeveta Dioso petocopatsixaetsi. ² Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamonaе apo jumecovënëtsi, nexata bajarapamonaе Dioso naneconitsiaexanaenatsi. ³ Pamonaе pexaniacuene exanavanapa, nacuaevetsivi apo cjunavi. Pamonaе pijinia pibisiacuene exanavanapa, nacuaevetsivi cjunava. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecayanacuaevetsivi. ⁴ Bajarapamonaе Dioso pejamatabëcueneta nacuenebanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecayanacuaevetsivi bepacujunavame. Tsipaji bajarapamonaе Dioso tocopatatsi papecananeconitsiaexanaenexa. Dioso tocopatatsi bajarapamonaе penaneconitsiaexanaenexa daxita pamonaе pibisiacuene pexanaevi. ⁵ Bajaraxuata bejumecovënëtatsi pamonaе vajanacayanacuaevetsivi. Apo jumecovënëtsitsi saya vajanacananeconitsiaexanaeyaniva. Jume baja cajena. Biji rajane jumecovënëtatsi tsipaji Dioso pijajivixaetsi, vajajamatabëcueneta yapëtanetsi pacuenia bexanavanapatsi. ⁶ Bajaraxuata nacuaevetsivijavabelia impuestomatamo pamamatotabiabame panematamotsipalatata penaevetsinexa. Nacuaevetsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuene nacueneba.

⁷ Pacuenia pacaеjivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabarë. Bajarapamonaeyajuvënëvi itsa caetuata impuestomatamo, xuavajëto pamoneyabame, pamamatotabiabarë. Pamonaе pijinia peyaiyataevitsi,

payaiyataeyabiabare. Pamonaē peyaiyataevitsi, bajarapamonaē pexaniacuēnia pabaracuaicuaijamēre tsabiabi. ⁸ Pētsa pamoneyabame itsajivi ata. Biji rajane pacuēnia Cristo pacaasiva, bajarapacuēnia paxamē ata panaasivamēre tsavanapae. Pajivi asiva itsajivi ata pacuēnia nasiva pijacuata, bajarapajivi jumecovēnētsicapanepa Dioso Moiséspijinēta penajumecopatsilivaisi. ⁹ Dioso Moiséspijinēta penajumecopatsilivaisi, itaveta mapacuēniaje: “Pētsa jaitame itsava nijavavecua. Pētsa beyaxuabame jivitonē. Pētsa nacobetoxotame. Pētsa najumetsēnētsiaya baracuaicuaijamē itsajivi. Pētsa cobecaēbame itsajivi pexinaejava,” jai Dioso Moiséspijinēta penajumecopatsilivaisi. Nexata paxamē itsa pajumecovēnētsicapanepaejitsipame daxita mapalivaisije, itsalivaisiyo ata yajava, pajumecovēnētsicapanepaejitsipame mapejumaitsilivaisiyoje: “Asivamēre itsajivi ata pacuēnia xamē nijacuata nasivamē,” pejailivaisiyo. ¹⁰ Tsipaji pajivi asiva itsajivi ata, pibisiacuene apo exanaē bajarapajivijavabelia. Bajaraxuata itsa asivatsi itsamonaē ata, nexata jumecovēnētsicapanepatsi daxita pacuēnia Dioso nacaitoroba.

¹¹ Bajarapacuēnia itsamonaē ata biasivatsi. Tsipaji baja yapētanetsi bitso baja imoxoyo pevajēnaē icatsia Jesucristo pepatsijavanexatsica. Vajanacacapanepaenēnexa, najetarucaena vajanacacapanepaenexa mapanacuavecuaaje. Pamatacabi taxuxuabatsi Jesucristo vajajumecovēnētsijava, nacatsita tajēvajēnaē abaxē itajara Jesucristo icatsia pepatsijavanexatsica. Aeconoxae baja bitso imoxoyo pevajēnaē icatsia Jesucristo pepatsijavanexatsica. ¹² Meravi abaxē aitaquiri. Itsa baja icatsia matabijitsia, pitaquirijavami baja ajibi tsaponae. Bajara pijinia pacuēnia imoxoyo baja pevajēnaē pecopiarucaenexa mapanacuapijivi pibisiacuene pexanaejava yabara piamatabēcueneitaquirijavami. Tsipaji baja imoxoyo pevajēnaē icatsia Jesucristo pepatsijavanexatsica. Bajaraxuata bexanavanapatsi ēpexaniacuene Dioso pejitsipacuēnia. ¹³ Aeconoxae baja vajavajēnaeyabelia, jinavanapae-natsi xaniavaetsia vajayapētaexae pexaniajailivaisi. Apo ponae tsanetsi piaitajibivijava. Apo ponae tsanetsi fiestajava ata, itsajota pibisiacuene exanavanapa. Apo exanaē tsanetsi pibisiacuene vajavitota. Apo exanaē tsanetsi it-sacuenējava ata, xua pibisiacuene. Nabijataeya apo najumeanaenotsi tsanetsi. Itsamonaē ata apo cuenecaēbi tsanetsinua. ¹⁴ Biji rajane vajētabiabianatsi vajatuxanenē Jesucristojavabelia vajanacayavenonabiabinexa. Vajatuxanenē Jesucristo nacajamatabēcueneasaēyaexanaena vajato-

jinavanapaenexa vajanacatojitsipaecuena. Apo sivana-jamatabëxainae tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajua-jumecovënëtsivi itsa janitane pexaejava jumapecataeya pexanaenëanëjavabelia peyajuvënërajutsivi, "Pibisiacuene exana mapajivije," pejaiyaniva, yabara pelivaisi

¹ Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexaeyabiabijavami jumapecataeya pexanaenëanëjavabelia perajutsiyajuvënëvi. Nexata baja cjunava pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi.

² Itsamonae Cristojavabelia penajamatabëcuenecopatsivi, jamatabëjumaitsi: "Daxitacuene xanepana vajaxaenexa," jamatabëjai. Itsamonae pijinia abaxë jamatabëjumaitsi: "Dioso nacananeconitsiaexanaejitsipa jumapecataeya pexanaenëanëjavabelia perajutsiyajuvënëvi itsa xanetsi," jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexaeyaniva.

³ Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae jumapecataeya pexanaenëanëjavabelia perajutsiyajuvënëvi, pëtsa neconitsiaya jumaitsi jivijavabelia: "Pibisiacuene exana pajivi xane jumapecataeya pexanaenëanëjavabelia perajutsiyajuvënëvi," jai pëtsa. Tsipaji Cristojavabelia penajamatabëcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi.

⁴ Dioso apo pacatocopatsi Dioso pijajivitonë neconitsiaya jivijavabelia panejumaitsinexa mapacueniaje: "Xua exana bajaraponë, pibisiacuene. Nexata Dioso naneconitsiaexanaenatsi," panejainexa. Dioso pijajivitonë xaniavaetsia Dioso itsa tonacueneba, xaniavaetsia apo tonacuenebi atanua, caenë, Dioso, toxanepanatsi, pacuenia jamatabëjumaitsi, pejumaitsinexa pijajivitonëjavabelia. Dioso cajena caëjëpatsi peyavenonaenexa pijajivi pejitsipaecuena xaniavaetsia petojinavanapaenexatsi pesivabarëyanexa.

5 Itsamonae Dioso pejumecovënëtsivi yaiyataeyabiaba matacabi. Nexata itsamatacabianëvecua caematacabi yaiyataeyabiaba. Itsamonae pijinia najëpaeya tane daxitamatacabianë. Pamonaeyaiyataeyabiaba caematacabi itsamatacabianëvecua, bajarapamonaey xaniavaetsia beyapëtane pajamatabëcuenelivaisi yabara yaiyataeyabiaba caematacabi. Pamonaey ata pijinia najëpaeya tane daxitamatacabianë, xaniavaetsia beyapëtane pajamatabëcuenelivaisi yabara najëpaeya tane daxitamatacabianë. 6 Pajivi nacueraeveta itsamatacabi, bajarapajivi nacueraeveta peyaiyataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëanëjavabelia perajutsiyajuvënëvi, bajarapajivi xane peyaiyataenexa Dioso. Tsipaji jamatabëjumaitis: “Dioso cajena netocopata daxitacuene taxaenexa,” jamatabëjai. Nexata pexaniajamatabëcuene rajutabiaba Diosojavabelia. Pajivi pijinia apo xae jumapecataeya pexanaenëanëjavabelia perajutsiyajuvënëvi, bajarapajivi apo xae peyaiyataenexa Dioso. Tsipaji jamatabëjumaitis: “Mapavije apo xaenë taneconitsiyaniva Diosojavabelia,” jamatabëjai. Nexata pexaniajamatabëcuene rajutabiaba Diosojavabelia ëpeubijava pexaeyabiabixae.

7 Itsajivi ata vaxaitsiyajuvënëjivi, Dioso pejumecovënëtsijivi, apo ponaponaey ëpijacuata penatojitsipaecuenia pexanaponaponaenexa. Biji rajane exanaponapona pacuenia Cristo tojitsipatsi. Petëpaematacabinexa ata yabara, apo jamatabëjumaitis: “Tëpaenajë pamatacabi natojitsipajë tatëpaejava,” apo jamatabëjai. 8 Vaxaitsi abaxë vajaasaëtsavanapaeepato, tojinavanapatsi pacuenia vajatuxanenë nacatojitsipa. Itsiata baitsi jane itsamatacabi, tëpaenatsi. Tsipaji Dioso nacatojitsipaena vajatëpaenexa. Aeconoxae abaxë vajaasaëtsavanapaeivi, vajatuxanenë pijajivitsi tsavanapae. Vajatëpaecujinaey ata tsane, tsiteca vajatuxanenë pijajivitsi tsavanapae tsane. 9 Cristo baja cajena nacasivatëpa vajatuxanenë vajaexanaenexa. Nexata icatsia Cristo asaë tsaponaponaey petëpaecujinaey. Bajaraxuata Cristo daxitajivi pijatuxanenë. Piasaëtsavanapaeivi, petëpaeivi ata, daxita pamonaey najamatabëcuenecopata bajaraponëjavabelia, Cristo cajena pijatuxanenë.

10 Bajaraxuata nexata jumapecataeya pexanaenëanëjavabelia perajutsiyajuvënëvi paxamë panijabananë pexaejava yabara, baracuaicuaijaiya apo bepajumaitsimë mapacueniajey: “Maponëjey pibisiacuene exana. Nexata Dioso naneconitsiaexanaenatsi,” apo bepajamë. Bijiaya ata apo bepataemë bajaraponë.

Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajëvelia jumaitsi mapacueniaje:

Dioso tajëvelia jumaitsi: “Xanë daxitamatacabijavabelianexa tasaëtsaponaponaenë. Nexata tajumaitsijume xaniajanë. Itsamatacabi daxitajivi taitabarata pematocabëta netonubenaena taneyaiyataexae. Daxitajivi nevajunupaebiana Diosonëcuenenë,”

jai Dioso pejumelivaisibaxutota mapacueniaje Dioso tajëvelia pejumaitsijava daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajua-jumecovënëtsivi Diosovecua pejopaeyaexanaeyaniva petsitaexanaejava pejamatabëcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuaicuaijaitsi pibisiacuenia. Biji rajane bejamatabëjumaitsitsi mapacueniaje: “Apo tsitaexanaenë tsane itsacuenejavayo ata, xua yabara itsajivi, Dioso pejumecovënëtsijivi, jamatabëcuenebijanajitsipatsi,” bejamatabëjaitsi. ¹⁴ Najamatabëcuenecopatajë xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cjunavajë taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaitsi tsipae: “Dioso apo netocopatsi taxaenexa bajaraxua. Itsa xaejitsipajë, naneconitsipajë Diosojavabelia,” jamatabëjai tsipae. Nexata apo xae tsipae bajaraxua. ¹⁵ Panijabananë itsa apo pexaenë jumapecataeya pexanaenëanëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëanëjavabelia perajutsiyajuvënëvi, panijabananë bepacasivajamatabëjiobi tsipae. Tsipaji panijabananë bepibisiacuene patsitaexanaejitsipame itsa patsitaxaejitsipame jumapecataeya pexanaenëanëjavabelia perajutsiyajuvënëvi. Nexata jumapecataeya pexanaenëanëjavabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi,

nexata bajaraponë ata naxaejitsipa. Nexata Diosojavabelia bepenaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata penaxuabiyaniva. ¹⁶ Payapëtae atamë, xua picani xanepana paneexanaenexa, itsiata panijabananë itsa cjunava bajaraxua pexanaenexa, pëtsa patsitaexaname. Tsipaji panijabananë pacataejitsipa pibisiacuene bepaneexanaevi. ¹⁷ Vaxaitsi baja najamatabëcuenecopabatsi Cristojavabelia. Nexata jumecovënëtavanapatsi Dioso. Apo nacaitorobi vajanayanijobabiabinexa ëvajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamatabëcuenejëpaeya vajajinavanapaenexa. Nacaitorobanua jamatabëcuenebarëyaya vajajinavana-paenexa Espiritu Santo vajanacatsijamatabëecaexae. ¹⁸ Pajivi Dioso pijacuene tonacuenebaponapona, sivajamatabëcuenebarëyatsi Dioso. Jivi ata xaniavaetsia yayiatanetsi.

¹⁹ Xua Dioso nacayavenona vajajinavanapaenexa najamatabëcuenejëpaeya, bajaraxua exanavanapaenatsi. Xua ata nacayavenona namataenetsia vajanajamatabëcuene asaëyaexanaenexa Diosojavabelia, bajaraxua ata exanavanapaenatsi. ²⁰ Pëtsa patsitaxaneme xua panijabananë tane bepitaevetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuayaniva pëtsa patsitaxaneme xua cjunava panijabananë. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananë taejitsipa bepibisiacuene paneexanaejava itsa paxaejitsipame. ²¹ Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa papamenua piatanera paneaitajibiyaniva. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë jamatabëcuene faefaenaeyaexanaejitsipatsi. ²² Itsa baja xaniavaetsia payapëtaneme pexanepanaecuene panexaenexa, xua picani pacjunavame panexaejava Jesucristojavabelia panenajamatabëcuene copatsivajënaeya, saya pamoyamë

tsane. Tsipaji Dioso yapētane pacuenia panajamatabēxainame bajaraxua yabara. ĩBitso jamatabēcuenebarēya pajivi pexanabiabijava yabara jamatabējumaitsi: “Dioso pitabarata aneconijibia toponaponajē,” jamatabējai! ²³ Pajivi pijinia jamatabējumaitsi ata: “Apo xanepanae tsipae taxaenexa bajaraxua,” jamatabējai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabēcuenebijianaejitsipa. Daxita pijinia xua yabara vaxaitsi jamatabējumaitsi: “Dioso apo jitsipae vajaexanaenexa bajaraxua,” jamatabējai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaējētatsi vajabananē vajajamatabēcueneyavenonaenexa yabara pelivaisi

¹ Vaxaitsi ajamatabēcuenesaētsi Dioso vajajumecovēnētsijava. Nexata beyavenonatsi pamonaē abaxē jamatabēcuenefaefaena Dioso pejumecovēnētsijava. Pētsa exanatsi vaxaitsi vajacuata vajanatojitsipacuena. ² Biji rajane caejivitsi canacujitsia becanaējētatsi vajabananē vajajamatabēcueneyavenonaenexa. Xua yabara vajabananē ajamatabēcuenesaējitsia, bajaraxua betoexanavanapatsi vajabananē pejamatabēcuenevitsabinexa Diosojavabelia. ³ Tsipaji Cristo ata, ponē Dioso athēbēvetsica itorobica jivi pecapanepaenexa, abaxē itsa ponapona mapanacuataje, apo exanae pijacuata penatojitsipacuena. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitisijava, Dioso pejumelivaisibaxutota tajēvelia jumaitsi mapacueniaje: “Pacuenia picani jivi xamē pibisiacuena jamatabēcabaracuaicuaijai, xanē nebaracuaicuaijai tsane,” jai tajēvelia Dioso pejumelivaisibaxutota paxa Diosojavabelia Cristo pejumaitisijava. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata naticopata vajajumecovēnētsinexa, vajanacajamatabēcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabēcuenesaētsi tsavanapae. Tsipaji yapētanetsi pacuenia Dioso najumecapanepaeya jumaitsi bajarapalivaisita vajanacapanepaenexa. ⁵ Itsacuenejavaxi yabara bajayajebi itsa nacajamatabēcueneējēta, nexata Dioso nacajamatabēcueneyavenonapona. Nacajamatabēcueneasaēyaexanapona bajayajebinexa ata. Pacatovajētatsi Diosojavabelia Dioso papecayavenonaenexa,

najamatabëcuenejëpaeya daxita panejinavanapaenexa Jesucristo papecatojitsipaecuenia. ⁶ Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pijajivinexatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yaiyataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” jai tsabiabi tsane. ⁸ Mara pacajumaitstsije. Jesucristo athëbëvetsica patsica mapanacuayabetsicaje peyavenonaenexa judíovi. Bजारapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. ⁹ Jesucristo athëbëvetsica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bजारapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumait्सijava, Dioso pejumelivaisibaxutota jumait्सi mapacueniaje:

Xanë tajamatabëcueneta, daxitanacuanëpijivi: “Diosomë, bitso ayaijamatabëcuenenëmë,” cajai tsabiabi tsane.

Catonaxëanabiabiananua vajianë ata,

jai Dioso pejumelivaisibaxutota paxa Diosojavabelia Cristo pejumait्सijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumait्सi mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava,

jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumait्सi icatsia mapacueniaje:

Paxamē apo pajudíovimē, Diosojavabelia pajumaitsimēre: “Diosomē, bitso ayaijamatabēcuenenēmē,” pajamēre. Paxamē, padaxitamē, itsamonaejavabelia pajumaitsimēre: “Caenē Dioso bitso ayaijamatabēcuenenē,” pajamēre,

jai Dioso pejumelivaisibaxutota.

¹² Isaíaspijinē pijinia itsabaxutota tajēvelia yaquina Jesucristo pelivaisi. Jumaitsi mapacueniajē:

Penacuetonēyo naexanaena. Nexata Isaípijinē bepemomonēyocuenia naexanaena. Itsa vitsabiana, Dioso evetsiaexanaenatsi jivi, daxitanacuanēpijivi. Pamonaē apo judíovi, jumecovēnētsiana bajaraponē pesivatēpaejavatsi pecapanepaenexatsi pijaneconivecua,

jai tajēvelia Isaíaspijinē peyaquinaebaxutota Jesucristo yabara.

¹³ Yapētanetsi Dioso vajanacacapanepaejavanexa Jesucristo pejamatabēcueneta. Nexata pacatovajētatsi Dioso papecajamatabēcuenē barēyayaexanaenexa. Pacatovajētatsinua jamatabēcuenexanepanaeya panejinavanapaenexa. Bajarapacuenia Dioso pacajamatabēcueneyavenonaena tsipaji Dioso pajumecovēnētame. Espíritu Santo ata, ponē pacatsijamatabēeca, pesaēta panevajēnaeyabelia pacajamatabēcuenē asaēyaexanaponaena Dioso papecacapanepaejavabelianexa.

¹⁴ Tajamonae, pacayapētanetsi paxamē papexaniamatabēcuenēvijavamē. Pacayapētanetsinua paxamē bitso paneyapētaejava Cristo papecasivatēpaejava pibisiacuene paneexanaeneconi yabara. Pacayapētanetsinua paneyapētaejava xaniavaetsia namataenetsia panenamuxujibinexa. ¹⁵ Tajamonae, palivaisi baja payapētaneme, bajarapayajuvēnēlivaisi panenajamatabēnapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonēnēxanē Jesucristo pelivaisi tatsipaebabiabinexa apo judíovijava.

Nexata apo judíovi tsipaebabiabajē pexanialivaisi, Jesucristo pelivaisi, pecapanepaelivaisinexatsi Diosojavabelia. Espíritu Santo pejamatabēcueneta apo judíovi ata Cristo pijajivi exanatsi. Bajaraxuata Dioso sivabarēyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonēxaenē, Jesucristo neyavenonabiaba itsa tonacuenēbabiabajē. Bajaraxuata barēyanē tatsipaebaponaenexa itsamonaejavabelia Jesucristo taneyavenonabiabijava tatonacuenēbinexa Dioso.

¹⁸ Rovialia tsipaebabiabajē ajumeurajibia. Tsipaebabiabajē

vajatuxanenē Jesucristo taneyavenonabiabijava tatonacuenebinexa Dioso. Vajatuxanenē Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta pinijicuene taexanaponaejavanē, bajarapamonae jumecovënëta baja Jesucristo pesivatēpaejavatsi pibisiacuene pexanaeneconi yabara. ¹⁹ Vajatuxanenē Dioso pesaëta nejamatabëcuenecaëjēpaeyaexana pinijicuene taexanaenexa. Espíritu Santo ata pesaëta nejamatabëcueneyavenona. Bajaraxuata apo judíovi tsipaebaponajē pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajē baja bajarapalivaisi Jerusalén tomarajava. Bajaraxuacujinae tsipaebaponajē daxitanacuanējava. Tajënacujavabelia ata, Ilírico nacujavabelia, tsipaebaponajē. ²⁰ Itsa tsipaebaponajē pexanialivaisi, Jesucristo pelivaisi, jitsipajē tatsipaebaponaenexa itsaxuayo abaxē jivi apo vënëlivaisitae Cristo. Apo jitsipaenē tatsipaebaponaejava itsaxuayo baja tavajënaeya itsamonae tsipaebapona. ²¹ Bajarapacuenia apo judíovi itsa tsipaebaponajē Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniaje:

Pamonae abaxē apo vënëlivaisitae, ponē athëbëvetsica Dioso itorobijitsiatsica jivi pecapanepaenexa, bajarapamonae bajaraponē pelivaisi tsipaebianatsi. Nexata bajarapamonae jumecovënëtsiana ponē pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba Roma tomarebelia yabara pelivaisi

²² Bajayajebi picani bitso jamatabëpacataeyabiabatsi. Itsiata apo necuenecaëjēpae taponaeenexa paxamëjavabelia daxitanacuanējava Dioso pejumelivaisi tatsipaebanajetarucaexae. ²³ Aeconoxae baja veretajē tanacuenebijava mapanacuajavaje. Nexata jane baja ponaenajē paxamëjavabelia. Tsipaji picani bajayajebi jamatabëpacataeyabiabatsi. ²⁴ Pamatacabi ponaenajē España nacuyabelia, patsianajē copiaya paxamëjavata patacataenexa. Itsa baja nataenatsi, bitso jamatabëcuenearëya tsavanapae tsanetsi.

Bjaraxuacujinae jitsipajë pataneyavenonaenexamë tajanamutonexa taponanexa jane baja España nacuayabelia. ²⁵ Bajara masaya pamatacabitaje ponaenajë Jerusalén tomarabelia ofrenda tatocaponanexa Dioso pejumecovënëtsivi. ²⁶ Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bjarapaofrenda toexana petoitorobinexa Dioso pejumecovënëtsivi, pamona bepejiobivi, Jerusalén tomarata pejinavanapaevi. ²⁷ Macedonia nacuapijivi, Acaya nacuapijivi ata, apo judíovi. Itsiata tsitaxanepanatsi bjarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tshipaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamona apo judíovi ata, yapëtane baja pecapanepaelivaisinexatsi Diosojavabelia. Bjaraxuata pamona apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸ Copiaya tocalianë tsane mapaofrendaje Jerusalén tomarapijivijavabelia. Nexata bjaraxuacujinae itsa ponaenajë España nacuayabelia, copiaya patsianajë paxamëjavata. ²⁹ Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenabarëyanexa.

³⁰ Tajamona, pajumecovënëtame vajatuxanenë Jesucristo. Paneasivamënu Espíritu Santo pejamatabëcueneta papecajamatabëcueneitorobixae pataniasivanexamë. Bjaraxuata pexaniacuene pacavajëtatsi. Itsa pavajëtame Diosojavabelia, xanë ata asaëyata panetovajëtsianame, pacuenia tajacuata natovajëtabiabajë. ³¹ Panetovajëtsianame Diosojavabelia taneyavenonaenexa taneitsacueniabiyaniya Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianë. Pamona apo judíovi pejebipalataxae, belia bjarapaofrenda apo nevecuapitsi tsipae bjarapamona judíovi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiabatsi Diosojavabelia papecayajavaponaponaenexa Dioso. Dioso cajena nacayavenonabiaba jamatabëcuenabarëyaya vajajinavanapaenexa. Bajara itsi tsane.

Pacuenia Pablo jamatabĕnajinalia peyapĕtaevitsi, Roma tomarapijivi, yabara pelivaisi

¹ Payavenonaename vajabanava Febe, pova ponaejitsia paxamĕjavabelia. Bajarapova yavenonabiaba Dioso pejume-covĕnĕtsivi, Cencrea tomarapijivi. ² Pacopiapitsianame xaniavaetsia bajarapova vajatuxanenĕ Jesucristo pejamatabĕcueneta, pacuenia vaxaitsi copiapitabiabatsi Dioso vajanajuajumecovĕnĕtsivi. Xua namatavenona bajarapova, payavenonaename. Tsipaji bajarapova yavenonabiaba ayaibitsaĕto Dioso pejume-covĕnĕtsivi. Xanĕ ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebiji-vibeje vajatuxanenĕ Jesucristo pijacuene. ⁴ Bajarapajivibeje toyai atatsibeje petĕpaejavanexabeje picani, necapanepabeje tatĕpaejavaminexavecua. Nexata jumaitsinĕ: “Pexani-acuene baja cajena bitso panetoexanamebeje,” janĕ bajarapajivibejejavabelia. Itsiata ĕxanĕ bajarapacuenia apo jumaitsinĕ. Daxita pamonaĕ apo judĭovi, Dioso pejume-covĕnĕtsivi, bajarapamonaĕ ata, bajarapacuenia jumaitsitsibeje tanecapanepaexabeje. ⁵ Pamonaĕ Dioso pejume-covĕnĕtsivi, pamonaĕ nacaetuatabiaba Priscabeje Aquilabeje pijabota, bajarapamonaĕ ata nebajacobiana. Nebajacobiananua tasivanĕ Epeneto. Bajaraponĕ daxita Asiavĕnĕ nacuapijivivecua copiaya najamatabĕcuenecopata Jesucristojavabelia. ⁶ Nebajacobiananua Marĭa, pova bitso tonacuenebabiaba Dioso pijacuene paxamĕ tuatuaĵĕta. ⁷ Nebajacobiananua tajanacuapijinĕbeje, Andrĕnicobeje Juniasvĕnĕnĕbeje. Bajayata bajaraponĕbeje panenajuajeba penaneconitsivi pejebabiabibota. Bajaraponĕbeje yaiyataeya baracuaicuajaitsibeje pevĕna apĕstolevi ata. Xanĕ ata tanajamatabĕcuenecopatsivajĕnaeya, bajaraponĕbeje najamatabĕcuenecopatabeje Cristojavabelia.

⁸ Nebajacobiananua Ampliato. Bitso tasivanĕ. Tsipaji bajaraponĕ ata Cristojavabelia najamatabĕcuenecopata. ⁹ Nebajacobiananua Urbano. Bajaraponĕ ata tonacuenebaponapona vajatuxanenĕ Jesucristo pijacuene pacuenia vaxaitsi tonacuenebavanapatsi. Nebajaco-biananua Estaquis, bitso tasivanĕ. ¹⁰ Nebajacobiananua Apeles, ponĕ picani dovathi pejamatabĕcueneta jamatabĕcueneĵĕtatsi Cristo pelivaisi pejume-covĕnĕtsijava yabara. Itsiata apo copatsi pejume-covĕnĕtsijava Cristo pelivaisi. Nebajacobiananua Aristĕbulo pijamonaĕ. ¹¹ Nebajacobiananua tajanacuapijinĕ Herodiĕn. Nebajacobiananua Narciso pijamonaĕ, pamonaĕ

penajamatabēcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene. ¹³ Nebajacobiananua Rufo, ponē bitso xaniavaetsia jumecovēnēta vajatuxanenē. Bajaraponē pena ata nebajacobiana. Bajarapova bepexēnatonē netaeyabiaba. ¹⁴ Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonae najinavanapa bajarapamonaejavata. ¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpás ata, daxita itsamonae ata, Dioso pejumecovēnētsivi, pamonae najinavanapa bajarapamonaejavata.

¹⁶ Paxamē ata Dioso panejumecovēnētsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovēnētsivi majotaje pejinavanapaevi pacabajacobalia.

¹⁷ Tajamonae, pacatsipaebatsi itsalivaisi. Pena-jumetsēnētsilivaisi petsipaebaponaevi, panayajivitaename papecayamaxēitojorobianiva. Bajarapamonae namataenetsia pacanajumeanaenotsiaexanaena najamatabēcuenējēpaeya panejinavanapaeyaniva panenavecuanatsanaenexa. Palivaisi baja paxamē pajumecovēnētame, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. ¹⁸ Bajarapamonae apo jamatabēexanae pacuenia jitsipa vajatuxanenē Jesucristo. Biji rajane saya jamatabēexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabēyamaxēitojoroba pamonae abaxē xaniavaetsia apo jumeyapētae pexaniajailivaisi. ¹⁹ Daxitajivi paxamē pacavēnēlivaisitane xaniavaetsia panejumecovēnētsijava Dioso. Bajaraxuata pacasivabarēyatsi. Pacatojitsipatsi paneyapētaenexa bitso ēpexaniacuene paneexanaenexa. Pētsa panacopatame itsajivi ata papecayamaxēitojorobinexa pibisiacuene paneexanaenexa. ²⁰ Dioso baja cajena vajanacayavenonaenē najamatabēcuenējēpaeya vajajinavanapaenexa, itsajivi ata vajanacayamaxēitojorobianiva penajumetsēnētsilivaisita. Nexata Dioso bepijia pacayavenonaena panejamatabēcueneamoneyabinexa dovathi. Pacatovajētabiabatsi Diosojavabelia vajatuxanenē Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenebinēbeje. Pabajacobianamenua pina tajanacuapijivi

Lucio, Jasón ata, Sosípater ata.

²² Xanë, Tercionë, mapabaxutotaje Pablo pijume tajumeyaquinaponenë. Xanë ata pacajamatabënjatsi. Tspijaji Jesucristojavabelia vajanajamatabëcuenecopatsivi.

²³ Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacaetuatabiabinexa Gayo pijabota. Pabajacobianamenua pina Erasto, ponë evetabiaba palata, Corinto tomarapijipalata. Pabajacobianamenua pina vajabanenë Cuarto.

²⁴ Pacatovajëtabiatsi Diosojavabelia daxita paxamë vajatuxanenë Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: “Dioso cajena bitso ayaijamatabëcuenenë,” jaitsi tsabiabi. Dioso, daxitamatacabijavabelianexa peponaponenë, cajëpatsi papecajamatabëcuene asaëyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepelivaisinexatsi Diosojavabelia. Bajarapalivaisi jivi tspiebaponajë. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipaebivi profetavi tajëvelia yapëtane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinxaxa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinxaxa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumaitsitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. ² Mapabaxutoje pacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetoinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamona navajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. ³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixaemë, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinxaxa Dioso pejumelivaisi. Pacajumeyapëtaeyaexananua pepo pexaniajailivaisi. ⁶ Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaëmë tsavanapae panejumecovënëtsijava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacaëjëpaeyaexanabiaba panetoexanavanapaenexa daxita pacuene Dioso pacatojitsipa. ⁸ Dioso cajena pacayavenonaponaena paneajamatabëcuenesaënexa Dioso panejumecovënëtsijava daxitamatacabijavabelianexa. Nexata pamatacabi

vajatuxanenē Jesucristo icatsia patsianica, toacuenebi tsanetsi itsajivi ata papecaneconitsinexa. ⁹ Dioso cajena bajarapacuenia pacatoexanaena. Tsipaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexēnato, vajatuxanenē Jesucristo, papijajivinexamē.

Pacuenia Dioso pejumecovēnētsivi navecuanatsanapona apo penajamatabēcuenejēpaexae yabara pelivaisi

¹⁰ Tajamonae, pacaitorobatsi vajatuxanenē papijajivixaemē, najamatabēcuenejēpaeya panejinavana-paenexa. Pētsa panavecuanatsanaeyajoneponame itsajavabelia. Biji rajane najamatabēcuenejēpaeya pajinavanapare. Najamatabēcuenejēpaeya xaniavaetsia panajamatabēxainare caelivaisi. ¹¹ Mapacuenia pacatoyaquinatsije tsipaji Cloévēnēva pijajivi netsipaeba. Apo panajamatabēcuenejēpaemē pina. Daxitatsi baja cajena caenē vajatuxanenē Jesucristo pijajivitsi. Paxamē tuatuajēta pina itsamonae nabijataeya namataenetsia najumeanaenotabiaba. ¹² Itsamonae pina xanē yabara jumai tsabiabi: “Xanē raja saicaya Pablo pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Apolos pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Pedro pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Cristo pijajivitonēnē,” jai pina tsabiabi. ¹³ Bajarapacuenia paxamēyajuvēnēvi apo bejumaitsi tsabiabi. Tsipaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanapona tsipaji baja cajena Cristo caenē tsaponapona. Apo navitsanae baja cajena. Nexata pamonaē ata Cristo pijajivi, caebitsaēto rabaja tsavanapae. Nexata apo benavecuanatsanapona. Nexata itsajivi ata xanē yabara apo bejumaitsi: “Xanē raja saicaya Pablo pijajivitonēnē,” apo bejai. Tsipaji xanē itsajivi ata apo sivanabeyaxuabiaexanaenē cruzata. Itsajivi ata baja cajena apo bautisabitsi tavēnēta tajajivitonē penaexanaenexa. ¹⁴ Xanē baja cajena apo bautisabinē jivi ayaibitsaēto. Saya bautisabajē anijanēbeje, Cristobeje Gayobeje. Bajaraponēbeje itsa bautisabajē, bautisabajē Cristo pevēnēta. Nexata jivi ayaibitsaēto apo tabautisabixae, sivabarēyanē Diosojavabelia. ¹⁵ Nexata acuenebi itsajivi ata pejumaitsijava: “Xanē raja nebautisaba Pablo pevēnēta. Nexata Pablo pijajivitonēnē,” pejaijava. ¹⁶ Jemajanē tsaena. Bautisabajēnuā tsaena Estēfanās pijamonae. Pematatsēnēa baja apo najamatabēnapitsinē pajiviyo bautisabajē. ¹⁷ Cristo

apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcuenecaëjÿpaeya exanapona, bajarapacuenia pacatsipaebaponatsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamonaë yapÿtane saya maëpanacuapijilivaisije, bajarapacuenia tatsipaebinxëa, Cristo apo nitorobi. Nexata itsa tsipaebaponaëjitsipajÿ pacuenia tsipaebabiaba pamonaë yapÿtane saya maëpanacuapijilivaisije, nexata Jesucristo vajanacasivatÿpaejava cruzata tsipaebi atanë tsipae jivijavabelia, ajumematamobinë tsipae.

Pacuenia Cristo jivijavabelia tsitajÿta Dioso piasaënëcuene, Dioso bitso daxitacuene peyapÿtaenëcuene ata, yabara pelivaisi

¹⁸ Itsamonae pijaneconi yajavatÿpaena. Bajarapamonae jumetae ata Jesucristo cruzata vajanacasivatÿpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacapanepaevinexa, bajarapalivaisi nacayapÿtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajÿvelia jumaitsi mapacueniaje:

Itsamonae bitso yapÿtane mapanacuapijilivaisije. Bajaramonaë peyapÿtaelivaisimi, itsamatacabi vecuaajib-iaexanaenajÿ. Pamonaë ata bitso peyapÿtaevi itajara tanetsi mapanacuapijivije, xanë itsamatacabi jamatabëcueneitajÿtsianajÿ pacuenia jamatabëcueneitsi. Nexata bajarajota daxitajivi jamatabëcueneyapÿtaenatsi bajarapamonae saya bevelia peyapÿtaevicuene, jai baja cajena tajÿvelia Dioso pejumelivaisibaxutota.

²⁰ Ponë yapÿtane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapÿtae ata, ajumematamobi cajena. Ponë ata bitso ajumelivaisisaëya cuaicuajiai, bajaraponë ata ajumematamobi cajena. Daxita bajarapitsivi ajumematamobi, itsa apo natovajÿtsi Diosojavabelia peyavenonaenexatsi peyapÿtaenexa jane baja xaniavaetsia. Dioso baja cajena nacayapÿtaeyaexana mapanacuapijilivaisije natsiquejemalivaisicuenë. Tsipaji Dioso apo penajamatabëxainaelivaisi. ²¹ Dioso baja cajena daxitacuene bitso peyapÿtaenë mapanacuapijilivaisi peyapÿtaevi matatoxenetsia. Nexata Dioso apo tocopatsi pejamatabëcueneyapÿtaenexatsi pamonaë bitso yapÿtane saya mapanacuapijilivaisije. Biji rajane Dioso jamatabëcapanepa pijaneconivecua pamonaë jumecovënëta pexanialivaisi, palivaisi patsipaebaponaëjÿ,

Jesucristo cruzata vajanacasivatëpaelivaisi. Bajarapalivaisi itsamonae betsitansiquejemalivaisi atatsi, itsiata bajarapalivaisi pejamatabëcueneta capanepaenatsi pamonaë jumecovënëtavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi ëpamonae: “Itsa taejitsipatsi Dioso pesaëta pinijicuene pexanaejava pamonaë nacatsipaeba mapalivaisije, nexata matapania jumecovënëtsipatsi bajarapalivaisi pexaniajailivaisicuene,” najai tsabiabi judíovi. Griegovi ata itsa patsipaebabiabajë bajarapalivaisi, najumai tsabiabi ëpamonae: “Mapalivaisije itsa jumejëpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumecovënëtsipatsi pexaniajailivaisicuene mapalivaisije,” najai tsabiabi griegovi. ²³ Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi. ²⁴ Itsiata pamonaë Dioso junatatsi pecapanepaenexatsi, judíovi, apo judíovi ata, bajarapamonae jumeypëtaepona bajarapalivaisi. Nexata bajarapamonae yapëtaepona Dioso piasaënëcuene. Tsipaji bajarapamonae Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonae yapëtaeponanua Dioso bitso daxitacuene peyapëtaenëcuene. Tsipaji Dioso tajëvelia najamatabëxaina bajarapamonae pibisiacuene pexanaeconivecua pecapanepaenexa Cristo pejamatabëcueneta. ²⁵ Pacuene Dioso exana jivi pecapanepaenexa pijaneconivecua, bajarapacuenë mapanacuapijivije, Dioso apo pejumecovënëtsivi, betsitansiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijillivaisije, apo caëjëpaetsi bajarapacuenia penajamatabëxainaenexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tsipaji bajarapaepatota Dioso pinijicuene exana vajanacacapanepaenexa vajaneconivecua. ²⁶ Tajamonae, pacanaëjëre

mapacueneje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëtoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë.

²⁷ Pamonaevi bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamonaevi bitso apo peyapëtaevije,” jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamonaevi bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamonaevi bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajarapamonaevi aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë.

²⁸ Dioso baja cajena pacaitapeta papijajivinexamë, daxitajivi papecaitoyaxae, bijiaya papecanaëcotsivi ata. Bajarapacuenia Dioso pacaitapeta, pamonaevi bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonaevi Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena piamemematamobijava, pamonaevi ayaijamatabëcuenevi itajara tanetsi mapanacuataje.

²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatabëcuene taxainaenë,” apo bejai.

³⁰ Dioso papecaitaxutotsoniataexae, pacaitapeta papijajivinexamë. Nexata Jesucristo payajavajinavanapame. Vaxaitsi Dioso jamatabëcueneyapëtanetsi. Tsipaji Jesucristo nacajamatabëcueneyavenona Dioso vajajamatabëcueneyapëtaenexa. Jesucristo pejamatabëcueneta Dioso aneconijibia natanene. Pijajivitsinua Dioso nacaexana. Nacavecuaajibiaexananua pibisiacuene vajaexanaeconimi.

³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaitsi mapacueniaje: “Pëtsa navajunupaebame saya nijacuata nexanaejava yabara jivi pecayaiyataenexa. Biji rajane navajunupaebare Dioso

pecayavenonaponaejava. Nexata jivi Dioso yaiyataena," jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamonae bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi. ² Itsa ponaponajë paxamëjavata, najamatabëxainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinexa pexaniajailivaisi, Jesucristo pelivaisi, najamatabëcueneyapëtaniji apo tanecaëjëpaejava tajacuata patacatsipaebinexa. Nexata natsijamatabëcuenebëjanë. Jamatabëcueneneconeconajë Dioso pitabarata bajarapalivaisi patacatsipaebijavanexa yabara. ⁴ Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espíritu Santo pacatsijamatabëcuaicuaijai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtame. ⁵ Bajarapacuenia pacatsipaebatsi panenajamatabëcuenecopatsinexa Diosojavabelia, Dioso pesaëta papecayavenonaponaejava. Tsipaji apo pacatojitsipaetsi paneyajavajumecovënëtsinexa pamonae mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaona pejumecovënëtsivitsijavabelia Espíritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacapanepaenexa vajaneconivecua. Bajarapalivaisi baja cajena Dioso bajayata tajëvelia muetsia

xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matacabi apo peverevereaejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexë nato. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaitsi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonae Dioso pejitsipaevinexa, jai tajëvelia Dioso pejumelivaisibaxutota Cristo vajanacasi vatëpaejavanexa cruzata.

¹⁰ Nexata vaxaitsi Cristo vajanacasi vatëpaejava, Dioso nacayapëtaeyaexana Espíritu Santo pejamatabëcueneta. Espíritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacacapanepaenexa, bajaraxua ata Dioso nacayapëtaeyaexana Espíritu Santo pejamatabëcueneta.

¹¹ Vaxaitsi apo nacacaëjëpae vajajamatabëcueneyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata najamatabëcueneyapëtane. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espíritu Santo itsa apo nacayapëtaeyaexanae tsipae. ¹² Tsipaji Dioso apo nacatocopatsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espíritu Santo vajanacatsijamatabëcaenexa. Nexata Espíritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënëtsivijavabelia, tsipaebaponatsi pacuenia Espíritu Santo nacayapëtaeyaexanapona. Apo tsipaebaponaetsi mapanacuapijicue yabaraje, xua vajacuata banajamatabëxainatsi.

¹⁴ Pajivi Dioso apo jumecovënëtsi, bajarapajivi apo jumecovënëtsi palivaisi picani Espíritu Santo ata yapëtaeyaexanaejitsiatsi. Tsipaji saya bajarapalivaisi betsitansiquejemalivaisitsi. Bajarapajivi apo caëjëpaetsinua pejumeyapëtaenexa palivaisi Espíritu Santo yapëtaeyaexanatsi.

Tsipaji Espíritu Santo petsijamatabëenaevitsi, caējēpatsi pejumeyapētaenexa palivaisi Espíritu Santo yapētaeyaexanatsi. ¹⁵ Pajivi tsijamatabëecatsi Espíritu Santo, bajarapajivi pejamatabëcueneta yapētaeyaexanaponatsi xua Dioso tsitapexaniacuenetsi. Yapētaeyaexanaponatsinua xua ata Dioso tsitapibisiacuenetsi. Nexata Dioso apo pejumecovēnētsivi apo caējēpaetsi peneconitsinexatsi bajarapajivi Diosojavabelia. ¹⁶ Dioso pejumelivaisibaxutota bajaraxua yabara jumaitsi mapacueniaje: “Itsajivi ata apo yapētae pacuenia najamatabëxaina pepo petuxanenē Dioso. Nexata itsajivi ata apo caējēpaetsi pemuxujiobinexa Dioso,” jai Dioso pejumelivaisibaxutota. Nexata pacuenia Cristo jamatabëcueneitsi, bajara vaxaitsi ata jamatabëcueneitsitsi. Nexata itsajivi ata apo caējēpaetsi vajanacajamatabëcueneyapētaenexa. Apo caējēpaetsinua vajanacamuxujiobinexa.

3

Pacuenia Dioso pejumecovēnētsivi najamatabëcuenejēpaeya Dioso betonacuenebavanapa yabara pelivaisi

¹ Tajamonae, palivaisi abaxē ayapēbeje jivi pejumeyapētaenexa, bajarapalivaisi tsipaebabiabajē Espíritu Santo pitorobicueniatsi pejinavanapaevijavabelia. Nexata bajarapamonae nejumeyapētaeyabiaba. Itsiata baitsi jane paxamē bajayajebi baja Cristo pelivaisi panejumecovēnētsivi ata, piayapēbejelivaisi apo pacatsipaebabiabitsi. Tsipaji apo panejumeyapētaemē tsipae. Bajaraxuata abaxē pacatsipaebabiabatsi pacuenia tsipaebabiabajē pamonae pejanajumecovēnētsivi Cristo pelivaisi. Tsitecaeya abaxē bepapejevaxijamatabëcuenemē Cristo panejumecovēnētsijava yabara. Tsipaji apo panejumeyapētaeponaemē panevajēnaeyabelia Cristo pelivaisi. ² Penacuetojiviyo abaxē ěmito barajutatsi. Apo rajutsitsi abaxē pexaenexa pevi. Bajara pijinia pacuenia paxamē ata pamatacabi ajena pajumecovēnētame Cristo pelivaisi, pacatsipaebatsi peyapēxanepanaelivaisi panejumeyapētaenexa. Tsipaji abaxē bajarapamatacabi apo pacacaējēpae panejumeyapētaenexa palivaisi abaxē ayapēbeje. Itsiata baitsi jane abaxē aeconoxae ata saya patsitecavanapame. Apo pacacaējēpae panejumeyapētaenexa pematatsēnēa. Bajaraxuata paxamē abaxē bemito paneapaejivixi Cristo pelivaisi panejumecovēnētsijava yabara. ³ Bajarapacuenia pajamatabëcueneitsimē tsipaji abaxē mapanacuapijivije, Dioso apo pejumecovēnētsivi, jamatabëcuenejēpaeya pajinavanapame. Paxamē abaxē panacuenecaēbabiabame.

Nabijataeyanua namataenetsia panajumeanaenotabi-abame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. ⁴ Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonae, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonae pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

⁵ Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenebajëbeje vajatuxanenë Cristo pacuenia paneitorobabeje. ⁶ Pabixainaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. ⁷ Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. ⁸ Pamonae jivi tsijamatabëuba Dioso pejumelivaisi, pamonae ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaevecua. Itsiata Dioso matamotsianatsi caenë canacujitsia saicaya petonacuenebimatamo. ⁹ Paxanë raja Dioso pijacuene panebarënacueneba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënuua, paboxaneto Dioso panebarëexanapona. ¹⁰ Bo pexanaevi, pexaniabo pexanaenexa, itsaxuayo bo ënëtuatuajënexa, copiaya

feratonë bamatatoyorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë bana-jumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtamë bajarapalivaisi. Bajaraxuata xanë bo ënëtuatuajënexa matatoyorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tshipaji xanë copiaya pacatsipaebatsi Cristo pelivaisi. Nexata juya pamonaë cotocaevi pacatsipaebavanapa, pacatsipaeba panevajënaeyabelia paneajamatabëcuenesaë tsaponaenexa Cristo pelivaisi pane-jumecovënëtsijava. Bajarapamonae boyenepananexa ibotonë bepecatsanaponaevi bo ënëtuatuajënexa matatoyorotsia tamëthëcaibotoxanetonëjumavereca. Boyenepananexa pecat-sanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonaë pacaëvetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia. ¹¹ Payapëtaneme rabaja mapacueneje. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcaë. Bajara pijinia paitsimë paxamë ata. Capanepaeya baja pajumecovënëtamë Jesucristo papecasivatëpaejava Dioso papecavecuaajibiaexanaenexa pibisiacuene paneexanaeconimi. Nexata baja apo bepajumecovënëtsimë saicayalivaisi. Tshipaji baja ajibi pematatsënëa itsalivaisi papecacapanepaelivaisinexa panijaneconivecua. ¹² Pamonaë bo exana, maitsije. Itsamonae exana bitso penamatamotsijavanëta. Itsamonae exana bevelia penamatamotsijavanëta. Pamonaë pacatsipaebapona pexaniajailivaisi pacuenia Dioso yapëtaeyaexanaponatsi, bajarapamonae bo bepexanaevi bitso penamatamotsijavanëta bajayajebi bo pija-matabësäetsecaenexa. Bajarapamonae bo bepexanaevi oronanitonëta, platananitonëta ata, penamatamotsii-botonëta ata. Pamonaë pijinia saya pejamatabëcueneta peyapëtaelivaisi pacatsipaebapona, bajarapamonae bo bepexanaevi bevelia penamatamotsijavanëta, bajayajebi apo piamatabësäëjavanëta. Bajarapamonae bo bepexanaevi saya naëjavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica, bajarapamatacabi nayapëtaëna caejivi canacujitsia Cristo pijajivi, pamonaë xaniavaetsia tonacuenebavanapa. Bajarapamatacabi

Cristo isoto yajavapatsianica. Nexata bajarapaisotota Cristo ëjëtaponæna xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. ¹⁴ Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucæe ata, itsiata bo apo tajue tsipæe isoto apo petajuejavanëta bo pexanetsixæe. Nexata bo penacuenebinë matamotsipatsi. ¹⁵ Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixæe, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipæe. Panepæejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaæ xaniavaetsia pacatsipaeba, capanepæenatsi Dioso. Matamotsianatsinua Dioso. Tsipaji pacuenia Dioso yapëtaeyæexanatsi, pexanialivaisi pacatsipaebapona. Pamonaæ pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona. Itsiata bajarapamonaæ ata tsiquirijavayota capanepæenatsi Dioso.

¹⁶ Payapëtaneme rabaja mapacueneye. Paxamë rabaja Dioso bepapijatemplobomë. Tsipaji Espiritu Santo pacayajavaponapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: “Xanë cajena daxitajivi matatoxenetsia bitso tayapëtaenë mapanacuapijilivaisije,” itsa jamatabëjai, nexata bajarapajivi becopata bajarapajamatabëcuene. Bevelijamatabëcuenejivi saya benatane. Nexata Dioso jamatabëcuenecaëjëpaeya exanaenatsi peyapëtaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapæejavata itsamonaæ,” jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaitsi mapacueniaje: “Pepo petuxanenë baja cajena yapëtanæ pia-matamobicuene mapanacuapijilivaisije, bitso peyapëtaevi penajamatabëxainæcuene,” jai Dioso pejumelivaisibaxutota. ²¹ Bajaraxuata itsajivi ata paxamëyajuvënëjivi, Dioso

pejumelivaisi patacatsipaebivi, paxanë bepatajajivitonë apo benatae. Bepaayaijamatabëcuenevinëna, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname. ²² Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcueneavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa. ²³ Pematatsënëa rabaja Dioso pacatocopatanua paxamë Cristo papijajivinexamë. Cristo rabaja pijinia Dioso bepijajivitonë, Dioso pejitsipaecuenia petoexanaexae.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. ³ Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuaicuaijamë tsabiabi ata, itsamonae ata nebaracuaicuaijai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabëcuenebëjanë patanebaracuaicuaijaitsabibijava yabara. Apo nacuenecanaëjëtsinëna pacuenia tonacuenebajë vajatuxanenë. Nexata tajamatabëcueneta apo jamatabëjumaitsinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë. ⁴ “Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajibi Dioso taneyabara naneconitsiaexanaejavanexa,” jamatabëjanë ata tsipae, itsiata ajumematamobinë tsipae. Bajaraxuata evetajë vajatuxanenë pijacuata tanejumaitsinexa itsa apo jumecovënëtsinë taneitorobicuenia. ⁵ Bajaraxuata pëtsa pabaracuaicuaijamë itsamonae ata Dioso petonacuenebavanapaevi. Pacopiaevetavanapare

abaxë vajatuxanenë pepatsijavatsica. Bajaraponë itajëtsiana bajarapamonae muetsia pexanaejavanëmi ata. Pacuenia caejivi canacujitsia vajatuxanenë pijajivi bëpënëa najamatabëxaina petonacuenebavanapaejavata, vajatuxanenë itajëtsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barëyataenatsi petonacuenebavanapaejava yabara.

6 Tajamonae, bajarapacuenia pacatoyaquinatsi Apolos yabara, xanë ata yabara, patacayapëtaeyaexanaenexa. Bajarapacuenia pacatoyaquinatsi, Dioso pejumelivais-ibaxutota pejumaitsicueniavecua, bitso bepaayaijamatabëcuenenënëbeje patanetaeyanivamë. Bajarapacuenia pacatoyaquinatsi itsamonae ata, pamonae Dioso petonacuenebavanapaevi, najëpaeya paneyaiyataenexa. Pëtsa itsamonaavecua beayaijamatabëcuenenë pataneme caenë ata. Bajara pijinia pacuenia beveliajamatabëcuenenë pëtsa pataneme caenë ata. 7 Paxamë ata pëtsa itsamonaavecua bepaayaijamatabëcuenevimë panataneme. Itsa panavajunupaebabiabame, apo panavajunupaebabiabimë Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonae ata pata paxamëjavata papecatsipaebinexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayaijamatabëcuenevimë pëtsa panataneme itsamonaavecua.

8 Paxamë jamatabëcuenenavëxaniabiaya panajamatabëxainame mapacueniaje: “Pacuenia ricovi ayaijava pecobecovë xaina, bajara vaxaitsi itsitsi Dioso pejumelivaisi vajajumecovënëtsijava. Tsipaji ayailivaisi xainatsi. Tsipaji baja itsamonae bitso nacatsipaebabiaba Dioso pejumelivaisi. Nexata baja pematatsënëa apo namatavenonaetsi itsajivi ata vajanacatsipaebaponaenexa,” pajamatabëjamë tsabiabi jamatabëcuenenavëxaniabiaya. Jamatabëcuenenavëxaniabiaya Dioso pijacuene bepaneevensivi panataneme. Nexata meta paxanë matatoxenetsia bitso bepaayaijamatabëcuenevimë panataneme. Dioso pijacuene itsa paneevensivi tsipae, nexata pacasivajamatabëcuenebarëyatsi tsipae. Nexata vajanajuaeevensivi tsipae Dioso pijacuene. 9 Paxanë, paapóstolevinë, Dioso covë panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinexa. Bajarapacuenia Dioso panetocopata bijiaya patanetaenexa ángelevi ata, daxitajivi ata. 10 Paxanë, Cristo xaniavaetsia patajumecovënëtsivi, itsamonae panetane bepatanematajemabivi. Paxamë, Cristo

xaniavaetsia apo panejumecovënëtsivi ata, Cristo pijacuene bitso bepanyapëtaevi itajara panataneme. Caranata paxanë itsamonae bepataajamatabëcuenesaëjibivi panetane. Caranata juya paxamë bepaneajamatabëcuenesaëvi panataneme. Paxanë itsamonae apo paneyaiyatae. Paxamë panayaiyataneme. ¹¹ Cristo pelivaisi jivi itsa patsipaebaponajë mapamatacabijavaberena ataje, bitso baja cajena panabejiobitabiabajë. Patajani tsabiabi. Mera pajitsipabiabajë. Bitso pajumaesebejenë tsabiabi. Jivi panebeyabiaba pecobeta. Apo paxainabiabinë pabota panapatsijitsianë. ¹² Pacueranabiabajë bitso patanacuenebabiabijava patacobeta. Jivi panebijataeyabiaba pibisiacuenia. Itsiata apo pajumeanaecanaviatabiabinë. Biji caranata paxanë bajarapamonae patovajëtabiabajë Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabëcuenemoyanë tsabiabi. ¹³ Pibisiacuenia panebaracuaicuajai tsabiabi itsamonaejavabelia. Itsiata bajarapamonae pexaniajamatabëcuenia xaniavaetsia pamuxujiobabiabajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënuu panetaeyabiaba.

¹⁴ Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujiobinexa xaniavaetsia. Pacuenia muxujiobijitsipajë taxi, bajarapacuenia pacamuxujiobatsi. ¹⁵ Xanë copiaya pacatsipaebatsi pexanialivaisi, Cristo pelivaisi. Nexata baja panajamatabëcuenecopatame Jesucristojavabelia. Bajaraxuata xanë bepatacavitsatsivixae, panetaneme bepeneaxanë. Paxainae atamë tsipae diez mil ponëbeje papecatsipaebivinexa Cristo pelivaisi, itsiata xanë caenënë panetaejitsipame bepeneaxanë. ¹⁶ Bajaraxuata asaëyata pacamuxujiobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaraponë bitso tasivanë. Betaxënatocuenia tataenë. Xaniavaetsia pejumecovënëtaaponaponanë Dioso. Bajaraponë Timoteo pacatoitorobatsi baja papecatsipaebinexa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxaenë, tsitaexanabiabajë daxita Dioso pejumecovënëtsijava, itsaxuayo tsipaebaponajë Cristo pelivaisi. ¹⁸ Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae

xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. ¹⁹Itsiata baitsi jane Dioso itsa netocopatsiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcuenëitsi tsavanapae pamonae beayaijamatabëcuenevi natane. Tsipaji raeta bajarapamonae pepacuene ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. ²⁰Pamonae Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuenesaë tsavanapae. Ëpecuibovojotota apo jumaitsi. Biji rajane bajarapamonae pejamatabëëthëtojavavetsina Dioso jumecovënëta. ²¹¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

5

Pacuenia Dioso pejumecovënëtsivi tuatuajëta ponapona bitso pibisiacuene pexanaponaponaenë yabara pelivaisi

¹Paxamë tuatuajëta bitso pibisiacuene pexanaponaponaenë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënënë pita pina pijavanexa paxa pijavami. ²¡Bajaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenëvimë panataneme! ¡Biji rajane bajaraponë pibisiacuene pexanaejava, bitso bepasivanajamatabëxainame! ¡Bepayapijiviauramënuu bajaraponë! Bajaraponë pibisiacuene pexanaponaponaenë, bepanavecuacapitsapame. ³Paxamëjavata apo naponaponaenë, itsiata paxamëjavata betanaponaponaenë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavanexatsi yabara pibisiacuene pexanaponaponaexae. ⁴Paxamë panacaetuare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabënajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. ⁵Pibisiacuene pexanaponaponaenë paxamë tuatuajëta, panavecuacapitsapare baja dovathijavabelia. Nexata daxita pibisiacuene penatojitsipaecuenia pexanaejava yabara, dovathi pebejiobiaexanaenexatsi. Nexata belia icatsia

Dioso jumecovënëtsiana. Bajarapajamatabëcuene jane baja capanepaenatsi pamatacabi vajatuxanenë Jesús patsianica.

⁶ Papibisiacuene bajaraponë exanaponapona, panaitax-utojematsi atamë, itsiata bepaayaijamatabëcuenevimë panataneme. Abeje raja pibisiacuene pexanaponaponaenë panecuenenaitaxutojematsijava. Payapëtaneme rabaja mapacueneje. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsipae caenë itsa pacuenecopatsipame pibisiacuene pexanaponaponaexava paxamë tuatuajëta. Daxitajivi belia pibisiacuene exanaponaejitsipa bajaraponë pejamatabëcueneta.

⁷ Bajaraxuata panavecuacapitsapare baja, ponë pibisiacuene exanaponapona paxamë tuatuajëta, daxitajivi pejamatabëcuenebijianaeyaniva bajaraponë pejamatabëcueneta. Pacuenia itsi perujupanmatabë, levadurata pematajërëabimatabë, bajara jamatabëcueneitsi bajaraponë, pibisiacuene pexanaponaponaexae. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcueneta pejanajamatabëcuene paxainame. Nexata pacuenia itsi levadurata apo pematajërëabipanmatabë, bajarapajamatabëcueneitsimë. Tsipaji baja Dioso aneconijibia pacatane. Paxamë baja aneconijibia Dioso pacatane. Tsipaji Cristo pacasivatëpa. Cristo baja cajena beovejayo tanetsi Dioso. Tsipaji nacasivatëpa cruzata pibisiacuene vajaexanaeconomy vajanacavecuajaibiaexanaenexa. ⁸ Nexata baja aeconomy pibisiacuene apo beexanavanapaetsi. Jesucristo pijajivixaetsi, itsajamatabëcuene xainaenejevatsi, pexanijailivaisi jumecovënëtavanapaenatsi. Bajarapacuenia itsa jumecovënëtavanapaenatsi, nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavanapaexae.

⁹ Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavana-paeyaniva. ¹⁰ Dioso apo pejumecovënëtsivi, itsamonae, pibisiacuene exana pevitota. Itsamonae najamatabëxaina ëpamonaenexa ayajava pexainaecuene pexainaenexa. Itsamonae nacobetoxota. Itsamonae, jumapecataeya pexanaenëanëjavabelia, navajëca. Bajarapitsicuene pexanaevi, Dioso apo pejumecovënëtsivi, panenavecuat-satsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovënëtsivi,

itsa panavecuatsatsipame, nexata pepacuene mapanacuavecuaje athëbëabetsia ëpaneponaenexa tsipae. Tsipaji daxita mapanacuajavaje bajarapitsicuene pexanaevi yacaëjëpa. ¹¹ Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacuene itsa exana pevitota, ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuenia itsa baracuaicuajai, itsa aitajibi tsabiabinua, itsa nacobetoxotania, bajarapajivi pëtsa payajavajinavanapame. Pëtsa payajavaxanemenua caejavata, pacajunatsi ata. ¹²⁻¹³ Pamona abaxë Dioso apo pejumecovënëtsivi, bajarapamonae yabara tajumaitsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonae. Itsiata baitsi jane pamona Dioso panenajuajumecovënëtsivi, panenacaetuatabiabibota panenajuajoneyabiabivi, pibisiacuene itsa exana, paxamë bepacueneitavetame. Bajaraxuata nexata panavecuacapitsapare baja ponë paxamë tuatuajëta pevitota pibisiacuene exanaponapona.

6

Pacuenia Dioso pejumecovënëtsivi itavetatsi Dioso penajuajumecovënëtavanapaevi peneconitsiyaniya juezmonaejavabelia yabara pelivaisi

¹ Itsanë paxamëyajuvënënë, Dioso pejumecovënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmonae Dioso apo pejumecovënëtsivi. Bajaraxuata Dioso panenajuajumecovënëtsivi apo bepaneconitsimë juezmonaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi. ² Payapëtaneme rabaja mapacuenije. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopatsiana vajananeconitsiaexanaenexa pamona pijaneconi pexainaevi. Daxita mapanacuapijivije, pamona Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacaëjëpa panelivaisixanetsinexa paneconi exana panetuatuajëta. Tsipaji mapanacuata jivi pevetsijamatabëcuene bevelijamatabëcuene saya. Apo ayapëbeje bitso. ³ Payapëtaneme rabaja mapacuenije. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxë aeconoxae paneji-

navanapaeepato mapanacuataje, pacacaējēpa panelivaisixanetsinexa paneconi exana panetuatuajēta, mapanacuapijilivaisije. ⁴ Itsiata baitsi jane paxamēyajuvēnjivi itsa pacaitsacueniaba mapanacuataje, itsiata panijacuata apo palivaisixanetabiabimē pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenexatsi. ⁵ Mapacuenia pacajumaitsitsije patacaurabinexa. Paxamēyajuvēnjivi itsa pacaitsacueniaba, ħajibi tsabaja caenē ata paxamēyajuvēnēnē pexanialivaisi peyapētaenē pelivaisixanetsinexa bajarapalivaisi? ⁶ Dioso panejumecovēnētsivixae, juezmonaejavabelia apo bepaneconitsimē Dioso panenajuajumecovēnētsivi.

⁷ Bajarapacuenia panacaevēnavi atamē paneneconitabiabixae juezmonaejavabelia, daxitajivi pacacueneyapētane xaniavaetsia apo panejinavanapaejava Dioso pitabarata. Nexata panacaevēnavimē itsa pacaitsacueniaba, itsa pacatonacobetoxotanea, Dioso panejumecovēnētsivixae, xanepanaejitsipa itsa pajamatabēcuenemoyamē tsipae. ⁸ Itsiata baitsi jane paxamē Dioso panenajuajumecovēnētsivijavabelia ata, paitsacueniababiabame. Yamaxēitorobiaya pavecuanacobetoxotabiabamenea.

⁹⁻¹⁰ Payapētaneme rabaja mapacueneje. Pibisiacuene pexanaevi apo yajavajinavanapaetsi tsane Dioso pijanacuatatsia. Bajaraxuata pētsa paexaname panijacuata panenatojitsipaecuenia. Dioso pijanacuatatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenēanējavabelia penavajēcaevi. Apo yajavajinavanapaetsi tsane pejaitisivi itsava pijavavecua. Apo yajavajinavanapaetsi tsane pejaitisivi itsanē pamonavecua. Apo yajavajinavanapaetsi tsane penaquenetsiataevi nacaevēnapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane epamonaenexa pexainaecuene penatojitsipaevi. Apo yajavajinavanapaetsi tsane piaitajibitsabiabivi. Apo yajavajinavanapaetsi tsane itsamonae pibisiacuenia pebaracuaicuaijivi. Daxita bajarapitsivi apo yajavajinavanapaetsi tsane Dioso pijanacuatatsia. ¹¹ Bajara picani bajayata paxamēyajuvēnēvi pacuenia exanavanapa. Itsiata baitsi jane aeconoxae baja pibisiacuene paneexanaeneconimi, Dioso baja pacavecuaajibiaexana. Pacatsata baja Dioso papijavivexamē. Dioso baja aneconijibia pacatane vajatuxanenē Jesucristo pejamatabēcueneta. Espiritu Santo ata pesaēta pacayavenona panejumecovēnētsinexa vajatuxanenē papecaitorobicuenia.

Pacuenia Dioso pejumecovēnētsivi xaniavaetsia

bejinavanapa Dioso pitabarata yabara pelivaisi

¹² Itsamonae jumaitsi: “Mapanacuata navita vajaex-
anaejavanexa. Itsajivi ata apo nacaitavetsi bajarapacuene
vajaexanaenexa,” jai itsamonae. Xaniajai rabaja picani.
Itsiata baitsi jane daxita bajarapacuene vajaexanaenexa,
apo nacatoxanepanae.

Mapanacuata navitsi ata
vajaexanaejavanexa, xua itsajivi ata apo nacaitavetsi,
itsiata bejamatabëjumaitssitsi mapacueniaje: “Papibisiacuene
taexanaenexa tajamatabëcuene nitorobabiaba, apo exanaenë
tsane Cristo pijajivitonëxaenë. Tsipaji itsa exanaejitsipajë
bajarapapibisiacuene, nexata tajamatabëcuene bepijajivi-
tonëncuenia jumecovënëtabiabijitsipajë,” bejamatabëjaitsi
pibisiacuene vajaexanaeyaniva.

¹³ “Vajaxaejava raja
vajacotsorotopijijavanexa. Vajacotsoroto raja pijinia
vajaxaejava peecaenexa,” pejailivaisi, xaniajai baja cajena.
Itsiata baitsi jane itsamatacabi Dioso bajarapacuenebeje
vereverecaeyaexanaena. Daxita raja vajaperabëtuareca
pibisiacuene apo vajaexanavanapaenexa. Vajaperabëto
raja Dioso nacatocopata vajatuxanenë vajatonacueneba-
vanapaenexa. Vajatuxanenë rabaja pijinia vajaperabëtota
vajanacayajavaponaponaenexa. ¹⁴ Dioso baja cajena
icatsia asaëyaexanatsi vajatuxanenë petëpaecujinae. Bajara
pijinia pacuenia vaxaitsi ata itsamatacabi Dioso pesaëta
nacaasaëyaexanaena vajatëpaecujinae.

¹⁵ Payapëtaneme rabaja mapacueneje. Pacaenëmë
canacujitsia, caenë Cristo peperabëtojavabelia becaeperabëto
panaexaname papijajivixaemë. Xanë ata rabaja Cristo
bepeperabëtoyajuvënënënë. Bajaraxuata pibisiacuene apo
bexanaenë tavitota pibisiacuene pexanabiabivajavabelia,
bajarapova bepeperabëtoyajuvënëjavanë tanaexanaeyaniva.

¹⁶ Payapëtaneme rabaja mapacueneje. Pebi pibisiacuene
itsa exana pevitota pibisiacuene pexanabiabivajavabelia,
bajarapajivibeje becaeperabëto naexanabeje. Dioso
pejumelivaisibaxutota jumaitsi penapitsijivibeje yabara
mapacueniaje: “Anijajivimibeje becaejivi naexanabeje,”
jai.

¹⁷ Nexata pijinia pajivi najamatabëcuenecopata
vajatuxanenë Jesucristojavabelia, bajarapajivi becaejivi
naexana vajatuxanenë Jesucristojavabelia.

¹⁸ Pevitota pibisiacuene pexanaeyaexanaejamatabëcuene,
pavecuanajetabajiravabiabare. Itsajava raja pibisiacuene
pexanaejava, bitso jivi apo jamatabëcuenebijianaetsi. Pacuenia
pevitota pibisiacuene pexanaejava, jamatabëcuenebijianatsi,
apo itsi. Ponë jaita itsava pijavavecua pibisiacuene pex-
anaenexa pevitota, bitso pibisiacuene exana. Petiriva ata,
pova jaita itsanë pamonavecua pibisiacuene pexanaenexa

pevitota, bitso pibisiacuene exana. Pajivi bajarapapibisiacuene exana, bitso najamatabëcuenebijiana. ¹⁹ Payapëtaneme rabaja mapacueneje. Paneperabëto baja cajena Espiritu Santo pijabo papecatsijamatabëcaexae. Dioso cajena pacarajuta pijaEspiritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainamë panijacuata panenatojitsipaecuenia paneexanavanapaenexa. ²⁰ Tsipaji Dioso ayaimatamota pacacomuata. Nexata Dioso papijajivixaemë, xaniavaetsia panejamatabëëthëtovetsina Dioso jumecovënëtsiaya paji-navanapare. Nexata daxitajivi Dioso yayiataeponaena paxamë xaniavaetsia itsa patsitajinavanapame.

7

Pemuxujobilivaisi penapitsijivibeje yabara pelivaisi

¹ Xua yabara panetoyaquinaremena pataneyanijobinexamë, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacuene pexanaevi. Bajaraxuayaniva caepebi canacujitsia pijava bexaina. Bajara pijinia itsi petiriavi ata. ³ Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. ⁴ Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxainabeje. ⁵ Papetiriavimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panenavecuanaperabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavabelia. Pamatacabimaxëto panavajëcaejitsiamëbeje Diosojavabelia, bajarapamat-acabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tsipaji panevajënaeyabeliabeje itsa panavecuanaperabëasivamëbeje tsaponae tsipae, nexata dovathi pacajamatabëcuene yamaxëtojobijitsipabeje. Nexata pibisiacuene paexanaejitsipamebeje, pacuene picani apo bepaexanaemëbeje.

⁶ Itsa pacamuxujobatsi panenacojobinexa pibisiacuene paneexanaeyaniva panevitota, apo pacaitorobitsi daxita panenacojobinexa. Pamonaē jitsipa penacojobijava, nacojobi. ⁷ Pacuenia xanē imasia ponaponajē, bajara-pacuenia picani paxamē ata imasia panejinavanapaejava, pacatojitsipatsi. Itsiata bailsi jane Dioso pacaenēmē canacujitsia papecayavenonaponaexae, pacacaejēpa baja pacuenia paexanavanapaejitsiamē. Itsamonae paxamēyajuvēnēvi itsacuenia Dioso jamatabēcuene caējēpaeyaexanaponatsi Dioso pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabēcuene caējēpaeyaexanaponatsi.

⁸ Mapacuenia saicaya jumaitsinēje pimasiarubenaevijavabelia, pamonajivi pevecuatēpaevitsijavabelia ata. Bajara-pamonae picani toxanepanatsi imasia pejinavanapaejava pacuenia xanē imasia ponaponajē. ⁹ Itsiata bailsi jane itsa apo caējēpaetsi penajamatabēcuenesaētsijava, nexata pibisiacuene pevitota pexanaeyaniva, roviaalia benacojoba. Bajara-pamonae toxanepanatsi roviaalia penacojobijava. Tsi-paji itsa apo nacojobi tsipae, epibisiacuene pexanaenexa najamatabēxainaejitsipa. Nexata najamatabēcuene bijianaponaejitsipa.

¹⁰ Paxamē baja panenacojobivi mapacuenia pacajumait-sitsije. Itsiata xanē apo tajamatabēcuene. Pacuenia vajatuxanenē jumaitsi, pacaitorobatsi. Papetiriavimē, pētsa pavecuanaviabame paneamonajivi. ¹¹ Pacamuxujobi atatsi, itsiata pova vecuanaviata pamona, bajarapova beponapona imasia. Apo benacojobi baja. Itsa jume, benapitabeje icatsia pamonacovēnēbeje. Bajara pijinia itsi pebi ata. Pebi apo bexuabi pijava.

¹² Paxamē tuatujēta Dioso apo pejumecovēnētavanapaevi yabara, jumaitsinē mapacueniaje. Itsiata vajatuxanenē apo pejumaitsi jume. Dioso pejumecovēnētsinē pijava, itsa apo pejumecovēnētsiva Dioso, itsiata bajarapova itsa jitsipa peponaponaenexa bajaraponējavabelia, nexata bajaraponē pijava apo benavecuaitavetsi pevecuanaviatsinexatsi.

¹³ Dioso pijinia pejumecovēnētsiva pamona, itsa apo pejumecovēnētsinē Dioso, itsiata bajaraponē itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi.

¹⁴ Dioso pejumecovēnētsiva pamona, apo jumecovēnētsi ata Dioso, itsiata bajaraponē Dioso copatsiaexanaenatsi mapanacuapijipibisiacuene pexanabiabijavami. Bajara-pacuenia Dioso copatsiaexanaenatsi tsipaji bajaraponē pijava Dioso pejumecovēnētsiva. Bajara pijinia itsane Dioso

pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijip-ibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane pamona Dioso apo pejumecovënëtsivi, bajarapacuenia coxitaejitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso. ¹⁵ Itsiata Dioso pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponanexa. Tsipaji Dioso nacajunata jamatabëcuenexanepanaeya vajajinavanapaenexa. ¹⁶ Papetiriavimë, paneamonajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane paneamonajivi, paneamonajivi ata meta najamatabëcuenecopatsiana Cristojavabelia. Papebijivimë pijinia, panijavajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane panijavajivi, panijavajivi ata meta najamatabëcuenecopatsiana Cristojavabelia. Bajaraxuata jamatabëcuenexanepanaeya panacajinavanapare. Pëtsa panavecuanaviabame.

¹⁷ Caenë canacujitsia tsiteca bexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë. ¹⁸ Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtaponapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtaponapona. Apo benaperabëcaucutsiaexanae. ¹⁹ Vajanacaperabëcaucutsijava, amatamobi Diosojavabelia. Apo vajanacaperabëcaucutsijava

ata, amatamobi Diosojavabelia. Dioso rajane vajanacaitorobicuenia vajajumecovënëtavapanapaejava, bajara jane xua, namatamota Diosojavabelia. ²⁰ Caejivi canacujitsia benacuenebaponapona xua nacuenebaponapona Dioso pejunatsivajënaeyatsi. ²¹ Itsamonae baja paxamëyajuvënëvi Jesucristojavabelia penajamatabëcueneocopatsivajënaeya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcueneocopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. ²² Ponë itsamonaejavabelia canajetatsi, nexata amoneya itsa tonacuenebaponapona, bajaraponë bitso pibisiacuene pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabëcueneocopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanaponapona. Bajara pijinia itsi ponë ata apo canajetsitsi itsamonaejavabelia. Itsa najamatabëcueneocopata Cristojavabelia, bajaraponë Cristo pijajivitonë baja naexana. Nexata bajaraponë ata exanaponapona Dioso pitorobicueniatsi. ²³ Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënëtavapanapaejavavecu. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavanapaenexa papecaitorobicuenia. ²⁴ Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuenia, nexata bajarapacuenia pajinavanapare. Itsamonaejavabelia papecacanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

²⁵ Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane

pacatsipaebianatsi pacuenia sivanajamatabëxainajë bajara-
pitsivi. Dioso tajamatabëcueneta neyapëtaeyaexana taneitax-
utotsoniataexae. Bajaraxuata pacatoxanepana pacuenia
pacatsipaebijitsiatsi patanejumecovënëtsinexamë. ²⁶ Dioso
vajajumecovënëtavanapaevi, nacatsiayai bitso aeconoxae va-
jajinavanapaepato abaxë mapanacuataje. Tsipaji itsa-
monae vajanacaitoyaxae, nacabejiobiaexanaponaena. Ba-
jaraxuata netsitaxanepana bajarapamonae itsa apo naco-
jiobavanapae. ²⁷ Itsa baja capanepaeya penacojiobivi, pëtsa
xuaba pijava. Itsiata baitsi jane itsa abaxë apo nacojiobi,
pëtsa jaita pijavanexa. ²⁸ Ponë baja capanepaeya nacojioba,
apo pibisiacuene. Petiriva ata baja itsa nacojioba, apo exanae
pibisiacuene. Aeconoxae daxita Dioso vajajumecovënëtsivi
bitso vajanacatsiyaixae, pamonaе baja nacojioba, bajarapa-
monae toayapëbeje tsanetsi pevecuapanepaenexa bajarapa-
piayaicuene. Bajarapacuenia petoayapëbejeyanivatsi, bajarapa-
monae picani tojitsipajë imasia pejinavanapaenexa.

²⁹ Tajamonae, mara pacuenia jamatabëpacajumaitsitsije.
Imoxoyo rabaja pevajënae vajatuxanenë icatsia
pepatsijavanexatsica. Ajena, mapamatacabicujinaelia
tsaneje, penacojiobivi ata bepimasiarubenaevicue-
nia asaëyata betonacuenebavanapa vajatuxanenë.
³⁰ Daxitajivi bejamatabëcueneenatsi ëDioso pijacuene
petonacuenebavanapaenexa. Pamonaе bitso naja-
matabëxaina peyajuvënëtëpaexae, bajarapamonae ata
najamatabëxainaenejeva asaëyata betonacuenebavanapa
vajatuxanenë. Apo bepenajamatabëxainaevicuenia, bejina-
vanapa. Pamonaе ata jamatabëcuenebarëya tsavanapae,
asaëyata betonacuenebavanapa vajatuxanenë. Apo
bepejamatabëcuenebarëyavicuenia betonacuenebavanapa.
Pamonaе ata comuaca pexinaejavanexa, asaëyata
betonacuenebavanapa vajatuxanenë. Asivaya apo
betae xua natocomuaca. ³¹ Pamonaе ata, mapanacuata
pexinaejava, canacuenebavanapa, bajarapamonae
becanacuenebavanapa jamatabëcueneçënënaenejevatsi
bajarapajamatabëcuene. Tsipaji mapanacuapijicuene
vajataejavami vereverecapona.

³² Apo pacatojitsipaetsi papecajamatabëcueneenaenexa
mapanacuapijicueneje. Ponë abaxë imasia ponapona,
jamatabëcueneenatsi ëvajatuxanenë pijacuene. Tsipaji jitsipa
pesivajamatabëcuenebarëyanexatsi vajatuxanenë. ³³ Itsiata
baitsi jane penacojiobinë yajavajamatabëcueneenatsi
pevetsinexa pijava pesivajamatabëcuenebarëyanexatsi.
³⁴ Apo najamatabëcuenejëpaebeje pijinia penacojiob-
bivabeje pimasiarucaevabeje. Pova apo nacojiobi,

jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipanua pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

³⁵ Bajarapacuenia itsa pacajumaitsitsi, apo penacojiobivi apo itavetsinë penacojiobijava. Patacajamatabëcuene yavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

³⁶ Ponë pexënatoyo xaina, itsa tsitaxanepanatsi pexënatoyo petonacojiobinexatsi, nexata betocopata penacojiobinexa. Tsipaji baja penaveretsiva tsaponapona. Bajarapova ata baja itsa jitsipa penacojiobinexa, betocopata penacojiobinexa. Itsa tocopata pexënatoyo penacojiobinexa, apo pibisiacuene. ³⁷ Ponë pijinia pexënatoyo itsa apo jitsipae abaxë penacojiobinexa, bajaraponë ata itsa najamatabëcuenevereta apo petocopatsinexa pexënatoyo penacojiobijava, nexata bajaraponë ata pexaniacuene exana. ³⁸ Nexata ponë apo tocopatsi pexënatoyo penacojiobinexa, bajaraponë itsanëvecua bitso pexaniacuene exana.

³⁹ Penacojiobiva baja acuenebi pevecuanaviatsinexa pamona. Tsipaji pamona piasaëtsaponaponaepato, bajaraponë abaxë tsiteca pijava tsaponapona. Tsipaji bajarapacuenia Dioso najumecopata. Itsiata baitsi jane pamona itsa vecuatëpatsi, bajarapova tocopatatsi icatsia penacojiobinexa. Tocopatatsi penacojiobinexa ponëjavabelia jamatabënacojioba, itsa bajaraponë ata Dioso pejumecovënëtsinë. ⁴⁰ Itsiata bajarapova pamona pevecuatëpaecujinaetsi, imasia abaxë itsa ponapona, jamatabëcuenebarëya tsaponapona tsane ëDioso pijacuene pejamatabëcueneenaponaponaexatsi. Nexata baja itsa nacojiobiana, bevelia baja jamatabëcuenebarëya tsane. Pacuenia copiaya jamatabëcuenebarëya tsaponapona, apo itsi tsane baja. Bajarapacuenia najamatabëxainajë bajarapacueni yabara. Bajarapacuenia itsa pacajumaitsitsi, Espíritu Santo neyjavacuaicuaijai.

8

Jumapecataeya pexanaenëanëjavabelia perajutsiviya-juvënëjava yabara pelivaisi

¹ Jumapecataeya pexanaenëanë itsamonae tane bepíadiosovi. Nexata bajarapamonae dajubi

beyabiaba perajutsinexa bajarapavi jumapecataeya pexanaenëanëjavabelia. Bajarapaviyajuvënëjava panexaejava ata yabara, paneyanijobame ita panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacueene yapëtanetsi. Pavi rajuta jumapecataeya pexanaenëanëjavabelia, bajarapaviyajuvënëjava xae atatsi tsipae, apo nacaitsacueniabi tsipae. Itsiata vajaxaecujinae bajarapaviyajuvënëjava, ita jamatabëjumaitsitsi: “Xanë bitso yapëtaniji pamona mapavije atsobabiaba matatoxenetsia,” ita jamatabëjaitsi, abeje rajane bajarapajamatabëcuene. Tsipaji beayaijamatabëcuenejivitsi nataejitsipatsi bajarapamonaevectua. Biji rajane xanepana vajajamatabëjumaitsinexa mapacueniaje: “Asivaya taniji Dioso patanajuajumecovënëtsivi, pamona atsobabiaba jumapecataeya pexanaenëanëjavabelia perajutsivivajuvënëjava. Nexata xanë ata apo xanë tsane bajarapaviyajuvënëjava. Nexata xaniavaetsia tsitaponaponaenajë bajarapamona taneitaxutua ajamatabëcuenesaënexa Diosojavabelia,” vajajamatabëjaijava xanepana. Bajarapacuenia ita tsitaponaponatsi Dioso pejumecovënëtsivi, nexata nacaitaxutuaajamatabëcuenesaë tsaponae Diosojavabelia. ² Pajivi jamatabëjumaitsi: “Xanë cajena bitso yapëtaniji daxitacuene,” jamatabëjai, bajarapajivi pejamatabëcuenenavëxaniabijivi. Abaxë ayaijava tosaicatsi xaniavaetsia peyapëtaenexa. ³ Itsiata baitsi jane pajivi Dioso jitsipa, bajarapajivi Dioso ata jamatabëcueneyapëtanetsi Dioso pejitsipaejava.

⁴ Nexata jitsipajë patacayapëtaeyaexanaenexa itsamonae jumapecataeya pexanaenëanëjavabelia perajutsiviya-juvënëjava pexaejava yabara. Vaxaitsi baja cajena yapëtanetsi jumapecataeya pexanaenëanë apo pexaniajaicuene. Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. ⁵ Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya. ⁶ Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepo vajatuxanenë Jesucristo. Bajaraponë pejamatabëcueneta exana daxitacuene. Bajaraponë pejamatabëcuenetanua nacacapanepaena vajaneconivectua.

7 Itsiata baitsi jane itsamonae Dioso pejume-covënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. Bajarapamonae pejevaxi-javaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivajamatabëjai tsabiabi bajarapamonae jamatabëcuenenavëxaniabiaya. Bajaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviya-juvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacuene meta exanajë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. 8 Yapëtanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vajaxaejava apo nacavënananeconitsiaexanae Dioso. 9 Paxae atamënuu, apo paxae atamënuu, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovënëtsivi asivaya panetaexae, pëtsa patsitaexaname itsacuenejavayo ata, xua bepibisiacuene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaefaena Dioso pejumecovenëtsijava. 10 Paxamë pëtsa panabaneme pabojavata jumapecataeya pexanaenëanëjavabelia perajutsiviya-juvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviya-juvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponë ata naxaejitsipa. Nexata penaxaexae, bepenaneconitsinë Diosojavabelia nataejitsipa. 11 Paxamë picani bajarapitsinë matatoxenetsia paneyapëtaexae, paxaejitsipame bajarapaviya-juvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaefaena Dioso pejumecovënëtsijava. Bajaraponënexa ata cajena Cristo sivatëpatsi. 12 Bajarapacuenia itsa pajamatabëcuenebijianaejitsipame Dioso pejumecovënëtsijivi, nex-

ata pananeconitsipame Cristojavabelia. ¹³ Bajaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxaejava pejamatabëcueneta, nexata caeto ata apo tsitaxaenë tsipae bajarapavijajuvënëjava asivaya tataexae bajarapajivi.

9

Pacuenia apóstolevi tocopatatsi, xua namatavenona, pe-vajëtsinexa Dioso pejumecovënëtsivijavabelia yabara pelivaisi

¹ Payapëtaneme rabaja mapacueneye. Xanë apo xae atanë jumapecataeya pexanaenëanëjavabelia perajutsivijajuvënëjava, itsiata Dioso netocopata daxitacuenetaxanaenexa Jesucristojavabelia tanajamatabëcuenecopatsixae. Payapëtanemenua vajatuxanenë Jesucristo taneitapetsijava apóstolenëexanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcuenecopatame Jesucristojavabelia. Tsipaji asaëyata tonacuenebaponaponajë vajatuxanenë. ² Itsamonae apo beapóstolenënetae ata, itsiata paxamë apóstolenëcuenenë paneyapëtaneme. Patacatsipaebixae pexanialivaisi, paxamë baja vajatuxanenë pajumecovënëtametame. Bajaraxuata picani daxitajivi xaniavaetsia beneyapëtanetane apóstolenëcuenenë.

³ Itsajota pexanialivaisi jivi tsipaebaponaponajë, Dioso picani netocopata tanerajutsinexa tanamatavenonaejavaxi. Itsamonae paxamëyajuvënëvi nejumeaebabiaba livaisi tatsipaebabiabijava mapacueniaje. ⁴ Paapóstolevinë itsa panacuenebajë Dioso pijacuenetane, panetocopata itsajota pexanialivaisi patsipaebavanapajë patanerajutsinexa pataxaejava, pataapaejava ata. ⁵ Itsa tanacojobinë tsipae, xanë ata pijinia Dioso netocopatsipa tabarëponaenexa tajava, Dioso pejumecovënëtsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenë pejuyapijivi ata, apóstolenë Pedro ata, pijava barëponabiaba. ⁶ Itsamonae itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje panacuenebabiabajëbeje patajacuatabeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamatavenonaejavaxibeje. Tsipaji paxanëbeje Cristo pelivaisi patacatsipaebabiabixabeje, Dioso picani panetocopatabeje patanerajutsinexamë patanamatavenonaejavaxibeje.

7 Payapëtaneme baja cajena mapacueneje. Itsanë itsa tonacueneba pijatuxanenë, barajutatsi pexaejava. Pamonaë ata pijinia vajabitsaë naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonaë pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvënëjava. Pamonaë pijinia itsanë pijaoveja toeveta, itsajivi ata apo janiitavetsitsi pemiujucaebarëmeneyajuvënëjava piapaeyaniva. Jume cajena. 8 “Maraeta pacuenia Pablo nacajumaitsije saya jivi petsitaxanepanaecueniatsi vajaexanavanapaenexa,” pajamatabëjamë pëtsa. Tsipaji rabaja Dioso pejumelivaisibaxutota ata bajarapacuenia jumaitsi. 9 Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi. 10 Biji rajane bajarapacuenia Dioso pejumelivaisibaxutota jumaitsi vajanacayapëtaeyaexanaenexa vajamatamotsijavanexa vajanacatonacuenebinë. Ponë canacueneba iracuemo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene patatonacuenebivi patanamatavenonaejavaxi, paxamë bepanerajutame Cristo pelivaisi patacatsipaebijamatabëcuene. 11 Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamatavenonaejavaxi, ¿pacatsitaayajava tsaja tsipae bajarapacueni? 12 Paxamë rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevectu.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaëja-

matabëcuene. Itsiata apo pacavajëtsitsi patanerajutsinexamë. Biji rajane piayapëbejecuena panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamavenonaejavaxi. Itsa pacavajëtsipatsi, itsajamatabëcuene meta paxainaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. ¹³ Payapëtaneme rabaja mapacueneje. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonaë penacuenebivi altarvënëjavata, itsajota dajubi tobeyabiaba ofrendacuena perajutsinexa bajarapavi Diosojavabelia, bajarapamonaë ata Dioso tocopatatsi pexaenexa bajarapaviyajuvënëjava. ¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaevi penamatavenonaejavaxi perajutsinexatsi. Pamonaë jumecovënëtapona petsipaebilivaisitsi, bajarapamonaë juya berajutapona xua namatavenona petsipaebivitsi. ¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipaenë patanematamotsijavamë. Itsa panematamotsijitsiamë tsipae, nexata jitsipaejitsipajë tatëpaejava patanematamotsiyanivamë. Tsipaji itsa panematamotsipame, copiarucaejitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ;Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi! ¹⁷ Dioso nitorobinejeva, saya xanë tajamatabëcueneta jivi itsa tsipaebaponaëjitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponaë vajatuxanenë taneitorobixae. Jumecovënëtaponaaponajë pacuenia Dioso nitorobapona. ¹⁸ Bajaraxuata apo nematamotsi ata, tsipaebaponaë

pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaenamatabëcuene, itsiata apo vajëtsinë tanerajutsinexa itsacuenejavayo ata. Jivi itsa tsipaebaponañë bajarapalivaisi, bitso jamatabëcuenebarëyanë tsapona. Bajaraxuata apo jitsipaenë tanematamotsijava.

¹⁹ Apo tanecanajetsinë raja dajubinëcuenia itsamonaejavabelia amoneya tatonacuenebinexa. Itsiata baitsi jane daxitajivi beprijavitonëncuenia ponaponajë. Bajarpacuenia exanaponaponajë itsamonae ayaibitsaëtöxaneto ata tayavenonaenexa, penajamatabëcueneocopatsinexa Cristojavabelia, pecapanepaenexatsi Diosojavabelia.

²⁰ Judíovi jumecovënëtsiajinavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponaenexa pacuenia itoröba Dioso Moiséspijinëta penajumecopatsilivaisi. Tsipaji baja najamatabëcueneocopatajë Cristojavabelia tajaneconi tanevecuaajibiaexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itoröbatsi, judíovi itsa exana, xanë ata bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë.

Nexata judíovi itsa najamatabëcueneocopata Cristojavabelia, pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeya naponaponabiabajë. Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcueneocopata Cristojavabelia, pecapanepaenexatsi Diosojavabelia.

Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcueneocopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneavenonaenexa bajarapamonae pevajënaeyabelia pijamatabëcuenesaë tsavanapaenexa vajatuxanenëjavabelia. Baitsi pacuenia

caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaejitsianë bajarapamonaejajuvënëvi ayaibitsaëtöxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

²⁴ Payapëtaneme rabaja mapacueneye. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. ²⁵ Daxita pamonaë penayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva pïajumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepïjia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo peverevereacajavanexa. ²⁶ Pacuenia pebitsojinaenë asaëyata kujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava. ²⁷ Bajaraxuata naperabëevetsia naevetaponaponajë pibisiacuene taexanaeyaniva. Bajarapacuenia naperabëevetsia naevetaponaponajë tsipaji jitsipajë vajatuxanenë tanesivajamatabëcuenebarëya tsaponaejava itsamonae itsa tsipaebaponajë pexanialivaisi. Apo jitsipaenë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajë, Dioso necopatsiaexanaejitsipa

tatonacuenebijava.

10

Pemuxujobilivaisi penavajëcaeyaniva jumapecataeya pexanaenëanëjavabelia yabara pelivaisi

¹ Tajamonae, pacatojitsipatsi icatsia panenajamatabënapitsinexa pacuenia bajayatami vajasalinaivimi Moiséspijinë barëpitsaparena Egipto nacuaverena. Moiséspijinë Dioso tsitajëtaponatsi itsaxuayo vajasalinaivimi barënajetaruaejitsia. Vajasalinaivimi pematatsënëatsia itarërëbo namataxainaeaya najetaruca. Nexata bajarapaitarërëbo vajasalinaivimi pënanajetarubena. Daxitabitsaëto vajasalinaivimi Moiséspijinë barënicabarena Rojovënë manuamenemaxërana epatuarena. ² Pacuenia pebi itsa bautisabatsi merata, naexana Dioso pijajivitonë, bajara pijinia pacuenia vajasalinaivimi Moiséspijinë pijajivi naexana itsa pënaponarena Egipto nacuaverena. Moiséspijinë pijajivi naexana vajasalinaivimi itarërëbo pebëxëpana itsa pënanajetarubena Moiséspijinë. Rojovënë manuamenemaxërana epatuarena ata itsa barënicabarenatsi, Moiséspijinë pijajivi naexana vajasalinaivimi. ³ Daxita vajasalinaivimi caeviriajava pexaejava najuanabanepona itsa najetarubena bajarapatusato nacuayarena. Papexaejava Dioso rajutaponatsi, bajarapamonaemi xaepona. ⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoxaneto. ⁵ Itsiata baitsi jane vajasalinaivimiyajuvënëvi, caejiviyobeje, saya jumecovënëta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabëcuenebarëyatsi. Daxita itsamonae apo jumecovënëtsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaëjëtatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabëëthëtovetsina becanaëjëtatsi pibisiacuene vajaexanaeyaniva. ⁷ Bajaraxuata apo benavajëcaetsi jumapecataeya pexanaenëanëjavabelia pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenëanënexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabiaba penabaninexa,

piapaenexanua. Bajaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. ⁸ Apo bexanaetsinua vajavitota pibisiacuene pacuenia bajayata vajasalinaivimiyajuvënëvi exana. Bjarapitsivi tēpa caematacabita veintitrés mil pajivibeje. ⁹ Apo bejamatabëcuenejëtsitsinua vajatuxanenë pacuenia bajayata vajasalinaivimiyajuvënëvi Dioso jamatabëcuenejëta. Papibisiacuene vajasalinaivimi pejamatabëëthëtota natojitsipa pexanaenexa, Dioso jamatabëcuenejëtsiaya exanavanapa, peyapëtaenexa pacuenia Dioso exanaejitsia bajarapamonaejavaberena. Bjaraxuata vajasalinaivimi jomo pesinicujiruatsi vereverecapona. ¹⁰ Pëtsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moiséspijinëbeje Aarónpijinëbejavabelia. Bjaraxuata Dioso itoroba pijaángel peverebiabinexatsi vajasalinaivimiyajuvënëvimi.

¹¹ Bjarapacuenia exanatsi bajayata vajasalinaivimi. Dioso baja cajena nacayapëtaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bjarapalivaisi itanerubena Dioso pejumelivaisibaxutota vajanacamuxujiobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaetarayota jinavanapatsi. ¹² Itsa pajamatabëjumaitsimë: “Xanë cajena ajamatabëcuenesaënë Dioso tajumecovënëtsijava. Nexata apo exanaenë tsane pibisiacuene pacuenia bajayata tajasalinaivimi exana,” itsa pajamatabëjamë, ¡xania baja tsane! Tsipaji paxamë ata bajarapacuenia pibisiacuene paexanaejitsipame. ¹³ Xua baja aeconoxae pataeponame, dovathi pejamatabëcueneta papecajamatabëcuenejëtsijava, bajaraxua daxita Dioso pejumecovënëtsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcuenejëtaponaenexa paneajamatabëcuenesaëjava matatoxenetsia. Nexata dovathi itsa pacajamatabëcuenejëta, itsiata Dioso pacayavenonaponaena paneajamatabëcuenesaë tsaponaenexa. Nexata papecajamatabëcuenejëtsijava, pavecuapanepaponaenename pibisiacuene paexanaenejevamë.

¹⁴ Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare. ¹⁵ Pacajamatabëcuenecaëjēpa baja cajena panejumeyapëtaenexa patacatsipaebilivaisi. Nexata panejumecanaëjēre patacatsipaebilivaisi

paneyapëtaenexa itsa pexaniajailivaisi. ¹⁶ Itsa nacaetuanatsi vajanajamatabënapitsinexa xua yabara Cristo nacasivatëpa, najuaxanetsi pan. Najuamatavëjëaapatsinua vajanamatavëjëaapaera. Nexata pan yabara, vajanamatavëjëaapaera ata yabara, Diosojavabelia jumaitsitsi: “Pexaniacuene bitso panetoexaname. Panerajutame pan. Panerajutame patamatavëjëaapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacasivatëpa, caebitsaëto naexanatsi Cristo yajava, ponë nacasivatëpa cruzata. ¹⁷ Ayaibitsaëtoxaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaëtotsi Cristo pijajivitsi naexanatsi.

¹⁸ Pacanaëjëre pacuenia judíovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonae naxane bajarapavi, caebitsaëto Dioso pijajivi naexana. ¹⁹ Mara pajamatabëcuene yabara jumaitsinëje. Jumapecataya pexanaenëanë, itsacuenejavayo ata pexanaenexa, apo caëjëpaetsi. Bajara pijinia itsi pavi ata jumapecataeya pexanaenëanëjavabelia rajuta. Apo caëjëpaetsi jivi xae ata pejamatabëcuenebijianaenexatsi. Tsiapai jumapecataeya pexanaenëanë, bajarapavi apo ithothianae bajarapavivecua. ²⁰ Nexata abaxë pamonae Dioso apo yapëtae, dajubinë itsa tobeyaxuaba ofrendacuenia pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava. ²¹ Paxamë baja panenabanivi, paneapaevinua, vajatuxanenë pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënëtsivi dovathi pijacuene exanavanapa. ²² Vaxaitsi Dioso vajajumecovënëtsivi, apo jitsipaetsi vajatuxanenë vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenë nacabaraanaepanaejitsipa. Vaxaitsi cajena apo vecuaasaëtsi vajatuxanenë. Nexata apo vecuapanepaetsi tsiptae vajatuxanenë itsa nacananeconitsiaexana.

Pacuenia Dioso pejumecovënëtsivi bejinavanapa itsamonae pejamatabëcuenebijianaeyaniva yabara pelivaisi

²³ Xaniajai rabaja pacuenia itsamonae jumaitsi. Manacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi

jane apo nacatoxanepanae daxita bajarapacuene vajaex-
anaenexa. Daxitacuene, xua itsajivi ata apo nacaitavetsi
vajaexanaenexa, exanae atatsi tsipae, itsiata apo nacaja-
matabëcueneasaëyaexanae tsipae Dioso vajajumecovënëtsijava.
24 Pëtsa pajamatabëjumaitsimë: “¿De tsaeta xua natoexanae-
najë, xua éxanënexa netoxanepanaejitsia?” pajamatabëjamë
pëtsa. Biji rajane pajamatabëjumaitsimëre. “¿De tsaeta xua
toexanaenajë, xua itsamonaenexa toxanepanaejitsiatsi?” pa-
jamatabëjamëre.

25 Dioso baja cajena pacatocopata panexaenexa itaxuto-
jema. Nexata pacatocopata panexaenexa pavi canajeta
pecanajetsibota. Nexata pëtsa payanijobame. “¿Matsa pavi
jumapecataeya pexanaenëanëjavabelia peyajuvënërajutsivije?”
pajamë pëtsa. Itsa payanijobijitsipame bajarapacuenia:
“Jājā, bajarapayajuvënëvi,” pacajai tsipae. Nexata pax-
amë pajamatabëjumaitsimë tsipae bajarapavi yabara: “Ma-
pavije itsa xaejitsipajë, nexata pibisiacuene exanaejitsipajë
Dioso pitabarata,” pajamatabëjamë tsipae. Saya pacomuare
payanijobinejevamë. 26 Dioso baja cajena pacatocopata itax-
utojema panexaenexa. Tsipaji mapanacuaje, daxita ma-
panacuapijicuene ataje, Dioso baja cajena pijajava.

27 Dioso apo pejumecovënëtsijivi ata itsa pacajunata
panenanabaninexa pijaboyabelia, panaponare
panenanabaninexa itsa pajitsipame. Xua pacaabata,
paxaema payanijobinejevamë. “¿Matsa pavi jumapecataeya
pexanaenëanëjavabelia peyajuvënërajutsivije?” pajamë pëtsa.
28 Itsamonae Dioso pejumecovënëtsivi bepibisiacuene
pexanaejava taejitsipa itsa xaejitsipa bajarapayajuvënëvi.
Nexata panexaevajënaeya, bajarapamonaeyajuvënë
itsa pacajumaitsi: “Mara pavije jumapecataeya
pexanaenëanëjavabelia ofrendacuenia peyajuvënërajutsivije,”
itsa pacajai, pëtsa patsitaxaneme. Itsa apo patsitaxaemë
tsane, nexata apo pajamatabëcuenebijianaemë tsane
bajaraponë. 29 Itsa patsitaxaejitsipame, bajaraponë ata
naxaejitsipa. Nexata bajaraponë jamatabëjumai tsipae:
“Pibisiacuene baja cajena exanaejë Dioso pitabarata mapavije
tanaxaexae,” jamatabëjai tsipae.

Bajarapacuenia patacatsipaebijava, itsanë Dioso pejume-
covënëtsinë itsa jumetaena, jamatabëcuenenavëxaniabiaya
meta jumaitsi tsane mapacueniaje: “Jumapecataeya
pexanaenëanëjavabelia perajutsiviyajuvënëjava tax-
aeyabiabinexa, Dioso netocopata. Nexata baja
xaeiyabiabajë. Itsiata icatsia aeconoxae nitaveta itsanë
Dioso pejumecovënëtsinë itsa tsitaxaniji bajarapayajuvënëvi,
bepibisiacuene petaeyaniva. ¿De meta xuajitsia xanë

epatua copatsipajë bajarapayajuvënëvi taxaeyabiabijavami?
³⁰ Taxaevajënae bajarapavi, 'Xanepana rabaja,' janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuajai tsipae bepibisiacuene taexanaenë taxaejamatabëcuene bajarapayajuvënëvi?"
 jai meta tsane jamatabëcuenenavëxaniabiaya itsanë Dioso pejumecovënëtsinë. ³¹ Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaename paxamë panetsitaexanaejava yabara jivi papecasivajamatabëjumaitsinexa: "Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi," papecasivajamatabëjainexa.
³² Bajaraxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva.
³³ Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

Pacuenia petiriavi namataacatsiaya bejunua Dioso pejumecovënëtsivi penacaetuatabiabibota yabara pelivaisi

² Tajamonae, panejamatabënajinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi. ³ Pacatojitsipatsi paneyapëtaenexa mapacuenije. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. ⁴ Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. ⁵ Petiriva rajane pamona pejumecovënëtabiavacuene itsamonae

peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. ⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijiviaurayanivatsi. ⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliajamatabëcuene pexainaevacuene. ⁸ Copiata Dioso pebi itsa exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene. ¹¹ Vaxaitsi Dioso vajajumecovënëttavanapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajajamatabëëthëtota yapëtanetsi mapacueneje. Pebi itsa amatanapiareca, amataura tsipae. ¹⁵ Vajajamatabëëthëtota yapëtanetsinua mapacueneje. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi

piamatanapianexareca. Nexata bepemataacatsitsi pematana. ¹⁶ Itsajivi itsa jamatabëpanejumeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarpacuenia itsamonae ata, pamonaе Dioso pejumecovënëtsivi, najamatabëxaina. Tsipaji baja cajena patajacuene,” pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonae ayaijava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujiobinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranaponame. ¹⁸ Najamatabëxainajë copiaya patacajumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtoximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. ¹⁹ Baja raeta pacuenia navecuanatsanaeya panavecuaenabiabame. Tsipaji meta pajamatabëjumaitsimë tsabiabi: “Vaxaitsi cajena Dioso pepacuene jumecovënëtatsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabiabimë. Nexata Dioso pacatane saya jema bepanenacaetuatsivi. ²¹ Tsipaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaе cotocaeви pepatsivi, yavereverecabiaba. Nexata pijani tsabiabi. ²² Ëpanexaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamonaе nacaetuatabiaba penavajëcaenexa

Diosojavabelia. Paurababiabamenua pamonaē bepejioivi, pexaejava apo penacapatsivi. Pexaniacuene cajena apo paexanabiabimē bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabēcuene yabara nacaetuatabiaba Dioso pejume-covēñetsivi caejumeto canacujitsia yabara pelivaisi
(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenē Jesús pijajivi barēexana. Pameravi vajatuxanenē pijavajabitsaē pecobeyabelia canajetsijitsiatsi, bajarapameravi vajatuxanenē cobenanuca panbē. ²⁴ “Pexaniacuene panetoexaname. Pan panerajutame,” pejaicujinae Diosojavabelia, panbē epatsēnēca. Jumaitsi pijajivijavabelia: “Mara tavije patacasivatēpaejava paxamēnexa. Mapacueniaje tacovēta paexanabiabianame patanenajamatabēnapitsinexamē,” jai vajatuxanenē Jesús pijajivijavabelia. ²⁵ Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacacapanepaena tajana pejamatabēcueneta. Tajana raja nevecuarunaena tatēpaejavata papecacomuatsinexa panijaneconivecua. Mapacaapaejavataje, itsa papaeyabiabianame, panenajamatabēnapitabiabianame,” jai vajatuxanenē Jesús pijajivijavabelia. ²⁶ Nexata paxamē bajarapacuenia itsa paexanabiabame, patsitanaitajētabiabame itsamonaejavabelia xua yabara vajatuxanenē pacasivatēpa cruzata. Bajarapacuenia paexanabiabare vajatuxanenē icatsia pepatsimatcabitsicajavabelianexa.

Pacuenia Dioso pejume-covēñetsivi benaxaniavaeta, itsa nacaetuata penajamatabēnapitsinexa xua yabara Cristo sivatēpatsi, yabara pelivaisi

²⁷ Jivi itsa nacaetuata penajamatabēnapitsinexa xua yabara Cristo sivatēpatsi, becanaējētena. Tsipaji canaējētsinejeva itsa naxane pan, itsa apanua vajatuxanenē pecaapaejavata, bajarapajivi naneconitsipa vajatuxanenējavabelia, vajatuxanenē pevito, pijana ata, apo peyaiyataexae. ²⁸ Bajaraxuata caejivi canacujitsia xaniavaetsia benajamatabēcuenejaita pecaxitajarabinexa paneconi xainaponapona Dioso pitabarata. Bajarapacuenia benajamatabēcuenejaita pan penaxaevajēnaeya, pematavējēapaera ata penaapaevajēnaeya. ²⁹ Itsa naxane pan, itsa naapanua pematavējēapaera, becanaējēta pajamatabēcuene yabara vajatuxanenē

sivatēpatsi cruzata. Pajivi canaējētsinejeva naxane pan, naapanua pematavējēapaera, bajarapajivi pijacuata naneconitapona Diosojavabelia. ³⁰ Bajaraxuata paxamē ayaibitsaēto payajuvēnēavitanemē. Nexata itsamonae payajuvēnēcueraname. Itsamonae payajuvēnētēpame baja. ³¹ Bajaraxuata vaxaitsi vajanaxaevajēnae pan, vajanaapaevajēnae ata pematavējēapaera, benajamatabēnapitatsi Jesucristo vajanacasivatēpaejava vajaneconi yabara. Benajamatabēcuenejaitatsinua paneconi xainatsi Dioso pitabarata vajanavajunupaebinexa Diosojavabelia. Bajarapacuenia itsa exanaenatsi, vajatuxanenē apo nacananeconitsiaexanae tsane. ³² Itsa naneconitsianatsi, nexata vajatuxanenē nacabejiobiaexanaponaena Dioso apo pejitsipaecuene vajaexanaejava vajacopatsinexa. Bajarapacuenia vajatuxanenē nacaexanaena Dioso apo pejumecovēnētsivi yajava Diosovecua vajanaxuabiyaniava.

³³ Bajaraxuata itsa panacaetuatame panenajamatabēnapitsinexa xua yabara Cristo pacasivatēpa, paevetabiabianame abaxē daxita pepatsijava caecuenia panenajuaxaenexa. ³⁴ Pajivi pijani, bajarapajivi copiaya benabane pijabota pejonevajēnaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabēcuenejavaxi pematatsēnēa, xua yabara paneyanijobame, abaxē apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanatsi pexanaenexa pacuenia Dioso itorobaponatsi yabara pelivaisi

¹ Tajamonae, jitsipajē patacatoyaquinaejava paneyapētaenexa mapacueneje. Caejivi canacujitsia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanaponaetsi pexanaenexa pacuenia Dioso itorobaponatsi.

² Paxamē rabaja payapētaneme mapacueneje. Pamatacabi abaxē Dioso apo pajumecovēnētsimē, dovathi pacayamaxēitorobabiaba. Nexata panevajētsinexa jumapecataeya pexanaenēanējavabelia, panematabacabēta patonubenabiabame. Jumapecataeya raja pexanaenēanē, apo caējēpaetsi itsacuenejavayo ata pexanaenexa.

³ Bajaraxuata pacatoyaquinatsi paneyapētaenexa mapacueneje. Pajivi jumaitsi: “Jesús raja Dioso apo pexēnato,” jai, bajarapajivi Espiritu Santo apo

yajavaponaponaetsi. Pajivi rajane jumaitsi: “Jesucristo raja pepo petuxanenë,” jai, bajara jane pajivi Espíritu Santo yajavaponaponatsi.

4 Daxita xua Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponatsi, apo najëpae. Caenë canacujitsia saicayacuenia jamatabëcuene caëjëpaeyaexanaponatsi. Itsiata baitsi jane caenë Espíritu Santo pejamatabëcueneta jamatabëcuene caëjëpaeyaexanaponatsi daxita bajarapamonae. 5 Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenë Dioso pijacuene tonacuenebavanapa. 6 Dioso pijacuene petonacuenebivi, apo nacuenejëpae. Itsiata rabaja caenë Dioso daxita yavenonatsi petonacuenebavanapaenexa. 7 Caejivi canacujitsia, Dioso pejumecovënëtsivi, Espíritu Santo pejamatabëcueneta jamatabëcuenecaëjëpaeyaexanatsi xua Dioso tonacuenebavanapaejitsia. Nexata bajarapamonae, caejivi canacujitsia, caëjëpatsi peyavenonaenexa bajarapajamatabëcueneta daxita Dioso pejumecovënëtsivijavabelia. 8 Itsamonae Dioso pejumecovënëtsivi, Espíritu Santo pejamatabëcueneta jamatabëcuene caëjëpaeyaexanaponatsi pemuxujiobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabëcuene caëjëpaeyaexanaponatsi jivi xaniavaetsia peyapëtaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabëcueneta bajarapacuenia jamatabëcuene caëjëpaeyaexanaponatsi bajarapamonae. 9 Itsamonae pijinia jamatabëcuene caëjëpaeyaexanaponatsi penajamatabëcuenerutsinexa Diosojavabelia Dioso peyavenonabiabinexatsi daxitacuene yabara. Itsamonae pijinia jamatabëcuene caëjëpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabëcueneta bajarapacuenia jamatabëcuene caëjëpaeyaexanaponatsi. 10 Itsamonae pijinia jamatabëcuene caëjëpaeyaexanaponatsi Dioso pesaëta pinijicuene pexanaejavanë pexanaenexa. Itsamonae pijinia jamatabëcuene caëjëpaeyaexanaponatsi petsipaebinexa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caëjëpaeyaexanaponatsi pejumeyapëtaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caëjëpaeyaexanatsinua pejumeyapëtaenexa itsajivi itsa tsipaebatsi pexaniajailivaisi Espíritu Santo pejamatabëcueneta. Itsamonae pijinia jamatabëcuene caëjëpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae

pijinia jamatabëcuene caējëpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianë tsipaebapona pamona cuaicuaijai itsajivi ata mapanacuata apo pejumetaejumeta. ¹¹ Itsiata baitsi jane caeEspíritu Santo pejamatabëcueneta jamatabëcuene caējëpaeyaexanaponatsi daxita bajarapamonae. Pacuenia Espíritu Santo jitsipa pejamatabëcuenecaējëpaeya exanapon-aenexa Dioso pejumecovënëtsivijavabelia, bajarapacuenia Espíritu Santo caejivi canacujitsia jamatabëcuene caējëpaeyaexanaponatsi Dioso pejumecovënëtsivi.

Pacuenia daxita Dioso pejumecovënëtsivi caenë Cristo bepeperabëto yabara pelivaisi

¹² Pavi xainatsi vajaperabëtota, caevito canacujitsia pevënë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabëtotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijavanexa, Espíritu Santo pejamatabëcueneta nacajamatabëcuene caējëpaeyaexanaponae ata, itsiata caenë Cristo bepeperabëtotsi. ¹³ Daxitatsi rabaja Dioso vajajumecovënëtsivi, itsa nacabautisaba, caeEspíritu Santo nacatsijamatabëca caebitsaëtonexatsi, caenë Cristo bepeperabëtonexatsi. Judíovi atatsi, apo judíovi atatsi, dajubicuenia vajanacacanajetsivi ata itsamonaejavabelia amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspíritu Santo nacatsijamatabëca.

¹⁴ Pavi jivi peperabëtuareca xaina, caevito canacujitsia pevënë xainapona. Nexata caevënëvito jivi apo xinae peperabëtuareca. ¹⁵ Nexata jivi petaxu itsa caējëpaejitsipatsi pecuaicuaijainexa, petaxu meta jumatsi tsipae: “Apo pecobenë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējëpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. ¹⁷ Jivi daxitanë peperabëtuareca itsa xinaejitsipa ëpitaxutonë, ¿detsa nexata

pacuenia jumetaejitsipa? Acuenebi tsipae. Daxitanë peperabëtuareca itsa xainaejitsipa ëpemuxuyorotonë, çdetsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabëtuareca caevënëvito Dioso apo torutsi. Saicaya pevënë pexainaevitonë, caevito canacujitsia, jivi peperabëtuareca Dioso torutapona itsajota jitsipa petorutsinexa. ¹⁹ Itsa meta jivi peperabëtuareca xainaejitsipa caevitoreca, aithothia meta tsipae. Nexata apo bejivitonë perabëto tsipae. ²⁰ Itsiata baitsi jane maitsije. Jivi peperabëtuareca navitsiaxainae ata saicaya caevito canacujitsia pevënë pexainaevi, itsiata rabaja caeperabëtoareca.

²¹ Nexata jivi pitaxutobeje caëjëpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejejavabelia: “Apo pacanamatavenonaetsibeje cajena,” pejainexabeje. Jivi pematabocotota ata caëjëpae atatsi tsipae pecuaicuaijainexa, itsiata acuenebi tsipae pejumaitsinexa petaxubejejavabelia: “Apo pacanamatavenonaetsibeje cajena,” pejainexa. Tsipaji daxita pavi xainatsi vajaperabëtota, namatavenonatsi. ²² Bajaraxuata vajaperabëtota pavi xainatsi, pavi itajara apo bevajanacatsitanamatavenonae, bajarapavi bitso pepacuene namatavenonatsi. ²³ Pavi xainatsi vajaperabëtota, pavi vaxaitsi natanetsi beveliavi, bajarapavi banaperabëxatatatsi naitabëtsiaya. Pavi naperabëcauratsi, naperabëcaranatsiaya banaperabëxatatatsi xaniavaetsia. ²⁴ Pavi apo naperabëcauratsi, apo naperabëxatatsitsi xaniavaetsia. Bajarapacuenia vajaperabëtota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabëtsia banaperabëxatatatsi. Nexata bajarapacuenia bajarapavi ata bevajanamatavenonaevi tanetsi. ²⁵ Nexata pavi vajaperabëtota xainatsi, apo navecuanatsanae. Nexata daxita pavi xainatsi vajaperabëtota, namataenetsia naeveta. ²⁶ Vajaperabëtota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabëtsianaxatatatsi, nexata daxitaperabëtotsireca bayajavabarëyatsi.

²⁷ Daxita rabaja paxamë Dioso papijajivimë. Nexata caenë Cristo beperabëto panaexaname. Pavi Cristo peperabëtota xaina, bajara bepayajuvënëvi Dioso pacatane pacaenëmë canacujitsia. ²⁸ Vajaperabëtota pavi xainatsi, caevito canacujitsia saicaya xainapona pexanaponaejavanexa. Bajara pijinia itsi Dioso pejumecovënëtsivi. Caejivi canacujitsia Dioso itapetaponatsi saicaya caejivi

canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapëtaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapëtaeyaexanaevinexa itsamonaejavabelia. Xuacujinae icatsia Dioso itapeta Dioso pesaëta pinijicuene pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiobivi peyavenonaevinexa. Xuacujinae icatsia Dioso itapeta Dioso pejumecovënëtsivi penamatacaitorobivinexa. Xuacujinae icatsia Dioso itapeta pecuaicuaijaivinexa itsajivi ata mapanacuata apo pejumetaejumeta. ²⁹ Nexata daxita apo ëapóstolevi. Nexata pijinia daxita apo ëpetsipaebivinexa itsamonaejavabelia pacuenia Dioso yapëtaeyaexanatsi. Nexata pijinia daxita apo ëpeyapëtaeyaexanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaëta pinijicuene pexanaejava, apo ëpexanaponaevinexa. ³⁰ Nexata pijinia daxita apo ëpejamatejemayaexanaevinexa piavitanevi. Nexata pijinia daxita apo ëpecuaicuaijaivinexa itsajivi ata mapanacuata apo pejumetaejumeta. Nexata pijinia daxita apo ëpejumetaevinexa bajarapajume, juya itsamonaejavabelia pejumevajunupaebaponaenexa pajamatabëcuenelivaisi xainapona caelivaisi canacujitsia, palivaisianë tsipaebapona pamonaë cuaicuaijai itsajivi ata mapanacuata apo pejumetaejumeta. ³¹ Bajarapacuenia itsamonaë pejamatabëcuenecaëjëpaeya exanaejavatsi matatoxenetsia panevajënaeyabelia bitso pajitsipare Dioso papecajamatabëcuenecaëjëpaeya exanaenexa, paneyavenonaenexa daxita Dioso pejumecovënëtsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajënaeyabelia bitso pajitsipare Dioso papecajamatabëcuenecaëjëpaeya exanaenexa itsamonaë ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabëcuenecaëjëpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaicuaijanë tsipae. Nexata jivi netaejitsipa ayaijamatabëcuenenënë. Bajarapacuenia Dioso nejamatabëcuenecaëjëpaeyaexanaë ata tsipae, itsiata itsamonaë ata itsa apo asivanë tsipae, nexata saya bajaraxua

netoamatamobi tsipae Dioso pitabarata. Nexata palivaisi ata tsipaebaponaejitsipajë jivi pejumetaejumeta, apo nejumecovënëtsi tsipae. Nexata pacuenia tambor, itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. ² Dioso nejamatabëcuenecaëjëpaeya exanaejitsipa xaniavaetsia tayapëtaenexa Dioso pejumelivaisi, asaëyata tatsipaebinexa itsamonaejavabelia. Yapëtaejitsipajënuaxaxita Dioso muetsia penajamatabëxainaelivaisianë ata. Yapëtaejitsipajënuaxaxita Dioso pijacuene ata. Bajarapacuenia xaniavaetsia yapëtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovënëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecuatixitsiana,” itsa janë tsipae, nexata Dioso nevecuatixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajë bepejiobivijavabelia daxita taxainaejavaximi. Nacaevetsipajënuaxaxitanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

⁴ Majamatabëcuenetsije pajivi asiva itsamonae ata. Bajara-pajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenënë bajarapamonae matatoxenetsia,” apo jai itsajivijavabelia. ⁵ Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxita xua xanepana, ëponënexa apo natonajamatabëxainae. Pajivi asiva itsamonae ata, bepijia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabëtsitecae juya pecuenecanaviatsinexa bajarapamonaejavabelia. ⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabëcuenebarëya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabëcuenebarëya bajarapamonae Dioso pejitsipaecuenia pexanavanapaejava yabara. ⁷ Pajivi asiva

itsamonae ata, bajarapajivi piasivaviyajuvënëvi itsacueniabi atatsi, najamatabëcuenesaëta pevajënaeyabelia piasivajava bajarapamonae. Pajivi asiva itsamonae ata, bajarapajivi apo peyapëtaevi ata, sivajamatabëjumaitsi mapacueniaje: “Maraeta pamonaë ata pexaniajamatabëcuenevije,” sivajamatabëjai. Pajivi asiva itsamonae ata, bajarapajivi pibisiacuene pexanaevi ata, sivajamatabëjumaitsi mapacueniaje: “Maraeta pamonaë itsamatacabi pexaniacuene pexanaevi tsaneje,” sivajamatabëjai. Pajivi asiva itsamonae ata, bajarapajivi tsiyapëbeje atatsi daxitacuene yabara, apo copatsi piasivajava itsamonae ata.

⁸ Itsamonae Espíritu Santo pejamatabëcueneta jamatabëcuene caëjëpaeyaexanaponatsi petsipaebinexa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caëjëpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabëcuene caëjëpaeyaexanaponatsi pacuenia Dioso pejumelivaisibaxutota jumaitsi peyapëtaeyaexanaenexa itsamonaejavabelia. Daxita bajarapacuene, xua Dioso Espíritu Santo pejamatabëcueneta Dioso pejumecovënëtsivi jamatabëcuenecaëjëpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucaë tsane. ⁹ Dioso nacajamatabëcuene caëjëpaeyaexanae ata vajayapëtaenexa, abaxë tsiquirijavayo yapëtaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espíritu Santo pejamatabëcueneta vajanacajamatabëcuene caëjëpaeyaexanaejamatabëcuenemi, nacatocopiarucaena. Nexata jane baja bajarapamatacabi vajatuxanenë xaniavaetsia nacayapëtaeyaexanaena daxitacuene Dioso pijacuene.

¹¹ Pamatacabi abaxë pejevaxinëyonë, cuaicuaijanë pejevaxinëyonëcuenia. Najamatabëxainajënua pejevaxinëyonëcuenia. Jumetanijinua abaxë pejevaxinëyonëcuenia. Itsa baja tanaveretsinë, pejevaxijamatabëcuenemi baja copatajë. ¹² Bajara pijinia itsinë Dioso taja-matabëcueneyapëtaejava. Tsiquirijavayo abaxë Dioso jamatabëcueneyapëtaniji. Pacuenia pitatsëcënaetsaxuta itsa naitatanetsi, apo nacatonapebetsi, bajarajamatabëcueneitsinë Dioso tajamatabëcueneyapëtaejava. Abaxë saya tsiquirijavayo Dioso jamatabëcueneyapëtaniji. Itsiata baitsi jane itsamatacabi Dioso xaniavaetsia jamatabëcueneyapëtaenajë. Pacuenia aeconoxae Dioso xaniavaetsia nejamatabëcueneyapëtane, bajara pijinia

pacuenia xanë ata itsamatacabi xaniavaetsia Dioso jamatabëcueneyapëtaenajë. ¹³ Apo vereverecae daxitamatacabi vaxaitsi vajanajamatabëcuenecopatsijava Diosojavabelia. Vaxaitsi evetavanapatsinua Dioso vajanacacapanepaenexa. Nexata vajanajamatabëcuenecopatsijava Diosojavabelia, vajaevetavanapaejava ata Dioso vajanacacapanepaenexa, bajaraxuabeje matatoxenetsia bitso xanepana vajaasivajava itsamonae ata.

14

Pacuenia Espiritu Santo pejamatabëcueneta itsamonae cuaicuajaiyaexanatsi itsajivi ata mapanacuata apo pejumetaejumeta yabara pelivaisi

¹ Panajamatabëcueneverere panevajënaeyabelia panecasaëtsavanapaenexa itsamonae ata paneasivajava pacuenia panijacuata panaasivamë. Panatojitsiparenuua xua Dioso pacatojitsipa papecajamatabëcuene caëjëpaeyaexanaenexa Espiritu Santo pejamatabëcueneta. Bitso jane panatojitsipare palivaisi Dioso payapëtaeyaexana panetsipaebinexa itsamonaejavabelia. Nexata patsipaebianame palivaisi Dioso pacayapëtaeyaexana.

² Itsamonae Espiritu Santo pejamatabëcueneta jamatabëcuene caëjëpaeyaexanaponatsi pecuaicuajainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tsipaji itsajivi ata mapanacuata apo pejumetaejumeta paeba. Bajarapajivi Espiritu Santo pejamatabëcueneta livaisi paebiaexanatsi. Palivaisi Espiritu Santo bëpënëa xainaponapona, paebiaexanatsi. ³ Itsamonae pijinia Espiritu Santo pejamatabëcueneta jamatabëcuenecaëjëpaeyaexanatsi jivi pejumetaejumeta petsipaebinexa palivaisi Dioso yapëtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajënaeuabelia sivaajamatabëcuenesaë tsaponae Dioso pejumecovënëtavanapaejava. Bajarapajivi jamatabëcuenebabatanua bitso penajamatabëxainaevi. ⁴ Pajivi Espiritu Santo pejamatabëcueneta jamatabëcuenecaëjëpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata

jamatabëcuenevitsabapona Diosojavabelia bajarapalivaisita. Itsiata baitsi jane pajivi jamatabëcuenecaējēpaeyaexanatsi jivi pejumetaejumeta petsipaebinexa palivaisi Dioso yapētaeyaexanatsi, bajarapajivi petsipaebilivaisita Diosojavabelia jamatabëcuenevitsabiaexanapona daxita Dioso pejumecovēnētsivi.

⁵ Pacatojitsipatsi picani daxita paxamē Espiritu Santo pejamatabëcueneta papecajamatabëcuene caējēpaeyaexanaenexa panecuaicuajainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabëcuene caējēpaeyaexanaenexa jivi pejumetaejumeta panetsipaebinexa palivaisi Dioso pacayapētaeyaexana. Pajivi tsipaebapona jivi pejumetaejumeta palivaisi Dioso yapētaeyaexanatsi, bajarapajivi bitso jamatabëcueneyavenona itsamonae Dioso pejumecovēnētsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovēnētsivi apo jamatabëcuenevitsabiaexanae Diosojavabelia. Itsiata bajarapajivi itsa caējēpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovēnētsivi jamatabëcuenevitsabiaexana Diosojavabelia. ⁶ Bajaraxuata xanē ata pijinia paxamējavata itsa patsipajē livaisi patacatsipaebinexa apo panejumetaejumeta, nexata apo panejumetaemē tsipae palivaisi pacatsipaebijitsipatsi. Nexata apo pacajamatabëcuene vitsabiaexanae tsipaetsi Diosojavabelia. Itsiata baitsi jane itsa patsipajē panejumetaejumeta patacatsipaebinexa pacuenia Dioso bemajitsinaebota netsitajēta, nexata pacajamatabëcuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabëcuene vitsabiaexanaejitsipatsi Diosojavabelia. Palivaisi Dioso neyapētaeyaexana, palivaisi ata Dioso jumaitsi, pexaniajailivaisi, itsa pacatsipaebijitsipatsi, nexata pacajamatabëcuene vitsabiaexanaejitsipatsi Diosojavabelia.

⁷ Pamona Espiritu Santo pejamatabëcueneta jamatabëcuenecaējēpaeyaexanatsi pecuaicuajainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxēanaejavanē peracatsivi ata xaniavaetsia itsa apo racatsi tsipae. Flauta piobinē, bijiata itsa obijitsipa, arpa pijinia peracatsinē ata, bijiata itsa racatsipa, nexata itsajivi ata apo vajiyapētaetsibeje tsipae, pavaji picani naxēanaeyaexanabeje. Flauta piobijava, arpa ata

peracatsijava, amatamobi tsipae. ⁸ Bajara pijinia itsi tsipae vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaevavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! ¹⁰ Daxitaviriajumevi bitso navita mapanacuajavaje. Caeviriajumevi canacujitsia yapëtaepona xaniavaetsia pijajume. ¹¹ Itsiata baitsi jane tajanacuapijinë ata itsa nebarëcuaicuaijai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaicuaijanë tsipae, besaicaya nacuapijinënë netaejitsipa. ¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaevavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espíritu Santo pejamatabëcueneta jamatabëcuenecaëjëpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajëta Diosojavabelia pejamatabëcuenecaëjëpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba. ¹⁴ Xanë ata apo tajumetaejumeta vajëtsi atanë tajamatabëëthëtojavavetsina, itsiata apo yapëtaenë xua vajëtajë Diosojavabelia. ¹⁵ Mara pacuenia tavajënaeyabelia xanë exanaenajëje. Vajëtsianajë Diosojavabelia anijaviriajumetabeje. Vajëtsianajë apo tajumetaejumeta. Vajëtsianajënuu tajajumeta ata daxitajivi tanejumetaenexa. Tanaxëanaejavata ata

pijinia bajarapacuenia exanaenajë. Naxëanaenajë apo tajumetaejumeta. Naxëanaenajënuu tajajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. ¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcueneconvëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia. ¹⁸ Dioso baja cajena xanë nejamatabëcuenecaëjëpaeyaexana tacuaicuaijainexa itsajivi ata mapanacuata apo pejumetaejumeta. Bajarapacuenia cuaicuaijanë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaetuatsijavata, apo jitsipañë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaename. Pacuenia penaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataename. Tsipaji pejevaxijivixi abaxë bitso apo najamatabëxinae pibisiacuene pexanaenexa. ²¹ Dioso pejumelivaisibaxutota tajëvelia jumaitsi mapacueniaje: “Itsamonae cuaicuaijaiyaexanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judíovi Dioso apo pejumecovënëtsijavanexa yabara. ²² Nexata Dioso

pejumecovënëtsivi Espíritu Santo pejamatabëcueneta jamatabëcuene caējëpaeyaexanaponae natsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuene, canaējëtsiana Diosojavabelia. Canaējëtsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caējëpaeyaexanaenatsi petsipaebinexa itsamonaejavabelia palivaisi Dioso yapëtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaējëtsiana pepacuene Dioso pitaxutotsoniataejavatsi pecapanepaenexatsi pijaneconivecua. ²³ Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonae penapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaeje saya pematajemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipanua bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcueneyapëtaejitsipa. Nexata nayapëtaejitsipa penaneconitsijava Diosojavabelia. Nexata pematabacabëta nucae jitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

Pacuenia Dioso pejumecovënëtsivi muxujibatsi peyapëtaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuatame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa itsamonaejavabelia.

Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijivi. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinexatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaebi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëëthëtota becuaijajai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëëthëtota bevajëtena. ²⁹ Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsipaebatsi bajarapalivaisi. ³⁰ Nexata bajarapamonae livaisi petsipaebaponaevavata, bajarajota penamuxunaevetecaenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsipaebapona, benajumecopata baja. Nexata ponë penamuxunaevetecaejavata, Dioso

livaisi yapëtaeyaexanatsi, bajaraponë juya daxitajivi-javabelia betsipaeba palivaisi Dioso yapëtaeyaexanatsi penamuxunaevetecaejavata. ³¹ Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaevivimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaelivaisi, pesivaajamatabëcuenesaë tsaponaenexanua Dioso pejumecovënëtsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota najumecopatsijitsia. Tsipaji Espiritu Santo pejamatabëëthëtota itorobatsi paepatota najumecopatsijitsia. Nexata itsa najumecopata bajaraponë, juya itsanë petsipaebinexa daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata. ³⁴ Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsitsi Dioso pejumecovënëtsivi penacaetuatsijavata pecuaicuaijaitsenanexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi. ³⁵ Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva itsa cuaicuaijai tsecae tsipae.

³⁶ Pëtsa pacopatame Dioso pejumecovënëtsivi penacaetuatsijavata petiriva pecuaicuaijaitsecaenexa. Tsipaji itsatomaranëjava Dioso pejumecovënëtsivi bajarapacuenia apo exanae. Pëtsa bepaayaijamatabëcuenevimë panataneme bajarapacuenia paneexanavanapaenexa. ³⁷ Itsamonae paxamëyajuvënëvi natane bepetsipaebarutsivinexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa. ³⁸ Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi

penavajunupaebijava Dioso pejamatabëcuenecaējēpaeya exanaejavatsi.

³⁹ Bajaraxuata asaëyata panatojitsipare Dioso papecajamatatabëcuene caējēpaeyaexanaenexa panetsipaebinexa daxitajivijavabelia palivaisi Dioso pacayapētaeyaexana. Itsiata baitsi jane pētsa pajumeitavetame itsamonae itsa cuaicuaijai itsajivi ata mapanacuata apo pejumetaejumeta. ⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapētaeyaexana, xaniavaetsia pacaenēmē tsaponae patsipaebabiabianame.

15

Jesucristo petēpaecujinae Dioso icatsia piasaëyaexanaejavatsi yabara pelivaisi

¹ Tajamonae, pacatojitsipatsi panenajamatabēnapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaelivaisinexa panijaneconivecua. Pajumecovēnētame baja bajarapalivaisi. Nexata panevajēnaeyabelia asaëya pajumecovēnētavanapaename bajarapalivaisi. ² Panevajēnaeyabelia itsa pajumecovēnētavanapaename bajarapalivaisi, nexata pibisiacuene paneexanaeneconivecua Dioso pacacapanepaena. Maticabi apo pevereverecejava paxainaename. Itsiata baitsi jane copiaya panejamatabēthētojavavetsina itsa apo pajumecovēnētšimē tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenē copiaya netsipaeba. Pacatsipaebatsi baja cajena Cristo vajanacasivatēpaejava pibisiacuene vajaexanaeneconi yabara. Cristo baja cajena nacasivatēpa pacuenia Dioso pejumelivaisibaxutota tajēvelia jumaitsi. ⁴ Nexata Cristo petēpaenē pemēthētsicujinaetsi, acueyabi maticabita, icatsia Dioso asaëyaexanatsi. Bajarapacuenia Cristo Dioso icatsia asaëyaexanatsi pacuenia baja cajena tajēvelia Dioso pejumelivaisibaxutota jumaitsi Cristo yabara. ⁵ Nexata Cristo Dioso piasaëyaexanaecujinaetsi, copiaya Pedrojavabelia tsitanaitajēta. Bajaraxuacujinae Jesús pijajivi, doce ponēbeje apóstolevijavabelia, tsitanaitajēta. ⁶ Bajaraxuacujinae Jesús pijajivi quinientos pematatsēnēa pajivibejevavabelia penacaetuatsijavata, tsitanaitajēta. Bajarapamonaeyajuvēnēvimi Jesús petaevitsi itsamonae baja tēpae ata, itsiata ayaibitsaëtōxaneto abaxē asaë tsavanapae. ⁷ Bajaraxuacujinae icatsia Santiagojavabelia Jesús tsitanaitajēta. Bajaraxuacujinae icatsia daxita apóstolevijavabelia Jesús tsitanaitajēta.

8 Xanë daxita apóstolevivecua bexëjavaberena apóstolenënë nexana. Nexata pacuenia pexi pexainaejivi cotocaevi pexainaenacueto itsi, bajarapacuenia nataniji bajarapamonaevēcua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataenexa. 9 Daxita apóstolevivecua xanë beveliajamatabëcuenenënë nataniji. Tsipaji abaxë xanë Jesús itsa apo jumecovënëtsinë, Jesús pijajivi bejioabiaexanabiabajë. Bajaraxuata: “Apóstolenë,” tanejainexa ata, auranë tsabiabi. 10 Itsiata baitsi jane Dioso taneitaxutotsoniataexae, nitapeta baja apóstolenënexanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tjamatabëcuenesaëta apo tonacuenebaponaponanë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponanexa. 11 Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamonae bitso Dioso tonacuenebavanapa xanë matatoxenetsia. Itsiata baitsi jane bajarapacueni yabara apo canaëjëtsinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënëttavanapame.

Pacuenia itsamatacabi Dioso icatsia asaëyaexanaejitsia petëpaevimi yabara pelivaisi

12 Pacatsipaebatsi baja cajena Cristo petëpaecujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabiaya jumai tsabiabi: “Jivi rabaja petëpaecujinae ajibi icatsia piasaëjavanexa,” jai tsabiabi. Nexata bajarapacuenia apo bejumaitsi bajarapamonae. 13 Tsipaji peneta itsa pepacuene ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaecujinae. 14 Itsa baja Cristo petëpaecujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, amatamobi tsipae. 15 Pematatsënëa xua Dioso exana patavajunupae-bijava, panajumetsënëtsipajë. Tsipaji pajumaitsinë tsabiabi mapacueniaje: “Cristo raja petëpaecujinae Dioso baja icatsia asaëyaexanatsi,” pajanë tsabiabi. Itsa pepacuene ajibi tsipae petëpaevi icatsia piasaëjavanexa, nexata baja Cristo

Dioso icatsia apo asaëyaexanaetsi tsipae. ¹⁶ Itsa peneta pepacue ne ajibi tsipae petëpaevi icatsia piasaëjavanexa, nexata Cristo ata petëpaecujinae icatsia Dioso baja apo asaëyaexanaetsi tsipae. ¹⁷ Nexata Cristo petëpaecujinae Dioso baja icatsia ita apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxë panijaneconi paxainaejitsipame. ¹⁸ Bajarapacuenia ita itsipae, nexata baja pamonami tëpa Cristo pepua pejumecovënëtsivi, bajarapamonami ata naxuabijitsipa baja. ¹⁹ Vaxaitsi ata pijinia Cristojavabelia vajanajamatabëcuene copatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajatëpaecujinae, Cristo pejamatabëcueneta Dioso ita apo nacacapanepaejitsia tsipae vajaneconivecua, vajajamatabëcuenenavëxaniabivi baja tsipae. Tsipaji vaxaitsi jamatabëjumaitsitsi tsabiabi mapacueniaje: “Cristo pejamatabëcueneta Dioso nacacapanepaena,” jamatabëjaisi tsabiabi. Nexata ayaicuenia Dioso vajatonacuenebabiabijava ata, nacueratsipatsi. Maticabi apo peverevereaejava Dioso vajanacarajutsinexa vajeavetavanapaejava ata, nacueratsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejiobiataenexa.

²⁰ Itsiata baitsi jane mapalivaisije xaniajai cajena. Tsipaji baja Cristo petëpaecujinae, capanepaeya baja icatsia Dioso asaëyaexanatsi. Nexata pacuenia Cristo petëpaecujinae mëthëvecua pitsapa, bajara pijinia pacuenia itsamatacabi mëthëvecua pitsapaena daxita pamonami tëpa Dioso pepua pejumecovënëtsivi. Nexata baja Cristo petëpaecujinae, mëthëvecua ita pitsapa, daxita petëpaevivecua Cristo baja namataxainaeya pitsapa mëthëvecua. ²¹ Caenë Adánpijinë pejamatabëcueneta taxuxuaba jivi petëpaejava mapanacuataje pibisiacuenepexanaexae. Bajara pijinia pacuenia caenë Cristo pejamatabëcueneta vajanacasivatëpaexae cruzata, taxuxuaba petëpaevimi itsamatacabi mëthëvecua pepitsapaejavanexa. ²² Daxitajivi tëpaponna Adánpijinë petaxuxuabicuenia. Bajara pijinia pacuenia daxita pamonaë Cristo pijajivi, petëpaecujinae icatsia Dioso asaëyaexanaenatsi pacuenia Cristo Dioso asaëyaexanatsi. ²³ Paepatota Dioso jitsipa petëpaevi piasaëyaexanaenexa, caejivi canacujitsia asaëyaexanaponaena. Cristo baja petëpaecujinae, Dioso ita asaëyaexanatsi, daxita petëpaevivecua namataxainaeya baja asaëyaexanatsi. Bajaraxuacujinae icatsia pamatacabi Cristo patsianica, daxita pamonaë Cristo pijajivi, Dioso icatsia

asaëyaexanaenatsi. ²⁴ Bajaraxuacujinae jane baja daxitacuene pecopiarucaeyaexanaejavanexa, copiapatsiana. Bajarapamatacabi Cristo copiarucaeyaexanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. ²⁵ Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaë, Cristo copatsiana daxitacuene pevetsijava. ²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaexanaena jivi petëpaecuenemi. ²⁷ Dioso pejumelivaisibaxutota tajëvelia jumaitsi mapacueniaje: “Dioso itsamatacabi pexënato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata bailsi jane Dioso pexënatojavabelia apo jumaitsi: “Xanë ata nitorobianame,” apo jai Dioso. Dioso raja itorobiana pexënato petoevetsinexatsi daxitacueneviria. ²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovënëtabiabianatsi. Nexata jane baja bajarapamatacabi Cristo jumecovënëtsiana paxa Dioso pitorobicueniatsi. Bajarapacuenia Cristo paxa Dioso pejumecovënëtsixae tsane, nexata bajarapamatacabi Dioso daxitanacuanëjava daxitacueneviria pitorobinë tsane.

²⁹ Itsamonae pepua penabautisabivi baja, pijamonaemi totëpatsi. Pijamonaemi ata baja pepuanajamatabëcuenecopabi Cristojavabelia, totëpatsi. Itsiata bailsi jane bajarapamonaemi tēpa nabautisabinejeva. Nexata pajivi pijamonaemi totëpatsi, bajarapajivi penabautisabijivi ata baja, pijamonaevēnamuto icatsia nabautisaba. Bajarapacuenia anijatobeje nabautisaba pevecuatëpaejivitsi bepenabautisabijivi petotaenexatsi Dioso. Petëpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaevēnamuto icatsia apo nabautisabi tsipae, nabautisabinejeva pevecuatëpaejivitsi bepenabautisabijivi petotaenexatsi Dioso.

³⁰ Petëpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapaenë tsipae, daxitamatacabi panetsiyai tsabiabi ata. ³¹ Tajamonae, daxitamatacabi baja cajena netsiyai tsabiabi. Itsamonae picani jamatabënebeyaxuababiaba. Bajaraxua paneyapëtaenexa, pacatsipaebatsi. Tsipaji pacasivajamatabëcuenenbarëyatsi vajatuxanenë Jesucristo xaniavaetsia panejumecovënëtavanapaexae. ³² Majotaje Efeso tomarapijivi ata jamatabënebeyaxuaba picani.

Bजारपामोनाे benevëthëjamatabëcuenevi. Tsiquirijavayota vecuapanepajë. Jivi petëpaecujinae icatsia Dioso itsa apo asaëyaexanaejitsiatsi tsipae, nexata xanë ata nacueratsipajë. Nacueratsipajë, netsiayai ata, jivi tatsipaebaponaejava Dioso pejumelivaisi. Vajatëpaecujinae icatsia Dioso itsa apo nacaasaëyaexanaejitsia tsipae, nexata xaniavaetsia jumecovënëtsipatsi pamonaе jamatabëcuenenavëxaniabiaya nacatsipaeba mapacuenia pejumaitsilivaisije: “Ayaijavanë vajaxaejava xaeyabiabianatsi. Aitajibitsinua tsabiabi tsane vajabarëyatsabiabinexa. Tsipaji raja bepijia tēpaenatsi,” pejailivaisi vajanacatsipaebivi jumecovënëtsipatsi.

³³ Itsiata baitsi jane pëtsa panacopatame papecaya-maxëitorobinexa bajarapacuenia pejumaitsiivi. Tsipaji raja itsamonae bajumaitsi: “Itsa yajavaponaponaejitsipame pibisiajamatabëcuenevi, cajamatabëcuenebijianaejitsipa. Nexata pexaniajamatabëcuenenë atamë, bajarapamonae cuenejëpaeya ponaponaejitsipame,” bajai itsamonae. ³⁴ Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsijsije paneauranexa.

*Pacuenia petëpaevimi Dioso icatsia itsa asaëyaexanatsi, per-
abëithianaejitsiatsi yabara pelivaisi*

³⁵ Itsamonae raeta yanijobiana petëpaevimi icatsia Dioso piasaëyaexanaejavanexatsi yabara. Jumaitsi meta tsane bajarapamonae: “¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonae?” jai meta tsane bajarapamonae. ³⁶ Bजारapacuenia itsa yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto itsa ubatsi, pejuvicujinae bajarapaxutomi batsabana pepitsapaenexa pejananae. ³⁷ Arrozzuto, itsaviriauxutoxi ata, pexu saya ubatsi. Apo mëthëcaetsi pepabotonë. ³⁸ Peubixu, caeviriauxu canacujitsia, peubicujinae capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. ³⁹ Mapanacuata Dioso copatsi ata daxitacueneviria pejinavanapaenexa, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. ⁴⁰ Bajara pijinia itsi athëbëtatsia pejinavanapaevi ata. Bजारapamonae saicaya itsaviriaperabëto xaina mapanacuapijivivecuaje. Athëbëtatsia pejinavanapaevi

nacavecuapexaniaperabētovi. Mapanacuata pejinavana-paevi ata, itsamonae nacatsitapexaniaperabētovi picani. Itsiata pijinia saicayacuenia. ⁴¹ Maticabipijijuameto itayota. Meravipijijuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetuluputo canacujitsia saicayacuenia navecuaitayotapona. ⁴² Bajara pijinia nacavecuaitane petēpaevimi. Saicayaperabēto nacavecuaxainaena Dioso icatsia itsa asaēyaexanaenatsi. Petēpaejivi irabelia mēthētatsi. Nexata baja tsabana. Bajaraxuacujinae Dioso icatsia itsa asaēyaexanaenatsi, apo petsabanaeperabētonexa jane baja xainaena. ⁴³ Petēpaejivi mēthētatsi vajaataejitsibiperabēto yajava. Bajaraxuacujinae Dioso icatsia itsa asaēyaexanaenatsi, pexaniapenivenivenaeperabēto jane baja xainaena. Petēpaejivi mēthētatsi pecueranaeperabētomi yajava. Bajaraxuacujinae Dioso icatsia itsa asaēyaexanaenatsi, daxita maticabijavabelianexa jane baja pesaē pexainaeperabēto xainaena. ⁴⁴ Petēpaejivi mēthētatsi mapanacuapijiperabēto yajava. Bajaraxuacujinae Dioso icatsia itsa asaēyaexanaenatsi, athēbēnacupijiperabēto xainaena. Itsaviriaperabēto abaxē aeconoxae xainatsi mapanacuata vajajinavanapaenexa. Bajara icatsia pacuenia itsamaticabi itsaviriaperabēto xainaenatsi athēbēnacuatatsia vajajinavanapaenexa.

⁴⁵ Dioso pejumelivaisibaxutota jumaitsi mapacueniaje: “Adánpijinē copiaya Dioso exanatsi mapanacuataje. Bajaraponē Dioso exanatsi pecueranaeperabēto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinē matatoxenetsia Cristo bitso ayaijamatabēcuenenē. Nexata Cristo petēpaeujinae icatsia Dioso itsa asaēyaexanatsi, caējēpatsi vajanacajamatabē cueneasaēyaexanaenexa Diosojavabelia. Caējēpatsinua vajanacarajutsinexa maticabi apo peverevereaejava. ⁴⁶ Pacuenia athēbēnacupijivi perabēitsi, abaxē copiaya apo perabēitsitsi. Biji rajane pacuenia mapanacuapijivi perabēitsije, bajaraperabēitsitsi. Itsiata baitsi jane vajatēpaeujinae Dioso icatsia itsa nacaasaēyaexanaena, pacuenia athēbēnacupijivi perabēitsi, bajara vaxaitsi ata perabēitsi tsanetsi. ⁴⁷ Adánpijinē copiaya Dioso exanatsi mapanacuataje. Atsabenota exanatsi. Bajaraxuacujinae bexējavabelia athēbēvetsica Cristo patsica, ponē vajatuxanenē. Bajaraponē saicaya athēbēvetsica pepatsinē. ⁴⁸ Daxitatsi vaxaitsi, mapanacuapijivitsije, perabējēpatsi Adánpijinē, atsabenota pexanaenētsi. Itsiata baitsi jane itsamaticabi daxitatsi, Cristo vajajumecovēnētsivi, perabējēpaenatsi Cristo. Nexata

pacuenia athëbënacuapijivi perabëitsi, bajaraperabëitsi tsanetsi Cristo vajajumecovënëtsivi. ⁴⁹ Aeconoxae abaxë perabëjëpatsi Adánpijinë, ponë atsabenota pexanaenëtsi. Bajara icatsia pacuenia itsamatacabi Cristo perabëjëpaenatsi, ponë athëbëvetsica pepatsinë.

⁵⁰ Tajamonae, jitsipajë patacatsipaebinexa mapacueneye. Acuenebi caejivi ata mapanacuapijivije mapanacuapijiperabëto vajava pejonenexa Dioso pijanacuayabetsia. Tsipaji vajaperabëto saya pevereverecaejavanexa. Bajaraxuata acuenebi vajayajavajinavanapaenexa bajarapaperabëto daxita matacabijavabelianexa. ⁵¹ Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapëtaeyaexanapona. Daxitatsi raja vaxaitsi Cristo icatsia pepatsimatacabinexatsica pevajënaeya, apo tēpaetsi tsane. Itsiata baitsi jane apo tēpae atatsi tsane, pamatacabi Cristo patsianica, daxitatsi nacaperabëithianaena Dioso. ⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajëto banaitatsaquetajarabatsi, bajarapaepatoyovajëto Dioso nacaperabëithianajonena. ⁵³ Vajaperabëto raja pevereverecaejavanexa. Bajaraxuata xanepana vajanacaperabëithianaenexa, apo pevereverecaeperabëto vajaxainaenexa. ⁵⁴ Nexata paepatota bajarapacuenia nacaperabëithianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniaje: “Jivi petëpaecuenemi itsamatacabi copiarucaena. Pinijicuenia Dioso copiarucaeyaexanaena jivi petëpaecuenemi. ⁵⁵ Jivi petëpaeyaexanaecuenemi ajibi tsane pesaë vajanacaavitaniaexanaeyaniva. Ajibi tsane vajanacatëpaeyaexanaecuenemi,” jai tajëvelia Dioso pejumelivaisibaxutota jivi petëpaeyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacuene vajaexanaeneconi yabara tēpaenatsi. Palivaisi bajayata Dioso Moiséspijinëta najumecopata, bajarapalivaisi pejamatabëcueneta yapëtanetsi vajatëpaecujinae Diosovecua picani vajanaxuabijavanexa pibisiacuene itsa exanatsi. ⁵⁷ Itsiata baitsi jane baja vajatëpaecujinae Diosovecua apo naxuabitsi tsane. Tsipaji baja vajatuxanenë Jesucristo nacasivatëpa cruzata vajanacacapanepaenexa vajaneconivecua. Bajaraxuata vaxaitsi Diosojavabelia jumaitsitsi tsabiabi mapacueniaje: “Pexaniacuene rabaja panetoexaname,” jaitsi tsabiabi.

⁵⁸ Tajamonae, bitso patacaasivavi. Payapëtaneme rabaja mapacueneye. Dioso panetonacuenebijava, apo panacuer-

atsimë tsane. Bajaraxuata panevajënaeyabelia asaëya pantonacuenebavanapare Dioso. Pëtsa pacopabame Dioso panejumecovënëtsijava. Panevajënaeyabelia asaëya Dioso pantonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavanapaevi petoitorobinexa yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda panetoitorobinexa Jerusalén tomarata Dioso pejumecovënëtavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaename ofrenda. ² Pacaejivimë canacujitsia, caesemana canacujitsia panenacanabipalatayajuvënëjjava, ofrendanexa saicaya patsataponaename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponaename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane. ³ Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamonaepalata pecaponaevinexa, tsicobeyaquinaenajë cuyalato. Bajarapacuyalato bajarapamonae peyjavacaponaenexa, panecaetuatsiofrenda itsa tocaponaena Jerusalén tomarata Dioso pejumecovënëtsivijavabelia. Nexata bajarapapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyjavacaponaexae tsane tatsicobeyaquinaebaxuto. ⁴ Xanë ata itsa jitsipaenajë taponanexa, ponaenajë Jerusalén tomarabelia. Nexata meta bajarapamonae naponanena tapëta.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponaenajë Macedonia nacujjava. Bajaraxuacujinae jane baja patsianajë paxamëjavabelia, Corinto tomarata. ⁶ Ponaponanajë meta paxamëjavata bajayajebi. Daxita emarapaejebi ata meta naponaponanajë

paxamějavata. Nexata bajaraxuacujinae paneyavenonaename tajanamutonexa, itsabelia jitsipajě taponaaenexa icatsia. ⁷ Caepatoyo saya tanaponaponatabinexa paxamějavata, apo jitsipaeně. Biji rajane jitsipajě bajayajebi taponaponaaenexa paxamějavata pacuenia vajatuxaneně netojitsipa. ⁸ Itsiata baitsi jane abaxě aeconoxae ponaponaaenajě majotaje Efeso tomarata. Pentecostěsvěně fiestacujinae meta, matapania vecuaponaaenajě Efesotomara. ⁹ Majotaje aeconoxae baja bitso xanepana tatsipaebinexa Dioso pejumelivaisi. Tsipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayaibitsaěto apo jitsipae. Nexata tatsipaebilivaisi pejumecověnětsivi, jamataběcopabiaexanaponatsi.

¹⁰ Timoteo itsa patsiana paxamějavelia, pacopiapitsianame xaniavaetsia jamataběcuenebarěyaya peponaponaaenexa paxamějavata. Bajarapacuenia xaniavaetsia pacopiapitsianame. Tsipaji pacuenia xaně vajatuxaneně pejamataběcueneta tonacuenebaponaponajě, bajara pijinia pacuenia bajaraponě ata vajatuxaneně pejamataběcueneta tonacuenebaponapona. ¹¹ Bajaraxuata pětsa itsajivi ata pacopatame pequenetsiataenexatsi. Biji rajane payavenonaename pijanamutonexa jamataběcuenexanepanaeya pepatsinexa xanějavaberena. Xaně, itsamonae yajava, vajěnaeevetaponaponajě Timoteo pepatsinexarena xanějavaberena.

¹² Vajabananě Apolos pelivaisi pacatsipaebijitsiatsi. Bajaraponě picani itorobajě itsamonae Dioso pejumecověnětsivi pepěta penaponaaenexa paxamějavelia papecataenexa. Itsiata baitsi jane aeconoxae abaxě apo jamataběponae. Ponaena meta itsiata itsajota cuenecaějěpatsi.

Pacuenia Pablo jamataběnajina Corinto tomarapijivi yabara pelivaisi

¹³ Dovathi pejamataběcueneyaniva, jamataběcuenenaěcotsiaya pajinavanapare. Pajamataběcuenesaěměre tsavanapae Jesucristojavelia panenajamataběcuenecopatsijava. Pětsa jamataběcueneaitejepaebiaya pajinavanapame. Pajamataběcuenaitatsacaměre tsavanapae pebicuenia. Itsamonae patsitaajamataběcuenesaěměre tsavanapae. ¹⁴ Daxita xua paexanavanapame, itsamonae ata asivaya paexanavanapare.

¹⁵ Tajamonae, payapětaneme rabaja mapacueneye. Estėfanas pijabopijivi barějumecověněta Jesús pelivaisi. Bajarapamonae daxita pijanacuapijivivecua copiaya jumecověněta Jesús pelivaisi Acaya nacuata. Nexata bajarapamonae jamataběcuenenabiabatsi ěDioso pijacuene.

Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi. ¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame. ¹⁷ Paxamëyajuvënëvi parena xanëjavaberena mapamatabëxëyoje. Estéfanas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame. ¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamona nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papecayavenonabiabinexa. ²⁴ Daxita paxamë asivaya pacajamatabënajinatsi caenë Jesucristo pijajivixaetsi.

Mapabaxutoje San Pablo cotocaevi toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejume-covënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinxaxa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoy-aquinajëbejenua mapalivaisije Acaya nacujava pejinavana-paevi ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo navajunupaeba itsamonae pebejiobiaex-anaejavatsi yabara pelivaisi

³ “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. ⁴ Pamatacabi panetocopiapatabiaba daxita xua bitso panenajamatabëxainaeya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjëpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeya exanaejitsiatsi. ⁵ Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espiritu Santo panejamatabëcuenebabatabiaba bitso patanajamatabëxainaeyaniva. ⁶ Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjëpaena juya itsamatacabi paxamë patacajamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. ⁷ Payapëtaniji baja cajena paxamë ata Dioso papecacapanepaejavanexa. Pacuenia

paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia paneajamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

⁸ Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. ⁹ “Pepacuene raeta baja panebeyejebiana,” pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaëjëpae tavecuapanepaenexa mapacueneje. Matapania Dioso neyavenonaena, necaëjëpaena tavecuapanepaenexa mapacueneje,” patajamatabëjainexa. Dioso caëjëpatsi pataneyavenonaenexa. Tsipaji baja cajena Dioso pematacotsinë petëpaevi ata. ¹⁰ Dioso baja panecapanepa itsamonae patanebejiobiaexanaejavata patanebeyaxuabiyaniava. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponëjavabelia panajamatabëcueneocopatajë bajarapacuenia pataneyavenonabiabinexa. ¹¹ Paneyavenonaeyavajëtaponaename Diosojavabelia bajarapacuenia Dioso pataneyavenonabiabinexa. Paayaibitsaëttoxanetomë itsa panetovajëtaponaename Diosojavabelia, nexata Dioso paneyavenonabiabiana. Nexata pijinia jivi ayaiBITSaëttoxaneto paxanë yabara jumai tsabiabi tsane Diosojavabelia: “Pexaniacuene bitso toexaname Pabloana. Ayaicuenia yavenoname pebeyejebiyaniavatsi,” jai tsabiabi tsane.

Pajamatabëcuene yabara Pablo apo ponae Corinto tomabelia yabara pelivaisi

¹² Itsa pajinavanapajë daxitajivijava, paxamëjava ata, xaniavaetsia pajinavanapajë Dioso pitabarata. Itsa pajinavanapajë paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenebarëyanë. Paxanë raja saya mapanacuapijilivaisita apo panejamatabëcuenyavenonae xaniavaetsia patajinavanapaenexa. Dioso raja

patanejamatabëcueneyavenonaexae, bajarapacuenia xaniavaetsia pajinavanapajë. ¹³ Palivaisianë baja pacatoy-aquinabiabatsi, caelivaisita anijajamatabëcuenelivaisibeje apo xainaponae. Palivaisianë pajumetaneme itsa palebame patacatoyaquinaelivaisianë, bajarapalivaisianë saya caejamatabëcuenelivaisi xainapona. Pematatsënëa itsajamatabëcuenelivaisi apo xainaponae. Pacatojitsipatsi xaniavaetsia panejumeyapëtaenexa palivaisianë pacatoyaquinatsi. ¹⁴ Pacatojitsipatsi xaniavaetsia patanejamatabëcueneyapëtaenexamë. Tsipaji abaxë xaniavaetsia apo panejamatabëcueneyapëtaemë pacuenia pajamatabëcueneitsinë tsavanapae. Nexata pamatacabi vajatuxanenë Jesús icatsia patsianica, paxamë panesivajamatabëcuenebarëyamë tsane. Bajara pijinia pacuenia paxanë ata pacasivajamatabëcuenebarëyatsi tsane.

¹⁵ Nexata xanë pacasivajamatabëcuenejumaititsi mapacueniaje: “Corinto tomarapijivi baja cajena xaniavaetsia nejamatabëcueneyapëtane. Yapëtane pacuenia apo sivanajamatabëxainanë itsajamatabëcuene bajarapamonaejavabelia,” pacasivajamatabëjaitsi. Bajaraxuata picani jamatabëpatajë paxamëjavata patanesivajamatabëcuene barëyanexamë itsa patajë paxamëjavata. ¹⁶ Pamatacabi ponajë Macedonia nacuayabelia, talianë picani jamatabëpacataeponatsi bajaraxuayo. Bajaraxuacuujinae icatsia tanaviatsinërena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuayabelia taponanexa,” pacasivajamatabëjaitsi picani. ¹⁷ Pacuenia najamatabëxainabiabajë taponanexa itsajavabelia, ponabiabajë baja cajena. Itsiata aeconoxae bajarapacuenia apo exananë taponanexa paxamëjavabelia. Mapanacuata itsamonae najamatabëxainae ata itsacuenejavayo pexananexa, itsiata apo exanabiabi. Bajarapacuenia itsiata xanë apo jamatabëcueneitsinë. Paxamë baja cajena panecueneyapëtaneme. ¹⁸ Dioso ata panecueneyapëtane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacuujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabitsi. ¹⁹ Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuene xainabiaba. Nexata pacuenia jumaitsi, xaniajai tsabiabi. ²⁰ Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajëtsijavata

itsa jumaitsitsi: “Diosomë, bitso ayaijamatabëcuenenëmë,” itsa jaitsi, nexata Jesucristo pejamatabëcueneta jumaitsitsi. ²¹ Dioso pacajamatabëcueneyavenonapona panevajënaeyabelia paneajamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenebavanapaenexa. ²² Dioso raja Espiritu Santo nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacacapanepaejavanexa.

²³ Mapacuenia pacajumaitsitsije Dioso pitabarata. Dioso baja cajena nejamatabëcueneyapëtane. Pamatacabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tshipaji abaxë apo paexanavanapaemë patacaitorobicuenia. Bajaraxuata abaxë apo navecuaponaenë paxamëjavabelia, itsa pacabijatanetsi, bitso panenajamatabëxainaeyaniva. ²⁴ Nexata apo jitsipaenë icatsia patacatsipaebaponaenexa paneyapëtaenexa pacuenia bepaexanavanapame. Tshipaji baja xaniavaetsia Dioso pajumecovënëtavanapame. Jamatabëpacayavenonatsi. Pacuenia baja pajamatabëcuenebarëyamë tsavanapae, matatoxenetsia icatsia panejamatabëcuenebarëyanexa Dioso pitabarata.

2

¹ Najamatabëcopatajë baja taponaejava paxamëjavabelia. Tshipaji jamatabëjumaitsinë paxamë yabara mapacueniaje: “Apo ponaenë abaxë tsane Corinto tomarapijivijavabelia tanajamatabëxainaeyaexanaeyaniva bajarapamonae,” jamatabëjanë. ² Paxamë itsa pajamatabëcuenebarëyamë, nexata xanë ata pacasivajamatabëcuenebarëyatsi tsabiabi. Itsiata itsa pacanajamatabëxainaeya exanaejitsipatsi, nexata apo pajamatabëcuenebarëyamë tsipae. Nexata xanë ata apo pacasivajamatabëcuenebarëyatsi tsipae. Tshipaji ajibi tsipae patacasivajamatabëcuenebarëyajavanexa. ³ Bajaraxuata taponaevajënaeya paxamëjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tshipaji abaxë apo jamatabëponaenë paxamëjavabelia patacasivanajamatabëxainaeyaniva, itsa pacatanetsi panejinavanapaejava apo patacaitorobicuenia. Jitsipajë picani paxamë patacasivajamatabëcuenebarëyanexa. Paxamë yabara jamatabëjumaitsinë mapacueniaje: “Corinto tomarapijivi baja cajena nejamatabëcueneyapëtane. Bajarapamonae itsa jamatabëcuenebarëya, xanë ata bajarapamonae sivajamatabëcuenebarëyanë tsabiabi,”

jamatabëjanë. ⁴ Apo jitsipaenë picani patacatoyaquinaenexa bajarapabaxuto. Itsiata itsa pacatoyaquinatsi, nuajë paxamëjitsia. Najamatabëxainajë cajena bitso tajamatabëëthëtovetsina. Apo pacatoyaquinaetsi raja saya patacanajamatabëxainaeya exanaenexa. Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponaenëmi yabara pelivaisi

⁵ Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana. ⁶ Ponë yabara itsabaxutota pacatoyaquinatsi, paxamë baja cajena najamatabëcueneyëpaeya panavecuaitavetame bajaraponë, pibisiacuene pexanaenë, penapatsiyanima panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. ⁷ Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaename piaurayaniva. Bajarapacuenia pajamatabëcueneyavenonaename pejamatabëcuene matatoxenetsiyanimatsi bitso pejamatabëcuenebëjajjava pijaneconi yabara. ⁸ Bitso pacatojitsipatsi panetsitanajamatabëcueneitajëtsinexa paneasivajava bajaraponë. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenejëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. ¹⁰ Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneconijibia jamatabëcuenebarëyaya panejinavanapaenexa Cristo pitabarata. ¹¹ Jamatabëcuenecaevatsi baja papibisiacuene bajaraponë exana vaxaitsijavaberena. Tsipaji vaxaitsi itsa apo jamatabëcuenecaevitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

¹² Patajopajë Troas tomarata tatsipaebinxaxa Cristo pelivaisi. Troas tomarata tapatsivajënaeya, taniji Dioso tane-toxanepanaeyaexanaejaxa tatsipaebinxaxa pejumelivaisi bajarapatomarata. Nexata Troas tomarata itxa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajarajota abaxë apo jamatabëcuenebarëyanë. Najamatabëxainajë vaxabanajë Tito yabara. Tsipaji abaxë Tito apo caxitajarabaxuabinë Troas tomarata. Nexata baja napëjijobajë Troas tomarapijivi taponaenexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itxa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxaxa Dioso pejumelivaisi. Pamonaë jumecovënëta bajarapalivaisi, tsitapexanialivaisitsi bitso. ¹⁵ Dioso sivanajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tsipaji patsipaebabiabajë Cristo pelivaisi daxitajivijavabelia. Itsamonae baja jumecovënëtapona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxaxa. ¹⁶ Pamonaë Diosovecua naxuabiana apo pejumecovënëtsixaxa Cristo pelivaisi, naxuabiana. Pamonaë pijinia Dioso capanepaenatsi pejumecovënëtsixaxa Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcuenecajëpa patatsipaebabiabinxaxa pexanialivaisi, Cristo pelivaisi, jivi pecapanepaelivaisinexatsi. ¹⁷ Pacuenia itsamonae tsipaebabiaba Cristo pelivaisi epematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainaenë jivijavabelia itxa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinxaxa.

3

Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayaijamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonae pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë ita papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonae pataneyapëtaenexa xaniavaetsia patanecopiapitsinexa.

² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tsipaji baja jivi yapëtane xaniavaetsia Jesucristo pelivaisi patacatsipaebixae panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonae yapëtanenua Dioso patanitorobijava. ³ Paxamë xaniavaetsia panejumecovënëtame patacatsipaebilivaisi, Jesucristo pelivaisi. Nexata itsamonae, apo pataneyapëtaevi ata, ita pacavënëlivaisitane patanejumecovënëtsijavamë, panesivajamatabëjumaitsi: “Pablobana Corinto tomarapijivi cuyalato apo tsicobeyaquinae atatsi, ita jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabëjai. Piasaëtsaponaponaenë baja cajena Espíritu Santo pacatsijamatabëeca. Nexata baja pacajamatabëcuene pënëyorota pejanajamatabëcuene panexainaenexa. Nexata itsamonae xaniavaetsia ita patsitajinavanapame, bajarapamonae ata baja pacayapëtane Cristo pelivaisi papecatsijamatabëecaejava.

⁴ Paxanë payapëtaniji Dioso patanitorobijava pepacuene Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabëcueneta.

⁵ Paxanë patasaëta Dioso patatonacuenebinexa, apo

panejamatabëcuenecaējēpae. Nexata xua Dioso patoexana-
vanapajē, Dioso baja cajena paneyavenonabiaba. ⁶ Dioso
panejamatabëcueneyavenonabiaba patatsipaebabiabinexa
itsamonaejavabelia Dioso najumecapanepaeya pejanalivaisi
pejumaitsijava jivi pecapanepaenexa. Bajarapamonaejav-
abelia apo pajumaitsinē tsabiabi: “Pajumecovēnētavanapare
Dioso Moiséspijinēta penajumecopatsilivaisi. Itsa apo
pajumecovēnētsimē tsane, nexata panaxuabianame,”
apo pajanē tsabiabi. Biji rajane jivi patsipaebabiabajē
pacuenia Espíritu Santo jamatabëcueneasaëyaexanaejitsiatsi.
Palivaisi bajayata Dioso Moiséspijinēta najumecopata,
itoroba pebeyaxuabinexatsi pajivi apo jumecovēnētsi
bajarapalivaisi. Itsiata baitsi jane pajivi jumecovēnēta
papejanalivaisi jivi patsipaebabiabajē, Espíritu Santo pesaëta
jamatabëcueneasaëyaexanaponatsi.

⁷ Bajayatami Dioso Moiséspijinēta najumecopata.
Bajarapalivaisi Dioso yaquina ibopanabejumata.
Bajarapalivaisita Dioso itoroba pajivi apo jumecovēnētsi
bajarapalivaisi pebeyaxuabaponaenexatsi. Bajarapacuenia
Dioso Moiséspijinēta itsa najumecopata bajarapalivaisi,
Moiséspijinē itabaranivenivena bitso. Nexata Israelpijinē
pemomoxi apo itabaranaëcotsicapanepaetsi. Itsiata
baitsi jane bajaraxuacujinae itsamatacabianējavabelia,
itabaracotiacaevapona baja. ⁸ Palivaisi bajayata Dioso
Moiséspijinēta najumecopata, xanepana baja picani
caepatoyonexa saya. Bajarapalivaisimi matatoxenetsia
bitso xanepana papejanalivaisi mapamatacabitaje
jumecovēnētavanapatsi Dioso vajanacacapanepaenexa.
Bajarapacuenia Dioso nacacapanepaena Espíritu Santo
vajanacatsijamatabëcaexae daxitamatacabijavabelianexa.
⁹ Bajayata Dioso Moiséspijinēta najumecopata. Nexata
bajarapalivaisi xanepana. Tsipaji bajarapalivaisi
pejamatabëcueneta, jivi yapētane Dioso penaneconitsi-
aexanaejavanexatsi pibisiacuene pexanaeconi yabara.
Itsiata baitsi jane bajarapalivaisimi matatoxenetsia
bitso xanepana papejanalivaisi pejamatabëcueneta
Dioso nacacapanepaejitsia. Bajarapapejanalivaisi
pejamatabëcueneta, Dioso baja aneconijibia ncatane.
¹⁰ Palivaisi bajayata Dioso Moiséspijinēta najumecopata,
xanepana baja picani. Itsiata baitsi jane palivaisi Dioso
cotocaevi najumecopata, bajarapalivaisi bitso xanepana.
Bajaraxuata palivaisimi copiaya Dioso najumecopata
Moiséspijinēta, aeconoxae baja nacatsitaajumematamobi.
¹¹ Palivaisi copiaya Dioso Moiséspijinēta najumecopata,
xanepana picani caepatoyonexa saya. Biji rajane palivaisi

cotocaevi Dioso najumecopata, bitso xanepana. Tsipaji daxitamatacabijavabelianexa bajarapalivaisi tsitecaena.

12 Payapētaniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinē bajarapalivaisi patatsipaebinxexa jivijavabelia. Palivaisivajēto payapētaniji, patsipaebabiabajē jivijavabelia. 13 Bajayata Moiséspijinē yapētae ata livaisi. itsiata xaniavaetsia apo tsipaebi pijajivijavabelia. Itsiata paxanē bajarapacuenia apo paitsinē. Bajayata Moiséspijinē itsa itabaranivenivena, naitabaraacata papaēbērēpanata. Bajarapacuenia naitabaraacata pijajivi, Israelpijinē pemomoxi, pitabarataeyanivatsi bajarapacotia pecaevaponaejava. 14 Itsiata baitsi jane bajarapamonaejavabelia Moiséspijinē tsipaebi ata, apo jumeyapētaetsi pajamatabēcuenelivaisi yabara tsipaeba. Bitso ajamatabēcuenetaja bajarapamonaemi. Nexata apo jumeyapētae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxē ajamatabēcuenetaja bajarapamonaē pemomoxi ata. Bajarapamonaē penacaetuatabiabibota, itsa lebabiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bajarapamonaē itsa jumecovēnētsipa Cristo pesivatēpaejavatsi, nexata matapania jumeyapētaejitsipa pajamatabēcuenelivaisi xaina palivaisi bajayata Moiséspijinē tsipaebabiaba. 15 Ajena mapamatacabijavaberena ataje, judíovi penacaetuatabiabibota itsa lebabiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bitso ajamatabēcuenetaja bajarapamonaē. 16 Itsiata baitsi jane pajivi najamatabēcuenecopata vajatuxanenē Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapētane pajamatabēcuenelivaisi xaina palivaisi bajayata Moiséspijinē tsipaebabiaba. 17 Vajatuxanenē Jesucristobeje, Espíritu Santobeje, najamatabēcuenejēpabeje. Jesucristo pejamatabēcueneta Espíritu Santo ponapona vajajamatabēēthētotā. Nexata Espíritu Santo nacajamatabēcueneyavenonapona pibisiacuene vajaexanaeyaniva. 18 Nexata Jesucristo pejamatabēcueneta, Espíritu Santo nacayavenona. Nexata pacuenia Moiséspijinē jivi vecuanaitabaraacata pitabaracotiaeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajētsiaya jinavanapatsi xaniavaetsia

jivi peyapëtaenexa Dioso ayaijamatabëcuene pexainaejava. Espíritu Santo nacajamatabëcueneyavenonapona vajavjänaeyabelia pejanajamatabëcuene vajaxainaponaenexa. Nexata pacuenia Jesucristo jamatabëcueneitsi, bajara vaxaitsi ata vajajamatabëcueneitsinexa.

4

1 Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. 2 Muetsia apo paexanaenë itsacuenejava ata. Apo paexanaenë daxita xua piauracuene ata. Jivi patayamaxëitojorobinexa, itsacuenejava ata apo paexanaenë. Apo patsipaebabiabinënuua saicayalivaisi Dioso pejumelivaisivecua. Dioso baja cajena yapëtane jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. 3 Itsa patsipaebabiabajë jivi pecapanepaelivaisinexatsi, jumenapebetsiaya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. 4 Bajarapacuenia apo jumecovënëtsi tsipaji dovathi pejamatabëcueneta ajamatabëcueneitaquiriayaexanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabëcueneitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcueneitayotsiyanivatsi. Cristo paxa Dioso jamatabëcuenejëpa. Nexata pacuenia Dioso jamatabëcueneitsi, bajara Cristo ata jamatabëcueneitsi. 5 Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. 6 Bajayata Dioso mapanacuae itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcueneaitaquirijavami, Jesucristo pelivaisi itsa pajumecovënëtajë, Dioso panejamatabëcueneitayota. Bajarapacuenia itsa panejamatabëcueneitayota, payapëtaniji Dioso bitso ayaijamatabëcuene pexainaejava. Jesucristo

itsa itabaranivenivena Dioso pexēnatoxae, paxa Dioso jamatabēcueneitajēta Dioso bitso ayaijamatabēcuene pexainaejava.

Pacuenia Dioso jamatabēcuene yavenona pijajivi, itsa tonacuenebavanapatsi, yabara pelivaisi

⁷ Paxanē Dioso patanejamatabēcueneitayotsivi ata, pataperabēto apo ajamatabēsaē. Pacuenia atsavaxi bajayajebi apo ajamatabēsaē, bajara saya itsi. Pataperabēto apo paperabēsaē atanē, Dioso pataneyavenonaexae, pajamatabēcuenesaēnē tsavanapae. Nexata bajarapacuenia pataajamatabēcuenesaē tsavanapaejava patanetaevi, jamatabējumai tsane paxanē yabara: “Mapamonaeje ajamatabēcuenesaē tsavanapae Dioso pesaēta,” jamatabējai tsane. ⁸ Nexata panetocopiapatabiabi ata itsacuene patanetoypēbejecuene, itsiata Dioso paneyavenonabiaba patavecuapanepaenexa bajarapacuenie. Apo payapētaeyabiabi atanē pajamatabēcuene yabara panetocopiapata patanetoayapēbejecuene, itsiata paxanē apo pacopatsinē Dioso patajumecovēnētsijava.

⁹ Itsamonae panebejiobiaexanabiabi ata Dioso patajumecovēnētsijava yabara, itsiata Dioso apo panecopatsi patajaepato. Itsamonae irata panepenetiabiabi ata patanebeyejebinexa picani, itsiata pepacuene apo panebeyaxuababiabi Dioso pataneyavenonabiabixae.

¹⁰ Pacuenia Jesús pijavajabitsaē bajayajebi picani jamatabēbeyaxuababiabatsi, bajarapacuenia paxanē ata Jesús papijajivixaenē, itsamonae jamatabēpanebejebabiaba picani. Itsiata apo panebeyejebicanepae. Bajaraxuata daxita jivi yapētane Jesús pataneyavenonabiabijava.

¹¹ Daxitamatacabi patajinavanapaematacabianē, panetsiayai tsabiabi itsamonae patanebeyejebinexa Jesús papijajivixaenē. Bajarapacuenia panetocopiapatabiaba jivi pataneyapētaenexa Jesús pataneyajavaponaponaejava.

¹² Panetsiayai tsabiabi itsamonae patanebeyejebinexa patacatsipaebabiabixae papecacapanepaelivaisinexa Diosojavabelia. Nexata paxanē patacatsipaebilivaisi panejumecovēnētsixae, itsamatacabi athēbētatsia Dioso pacarajutsiana matacabi apo pevereverecaejava.

¹³ Dioso pejumelivaisibaxutota jumaitsi mapacueniaje: “Jumecovēnētajē Dioso taneyavenonaejavanexa. Bajaraxuata tsipaebajē jivijavabelia Dioso taneyavenonaejavanexa,” jaī. Bajara pijinia pacuenia paxanē ata pajamatabēcueneitsinē. Pajumecovēnētajē Dioso pataneyavenonaejavanexa. Bajaraxuata patsipaebabiabajē jivijavabelia Dioso pataneyavenonaejavanexa. ¹⁴ Vajatuxanenē Jesús petēpaecujinae Dioso icatsia asaēyaexanatsi. Bajaraxuata

payapētaniji baja pexaniajaicuene Dioso icatsia paxanē ata pataniasaēyaexanaejavanexa patatēpaecujinae, Dioso patayajavajinavanapaenexa pijanacuataatsia. ¹⁵ Paxanē itsamonae panebejiobiaexanabiabi ata, itsiata apo pacopatsinē patacatsipaebabiabijava pexaniajailivaisi. Nexata panevajēnaeyabelia pajumecovēnētaaponame patacatsipaebilivaisi. Nexata baja itsa paayaibitsaētome tsaponae Dioso panejumecovēnētsivi, paayaibitsaētome baja pijinia tsaponae Diosojavabelia panejumaitsivinexa: “Xanepana rabaja. Tshipaji bitso pexaniacuene panetoexaname,” panejaivinexa Diosojavabelia. Nexata papecajumetaevi ayaibitsaēto yapētaena Dioso bitso ayaijamatabēcuene pexinaejava.

¹⁶ Bajaraxuata itsamonae panebejiobiaexanabiabi ata, itsiata apo pajamatabēcopatsinē jivi patatsipaebabiabijava pexaniajailivaisi. Pataperabēto cueranaponae ata, itsiata patavajēnaeyabelia, caematacabi canacujitsia, pajamatabēcuenesaēnē tsaponae Dioso patajumecovēnētsijava. ¹⁷ Xua nacatocopiapatabiaba itsamonae vajanacabejiobiaexanabiabinexa, saya caepatoyo bajarapacuenia nacabejiobiaexanabiaba mapanacuataje vajajinavanapaepatoyo. Bajaraxuacujinae athēbētatsia xainaenatsi daxitacuenevecua pexaniajava, baitsi matacabi apo pevereverecaajava. ¹⁸ Nexata apo vajēnaeevetavanapaetsi vajanacatocopiapatsinexa, xua nacacaējēpa vajataenexa. Biji rajane jamatabēnajinavanapatsi vajanacatocopiapatsinexa xua apo nacacaējēpae vajataenexa. Tshipaji xua nacacaējēpa vajataenexa, daxita bajaraxua, vereverecaena. Itsiata baitsi jane xua apo nacacaējēpae vajataenexa, daxitamatacabijavabelianexa apo vereverecae tsane.

5

¹ Mapanacuata jivi pexanaebobērēto bepijia baabeje. Bajara pijinia itsi vajaperabēto ata. Bepijia vereverecaena. Itsiata baitsi jane yapētanetsi mapacueneye. Vajatēpaecujinae itsamatacabi Dioso athēbētatsia nacarajutsiana apo pevereverecaeperabētonexa. ² Xaniajai cajena. Itsa abaxē jinavanapatsi mapanacuataje, bitso picani jitsipabiabatsi vajanacaperabēithianaenexa athēbēpiperabētonexa. Jitsipabiabatsi picani vajaponaenexa athēbēabetsia pejanaperabēto vajayajavajinavanapaenexa athēbētatsia. ³ Athēbētatsia raja aperabējibia apo jinavanapae tsanetsi. Biji rajane pejanaperabēto yajavajinavanapaenatsi. ⁴ Itsa abaxē jinavanapatsi mapanacuataje, bitso picani jitsipabiabatsi vajanacaperabēithianaenexa. Apo jitsipaetsi picani vajatēpaejava. Itsiata baitsi jane

yapëtanetsi mapacueneje. Vajatëpaecujinae itsamatacabi athëbëtatsia yajavajinavanapaenatsi pejanaperabëto, apo peverevereceaerabëtonexa jane baja. Nexata mapanacuata vajayajavajinavanapaerabëtomimi ajibi baja tsane. Xainaenatsi juya apo peverevereceaerabëtonexa.
 5 Bajarapacuenia vajanacaperabëithianaenexa Dioso nacatoxaina. Nexata Dioso nacatocopata Espiritu Santo vajanacayajavaponaponaenexa. Nexata Dioso yabara bejamatabëjumaitsitsi mapacueniaje: “Mapacueniaje Espiritu Santo Dioso pataneyajavaponaponaeyaexanaexae, nexata payapëtaniji xaniajai pepacuene itsamatacabi Dioso pataneperabëithianaeejavanexa. Xaniajai baja cajena. Pepacuene itsamatacabi Dioso paneperabëithianaena pacuenia baja najumecapanepaeya jumaitsi,” bejamatabëjaitsi Dioso yabara.

6 Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneje. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavanapaejitsiatsi, bajarapanacua abaxë tajë vecujinavanapatsi.
 7 Apo taetsi abaxë athëbëtatsia vajatuxanenë vajayajavajinavanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaejavanexa.
 8 Bajaraxuata jitsipatsi vajatëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenë pijanacuatatsia vajayajavajinavanapaenexa.
 9 Bajaraxuata mapanacuata vajajinavanapaematacabibeje, asaëyata vajatuxanenë tonacuenebavanapatsi. Tsipaji jitsipatsi vajanacasivajamatabëcuene barëyajava. Vajatëpaecujinae ata, pijanacuatatsia jamatabëtojinavanapatsi pejitsipaecuenia.
 10 Vajatuxanenë pejitsipaecuenia jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtaponenatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamonaexaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi

11 Payapëtaniji baja cajena itsamatacabi vajatuxanenë pitabarata cunaviaya patananubenaeejavanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene

apo panajamatabëxainabiabinë bajarapalivaisivecua. Dioso baja cajena panejamatabëcueneyapëtane pacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. ¹² Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcueneçaëjëpaenexa panejumecanaviatsijava pamonaë pibisiacuenia panebaracuaicuaijai. Bajarapamonaë paneyalivaisiaexanabiaba. Beayaijamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeneconi yabara. Apo canaëjëtsi pexaniajamatabëcuene pexainaenexa. ¹³ Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepatanematajemabivi. ¹⁴ Cristo raja paneasiva tsabiabi. Bajaraxuata patonacuenebavanapajë. Pajamatabëjumaitsinë tsabiabi: “Caenë Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepevi Dioso nacatane,” pajamatabëjanë tsabiabi. ¹⁵ Cristo jivi sivatëpa. Petëpaecujinaë Dioso icatsia asaëyaexanatsi. Nexata daxita pamonaë jumecovënëta Cristo pesivatëpaejavatsi, matacabi apo peverevereçaejava xainaena. Nexata bajarapamonaë apo bexanavanapae pijacuata penatojitsipaecuenia. Biji rajane bexanavanapa pacuenia Cristo tojitsipatsi pesivajamatabëcuenebarëyanexatsi. ¹⁶ Bajaraxuata ajena mapamatacabijavaveliacujinaëje, patavajënaeyabelia tsaponaë, Dioso pejumecovënëtsivi yabara apo bepanajamatabëxainaenë pibisiacuenia, pacuenia Dioso apo pejumecovënëtsivi banajamatabëxaina. Tsipaji pamonaë Dioso pejumecovënëtsivi pacuenia bëpënëaverena jamatabëcueneitsi, apo pajamatabëcueneyapëtaenë. Xanë ata rabaja picani Jesucristojavabelia tanajamatabëcuene copatsivajënaeya, Jesucristo yabara najamatabëxainajë pibisiacuenia, pacuenia banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tsipaji baja yapëtaniji Cristo pexaniajainëcuene. ¹⁷ Pajivi

najamatabëcuenecopata Jesucristojavabelia, bajarapajivi xaina pejanajamatabëcuene. Pijaperujamatabëcuenemi baja vecuaajibiaexanatsi. Nexata bajarapajivi daxitacuene sivanajamatabëxaina pexaniajamatabëcueneta.

¹⁸ Daxitatsi Dioso pejanajamatabëcuene nacarajuta. Dioso nacabarajamatabëcuenexanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovënëta, Dioso pebarajamatabëcuenexanepanaenexatsi. ¹⁹ Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcuenexanepanaeya tanetsi daxita pamonae jumecovënëta Cristo pesivatëpaejavatsi. Paneconi picani bajarapamonae xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. ²⁰ Nexata paxanë Cristo papijajivinë tsanajetarubena. Cristo baja cajena pejamatabëcueneta, papatajë paxamëjavata patacatsipaebinexa pexanialivaisi. Pacuenia Dioso itsa patsipa, pacamuxujiobijitsipa, bajarapacuenia xanë ata pacamuxujiobatsi Cristo papecasivatëpaexae panijaneconi yabara Dioso papecabarajamatabëcuenexanepanaenexa. ²¹ Cristo pibisiacuene apo exanae, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneonijibia nacatane itsa jumecovënëtatsi Cristo vajanacasivatëpaejava vajaneconi yabara.

6

¹ Dioso pataneyajavanacuenebixae, asaëyata pacamuxujiobatsi. Dioso pinijicuenia papecaitaxutotsoniataejava, pacatsipaebatsi panejumaebiyaniva. Itsa pajumeaebijitsipame, nexata Dioso nacueratsipa papecaitaxutotsoniataejava. ² Tsipaji Dioso jivi pitaxutotsoniataejavanexa, tajëvelia Dioso pejumelivaisibaxutota jumaitsi mapacueniaje: Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacacapanepaenexa jane baja.

³ Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene,

tsiquirijavayo ata, pataexanaejava yabara jivi patanejumeaebiyaniwa Dioso pejumelivaisi itsa patsipaebajë. ⁴ Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejiohiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae patanebeyejebinexa. Bajarapacuenia panetsiayai tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. ⁵ Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuenenë. ⁶ Dioso papijajivicuenenë jivi pataneyapëtaenexa, jivi patsitajinavanapajënu mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuena. Bajayajebi itsamonae pibisiacuene paneexanabiabi ata, apo pacuene canaviatabiabinënu. Pexaniacuene patoexanabiabajënu itsamonaejavabelia. Patsitajinavanapajënu pacuenia Espíritu Santo paneyapëtaeyaexanapona Espíritu Santo patanetsijamatabëcaexae. Patsitanajamatabëcuene itajëtavanapajënu itsamonae ata pataasivajava patajamatabëëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë. ⁷ Dioso papijajivicuenenë jivi pataneyapëtaenexa, patsitajinavanapajënu mapacueniaje. Ëpexaniajailivaisi jivi patsipaebabiabajë. Patsitanacuene itajëtavanapajënu daxita xua paexanavanapajë, Dioso pataneyavenonabiabijava. Dioso baja aneconijibia patanetaexae, Espíritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espíritu Santo patacuene amoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicuenenë. ⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuena panebaracuacuajai tsabiabi.

Itsamonae pijinia pibisiacuenia panebaracuaicuaijai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsënëtsivi. ⁹ Itsamonae pataneyapëtaevi ata, itsiata apo bepataneyapëtaevi panetaeyabiaba. Itsajavata itsamonae jamatabëpanebejebabiaba picani. Itsiata tsiteca asaëya bajarapalivaisi patsipaebavana-pajë. Dioso baja cajena panetocopata itsamonae ayaicuenia patanebejiobiaexanabiabinexa, itsiata apo patanebejebinexa. ¹⁰ Panajamatabëxainabiabi atanë bitso itsamonae pibisiacuene pexanaejava yabara, itsiata bëpënëa pepacuene pajamatabëcuenebarëyanë tsavanapae daxitamatacabijavabelianexa. Patabejiobivi picani. Itsiata jivi ayaibitsaëtoxanetonë ricovi paexanaponajë Dioso pejumelivaisi patatsipaebijamatabëcueneta pejumecovënëtsixa. Apo paxainaenë picani mapanacuapijicuene. Itsiata baitsi jane Diosojavabelia daxitacuene paxainajë, apo peverevereaejavanexa jane baja.

¹¹ Tajamonae, paxamë paCorinto tomarapijivimë, pacana-jamatabëcuene vajunupaebatsi baja cajena roviaia. Apo pacavecuanajamatabëcuene matayatsitsi. ¹² Asivaya pacatae atatsi, paxamë itsiata bajarapacuenia asivaya apo pane-taemë. ¹³ Pacuenia pexi pexainaenë asaëya banacoximuxu-jioba, bajara pijinia pacuenia paxanë ata pacamuxujiobatsi. Paxamë ata panejamatabëcuenevetsina asivaya panetaema pacuenia baja paxanë asivaya pacatanetsi.

Pacuenia piasaëtsaponaponaenë Dioso nacatane bepijatemplobotsi tsavanapae yabara pelivaisi

¹⁴ Dioso apo pacatojitsipae mapacueneje. Pax-amëyajuvënëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinexa ata pëtme Dioso apo pejumecovënëtsivi. Tshipaji apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae Dioso apo pejumecovënëtsivi. Tshipaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejëpaebeje. ¹⁵ Cristobeje dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponapon-aenexabeje. Tshipaji apo najamatabëcuenejëpaebeje. ¹⁶ Bajara pijinia navecuaitsibeje Dioso pijatemplobobeje, jumapecataeya pexanaenëanë penubenaetemplobobeje. Apo najamatabëcuenejëpaebeje. Vaxaitsi baja cajena

piasaëtsaponaponaenë Dioso, nacatane bepijatemplobotsi tsavanapae. Bajarapacuenia nacatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bajarapajamatabëcuene yabara bajayata Dioso vaxaitsi yabara tajëvelia jumaitsi mapacueniaje:

Tsijamatabëecaenajë bajarapamonae tayajavaponapon-aenexa. Bajarapamonae pijaDiosonë tsane. Bajara pijinia pamonaë tajajivi tsane, jai Dioso bajayata tajëvelia vaxaitsi yabara.

¹⁷ Bjaraxuata Dioso apo pejumecovënëtsivi vajave-cuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitsi mapacueniaje:

Pamonae tuatujëta pajinavanapaename, pavecuapit-sapaename. Bajarapamonae navecuatsatsia pajinavanapaename. Paxamë pëtsa pibisiacuene panaexanaename bajarapamonaeta papeca-jamatabëcuene bijianaeyaniva. Nexata xanë pacasivabarëya tsanetsi. ¹⁸ Paneaxanë tsane. Nexata daxita paxamë pataximë tsane,

jai bajayata vajatuxanenë Dioso tajëvelia vaxaitsi yabara, daxitacuene pevetsinë.

7

¹ Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bjaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisijamatabëcuene vajanajamatabëxainabiabijavami ata, copatsianatsi baja. Dioso yaiy-ataeya jinavanapaenatsi Dioso vajanacatojitsipaecuenia.

Pacuenia Pablo sivajamatabëcuenebarëya Corinto tomarapi-jivi yabara pelivaisi

² Panetsitanajamatabëcueneitajëre pataniasivajavamë. Cae-jivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacaya-juvënë yamaxëitojorobitsinua bajarapacuenia panijapalata patacavecuapitsinexa. ³ Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabijavabelianexa asivaya pacajamatabënajinabiabatsi. ⁴ Payapëtanijinua cae-jamatabëcuene panenajamatabëxainaejava. Bjaraxuata bitso pacasivajamatabëcuenebarëyatsi. Paepatota ata itsamonae

panebejiobiaexanabiaba, apo panasivabëjanë tsabiabi. Tsipaji bajarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunaviajinavanapabiabajë. ⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. ⁷ Tito pepatsixae paxamëjavaverena, panejamatabëcueneasaëyaexana. Itsiata Tito ëpëpatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaberena, pamuxunanajamatabëcuenesaëtajë. Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeneconi. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunanajamatabëcuenebarëyanë.

⁸ Pabaxutomi copiaya pacatoyaquinatsi, itsa palebame, bitso pacanajamatabëxainaeyaexana. Itsiata saya caepatoyonexa. Bajarapacuenia papecanajamatabëxainaeyaexanaexae, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaenë. ⁹ Aeconoxae baja sivabarëyanë patacatoitorobixae bajarapabaxutomi. Itsiata apo sivabarëyanë xua pacanajamatabëxainaeyaexanatsi panijaneconi yabara. Biji rajane sivabarëyanë tsipaji patacanajamatabëxainaeya exanaejavata bajarapabaxutomita, pacopabame baja pibisiacuene paneexanabiabijava. Panajamatabëcuenepënëyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabëcueneta,

pacajamatabëcueneyavenonatsi. ¹⁰ Nexata pacuenia Dioso pacatojitsipa, bitso payanamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepënyorotame baja Diosojavabelia. Nexata paxamë Dioso pacacapanepaena. Pamonaë Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamonaë yanajamatabëxainavanapae ata pibisiacuene pexanaeneconi, itsiata itsa apo copabi tsane pibisiacuene pexanabiabijava, itsa apo najamatabëcuenepënyorotsi Diosojavabelia, bajarapamonaë Diosovecua naxuabiana daxitamatacabijavabelianexa. ¹¹ Panajamatabëcuenecanaëjère mapacueneje. Pacuenia Dioso pacatojitsipa, bitso paxamë payanamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcuenereviabiaya baja pacanaëjètame panijaneconi. Pepacuene panavajunupaebamenua Diosojavabelia pacuenia paexanavanapame. Paxamë picani bitso pabaraanaepanabiabame paxamëyajuvënënë, ponë pibisiacuene exanaponapona paxamë tuatuajëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecatojitsipaecuena. Pasivanajamatabëcueneveretamenua panenaneconitsiaexanaenexa paxamëyajuvënënë, ponë pibisiacuene exanaponapona paxamë tuatuajëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcueneitajëtame Diosojavabelia apo panenaneconitsijava. ¹² Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujiobinexa. Apo toyaquinaenë caenë paxamëyajuvënënë tamuxujiobinexa, ponë pibisiacuene exanaponapona paxamë tuatuajëta. Apo toyaquinaenënuu tamuxujiobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujiobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneyapëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenebarëyanexa. ¹³ Nexata baja panejumecovënëtame. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bajaraxuata

pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi. ¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebiana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi. ¹⁵ Tito najamatabënapitabiaba panejumecovënëtabiabijava pacuenia pacaitoroba. Najamatabënapitabiabanua yaiyataeya panecopiapitsijava ata. Bajaraxuata Tito bitso pacaitaxanapona pevajënaeyabelia. ¹⁶ Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneyavenonatsi Dioso pejumecovënëtsivi, Macedonia nacuapijivi. ² Macedonia nacuapijivi petoayapëbejecuenetsi tocopiapataponae atatsi ayaiacuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. ³ Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. ⁴ Bajarapamonae pinijicuenia paneitoroba patatocaponaenexa pejebiofrenda. Panejumaitsi mapacueniaje: “Pexaniacuene panetoexanaename. Panetocaponaename mapaofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. ⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,”

pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi. ⁶ Paxamë, paCorinto tomarapijivimë, paofrenda paxamë ata pacaetuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcuene yavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. ⁷ Paxamë itsamonaevēcua xaniavaetsia Dioso patojinavanapame. Xaniavaetsia panajamatabëcuene copatame Diosojavabelia. Payapëtanemenua xaniavaetsia Dioso pejumelivaisi. Pacacaëjēpanua xaniavaetsia Dioso pejumelivaisi panetsipaebinexa itsamonaē. Bitso pacajamatabëcuene enabiabanua Dioso pijacuene panetonacuene bavanapaenexa. Bitso paneasivamēnuā. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

⁸ “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuene barëyaya toexana ofrenda bepejiobivi peyavenonaenexa. Bajarapacuenia paxamë ata itsa paexanaename, itsamonaē patsitanajamatabëcuene itajëtsianame panexaniajaicuene Dioso paneasivajava. ⁹ Bajarapacuenia paxamë ata ofrenda parajutsianame. Tsi paji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamë ata itsamatacabi paayaijamatabëcuene vimë tsane Dioso pijanacuatatsia.

¹⁰ Pacatsipaebatsi paneyapëtaenexa pacuenia panetsitananepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoxaname ofrenda.

11 Paxamē picani imata pavaimi Jerusalén tomarapijivi bitso jamatabēpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaējēpa. 12 Nexata ita pepacuene parajutsianame pacuenia pacacaējēpa, Dioso pacasivajamatabēcuenebarēya tsane. Tsipaji apo pacaitorobi xua apo paxainaemē panerajutsinexa.

13 Apo pacaitorobitsi raja mapacueniaje: “Itsamonae paneyavenonaenexa, ofrenda ita paexaname, pabuare daxita panexainaepalatayomi,” apo pacajaitsi. Tsipaji juya paxamē panamatavenonaejitsipame.

14 Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaējēpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamē panamatavenonaename, caējēpaenatsi juya bajarapamonae papepayavenonaenexa. Bajarapacuenia nexata daxita paxamē panematavenonaejavaxi, apo panamatavenonaemē tsane. 15 Bajarapajamatabēcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xinae ata, itsiata apo toyajuvēnēnacopatsitsi. Itsajivi pijinia tsiquirijavayo xinae ata, itsiata apo namatavenonae,” jai Dioso pejumelivaisibaxutota. Bajaraxuata paxamē ata panexainaeyajuvēnējava, beparajutame penamatavenonaevijavabelia.

Pacuenia Tito, anijanēbeje yajava, pona Corinto tomabilia yabara pelivaisi

16 Xanē bitso jitsipajē paxamē patacayavenonaenexa. Tito ata bajarapacuenia jitsipa papepayavenonaenexa. Bajaraxuata pexaniajamatabēcuene rajutajē Diosojavabelia. Tsipaji Espiritu Santo pejamatabēcueneta Titobeje panajamatabēcuenejēpajēbeje paxamē yabara. 17 Nexata Tito itorobajē papecataenexalia, papepayavenonaenexanua bajarapaofrenda panecaetuatsijava paneveretsinexa baja tavajēnaelia. Barēyaya Tito jejai peponaenexa paxamējavabelia. Bajaraponē ata pijacuata pejitsipaexae peponaejava paxamējavabelia, ponaena papepayavenonaenexa.

18 Tito pepēta paitorobajē itsanē Dioso pejumecovēnētsinē. Bajaraponē Macedonia nacuata daxita Dioso pejumecovēnētsivi bitso peyapētaenētsi. Peyaiyataenētsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. 19 Ponē, Tito yajava, ponaejitsia paxamējavabelia, bajaraponē Macedonia nacuata itapetatsi daxita Dioso pejumecovēnētsivi. Nexata pamatacabi

paponaenajë Jerusalén tomarajavabelia, bajaraponë payajavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënuua patajitsipaejava patayavenonaenexa pamonaë bepejiobivi. Nexata bajarapamonae jamatabëjumai tsane: “Matsaena pamonaë jitsipa peyavenonaenexa bepejiobivije,” jamatabëjai tsane. ²⁰ Bajarapacuenia Macedonia nacuapijinë payajavaponaenajë itsajivi ata patanebaracuaicuajaiyaniva bajarapapalataxaneto yabara. “Pabloana raeta bajarapapalata yajuvënëcopata,” patanejaiyaniva. ²¹ Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata pataneyapëtaenexa apo patanacobetoxotsivicuene.

²² Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatonë pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaëjavanexa Jerusalén tomarapijivi. ²³ Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaenajavabeje jivi petaexae, nexata jivi yaiyatane Cristo pelivaisi,” pajamë tsane. ²⁴ Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamonaë itorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pabloana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

9

Ofrenda pecaetuatsijava Dioso pejumecovënëtsivijavabelia peyavenonaenexa yabara pelivaisi

1 Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipae nē picani icatsia patacatoyaquinaenexa bajaraxua yabara. 2 Tshipaji baja yapëtaniji pacuenia bitso jamatabëpayavenoname bajarapamonae. Bajaraxuata pacasi-vajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabivi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi itsa pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëtoخانeto tocaetuatapona ofrenda peyavenonaenexa Jerusalén tomarapijivi. 3 Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia itsa apo paveretsimë tsipae ofrenda panecaetuatsijava, paxamë yabara pexaniacuenia tajumait्सijava, najumecovëauranë tsipae Macedonia nacuapijivijavabelia. 4 Tshipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tshipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. 5 Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” jamatabëjanë. Nexata Titobana pacajamatabëcuenejavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda itsa paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

6 Pacanaëjëre mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava itsa parajutsianame itsamonaejavabelia, Dioso juya pacarajutsiana ayaijava. 7 Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tshipaji pajivi rajuta itsajivijavabelia jamatabëcuenebarëyaya, Dioso asivatsi. 8 Dioso baja

cajena caējēpatsi papecarajutaponaenexa pacuenia panamatavenoname matatoxenetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia. ⁹ Dioso pejumelivaisibaxutota jumaitsi mapacueniaje:

Ponē rajutabiaba bepejiobivi penamatavenonaecuene, bajaraponē pexaniacuene exanabiaba Dioso pitabarata. Nexata bajarapacuene Dioso apo nacofēnētsi daxitamatacabijavabelianexa, jai Dioso pejumelivaisibaxutota.

¹⁰ Dioso rajuta jivi peubixunexa. Bajaraxuacujinae icatsia Dioso pejamatabēcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexinaejavanexa, panerajutsinexanua bajaraxuayajuvēnējava bepejiobivijavabelia. Pacacaējēpaeyaexanaenanua ēpexaniacuene ayaijava paneexanaenexa. ¹¹ Bajarapacuenia Dioso pacarajutsiana panexinaenexa ayaijava. Nexata pacacaējēpaena bajaraxuayajuvēnējava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovēnētsivi, Jerusalén tomarapijivi, itsa parajutsianajē bajarapamonae, pexaniajamatabēcueneta rajutsiana Diosojavabelia bajarapacuenia paneyavenonaexae.

¹² Bajarapacuenia Dioso pejumecovēnētsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabēcueneta Diosojavabelia perajutabiabijava pematatsēnēa bitso pexaniajamatabēcueneta rajutsiana Diosojavabelia.

¹³ Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabēcueneta itajētsianame pepacuene xaniajai panejumecovēnētsijava pexanialivaisi, Cristo pelivaisi. Nexata bajarapamonae pexaniajamatabēcueneta rajutsiana Diosojavabelia Cristo pelivaisi panejumecovēnētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcueneta rajutsiana Diosojavabelia. ¹⁴ Nexata bajarapamonae bitso asivaya pacajamatabēnajinaeya pacatovajētabiabiana Diosojavabelia.

Tsipaji paxamē bajarapamonae payavenoname Dioso pejamatabēcueneta papecaitorobixae.

¹⁵ Vaxaitsi pexaniajamatabēcueneta rajutabiabatsi Diosojavabelia. Tsipaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuene bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanëjava jivi petsipaebanajetarucaenexa yabara pelivaisi

¹ Pacuenia Cristo pexaniacuenia pacaitorobijitsipa, bajarapacuenia xanë ata pexaniacuenia ajumesaëya pacaitorobatsi. Itsiata baitsi jane itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Itsa abaxë Pablo tajë nacavecuaponapona, ajumelivaisisaëya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaebinëcuenia patajopaena. Ajumejibia ponaponaena piajumeuraxae,” jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane. ² Nexata pexaniacuenie pacavajëtatsi. Pëtsa itsajamatabëcuene panetoexaname, itsa patsialiajë paxamëjavabelia, ayaijumeta pacabijataeya patacamuxujiobiyanima. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua: “Pablo apo ponapona Dioso pejumecovënëtsinëcuenia. Saya ponapona Dioso apo pejumecovënëtsinëcuenia. Yajavaponapona pijaperujujamatabëcuene,” jai tsabiabi paxamëyajuvënëvi xanë yabara. Bajarapacuenia xanë yabara pecuaicuaijaittsabiabivijavabelia ayaijumeta bijataeya cuaicuaijanë tsane. ³⁻⁴ Mapanacuapijivi, Dioso apo pejumecovënëtsivi, saicayacuenia nayajiviyapëtane pijavajabitsaëvecua penaevetsinexa pitsacueniabiyantatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. ⁵ Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabibinexa itsamonaejavabelia. Nexata pamona Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabëcuenesaëta. Itsamonae pijinia dovathi pejamatabëcueneta beayaijamatabëcuenevi natane. Pamona bajarapacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamona ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso

pejamatabëcuenesaëta. ⁶ Bajarapacuenia paxamëjava ata paexanaponaenajë. Paxanë panajamatabëcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënëtanapaename, paxanë pacavecuacapitsapaenatsi pamonaë apo jitsipae patanëjumecovënëtsinexa Cristo pelivaisi.

⁷ Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuene. ⁸ Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenëxexa,” pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. ⁹ “Pablo saya nacajamatabëcuenenabenajacaeya exanabiaba vajanacatoyaquinaelivaisianëta,” panejajava xanë yabara apo jitsipañë. Tsipaji bajaraxua yabara apo pacatoyaquinaetsi. ¹⁰ Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. ¹¹ Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaëjavabelia exanaejitsianë itsa papatsialiajë paxamëjavabelia. Pacuenia baja pacatoyaquinaliatsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonaë apo canaëjëtsi pacuenia Dioso pejumelivaisibaxutota jumaitsi. Nexata bajarapamonaë namataenetsia natane bepexaniajamatabëcuenevi. Nexata pamonaë apo bajarapamonaëyajuvënëvi, bepibisiajamatabëcuenevi tane. Saya xua bajarapamonaë tsitaxanepanatsi, bajaraxua yabara jumai tsabiabi: “Maxuajë pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuajë pibisiacuene,” jai tsabiabi. Bajarapamonaë cajena bitso apo yapëtaë. Paxanë raja bajarapacuenia apo pajamatabëcueneitsinë. ¹³ Paxanë Dioso paneitoroba Dioso

pijacuene patatonacuenebinexa. Nexata panacuanēja Dioso paneitoroba, bajarapanacuanēja Dioso pejumelivaisi patsipaebanajetarubenajē. Dioso paneitoroba tajē ata paxamē paCorinto tomarapijivimēja vabelia ata pataponaenexa patacatsipaebinexa pejumelivaisi. Nexata itsa panavajunupaebabiabajē Dioso patanitorobijava, xuayovajēto Dioso panetocopata patatonacuenebinexa, panavajunupaebabiabajē. Ayailivaisi apo panavajunupaebabiabinē saya itsamonae pataneyaiyataenexa patanavajunupaebijava yabara. ¹⁴ Bajaraxuata itsa papatajē paxamēja vata, pacatsipaebatsi pexanialivaisi, Cristo pelivaisi. Tsipaji bajarapanacuanēja Dioso paneitoroba pejumelivaisi patacatsipaebinexa. Bajarapalivaisi copiaya baja paxanē pacatsipaebatsi. ¹⁵ Itsamonae baja Cristo pelivaisi jumecovēnēta itsamonae petsipaebixaetsi. Nexata Cristo pelivaisi pejumecovēnētsivi yabara najumetsēnētsiaya apo pajumaitsinē tsipae mapacueniaje: “Paxanē raja patatsipaebixae, bajarapamonae jumecovēnēta Cristo pelivaisi,” apo pajanē tsipae. Pacatojitsipatsi panevajēnaeyabelia panejumecovēnētavanapaenexa Dioso. Nexata pajitsipajē orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ēpanacuanēja Dioso paneitoroba patatsipaebavanapaenexa pejumelivaisi, bajaraēpanacuanēja patsipaebavanapaenajē. ¹⁶ Nexata paxamē majotaje patacatsipaebicujinae, panepēnēyabelia penaetomaranēja ata jamatabēpatsipaebajē pexanialivaisi, Cristo pelivaisi. Apo pajitsipaenē patatsipaebinexa bajarapalivaisi itsaxuayo baja patavajēnaeya itsamonae tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apo benavajunupaebi pijacuata pexanaejava jivi saya peyaiyataenexatsi. ¹⁸ Pajivi pijacuata navajunupaebabiaba: “Xanē ra bitso pexaniacuene exanabiabajē,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenē jumaitsi: “Mara pajivije xaniavaetsia netoponapona,” jai, nexata tojumenamatamotatsi.

11

Pablo pelivaisi, penajumetsēnētsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuaijainē, xua exana, pijacuata banavajunupaeba itsamonaejavabelia. Bajara

pijinia pacuenia xanë ata, xua exanajë, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë.

² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare.

³ Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecayamaxëitojorobianiva. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara.

⁴ Pacacacujunavatsi penajumetsënëtsilivaisi petsipaebaponaevi papecatsipaebianiva. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espíritu Santo, ponë pacatsijamatabëeca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecacapanepaelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia.

⁵ Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë.

⁶ Jivijavabelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa, pacatsitanajamatabëcuene itajëtabiabatsi paxamëjavata itsa pacatsipaebavanapatsi Jesús pelivaisi.

⁷ Paxamëjavata itsa pacatsipaebaponaaponatsi pexanialivaisi papecacapanepaelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia betajibicuenia nacuenebabiabajë tanaevetsinexa pamatacabi pacatsipaebaponaaponatsi Jesús pelivaisi. Nexata baja pajumecovënëtame Jesús pelivaisi

itsamatacabi panexainaenexa matacabi apo pevereverecaejava. ⁸ Itsamonae Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaponanexa bajarapapalatata. Nexata pacayavenonapononatsi. Bajarapacuenia paxamëjavata naevetaponaponajë. Paxamë apo panerajutsimë palata. ⁹ Nexata pamatacabi paxamëjavata ponaponajë, namatavenonae atanë, apo pacavajëtsitsi panexainaeyajuvënëjava patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacajamatabëitonotsiyanima. Apo najamatabëxainaenë bexëjavabelia ata patacavajëtsinexa. ¹⁰ Yapëtaniji Cristo pelivaisi pepacuene pexaniajailivaisicuene. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenebarëyanë. ¹¹ Itsamonae xanë yabara jamatabëcuenenavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

¹² Itsiata tavajënaeyabelia Dioso pejumelivaisi pacatsipae-baponanatsi pacavajëtsinejevatsi itsacuenejavayo ata. Pamonae penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarapacuenia papecamatamoyanijobabiabixae, nexata toacuenebitsi pevajënaeyabelia papecajumaitsaponanexa: “Paxanë ata patonacuenebavanapajë Dioso pacuenia Pablo tonacuenebaponapona Dioso,” papecajainexa. ¹³ Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. ¹⁴ Paxamë apo bepasivejamatabëcuenenabenajacaemë bajarapamonae. Bajarapacuenia saya bajarapamonae exanavanapa papecayamaxëitojorobinexa. Dovathi raja caëjëpatsi Dioso bepijaángelnë penaexanaenexa, bepexaniajailivaisi itajara petsipaebinë jivi petaenexatsi. ¹⁵ Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejibitsiaponapona yabara pelivaisi

16 Icatsia pacajumaitsitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. 17 Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. 18 Pamonaë peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonaë. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. 19 Paxamë bitso ayailivaisi bepaneyapëtaevi panataneme. Itsiata apo payapëtaemë. Tsipaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi. 20 Bajarapamonaë bepapijajivitonëmëcuenia pacaitorobabiabi ata, itsiata xaniavaetsia panamuxunaevetabiabame. Panexainaejavaxi pacavecuaveretaponae ata, itsiata xaniavaetsia panamuxunaevetabiabame. Bijiyaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. 21 Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonaë ajumeurajibia pacanavajunupaebabiaba, xanë ata necaëjëpa bajarapitsicuene yabara ajumeurajibia patacanavajunupaebinexa pataneyaiyataenexamë. 22 Bajarapamonaë ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonaë pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonaë pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia

apo pacajumaitsitsi. ²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. ²⁴ Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaejava. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava. ²⁷ Itsajavata bitso nacuenebabiabajë. Cueranabiabajënuu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi.

29 Pajivi jamatabëcuenecuerana Dioso pejumecovënëtsijava, xanë ata sivajamatabëcuenecueranabiabajë. Pajivi itsajivi pejamatabëcueneta pibisiacueene exanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabajënuu pajivi pejamatabëcueneta jopaeayaexanatsi. ³⁰ Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcueneitajëtsinexa tajamatabëcuenefaefaenajava. ³¹ Vajatuxanenë Jesucristo paxa Diosojavabelia pexaniajamatabëcuenene berajutabiabatsi daxitamatacabijavabelianexa. Dioso baja cajena yapëtane jivi tatsipaebilivaisi pexaniajaicueene. ³² Imata ponaponajë Damasco tomarata. Nexata pepo iraevetsinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piatayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. ³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojotualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsitanaitajëtabijavatsi yabara pelivaisi

1 Apo netsitaxanepanae picani ajumeurajibia patacanavajunupaebinexa. Itsiata baitsi jane pamonae peyamaxëitorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabijava. Neyapëtaeyaexanana pajamatabëcuenelivaisi xaina xuanë ata netsitajëtabiaba. ²⁻³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuenene meta saya capona. Caenë Dioso yapëtane pacuenia necapona athëbëabetsia. ⁴ Itsiata

necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. ⁵ Bajarapacuenia athëbëabetsia tanecaponaejava tanavajunupaebinexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. ⁶ Ayailivaisi picani xainajë ajumeurajibia tanavajunupaebaponaenexa pacuenia taniiji athëbëtatsia. Ajumeurajibia itsa navajunupaebaponaejitsipajë, apo navajunupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tsipaji apo jitsipañë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenënë daxitajivi matatoxenetsia,” tanabarajamatabëjaiyaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi. ⁸ Diosojavabelia picani vajëtajë acueyabi xuabeje tanevecuaajibiaexanaenexa bajarapavixae. ⁹ Itsiata baitsi jane vajatuxanenë nejumaitsi mapacueniaje: “Jume. Apo cavecuaajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabëcuenecaëjëpae atatsi pesaëta tanetonacuenebinexa tajacuene, itsiata baja itsa caëjëpatsi tanetonacuenebinexa, nayapëtane tayavenonaecuene,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaëjëpaejava, nasivajamatabëcuenenëbarëyanë. Tsipaji Cristo pesaëta neyavenonabiaba daxitacuene yabara. ¹⁰ Apo tanejamatabëcuenecaëjëpaexae tasaëta tatonacuenebinexa vajatuxanenë pijacuene, nasivajamatabëcuenenëbarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenenëbarëyanë tsabiabi. Itsacuenejavaxi itsa namatavenonabiabajë, itsiata nasivajamatabëcuenenëbarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenenëbarëyanë tsabiabi. Itsa netsiayapëbeje tsabiabi tatonacuenebinexa Cristo pijacuene, itsiata

nasivajamatabëcuenebarëyanë tsabiabi. Tsipaji paepatota apo nejamatabëcueneçaëjēpae, bajarapaepatota vajatuxanënë bitso nejamatabëcueneyavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamonae peyamaxëitorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipae në picani tanavajunupaebinexa. Paxamë xaniavaetsia itsa panevajunupaebijitsipame pacuenia exanaponaponajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atanë, itsiata pamonae peyamaxëitorobiapóstolevivecua, xanë apo beveliajamatabëcuenenënë. ¹² Paxamëjavata itsa ponaponajë, netsiyapëbeje ata, bajayajebi pacatsitaexanapononatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaëta. Nexata paneyapëtaneme Dioso taneyavenonabiabijava. ¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenexamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacuenejavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacuenejavayo ata apo patacavajëtsijava.

¹⁴ Mabaja panamutotaje, acueyabi namuto taponae nexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipae në. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajëje. Daxita taxinaejavami, veretsipajë jamatabëcuenebarëyaya. Tasaëtsaponaponaepatojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacagamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva

tsaponae atatsi, itsiata covë paxamë juya bevelia saya paneasivamë tsaponae.

16 Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara. 17 Itsanë ata cajena, paxamëjavabelia xanë taitorobiviyajuvënënë, yamaxëitojorobiaya palata apo pacavecuapitsi. 18 Itorobajë baja Tito peponaenexa paxamëjavabelia papecataenexa. Itorobajënuua itsanë Dioso pejumecovënëtsinë Tito peyajavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenëjëpajëbeje.

19 Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo pane-tojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacujamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixaemë. 20 Pamatacabi ponaenajë paxamëjavabelia, bitso meta najamatabëxainaeya patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsënëtsia panebaracuaicuaijaitsiabijava ata. Pacataenatsi meta itsamonaevecua paayaijamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejinavanapaejava ata. 21 Paxamëjavata icatsia itsa patsianajë, Dioso meta pitabarata pacayapijiviaura tsanetsi

pibisiacuene paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyjavami, nevecuaajibi meta tsane. Paxamëyajuvënëvi bajayatajavaverenacujinae pibisiacuene pexanavanapaexae, sivajamatabënuenajë. Bajarapamonae pibisiacuene pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacuene pexanavanapaejava pevitota.

13

Pacuenia icatsia Pablo itaveta Corinto tomarapijivi Diosojavabelia penaneconitsiyaniva yabara pelivaisi

¹ Aeconoxae baja icatsia ponaejitsianë paxamëjavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevajunupaebinexatsi anijajivibeje, acueyabi pajivibeje ata, petaevitsi. Nexata xucujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. ² Imata panamutomi pacaitavetatsi daxita paxamë pibisiacuene paneexanavanapaejava panecopatsinexa, Diosojavabelia pananeconitsiyaniva. Bajarapacuenia itavetajë itsamonae ata pibisiacuene pexanavanapaeyaniva. Aeconoxae tajë pacavecuaponaponae atatsi, pacatoyaquinatsi icatsia patacaitavetsinexa pibisiacuene paneexanaeyaniva. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuene pexanaeneconi yabara. ³ Itsa pacananeconitsiaexanaenatsi, ajumesaënë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaicuaijitsabiabi-
java Cristo. Cristo baja cajena piamatabëcuenesaëjava, pacatsitanajamatabëcueneitajëta itsa pacayavenonapon-
apona paxamëjavata. ⁴ Xaniajai rabaja. Pacuenia vaxaitsi mapanacuapijivitsi ajamatabëcuenesaëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuenesaëjibi atanë, itsiata aeconoxae Dioso pesaëta Cristo payajavajinavanapajë patacajamatabëcuene yavenonaenexa.

⁵ Jica jane. Panajamatabëcuenelivaisiëjere itsa xaniajai pepacueni Cristo papijajivimë. Itsa pepacueni

Cristo papijajivimē, nexata payapētaename Cristo papecayajavaponaponaejava. Itsa Cristo apo papijajivimē, nexata Cristo apo pacayajavaponaponae. ⁶ Paxanē pajamatabējumaitsinē paxamē yabara mapacueniaje: “Corinto tomarapijivi vaxaitsi itsa nacacuenecanaējētsiana, xaniavaetsia yapētaena pepacuene Cristo pijajivicuenetsi,” pajamatabējanē. ⁷ Pacatovajētaponatsi Diosojavabelia pibisiacuene paneexanaponaejaniva. Bajarapacuenia itsa pacatovajētaponatsi Diosojavabelia, itsajamatabēcuene apo pacasivanajamatabēxainaetsi. Nexata apo pajamatabējumaitsinē paxamē yabara: “Itsa bajarapamonae xaniavaetsia jinavanapaena, nexata pijinia daxitajivi nacayapētaena pepacuene apóstolevicuenetsi,” apo pajamatabējanē paxamē yabara. Bajarapacuenia Diosojavabelia pacatovajētatsi tsipaji pacatojitsipatsi ēpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajē paxamējavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸ Tsipaji acuenebi patananeconitsiaexanaejava pajivi baja jumecovēnēta pexaniajailivaisi, Jesucristo pelivaisi. Pananeconitsiaexanaenajē ēpijaneconi pexainaevi. ⁹ Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabēcuenebarēyatsi. Tsipaji apo paxainaemē paneconi yabara pacananeconitsiaexanaejitsiatsi. Pacatovajētaponatsinua Diosojavabelia panevajēnaeyabelia panejamatabēcuenevitsabaponaenexa Dioso panejumecovēnētsijava. ¹⁰ Pacatoyaquinaliatsi mapabaxutoje taponaevajēnaeya paxamējavabelia tavajēnaelia panenajamatabēcuenexanebinexa pibisiacuene paneexanaejavavecua. Nexata itsa patajopaeliajē paxamējavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinēnexa. Nexata itsa patsialiajē paxamējavabelia, apo jitsipaenē tsane patacananeconitsiaexanaenexa. Biji rajane jitsipajē patacajamatabēcuene saēyaexanaejava panevajēnaeyabelia panejamatabēcuenesaēnexa Dioso panejumecovēnētsijava.

¹¹ Tajamonae, pajamatabēcuenebarēyamēre tsavanapae. Panevajēnaeyabelia panajamatabēcuene vitsabiaexanaponare Dioso panejumecovēnētsijava. Panamuxunaevere palivaisi pacatoyaquinaliatsi. Najamatabēcuenejēpaeya pajinavanapare jamatabēcuenexanepanaeya. Dioso vajanacaasivanē. Bajaraponē jamatabēcuenexanepanaeya

nacajinavanapaeyaexana. Nexata Diosojavabelia pacatovajëtabiabatsi Dioso papecayajavaponaponaenexa. ¹² Paxamë ata Dioso panejumecovënëtsixae, xaniavaetsia nasivaya namataenetsia panabajacobabiabare. ¹³ Daxita pamonae Dioso pejumecovënëtsivi, majota pejinavanapaevije, pacabajacobalia.

¹⁴ Pacatovajëtabiabatsi Diosojavabelia vajatuxanenë Jesucristo papecayavenonabiabinexa. Pacatovajëtabiabatsinua itsamonae ata asivaya panetaenexa pacuenia paxamë ata Dioso pacaasiva. Pacatovajëtabiabatsinua Espíritu Santo ata papecayajavaponaponaenexa.

Mapabaxutoje San Pablo toyaquina Galacia nacuapijivijavabelia

Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

¹ Xanë Pablonë, apóstolenënë. Jivi pejamatabëcueneta apo nitorobi tatsipaebaponaenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. ² Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. ⁴ Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxuabinexatsi pibisiacuene vajaexanaeneconi yabara. Nexata Jesucristo pejamatabëcueneta vaxa Dioso aneconijibia nacatane. ⁵ Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmè!” jaitsi tsabiabi daxitamatacabijavabelianexa. Bajara itsi tsane.

Pacuenia baja Jesús pelivaisivecua pematatsënëa ajibi itsalivaisi jivi pecapanepaelivaisinexatsi yabara pelivaisi

⁶ Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabenajacatsi. Jesucristo picani pejamatabëcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuana-jamatabëcuene pënëyorotame saicayalivaisijavabelia, bepapecacapanepaelivaisinexa itajara panejumetaexae. ⁷ Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajarapamonae pata papecajamatabëcuene naepatajërëcaeyaexanaenexa. Bajarapamonae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. ⁸ Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataithianaenexa bajarapalivaisi. Athëbëvetsica pepatsinë ata tsipae, ángelnë, acuenebi piaithianaenexa

bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso panenaneconitsiaexanaejitsipa daxitamatacabijavabelianexa. ⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

¹⁰ Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tanesivajamatabëcuenebarëyanexa. Saya jema jivi livaisi itsa tsipaebijitsipajë saya tanesivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

Pacuenia Pablo Dioso junatatsi apóstolenënexa yabara pelivaisi

¹¹ Tajamonae, jitsipajë patacatsipaebinexa mapalivaisije. Palivaisi tsipaebaponajë jivi pecapanepaelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi. ¹² Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevënëlivaisitaneme rabaja pacuenia exanaponaponajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudíovinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyabiabinë cajena tsiquirijavayo ata. Jamatabëverebiaxuaabiabajë Jesucristo pijajivi. ¹⁴ Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonae pevëjëavi judíovi, Israel nacuapijivi, matatoxenetsia xanë bitso casaënë tajumecovënëtsijava bajarapalivaisi. ¹⁵ Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenënexanë. ¹⁶ Nexata pamatacabi ponajë Damasco tomarabelia, namutoepatota Dioso netsitajëta

pexênato. Nexata Dioso neyapêtaeyaexana pexênato pelivaisi. Bajarapacuenia Dioso pexênato pelivaisi neyapêtaeyaexana tatsipaebaponaenexa apo judíovijava. Nexata Dioso taneyapêtaeyaexanaecujinae pexênato pelivaisi, apo ponaenê itsajivijavabelia ata tayanijobinexa Dioso pexênato pelivaisi. Apo ponaenê tanemuxujobinexanua Dioso pexênato pelivaisita. ¹⁷⁻¹⁸ Pamatacabi namutoepatota Dioso netsitajêta pexênato, apo naviatecaenê Jerusalén tomarabelia tayanijobinexa pamonaejavabelia xanêvecua copiaya exanatsi apóstolevi. Biji rajane rovia paliajê Damasco tomarabelia. Nexata Damasco tomarata tapatsicujinae, caenênê ponajê Arabia nacuayabelia, petusato nacuayabelia. Nexata petusato nacuata Dioso xaniavaetsia neyapêtaeyaexanapona pexênato pelivaisi. Bajaraxuacujinae icatsia bexêa Arabia nacuaverena naviarenajê Damasco tomaraberena. Bajaraxuacujinae tapuaxainae baja acueyabi pavaibeje tajumecovênêtsicujinae Dioso pexênato pelivaisi, ponajê jane baja Jerusalén tomarabelia apóstolenê Pedro tacaxitajarabinexa. Nexata Jerusalén tomarata, Pedrojavata, naponaponajê quince pamatacabibeje. ¹⁹ Itsiata Jerusalén tomarata pematatsênêa itsaapóstolenê apo taenê. ËSantiago saya, vajatuxanenê pejuyapijinê, taniji. ²⁰ Xaniavaetsia pacajumaitsitsi Dioso pitabarata. Palivaisi pacatoyaquinatsi, pexaniajailivaisi cajena.

²¹ Jerusalén tomarata taponaponaecujinae, ponajê icatsia Siria nacuayabelia Jesucristo pelivaisi jivi tatsipaebaponaenexa. Ponajê Cilicia nacuayabelia ata. ²² Jesucristo pelivaisi jivi itsa tsipaebanajetarucajê, Jesucristo pelivaisi pejumecovênêtsivi, Judea nacuapijivi, abaxê apo neyapêtae. Tsi-paji abaxê Judea nacuata apo tsipaebaponaenê Jesucristo pelivaisi. ²³ Bajarapamonae saya nevênêlvivaisitane itsamonae xanê yabara pejumaitsijava: “Ponê pina nacabarajinabiaba Jesucristo pelivaisi vajajumecovênêtsivi, aeconoxae pina baja bajaraponê ata jumecovênêta. Nexata pina itsamonae ata pejumecovênêtsinexa Jesucristo pelivaisi, bajaraponê tsipaebapona. Bajarapalivaisi yabara bajaraponê jamatabênacaverebiaxuaba picani,” pejaijava, itsamonae xanê yabara nevênêlvivaisitane Judea nacuapijivi, Jesucristo pelivaisi pejumecovênêtsivi. ²⁴ Bajaraxuata Judea nacuapijivi, Jesucristo pelivaisi pejumecovênêtsivi, jumai tsabiabi Diosojavabelia: “Diosomê, bitso ayaijamatabêcuenenê. Tsi-paji Pablo ata najamatabêcuenecopatsiaexaname nexênato Jesucristojavabelia,” jai tsabiabi xanê yabara.

2

*Pacuenia Pablo pevëna apóstolevi Jerusalén tomarata xani-
aetsia copiapitatsi yabara pelivaisi*

¹ Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacuajava, Cilicia nacuajava ata. Nexata Jesucristo pelivaisi jivi tatsipaebanajetarucaecujinae bajarapanacuabejajava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë. ² Patajë Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitsinë: “Maraeta pamonaë apo pejitsipaecuenia, tsipaebaponajë apo judíovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitaxanepanatsi pacuenia tsipaebaponajë apo judíovijava. ³ Bajarapacuenia tanavajunupaebixae, taneyanabinë Tito, apo judíonë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi. ⁴ Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaë panenaitaxutocaeveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. ⁵ Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipae-baponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa

pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajëna Dioso Moiséspijinëta penajumecopatsilivaisi. Nexata Dioso pepacuene necapanepaena,” pajamatabëjamë tsipae jamatabëcuenenavëxaniabiaya.

6 Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajaramatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajaramonae yabara itsamonae jamatabëjumai tsabiabi: “Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainaenë bajaramonae ayaijamatabëcuenevi tataenexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane. 7 Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuene. Nexata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënëtsivi penamatacaitorobivi xanë yabara. 8 Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

9 Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajaramatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuene tatsipaebaponaenexa Jesucristo pelivaisi apo judíovijava, nexata Dioso pejumecovënëtsivi

penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsi-paji paneyapëthanebeje patatonajuanacuenibivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponajébeje apo judíovijava. Santiagobana pijinia, Pedrobana, Juanbana, tsipaebapona judíovijava. ¹⁰ Bajarapamonae caelivaisiyo panejumaitsibeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenebarëyaya bajarapamonaenexa ofrenda toexanaeyaexanaponajë itsaxuayo tatsipaebilivaisi, Jesucristo pelivaisi, jumecovënëtaþona.

Pacuenia Pablo muxujioba Pedro Antioquía tomarata yabara pelivaisi

¹¹ Perujulivaisimi, judíovi pijalivaisi, itavetatsi judíovi caejavata peyajavanabaniyaniva apo judíovi. Pedro itsa ponapona Antioquía tomarata, muxujiobajë daxitajivi pitabarata. Tsiþaji Pedro apo pexanepanaecuene exana. Pedro apo judíovijavata itsa naponapona, jemata apo judíovi vecuanaþaicayaba. ¹² Pedro, judíonë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nanabaneþiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanaþaicayaba apo judíovi. Tsiþaji Pedro cjunava Santiago pijajivi þetaeyanivatsi apo judíovijavata penanabanijava. Pedro baja nexata copata apo judíovijavata penanabaneþiabijava. Santiago pijajivi perujulivaisi tsiteca jumecovënëtavanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cjunava bajarapamonae. Nexata Pedro jamatabëjumaitsi: “Itsa netaeþitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia neþijataeþitsipa,” jamatabëþjai Pedro. Bajaraxuata Pedro vecuanaþaicayaba baja apo judíovi. ¹³ Pedro yapëtae ata pacuenia picani apo bevecuanaþaicayabi apo judíovi, itsiata vecuanaþaicayaba. Nexata daxita judíovi, pamonae najamatabëcueneþopaba Jesucristojavabelia, itsa tane Pedro pevecuanaþaicayabijava apo judíovi, bajarapamonae ata vecuanaþaicayaba apo judíovi. Bernabé ata yapëtae ata pacuenia picani apo bevecuanaþaicayabi apo judíovi, itsiata vecuanaþaicayaba

apo judíovi. ¹⁴ Nexata pacuenia jumaitsi pexanialivaisi jivi pecapanepaelivaisinexatsi Diosojavabelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujio bajë. Daxita Dioso pejumecovënëtsivi pitabarata, jumaitsinë Pedrojavabelia: “Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuenia. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuenia, ¿detsa nexata xuajitsia caranata apo judíovi aeconoxae jamatabëjinavanapaeyaexaname judíovicuenia?” janë Pedrojavabelia pevecuanasaicayabixae apo judíovi.

Pacuenia judíovi ata xanepana penajamatabëcuenecopatsinexa Cristojavabelia pecapanepaenexatsi Diosojavabelia yabara pelivaisi

¹⁵ Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. ¹⁶ Pexaniajailivaisi patajumecovënëtsinexa, patajamonae baja cajena paneyajavavitsata. Nexata payapëtaniji mapacueneje. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarpacune paxanë pajudíovinë payapëtaniji. Bajaraxuata paxanë pajudíovi atanë, panajamatabëcuenecopatajë Jesucristojavabelia. Nexata Dioso aneconijibia panetane patanajamatabëcuenecopatsixae Jesucristojavabelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicanepae bajarapalivaisi. Nexata itsamonae jumecovënëtsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabëcuenenavëxaniabiaya nejumaitsi tsipae: “Xamë jumaitsimë tsabiabi: ‘Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso Moiséspijinëta penajumecopatsilivaisi,’ jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catanë pibisiacuene nexanaenë,” nejai tsipae itsajivi

jamatabëcuenenavëxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenë. ¹⁸ Diosojavabelia rajane naneconitsipajë mapacuenia itsa exanaejitsipajë. Dioso Moisëspijinëta penajumecopatsilivaisi, tajumecovënëtsijavami tacopatsicujinae, icatsia caevëalia itsa jumecovënëtsipajë, nexata Diosojavabelia naneconitsipajë. ¹⁹ Pamatacabi abaxë ajamatabëcuenesaenë tsabiabi tajumecovënëtsijava Dioso Moisëspijinëta penajumecopatsilivaisi, naneconitajë picani Diosojavabelia. Tsipaji ajamatabëcuenesaenë tsabiabi ata tajumecovënëtsijava bajarapalivaisi, itsiata apo necaëjēpae tajumecovënëtsicapanepeanexa daxita pacuenia jumaitsi bajarapalivaisi. Itsa meta abaxë tsiteca bajarapalivaisi jumecovënëtaaponaponaejitsipajë, yajavatēpaejitsipajë meta tajaneconi. Bajaraxuata aeconoxae baja icatsia bajarapalivaisi tajumecovënëtsinexa, apo sivanajamatabëxainaenë. Pacuenia baja petēpaejivi itsacuenejavayo apo sivanajamatabëxainae, bajara itsinë taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaponaeenexa pacuene Dioso jitsipa. ²⁰ Cristo cruzajavabelia itsa cobematabi-abarutatsi, xanë ata tajaneconi yabara nesivatēpa. Nexata xanë ata Cristo betaneyajavatēpae. Bajaraxuata perujujamatabëcuenemi, pibisiacuene taexanaenexa taneitorobabiabijamatabëcuenemi, nevecuatēpa baja cruzata. Nexata baja piasaëjamatabëcuene, pejanajamatabëcuene, xainajë. Cristo baja neyajavaponapona. Pajamatabëcuene yaasaenë tsaponapona, Dioso pexënatojavabelia najamatabëcuenecopatsiaya ponaponajë. Dioso pexënato nejitsipa. Nesivatēpanua baja cajena. ²¹ Apo namuxujematsinë Dioso vajanacaitaxutotsoniataejava. Dioso Moisëspijinëta penajumecopatsilivaisi, jivi pejumecovënëtsixae, Dioso aneconijibia jivi itsa taejitsipa, nexata Cristo jivi apo sivatēpae tsipae pijaneconi yabara. Nexata Cristo saya jema tēpaejitsipa.

3

Pacuenia Cristo pejumecovënëtsivi, Dioso aneconijibia tanetsi pecapanepaenexatsi pijaneconivecua, itsa jumecovënëta pacuenia Abrahampijinë jumecovënëta, yabara pelivaisi

¹ ¡Paxamë paGalacianacuapijivimë, bitso cajena paneajamatabëcuenetajavi! Itsamonae raeta saicayalivaisi yamaxëitojorobiaya pacatsipaeba, pexaniajailivaisi, palivaisi

baja picani pajumecovënētame, panecopabinexa. Xanē Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetae Jesucristo papecasivatēpaejava cruzata. ² Caejumeyo pacayanijobatsi. ¿Detsa xua yabara pacatsijamatabējūnua Espírítu Santo? Apo pacatsijamatabējone raja panejumecovënētsixae Dioso Moiséspijinēta penajumecopatsilivaisi. Espírítu Santo raja pacatsijamatabējūnua panejumecovënētsixae Jesucristo papecacapanepaejavanexa panijaneconivecua. ³ Paxamē bitso pajamatabēcuenetajamē. Pamatacabi pataxuxuabame panejumecovënētsijava Jesucristo papecacapanepaejavanexa panijaneconivecua, panajamatabēxainabiabame Espírítu Santo papecayavenonabiabinexa. Aeconoxae baja icatsia caevēalia panajamatabēxainame panejumecovënētsinexa Dioso Moiséspijinēta penajumecopatsilivaisi. Itsiata apo caējēpaetsi bajarapalivaisi papecacapanepaenexa. ⁴ Itsamonae bitso pacabejibiaexanabiaba pexanialivaisi, Jesucristo pelivaisi, panejumecovënētsixae. Bajaraxuata apo bepacopatsimē panejumecovënētsijava Jesucristo pelivaisi, palivaisi yabara itsamonae pacabejibiaexanabiaba. Tsiipaji itsa pacopabijitsipame panejumecovënētsijava Jesucristo pelivaisi, saya panacueratsipame. ⁵ Payapētaneme rabaja Dioso papecarajutsijava Espírítu Santo. Pinijicuene pexanaejavanē ata Dioso pacatsitaexana paxamē tuatujēta. Baitsi piavitanevi jamatejemaya exanapona. Petēpaevimi ata asaēyaexanapona. ¿Detsa xua yabara bajarapacue ne Dioso pacatsitaexana? Dioso raja apo pacatsitaexanae bajarapacue ne panejumecovënētsixae Dioso Moiséspijinēta penajumecopatsilivaisi. Dioso raja pacatsitaexanae bajarapacue ne panejumecovënētsixae patacatsipaebilivaisi, Jesucristo pelivaisi.

⁶ Bajayata Abrahampijinē Diosojavabelia najamatabēcuenecopatsiaya jamatabējūmaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabējai. Bajaraxuata Dioso Abrahampijinē aneconijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamē bepayapētaneme mapacue neje. Pamonaē jumecovënēta pacuenia Dioso najumecapanepaeya jumaitsi, bajarapamonae Abrahampijinē apo pemomoxi ata, itsiata Dioso tanetsi Abrahampijinē bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajēvelia jumaitsi pacuenia apo judíovi ata Dioso capanepaejitsiatsi pijaneconivecua.

Nexata apo judíovi ata Dioso itsa jumecovënëtsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajëvelia Abrahampijinëjavabelia Dioso jumaitsi mapacueniaje: “Tacatsipaebilivaisi tanejumecovënëtsixaemë, daxitanacuapijivi ata aneconijibia taenajë, bajarapamonae ata itsa nejumecovënëtsiana pacuenia xamë nejumecovënëtame,” jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaitsi. ⁹ Nexata baja vaxaitsi xaniavaetsia yapëtanetsi mapacuenije. Pamonae jumecovënëta Jesucristo pelivaisi, bajarapamonae Dioso aneconijibia tanetsi pecapanepaenexatsi pijaneconivecua. Tsipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaitsi.

¹⁰ Pajivi Dioso Moiséspijinëta penajumecopatsilivaisi apo jumecovënëtsicapanepae ata, jamatabëjumaitsi: “Bajayata Dioso Moiséspijinëta najumecopata jivi pejumecovënëtsinexa. Nexata baja xanë bajarapalivaisi jumecovënëtaaponaponajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaitsi mapacueniaje: “Pamonae apo jumecovënëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. ¹¹ Nexata baja vaxaitsi xaniavaetsia yapëtanetsi bajarapacuenie. Dioso Moiséspijinëta penajumecopatsilivaisi, jivi jumecovënëtsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovënëtsicapanepae daxita pacuenia itorobatsi Dioso Moiséspijinëta penajumecopatsilivaisi. Bajarapacuenie vaxaitsi yapëtanetsi. Tsipaji Dioso pejumelivaisibaxutota icatsia jumaitsi mapacueniaje: “Pajivi pepacuene Dioso pejumecovënëtsixae, jamatabëjumaitsi: ‘Xanë pepacuene Dioso neyavenonaena pacuenia najumecapanepaeya jumaitsi,’ jamatabëjai, Dioso aneconijibia tanetsi. Bajarapajivi xainaena matababi apo peverevereaejava,” jai Dioso pejumelivaisibaxutota. ¹² Dioso Moiséspijinëta penajumecopatsilivaisi jivi jumecovënëtsi ata, itsiata apo jumecovënëtsicapanepae daxita pacuenia itorobatsi bajarapalivaisita. Bajaraxuata Dioso Moiséspijinëta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovënëtsicapanepae ata Dioso Moiséspijinëta penajumecopatsilivaisi, itsiata

itsa jamatabējumaitsi tsane: ‘Xanē pepacuene Dioso neyavenonaena pacuenia najumecapanepaeya jumaitsi,’ itsa jamatabējai tsane, apo jumecovēnētsicapanepea ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovēnētsicapanepeaena daxita pacuenia itorobatsi Dioso Moiséspijinēta penajumecopatsilivaisi, bajarapajivi capanepaenatsi Diosojavabelia. Itsa apo jumecovēnētsicapanepea tsane daxita pacuenia itorobatsi Dioso Moiséspijinēta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinēta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tshipaji apo jumecovēnētsicapanepeatsi Dioso Moiséspijinēta penajumecopatsilivaisi. Itsiata baitsi jane Cristo itsa tēpa cruzata, nacaneconimatamota pijanata. Dioso Moiséspijinēta penajumecopatsilivaisi apo vajajumecovēnētsicapanepeaxae, naneconitatsi picani Diosojavabelia. Itsiata Cristo cruzata itsa tēpa, nacavecuaajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinē vajaneconi pejamatabēcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeneconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo itsa nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaitsi Abrahampijinējavabelia. Nexata apo judíovi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacacapanepaenexa Diosojavabelia, nexata pacuenia Dioso tajēvelia najumecapanepaeya jumaitsi, bajarapacuenia Dioso nacatsijamatabēcaeyaexana Espíritu Santo.

Pacuenia Abrahampijinējavabelia Dioso najumecapanepaeya jumaitsi, pacuenia ata icatsia cotocaevi Moiséspijinējavabelia najumecapanepaeya jumaitsi, yabara pelivaisi

¹⁵ Tajamonae, livaisi pacatsipaebijitsiatsi paneyapētaenexa mapacuenieje. Pepacuene raja Dioso exanaena pacuenia

bajayata tajëvelia Abrahampijinëjavabelia Dioso najumecapanepaeya jumaitsi. Mapanacuapijinë ata, pecobecovë pexainaenë, petëpaevajënae bayaquina pecobecovë yabara. Nexata pecobecovë pexainaenë itsa tëpa, pevënamuto pexi penatsicobetsanaenexa. Nexata jumenamatamota pecobecovë pexainaenë peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pejainexa. Mataropotsia ata itsanë peyaquinaponanexa, acuenebi. Tspaji pecobecovë pexainaenë peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajëvelia Dioso najumecapanepaeya pejumaitsijava Abrahampijinëjavabelia. Baitsi Abrahampijinë pemomo pejamatabëcueneta, jivi ayaibitsaëto Dioso aneconijibia petaejavanexa, Dioso jumenamatamota. Bajayata tajëvelia Dioso najumecapanepaeya jumaitsi Abrahampijinëjavabelia ayaibitsaëto mapanacuapijivi Abrahampijinë pemomo pejamatabëcueneta Dioso aneconijibia petaenexa. Ayaibitsaëto Abrahampijinë pemomoxi pejamatabëcueneta Dioso jivi aneconijibia petaenexa, bajarapacuenia tajëvelia Dioso najumecapanepaeya apo jumaitsi. Biji rajane caenë, Jesús, pejamatabëcueneta Dioso jivi aneconijibia petaenexa, tajëvelia najumecapanepaeya jumaitsi. “Abrahampijinë pemomo,” itsa jai, tajëvelia jumaitsi Cristo yabara. ¹⁷ Palivaisi pacatsipaebatsi, maitsiije. Bajayatami copiaya Dioso tajëvelia najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinëta najumecopata jivi pejumecovënëtsinexa. Itsiata palivaisi copiaya Dioso tajëvelia najumecapanepaeya jumaitsi Abrahampijinëjavabelia, bajarapalivaisi acuenebi Dioso penajumeamatamobiaexanaenexa. ¹⁸ Nexata palivaisi cotocaevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaitsi Abrahampijinëjavabelia, ajumematamobi tspiae. Itsiata baitsi jane palivaisi cotocaevi Dioso Moiséspijinëta najumecopata, jivi jumecovënëtsi ata tspiae, itsiata Dioso apo capanepae tsipaetsi. Nexata yapëtanetsi pejumenamatamotsijava palivaisi copiaya Dioso tajëvelia najumecapanepaeya jumaitsi Abrahampijinëjavabelia. Tspaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaitsi

Abrahampijinējavabelia, bajarapajivi Dioso aneconijibia tanetsi.

¹⁹ Itsa baja jumenamatamota palivaisi copiaya Dioso tajēvelia najumecapanepaeya jumaitsi Abrahampijinējavabelia, ¿detsa nexata xuajitsia icatsia Dioso Moiséspijinēta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapētaenexa pibisiacuene vajaexanavanapaejava Dioso pitabarata. Bajrapalivaisi Dioso nacatonajumecopata vajajumecovēnētavanapaenexa matapania Abrahampijinē pemomo, Cristo, pepatsimatacabitsicajavabelianexa. Tajēvelia Dioso najumecapanepaeya jumaitsi Cristo pejamatabēcueneta ayabitseaētoxaneto mapanacuapijivije Dioso aneconijibia petaenexa. Palivaisi Dioso Moiséspijinēta najumecopata, pijacuata Dioso apo jumaitsi Moiséspijinējavabelia. Dioso saya itoroba ángelevi Moiséspijinē petsipaebinexatsi. Nexata juya Moiséspijinē tsipaeba jivijavabelia. Moiséspijinē jivi petocuaicuaijainē Diosojavabelia. Dioso juya Moiséspijinē itorobatsi petocuaicuaijainexa jivijavaberena. ²⁰ Pamatacabi Dioso najumecapanepaeya jumaitsi Abrahampijinējavabelia pacuenia Dioso toexanaejitsia Abrahampijinējavabelia, Dioso pijacuata jumaitsi Abrahampijinējavabelia. Dioso apo itorobi ángelevi petotsipaebinexatsi Abrahampijinējavabelia. Dioso pijacuata najumecapanepaeya jumaitsi Abrahampijinējavabelia pacuenia pepacuene toexanaejitsia.

Pajamatabēcuenelivaisi yabara bajayata Dioso Moiséspijinēta najumecopata yabara pelivaisi

²¹ Dioso icatsia cotocaevi Moiséspijinēta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinējavabelia, itsiata apo ajumematamobiaexanae. Tsipaji Dioso Moiséspijinēta penajumecopatsilivaisi pejamatabēcueneta, jivi Dioso apo capanepaejitsiatsi. Jivi itsa caējēpaejitsipatsi pejumecovēnētsicapanepaenexa daxita palivaisi Dioso Moiséspijinēta najumecopata, nexata Dioso jivi capanepaejitsipa pijaneconivecua Dioso Moiséspijinēta penajumecopatsilivaisi pejumecovēnētsicapanepaexae. ²² Itsiata baitsi jane

itsajivi ata apo caējēpaetsi pejumecovēnētsicapanepaenexa Dioso Moiséspijinēta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacuene pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitsi vajayapētaenexa. Nexata yapētanetsi vajanajamatabēcuenecopatsinexa

Jesucristojavabelia, vajanacacapanepaenexa pacuenia Dioso copiaya tajëvelia najumecapanepaeya jumaitsi Abrahampijinëjavabelia.

²³ Cristo abaxë athëbëvetsica pepatsivajënaeyatsica, Dioso Moiséspijinëta penajumecopatsilivaisi nacayapëtaeyaexana pamatacabi Cristo patsica vajanajamatabëcuenecopatsinexa Cristojavabelia. Nacayapëtaeyaexananua pacuenia vajacuata vajaexanaejava pejamatabëcueneta, acuenebi Dioso vajanacacapanepaenexa. Nexata Dioso Moiséspijinëta penajumecopatsilivaisi, nacajamatabëcueneevetapona matapania Cristo athëbëvetsica pepatsimatacabitsicajavabelianexa. Nexata bajarapalivaisi vajanacajamatabëcueneevetsijavata, Cristo baja nacacaxitajaraba. ²⁴ Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinëta penajumecopatsilivaisi, nacajamatabëcueneeveta daxita vajajumecovënëtsivi bajarapalivaisi. Bajarapacuenia nacajamatabëcueneeveta matapania Cristo athëbëvetsica pepatsimatacabitsicajavabelianexa. Nexata jane baja athëbëvetsica Cristo pepatsicujinaetsica, vajanajamatabëcuenecopatsixae bajaraponëjavabelia, Dioso aneconijibia nacamatacane. ²⁵ Aeconoxae baja najamatabëcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinëta penajumecopatsilivaisi, apo nacajamatabëcueneevetsi.

²⁶ Paxamë rabaja Dioso papeximë panenajamatabëcuenecopatsixae Jesucristojavabelia. ²⁷ Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. ²⁸ Daxitatsi vaxaitsi vajanamatabëcuenecopatsivi Jesucristojavabelia, pajudíovinë, apo pajudíovi atamë, aeconoxae baja Dioso najëpaeya nacamatacane. Paxamë ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najëpaeya nacamatacane. Paxanë papebijivinë, paxamë pijinia papetiriavi atamë, bajarapacuenia daxitatsi Dioso najëpaeya nacamatacane. ²⁹ Cristo pijajivixaetsi, nexata Abrahampijinë bepepo pemomoxitsi Dioso nacamatacane. Nexata pacuenia Dioso bajayata tajëvelia najumecapanepaeya jumaitsi Abrahampijinëjavabelia, bajarapacuenia Dioso nacacapanepaena.

4

¹ Mara pacuenia jitsipajë patacajumaitsinexaje. Pejevaxinëyo paxa itsa vecuatëpatsi, paxami riconë ata, abaxë apo rajutsitsi paxami pecobecovë pepitsinexa pijajavanexa. Tsipaji abaxë pejevaxinëyo. Pacuenia itorobabiabatsi pevetsijivitsi, bajarapacuenia exanabiaba. Daxitacuene pexainaenënexa ata, bajaraponëyo jumecovënëtabiaba pevetsijivitsi pitorobicueniatsi. ² Itsa abaxë pejevaxinëyo, pevetsijivitsi evetatsi. Xua ata pijajavanexa, toevetatsi. Matapania baja itsa tocopiapatatsi paxapijinë petocaëjëtsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. ³ Bajara pijinia paitsinë pajudíovinë Jesucristo abaxë athëbëvetsica pepatsivajënaeyatsica. Itsa abaxë apo payapëtaenë pexaniajailivaisi, Jesucristo pelivaisi, pajumecovënëtabiabajë pacuenia paneitoroba Dioso Moiséspijinëta penajumecopatsilivaisi. Nexata pacuenia pejevaxinëyo jumecovënëtabiaba pevetsijivitsi pitorobicueniatsi, bajarapacuenia pajumecovënëtabiabajë Dioso Moiséspijinëta penajumecopatsilivaisi. Jamatabëcuenenavëxaniabiaya pajamatabëjumaitsinë tsabiabi: “Pacuenia Dioso Moiséspijinëta najumecopata vajaexanaexae, nacacapanepaena Dioso,” pajamatabëjanë tsabiabi. ⁴ Itsiata Dioso pecaëjëtsimatacabi itsa copiapata, Dioso pexënato itorobica judíovata penaexanaenexa mapanacuataje. Nexata Dioso pexënato mapanacuataje judiónëcuenia ponapona. Nexata pacuenia itoroba Dioso Moiséspijinëta penajumecopatsilivaisi, bajarapacuenia Dioso pexënato exanaponapona. ⁵ Bajarapacuenia Dioso pexënato naexana mapanacuataje vajanacavecuajibi-aexanaenexa pibisiacuene vajaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinëta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamë Dioso papexicuenemë panenayapëtaenexa, Dioso pacatoitorobica Espiritu Santo papecatsijamatabëjonenexa. Nexata Espiritu Santo pejamatabëcueneta: “¡Taxa!” pacajaiyaexana Diosojavabelia. ⁷ Nexata Dioso papexixaemë, aeconoxae baja apo pajumecovënëtsimë pacuenia pacaitoroba Dioso Moiséspijinëta penajumecopatsilivaisi. Dioso papexixaemë, itsamatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabëxaina Galacia nacuapijivi, Dioso pejumecovënëtavapaevi, yabara pelivaisi

⁸ Pamatacabi abaxë Dioso apo payapëtaemë, panematabacabëta panubenabiabame panevajëcabiabinexa bediosovi

panetaevijavabelia. Bajarapamonae baja cajena apo diosovi. Nexata saya panacueratabiabame. ⁹ Itsiata baitsi jane aeconoxae baja payapëtaneme pepo Dioso. Bajaraponë jane xaniavaetsia pacayapëtane. ¿Detsa xuajitsia nexata pajitsipame panejumecovënëtsinexa Dioso Moiséspijinëta penajumecopatsilivaisi? Pamatacabi abaxë apo payapëtaemë pepo Dioso, panematabacabëta pavajëcabiabame bediosovi panetaevijavabelia. Itsiata baitsi jane bajarapamonae apo cajëpaetsi papecacapanepaenexa. Bajara pijinia itsi Dioso Moiséspijinëta penajumecopatsilivaisi. Pajumecovënëtsi atamë tsipae Dioso Moiséspijinëta penajumecopatsilivaisi, itsiata Dioso aneconijibia apo pacatae tsipae papecacapanepaenexa. ¹⁰ Judíovi nacueraevetabiaba penacueraevetsimatacabitá. Exanabiabanua fiesta Dioso Moiséspijinëta penajumecopatsilivaisi pitorobicueniatsi. Bajara pijinia pacuenia paxamë ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamë ata paexanabiabame. Jamatabëcuenenavëxaniabiaya pajamatabëjumaitsimë tsabiabi: “Bajarapacuenia vaxaitsi ata itsa exanaenatsi, Dioso aneconijibia nacataena,” pajamatabëjamë tsabiabi. ¹¹ Bajarapacuenia paneexanabiabixae, bitso pacasivanajamatabëxainatsi. Tsipaji paxamë yabara jamatabëjumaitsinë mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajë,” jamatabëjanë paxamë yabara.

¹² Tajamonae, pacaitorobatsi paxamë ata panenajamatabëcuenecopatsinexa Jesucristojavabelia pacuenia xanë najamatabëcuenecopatajë. Tanajamatabëcuenecopatsixae baja Jesucristojavabelia, judíonë atanë, copatajë baja tajumecovënëtsijavami Dioso Moiséspijinëta penajumecopatsilivaisi. Nexata pacuenia paxamë, apo pajudíovimë, apo pajumecovënëtsimë picani Dioso Moiséspijinëta penajumecopatsilivaisi, bajarapacuenia xanë ata baja apo jumecovënëtsinë Dioso Moiséspijinëta penajumecopatsilivaisi. Nexata pëtsa baja pajumecovënëtame Dioso Moiséspijinëta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamë apo paneitsacueniabimë. ¹³ Paxamë baja cajena payapëtaneme mapacuenije. Tavitanexae, copiaya patajopajë paxamëjavata. Nexata bajarapacuenia paxamëjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxë apo payapëtaemë. ¹⁴ Dioso baja cajena netocopata tanevaetabinexa bajarapavitane

pataneyaaitajitsibinexamë picani. Itsiata baitsi jane bajarapavitane yabara bijiata apo panetaemë. Apo panenavecuaitorobimë patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. ¹⁵ Bajarapamatacabi bitso pajamatabëcuenebarëyamë patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimë panejamatabëcuenebarëyajavami? Bajarapamatacabi meta itsa pacavajëtsipatsi, paneitaxuto ata panerajutsipame tanaitaxutorutsinexa. ¹⁶ Aeconoxae meta bepanijavajabitsaënënë panetaejitsipame patacatsipaebixae pexaniajailivaisi, Jesucristo pelivaisi.

¹⁷ Pamonaë saicayalivaisi Jesucristo pelivaisivecua petsipaebaponaevi, pata paxamëjavata bajarapalivaisi papecatsipaebinexa. Bajarapamonaë najamatabëxainabiaba pexanaenexa xua yabara pasivabarëyamëjitsia bajarapamonaë. Itsiata baitsi jane bajarapamonaë apo najamatabëxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonaë jitsipa paxanë patanevecuanasaicayabinexamë. Jitsipa panejamatabëcuenejëpaenexa bajarapamonaë. ¹⁸ Xanepana picani itsamonaë ata panesivabarëyanexa itsa pacayavenona, itsa baitsi jane pepacuene xaniavaetsia pacasivanajamatabëxaina papecayavenonaenexa. Bepacayavenona bajarapamonaë daxitamatacabijavabelianexa. Nexata paxanë ètapatsimatacabi paxamëjavata, apo bepacayavenonaë.

¹⁹ Paxamë bepataximë pacatanetsi. Petiriva itsa vixaenotatsi penacueto pevecuanaexanaenexatsi, bitso banajamatabëxaina èpexanaejavabelianexa. Bajara pijinia pacuenia xanë ata bitso pacasivanajamatabëxainatsi. Tsipaji bitso patojitsipatsi, pacuenia Cristo jamatabëcueneitsi, bajara paxamë ata panejamatabëcueneitsinexa. ²⁰ Bitso picani jitsipajë aeconoxae taponaponaëjava paxamëjavata bitso patacasivanajamatabëxainaexae. Nexata itsa ponaponaëjitsipajë paxamëjavata, apo patacatoyaquinaë tsipaetsi. Pacabarëcuaiçuaijaisi tsipae pexaniacuenia. Apo patacataexae, nexata abaxë xaniavaetsia apo yapëtaenë pacuenia exanaejitsianë paxamëjavabelia.

Agarpijivabeje Sarapijivabeje yabara pelivaisi

²¹ Paxamë pajumaitsimë tsabiabi: “Jumecovënëtsianatsi Dioso Moiséspijinëta penajumecopatsilivaisi Diosojavabelia vajanacapanepaenexa,” pajamë tsabiabi. ¡Nexata panamuxunaevere xaniavaetsia paneyapëtaenexa pacuenia

Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijiniñe xaina pexēnatobeje. Abrahampijiniñe pexēnato itsanē xaina Agarpijivata. Agarpijiva, Abrahampijiniñe bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovēnētabiaba pijatuxanejivibeje pitorobicueniatsi. Bajaraxuacujinae icatsia Abrahampijiniñe itsanē xaina Sarapijivata, pepo pijavata jane baja. Bajarapova apo pecomuatsiva. ²³ Panacuetonēyo Abrahampijiniñe xaina Agarpijivata, pecomuatsivata jane baja, xaina pacuenia baxaina pexi pexainaevi. Panacuetonēyo pijinia xaina Sarapijivata, pepo pijavata jane baja, mavecova ata bitso pepua perujuvata, xaina. Bajarapanacuetonēyo xaina petocopiapatsixaetsi pacuenia Dioso tajēvelia najumecapanepaeya jumaitsi Abrahampijiniñe pexēnato pexainaenexa. ²⁴ Bajarapovabeje pelivaisita Dioso nacayapētaeyaexana pacuenia Dioso jivi tane anijacueniabeje. Dioso Moiséspijinēta najumecopata Moiséspijinē pijajivi pebarējumecovēnētsinexa bajarapalivaisi. Bajarapalivaisi Dioso najumecopata Moiséspijinēta Sinaivēnē tsutojumata, Arabia nacuata. ²⁵ Itsamonae abaxē mapamatacabi ataje tsiteca jumecovēnētavanapa Dioso Moiséspijinēta penajumecopatsilivaisi. Bajarapamonae abaxē tsiteca pejumecovēnētavanapaexae Dioso Moiséspijinēta penajumecopatsilivaisi, Abrahampijiniñe pecomuatsivami, Agarpijivami, cuenejēpavanapa. Tsipaji pacuenia Agarpijiva daxitamatacabi jumecovēnētabiaba pijatuxaneva pitorobabiabicueniatsi, bajara pijinia pacuenia bajarapamonae jumecovēnētabiaba Dioso Moiséspijinēta penajumecopatsilivaisi pitorobicueniatsi. ²⁶ Vaxaitsi pijinia Jesucristojavabelia vajanajamatabēcueneocopatsivi, Abrahampijiniñe pepo pijavami, Sarapijivami, cuenejēpavanapatsi. Nexata itsamatacabi Dioso pijatomarata, pejanaJerusalén tomarata, jinavanapaenatsi. Tsipaji pacuenia Abrahampijiniñe pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinēta penajumecopatsilivaisi pitorobicuenia apo jumecovēnētavanapaetsi. ²⁷ Nexata ayaibitsaētotsi tsaponae Jesucristojavabelia vajanajamatabēcueneocopatsivi. Abrahampijiniñe pepo pijavami, Sarapijivami, yabara, Dioso pejumelivaisibaxutota tajēvelia jumaitsi mapacueniaje:

Mavecovamē, nexi apo nexainaeva. Jamatabēcuenebarēyamē tsane. Caeto ata apo nenavixaetaeva ata, itsiata jamatabēcuenebarēyaya vavajamē tsaxuabi tsane, navix-

aetae atamë. Tsipaji nemomoxi ayaibitsaëto xainae-name. Xainae-name ayaibitsaëto nemomoxi, nijajivitova pemomoxi matatoxenetsia, jai tajëvelia Dioso pejumelivaisibaxutota ayaibitsaëtotsi Jesucristojavabelia vajanajamatabëcuene copatsijavanexa yabara.

²⁸ Tajamonae, pacuenia Abrahampijinë pepo pijavata, Sarapijivata, naexana Isaacpijinë pacuenia Dioso tajëvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabëcuene copatsixae, Dioso nacatane Sarapijiva bepepo pemomoxitsi. Nexata pacuenia Dioso tajëvelia najumecapanepaeya jumaitsi vajanacacapanepaenexa, bajarapacuenia Dioso nacacapanepaena. ²⁹ Bajayata Abrahampijinë pexënato, matapijinë, ponë naexana Agarpijivata, bajaraponë jamatabëitonotabiaba pejuyapijinë, ponë naexana Sarapijivata Dioso pejamatabëcueneta Espirítu Santo peyavenon-aexaetsi. Bajara pijinia pacuenia aeconoxae ata, pamonae casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espirítu Santo vajanacatsijamatabëcaevi. ³⁰ Pijuyapijinë, pejamatabëitonotabiabinë yabara, Dioso pejumaitzijava Abrahampijinëjavabelia Dioso pejumelivaisibaxutota jumaitsi mapacueniaje: “Ponë nexënato xainame necomuatsivata, apo rajutsimë tsane nexainaeyajuvënëjvanevënamuto pepitsinexa. Daxita rajutsianame ponë xainame pepo nijavata. Bajaraxuata nijabovecua pitsapaeyaexanaename necomuatsiva, nexënato yajava,” jai Dioso pejumelivaisibaxutota Abrahampijinëjavabelia Dioso pejumaitzijava. ³¹ Tajamonae, Dioso apo nacatae Abrahampijinë pecomuatsiva bepemomoxitsi. Biji rajane Dioso nacatane Abrahampijinë pepo pijava bepemomoxitsi. Bajaraxuata vaxaitsi baja apo jumecovënëtsitsi Dioso Moiséspijinëta penajumecopatsilivaisi.

5

Pacuenia icatsia apo bejumecovënëtsi Dioso Moiséspijinëta penajumecopatsilivaisi, pamonae baja najamatabëcuene copaba Cristojavabelia, yabara pelivaisi

¹ Cristo pejamatabëcueneta nacacopatsiaexana Dioso Moiséspijinëta penajumecopatsilivaisi vajajumecovënëtsijavami. Nexata Dioso Moiséspijinëta penajumecopatsilivaisi panejumecovënëtsijavami panecopatsijava, tsiteca baja pacopatavanapare. Pëtsa icatsia caevëalia pajumecovënëtame Dioso Moiséspijinëta

penajumecopatsilivaisi, bajarapalivaisi bepapijajivimē papecaitorobabiabicuenia paneexanavanapaeyaniva.

2 Xanē Pablonē, panenamuxunaevere palivaisi pacatsipaebijitsiatsi. Jamatabēcuenenavēxaniabiaya pētsa pajamatabējumaitsimē: “Xanē rabaja taneperabēcaucutsinē. Bajaraxuata tajaneconivecua Dioso necapanepaena,” pajamatabējamē pētsa. Bajarapacuenia itsa panajamatabēxainaejitsipame, nexata Cristo papecasivatēpaejava papecacapanepaenexa panijaneconivecua, saya pacasivanacueratsipa. Nexata pajumecovēnēre Cristo papecasivatēpaejava papecacapanepaenexa panijaneconivecua. 3 Icatsia pacamuxujiobatsi asaēyata. Pajivi jamatabēcuenenavēxaniabiaya jamatabējumaitsi: “Xanē naperabēcaucutsiaexanaenajē tajaneconivecua Dioso tanecapanepaenexa,” jamatabējai, bajarapajivi bejumecovēnētsicapanepa daxita pacuenia Dioso Moiséspijinēta penajumecopatsilivaisi itorobatsi. 4 Jamatabēcuenenavēxaniabiaya itsa pajamatabējumaitsimē tsipae: “Xanē jumecovēnētsianajē Dioso Moiséspijinēta penajumecopatsilivaisi. Nexata Dioso aneconijibia netaena tanecapanepaenexa,” itsa pajamatabējamē tsipae, nexata pacopabijitsipame panejumecovēnētsijavami Cristo papecasivatēpaejava panijaneconi yabara. Dioso papecaitaxutotsoniataexae aneconijibia papecataejavami ata, pacopabijitsipame. 5 Vaxaitsi baja cajena yapētanetsi Dioso vajanacapanepaejavanexa. Tsipaji jumecovēnētatsi Jesucristo vajanacasivatēpaejava vaneconi yabara. Bajaraxuata Espíritu Santo pejamatabēcueneta vajanacayavenonaexae, evetavanapatsi Dioso vajanacajumaitsinexa: “Paxamē rabaja paneconijibimē,” vajanacajainexa, pamatacabi Dioso pitabarata nubenaenatsi. 6 Vaxaitsi baja Jesucristo pijajivitsi. Nexata nacaperabēcaucutsi ata, apo nacaperabēcaucutsi ata, itsiata bajarapacue ne amatamobi Dioso pitabarata. Namata-mota rajane asivaya vajayavenonaponaejava itsamonae ata vajanajamatabēcuenecopatsixae Jesucristojavabelia.

7 Pajumecovēnētavanapame baja picani pexaniajailivaisi. Ķipatsa nexata pacacopatsiaexana bajarapalivaisi panejumecovēnētsijavami? 8 Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabēcuenecopatsinexa. 9 Pētsa panacofēnētame mapalivaisije. Pan pexanaematabēnexa ayaimatabē ata, levadurajava pijinia tsiquirijavayo ata, itsiata pematajērēabijavata, bacaējēpa daxitamatabējava. Nexata bafufunaeyaexana daxitamatabē. Bajara pijinia itsi penajumetsēnētsilivaisi jivi petsipaebapon-

aevi. Penajumetsënëtsilivaisi jivi petsipaebaponaevi, caenëbeje ata, itsiata ayaibitsaëto Jesucristojavabelia penajamatabëcuenecopatsivi, jamatabëcuenebijanapona. ¹⁰ Yapëtaniji baja cajena mapacueneye. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtavanapaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënëtsilivaisita.

¹¹ Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenamatabëcuenecopatsivi, bepanaperabëcaucubiaexaname Diosojavabelia papecacapanepaenexa,” itsa janë tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajë peperabëcaucubinexatsi, nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae. ¹² Pamonaë pacajamatabëitonotabiaba panenaperabëcaucutsiaexanaenexa, bajarapamonae tojitsipajë mapacueniaje. Tojitsipajë bajarapamonae papecavecuapitsapaenexa, papecacopatsinexa baja papecajamatabëitonotabiabijava.

¹³ Tajamonae, Dioso pacajunata panecopabinexa Dioso Moiséspijinëta penajumecopatsilivaisi panajumecovënëtsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënëtsijavami, tacopatsixae baja, nexata exanaenajë daxita pibisiacuene pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panajumecovënëtsijavami, panecopabixae baja, Jesucristojavabelia penajamatabëcuenecopatsivi bepapijajivimë panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae. ¹⁴ “Asivamëre itsamonae ata pacuenia nijacuata nasivamë,” pejailivaisi itsa pajumecovënëtsianame, nexata daxita palivaisi Dioso Moiséspijinëta najumecopata, pajumecovënëtsicapaneapaename. ¹⁵ Itsa panaitoyamë, itsa panabaracuaicuaijamënuua pibisiacuena, nexata xaniavaetsia panaitavere. Tsipaji itsa panaitoyamë tsipae, itsa panabaracuaicuaijamënuua tsipae pibisiacuena, nexata Jesucristojavabelia panenamatabëcuenecopatsijava, namataenetsia panajamatabëcuene faefaenaeyaexanaejitsi-

pame. Pacopatsipamenua baja Dioso pejumelivaisi yabara panenacaetuatabijava ata.

Pacuenia Espiritu Santo nacajamatabëcueneyavenona yabara pelivaisi

¹⁶ Mapacuenia pacajumaitsitsije. Pacuenia Espiritu Santo pacaitorobabiaba, paexanabiabare daxitamatacabi canacujitsia. Pëtsa pibisiacuene paexanabiabame panijacuata panenajamatabëxainaejava. ¹⁷ Xua vajacuata vajajamatabëëthëtota najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espiritu Santo apo jitsipae. Xua pijinia Espiritu Santo nacaitorobabiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espiritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene. ¹⁸ Itsa baja paexanavanapaename pacuenia Espiritu Santo pacaitorobabiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tsipaji baja pacuenia Espiritu Santo pacaitoroba, paexanavanapaename.

¹⁹ Xua jivi pijacuata najamatabëxaina, itsa exana, yapëxanepana vajayapëtaenexa. Tsipaji xua jivi pijacuata najamatabëxaina itsa exana, pebi itsava jaita pijavavecua. Petiriva pijinia jaita itsanë pamonavecua. Pamonaë pevitota pibisiacuene exana pacuenia pijacuata najamatabëxaina, bajarapamonae jitsipanua daxita xua pibisiacuene pexanaenexa. ²⁰ Pamonaë pibisiacuene exana pacuenia pijacuata najamatabëxaina, pematatabacabëta nubenabiaba pevajëtabiabinexa jumapecataeya pexanaenëanëjavabelia. Junatabiabanua penajorobivi. Bajarapamonaeya-juvënëvi naexananua penajorobivi. Itoyanua tsabiabi itsamonae. Jumeanaenotabiabanua itsamonae. Cuenecaëbabiabanua itsamonae. Anaepanabiabanua apo vajayabaraanaepanaejavayo ata. Natoexanabiabanua daxitacuene ëpamonaenexa. Vecuanasaicayababiabanua itsamonae Dioso pejumecovënëtsivi. Caebitsaëto caejavata apo najuanacaetuanabiabi. ²¹ Pamonaë pibisiacuene exana pacuenia pijacuata najamatabëxaina, jamatabëyacajërëtabiabanua itsamonae pexainaejava. Jamatabëbeyaxuababiabanua jivi. Aitajibinua tsabiabi pijabonëjava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujibatsi, bajara icatsia pacuenia pacamuxujibatsi. Pamonaë

bajrapacuenia pibisiacuene exana, bajarapamonae apo jinavanapae tsane Dioso pijanacuatatsia.

²² Pacuenia peubinae, pexaniana, pexaniacuai capitsapa, bajara pijinia pacuenia Espíritu Santo vajajamatabëéthëtovetsina capitsapa mapacuenije. Capitsapa itsamonae ata vajaanajamatabëcuene. Capitsapa vajabarëyajamatabëcuene. Capitsapa Dioso javabelia, itsamonae javabelia ata, barajamatabëcuenexanepanaeya vajataenexa. Capitsapa, itsamonae nacaitacueniabi ata, vajavajënaeyabelia vajaanajamatabësaëjamatabëcuene. Capitsapa itsamonae vajaitaxutotsoniatae jamatabëcuene. Capitsapa itsamonae pexaniacuene vajatoexanaejamatabëcuene. Capitsapa Dioso vajajumecovënetsijava vajaanajamatabësaëjamatabëcuene. ²³ Espíritu Santo vajajamatabëéthëtovetsina capitsapa vajaaitejepaebijamatabëcuene. Capitsapa vajanajamatabëcataitsi jamatabëcuene pibisiacuene vajaanaxanaeyaniva. Daxita bajarapajamatabëcuene, Espíritu Santo vajajamatabëéthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacueni. ²⁴ Pamonae Jesucristo pijajivi, bajarapamonae jamatabëjumaitsi: “Jesucristo cruzajavabelia itsa cobematabiabarutatsi, tajaperujujamatabëcuenemi yajavatëpa,” jamatabëjai. Nexata vecuaajibiaexanatsi pajamatabëcuene itorobabiabatsi pibisiacuene pexanaenexa. ²⁵ Vaxaitsi Espíritu Santo nacayajavaponapona. Nexata betonacopatabiabatsi vajanacaitorobinexa pacuenia Espíritu Santo nacatojitsipa vajaanabiabinexa.

²⁶ Ayajamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaëbiyaniva ata.

6

Pacuenia Dioso pejumecovënëtsivi itorobatsi namataenetsia penajamatabëcueneyavenonaenexa yabara pelivaisi

¹ Tajamonae, itsa pacaxitajarabame Dioso pejumecovënëtsijavavecua pejopaejivi, paxamë pacuenia Espíritu Santo pacaitoroba panejinavanapaevi, payavenonare bajarapajivi. Payavenonare bajarapajivi piamatabëcuenesaënexa icatsia Dioso pejumecovënëtsijava. Itsiata bailsi jane pexaniajamatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopaejitsipame dovathi itsa pacajamatabëcuenejëta pibisiacuene paneexanaenexa.

2 Namataenetsia panayavenonabiabare dovathi itsa pacajamatabëcueneëjêta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

3 Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanë cajena ayaijamatabëcuenenënë bajarapajivi matatoxenetsia. Nexata Dioso tajumecovënëtsijavavecua apo jopaenë tsane,” jai, bajarapajivi najamatabëcuenecepaeba. Tsipaji bajarapajivi ata dovathi itsa jamatabëcueneëjêtatsi pibisiacuene pexanaenexa, apo ajamatabëcuenesaë tsipae Dioso pejumecovënëtsijava. 4 Caejivi canacujitsia benacuenecanaëjêta peyapëtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabëcuenebarëya Dioso pitabarata. Itsiata baitsi jane bajarapajivi pexaniacuene exanaponaponaë ata, apo bejamatabëjumaitsi mapacueniaje: “Xanë itsamonaevēcua pexaniacuene Dioso toexanaponaponajë,” apo bejamatabëjai. 5 Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

6 Pamonaë tsipaebatsi Dioso pejumelivaisi, bajaramonaë pexainaeyajuvënëjava juya berajuta Dioso pejumelivaisi petsipaebinëtsijavabelia.

7 Pëtsa pajamatabëcuenenavëxaniabame saicayacuenia paneexanaeyaniva Dioso papecaitorobicuenevecua. Tsipaji itsajivi ata apo caëjêpaetsi peyamaxëitojorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. 8 Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espiritu Santo pesivabarëyanexatsi, nexata bajarapajivi tēpae ata, xainaena matacabi apo peverevereaejava. 9 Vaxaitsi itsa apo yabaracueranaetsi tsane pexaniacuene vajaexananapaejava, nexata Dioso pecaëjêtsimatacabita nacarajutsiana pexaniacuene. Bajaraxuata pexaniacuene vajaexananapaejava, apo beyabaracueranaetsi. 10 Nexata itsajota nacacuenecaëjêpa, pexaniacuene betoexanabiabatsi itsamonaëjavabelia. Pamonaë Jesucristo vajanajuajumecovënëtsivi, bajarapamonaë bitsoyo beyavenonaponatsi.

Pacuenia Pablo pemuxujobilivaisi Galacia tomarapijivi

*toyaquina peveretsinexa baja petoyaquinaelivaisi mapabaxu-
totaje yabara pelivaisi*

11 Pataema mapaayaiitanetonėje. Xanē raja Pablonē tajacuata pacatoyaquinatsi mapalivaisije. 12 Itsamonae judíovi ajumesaēya pacajumai tsabiabi: “Paxamē apo pajudíovi atamē, Jesucristo pelivaisi itsa pajumecovēnētame, bepanaperabēcaucubiaexaname papecacapanepaenexa Diosojavabelia,” pacajai tsabiabi. Pajudíovi bajarapacuenia pacajumai tsabiabi, jamatabēcuenenavēxaniabiaya jamatabējumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabēcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabēcuenebarēya tsane. Nexata vajamonae judíovi apo nacaitsacueniabi tsane, apo judíovi tsipaebi atatsi Cristo vajanacasivatēpaejava cruzata,” jamatabējai tsabiabi bajarapajudíovi jamatabēcuenenavēxaniabiaya. 13 Pajudíovi bajarapacuenia pacajumai tsabiabi, pijacuata naperabēcaucubiaexanae ata, itsiata apo exanavanapae daxita pacuenia itorobatsi Dioso Moiséspijinēta penajumecopatsilivaisi. Bajarapamonae jitsipa panenaperabēcaucubiaexanaenexa, saya papecavajunupaebinexa pevēna judíovijavabelia: “Paxanē patajamatabēcueneta Galacia nacuapijivi naperabēcaucubiaexana,” pejainexa paxamē yabara. Tsipaji bajarapajudíovi jitsipa pesivajamatabēcuenebarēyajavatsi pevēna judíovi. 14 Xanē cajena bajarapacuenia apo exanaenē. Apo najamatabēxainaenē, xua exanajē, tanavajunupaebinexa jivi saya tanesivabarēyanexa. Itsiata jitsipajē caelivaisiyo jamatabēcuenebarēyaya jivi tatsipaebinexa. Jitsipajē jivi tatsipaebinexa Jesucristo vajanacasivatēpaejava cruzata. Jesucristo cruzata tanesivatēpaexae, nevejamatabēcaeva baja tajitsipaejavami mapanacuapijicueneje. Mapanacuapijivi pijinia tanejitsipaejamatabēcuenemi ata ajibi baja. 15 Espíritu Santo vajanacaitorobicuenia itsa exanavanapatsi, nacaperabēcaucutsi ata, apo nacaperabēcaucutsi ata, najēpabeje. Tsipaji cajena amatamobi bajarapacuenie Dioso pítabarata. Vajanajamatabēcuene pēnēyorotsijava rajane pejanajamatabēcuenejavabelia, namatamota vajanacacapanepaenexa Diosojavabelia. 16 Nexata pamonae exanavanapa pacuenia pejanajamatabēcuene itorobatsi, bajarapamonae jamatabēcuenexanepanaeya jinavanapaena Dioso pítabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

17 Tavajēnaeyabelia baja apo jitsipaenē tanejamatabēitonotaponaenexa pamonae nejumeaeba Jesucristo

taneitorobiněcuene. Jesucristo pelivaisi yabara tanejumaconibabeyabiabijavata, nejumatitibabeyabiaba. Bajarpavajēncovēanē tanetsijumarubenaexae, daxitajivi neyapētane Jesucristo pijajivitonēcuenenē.

¹⁸Tajamonae, pacatovajētabiabatsi Diosojavabelia vajatuxanenē Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejume-covënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneconijibia Dioso pitabarata. ⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bajarapacuenia Dioso nacavecuajibiaexana pibisiacuene vajaexanaeconimi. ⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi.

Nacayapëtaeyaexananua pacuene nacatoxanepana Dioso pejitsipaecuena vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuena itoroba. ¹⁰ Pacuena Dioso tajëvelia najamatabëcuenevereta, bajarapacuenia daxita Cristo pijajivitsi nacacaetuatsiana Dioso pecaëjësimatacabi ita copiapatsiana. Dioso pecaëjësimatacabi ita copiapatsiana daxitacuene mapanacuapijicueneje, athëbëpijicuene ata, Dioso baja tocopatsiana pexënato juya pevetsinexa.

¹¹ Jesucristo pijajivinxatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuena tsitaxanepanatsi. ¹² Bajarapacuenia Dioso tajëvelia nacaitapeta vajanajamatabëcuene copatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia. ¹³ Pexaniajailivaisi papecacapanepaelivaisinexa, paxamë ata ita pajumetaneme, nexata baja panajamatabëcuene copatame Jesucristojavabelia papijajivinxamë. Nexata pacuena Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuene më. ¹⁴ Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa matacabi apo peverevere caejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuene copatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonae Dioso pejumecovënëtsivi. ¹⁶ Bajaraxuata ita vajëtajë Diosojavabelia, pacato-vajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia

pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta.

¹⁸ Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayajamatabëcuenejava, matababi apo pevereverecaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matababi apo pevereverecaejava.

¹⁹⁻²⁰ Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuenecopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona.

²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatababitaje. Pejanamatababijavabelianexa ata evetsiana.

²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonaenajamatabëcuenecopata bajaraponëjavabelia.

²³ Daxita baja pamonaenajamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacujavaje.

2

Pacuenia Dioso pijajivi, piasivaxae, capanepaejitsia yabara pelivaisi

¹ Dioso baja cajena pacajamatabëcueneitavayaexana Jesucristo pejamatabëcueneta. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene paneexanavanapaeneconi yabara. Nexata pacuenia itsi petëpaevi, bajara picani

pajamatabëcueneitsimë Diosojavabelia ita abaxë Dioso apo pajumecovënëtsimë. ² Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëtavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatabëcueneasaëyaexanapona pamonaë Dioso apo pejumecovënëtsivi pibisiacuene pexanaenexa. ³ Daxita picani bajayata vaxaitsi pibisiacuene exanavanapatsi. Pacuenia vajajamatabëëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonae naneconita Diosojavabelia, bajara picani pacuenia vaxaitsi ata naneconitatsi Diosojavabelia vajanacananeconitsiaexanaenexa. ⁴ Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa. ⁵ Diosovecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso ita asaëyaexanatsi petëpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua. ⁶ Jesucristo petëpaecujinae, Dioso icatsia asaëyaexanatsi petëpaejavavecua. Nexata vaxaitsi Jesucristojavabelia vajanajamatabëcueneocopatsixae, Dioso nacatane bevajanacayajavaasaëyaexanaevi. Dioso nacatanenua Jesús athëbëtatsia bevajanacayajavaecaevi daxitacuene vajanacabarëevetsinexa. ⁷ Bajarapacuenia Dioso nacatoexana vajanacatsitanajamatabëcuene itajëtsinexa daxitamatacabijavabelianexa vajanacajitsipaecue. Nacatsitanajamatabëcueneitajëtanua vajanacaitaxutotsoniataecuene Jesucristo vajanacasivatëpaexae. ⁸ Dioso cajena bitso pacajitsipa. Bajaraxuata Jesucristojavabelia ita panajamatabëcueneocopatame, Dioso pacacapanepaena panijaneconivecua. Bajarapacuenia Dioso papecapanepaejavanexa, panijacuata apo panatoexanaemë. Biji rajane Dioso pejamatabëcueneta pacacapanepaena. ⁹ Itsajivi ata Dioso petonacuenebaponaponaejamatabëcuene, Dioso apo capanepaetsi tsane. Biji rajane Jesucristojavabelia penajamatabëcueneocopatsixae, Dioso capanepaenatsi. Bajaraxuata itsajivi ata beayaijamatabëcuenejivi apo benatae Dioso pecapanepaejavanexatsi yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai. ¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatooxanavanapaenexa pexaniacuene. Bajarapacuenia

Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcuenetsimë tsavanapae itsa abaxë Dioso apo pajumecovënëtsimë. Paxamë apo pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara. ¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacuene naxuabianajë,” pajamatabëjamë tsabiabi. ¹³ Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatēpaexae, aeconoxae baja payajavajinavanapame Dioso. ¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatēpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa tēpa, copiarucaeyaexana palivaisimi bajayata Dioso Moiséspijinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. ¹⁶ Jesucristo cruzata vajanacasivatēpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo

baja caebitsaëtotsi nacaexana pijajivinexatsi. Nexata baja Dioso jamatabëcuenexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa.

¹⁸ Nexata Jesucristo daxitatsi vajanacasivatëpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espíritu Santo vajanacayavenonaexae.

¹⁹ Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavanapaenexa.

²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtamë baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecacapanepaenexa. Bajaraxuata Dioso baja papeximë pacaexana.

²¹ Nexata baja itsamonae ata ayaibitsaëtoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espíritu Santo papecatsijamatabëcaexae.

3

Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judíovijava yabara pelivaisi

¹ Paxamë apo pajudíovi atamë, Dioso papijajivixaemë, pacatovajëtabiabtatsi Diosojavabelia. Xanë Pablonë, Jesucristo

pijajivitonënë. Nexata Jesucristo pelivaisi jivi tsipaebabi-abajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecacapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinarutetatsi caelivaisiyobeje saya. ⁴ Itsa palebianame, payapëtaename pacuenia Dioso neyapëtaeyaexana ëpajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenie Dioso paneyapëtaeyaexana Espíritu Santo pejamatabëcueneta. ⁶ Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaënë Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaëjëpaeyaexananua xaniavaetsia jivi tatsipaebaponaenexa bajarapalivaisi. ⁸ Xanë itsiata beveliajamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjava

patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenua Jesucristo vajanacayavenonaponaejavanexa. ⁹ Dioso nitoroba patacatsipaebaponaenexa, apo pajudíovi atamë, Dioso papecacapanepaejavanexa. Dioso daxitacuene pexanaenë mapanacuataje. Dioso cajena tajëvelia najamatabëxaina paxamë ata, apo pajudíovi atamë, papecacapanepaenexa. Itsiata itsajivijavabelia ata Dioso apo yapëtaeyaexanae, apo pajudíovi atamë, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamë, petsitanajamatabëcuene itajëtsinexa athëbëtsatsia pevetsivijavabelia. Nexata athëbëtsatsia pevetsivi itsa nacataena daxitatsi Dioso vajajumecovënëtsivi, pajudíovinë, apo pajudíovi atamë, benacaemonaetsi vajanajuajinavanapaejava, athëbëtsatsia pevetsivi yapëtaena bitso Dioso peyapëtaenëcuene daxitacuene pexanaenexa. ¹¹ Pacuenia Dioso tajëvelia copiaya najamatabëxaina, mapanacua pexanaevajënaeya ataje, bajarapacuenia baja Dioso exanaevereta. Tshipaji baja Dioso itorobica vajatuxanenë Jesucristo vajanacasivatëpaenexa cruzata. ¹² Vaxaitsi baja najamatabëcuene copatatsi Jesucristojavabelia vajanacacapanepaenexa. Bajaraxuata Dioso javabelia vajëtabiabatsi ajumejunavijibia. ¹³ Bajaraxuata Dioso javabelia asaëyata pacatovajëtabiabatsi patanesivajamatabëcuene cueranaeyanivamë abaxë naneconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinë tsabiabi: “Pamonae apo judíovi ata itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi nenaneconitsiaexaneta. Bajaraxuata panesivajamatabëcuene barëyamëre naneconitsia taponaponaejava penaneconitsivi pejebabiabibota.

Pacuenia Pablo Dioso javabelia tovajëta Dioso pejumecovënëtsivi yabara pelivaisi

¹⁴ Itsa najamatabënapitabiabajë, apo pajudíovi atamë, Dioso papecacapanepaejavanexa, nexata tamatabacabëta nucabiabajë asaëyata patacatovajëtsinexa vajatuxanenë Jesucristo paxa Dioso javabelia. ¹⁵ Daxita Dioso pijajivi, pamonae athëbëtsatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenë paxa exana Dioso. ¹⁶ Dioso baja cajena bitso piasaënë. Ayaijamatabëcuene pexainaenë. Bajaraxuata pacatovajëtabiabatsi Dioso javabelia Dioso pesaëta papecajamatabëcuene asaëyaexanaenexa

Espíritu Santo pejamatabëcueneta. ¹⁷ Pacatovajëtabiabsinua Jesucristo papecatsijamatabëcaenexa panesivanajamatabëcopatsixae bajaraponëjavabelia. Pacatovajëtabiabsinua bitso paneasivanexa itsamonae ata, pamonae Dioso pejumecovënëtsivi. ¹⁸ Pacatovajëtabiabsinua daxita Dioso panejumecovënëtsivi panejamatabëcueneyapëtaenexa Jesucristo bitso papecaasivajava. ¹⁹ Pacatovajëtabiabsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

²⁰ “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecajëpaenëtsi vajanacayavenonaenexa. Dioso cajëpatsi vajanacatoexanaenexa vajavajëtsicuenia. Vajanajamatabëxainaejava ata matatoxenetsia, Dioso cajëpatsi vajanacatoexanaenexa. Dioso pesaëta nacayavenonabiaba. ²¹ Dioso pejumecovënëtsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmë!” bejai tsabiabi Diosojavabelia daxitamatacabijavabelianexa. Bajara itsi tsane.

4

Pacuenia Espiritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

¹ Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujiobatsi panejinavanapaenexa pacuenia Dioso pacatojitsipa Dioso papecajunatsivi papijajivinexamë. ² Itsamonaevécua beveliajamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmërenua tsavanapae bajayajebi, itsamonae pacaitsacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabëcuenesaëmëre tsavanapae najamatabëcuenejëpaeya panejinavanapaenexa.

Bajaraxua yabara Diosojavabelia panatovajëtabiabare papecayavenonaenexa Espíritu Santo. Nexata nabarajamatabëcuenexanepanaeya pajinavanapaename.

⁴ Jesucristojavabelia vajanajamatabëcuenecopatsixae, vaxaitsi baja nexata caenë Jesucristo pijajivitsi. Xainatsi baja caeEspíritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacacapanepaenexa.

⁵ Caenë rabaja vajatuxanenë Jesucristo. Daxitatsi najamatabëcuenecopatatsi caenëjavabelia. Nacabautisabanua caenë Jesucristo pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatacaitorobinë. Dioso pijajivitsi, daxitatsi, nacayavenona. Nacayajavaponaponanua.

⁷ Caejivitsi canacujitsia, Cristo pejitsipaecuenia nacajamatabëcuene caëjëpaeyaexanapona pecovëta vajatonacuenebavanapaenexa vajanacaitorobicuenia. ⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëtoxaneto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuenecaëjëpaeyaexanae pecaëjëpaejamatabëcuenetsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavecu. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuyabetsia. Bajaraxuacujinae Jesucristo itorobica Espíritu Santo. Nexata daxitanacuanëjava Espíritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espíritu Santo jamatabëcuene caëjëpaeyaexanapontsi saicayacuenia. Itsamonae Espíritu Santo jamatabëcuenecaëjëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espíritu Santo jamatabëcuenecaëjëpaeyaexanatsi peyapëtaenexa pajamatabëcuenelivaisi xaina Dioso pejumelivaisi. Nexata tsipaeba itsamonaejavabelia. Itsamonae pijinia Espíritu Santo jamatabëcuenecaëjëpaeyaexanatsi petsipaebaponaenexa apo peyapëtaevi abaxë pexanialivaisi,

Jesucristo pelivaisi. Itsamonae pijinia Espíritu Santo jamatabëcuene caējēpaeyaexanatsi pevetsinexa Dioso pejumecovēnētsivi. Jamatabëcuene caējēpaeyaexanatsinua xaniavaetsia peyapētaeyaexanaenexa Dioso pijacuene. ¹² Bajarapacuenia Espíritu Santo, daxita Dioso pejumecovēnētsivi, jamatabëcuene caējēpaeyaexanatsi petonacuenebavanapaenexa Dioso pijacuene. Nexata daxita Dioso pejumecovēnētsivi, caejivi canacujitsia, ajamatabëcuenesaē tsaponae pevajēnaeyabelia. ¹³ Nexata belia daxitatsi bajarapacuenia najamatabëcuenejēpaeya jumecovēnētsianatsi Dioso. Jamatabëcuenyapētaenatsinua xaniavaetsia vajatuxanenē Jesucristo, Dioso pexēnato. Nexata daxitatsi Espíritu Santo nacajamatabëcuene caējēpaeyaexanaena Dioso vajajumecovēnētsinexa. Nacajamatabëcuene caējēpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcueneitsi, bajara vaxaitsi ata jamatabëcueneitsitsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcueneitsitsi tsane. Itsajamatabëcuene apo vecuanajamatabëxainaetsi tsane, palivaisi baja jumecovēnētavanapatsi. Nexata itsamonae penajumetsēnētsilivaisi bepexaniajailivaisicuenia nacatsipaebi ata tsane vajanacayamaxēitojorobinexa picani, itsiata apo nacayamaxēitojorobi tsane. ¹⁵ Nexata itsamonaejavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinē jamatabëcueneitsi, bajara vaxaitsi ata vajajamatabëcueneitsinexa, benatojitsipatsi Cristo vajajamatabëcuenejēpaenexa. ¹⁶ Daxitatsi Cristo pelivaisi vajajumecovēnētsivi, caenē Cristo pijajivitsi. Vajaperabētota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuenevitsabaponaenatsi Dioso vajajumecovēnētsijava.

Pacuenia Cristo pijajivi pejanajamatabëcuene xaina yabara pelivaisi

¹⁷ Jesucristo taneitorobixae, mapacuenia pacajumaitsijitsiatsije. Pētsa baja pajinavanapame pacuenia jinavanapa Dioso apo peyapētaevi. Dioso apo pejumecovēnētsivi najamatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovēnētsivi

ajamatabëcueneitaquiri tsavanapae. Tsipaji apo yapëtae Dioso. Bitso saya ajamatabëcuenetaja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. ¹⁹ Nexata apo yapëtae piauracuene. Casaë bitso pexanaenexa daxita xua pibisiacuene. ²⁰ Itsiata baitsi jane paxamë ita pajumecovënëtame Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata pacopabare panijaperujujamatatabëcuene. Bajarapajamatabëcuene bajayata abaxë Dioso ita apo pajumecovënëtsimë, pacaitorobabiaba pibisiacuene paneexanaenexa. Panijaperujujamatatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuenepëñëyorore. Papejanajamatabëcuenevimë panaexanare. ²⁴ Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaename pacuenia Dioso pacatojitsipa.

²⁵ Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tsipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuenetsitecame itsamatacabijavabelia ata. ²⁷ Tsipaji ita panasivajamatabëcuene tsitecaejitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuaijamë pibisialivaisi. Biji rajane pacuaicuaijamëre pexanialivaisi. Pexanialivaisi ita pacuaicuaijamë tsane, nexata papecajumetaevi pajamatabëcuene yavenonaename. Tsipaji paepatota jamatabëcuenefaefaena, ita pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espiritu Santo papecatojitsipaecuenevecua panejamatabëcuenebejiobitsiyanima Espiritu Santo. Dioso pijaEspiritu Santo papecatsijamatabëccaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

31 Daxita pibisiajamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuenebejjava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuaicuajaitsabiabijava ata. 32 Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuenia paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

1 Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. 2 Pacuenia bitso Cristo nacaasiva, bajara pijinia pacuenia paxamë ata bitso pasivamërë tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuenia ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vajaneconi vajanacavecuajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

3 Paxamë rabaja Dioso papijajivimë. Bajaraxuata pëtsa baja paexaname daxita xua pibisiacuenia. Pëtsa panajamatabëxainamenua pibisiacuenia paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicueneje. 4 Pëtsa panabarëcuaicuajiamënua piauracuene yabara ata. Pëtsa panabarëcuaicuajiamënua saya jema natsiquejemalivaisixi ata. Tsipaji apo pexanepanaecuene. Biji rajane Diosojavabelia pexaniajamatabëcuene parajutabiabianame.

5 Payapëtaneme rabaja pexaniajaicuene mapalivaisije. Pajivi daxita pibisiacuenia exana, apo jone tsane Dioso pijanacuayabetsia. Ponë jaita itsava pijavavecua, pova pijinia jaita itsanë pamonavecua, apo jone tsane Dioso

pijanacuayabetsia. Pamonaē ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonaē bitso jitsipa pexainaenexa daxitacuene mapanacuapijicueneje, jamatabēcuenejēpa pamonaē vajēcabiaba jumapecataeya pexanaenējavabelia. Bajarapamonaē jamatabēcuenejēpa tsipaji bitso jitsipa saicayacuene Diosovecua. ⁶ Pētsa pacayamaxēitojoroba itsajivi ata paxamē ata paneexanaenexa bajarapitsipibisiacuene. Tsipaji Dioso ayaicuena naneconitsiaexanaena pamonaē Dioso apo pejumecovēnētsivi, bajarapitsipibisiacuene pexanaēvi. ⁷ Bjaraxuata pētsa payajavajinavanapame pibisiacuene pexanaēvi.

⁸ Paxamē picani bajayata pajamatabēcueneaitaquirimē tsavanapae itsa abaxē apo payapētaemē pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabēcopatsixae, Dioso baja pacajamatabēcueneitayota. Bjaraxuata pajinavanapare Dioso pejitsipaecuenia, pacuenia Dioso pijajivi jinavanapa. ⁹ Dioso baja papecajamatabēcueneitayotsixae pexanialivaisita, paexanavanapare ēpexaniacuene. Pacanaējētaaponarenuā ēpexaniajaicuene paneyapētaenexa, xaniavaetsia panejinavanapaenexa Dioso pejitsipaecuenia. ¹⁰ Panevajēnaeyabelia pacanaējētaaponare paneyapētaenexa xua yabara Dioso pacasivajamatabēcuene barēyajitsia. Nexata itsa payapētaename xua yabara Dioso pacasivajamatabēcuene barēyajitsia, bjaraxua tsiteca asaēyata panevajēnaeyabelia paexanavanapaename. ¹¹ Dioso apo pejumecovēnētsivi pibisiacuene itsa exanavanapa, pētsa panaexaname bajarapapibisiacuene. Biji rajane paitavetsianame bajarapamonaē pibisiacuene pexanaeyaniva Dioso pitabarata. ¹² Xua bajarapamonaē exana muetsia, bjaraxua bitso pibisiacuene. Nexata itsajivi itsa cuenetaejitsipatsi bjaraxua pexanaejava, bajarapajivi bitso ajumeura tsipae juya petsipaebinexa itsamonaejavabelia. Tsipaji bitso pibisiacuene xua muetsia exana bajarapamonaē. ¹³ Itsiata baitsi jane bajarapamonaē itsa paitavetsianame Dioso pejumelivaisita, nacueneyapētaena bajarapamonaē bitso pibisiacuene pexanaejava. ¹⁴ Bjaraxuata pina bajarapamonaē yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamē. Bjaraxuata Diosovecua naxuabiaya pajinavanapame. Pacopabare baja pitaquirijamatabēcuene. Nexata Cristo pejamatabēcueneta panijaneconivecua Dioso pacacapanepaena. Pacaja-

matabëcueneitayotsiana,
jai pina itsamonae Dioso pijajivi.

¹⁵ Nexata baja xania tsane. Panayajivitaema pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. ¹⁶ Dioso papecaitorobicuenia xaniavaetsia patojinavanapare daxitamatacabijavabelianexa. Pamuxujiobabiabare itsamonae ata Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, ëpibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa. ¹⁸ Pëtsa paitajibimë tsabiabi. Tsipaji bajarapacuenie Diosovecua pacanaxuabiaexanaejitsipa infiernojavabelia. Biji rajane panacopatabiabare Espíritu Santo papecat-sijamatabëvënëcaenexa, Espíritu Santo papecaitoro-bicuenia paneexanabiabinexa. ¹⁹ Namataenetsia panatsipaebabiabare vajatuxanenë ayaijamatabëcuene pexainaecuene. Bajarapacuenia namataenetsia itsa panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espíritu Santo jemata pacanaxëanaeyaexanaena. ²⁰ Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

Pacuenia muxujiobatsi penapitsijivibeje yabara pelivaisi

²¹ Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitoroba-biabinexa Cristo panejumecovënëtsivixae.

²² Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacacapanepaenexa daxita vaxaitsi

vajanajamatabëcuene copatsivi Cristo javabelia. Daxitatsi caenë Cristo pijajivitsi. ²⁴ Nexata bejumecovënëtavanapatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavanapame daxita pacuenia pacaitoroba paneamonajivi.

²⁵ Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacacapanepaenexa vajaneconivecua. ²⁶ Bajarapacuenia Cristo exana caenë Cristo pijajivitsi vajanacaexanaenexa. Nexata baja Cristo vajanacajamatabëcuene xuirajibiaexanaejava, najamatabëcuene itajëtatsi vajanacabautisabijavata. Vajajumecovënëtavanapaexae Dioso pejumelivaisi, nacaajamatabëcuene xuirajibiaexanapona. ²⁷ Bajarapacuenia

Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaaneconijibivi, Dioso vajanacajamatabëcuenexaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajaraponë asiva pijava pacuenia pijacuata naperabëasiva.

²⁹ Itsajivi ata apo naperabëitoya. Biji rajane xaniavaetsia naperabëeveta. Bajara pijinia pacuenia Cristo ata nacaeveta daxita Dioso vajajumecovënëtsivi. ³⁰ Tsipaji vaxaitsi Cristo pijajivitsi, ayailbitsaëto atatsi, becaejivitsi Dioso nacatane.

³¹ Nexata nayapëtane pexaniajaicuene mapacuenije. Pebi petiriva itsa pita pijavanexa, naexanabeje becaejivi peperabëtocuenia. Tsipaji Dioso pejumelivaisibaxutota jumaitsi mapacueniaje: “Pebi itsa nacojioba, paxavecua, pena atavecua, havecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. ³² Mapalivaisije bitso ayapëbeje vajajumeyapëtaenexa. Itsiata baitsi jane comparacióncuenia nacayapëtaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenë Cristo peperabëtotsi.

³³ Bajarapalivaisi comparacióncuenia pacayapëtaeyaexana nexata paxamë, pacaenëmë canacujitsia, paneasivanexa panijavajivi. Nexata panijavajivi pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6

1 Paxamë papeximë, Dioso panejumecovënëtsivixae,

pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tsipaji bajarapacuenia Dioso pacatocopata panejumecovënëtabiabina panijamonae. ²⁻³ Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

⁴ Paxamë panexi panexainaevi, anaeyacuenia pëtsa panexi paitorobiabame papecabaraanaepanaeyaniva. Biji rajane xaniavaetsia panacoxivitsare papecajumecovënëtabiabina paneitorobijava. Pacujarubarenua Dioso pejumelivaisi pejumecovënëtsinexa.

⁵ Paxamë pijinia itsamonae papijajivimë, dajubicuenia papecacanajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaëyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebi-jitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovetsina.

⁷ Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara. ⁸ Payapëtaneme rabaja mapacuenije. Pajivi pexaniacuene toexana itsamonae ata, bajarapajivi matamotsianatsi Dioso. Pamonaë ata dajubicuenia canajetatsi itsamonae amoneya petonacuenebabiabina, bajarapamonae ata Dioso

matamotsianatsi pexaniacuene itsa toexana itsamonae ata. Pamonaē ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

⁹ Paxamē pijinia papijatuxanevimē, pacamuxujibatsi mapacueniaje. Xaniavaetsia pataema panijajivi, papecatonacuenebivi. Pētsa anaeya patiobabiabame panijajivi asaēya papecatonacuenebabiabinexa. Pacanaējēre pacuenia paxamē ata panijatuxanenē Dioso eca athēbētata. Pamonaē ata apo pecanaia. Bajaraponējavabelia pananeconitsipame. Bajaraponē panijajivi ata pijatuxanenē baja cajena. Bajaraponē saya najēpaeya nacatane daxitatsi. Nexata paneconivajēto xainatsi caejivitsi canacujitsia, bajarapaneconivajētota nacananeconitsiaexanaponaena. Bajaraxuata panijajivi ata itorobajē xaniavaetsia papecatonacuenebabiabinexa.

Pacuenia Dioso pejumecovēnētsivi itorobatsi penayajivi-taenexa dovathi yabara pelivaisi

¹⁰ Tajamonae, icatsia cotocaevi patacatoyaquinaelivaisita, pacajumaitsitsi mapacueniaje. Pajamatabēcuenesaēmēre tsa-vanapae vajatuxanenē pesaē paneyajavajinavanapaexae. ¹¹ Vajabitsaēnē banayajivinaxatata piatajajava pijavajabitsaēnē pejorojoronaeyanivatsi. Bajara pijinia pacuenia paxamē ata panayajivinajamatabēcuenexatare Dioso pejumelivaisita. Nexata bajarapacuenia pajamatabēcuenesaēmē tsane dovathi papecajamatabēcuenē yamaxēitojorobiyanima.

¹² Tspaji Dioso vajanacatojitsipaecuenia itsa exanavanapatsi, nexata dovathi jamatabēnacaitacueniaba. Nexata bēpēnēa vajajamatabēcuenesaēta asaēyata vajabitsaē hexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaētoخانeto. Dovathi pijajivi xaina penamatacaitorobivitsi, bitso pijamatabēcuenesaēvi. Nexata dovathi pijajivi jinavanapa athēbētatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bēpēnēa vajajamatabēcuenesaēta, asaēyata vajabitsaē hexanatsi dovathi pijajivijavabelia. ¹³ Nexata paxamē dovathi papecajamatabēcuenē yamaxēitojorobiyanima, panayajivinajamatabēcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabēcueneta papecajamatabēcuenējētsinexa, itsiata pajamatabēcuenesaēmē tsane bajarapalivaisita. Nexata pibisiacuene apo paexanaemē tsane. ¹⁴ Vajabitsaēnē itsa nayajivinaxatata piatajajava, caecovēta banuca. Nexata pijavajabitsaē apo tixitsitsi pecovēvecua. Bajara pijinia

pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyaniva Dioso pejumelivaisi panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyanivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobianiva. ¹⁵ Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonaе jumecovënëta bajarapalivaisi, Dioso baja barajamatabëcuenexanepanaeya tanetsi. ¹⁶ Panajamatabëcuenecopare Diosojavabelia papecayavenonabiabinexa. Vajabitsaënë banayajivicaпona escudovënëjava, pijavajabitsaënë itsa bixabajarabatsi piupiitarunut-sipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. ¹⁷ Vajabitsaënë banamataxatata piatajajava, cascovënëjava, pematathinaxuabianivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicaпona espada. Bajara pijinia pacuenia paxamë ata panayajivicaпonare Dioso pejumelivaisi, palivaisi baja pacayapëtaeyaexana Espiritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espiritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobianiva. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenua daxita Dioso pejumecovënëtsivi. ¹⁹ Xanë ata panetovajëtabiabarenua

Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenuajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoyaquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinxaxa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane. ²³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. ²⁴ Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablonë, Timoteobeje, Jesucristo papija-jivitonënëbeje. Pacatoyaquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtabiabatsi jamatabëcuenëbarëyaya. ⁵ Bजारapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia. ⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bजारaxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. ⁷ Bजारapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaevetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi

Diosojavabelia,” janë nacuaevetsivijavabelia. ⁸ Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacaasivanexa. ⁹ Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. ¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacaëjëpaena xaniavaetsia panejinavanapaenexa aneonijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaename. ¹¹ Nexata ëpexaniajamatabëcuene paxainaename panejamatabëëthëtojavavetsina Jesucristo papijajivixaemë. Nexata itsamonae paxamë yabara jamatabëjumaitsi tsane Diosojavabelia: “Diosomë, ayaijamatabëcuenenëmë bitso. Pexaniacuene bitso toexaname Filipos tomarapijivi ëpexaniajamatabëcuene pexainaenexa pejamatabëëthëtota,” jamatabëjai tsane itsamonae Diosojavabelia paxamë xaniavaetsia panetsitajinavanapaexae.

Pacuenia Pablo jumecovënëtaaponapona Cristo yabara pelivaisi

¹² Tajamonae, payapëtaneme rabaja pajamatabëcuene yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacueneye. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaëjëpaponaeenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpaponae daxitanacuanëjava daxitajivi Diosojavabelia pecapanepaenexatsi. ¹³ Nacuaevetsinë pijabopijivi, vajabitsaë, daxita itsamonae ata, neyapëtane majota naneconitsia taponaponaenexa Jesucristo pijajivitonëxaenë. ¹⁴ Mapatomarataje ayaibitsaëttoxaneto Dioso pejumecovënëtsivi, itsa nevënëtane tananeconitsiaponaponaenexa, najamatabëcuenesaëtavanapa. Diosojavabelia asaëyata najamatabëcuenecopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

¹⁵ Pamonae ajumejunavijibia Dioso pejumelivaisi tsipaebapona itsamonaejavabelia, bajarapamonaeayajuvënëvi, panecuenecaëba. Nexata itsamonaejavabelia

asaëya tsipaebapona Cristo pelivaisi. Bajarapamonae xanë yabara jamatabëjumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponë tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa,” jamatabëjai bajarapamonae. Itsiata itsamonae, bajarapamonae yajuvënëvi, taneyavenonaenexa, itsamonaejavabelia tsipaebapona Cristo pelivaisi bajarapamonae ata xaniavaetsia pejumecovënëtsinexa. ¹⁶⁻¹⁷ Itsamonae tsipaebapona Cristo pelivaisi pejumetaevitsi saya peyaiyataenexatsi, pepënaponaenexatsinua. Bajarapamonae pejamatabëëthëtovetsina apo jumecovënëtsi ata Cristo, saya jema Cristo pelivaisi tsipaebapona. Jamatabëjumaitsi: “Vecae Pablo naneconitsiaponaponaenae penaneconitsivi pejebabiabibota, pecovëta itsajamatabëcuene xainaeyaxanaenatsi Cristo pelivaisi pejumecovënëtsivi. Bajarapacuenia Pablo jamatabëcuenebëjaiyaxanaenatsi,” jamatabëjai bajarapamonae xanë yabara. Itsiata itsamonae xaniavaetsia tsipaebapona Cristo pelivaisi pejumecovënëtsixae Cristo. Bajarapamonae yapëtane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitsijavanexa nacuaevetsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajaijavanexa nacuaevetsivijavabelia, bajarapamonae yapëtane. ¹⁸ Majotaje nenaneconitsiaexanae ata, apo natsinajamatabëxainaenë. Itsamonae pejamatabëëthëtovetsina Cristo pelivaisi pejumecovënëtsixae, tsipaebapona jivi pejumecovënëtsinexa bajarapalivaisi. Itsamonae pijinia pejamatabëëthëtovetsina apo jumecovënëtsi ata, itsiata Cristo pelivaisi tsipaebapona jivi pejumecovënëtsinexa bajarapalivaisi. Bajaraxuata bajarapamonae ata jivi petsipaebaponaejava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponaenae tsane. ¹⁹ Tsipaji yapëtaniji pacuenia panetovajëtaponame Diosojavabelia. Espíritu Santo, ponë Jesucristo itorobica, bajaraponë neyavenonapona. Bajaraxuata yapëtaniji daxita pacuenia netoxanepanaejitsia. Nexata baja pitsapaenajë tananeconitsia ponaponaejavavecua. ²⁰ Bitso jitsipajë epexaniacuene taexanaenexa. Apo jitsipaenë taexanaenexa itsacuenejavayo ata, xua yabara auranë tsipae. Cristo tajumecovënëtsijavaveliacujinae, aeconoxae ata, ajunavijibia jitsipajë taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajë taexanaponaenexa ëbajaraponënexa. Bajaraponë

tanetojitsipaecuenia abaxë taasaëtsaponaponaepato mapanacuataje, tatëpaeepatotanexa ata, jitsipajë taexanaenexa xua pejamatabëcueneta daxitajivi yaiyataejitsia Cristo. ²¹ Tasaëtsaponaponaepato abaxë mapanacuataje, Cristo pejitsipaecuenia toexanaponaponajë. Itsa pamatacabi tēpaenajë, netoxanepanaejitsia mapanacuata tasaëtsaponaponaejava matatoxenetsia. Tsipaji Cristo yajavaponaponaenajë athëbëtatsia. ²² Tasaëtsaponaponaepato abaxë mapanacuataje, necaējēpa tatoexanaponaponaenexa Cristo tanetojitsipaecuenia. Itsiata apo yapētaenë xua pepacuene jitsipajë. ²³ Itsajavata bitso jitsipabiabajë tatēpaejava taponanexa Cristo pijanacuayabetsia. Bajaraxua bitso netoxanepanaejitsipa. ²⁴ Itsiata paxamë panematavenoname abaxë taponaponaenexa mapanacuata, patacayavenonaponaponaenexa. ²⁵ Yapētaniji baja cajena abaxë taponaponaejava paxamēnexa. Ponaponaenajë abaxë patacayavenonaenexa, paneajamatabëcuenesaēnexa panevajēnaeyabelia, panejamatabëcuenebarēyanexanua panejumecovēnētsixae Cristo pelivaisi papecacapanepaenexa panijaneconivecua. ²⁶ Nexata pamatacabi Jesucristo neyavenonaena penaneconitsivi pejebabiabibovecua tapitsapaenexa, ponaponaenajë icatsia paxamējavata. Nexata jamatabëcuenebarēyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecua.

²⁷ Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavēnēlvaisitaeponaejava najamatabëcuenejēpaeya panecasaëtsavanapaejava Cristo pelivaisi panejumecovēnētavanapaejava. Jitsipajë patacavēnēlvaisitaejava asaēyata najamatabējēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. ²⁸ Pētsa pacujunavame pamonaē pacaitoya. Dioso papecayavenonaexae, itsa apo pacujunavimē tsane itsamonae pacabejiobiaexanae ata, nexata bajarapamonae jamatabējumaitsi tsane: “Pexaniajailivaisi cajena bajarapamonae tsipaebaona. Tsipaji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana,” jamatabējai tsane. Yapētaenanua paxamë papecacapanepaejavanexa Dioso. ²⁹ Cristo pejamatabëcueneta pacatocopata bajaraponë panejumecovēnētsinexa. Itsiata baitsi jane apo pacatocopatsi ebajaraponë panejumecovēnētsinexa. Pacatoyajavacopatana baja cajena itsamonae papecabejiobiaexanaenexa bajara-

ponë papijajivixaemë. ³⁰ Pacuenia Cristo pijajivitonëxaenë itsamonae nebejiobiaexanapona, bajara pijinia pacuenia paxamë ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxë tsiteca nebejiobiaexanapona pacuenia baja panevënëlvaisitaneme.

2

Pacuenia Dioso pejumecovënëtsivi itavetatsi beayaijamatabëcuenevi penataeyaniva yabara pelivaisi

¹ Payapëtaneme rabaja mapacuejeje. Jesucristo paneyajavajinavanapaexae, panajamatabëcuenesaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcuenebabata. Payapëtaneme rabaja Espiritu Santo papecatsijamatabëecaejava papecayajavaponaponaenexa. Payapëtaneme rabaja Jesucristo papecaitaxutotsonia taeyabiabijava. ² Bajaraxuata nexata pacaitorobatsi mapacuenia panejinavanapaenexaje patacasivabarëyanexa. Najamatabëcuenejëpaeya pajinavanapare. Najamatabëcuenejëpaeya namataenetsia panaasivamëre tsavanapae. Xua paexanaejitsiamë Dioso pejamatabëcueneta, najamatabëcuenejëpaeya paexanavanapare. ³ Pëtsa panatoexaname itsacueniejavayo ata, xua ëpaxamënexa pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacueniejavayo ata saya bepaayaijamatabëcuenevimë papecataenexa itsamonae. Biji rajane beveliajamatabëcuenevi panataeyabiabianame. Itsamonae paxamëvecua ayaijamatabëcuenevi pataeyabiabianame. ⁴ Pëtsa panajamatabëxainabiabame ëpaxamë panenatojitsipaecuene. Biji rajane payajavanajamatabëxainabiabianame itsamonae ata penatojitsipaecuene.

⁵ Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. ⁶ Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yaiyatanetsi,” apo jamatabëjai. ⁷ Bajaraponë picani ayaijamatabëcuenenë. Paxa Dioso yajavaponapona athëbëtatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonë naexana, pacuenia Dioso itorobatsi pexanaenexa. ⁸ Bejivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso

pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutsinexatsi. ⁹ Bajaraxuata Dioso mēthēvetsina matacotatsi. Caponatsi athēbēabetsia peecaenexa paxa Diosojavatatsia, pebarēevetsinexatsi daxitacuene. ¹⁰ Nexata bajaraponē ita vēnēlivaisitaenatsi, pematabacabēta yaiyataeya tonubenaenatsi daxitajivi. Athēbētatsia pejinavanapaevi, mapanacuapijivi ata, petēpaevimi ata, pematabacabēta yaiyataeya tonubenaenatsi. ¹¹ Nexata daxitajivi jumai tsane Jesucristo yabara: “Jesucristo rabaja cajena pepo petuxanenē,” jai tsane. Nexata daxitajivi yapētaena pacuenia paxa Dioso bitso ayaijamatabēcuenenē.

Pacuenia Dioso pejumecovēnēsivi pexaniajailivaisi pejumecovēnētavanapaexae, bepecotia mapanacuataje yabara pelivaisi

¹² Tajamonae bitso patacaasivavi, pacuenia panejumecovēnētame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovēnētavanapare, aeconoxae xanē tajē pacavecuaponaponae atatsi. Pacaejivimē canacujitsia cjunaviaya Dioso pajumecovēnēre. Nexata ēpexaniacuene paexanavanapaename. Tsi-paji Dioso papecacapanepaevinexa. ¹³ Dioso rabaja pacajamatabēcueneyavenona panejamatabēēthētovetsina jitsipaeya paneexanaenexa, pacuenia Dioso pacatojitsipa. Dioso pacajamatabēcuenē caējēpaeyaexananua paneexanaenexa bajarapacuenē.

¹⁴ Daxitacuene paexanavanapare pajamatabēcuenenatsipaebinejevamē. Pētsa anaeya namataenetsia najumenotsia panabijatanemenua. ¹⁵ Bajarapacuenia ita pajinavanapaename, nexata daxita paxamē aneconijibia jivi patsitajinavanapaename Dioso papexixaemē. Nexata mapanacuapijivi pibisiacuene pexanaevi tuatujēta pajinavanapae atamē tsane, itsajivi ata acuenebi tsane pibisiacuena papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamē ata paitsimē tsane. Bepapecotiamē tsane pexaniajailivaisi panejumecovēnētavanapaexae bajarapamonaejavata. ¹⁶ Bepapecotiamē tsane xaniavaetsia ita patsitajumecovēnētavanapaename bajarapamonaejavata pexaniajailivaisi, Jesucristo pelivaisi. Bajarapacuenia ita patsitajumecovēnētavanapaename, pacasivabarēyatsi tsane pamatacabi icatsia Cristo patsianica. Bajarapacuenia pacasivabarēyatsi tsane tsipaji baja yapētaenajē apo tanacueratsijava asaēya tanacuenebijava paxamējavata. ¹⁷ Dioso pacasivabarēya panenajamatabēcuenērajutsixae

Diosojavabelia panetojinavanapaenexa bajaraponë papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinexa, Dioso netocopata. Nexata daxita paxamë pacayajavajamatabëcuenebarëyatsi tsane. ¹⁸ Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Papat-sicujinaerena, itsa pacavënëlvivaisitaenatsi pacuenia pajinavanapame, nejamatabëcuenebarëyaya exanaejitsia. ²⁰ Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. ²¹ Daxita itsamonae bitso najamatabëxaina ëpenatojitsipaecuenia pexanaenexa. Apo sivanajamatabëxainae Jesucristo petonacuenebinexa. ²² Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebija bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaejava yabara, nexata bajaraxuacujinae pacatoitorobialiat si Timoteo papecataenexalia. ²⁴ Xanë jamatabëjumait sinë paxamë yabara: “Itsa Dioso netojitsipaena xanë ata taponanexa bajarabelia, nexata neyavenonaena bepjjia taponanexa tataenexalia Filipos tomarapijivi,” jamatabëjanë paxamë yabara.

²⁵ Panetoitorobaremena rabaja vajabananë Epafrodito pataneyavenonaenexamë bajarapacuenia tanamatavenon-aepatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumait sinë paxamë yabara: “Itsa Diosobajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia. ²⁶ Majotaje Epafrodito piavitanecujinae, jamatejema baja. Nexata aconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlvivaisitaejava pebitsojava piavitanecuene. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji

itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. ²⁸ Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaenajë. ²⁹ Pacopiapitsianame bajaraponë bitso jamatabëcuenebarëyaya Dioso pejamatabëcueneta vajanabanëxae. Pamonaë jamatabëcueneitsi pacuenia bajaraponë jamatabëcueneitsi, payaiyataeneme. ³⁰ Paxamë apo papatsi atamërena maberena je pataneyavenonaenexamë, itsi-ata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

3

Pacuenia jivi Dioso pejitsipaecuenia betojinavanapa yabara pelivaisi

¹ Tajamonae, palivaisi capanepaeya pacatoyaquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueranaetsi patacatoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. ² Panayajivitaema pijamatabëcuenebejevi, pamonaë beaviri pianaepanaevi. Tsipaji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicuenia Dioso pepacuene papecapanepaenexa panijaneconivecu,” jai tsabiabi. ³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsipaji vajamatabëëthëtojavavetsina najamatabëcuenecopatatsi Diosojavabelia vajanacapanepaenexa. Jamatabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacapanepae tsipae vajacuata vajaexanaejava pejamatabëcueneta. ⁴ Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa. ⁵ Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivicuenia neperabëcaucuta. Baitsi neboupiperabëcaucuta. Xanë raja tajasalinainëmi

Israelpijinē. Benjamínpijinē pemomoxiyajuvēnēnē. Taxa judionē. Taena ata judiova. Xanē picani fariseonē. Pacuenia fariseovi bitso jumecovēnēta Dioso Moiséspijinēta penajumecopatsilivaisi, bajara pijinia pacuenia xanē ata itsinē. ⁶ Daxita tajamatabēcuenesaēta caasaēnē tajumecovēnētsijava Dioso Moiséspijinēta penajumecopatsilivaisi. Jamatabēcuenenavēxaniabajē tsaena bitso. Jesús pelivaisi pejumecovēnētsivi yabara, jumaitsinē tsabiabi: “Dioso Moiséspijinēta penajumecopatsilivaisivecua saicayalivaisi jumecovēnēta. Nexata bajarapamonae bebeyejebatsi,” janē tsabiabi. Nexata Jesús pijajivi bejiobiaexaniabajē. Dioso Moiséspijinēta penajumecopatsilivaisi, bitso xaniavaetsia jumecovēnētaaponajē. Nexata itsajivi ata acuenebi pejumaitsijava xanē yabara: “Pablo xaniavaetsia apo jumecovēnētsi Dioso Moiséspijinēta penajumecopatsilivaisi,” pejaijava. ⁷ Daxita bajarapalivaisi yabara xanē picani sivabarēyanē. “Itsa jumecovēnētsianajē bitso, netonamatamotsiana Diosojavabelia,” jamatabējanē picani. Itsiata aeconoxae yapētaniji daxita bajarapalivaisi piamatamobilivaisicuene. Tsipaji baja najamatabēcuenecopatajē Cristojavabelia tanevecuaajibiaexanaenexa tajaneconi. ⁸ Aeconoxae baja yapētaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapētaenexa xaniavaetsia tajatuxanenē Jesucristo. Jesucristo taneyajavaponaponaexae, nexata piamatamobilivaisi tajumecovēnētsijavami, copatajē baja. ⁹ Dioso aneconijibia apo netae tajumecovēnētsixae Dioso Moiséspijinēta penajumecopatsilivaisi. Aeconoxae baja Dioso aneconijibia netane tsipaji najamatabēcuenecopatajē Jesucristojavabelia tanevecuaajibiaexanaenexa tajaneconi. ¹⁰ Tavajēnaeyabelia bitso jitsipajē daxitacuenevecua tayapētaenexa pacuenia Cristo jamatabēcueneitsi. Pasaēta Dioso matacotatsi Cristo petēpaejavavecua, bajarapaasaē jitsipajē tayajavaponaponaenexa. Cristo pijajivitonēxaenē, jitsipajē xanē ata tanebejiobiaexanaenexa, tatēpaenexa ata. ¹¹ Tsipaji xanē ata copiaevetaponaponajē Dioso tanematacotsinexa tatēpaejavavecua.

Pacuenia Pablo najamatabēcuenesaēta xaniavaetsia Cristo peyajavaponaponaenexa, pepatsinexa Dioso pijanacuayabet-sia, yabara pelivaisi

¹² Xanē apo jamatabējumaitsinē: “Daxita baja Dioso pejitsipaecuenia toexanajē. Nejamatabēcuenecaējēpa baja tajumecovēnētsinexa pacuenia Dioso netojitsipa taexanaenexa,” apo jamatabējanē. Itsiata tavajēnaeyabelia tanejamatabēcuenecaējēpaponaponaenexa, caasaēnē tsaponaponaenexa.

taexanaejava pacuenia Dioso netojitsipa. Jitsipajë bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenene yabara Jesucristo nesivatëpa. ¹³ Tajamonae, apo jamatabëjumaitsinë: “Xanë rabaja nejamatabëcuenecaëjëpa Dioso tajumecovënëtsinexa pacuenia Dioso netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoponaponaenexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijavabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponaenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaenajë. ¹⁴ Pacuenia pecujinaejinaenë nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponaenexa Dioso tanerajutsinexa athëbëtsia taxinaejavanexa tayajavaponaenexae Jesucristo.

¹⁵ Daxita pamonaë xaniavaetsia jumecovënëtavanapa Dioso, bajarapamonaë ata benajamatabëcuenesaëttavanapa xaniavaetsia petojinavanapaenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexainaejava. ¹⁶ Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Becaasaë tsavanapaetsinua vajavajënaeyabelia orijibia vajajumeyapëtaeponaenexa.

¹⁷ Tajamonae, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonaë ata panaitaxutocaevetsianame paxamë ata xaniavaetsia panejinavanapaenexa pacuenia bajarapamonaë jinavanapa. ¹⁸ Ayaibitsaëttoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonaë yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebianatsi. ¹⁹ Mapanacuaje pecopiarucaematacabita, bajarapamonaë Dioso verebiabianatsi. Tsipaji bitso jitsipa pijacuata penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumaitsi

tsabiabi: “Pexaniacuene bitso vaxaitsi exanavanapatsi,” jamatabējai tsabiabi bajarapamonae. Ēmapanacuapijicuene saya sivanajamatabēxainabiaba. ²⁰ Vaxaitsi baja cajena jinavanapaenatsi Dioso pijanacuatatsia. Bajaraxuata copiaevetavanapatsi vajatuxanenē Jesucristo pepatsijavatsica vajanacacapanepaenexa Dioso pijanacuayabetsia. ²¹ Vajaperabēto vereverecaena. Itsiata vajatuxanenē Jesús nacaperabēitothianaena. Nexata pacuenia bajaraponē perabēitsi athēbētatsia, bajara vaxaitsi ata perabēitsitsi tsane. Nexata pasaēta Jesús caējēpatsi pitorobinexa daxitacuene, bajarapasaēta nacaperabēitothianaena.

4

Pacuenia vaxaitsi besivabarēyatsi tsabiabi vajatuxanenē Jesucristo yabara pelivaisi

¹ Tajamonae bitso patacaasivavi, pacaitaxanatsi. Bitso jamatabēpacatanetsi. Bitso pacasivajamatabēcuenebarēyatsi. Tshipaji xaniavaetsia pajumecovēnētavanapame Jesús pelivaisi pacuenia baja pacatsipaebatsi. Pajamatabēcuenesaēmēre tsavanapae pacopatsinejevamē panejumecovēnētsijava Jesús pelivaisi.

² Papetirivamēbeje, Evodia Síntique, paxamēbeje pacatoyaquinatsibeje patacaitavetsinexabeje mapacueniaje. Pētsa baja icatsia pematatsēnēa namataenetsia panajumeanaenotamebeje. Panajamatabēcuenejēparebeje Jesús pelivaisi panejumecovēnētsivaxaebeje. ³ Xamē ata xaniavaetsia taneyavenonaenēmē Dioso pijacuene tanacuenebijava, catoyaquinatsi. Jitsipajē neyavenonaenexa bajarapapetirivabeje, penabarajamatabēcuenexanepanaenexabeje namataenetsia icatsia penajumeanaenotsiyanivabeje. Bajarapovabeje bitso neyavenonabeje tatsipaebijava itsamonaejavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonae ata patanajuanacuenebivi, bajarapacuenia neyavenona. Daxita baja bajarapamonae vēnērubena Dioso pijabaxutota, itsa pabaxutota vēnēyaquinarubatsi pamonae pexainaevinexa matababi apo pevereverecajava.

⁴ Jesús pelivaisi panejumecovēnētsivixae, pajamatabēcuenebarēyamēre daxitamatababijavabelianexa. Icatsia pematatsēnēa pacajumaitsitsi. ¡Pajamatabēcuenebarēyamēre tsavanapae! ⁵ Jamatabēcuenexanepanaeya xaniavaetsia pajinavanapaename daxitajivi papecajamatabēcueneyapētaenexa. Tshipaji rabaja vajatuxanenē imoxoyo pevājēnae pepatsinexatsica.

⁶ Pëtsa pajamatabëcuenebëjamë itsacuenejavayo ata yabara. Biji rajane pavajëre Diosojavabelia daxitacuenejavanë yabara. Pexaniajamatabëcuenua parajutabiabare Dioso papecayavenonaejavanë yabara. ⁷ Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtavanapame, daxitacuene yabara panenajamatabëxainaejava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanapaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijijitsia pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsi-taponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

Pacuenia Filipos tomarapijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: “Apo jitsipae raeta icatsia taneyavenonaenexa bajarapamonae,” apo jamatabëjanë. Jume cajena. Yapëtaniji pacuenia picani jamatabëpanetoitorobi atamë ofrenda pataneyavenonaenexamë, itsiata apo pacacuenecaëjëpae patanetoitorobinexamë. ¹¹ Apo pacatoyaquinaetsi mapacueniaje ofrenda patanetoitorobivajënaeyamë bitso tanamatavenonaexae itsacuenejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë.

¹² Yapētaniji pacuenia ponaponajē, pamatacabi tsiquirijavayo xainae atanē. Yapētanijinua pacuenia ponaponajē pamatacabi ayaijava xainajē. Yapētanijinua pacuenia jamatabēcuenēbarēyanējitsia daxitamatacabijavabelianexa. Nexata itsa xainajē daxita tanamatavenonaejavaxi, barēyanē. Apo xainae atanē itsacuenejavayo ata, itsiata barēyanē tsabiabi. ¹³ Nejamatabēcuenēcaējēpa tanajamatabēcuenēsaētsinexa daxitacuene yabara. Tsipaji Cristo pesaēta nejamatabēcuenēcaējēpaeyaexana. ¹⁴ Itsiata baitsi jane paxamē pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵ Payapētaneme rabaja mapacueneje. Pamatacabi copiaya tsipaebanajetarucājē jivī pecapanepaelivaisinexatsi Macedonia nacuajava, paxamē paFilipos tomarapijivimē panijanacuavecua itsa ponajē, paxamē panerajutame ofrenda pataneyavenonaenexamē. Itsatomarapijivi, Dioso pejumecovēnētsivi ata, apo nerajutsi ofrenda bajarapacuenia taneyavenonaenexa. Ēpaxamē itsiata paneyavenoname. ¹⁶ Nexata bajaraxuacujinae, itsa abaxē ponaponajē Tesalónica tomarata, panetoitorobabiabame icatsia ofrenda anijatonē tanamatavenonabiabijavata. ¹⁷ Sivabarēyanē tsabiabi itsa panetoitorobabiabame bajarapacuenia. Itsiata apo sivabarēyanē tsabiabi tanetoxanepanaexae bajarapacuenia pataneyavenonaejavamē. Jume baja cajena. Biji rajane sivabarēyanē tsabiabi bajarapacuenia pataneyavenonaejavamē. Tsipaji juya paxainaejitsiamē Diosojavabelia papecarajutsijavanexa athēbētatsia. ¹⁸ Nexata pitajē daxita panetoitorobijavamē Epafroditota. Xainajē baja nexata bitso ayaijava, tanamatavenonaejava matatoxenetsia. Xua panetoitorobame ofrendacuena, tsitapexaniacuenetsi Dioso. Bajaraxua Dioso sivajamatabēcuenēbarēya. ¹⁹ TajaDioso bitso pexainaenē. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabēcuenecopatsixae. ²⁰ ¡Vaxa Dioso ayaijamatabēcuenē daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovēnētsivi pebajacobinexatsi yabara pelivaisi

²¹ Nebajacobiana paxamējavata daxita Jesús pelivaisi pejumecovēnētsivi, pamonae Dioso pijajivi. Dioso pijajivi, pamonae xanējavata jinavanapa, pacabajacobalia. ²² Daxita Dioso pijajivi, mapatomarataje pejinavanapaevi,

pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

²³ Pacatovajëtabiabatsi Diosojavelia, vajatuxanenë Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

*Pacuenia Pablo toyaquina mapabaxutoje Dioso pejume-
covënëtsivi, Colosas tomarapijivijavabelia, yabara pelivaisi*

¹⁻² Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Pablo Diosojavabelia tovajëtabiaba Colosas
tomarapijivi, Jesús pelivaisi pejumecovënëtsivi, yabara pelivaisi*

³ Paxanëbeje Timoteobeje pacatovajëtabiabatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutatsibeje. Tsipaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. ⁴ Bajarapacuenia pajumaitsinëbeje tsabiabi tsipaji pacavënëlivaisitanetsibeje xaniavaetsia panejumecovënëtavanapaejava Jesús pelivaisi. Pacavënëlivaisitanetsibejenua paneasivatsavanapaejava daxita Jesús pelivaisi pejumecovënëtsivi. ⁵ Bajara pajamatabëcueneitsimë tsipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecapanepaelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafras pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacaëjëpaponä. Nexata daxitanacuanëjava, pamonaë jumecovënëtaponä bajarapalivaisi, copataponä baja perujujamatabëcuenemi. Nexata baja pejanajamatabëcuene xainaponä. Bajarapamonäe pejanajamatabëcuene xainaponä, pacuenia paxamë ata pejanajamatabëcuene paxainame pamatacabi ajena pajumecovënëtame

bajarapalivaisi. Bajara pamatacabijavaverenacujinae paxamë baja payapëtaeponame pepacue ne Dioso papecaitaxutotsoniataejava. ⁷ Dioso papecaitaxutotsoniataejava, copiaya baja cajena vajaasivanë Epafras pacatsipaeba. Bajaraponë Jesucristo xaniavaetsia petonacuenebinë. Nexata bajaraponë panetoitorobaremena pataneyavenon-aenexabeje Dioso patatonajuanacuenebinexa majotaje. ⁸ Nexata pamatacabi Epafras pata paxanëbejjavaberena, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonae ata.

⁹ Nexata patacavënëlivaisitaecujinaebeje, pacatovajëtabiabatsi Diosojavabelia. Pacatovajëtabiabatsi xua Dioso pacatojitsipa papecayapëtaeyaexanaenexa. Nexata Dioso itsa pacayapëtaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabatsi daxitacuene, Dioso pijacuene ata, Dioso papecayapëtaeyaexanaenexa.

¹⁰ Pacatovajëtabiabatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuene paneexanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneypëtaeponaenexa. ¹¹ Pacatovajëtabiabatsinua Dioso papecajamatabëcuene asaëyaexanaenexa pesaëta.

Nexata bajayajebi itsamonae pacaitacueniababiabi ata, pacajamatabëcuenecajëpaena panejamatabëcuenesaë tsavanapaejava. ¹² Pacatovajëtabiabatsinua paxamë panejumaitsabiabinexa Diosojavabelia: “Xanepana rabaja. Tsipaji bitso pexaniacuene panetoexaname,” panejaitabiabinexa Diosojavabelia. Bajarapacuenia pajumaitsimë tsabiabi tsane tsipaji bajaraponë pacavecuaajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenaenacuatatsia.

¹³ Vaxaitsi bajayata apo yapëtaetsi pexaniajailivaisi. Nexata picani bepitaquirinacuata vajajinavanapaevi. Tsipaji picani dovathi pijajivitsi tsavanapae. Pibisiacuene exanabiabatsi pacuenia dovathi nacaïtoroba. Itsiata baja aeconoxae Dioso nacapita dovathivecua. Nexata baja Dioso pexënato, piasivanë, pijajivitsi nacaexana.

¹⁴ Nacasivatëpa Cristo. Nexata baja Cristo pejamatabëcueneta Dioso nacavecuaajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuaajibiaexana pibisiacuene vajaexanaeconimi Cristo vajanacasivatëpaexae yabara pelivaisi

15 Dioso cajena caeto ata apo vajataenë. Itsiata Dioso pexënato, Cristo, naexana mapanacuataje. Cristo paxa jëpa. Dioso daxitacuene mapanacuata pexanaevajënaeya ata, Cristo baja cajena ponapona athëbëtatsia. 16 Cristo baja cajena exana daxitacuene Dioso pejamatabëcueneta. Athëbëtatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaenexatsi. 17 Daxitacuene Cristo pexanaevajënaeya ata, Cristo baja cajena athëbëtatsia ponapona. Daxitacuene xua Cristo exana, bajaraxua pexanaecujinae abaxë Cristo pesaëta mapamatacabita ataje tsitecanajetaruca. 18 Cristo baja cajena pevetsinë daxita Dioso pejumecovënëtsivi. Nexata daxita Dioso pejumecovënëtsivi Cristo penamatacaitorobinë. Cristo pejamatabëcueneta daxita Dioso pejumecovënëtsivi Dioso pijajivi exanatsi. Cristo taxuxuaba jivi petëpaeujinae icatsia jivi piasaëjavanexa. Bajaraxuata itsamonae ata icatsia asaë tsane petëpaeujinae. Nexata Cristo daxitajivi mata-toxenetsia bitso ayaijamatabëcuenenë. 19 Bajarapacuenia Cristo bitso ayaijamatabëcuenenë tsipaji Dioso pexënato tojitsipa pejamatabëcuenëjëpaenexatsi. 20 Daxitajivi, pamonaë jinavanapa mapanacuataje, naneconita Diosojavabelia. Pamonaë ata jinavanapa athëbëtatsia, naneconita Diosojavabelia. Nexata Dioso jitsipa daxita bajarapamonae pebarajamatabëcuenexanepanaenexa. Nexata Dioso itorobica Cristo mapanacuayabetsicaje cruzata pesivatëpaenexa daxita bajarapamonae. Nexata daxita bajarapamonae Dioso aneconijibia tane Cristo pesivatëpaejamatabëcueneta. Bajaraxuata Dioso baja barajamatabëcuenexanepana bajarapamonae.

21 Paxamë picani abaxë bajayata Diosovecua naxuabiaya pajinavanapame. Dioso bepapijavajabitsaëmë tsavanapae pibisiacuene paneexanavanapaexae. Itsiata baitsi jane aeconoxae baja Dioso pacabarajamatabëcuenexanepana. 22 Dioso baja aeconoxae pacabarajamatabëcuenexanepana. Tsipaji Jesucristo bepejibicuenia cruzata pacasivatëpa. Nexata baja Dioso pacavecuaajibiaexana pibisiacuene paneexanaeneconimi. Bajaraxuata aeconoxae baja Dioso papijajivimë. Dioso baja pitabarata aneconijibia pajinavanapame. 23 Nexata panevajënaeyabelia aneconijibia Dioso pitabarata panejinavanapaenexa, asaëyata pajumecovënëtavanapare Cristo papecasivatëpaejava panijaneconi yabara. Palivaisi baja pajumecovënëtame papecacapanepaelivaisinexa, pëtsa pacopatame

panejumecovënëtsijava. Bajarapalivaisi baja yacaëjëpa daxitanacuanëjjava petsipaebaponaejjava. Xanë ata, Pablonë, tsipaebaponajë bajarapalivaisi.

Pacuenia Pablo itorobatsi peyavenonaenexa Dioso pejumecovënëtsivi yabara pelivaisi

²⁴ Xanë Pablonë, majotaje penaneconitsivi pejebabiabibota, naneconitsiaponaponajë paxamë apo pajudíovimëjjava Cristo pelivaisi patacatsipaebaponaexae. Itsiata jamatabëcuenebarëyanë tsaponaponae, nebejio-biaexanabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanë ata itsamona nebejio-biaexanabiaba. Bajarapacuenia Dioso netocopata tanebejio-biaexanabiabinexa tavajënaeyabelia tajamatabëcuenesaëtsaponaenexa Dioso tajumecovënëtsijava. Nexata tanesivaajamatabëcuenesaënexa daxita pamona e jumecovënëta Cristo pelivaisi. ²⁵ Dioso netocopata tayavenonaenexa Dioso pijajivi, pamona e Cristo pelivaisi jumecovënëta. Bajaraxuata paxamë ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. ²⁶ Dioso nitoroba jivi tatsipaebaponaenexa pacuenia Dioso tajëvelia najamatabëxaina pijajivi pecapanepaenexa. Dioso baja cajena nacua pexanaevajënaeya ata, najamatabëxaina pacuenia exanaejitsia pijajivi pecapanepaenexa. Abaxë picani itsajivi ata Dioso apo yapëtaeyaexanae bajarapacuenie. Itsiata baitsi jane aeconoxae baja Dioso tocopata daxita Dioso pejumecovënëtsivi peyapëtaenexa pacuenia Dioso exana pijajivi pecapanepaenexa. ²⁷ Dioso tojitsipa apo judíovi ata peyapëtaenexa pexanialivaisi, palivaisi picani itsajivijavabelia ata Dioso apo yapëtaeyaexanae. Bajarapalivaisi mapacuenia itsije. Cristo cajena pacatsijamatabëca papecayajavaponaponae. Bajaraxuata nexata payapëtaneme itsamatacabi Cristo paneyajavajinavanapaejavanexa Dioso pijapenivenivenae-nacuatatsia.

²⁸ Paxanë patanecaëjëpaecuenia, daxitajivi xaniavaetsia patsipaebaponajë Cristo pelivaisi. Pamuxujiobaponajënu xaniavaetsia daxita bajarapamona e pejumecovënëtsinexa Cristo pelivaisi. Bajarapacuenia pamuxujiobaponajë pevajënaeyabelia piamatabëcuenesaëtsaponaenexa Cristo pelivaisi pejumecovënëtsijava. ²⁹ Bajaraxuata asaëyata Dioso tonacuenebaponajë daxita pasaëta Cristo nerajutapona.

2

1 Jitsipajë paneyapëtaenexa pacuenia bitso pacasi-
vanajamatabëxainatsi. Nexata asaëyata Diosojavabelia
pacatovajëtabiabatsi. Laodicea tomarapijivi ata
tovajëtabiabajë. Itsamonae ata, pamonae abaxë apo
netae, bajarapamonae ata tovajëtabiabajë. 2 Asaëyata
Diosojavabelia pacatovajëtabiabatsi papecajamatabëcuene
asaëyaexanaenexa Cristo pelivaisi panejumecovënëtsijava.
Pacatovajëtabiabatsinua najamatabëcuenejëpaeya pane-
jinavanapaenexa namataenetsia panenasivaxae.
Pacatovajëtabiabatsinua panejamatabëëthëtota ayailivaisi
paneyapëtaeponaenexa xaniavaetsia itsa payapëtaneme
Cristo. Bajarapacuenia pacatovajëtabiabatsi xaniavaetsia
paneyapëtaenexa pexaniajailivaisi, palivaisi picani Dioso
apo yapëtaeyaexanae itsajivijavabelia ata, baitsi jane
baja Cristo pelivaisi. 3 Cristo pelivaisi xaniavaetsia itsa
yapëtanetsi, nexata yapëtanetsi pacuenia Cristo nacatojitsipa
vajatonacuenebavanapaenexa. 4 Bajarapacuenia
pacatsipaebatsi itsajivi ata papecayamaxëitojorobiyanima,
penajumetsënëtsilivaisi itsa pacatsipaeba, bepexaniajailivaisi
itajara panejumetaeyanima. 5 Apo pacayajavapon-
aponae atatsi, itsiata pacajamatabënjabinabiabatsi.
Jamatabëcuenebarëyanë itsa pacavënëlvivaisitanetsi
najamatabëcuenejëpaeya panejinavanapaejava. Ja-
matabëcuenebarëyanënuua itsa pacavënëlvivaisitanetsi
panevajënaeyabelia paneajamatabëcuenesaë tsavanapaejava
panejumecovënëtsijava Cristo pelivaisi.

6 Bajaraxuata pacuenia baja copiaya panaja-
matabëcuenecopatame vajatuxanenë Jesucristojavabelia
papecacapanepaenexa Diosojavabelia, bajarapacuenia
tsiteca panajamatabëcuenecopatavanapare. Pana-
jamatabëcuenecoparenua panevajënaeyabelia Cristo
papecayavenonaponanexa daxitacuene yabara. Nexata
pajinavanapaename Cristo papecatojitsipaecuenia.
7 Paxamë xaniavaetsia panajamatabëcuenecopare
Jesucristojavabelia papecayavenonaenexa. Nexata
Jesucristo pacajamatabëcueneasaëyaexanaena. Nexata
papexaniajailivaisi itsamonae pacatsipaeba, tsiteca
pajumecovënëtavanapaename. Pajumaitsimënuua tsabiabi
tsane Diosojavabelia: “Xanepana rabaja. Tsipaji bitso
pexaniacuene panetoexaname,” pajamë tsabiabi tsane
Diosojavabelia.

*Pacuenia Cristo pijajivi pejanajamatabëcuene xainavanapa
yabara pelivaisi*

8 Xania. Nayajivitaeya pajinavanapare. Pëtsa panacopatame papecayamaxëitojorobinexa pamona tsipaebavanapa saicayalivaisi Dioso pejumelivaisivecua. Bajarapamonae apo tsipaebaponae Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

9 Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayaijamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. ¹¹ Itsa panajamatabëcuenecopatame Cristojavabelia, nexata baja Dioso pacavecuaajibiaexana pibisiacuene paneexanaeneconimi papecacapanepaenexa. Pibisiajamatabëcuene ata baja pacavecuaajibiaexana. Nexata pacuenia judíovi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeneconimi Dioso papecavecuaajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuaajibiaexana pibisiacuene paneexanaeneconimi. ¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamëthëtsivi itsa mëthëtatsi petëpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaëvi petëpaecujinae icatsia itsa asaë. Bajarapacuenia Dioso pacatane tsipaji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petëpaecujinae,” pajamatabëjamë. ¹³ Paxamë picani abaxë bajayata bepanetëpaevi. Diosovecua naxuabiaya pajinavanapame pibisiacuene paneexanaeneconi yabara. Bajarapacuenia picani Diosovecua naxuabiaya pajinavanapame apo pajudíovixaemë. Itsiata baitsi jane aeconoxae baja Cristo payajavajinavanapame papecacapanepaenexa. Tsipaji baja Cristo pejamatabëcueneta Dioso pacavecuaajibiaexana pibisiacuene paneexanaeneconimi. ¹⁴ Bitso picani pibisiacuene exanavanapatsi. Tsipaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuaajibiaexana daxita bajarapaneconimi Cristo cruzata vajanacasivatëpaexae. ¹⁵ Bajarapacuenia Cristo cruzata vajanacasivatëpaexae, Cristo

baja cueneamoneyaba dovathi. Tsipaji bajarapacuenia Cristo ita nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëevetaponapona pitorobinexa, bajarapacuene Cristo cueneamoneyaba. Nexata Cristo daxitajivijavabelia tsitanacueneitajëta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovënëtsivi pejamatabënajinavanapaenexa Cristo peecaejava athëbëtatsia yabara pelivaisi

¹⁶ Cristo baja pecueneamoneyabixae dovathi, pëtsa panacopatame itsajivi ata papecajaniitavetsinexa panexaejava, panematavëjëaapaejava ata. Itsamonae abaxë tsiteca jumecovënëtavanapa perujulivaisi, Dioso Moiséspijinëta penajumecopatsilivaisi. Nexata pacuenia itorobatsi bajarapalivaisita, fiestanë exanabiaba caevai canacujitsia. Itsafiestanë exanabiaba caeuameto canacujitsia, pejanajuameto ita ecaica. Itsafiestanë exanabiaba penacueraevetsimatacabianë canacujitsia. Pëtsa pajumecovënëtame, itsajivi pacajunatsi ata panenaponaenexa bajarapafiestanëjavabelia. ¹⁷ Bajayata picani jivi ponabiaba bajarapafiestanëjavabelia. Tsipaji palivaisi bajayata Dioso Moiséspijinëta najumecopata, itorobatsi penaponabiabinexa bajarapafiestanëjavabelia. Itsiata baja Cristo ita patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapaenatsi. ¹⁸ Pëtsa pajumecovënëtame itsamonae pacajumaitsi ata mapacueniaje: “Beveliamatabëcuenevi panataema. Pavajëtabiabarenuua ángelevijavabelia Diosovecua panenaxuabiyaniava. Bemajitsinaebota baja cajena pataniji bajarapacuenia vajaexanabiabinexa,” pacajai ata, pëtsa pajumecovënëtame. Bajarapamonae beayajamatabëcuenevi nataeyabiaba pejamatabëcuenepijilivaisi saya petsipaebaponaejava yabara. ¹⁹ Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropotsiarubenaponareca. Bajara pijinia pacuenia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcuene yavenonapona. Nacajamatabëcuene vitsabiaexanaponanua pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Vajanacacapanepaenexa Diosojavabelia,

pexaniacuene toexanavanapaenatsi itsamonaejavabelia. Jumecovënétavanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tēpa, paxamë ata, Cristo bepapecayajavatēpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xuajitsia itsiata pajumecovënétavanapame mapanacuapijivi jamatabëcuenenavëxaniabiaya papecatsipaebilivaisije?

²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae.

²² Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuene daxita vereverecaena. Bajarapacuenia pitavetsicuene saya jivi pejamatabëcuenepijilivaisita itaveta. ²³ Pamonae bajarapacuenia pacaitavetapona, bepacatsita peyapëtaevi itajara. Tsipaji bajarapamonae jamatabëpacaitoroba panevajëtabiabinexa ángelevijavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënétaponae atamë tsipae, itsiata apo pacajamatabëcueneyavenonae tsipae papecavecuaajibiaexanaenexa papibisiajamatabëcuene paxainame panejamatabëëthëtota.

3

¹ Cristo petëpaecujinae Dioso icatsia itsa asaëyaexanatsi, paxamë ata Cristo bepapecayajavaasaëyaexanaevi, Dioso pacatane. Bajaraxuata athëbëpijicuene pajamatabënjavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaeavetsinexabeje dexitacuene.

² Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje.

³ Cristo itsa tēpa, paxamë ata Cristo bepaneyajavatēpaevi, Dioso pacatane. Aeconoxae baja paxamë Cristo papecayajavaponaponaejava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame.

⁴ Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo

icatsia athëbëvetsica patsianica, paxamë ata paxainaename penivenivenaecotia Cristo papijajivixaemë.

Pacuenia Dioso pejumecovënëtsivi perujujamatabëcuenemi baja copata pejanajamatabëcuene pexainaenexa yabara pelivaisi

⁵ Mapacuenia pajamatabëjumaitsimëre tsavanapaeje: “Tajaperujujamatabëcuenemi baja copatajë. Nexata baja apo jitsipaenë icatsia taxinaejava perujujamatabëcuene, mapanacuapijijamatabëcueneje. Apo jitsipaenë baja itsapetiriva tajaitsijava tajavavecua. Apo jitsipaenë baja piauracuene ata taexanaponaejava. Apo jitsipaenë baja pibisiacuene ata tanajamatabëxainaejava. Apo jitsipaenë baja pibisiajamatabëcuene ata tajitsipaejava. Apo jitsipaenë baja ayaijava taxinaejava tanaxainaeyabinexa. Daxita baja bajarapajamatabëcuenemi copatajë. Nexata baja matavëjëa apo jitsipaenë bajarapajamatabëcuene taxinaejava,” pajamatabëjamëre tsavanapae. Tsipaji itsa pajitsipaejitsipame ayaijava panexainaejava panenaxainaeyabinexa, nexata pacopabijitsipame Dioso panejitsipaejavami. Tsipaji Diosovecua bitso pajitsipaejitsipame mapanacuapijicueneje. Nexata pajamatabëcuenejëpaejitsipame pamonaе vajëcabiaba jumapecataeya pexanaenëanëjavabelia. Tsipaji bajarapamonaе Diosovecua jitsipa jumapecataeya pexanaenëanë. ⁶ Daxita pamonaе Dioso apo pejumecovënëtsivi, bajarapitsipibisiacuene pexanavanapaevi, Dioso ayaicuenia naneconitsiaexanaenatsi. ⁷ Paxamë ata picani daxita bajarapitsicuene paexanavanapame Dioso panejumecovënëtsivajënaeya. ⁸ Nexata baja aeconoxae pacopabare daxita mapajamatabëcueneje. Paneanaepanabiabijava itsamonaejavabelia, pacopabare. Pibisiacuene paneexanaenexa panenajamatabëxainabiabijava ata, pacopabare. Pibisiacuenia itsamonae panebaracuaicuaijitsabiabijava ata, pacopabare. Itsa pacuaicuaijamë, pëtsa pacuaicuaijamë pibisialivaisi. ⁹ Pëtsa namataenetsia panatsipaebame penajumetsënëtsilivaisi. Perujujamatabëcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujujamatabëcuenemi. ¹⁰ Nexata baja pejanajamatabëcuene paxainavanapame. Panevajënaeyabelia payapëtaeponame paneexanavanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatabëcueneitsimëre tsavanapae. ¹¹ Daxita pamonaе Dioso pejumecovënëtsivi, pejanajamatabëcuene xaina. Nexata daxita Dioso pejumecovënëtsivi Dioso najëpaeya tane. Judïovi, apo

judíovi ata, daxita bajarapamonae Dioso najëpaeya tane. Pamonaë peperabëcaucubivitsi, pamonaë ata apo peperabëcaucubivitsi, daxita bajarapamonae Dioso najëpaeya tane. Saicayanacuapijivi ata, pamonaë ata dajubicuenia canajetatsi itsamonaëjavabelia amoneya petonacuenebavanapaenexa, pamonaë ata apo canajetsitsi itsamonaëjavabelia amoneya petonacuenebavanapaenexa, daxita bajarapamonae Dioso najëpaeya tane. Tsipaji bajarapamonae Cristo tsijamatabëecatsi peyajavajinavanapaenexa caejivi canacujitsia. Nexata bajarapamonae xaina baja pajamatabëcuene Dioso tane bitso penamatamotsicuene mapanacuataje.

¹² Dioso bitso pacaasiva. Pacaitapetanua papijajivinexamë. Bajaraxuata paitaxutotsoniataeyabiabianame itsamonaë ata. Nexata ëpexaniajamatabëcueneta pajinavanapaename. Beveliajamatabëcuenevi nataeya pajinavanapaename. Pajamatabëcuenesaëmë tsavanapae tsane itsamonaë, bajayajebi pacaitsacueniababiabi ata. ¹³ Namataenetsia panajamatabëcueneyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabëcuenexanepanare. Pacuenia paxamë ata Cristo pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatabëcuenexanepanare itsamonaëjavabelia. ¹⁴ Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapacuenia nexata najamatabëcuenejëpaeya pajinavanapaename. ¹⁵ Pavajëtabiabare Diosojavabelia papecayavenonaenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

¹⁶ Pavajëtabiabare Diosojavabelia Cristo pelivaisi itsamonaë papecatsipaebijava papecajamatabëcueneenabiabinexa. Pavajëtabiabarenua Diosojavabelia xaniavaetsia Dioso panejamatabëcueneyapëtaenexa. Namataenetsia panatsipaebiababare Cristo pelivaisi. Namataenetsia panajamatabëcuene yavenonabiabarenua panejamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë

ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espiritu Santo pejamatabëcueneta pacanaxëanaeyaexana, panaxëanabiabare. ¹⁷ Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë tsane vajatuxanenë Jesucristo pejitsipaecuenia. Pexaniajamatabëcuene itsa parajutabiabianame vajatuxanenë Jesucristo paxa Diosojavabelia, Dioso papecayavenonabiabixae, Jesucristo pevënëta pexaniajamatabëcuene parajutabiabianame.

Pacuenia Pablo Dioso pejumecovënëtsivi muxujioba yabara pelivaisi

¹⁸ Paxamë papetiriavimë, pajumecovënëtabiabare pacuenia pacaitoroba paneamonajivi. Tsipaji bajarapacuenia vajatuxanenë pacatojitsipa paneexanavanapaenexa. ¹⁹ Paxamë pijinia papebijivimë, pasivamëre panijavajivi. Pëtsa anaeyacuenia paitorobabiabame panijavajivi. ²⁰ Paxamë pijinia papeximë, daxita xua paneaxajivi, paneenajivi ata, pacaitoroba paneexanaenexa, pajumecovënëtabiabare. Tsipaji bajarapacuenie vajatuxanenë sivabarëya. ²¹ Paxamë pijinia panexi panexinaevi, pëtsa panexi anaeya paitorobabiabame papecajumecovënëtabiabina xua paitorobame. Tsipaji saya belia panexi jamatabëcuenefaefaenajitsipa Dioso pejumecovënëtsijava. ²² Paxamë pijinia itsamonae papijajivimë, dajubicuenia papecacanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebijava yabara. Biji rajane daxitamatacabi asaëyata xaniavaetsia patonacuenebabiabare. Panejamatabëcuenevetsina cuenejitsipaeya panijatuxanevi patonacuenebabiabare papecasivabarëyanexa vajatuxanenë. ²³ Daxita xua panijatuxanevi patonacuenebabiabame, jamatabëcuenebarëyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: “Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenënexa,” pajamatabëjamëre tsabiabi. ²⁴ Payapëtaneme rabaja mapacuenieje. Vajatuxanenë pacarajutsiana pacuene pijajivi toxaina perajutsinexa, baitsi matacabi apo pevereverecaejava. Patonacuenebavanapame

baja cajena Cristonexa. Bajara jane ponë pepacuene panijatuxanenë. ²⁵ Panejumecovënëre pacuenia pacaitorobatsi. Tsipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

4

¹ Paxamë papetuxanevimë, xaniavaetsia paevere panijajivi, papecatonacuenebabiabivi. Panajamatabënapitabiabare paxamë ata panijatuxanenë athëbëtatsia peecaejava.

² Daxita Dioso panejumecovënëtsivi icatsia pacatoy-aquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuenemajitsinejevamë. Itsa pavajëtabiabianame Diosojavabelia, Dioso papecayavenonabiabijava yabara, pajumaitsimë tsabiabi tsane mapacueniaje: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia. ³ Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevetsivi patanitavetsiyaniva jivi patatsipaebaponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vajaexanaeneconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. ⁴ Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabiabianamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa itsamonaejavabelia, patsipaebabiabare. Xaniavaetsianua patsitajinavanapare pamona Dioso apo pejumecovënëtsivi. Tsipaji rabaja imoxoyo pevajënae Cristo icatsia pepatsijavanexatsica. ⁶ Daxita palivaisianë pacuaicuanetsipaebilivaisi. Panajamatabëcuenevererenua xaniavaetsia panejumecanaviatsinexa caejivi canacujitsia bajarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabananë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë. ⁸ Bajaraxuata bajaraponë pacatoitorobaliatsi papecatsipaebinexa pacuenia pajinavanapajë. Bajaraponë nexata itsa pacatsipaebiana, nexata panesivaajamatabëcuenesaëmë tsane. ⁹ Bajaraponë paxamëjavabelia yajavaponaiejitsia vajabananë Onésimo. Bajaraponë Onésimo panijatomarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

¹⁰ Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia. ¹¹ Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamona bitso neyavenona. ¹² Epafraas ata, Cristo pijajivitonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëtanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. ¹³ Pacatsipaebatsi baja cajena pacuenia Epafraas pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. ¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënëne ata pacabajacobalia.

¹⁵ Nebajacobi vajamonae, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamonaeta nacaetuatabiaba bajaraponë pijabota, nebjacobi. ¹⁶ Itsa baja paveretame panelebijava mapabaxutoje, patoitorobianame Laodicea tomarapijivijavabelia pe-

nalebinexa bajarapamonae ata. Bजारपामोनाए अता ततोय-
अकुनाएबखुतो जुया पाकतोतरोबिआ पानेनलेबिनेखा पख-
अमै अता. ¹⁷ अरुकिपोजवबेलिआ पजुमाइसिमै त्साने मापाकु-
निए: “डियो पेकतोकोपासिजा नेतनाकुनेबिनेखा, वेरेरे
खानिआवैत्सिआ,” पजामै त्साने.

¹⁸ खानै पब्लोनै, पाकतोयाकुनिअसि बजा काजना
ताकोबेता मापालिवाइसियोजे पातानेबाकोबिनेखामै.
पजामातबैनजिनानापारे पेनानेकोनिसिबि पेजेबबिबिबोता
तापोनापोनाएजावा. पाकतोवजैताबिअबत्सि डियोजवबेलिआ
पापेकायवेनोनाबिबिनेखा डियो. बजारा इत्सि त्साने.

Mapabaxutoje San Pablo copiaya toyaquina Tesalónica tomarapijivijavabelia

Pacuenia Pablobana, Silvanobana, Timoteobana toyaquina mapabaxutoje Dioso pejumecovënëtsivijavabelia yabara pelivaisi

¹ Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi

² Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa. ³ Itsa pacatovajëtabiabatsi vaxa Diosojavabelia, panajamatabënapitabiabajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënapitabiabajënu bitso pinijicuenia panejitsipaejava Dioso. Paxamë rabaja pajamatabëcuenesaëmë tsavanapae panecopiaevetavanapaejava vajatuxanenë Jesucristo icatsia pepatsijavanexatsica. ⁴ Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. ⁵ Bajayata itsa pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuenesaënexamë.

⁶ Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumecovënëtavanapame patacatsipaebilivaisi Espiritu Santo papecatsijamatabëecaexae. Bajarapacuenia barëyaya pajumecovënëtavanapame patacatsipaebilivaisi, it-samonae bitso pacabejiobiaexanabiabi ata. ⁷ Bajarapacuenia

panejinavanapaejava daxita Dioso pejumecovënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame. ⁸ Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitae. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuene. Bajaraxuata paxanë apo pacavajunupaebitsi daxita bajarapamonaejavabelia. Tsipaji baja yapëtane. ⁹ Biji rajane bajarapamonae pijacuata panetsipaeba paxamë xaniavaetsia patanecopiapitsijavamë pamatacabi pacanasivaxainatsi. Paxamë picani jumapecataeya pexanaenëanëjavabelia panavajëcabiabame. Itsiata baja aeconoxae pacopatame jumapecataeya pexanaenëanëjavabelia panenavajëcabiabijavami. Nexata baja pepo Diosojavabelia panajamatabëcuenecopatame. Patonacuenebavanapame pepo Dioso, ponë pi-asaëtsaponaponaenë daxitamatacabijavabelianexa. Bajarapacuenia paxamë yabara panetsipaeba baja cajena daxita bajarapamonae. ¹⁰ Bajarapamonae panetsipaebanua panecopiaevetavanapaejava Jesús, Dioso pexënato, athëbëvetsica icatsia pepatsijavanexatsica. Bajaraponë, Jesús, Dioso baja cajena asaëyaexanatsi petëpaecujinae. Jesús nacacapanepaena pibisiacuene vajaexanaeneconi yabara Dioso vajanacananeconitsia exanaejavaminexavecua.

2

Pacuenia Pablo nacueneba Tesalónica tomarata yabara pelivaisi

¹ Tajamonae, apo panacueratsinë itsa pacasivaxainatsi. Bajarapacuenie paxamë panijacuata payapëtaneme. ² Paxamë baja cajena payapëtaneme mapacuenije. Paxanëbeje Silasbeje patapatsivajënaebeje paxamëjavabelia, Filipos tomarata panenaneconitsiaexanabeje itsaneconi apo paxainae atanëbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebeje, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa. ³ Palivaisi pacatsipaebatsi, pexaniajailivaisi cajena. Apo penajumetsënëtsilivaisi. Apo

pacatsipaebitsi bajarapalivaisita patacayamaxëitojorobinexa.
⁴ Biji ra Dioso paneitoroba. Panetocopatanua jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajë, apo patsipaebaponaenë saya jivi patanebarëyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajë Dioso patanebarëyataenexa. Tsipaji Dioso vajanacajamatabëcueneyapëtaenë.
⁵ Paxamë baja cajena payapëtaneme mapacueneje. Caeto ata paxanë itsalivaisi apo pacabarëcuaiquajitsi saya jema bajarapalivaisi yabara patanebarëyataenexamë. Yamaxëitojorobiaya livaisi apo pacatsipaebitsi palata patacavecucupitsinexa. Dioso baja cajena daxita bajarapacuene panejamatabëcueneyapëtane.
⁶ Cristo patanitorobixae, panejamatabëcuenecaëjëpa picani patacaitorobinexa pataneyaiyataenexamë. Itsiata baitsi jane caeto ata apo pacaitorobitsi pataneyaiyataenexamë. Apo paitorobinë itsamonae ata pataneyaiyataenexa.
⁷ Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanë ata asivaya xaniavaetsia pacaevetavanapatsi.
⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabëpanebeyejebabiabi ata, itsiata apo pacopatsinë patacayavenonaponaejava.
⁹ Tajamonae, panecuenecanaëjëre mapacueneje. Pamatacabi paxamëjavata pajinavanapajë, pinijicuenia panacuenebabiabajë. Pinijicuenia panacuenebabiabajë patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapëtaeyaexana. Paepatota pacuenesajinajë, panatonacuenebabiabajë matakabita, meravi ata. Bajarapacuena panatonacuenebabiabajë itsanë ata paxamëyajuvënënë petoayapëbejeyanivatsi patanevetaponaejava.

¹⁰ Paxamë baja cajena paneyapëtaneme pacuenia pajinavanapajë. Dioso ata paneyapëtane. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainaenë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi.
¹¹ Paxamë baja cajena paneyapëtaneme paxamë pacaenëmë canacujitsia patacamuxujiobaponaejava panejamatabëcuenesaënexa Diosojavabelia. Pacuenia pexi pexainaenë nacoximumuxujioba, bajara pijinia pacuenia

paxanë ata pacamuxujibatsi. ¹² Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacuene papecabarëvetsinexa pijapenivenivenaenacu-atatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata panejumecovënètame patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënètame. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcuene parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumecovënëtsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. ¹⁵ Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixaenë, paxanë ata bajarapamona panecapitsapa judíovi penacaetuatabi-abibovecua. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya. ¹⁶ Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacuene pexanaeconi pematatsënëa ayaineconi natsixaina Diosojavabelia. Nexata baja aeconoxae bajarapamonaecopiapatatsi ayaicuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata pacajamatabënajinavanapatsi. Bitso picani icatsia jamatabëpaponajë paxamëjavabelia patacataenexa. ¹⁸ Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. ¹⁹ Vajatuxanenë Jesucristo icatsia ita patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi. ²⁰ Paxamë yabara baja cajena pexaniajamatabëcuene parajutabiabajë

Diosojavabelia. Pacasivajamatabëcuene barëyatsinua tsabiabi.

3

¹ Bajayajebi baja cajena apo pacataetsi. Nexata baja belia apo panajamatabëcuene saëtaaponaejitsipaenë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. ² Nexata baja pacatoitorobatsibeje vajabananë Timoteo. Timoteobeje baja cajena Dioso patatonajuanacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenon-aenexa, papecajamatabëcuene asaëyaexanaenexa Dioso panejumecovënëtsijava yabara. ³ Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënënë Dioso pejumelivaisi pejumecovënëtsijava pecopabijaniva, itsamonae itsa bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaenexa. ⁴ Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejiobiaexanaponaevanexa Dioso papijajivixaemë. Nexata jane baja bajarapacuene aeconoxae pacatocopiapata. ⁵ Bajaraxuata baja apo najamatabëcuene saëtaaponaejitsipaenë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: “Dovathi meta bajarapamonae jamatabëcuenejëtatsi. Othopaica meta baja. Nacueratajë meta baja bajarapamonaejavata pexanialivaisi tatsipaebabiabijava,” jamatabëjanë picani paxamë yabara.

⁶ Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabënajinavanapame pina pexaniajamatabëcuenia. Bitso pina jamatabëpanetaneme picani pacuenia paxanë ata jamatabëpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajë paxamë yabara. Panajamatabëcuenesaëtajë itsa pacavënëlivaisitanetsi asaëya

Dioso panejumecovënëtsijava. ⁸ Itsa pacavënëlvaisitanetsi asaëya Dioso panejumecovënëtsijava, nexata pacasivana-jamatabëcuenesaëtatsi. ⁹ Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. ¹⁰ Matacabita, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa icatsia pataponaenexa paxamëjavabelia patacataenexa. Pacatovajëtabiabatsinua Dioso papecayapëtaeyaxanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

¹¹ Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. ¹² Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. ¹³ Pacatovajëtatsi Dioso papecayamatabëcuene asaëyaexanaenexa, jamatabëcuenexanepanaeya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaeyavata, pamatacabi vajatuxanenë Jesús, daxita pijajivi yajava, patsianica.

4

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

¹ Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa.

³ Dioso raja jitsipa xaniavaetsia panetojinavanapaenexa ëponënexa. Dioso raja pacatojitsipa panecopabinexa pibisiacuene panevitota paneexanaejava.

⁴ Dioso raja pacatojitsipa pacaenëmë canacujitsia paneyapëtaenexa mapacueneje. Petiriva itsa papitame panijavanexa, xaniavaetsia paevere. Payaiyataemanua.

⁵ Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevitota

pibisiacuene pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaе exana bajarapacuene. Bajarapacuene yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. ⁸ Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espíritu Santo.

⁹ Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaeyaexanaenexa bajarapacuene. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vajamonae, Macedonia nacujava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Epanijacuene saya paexanare panejamatabëitonotsiyaniwa itsamonaejavabelia. Panijacuata panatonacuenebare bajarapacuenia pane-naevetavanapaenexa. ¹² Bajarapacuenia nexata Dioso apo pejumecovënëtsivi pacayaiyataena. Nexata apo pacatosaicae tsane itsacuenejavayo ata panenamataavenonaejava.

Pacuenia pepo petuxanenë Jesús icatsia patsijitsiatsica yabara pelivaisi

¹³ Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeyaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeyaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi. ¹⁴ Vaxaitsi baja cajena jumecovënëtatsi Jesús vajanacasivatëpaejava. Jesús vajanacasivatëpaecujinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamonaе Dioso pepua pejumecovënëtsivi petëpaevimi. Bajarapalivaisi vaxaitsi baja jumecovënëtatsi.

¹⁵ Palivaisi pepo petuxanenē Jesús netsipaeba, bajarapali-
vaisi pacatsipaebijitsiatsi. Vaxaitsi abaxē mapanacuata va-
jaasaētsavanapaevi pamatacabi pepo petuxanenē Jesús icat-
sia patsianica. Vaxaitsi athēbēabetsia apo namataxainaet-
sitsia tsane. Petēpaevimi rajane copiaya namataxainae-
nia. ¹⁶ Angelevi penamatacaitorobinē vavajai tsaxuabi
tsane. Dioso pijatrompeta najumetsiana. Pepo petuxanenē
jane baja pijacuata patsianica athēbēvētsica. Nexata pa-
monae Cristo pepua pejumecovēnētsivi tēpa, bajarapamonae
asaēyaexanaenatsi petēpaejavamivecua. ¹⁷ Bajaraxuacujinae
vaxaitsi, abaxē mapanacuata vajaasaētsavanapaevi bajarapa-
matacabita, itarērēbotatsia nacacaetuatsiania petēpaevimi ya-
java. Caxitajarabianatsi jane baja athēbētatsia pepo petuxa-
nenē Jesús. Nexata jane baja daxitamatacabijavabelianexa
yajavajinavanapaenatsi bajaraponē. ¹⁸ Bajaraxuata panaja-
matabēcuenesaētavanapare mapalivaisitaje.

5

¹ Tajamonae, itsiata apo panamatavenonaenē pataca-
toyaquinaenexa patacayapētaeyaexanaenexa pamatacabita,
paepatota ata, copiapatsijitsia daxita bajarapacuenē.
² Payapētaneme baja cajena pepo petuxanenē Jesús icatsia
pepatsijavanexatsica. Paepatota apo vajēnaeevetsitsi, jemata
patsianica. Pacuenia penacobetoxotsinēnexa meravī bapata
itsajota apo jamatabēnajinaetsi, bajarapacuenia jemata
patsianica pepo petuxanenē Jesús. ³ Pamatacabita jivi
jumai tsaponae tsane: “Daxitanacuanējava baja cajena
xanepana. Daxitajivi xaniavaetsia jinavanapa,” jai tsane,
bajarapaepatota jemata tocopiapatsianatsi Dioso apo
pejumecovēnētsivi peverebiabinexatsi. Nexata acuenēbi
tsane Dioso apo pejumecovēnētsivi pevecuarēcēpecaenexa
bajarapacuenē. Pacuenia petiriva, penacoxitsiva, itsa
vixaenotatsi penacueto pevecuanaexanaenexatsi, acuenēbi
pevecuanajetabajiravijava bajarapavixae, bajara pijinia
itsane pamonae Dioso apo pejumecovēnētsivi. ⁴ Tajamonae,
paxamē baja apo pajamatabēcueneaitaquirimē. Pacuenia
Dioso apo pejumecovēnētsivi ajamatabēcueneitaquiri, bajara-
pacuenia apo pajamatabēcueneitaquirimē. Pepo petuxanenē
Jesús pepatsimatacabinexatsica pacopiaevetavanapame.
Nexata pamatacabi pepo petuxanenē patsianica, apo
pajamatabēcuenenabenajacaemē tsane. Pacuenia penaco-
betoxotsinē itsa pata, basivajamatabēcuenenabenajacatsi,
apo paitsimē tsane. ⁵ Tsipaji baja daxita paxamē
pexanialivaisita pacajamatabēcueneitayota. Nexata baja
daxita vaxaitsi pitaquirijamatabēcuene apo xainaetsi.
⁶ Bajaraxuata nexata vaxaitsi apo bejamatabēcuenemajitsitsi.

Pacuenia Dioso apo pejumecovënëtsivi jamatabëcueneitsi, bajara apo bejamatabëcueneitsitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamonae jamatabëcueneaitaquiri, jamatabëcuenemajitabiaba. Aitajibi tsabiabinua meravi. ⁸ Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatanua piatajajava pejorojoronaeyanivatsi pijavajabitsaënë, bajara vaxaitsi ata itsitsi dovathi vajanacayamaxëitojorobianiva. ⁹ Dioso apo nacaitapetsi vajanacaneconitsiaexanaenexa pibisiacuene vajaexanaeneconi yabara. Biji rajane Dioso nacaitapeta vajanacacapanepaenexa pibisiacuene vajaexanaeneconivecua pepo petuxanenë Jesucristo pejamatabëcueneta. ¹⁰ Jesucristo baja cajena nacasivatëpa vajanacayajavaponaponaenexa vajaasaëtsavanapaevi mapanacuataje. Vajatëpaecujinae ata, Dioso pijanacuatatsia Cristo nacayajavaponaponaena. ¹¹ Bajaraxuata pacuenia baja namataenetsia panajamatabëcueneasaëya exanaponame, bajarapacuenia panevajënaeyabelia tsiteca paexanavanapare.

Pacuenia Pablo Dioso pejumecovënëtsivi muxujioba yabara pelivaisi

¹² Tajamonae, pinijicuenia pacamuxujiobatsi paneyaiyataenexa pamonae paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua. ¹³ Payaiyataema bajarapamonae. Asivaya pataema. Tsipaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonae pi-afaetabivi. Pamonae pijinia jamatabëcuene cuerana itsamonae bepejiobiaexanaponaexaetsi Dioso pejumecovënëtsijava yabara, pajamatabëcueneasaëyaexanare. Payavenonare pamonae jamatabëcuenefaefaena Dioso pejumelivaisivecua.

Itsa pamuxujobianame bajarapamonae, itsa pamuxujobianamenua itsamonaejavabelia ata, ajamatabëcuenesaëya pamuxujobianame bajayajebi pacopatsinejevamë.

¹⁵ Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënajinavanapare pexaniacuene namataenetsia panenatoexanaponaenexa. Pajamatabënajinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabëcuenebarëyamëre tsavanapae. ¹⁷ Daxitamatacabi Diosojavabelia pavajëtabiabarë pacopatsinejevamë. ¹⁸ Daxita pacuene apo panejitsipaecuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuene, itsiata pexaniajamatabëcuene parajutabiabianame Diosojavabelia bajarapacuene yabara. Bajarapacuenia paneexanavanapaenexa, Dioso pacatojitsipa Jesucristo papijajivixaemë.

¹⁹ Espíritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. ²⁰ Pëtsa panamuxujematame Espíritu Santo peyajavacuauaijaivi, Dioso pejumelivaisianë pepaebivi. ²¹ Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare. ²² Daxita xua pibisiacuene, panayajivitaema.

²³ Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeiconimi pacavecuajibiaexanaena. Dioso evetsiana panejamatabëcuene, paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa. ²⁴ Bajarapacuenia Dioso pacaevetsiana, ponë pacajunata papexinexamë. Dioso cajena pacatoexanaena daxita pacuenia najumecapanepaeya pacajumaitsi.

Pacuenia Pablo jamatabënajina Tesalónica tomarapijivi, pacuenia ata tovajëta Dioso peyavenonaenexatsi, yabara pelivaisi

²⁵ Tajamonae, Diosojavabelia panetovajëtabiabarë.

²⁶ Asivaya nebajacobiana daxita bajarajotalia Dioso pejumecovënëtsivi.

²⁷ Pacaitorobatsi Dioso pejamatabëcueneta. Patsimuxulebianame mapabaxutoje daxita Dioso pejumecovënëtsivi pejumetaenexa.

²⁸ Pacatovajëtabiabatsi Diosjavabelia vajatuxanenë Jesu-
cristo papecayavenonabiabinexa.

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi

¹ Xanë Pablonë, Silvano, Timoteo, mapamatabëxëyoje paca-toyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoni-ataenexa jamatabëcuenexanepanaeya panejinavanapaenexa.

Pacuenia Dioso naneconitsiaexanaena pibisiacuene pexanaevi pamatacabi Cristo icatsia patsianica yabara pelivaisi

³ Tajamonae, panevajënaeyabelia bitso orijibia panajamatabëcuenecopataponame Diosojavabelia. Pacaenëmë canacujitsia namataenetsia panaasivamënuua tsavanapae. Bajaraxuata daxitamatacabi paxamë yabara pajumaitsinë tsane Diosojavabelia: “Xanëpana rabaja. Pexaniacuena yavenonaponame Tesalónica tomarapijivi,” pajanë tsane. ⁴ Diosojavabelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejio-biaexanabiabi atanua. Bajaraxuata paxanë barëyaya pacavënëlivaisipaebaponatsi itsatomaranëjava, Dioso pejumecovënëtsivijava. ⁵ Bajarapacuenia pacabejiobiaexanabiabi ata, Diosojavabelia paneajamatabëcuenesaë tsaponaexae, nayapëtane Dioso papecajamatabëcueneyavenonaejavanexa pamatacabi naneconitsiaexanaena pijaneconi pexainaevi. Bajarapamatacabi Dioso papecasivajamatabëcuenearëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparucaje. ⁷ Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenivecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëángelevi yajava, pitarunutsicotia ata yajava. ⁸ Jesús jane baja patsianica penaneconitsiaexanaenexa pamonaë

apo yapëtae Dioso. Pamonaē ata apo jumečovënëtsi pepo petuxanenē Jesucristo pelivaisi, Jesús naneconitsiaexanaena. ⁹ Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaravecua tajë xuabianatsi. Bajarapamonae Dioso pijapenivenivenaēcotia apo tae tsane caeto ata. ¹⁰ Pamatacabi vajatuxanenē icatsia patsianica, pinijicuenia pijajivi yaiyataenatsi. Pinijicuenia sivajamatabëcuene nabenajacaenatsi daxita Jesús pejumečovënëtsivitsi. Bajarapacuenia tocopiapatsianatsi pamatacabi patsianica vajatuxanenē. Paxamë ata Jesús pijajivi payajavamë tsane patanejumečovënëtsixaemë patacatsipaebilivaisi.

¹¹ Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiabatsinua Diosojavabelia pecaëjëpaejamatabëcuenetatsi papecajamatabëcuene yavenonaenexa, paneexanaenexa daxita pacuenia pajamatabëexanaponame. Pacatovajëtabiabatsinua Diosojavabelia papeca yavenonaponanexa daxita pacuene paexaname Jesucristo papijajivixamë. ¹² Nexata paxamë xaniavaetsia panejinavanapaejamatabëcueneta, vajatuxanenē Jesucristo daxitajivi yaiyataenatsi. Paxamë ata juya Dioso pacayaiyatae yaexanaena daxitajivi. Bajarapacuenia pacayaiyatae yaexanaena papeca itaxutotsioniataexae vajaDioso, vajatuxanenē Jesucristo ata.

2

Pibisiacuene bitso pexanabiabinë yabara pelivaisi

¹ Tajamonae, pacatsipaebatsi baja cajena paneyapëtaenexa pacuenia vajatuxanenē Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavabelia pamatacabi patsianica. ² Nexata pajivi najumetsënëtsiaya pacajumai tsane: “Espíritu Santo raja neyapëtae yaexana. Jesucristo rabaja patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pablobana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtame. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcuene patajërërëcame panejumečovënëtavanapae

livaisivecua. Pëtsa pajamatabëcuenenabenajacamenua.
³ Pëtsa pajumecovënètame pematatsënëa itsalivaisicuenia
 itsa pacatsipaeba Jesucristo pepatsijavatsica yabara.
 Jesucristo raja abaxë apo patsitsica tsane. Peneta
 raja itsa baja imoxoyo pevajënae tsane Jesucristo
 pepatsinexatsica, jivi ayaibitsaëtonë Dioso pejumelivaisi
 pejumecovënëtsijava copabiana. Bajara pijinia pamatacabi
 patsiana ponë bitso pibisiacuene pexanabiabinënexa.
 Bajaraponë itsamatacabi Dioso xuabiana isotuabelia, bitso
 bejiobiaya peponaponaenexa daxitamatacabijavabelianexa.
⁴ Bajaraponë cueneitoya tsane Dioso pijacuene. Pamonae
 ata vajëcabiaba bedioso petaevijavabelia, itavetsiana
 pevajëcabiabiyanima. Dioso pijatemplobota ata belia ecaena
 bediosonë jivi petaenexatsi. Bajaraponë jumai tsane: “Xanë
 rajane baja dionsonënë,” jai tsane. Bajarapacuenia jivi
 ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë,
 tajëvelia baja cajena pacatsipaebabiabatsi bajarapalivaisi.
 ¿Panacofënètame tsabaja bajarapalivaisi? ⁶ Payapëtaneme
 baja cajena pacuenia abaxë Dioso yacaranata
 pibisiacuene bitso pexanabiabinënexa pepatsiyanima.
 Dioso petocaëjëtsimatacabita bajaraponë patsiana.
⁷ Mapamatacabita ataje jivi pibisiacuene pexanaejava
 navitapona pevajënaeyabelia. Itsiata abaxë apo patsi
 ponë bitso pibisiacuene pexanabiabinënexa. Matapania
 pamatacabi Dioso copatsiana pecaranatsijava bajaraponë
 pepatsiyanima, patsiana jane baja pibisiacuene bitso
 pexanabiabinexa. ⁸ Bajarapamatacabi bajaraponë
 patsiana bitso pibisiacuene pexanabiabinexa. Nexata
 pepo petuxanenë Jesús pijumalisaëta bajaraponëmi
 beyaxuabiana. Pamatacabi Jesús patsianica, bajaraponëmi
 Jesús vereverecaeyaexanaena pijapenivenivenaecotiata.
⁹ Bajaraponë patsiana dovathi pejamatabëcueneta
 pibisiacuene bitso pexanabiabinexa. Nexata bajaraponë
 dovathi pesaëta pinijicuene pexanaejava exanaponaena jivi
 peyamaxëitojorobinexa, beayaijamatabëcuenenë petaenexatsi.
¹⁰ Bajaraponë exanaena daxita xua pibisiacuene, jivi peya-
 maxëitojorobinexa. Nexata bajaraponë pejamatabëcueneta
 Diosovecua jivi naxuabiana. Jivi Diosovecua naxuabiana
 tsipaji apo jitsipae pejumecovënëtsinexa pexaniajailivaisi
 pecapanepaelivaisinexatsi Diosojavabelia. ¹¹ Bajaraxuata
 Dioso tocopatsiana bajaraponë penajumetsënëtsilivaisi
 petsipaebinxatsi peyamaxëitojorobinexatsi. Nexata
 bajarapamonae jumecovënëtsiana ëpenajumetsënëtsilivaisi.
¹² Bajaraxuata nexata daxita bajarapamonae Dioso

naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴ Dioso paneitoroba patacatsipaebinxaxa pexanialivaisi papecacapanepaelivaisinexa Diosojavabelia. Nexata baja pajumecovënëtame bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecayajavaponaponaenexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtame. ¹⁶ Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinxaxa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi

¹ Tajamonae, pecopiaruacelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtame bajarapalivaisi. Patovajërenua daxitajivi peyaiyataenexa Dioso pejumelivaisi. ² Panetovajërenua Dioso patanevetsinexa

pibisiajamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. ³Itsiata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. ⁴Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. ⁵Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaishi

⁶Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. ⁷Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. ⁸Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejeyanivatsi patanevetsijava patanajinavanapaejavata. ⁹Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. ¹⁰Pamatacabi abaxë panajinavanapajë paxamëjavata, pacajumaitsitsi baja cajena: “Pajivi afaetabi, pëtsa naxane,” pacajaitsi baja cajena. ¹¹Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. ¹²Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina panenaevetsinexa,’ jai raja Pablo,” pajamë tsane.

¹³ Tajamonae, pëtsa pajamatabëcuenecueraname pexaniacuene paneexanavanapaejava. ¹⁴ Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. ¹⁵ Itsiata baitsi jane bajarapajivi bepanijavajabitsaējivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujiobianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecayajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. ¹⁸ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. ² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebeje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

³ Pamatacabi baja ponajë Macedonia nacuyabelia, ca-puenetatsi neponaponaenexa Efeso tomarata. Nexata icatsia matavëjëa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjëa baja petsipaebaponaeyaniva bajarapalivaisi. ⁴ Itavetsianamenua bajarapamonae penajamatabëxainabiabiyanima saya jemalivaisixi, perujulivaisiximi. Itavetsianamenua pijasali-naivimi pevënëxi yabara ata penajamatabëxainabiabiyanima. Bajarapitsilivaisixi ajumematamobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonae tsipae pacuenia Dioso nacaitoroba jumecovënëtsiaya vajatoexanaenexa.

⁵ Bajarapacuenia caitorobatsi nejumeitavetsinexa bajarapamonae pecopatsinexa bajarapalivaisi pecuaicuaijaitsabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaaasivatsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso

jitsipanea jivi pejamatabëethëtovetsina xaniavaetsia pejume-covënëtanapaenexa Dioso pejumelivaisi. ⁶ Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuajitsabiabinexa. ⁷ Bajarapamonae picani jamatabënaexana jivi livaisi petsipaebabiabivinxaxa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapëtanetsi pexanepanae-cuene palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinxaxa jivijavabelia, jivi peyapëtaenexa penaneconitsicuene Diosojavabelia. ⁹ Pamonaе pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonaе pibisiacuene exanavanapa, toyaquinabiabatsi pitavetsilivaisinexatsi. Pamonaе ata apo yayiyatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonaе ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonaе ata jivibeви, paxa ata, pena ata, pebeyaxuabivi, toyaquinabiabatsi pitavetsilivaisinexatsi. ¹⁰ Pamonaе ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaе ata pevëna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara pijinia pacuenia petiriavi ata. Pamonaе pamonajivi vecuanamatayajita itsanëjavabelia, toyaquinabiabatsi pitavetsilivaisinexatsi. Pamonaе ata pevëna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonaе ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaе ata najumetsënëta, toyaquinabiabatsi pitavetsilivaisinexatsi. Pamonaе ata itsamonae yabara najumetsënëtsiaya baracuaicuajai tsabiabi, toyaquinabiabatsi pitavetsilivaisinexatsi. Pamonaе ata apo jitsipae pexaniajailivaisi jivi petsipae-baponaenexa, toyaquinabiabatsi pitavetsilivaisinexatsi. ¹¹ Bajarapalivaisicuenia xanë ata itavetaponajë itsa tsipaebaponajë palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajë, tsipaebaponajë daxisajivi peyapëtaenexa pacuenia Dioso itaxutotsoniatanetsi pecapanepaenexatsi.

Pacuenia Pablo pexaniajamatabëcuene rajuta Jesucristojavabelia yabara pelivaisi

12 Pexaniajamatabëcuene rajutajë vajatuxanenë Jesucristojavabelia tanerajutsixae pesaë tatonacuenebinexa. Jesucristo nesivanajamatabëxaina xaniavaetsia tatonacuenebinexa. Bajaraxuata pexaniajamatabëcuene rajutajë. 13 Copiata abaxë itsa apo jumecovënëtsinë Jesucristo, pibisiacuenia picani baracuaicuaijanë tsabiabi Jesucristo. Pijajivi ata tobarajinabiabajë tabejiobiaexanaenexa. Pibisiacuenia bijataeyabiabajë Jesucristo pijajivi. Bajarapacuenia taexanabiabinë ata, Dioso itsiata nebejiobiatane. Tsipaji jamatabëcuenenavëxaniabiaya bajarapacuenene exanabiabajë. Apo yapëtaenë picani xua exanaponajë Jesucristojavabelia. Tsipaji abaxë apo jumecovënëtsinë Jesucristo Dioso pexënatocuene. 14 Nexata baja itsiata belia vajatuxanenë Jesucristo pinijicuenia neyavenona tanajamatabëcueneocopatsinexa bajaraponëjavabelia. Bajaraxuacujinae pijajivitonëxaenë, neyavenona tasivanexa itsamonae ata.

15 Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta mapalivaisije. Jesucristo baja cajena patsica mapanacuayabetsicaje pibisiacuenene pexanaevimi pecapanepaenexa Diosojavabelia. Xanë ata picani bitso pibisiacuenene taexanaenëmi daxitajivi matatoxenetsia. 16 Xanë itsiata bajara taitsinëmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapëtaenexa Jesucristo bajayajebi tanesivaa-jamatabëcuenesaëjava tajumecovënëtsinexa, pibisiacuenene taexanaenëmi ata. Nexata pamonaexa bexëjavabelia ata Jesucristojavabelia najamatabëcueneocopataponae, xainaena matakabi apo peverevereaejava. Bajarapamonae nesivaa-jamatabëcuenesaë tsane itsa nevënëlivaisitaena Jesús taneitapetsijava pijajivitonënxanë, pibisiacuenene bitso taexanabiabinëmi ata. 17 Bajaraxuata vaxaitsi pepo Dioso, daxitacuene peyapëtaenëjavabelia, jumaitsitsi tsabiabi: “Xamë Diosomë bitso ayajamatabëcuenenëmë. Bitso ayaicuenene nexanaenë,” jaitsi tsabiabi. Bajaraponë Dioso daxitacuene peyapëtaenë. Pepo pevetsinënua daxitacuene. Apo petëpaenënxanua daxitamatacabijavabelianexa. Apo petaenëtsinua itsajivi ata.

18 Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsamonae Dioso pejumecovënëtsivi Dioso pejamatabëcueneta tajëvelia cavajunupaeba pacuenia exanaejitsiamë.

Bajarapacuenia Dioso asaëyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcueneëjësixae, ajamatabëcuenesaëmëre Diosojavabelia nenajamatabëcuene copatsijava. Exanabiabare xua yapëtaneme pexaniajaicuene nenajamatabëcuenebijianaeyaniva Diosovecua. ¹⁹ Itsamonae baja yapëtae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovënëtsijavami. ²⁰ Bajarapamonaeyajuvënënëbeje Himeneobeje Alejandrobeje. Pibisiacuenia Dioso baracuaicuajiaibeje tsabiabi. Nexata pecopatsinexabeje Dioso pebaracuaicuajijavabeje, bajaraponëbeje copatajë dovathijavabelia. Nexata hexëa itsa najamatabëxainabeje pexanialivaisi, xaniavaetsia jane baja Dioso pejumecovënëtsinexabeje.

2

Pacuenia Dioso pejumecovënëtsivi daxitajivi betovajëta Diosojavabelia yabara pelivaisi

¹ Timoteo, copiaya caitorobatsi mapacueniaje. Caitorobatsi panetovajëtabiabixae daxitajivi Diosojavabelia. Daxitajivi Diosojavabelia patovajëtabiabianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. ² Patovajëtsianamenua Diosojavabelia presidentevi ata. Patovajëtsianamenua daxita gobierno pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene. ³ Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacapanepaejitsia, vajanacasivabarëyanexa. ⁴ Bajarapacuenia daxitajivi vajatovajëtsijava Dioso jitsipa. Tsipaji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. ⁵ Nexata daxitajivi itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuajainënexa Diosojavabelia. ⁶ Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi

matamota. Bajarapacuenē daxitajivi peyapētaenēxa, Dioso pecaējētsimatācabita pijajivi itoroba daxitanacuanējava pexaniajailivaisi jivi petsipaebinēxa. Tspaji baja cajena Dioso jitsipa daxitajivi pecapanēpaenēxa. ⁷ Bajarapalivaisi jivi tatsipaebinēxa Dioso nitoroba. Dioso nitoroba bajarapalivaisi tatsipaebinēxa pamonae apo judiōvi ata penajamatabēcuenecopatsinēxa Diosojavabelia. Nexata pexaniajailivaisi jivi tatsipaebijava, itsa canavajunupae-batsi, xaniajanē cajena. Cristo tajumecovēnētsinēxae, pexaniajailivaisi jivi tsipaebaponajē. Apo najumetsēnētsinē cajena.

⁸ Bajaraxuata daxitanacuanējava pebijivi, pamonae baja Dioso pitabarata aneonijibi, itsa vajēta Diosojavabelia, jitsipajē nacobeyotsiaya pevajētsijava Diosojavabelia. Bajarapamonae bevajēta Diosojavabelia anaepanaenejeva itsajiviyojavabelia, jumeanaenotsinejevanua itsajiviyojavabelia. ⁹ Jitsipajē pijinia petiriavi penaxatabinēxa xanepanaeya. Pētsa bitso naitabētsiaya naxataba. Itsa naxaniavaeta, bitso pētsa namataitabēta pexaniacuēnia. Pētsa bitso naitabēta oronanitota pexanaejavanēta. Pētsa naitabēta penamatamotsiviriaibotoxita ata. Pētsa naitabētsiaya naxataba bitso penamatamotsināvanē ata. ¹⁰ Petiriavi, pamonae baja xaniavaetsia najamatabēcuenecopata Diosojavabelia, pētsa naitabēta bitso. Bajarapamonae Dioso pitabarata pexaniacuēne betoexanabiaba itsamonaejavabelia penajamatabēcuēnitabētsinēxa bēpēnējāvaverena. ¹¹ Dioso pejumecovēnētsivi itsa nacaetuata Dioso pejumelivaisi penamuxunaevetsinēxa, petiriavi beveliajamatabēcuēnevi nataeya ajumejibia benamuxunaevetena pejumecovēnētsinēxa palivaisi tsipaebatsi. ¹² Petiriavi apo tocopatsinē pemuxujiobinēxa pebijivi. Apo tocopatsinēnua petiriavi beayaijamatabēcuēnevi nataeya pitorobabiabinēxa pebijivi. Biji rajane petiriavi beveliajamatabēcuēnevi nataeya ajumejibia benamuxunaevetena. ¹³ Bajarapacuenia itorobajē tspaji copiaya Dioso exana pebi. Bajaraponē pevēnē Adán. Bajaraxuacujinae cotocaevi Dioso exana petiriva. Bajarapova pevēnē Eva. ¹⁴ Adán cajena picani dovathi apo yamaxēitojorobitsi. Biji rajane copiaya petiriva dovathi yamaxēitojorobatsi. Nexata petiriva copiaya pibisiacuēne exana. ¹⁵ Bajaraxuata daxita petiriavi Dioso tocopatatsi pevixaeitonotsinēxatsi penacueto itsa vecuanaexanatsi. Itsiata baitsi jane bajarapamonae capanēpaenatsi Diosojavabelia itsa casaē tsane penajamatabēcuenecopatsijava Diosojavabelia. Capanēpaenatsi Diosojavabelia daxitajivi ata asivaya

itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamatabëcueneitsi yabara pelivaisi

¹ Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba. ² Ancianonënexa, xanepana ponë apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinë. Penajamatabëcueneruviabinë. Xaniavaetsia penajamatabëxainaenë. Peyaiyataenëtsi. Xaniavaetsia pecopiapitabiabinë pijaboyaberena pesivaxainaevitsi. Pecaëjëpaenëtsi xaniavaetsia jivi Dioso pejumelivaisi petsipaebinxaxa. ³ Ancianonënexa, xanepana ponë apo piapaenë piatajibinxaxa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainaenexa ata pexainaejava, apo penajamatabëxainaenë. ⁴ Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeiyataenëtsinua. ⁵ Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpae tsipaetsi pevetsinexa Dioso pejumecovënëtsivi. ⁶ Apo xanepanae tsipae ancianonënexa ponë abaxë ajena jumecovënëta Dioso. Beayaijamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainaenë, Dioso vecuajopaica. Nexata dovathi daxitamatacabijavabelianexa naneconita Diosojavabelia. ⁷ Ancianonënexa, xanepana ponë peyaiyataenëtsi pamonaë Dioso apo pejumecovënëtsivi ata. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ata peyamaxëitojorobiyanivatsi.

Pacuenia diáconovinexa bejamatabëcueneitsi yabara pelivaisi

⁸ Diáconovinexa pijinia, xanepana pamonaë penajamatabëcueneruviabivi. Itaxutojema apo pecuaicuaijaivi. Apo piapaevi piatajibinxaxa. Apo pejitsipaevi

itsajivi ata yamaxëitojorobiaya palata pevecuanaco-
betoxotsinexa. ⁹ Diáconovinexa, xanepana pamona
xaniavaetsia najamatabëcuenecopata Cristojavabelia.
Pejamatabëéthëtota peyapëtaevi pexaniajaicuene palivaisi
jumecovënëta. ¹⁰ Pamona diáconovinexa, copiaya
bitorobatsi itsacueneyavayo pevetsinexa bajarapacuenia
pejamatabëcuenejëtsinexatsi. Nexata xaniavaetsia itsa
eveta xua evetsiaexanatsi, diáconovi jane baja bexanatsi.
Nexata jane baja bitorobatsi penacuenebinexa xua diáconovi
banacueneba. ¹¹ Diáconovi pijinia pijavajivi xanepana
penajamatabëcuenereviabinexa, apo bebaracuaicuaijai
itsamona. Xaniavaetsia benajamatabëxaina. Nexata xani-
avaetsia bexanabiaba pacuenia itorobatsi. ¹² Diácononënexa,
xanepana ponë caeva pepitsinë. Pecaëjëpaenëtsinua
xaniavaetsia pevetsinexa pexi, pijava yajava. ¹³ Diáconovi
xaniavaetsia itsa eveta penacuenebijava, nexata diáconovi
xaniavaetsia yaiyataenatsi daxitajivi. Ajumeurajibianua
jivijavabelia navajunupaebiana Jesucristojavabelia
penajamatabëcuenecopatsijava.

*Pacuenia Timoteo toyaquinatsi peyapëtaenexa pacuenia ex-
anaponaponaejitsia Dioso pejumecovënëtsivi tuatuajëta yabara
pelivaisi*

¹⁴ Timoteo, bepimia picani jamatabëponajë xamëjavabelia
tacataenexa. Itsiata tavajënaeyabelia catoyaquinatsi ma-
pacuene yabaraje. ¹⁵ Nexata abaxë itsa cuenenajemat-
sianajë tapatsijava xamëjavabelia, neyapëtaenexa pacuenia ex-
anaponaponaejitsiamë Dioso pejumecovënëtsivi tuatuajëta.
Pamona baja Dioso pejumecovënëtsivi, Dioso rabaja pi-
asaënë pijajivi. Bajarapamona Dioso pejumelivaisi, pexa-
niajailivaisi, xaniavaetsia baja jumecovënëttavanapa. Daxita
nacuanëpijivi ata pejumecovënëtsinexa bajarapalivaisi. Ba-
jarapamona pexaniajailivaisi itsamonaejavabelia tsipae-
bapona. Bajarapamona apo tocopatsinua itsajivi ata
pexaniajailivaisivecua saicayalivaisi pejumecovënëtsiyaniva.
¹⁶ Pepo pexaniajailivaisi cajena Cristo pelivaisi. Bajaraponë
baja vaxaitsi jumecovënëttavanapatsi. Itsiata baitsi jane itsa-
monae apo jamatabëcueneyapëtae bajaraponë. Bajaraponë
Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi
jivitonëcuenia. Espíritu Santo pejamatabëcueneta
daxitajivi yapëtaeyaexanatsi Cristo planeconijib-
inëcuene. Angelevi ata Cristo tanetsi. Cristo pijajivi
vënëlivaisipaebaponatsi daxitanacuanëpijivijava. Nexata
daxitanacuanëpijivi najamatabëcuenecopabapona

Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovënëtsijava pecopabivi yabara pelivaisi

¹ Espíritu Santo baja cajena tajëvelia nacayapëtaeyaexana pacuenia bexëajavabelia itsamonae copabijitsia Dioso pejumelivaisi pejumecovënëtsijavami. Bajarapamonae nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonae asaëya jumecovënëtaponaena itsamonae dovathi pejamatabëcueneta petsipaebilivaisitsi. ² Bajarapamonae namuxunaevetsiana penajumetsënëtsilivaisi petsipaebaponaevitsi, betsitapexani-ajamatabëcuenevitsi itajara tsane, pibisiajamatabëcuenevi ata. Bajarapamonae tsipaebaponaena penajumetsënëtsilivaisi. Apo acueneura cajena tsane. ³ Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. ⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponapon-aenexa, xaniavaetsia petsipaebinexanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Niajamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. ⁷ Itsiata baitsi jane pëtsa jumecovënëtamé mapanacuapijilivaisianëje, saya natsiquejemalivaisianë. Daxita nesaëta nacujaubare

xaniavaetsia neponaponaenexa Dioso pejitsipaecuenia.
⁸ Vajajumalixanepanaenexa, xanepana picani vajaper-
 abësaëta vajacujinaejinaejava. Itsiata baitsi jane daxitacuen-
 evecua xanepana bitso vajajinavanapaenexa pacuenia
 Dioso nacatojitsipa. Bajarapacuenenecatoxanepana tsipaji
 vajatëpaecujinae ata Dioso nacajamatabëcueneyavenonaena
 xaniavaetsia vajajinavanapaenexa.
⁹ Bajarapalivaisi
 pexaniajailivaisi cajena. Nexata daxitajivi xaniavaetsia
 bejumecovënëta bajarapalivaisi.
¹⁰ Bajaraxuata Dioso
 tonacuenebaponaponatsibeje. Casaëtsibeje tsaponaponae
 Dioso vajatonacuenebaponaponaevababeje, itsamonae
 pibisiacuenia nacabijataeyabiabi atabeje. Bajarapacuenia
 exanatsibeje tsipaji najamatabëcuenecopatatsibeje piasaënë
 Diosojavabelia. Bajaraponë Dioso daxitajivi pecapanepaenë
 pijaneconivecua. Dioso capanepaena daxita pamonaev
 najamatabëcuenecopata bajaraponëjavabelia.

¹¹ Bajarapalivaisi tsipaebaponare. Itorobaponarenu
 bajarapacuenia pexanaenexa.
¹² Pëtsa nacopatame
 pevëjëatoxaemë itsajivi ata pecaquenetsiataenexa. Biji rajane
 Dioso pejumecovënëtsivijava, xaniavaetsia tsitaponaponare.
 Cuaicuaijamëre xaniavaetsia. Livaisi ata itsa tsipaebame,
 tsipaebare xaniavaetsia. Ponaponare xaniavaetsia.
 Asivamëre daxitajivi. Najamatabëcopenae xaniavaetsia
 Diosojavabelia pecayavenonaenexa daxitacuenenecat
 yabara. Ëpexaniacuene yabara najamatabëxainare.
 Bajarapacuenia itsa tsitaexanaponaponaenename, nexata
 Dioso pejumecovënëtsivi cacuenjëpaeyajinavanapaena.
¹³ Tavajënaelia bajarapacuenia exanaponaponare.
 Jivi penacaetuatsijavata, Dioso pejumelivaisibaxuto
 tsimumulebabiabare. Tsipaebaponarenu pacuenia
 jumaitsi Dioso pejumelivaisibaxutota bajarapamonae
 pijamatabëcuenesaënexa Diosojavabelia.
¹⁴ Dioso baja
 cajena carajuta pecacaëjëpaejamatabëcuene xaniavaetsia jivi
 livaisi netsipaebinexa, pecacaëjëpaenexanua xaniavaetsia
 nevetsinexa Dioso pejumecovënëtsivi. Bajaraxua
 xaniavaetsia najamatabëcuenevetaponaponare. Pamatacabi
 ancianovi nacaetuata, catsimatancobebuatsiaya catovajëta
 Diosojavabelia. Nexata bajarajota Dioso carajuta
 pecacaëjëpaejamatabëcuene.

¹⁵ Daxita nesaëta evetaponaponare daxita pacuenia
 caitorobatsi nexanaenexa. Nexata daxitajivi cayapëtaena
 xaniavaetsia tanejumecovënëtaponaponaevavamë pacuenia
 caitorobatsi.
¹⁶ Pibisiacuene nayajivitaeya ponaponare.
 Palivaisi ata tsipaebaponame, xaniavaetsia tsipaebaponare.
 Saicayacuenia pëtsa bajarapalivaisivecua tsipaebaponame.

Bजारपacuena nexanaejava casaēmēre tsaponaponae. Nexata Dioso cacapanepaena. Pamonaē ata cajumecovēnēta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponaenexa Dioso pejumecovēnētsivijava yabara pelivaisi

¹ Pētsa asaēya muxujiobame pamonaē nevajēnaeyapijivi. Biji xaniavaetsia yaiyataeya beaxacuenia muxujiobare. Necovēpijivi pijinia benejuyapijivicuenia muxujiobare. ² Petiriavi ata nevajēnaeyapijivi beenacuenia muxujiobare. Necovēpijivaxi pijinia benejuyapijivaxicuenia muxujiobare. Ēpexaniajamatābēcuenia taema bajarapovaxi itsajamatābēcue ne bēpēnēa nejamatabēēthētota sivanajamatābēxainaenejevamē.

³ Pamona pevecuatēpaevatsi, Dioso pejumecovēnētsiva, yaiyataeya yavenonare itsa bitso bejiobi. ⁴ Itsiata baitsi jane pamona pevecuatēpaevatsi, itsa xaina pexi, pemomoxi ata, bajarapamonaē xanepana pevetsinexatsi. Bajarapamonaē xanepana peyavenonaenexa pijamonaē. Bajarapamonaē juya beveta paxa, pena ata, pamo ata, pacue ata, pamonaē vitsatatsi. Bजारपacuena itsa exana, exana pexaniacuene. Nexata Dioso barēyataenatsi. ⁵ Pamona pevecuatēpaevatsi, Dioso pejumecovēnētsiva, itsa apo xainae itsajivi ata pevetsinexatsi, bajarapova najamatābēcuenecopataponaponaē Dioso javabelia peyavenonaenexatsi. Navajētabiabi Dioso javabelia matacabita, meravi ata. ⁶ Itsiata baitsi jane pamona pevecuatēpaevatsi pejitsipaecuenia pibisiacuene itsa exanaponapona, Dioso tanetsi bepetēpaeva, abaxē asaē tsaponaponaē ata. ⁷ Bजारपacuena itorobare Dioso pejumecovēnētsivi pijamonaē peyavenonaenexa itsa bitso bejiobi. Nexata pamonaē Dioso apo pejumecovēnētsivi, toacuenebi tsanetsi pebaracuaicuaijajavatsi bajaraxua yabara. ⁸ Dioso pejumecovēnētsivi, pijamonaē beveta. Pajivi apo itaxutotsoniatae pevetsinexa pepo pijamonaē ata, bajarapajivi apo exanaē pacuenia Dioso itorobatsi. Nexata pijamonaē itsa apo evetsi, bajarapajivi bitso pibisiacuene exana Dioso apo pejumecovēnētsijivi matatoxenetsia.

⁹ Petiriva sesenta pavaibeje pexainaeva, caeto penacojiobicujinae pamona pevecuatēpaevatsi, xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota. Nexata daxita Dioso pejumecovēnētsivi peyavenonabiabinexatsi. ¹⁰ Pova pamona pevecuatēpaevatsi itsa cueneyapētanetsi pexaniacuene pexanaejava, bajarapova xanepana

pevënëyaquinarutsinexatsi pamona pevecuatëpaevitsi
 pevënëyaquinarubibaxutota. Mabaitsi pacuene pexanaeva
 xanepana pevënëyaquinarutsinexatsije. Pexi xaniavaetsia
 pevitsatsiva. Jivi ata itsa sivaxainatsi, xaniavaetsia
 pijabota pecopiapitsiva. Ajamatabëcuenecovëbia Dioso
 pejumecovënëtsivi peyavenonaeva. Peyavenonaevanua
 itsamonae itsa bejiobiaexanatsi Dioso pejumecovënëtsijava
 yabara. Daxita xua pexaniacuene, pexanaeva, xanepana
 pevënëyaquinarutsinexatsi pamona pevecuatëpaevitsi
 pevënëyaquinarubibaxutota.

11 Itsiata baitsi jane pova abaxë sesenta pavaibeje apo pex-
 ainaeva, pëtsa vënëyaquinarutame nevënëyaquinarubibaxutota
 peyavenonaenexatsi daxita Dioso pejumecovënëtsivi.
 Tsipaji bajarapova itsa jitsipa pexanaenexa pacuenia
 natojitsipa, copatsipa Cristo pejumecovënëtsijavami. Nexata
 icatsia nacojobijitsipa. 12 Nexata pijaneconi xinaejitsipa
 Diosojavabelia. Tsipaji copatsipa Cristojavabelia
 penajamatabëcuenecopatsijavami: “Capanepaeya baja
 jumecovënëtajë Cristo,” jai ata. 13 Pematatsënëa bajarapova
 sivaxainarutsipa itsa bonëjava. Afaetabinua tsipae.
 Pematatsënëa baracuaicuaijai tsabiabi tsipae itsamonae.
 Jamatabëitonotabiabijitsipa itsamonae. Xuaxi yabara
 ata apo becuaiicuaijaisi, cuaiicuaijai tsabiabi tsipae.
 14 Bajaraxuata pamona pevecuatëpaevatsi, pova abaxë
 bitso apo perujuva, jitsipajë icatsia penacojobijava
 pexi pexainaenexa, pijabo ata xaniavaetsia pevetsinexa.
 Nexata bajarapacuenia vajanacacueneyavi ata
 toacuenebi tsanetsi pebaracuaicuaijajavatsi bajarapitsiva.
 15 Bajarapacuenia jumaitsinë tsipaji baja itsamonae
 pamonajivi pevecuatëpaevitsi copaba baja Cristo
 pejumecovënëtsijavami. Nexata pacuenia dovathi itorobatsi,
 exanavanapa.

16 Dioso pejumecovënëtsivi, pebijivi, petiriavi
 ata, itsa pijamonaeyajuvënëva pamona vecuatëpatsi,
 nexata bajarapamonae bitaxutotsoniatane bajarapova.
 Bajarapacuenia nexata apo namatavenonae tsane
 peyavenonaenexatsi daxita Dioso pejumecovënëtsivi. Tsipaji
 baja pijamonae evetatsi. Nexata Dioso pejumecovënëtsivi
 caëjëpaejitsiatsi peyavenonaenexa pamonae bitso bepejibivi,
 pamona pevecuatëpaevitsi pijamonae petoajibivitsi.

17 Ancianovi, pamonae xaniavaetsia evetabiaba Dioso pe-
 jumecovënëtsivi, bajarapamonae xaniavaetsia bematamo-
 tatsi. Beyaiyatanetsinua. Ancianovi, pamonae Dioso
 pitorobilivaisi bitso tsipaeba, bitso cujarubanua, bajara-
 pamonae xaniavaetsia bematamotatsi. 18 Dioso pejume-

livaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxubinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxubijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamot-sijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹ Pëtsa jumexaniataneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. ²⁰ Nexata xaniajai ancianovi pibisiacuene itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cujunaviana pibisiacuene pexanaejava. ²¹ Dioso pitabarata, vajatuxanenë Jesucristo ata pitabarata, Dioso pijaángelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene pexanaejava. ²² Pëtsa itsanë ata bepíjia exaname ancianonënexa. Tsipaji ponë bepíjia ancianonënexa exanaejitsipame, bepíjia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevecua, xaniavaetsia naevetsiaya ponaponare.

²³ Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

²⁴ Itsamonae pibisiacuene itsa exana, bananeconitsiaexanatsi daxitajivi pepuacueneyapëtaetsi. Itsamonae pijinia pibisiacuene exanae ata, bepíjia apo cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava. ²⁵ Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

6

¹ Pamonae dajubicuenia canajetatsi itsamonaejavabelia amoneya petonacuenebabiabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuenia apo baracuaicuajai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuajai tsane. ² Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaisi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tshipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënënë. Bajara-palivaisi tsipaebaponare. Itorobarenaua bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonaе saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje. ⁴ Cueneyapëtanetsi pamonaе penajumetsënëtsilivaisi tsipaebapona. Bajarapamonae beayaijamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumenaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonaeyajuvënëvi itsa xaina itsacuenejavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamonaе covë nitsacueniabijitsia,” jamatabëjai tsabiabi, itsamonaе apo itsacueniabijitsia atatsi. ⁵ Bajarapamonae anaeya namataenetsia najumenotabiaba. Tshipaji piajamatabëcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinexa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. ⁶ Vaxaitsi Dioso vajajumecovënëtsivi,

bitso cajena vajaxainaeivi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxainaenexa mapanacuataje. ⁷ Pamatacabi vaxaitsi naexanatsi mapanacuataje, itsacuenejavayo ata apo capatsitsi. Pamatacabi pijiniä tëpaenatsi, apo caponae tsanetsi itsacuenejavayo ata mapanacuapijicueneje. ⁸ Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi. ⁹ Itsiata baitsi jane pamonae najamatabëxaina ëpexainaejavanexa, bajarapamonae dovathi jamatabëcueneçëtatsi. Nexata pibisiacuene exana palata pepitsinexa. Jamatabëcuenebijianatsi. Nexata bajarapamonae Diosovecua naxuabiaya jinavanapa. ¹⁰ Pamonae bitso palata jitsipa, daxita xua pibisiacuene exana palata pepitsinexa. Itsamonae bitso najamatabëxaina ëpexainaecuene pexainaenexa. Nexata baja copaba Dioso pejumecovënëtsijavami. Nexata bajarapajamatabëcuene bëpënëa bitso yajamatabëcuenebëjai.

Pacuenia Timoteo muxujiobatsi pijamatabëcuenesaënexa Diosojavabelia penajamatabëcueneçopatsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuenesaëmëre Dioso nejumecovënëtaaponaponaejava. Dioso asivamëre. Diosojavabelia najamatabëcueneçopatsiaya ponaponare. Itsamonae ata asivamëre tsaponaponae. Itsamonae caitsacueniababiabi ata, bajayajebi casaëmëre tsaponaponae Dioso nejumecovënëtaaponaponaejava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare. ¹² Catoayapëbeje ata Diosojavabelia nenajamatabëcueneçopatsijava, ajamatabëcuenesaëmëre nepitsinexa xua Dioso carajutsijitsia, matacabi apo peverevereçaejava. Pamatacabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matacabi apo peverevereçaejava. Ayaibitsaëtoxaneto Dioso pejumecovënëtsivi pitabarata, Dioso cajunata pecarajutsinexa matacabi apo peverevereçaejava. ¹³ Dioso baja cajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuupaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovënëtaaponaponaejava daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeevetaponaponare vajatuxanenë Jesucristo matapania pepatsimatacabitsicajavabelianexa.

15 Pamatacabi Dioso caējēta, itsa copiapatsiana, Cristo icatsia patsianica. Caenē Dioso bitso ayaijamatabēcuenenē daxitanacuanē pevetsivivecua. 16 Caenē Dioso apo tēpae tsane daxita matacabijavabelianexa. Dioso peyacotiyaponaponaenē. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caējēpaetsi petaejava. ¡Daxitamatacabi Dioso pijajivi yaiyatanetsi! ¡Dioso cajena ayaijamatabēcuenenē daxitamatacabijavabelianexa!

17 Pamonaē bitso pexainaevi mapanacuapijicueneje, bajarapamonaē muxujiobare beayaijamatabēcueneni penataeyaniva. Muxujiobarena pejamatabējumaitsiyaniva: “Palata baja taxainaexae, apo namatavenonaenē itsacuenejava ata,” pejamatabējaiyaniva. Tsipaji saya palata peverevereaejava. Biji rajane itorobare bitso pexainaevi penajamatabēcuenecopatsinexa piasaētsaponaponaenē Diosojavabelia. Dioso nacarajuta daxita vajaxinaejava barēyaya vajacajinapanaponaenexa. 18 Itorobarena bajarapamonaē pijapalata pecanacuenebinexa, itsamonaējavabelia pexaniacuene petoexanabiabinexa bajarapapalatata. Itorobarena penajamatabēcueneveretsinexa palata perajutsinexa bepejiobivijavabelia, bajarapacuenia peyavenonaenexa. Itorobarena petsicobetsanaponaenexa pexainaejava bepejiobivijavabelia. 19 Bajarapacuenia itsa exanaena, nexata athēbētatsia Dioso tobuataponaenatsi pepacuene penamatamotsijava pexanaenexa daxitamatacabijavabelianexa. Xainaenanua matacabi apo peverevereaejava.

Pacuenia Pablo Timoteo pemuxujobilivaisi toyaquina, pecopatsivajēnae petoyaquinaelivaisi mapabaxutotaje, yabara pelivaisi

20 Timoteo, exanaponaponare daxita xua Dioso catocopata nexanaenexa. Pētsa namuxunaevetame pamonaē bitso pecuaicuaijaivi saya mapanacuapijicuene yabaraje. Pētsa namuxunaevetame pecuaicuaijaivi natsiquejemalivaisixi. Pētsa namuxunaevetame pamonaē jivi tsipaebapona penajumetsēnētsilivaisi. Bajarapamonaē tsipaebapona itajara pepacuene bepexaniajailivaisi. Itsiata cajena apo pexaniajailivaisi. 21 Itsamonaē bajarapalivaisi jumecovēnēta. Nexata baja copaba Dioso pejumecovēnētsijavami.

Catovajētatsi Dioso pecayavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaitsi vajanacarajutsinexa matababi apo peverevereaejava. Dioso nacarajutsiana matababi apo peverevereaejava, Jesucristo vajajumecovënëtsivi. ² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebeje. Catovajëtatsi peçaitaxutotsoniataenexabeje, peçajamatabëcuene xanepanaeyaexanaenexanua bajaraponëbejavabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinavimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara.

⁴ Najamatabënapitabiabajë tanepënueyabaxuabijavamë pamatababi navecuanatsatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaeviyaniva Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacaajëpaeyaexana, Dioso carajuta pamatababi catsimatanacobeuatatsi tacatovajëtsijavata Diosojavabelia. ⁷ Dioso cajena nacarajuta Espiritu Santo. Espiritu Santo nexata vajanacayajavaponaponaexae, apo cjunavitsi itsacuenëjava ata. Espiritu

Santo pesaëta nacacaëjÿpaeyaexana pacuenia Dioso nacatojitsipa vajaexanabiabinexa. Nacayavenonanua vajaasivanexa itsamonae ata. Nacanajamatabÿcuene cataitsiaexananua pibisiacuene ata vajaexanaeyaniva. ⁸ Pÿtsa ajumeuramÿ nevajunupaebaponaejava vajatuxanenÿ Jesús. Pÿtsa ajumeuramÿ xanÿ ata tanevajunupaebijavamÿ, Jesucristo pijajivitonÿxaenÿ penaneconitsivi pejebabiabibota taneetsijava. Biji rajane xamÿ ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabÿcuenebabatsiana. ⁹ Dioso cajena nacacapanepaena pibisiacuene vajaexanaeiconimivecua. Nacajunata vajatojinavanapaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabÿcueneta. Pepo bajayatamicujinae, pamatacabi abaxÿ Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabÿcueneitajÿta vajanacaasivajava. Dioso vajanacaasivaxae, pexÿnato itorobica vajanacacapanepaenexa. Nexata tÿpae ata tsanetsi, apo nacatoitsacuene. Tsipaji itsa najamatabÿcuenecopatatsi Jesucristojavabelia, nacacapanepaena Diosojavabelia. Nexata xainaenatsi matacabi apo pevereverecaejava.

¹¹ Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenÿnexanÿ tatsipaebaponaenexa bajarapalivaisi apo judíovijavabelia. ¹² Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo auranÿ tanebejiobiaexanaejava yabara. Tsipaji ponÿjavabelia najamatabÿcuenecopatajÿ, jamatabÿcueneyapÿtaniji. Jamatabÿcueneyapÿtaniji pacuenia bajaraponÿ jamatabÿcuenecaëjÿpatsi taneyavenonaenexa. Nexata bajaraponÿ neyavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

¹³ Timoteo, casaëmÿre tsaponaponae nejumecovÿnÿtsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabÿnaponaponare. Xaniavaetsia jumecovÿnÿtsia ponaponare. Asivaya taeyabiabare itsamonae ata Jesucristo pijajivitonÿxaemÿ. ¹⁴ Espíritu Santo cajena nacayajavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso

caitoroba, exanabiabare. Saicayalivaisicuenia pëtsa tsipaebaponame. Espíritu Santo cayavenonaena.

¹⁵ Xamë baja cajena yapëtaneme pacuenia Asíavënë nacuapijivi, daxita Dioso pejumecovënëtsivi, nexu-abarëcëpeca. Tanexuabarëcëpecaevi yajuvënënëbeje Figelobeje Hermógenesbeje. ¹⁶ Onesíforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesíforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesíforo cajena apo neyabaraaura, penaneconitsivi pejebabiabibota ecae atanë. ¹⁷ Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitsijava. ¹⁸ Diosojavabelia Onesíforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesíforo nacayavenonabeje pamatacabi ponaponatsibeje Efeso tomarata.

2

Pacuenia Jesucristo pijajivitonë jamatabëcueneitsi, ponë xaniavaetsia jumecovënëta, yabara pelivaisi

¹ Timoteo, xamë betaxënatomëcuenia tacataenë. Cato-vajëtatsi Diosojavabelia pecajamatabëcuene asaëyaexanaenexa. Nacayavenonaena Jesucristo pijajivixaetsi. ² Xamë rabaja cajena nejumetaeyabiabame palivaisi tsipaebabiabajë jivi ayaibitsaëtöxanetonëjavabelia. Bajarapalivaisi juya tsipaebare itsamonaejavabelia. Pamonaepo piacuenejitsibivi pexanaenexa pacuenia itorobatsi, pecaëjëpaevitsinua xaniavaetsia jivi livaisi petsipaebinexa, bajarapamonaepo itorobare juya mataropotsia bajarapalivaisi petsipaebinexa itsamonaejavabelia.

³ Dioso pejumelivaisi jivi netsipaebaponaepavata, itsa catoayapëbeje, itsamonae itsa cabejiobiaexanaejitsianua, pëtsa najetabajiravame. Jesucristo pijajivitonëxamë, jamatabëcuenevetaponaponare pacuenia caitoroba nexanaenexa. Pacuenia pexaniavajabitsaënë itsi, bajaraitsimëre. ⁴ Vajabitsaënë pitorobabiabinëtsi

jamatabëcuenevetaponapona pacuenia itorobatsi pexanaenexa. Nexata apo vecuanajamatabëcueneepatajërëtsi saicayacuene pevetaponaenexa. ⁵ Bajara pijinia pacuenia pebitsojinaevi pecujinaejinaejava, penayacobijavata, kujinaejina pacuenia itorobatsi pijatuxanevi. Penacanabinë jamatejema perajutsinexatsi itsacuenejavayo. Pajivi xaniavaetsia apo kujinaejinae pacuenia itorobatsi, bitsojinae

ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. ⁶ Ponë pijinia pabi nacueneba peubinexa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo. ⁷ Najamatabëxainare tacatsipaebilivaisi. Nexata vajatuxanenë cayapëtaeyaexanaena bajarapalivaisi.

⁸ Canaëjère Jesucristo. Bajaraponë cajena Dioso asaëyaexanatsi petëpacujinae. Bajaraponë cajena Davidpijinë pemomoxiyajuvënënë. Bajaraponë pelivaisi jivi tsipaebabiabajë. Itsa jumecovënëta bajarapalivaisi, pecapanepaelivaisinexatsi Diosojavabelia.

⁹ Bajarapalivaisi tatsipaebaponaexae, penaneconitsivi pejebabiabibota neeta tavajënaeyabelia daxitanacuanëjava tatsipaebaponaeyaniva. Cadenamaëtonëta xanë necëta, pacuenia bitso pibisiacuene pexanaenë bacëtatsi. Itsiata Jesucristo pelivaisi apo cëtsicapanepae. Nexata xanë majotaje naneconitsia ponaponae atanë, aeconoxae baja Jesucristo pelivaisi yacaëjëpaponaxa daxitanacuanëjava.

¹⁰ Bajaraxua tayapëtaexae, tonacaevetajë itsamonae ayaicuenia tanebejiohiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovënëtsixae. Nexata bajarapamonae ata Dioso capanepaenatsi pexainaenexa matakabi apo peverevereceaevajava daxita matakabijavabelianexa. Nexata bajarapamonae Jesucristo yajavajinavanapaena pinijicotia yajava. ¹¹ Palivaisi aeconoxae jumaitsinëjitsia, pexaniajailivaisi cajena:

Itsa xaniajai Cristo yajavatëpatsibeje, nexata icatsia Cristo yajavaasaëtsibeje tsaponaponae tsane. ¹² Itsa casaë tsaponaponaetsibeje tsane Cristo pelivaisi vajajumecovënëtsijavabeje, itsamonae nacabejiohiaexanae atabeje, nexata daxitacuene Cristo cobenaevetsianatsibeje pamatakabi daxitacuene evetsiana pijanacuatatsia. Itsa vaxaitsibeje bajaraponë pelivaisi vajajumecovënëtsijavabeje nayavajunuaxainaenatsibeje jivijavabelia, nexata juya bajaraponë pijajivitonëcuenetsibeje nacayavajunuaxainaenabeje paxa Diosojavabelia. ¹³ Vaxaitsi itsajamatabëcuene Dioso vecuanajamatabëxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

14 Daxita Dioso pejumecovënëtsivi naja-
 matabënapitsiaexanaename palivaisi catsipaebatsi.
 Vajatuxanenë pitabarata tsipaebare bajarapamonae.
 Pëtsa bajarapamonae anaeya jumenota saya itsamonae
 pecuaicuajijava. Pejumeanaenotsijava itsamonae,
 apo jamatabëcueneyavenonae tsipaetsi itsajivi ata. Saya
 jamatabëcuenebijinaejitsipatsi daxita pejumetaevitsi.
 15 Pacuenia cacaëjêpa, Dioso pecaitorobicuenia
 exanaponaponare. Nexata pamatacabi naitajëtsianame Dioso
 pitabarata, cabarëyataena xaniavaetsia nejumecovënëtsixae
 pacuenia caitoroba. Ajibi tsane neyabaraaurajava
 Diosojavabelia. Tsipaji xaniavaetsia jivi tsipaebapon-
 aponame Dioso pejumelivaisi, pepo pexaniajailivaisi.
 16 Pëtsa namuxunaevetame pamonae tsipaebapona
 natsiquejemalivaisi, mapanacuapijilivaisi. Tsipaji raja
 bajarapamonae petsipaebaponaelivaisita, jivi Dioso
 pejumecovënëtsijavami copabiaexanapona pevajënaeyabelia.
 17 Bitso cajena abeje bajarapalivaisi. Pacuenia
 ayaivajënë banaexanapona pevajënëtsabanajanjetarucaejava,
 bajara pijinia jamatabëcueneitsi bajarapamonae
 petsipaebaponaelivaisi. Tsipaji pevajënaeyabelia jivi
 ayaibitsaëto jamatabëcuenebijianaponatsi bajarapalivaisi
 petsipaebaponaexaetsi. Bajarapalivaisi petsipaebaponaevi
 yajuvënënëbeje Himeneobeje Filetobeje. 18 Bajaraponëbeje
 copatabeje baja pexaniajailivaisi pejumecovënëtsijavamibeje.
 Jamatabëcuenenavëxaniababeje saya. Tsipaji jumaitsibeje
 tsabiabi: “Panepa rabaja jivi petëpaecujinae icatsia
 Dioso piasaëyaexanaponaejavaminexa,” jaibeje tsabiabi.
 Nexata bajarapacuenia Dioso pejumelivaisivecua naja-
 matabëcuene epatajërërëcaponabeje. Nexata bajaraponëbeje
 itsamonae ata Dioso pejumecovënëtsijavamivecua naja-
 matabëcueneepatajërërëcaeya exanaponabeje. 19 Pacuenia
 ibotoxaneto apo tixitsicapanepaetsi, bajara pijinia itsi
 Dioso pejumelivaisi, pexaniajailivaisi. Caelivaisi rabaja
 tsiteca. Nexata itsalivaisijavabelia apo tixitsicapanepaetsi.
 Bajarapalivaisijavata mapacuenia pejumaitsilivaisiyo
 rucaje: “Pepo petuxanenë cajena yapëtane pijajivi,”
 pejailivaisiyo ruca. Itsalivaisijavata pijinia mapacuenia
 pejumaitsilivaisiyo rucaje: “Pajivi jumaitsi: ‘Xanë raja
 Cristo pijajivitonënë,’ jai, bajarapajivi becopata pibisiacuene
 pexanaejava,” pejailivaisiyo ruca.

20 Riconë pijaboxanetota jivi pecanabaninëanënexa, xaina
 daxitacuenevirianëanë. Itsanëanë penioponaeplataninitota
 pexanaenëanë. Itsanëanë oronanitota pexanaenëanë. Pamat-
 acabi riconë topatatsi petuxanevi, ayajiamatabëcuenevi,

pexaejava abatabiaba bajaraponëanëta. Itsanëanë bevelianëanë, naejavanëanë. Itsanëanë atsananinëanë. Bajaraponëanë xaina daxitamatacabi jivi pecanabaninexa. ²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcuenevetaponapona pibisiacuene pexanaeyaniva, bajarapajivi jamatabëcueneitsi pacuenia oronanitota pexanaenëanë itsi. Baitsi baja ajamatabëcuenexuirajibi. Nexata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinexa. Timoteo, bajaraxuata xaniavaetsia benaevetaponaponame pibisiacuene nexanaeyaniva.

²² Pacuene pevëjëavi najamatabëxaina pibisiacuene pexanaenexa, bajarapacuene vecuanajetabajiravaponare. Casaëmëre tsaponaponae ëpexaniacuene nexanaponaponaejava. Diosojavabelia najamatabëcuene copatsi-ayaponaponare. Asivamëre tsaponaponae itsamonae ata. Jamatabëcuenexanepanaeya ponaponare Dioso pitabarata. Bajarapacuenia barëajamatabëcuenesaëmëre tsaponaponae, pamonaе xaniavaetsia penaevetavanapaevi pibisiacuene pexanaeyaniva, penavajëcabiabivinua Diosojavabelia peyavenonaenexatsi. ²³ Namuxujemare natsiquejemalivaisixi pecuaicuaijivi. Yapëtaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. ²⁴ Jesús cajena pijajivitonë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaebaponaejava. ²⁵ Xaniavaetsia muxujiobiaya livaisi betsipaebaponapona pamonaе Dioso apo pejitsipaevi ata. Nexata beevetaponapona bajarapamonae ata pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata bajarapamonae ata Dioso yapëtaeyaexanaenatsi Jesús pelivaisi pexaniajailivaisicuene. ²⁶ Nexata icatsia najamatabëxainaena xaniavaetsia Dioso pejumecovënëtsinexa. ²⁵ Xaniavaetsia muxujiobiaya livaisi betsipaebaponapona pamonaе Dioso apo pejitsipaevi ata. Nexata beevetaponapona bajarapamonae ata Nexata dovathi pejamatabëcuene itorobabiabijavatsivecua najamatabëcuenepënëyorotsiana Diosojavabelia.

3

*Pacuenia jivi itsane itsa baja imoxoyo pevajënae nacua pev-
ereverecaenexa yabara pelivaisi*

1 Timoteo, xaniavaetsia beyapëtaneme mapacueneje. Itsa baja imoxoyo pevajënae tsane nacua peverevere-caenexa, bajarapamatacabi bitso ayapëbeje tsane daxitacuenejavabelia. 2 Bajarapamatacabi cajena caejivi canacujitsia pexainaejava, natoasiva tsane ëbajarapamonae ayaijava pexainaenexa. Navajunupaebiana saya peyaiyataenexatsi pejumetaevitsi. Beayaijamatabëcuenevi nataena. Navajunupaebiana pexanaejava yabara peyaiyataenexatsi. Bajarapamonae pibisiacuena baracuaicuajai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamonae apo yaiyatae tsane itsamonae Diosojavabelia pevajëcabiabijava. 3 Bajarapamatacabita bajarapamonae apo asiva tsane pijamonae ata. Apo itaxutotsoniatae tsane itsamonaejavabelia ata. Najumetsënëtsiaya baracuaicuajai tsabiabi tsane itsamonae. Apo caëjëpaetsi tsane penajamatabëcuenecataitsinexa pibisiacuene pexanaejava. Anaepanabiabiana bitso pebejiobiaexanaenexa itsamonae. Itoya tsane daxita pexaniacuene pexanaevi. 4 Bajarapamonae canajetsiana penajuajinavanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijaya naëcotsiana itsamonae. Dioso apo jamatabënajinae tsane. Jaitsiana biji pebarëyajamatabëcuene saya pebarëyanexa. 5 Bajarapamonae itajara najonena Dioso pejumecovënëtsivijavabelia. Itsiata baitsi jane apo jumecovënëtsi tsane Dioso pejumelivaisi, jumetae ata.

Bajarapamonae navecuatsatsianame. 6 Bajarapamonae navecuatsatsianame tsipaji bajarapamonaeyajuvënëvi itsamonae pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitjorobabiabiana. Bajarapapetiriavi jamatabëcuenefaefaena. Daxitacuene pibisiacuene jamatabëexanabiabiana. Nexata pamatacabi bajarapapetiriavi pibisiacuene jamatabëexana, patabiabiana penajumetsënëtsilivaisi petsipaebinexatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana. 7 Bajarapapetiriavi picani jitsipaena petsipaebabiabinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia. 8 Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebiyaniivatsibeje.

Bajara pijinia pacuenia pamonae petiriavijavabelia penajumetsënëtsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyaniivatsi. Bajarapapebijivi apo caëjēpaetsi tsane penajamatabëxainaenexa xaniavaetsia. Bajarapamonae saya yamaxëitojorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. ⁹ Itsiata bajarapamonae ayaibitsaëto jivi apo pēnaponaetsi tsane. Daxitajivi cueneyapētaenatsi bajarapamonae saya jema livaisi petsipaebaponaejava. Nexata pacuenia bajayata Janespijinēmibeje Jambrespijinēmibeje daxitajivi cueneyapētanetsibeje pibisiacuene pexanaponaejavabeje, bajara pijinia pacuenia bajarapamonae ata daxitajivi cueneyapētaenatsi penajumetsënëtsilivaisi petsipaebaponaejava.

Pacuenia baja Pablo copatsijitsia Timoteo pemuxujijobijava yabara pelivaisi

¹⁰ Timoteo, xamë baja cajena yapētaneme palivaisi tsi-paebabiabajē jivibitsaëtoxanetojavabelia. Yapētanemenua baja cajena pacuenia xaniavaetsia ponaponajē. Yapētanemenua pacuene yabara Dioso tonacuenebaponaponajē. Yapētanemenua pacuenia Dioso jumecovënētaponaponajē. Yapētanemenua pacuenia itsamonaejavabelia livaisi tsipaebaponajē bajayajebi copatsinejevanē. Yapētanemenua pacuenia itsamonaē ata asivanē. Yapētanemenua pacuenia casaënē tsaponaponaē jivi livaisi tatsipaebaponaejava netoayapēbeje ata. ¹¹ Yapētanemenua pacuenia itsamonaē pibisiacuena nebaracuaicuaijai tsabiabi Jesucristo tajumecovënëtsinëxae. Yapētanemenua pacuenia nebejiobiaexanapona. Yapētanemenua pacuenia nebejiobiaexana Antioquía tomarata, Iconia tomarata ata, Listra tomarata ata. Bajarapatomaranēpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. ¹² Xaniajai cajena. Daxita pamonae najamatabëcuenecopata xaniavaetsia petojinavanapaenexa Jesucristo, bajarapamonae bejiobiaexanaponaenatsi. ¹³ Nexata pibisiajamatabëcuenevi, pamonae dovathi pejamatabëcueneta jivi yamaxëitojorobapona, orijibia bitso pevajēnaeyabelia pibisiacuene exanaponaena. Bajarapamonae dovathi pejamatabëcueneta jivi yamaxëitojorobaponaena. Nexata pijinia bajarapamonae ata bitsoyo dovathi yamaxëitojorobaponaenatsi.

¹⁴ Timoteo, itsiata baitsi jane xamë casaëmëre tsaponaponaē palivaisi baja capanepaeya jumecovënētame. Tsi-paji baja cajena xamë jamatabëcueneyapētaneme

pacuenia jamatabëcueneitsi pamonaē catsipaeba bajarapalivaisi. ¹⁵ Tsiquirinëyomëjavaveliacujinae baja cajena yapëtaneme Dioso pejumelivaisi. Bajarapalivaisi cayapëtaeyaexana pecacapanepaejavanexa Diosojavabelia nenajamatabëcuene copatsixae Jesucristojavabelia. ¹⁶ Dioso pijajivi Espiritu Santo itorobatsi peyaquinaenexa Dioso pejumelivaisi. Nexata pacuenia Espiritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonënexa. Nexata nacatoxanepana Dioso pejumelivaisi itsamonae vajanacatsipaebinexa vajayapëtaenexa pexaniajailivaisicuene. Nacatoxanepanana Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepanana Dioso pejumelivaisi vajanacajamatabëcueneitorobinexa ëDioso pejisipaecuene vajatoexanabiabinexa. Nacatoxanepanana Dioso pejumelivaisi vajanacayapëtaeyaexanaenexa xaniavaetsia vajatojinavanapaenexa Dioso. ¹⁷ Nexata Dioso pejumecovënëtsinë itsa yapëtanē Dioso pejumelivaisi, jamatabëcuene caëjëpaenatsi daxita xua pexaniacuene pexanaenexa.

4

¹ Pepo petuxanenë Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaëtsavanapaevi, petëpaevi ata. Bajaraponë itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanë jamatabëcuenereviaya caitorobatsi mapacueniaje. ² Daxitamatacabi jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovënëtsiaexanare. Itavere pibisiacuene pexanaejava. Muxujiobare piamatabëcuenesaënexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabëcuene cueranaenejevamë. ³ Bajarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojaitsiana saicayalivaisi Dioso pejumelivaisivecua ayaibitsaëto petsipaebinexatsi. Bajarapamonae pijacuata junatsiana petsipaebinexatsi palivaisi muxujitsipa. ⁴ Nexata pexaniajailivaisi petsipaebiyanivatsi, navecuaitavetsiana. Jumecovënëtsiana saya ënatsiquejomalivaisixi. ⁵ Itsiata baitsi jane xamë saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapëbeje ata, it-

samonae cabejiobiaexanae ata, casaëmëre tsaponaponae nevajënaeyabelia. Casaëmëre tsaponaponae jivi netsipae-bijava pexanialivaisi pecapanepaelivaisinexatsi Diosojavabelia.

⁶ Xanë baja netoimoxoyo tsaponae tatonacaevetsinexa tanebeyaxuabinexa. ⁷ Pacuenia pebitsojinaenë pecujinaejinaejava daxitasaëta cujinaejinaeya pata, bajarapacuenia xanë ata xaniavaetsia daxita tasaëta tonacuenebajë tajatuxanenë. Toveretaponajë baja tatonacuenebijava taneitorobicuenia. Apo copatsinë cajena tanajamatabëcuenecopatsijava Diosojavabelia. ⁸ Pacuenia penayacobijavata, pebitsojinaenë pecujinaejinaejava, barajutatsi corona pecujinaejinaematamo, bajara pijinia pacuenia xanë ata vajatuxanenë athëbëtatsia nerajutsiana pexaniacuene taneitorobicuenia tatoponaponaexae. Bajarapacueni nerajutsiana pamatacabi vajatuxanenë patsianica. Itsiata baitsi jane ëxanë apo nerajutsi tsane bajarapacueni. Daxita pamonaë ata ajamatabëcuenesaëya vajënaeevetavanapa pepatsijavatsica Jesucristo, bajarapamonae ata rajutsianatsi bajarapacueni. Vajatuxanenë itsa patsianica, naneconitsiaexanaena daxita pamonaë naneconita bajaraponëjavabelia. Vajatuxanenë itsa naneconitsiaexanaena daxita pamonaë naneconita bajaraponëjavabelia, itaxutojema apo naneconitsiaexanae tsane. Paneconivajëto caejivi canacujitsia xainapona, bajarapaneconivajëtota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaëjëpa neponaejava, bepijiayo netaeyojopaeremena. ¹⁰ Demasvënënë rabaja nexuabatabajirava. Tspiji Dioso pejumelivaisi matatoxenetsia jitsipa bitso mapanacuapijicueneje. Pona baja nexata Tesalónica tomabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia. ¹¹ Caenë Lucas xanëjavata ponapona. Jaire Marcos. Bajaraponë caëjëpatsi taneyavenonaenexa Dioso tatonacuenebijava. Nexata barërenamë tsane. ¹² Tíquico baja itorobajë Efeso tomarabelia. ¹³ Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënënë raja pijabota puenetarutajë. Tajalibronënu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

¹⁴ Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamamatamsiana tanebejiobiaexanaematamo.

15 Nayajivitaema bajaraponë. Tsipaji raja bitso itoya patatsipaebaponaelivaisi.

16 Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuaicuaijai. Daxita nexuabanuta. Nexata bajarapamonae tovajëtajë Diosojavabelia penaneconitsi-aexanaeyanivatsi tanexuabanutsijamatabëcuene. 17 Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminex-avecua. 18 Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, piniijicuene baja cajena nexanaenë,” jai tsabiabi tsanetsi.

Pacuenia Pablo Timoteo tonajumeitoroba Efeso tomara-belia pebajacobinexatsi peyapëtaevitsi yabara pelivaisi

19 Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonae ata. 20 Erasto nacopatajopa Corinto tomaratalia. Tróximo pijinia puenetajë Mileto tomaratalia. Tsipaji avitane. 21 Itsa cacuenecaëjëpa, naxanitsiayo renamë tsane emarapae pecopijopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

22 Catovajëtatsi vajatuxanenë Jesucristo pecayajavapon-aponanexa. Daxita paxamë pacatovajëtatsi Dioso pa-pecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexainaenexa matabi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matabi apo peverevereaejava. Dioso baja cajena apo penajumetsënëtsinë. ³ Nexata baja Dioso pecajëtsimatabita, bajarapalivaisi nacayapëtaeyaexana. Nexata Dioso, vajanacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. Tspaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuene xanepanaeyaexanaenexana.

Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi

⁵ Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcueneasaëyaexanaenexa Dioso pejumecovënëtsivi. Caitorobatsinua baja cajena caetomara-pijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tspaji

ponë itapetsianame ancianonënexa, Dioso pijacuene tonacuenebiana. Bajaraxuata ancianonënexa, itapetsianame ponë xaniavaetsia peponaponaenë, planeconijibinë. Beayaijamatabëcuenenë apo penataenë. Bepijia apo pianaepanaenë. Apo piapaenë piitajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonënexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiaya penajamatabëxainaenë pacuene exanaejitsia. Xaniavaetsia peponaponaenë jivi pitabarata, Dioso ata pitabarata. Pexanaponaenë daxita pacuenia Dioso pejumelivaisita itoroba jivi pexanaenexa. Pecaējēpaenëtsi penajamatabëcuenecatatsinexa pibisiacuene pexanaeyaniva. ⁹ Ancianonënexa, xanepana ponë casaë tsaponapona pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caējēpaenatsi itsamonae ata pejamatabëcuenebabatsinexa pexaniajailivaisita. Caējēpaenatsinua xaniavaetsia pejumecanaviatsinexa pamonaë jamatabëcuenenavëxaniabiaya pibisiacuena baracuaicuaijai Dioso pejumelivaisi. Nexata ancianonë xaniavaetsia itsa jumecanaviatsiana pamonaë pibisiacuena baracuaicuaijai Dioso pejumelivaisi, bajarapamonaë ata jumecovënëtsiana Dioso.

¹⁰ Bajarapitsijamatabëcuenevi itapetaponaename ancianovinexa. Tsipaji raja Cretatunaeto nacuata, Dioso pejumecovënëtsivi tuatuajëta, ayaibitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaeyajuvënëvi ayaibitsaëto judíovi. Bajarapajudíovi jumai tsabiabi: “Pamonaë apo judíovi ata Jesús pelivaisi itsa jumecovënëta, bajarapamonaë ata benaperabëcaucubiaexana,” jai tsabiabi. Bajarapajudíovi natsiquejemalivaisi saya cuaicuaijai tsabiabi. Nexata yamaxëitojorobapona Dioso pejumecovënëtsivi. ¹¹ Bajarapajudíovi bejumeitavetame. Tsipaji saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudíovi, caebopijivi canacujitsia, Dioso pejumecovënëtsivi, najamatabëcuene epatajërërëcaeyaexanapona Dioso pejumecovënëtsijavavecua. Bajarapajudíovi penajumetsënëtsilivaisi jivi tsipaebapona saya pematamotsinexatsi palata.

¹² Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsënëtsivi. Bitso

piacujirubejevi. Ayaijavanua jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijiniemi. ¹³ Xaniajai baja cajena pacuenia jumaitsi bajaronemi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonae xaniavaetsia penajamatabëcuenecopatsinexa Diosojavabelia. ¹⁴ Itavere bajarapamonae penamuxunaevetsiyaniva judíovi pijasalinaivimi pijalivaisixi. Itaverenua bajarapamonae pejumecovënëtsiyaniva pacuenia itorobaponatsi pamonaecopaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcuenexuirajibi. Bajarapajivi daxita xua tane, ëpexaniacuena sivanajamatabëxaina. Nexata itsacuenejavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuenexuira. Nexata bajarapajivi daxita xua tane, pibisiacuena sivanajamatabëxaina. Nexata daxitacuene jamatabëcuenebijianatsi. Pibisiacuene exanabiabi ata, jamatejema saya ponapona. ¹⁶ “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonae pibisiacuene exanavanapa. Nexata nayapëthane Dioso apo peyapëtaejava. Bajarapamonae itoya Dioso. Bajarapamonae apo jumecovënëtsi pacuenia Dioso itorobatsi. Nexata apo caëjëpaetsi itsacuenejavayo ata pexaniacuene pexanaenexa.

2

Pacuenia Pablo Tito itoroba pexanialivaisi jivi petsipae-baponaenexa yabara pelivaisi

¹ Tito, xamë jivi livaisi itsa tsipaebabiabianame, tsipaebabiabianame ëpexaniajailivaisi. ² Perujupebijivi muxujiobabiabianame penajamatabëcuenereviabinexa. Muxujiobabiabianame xaniavaetsia pejinavanapaenexa jivi peyaiyataenexatsi. Muxujiobabiabianame penajamatabëcuenecatatsinexa pibisiacuene pexanaeyaniva. Muxujiobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. ³ Bajara pijinia pacuenia muxujiobabiabianame perujupetiriavi ata jamatabëcuenereviaya pejinavanapaenexa Dioso pitabarata. Bajarapamonae pibisiacuena itsamonae apo bebaracuaicuaijai. Apo biaitajibi tsabiabinua. Bajarapapetiriavi itsamonae pexaniacuene betsitaexanavanapa. ⁴ Nexata perujupetiriavi

itsamonae pexaniacuene itsa tsitaexanavanapa, jamatabëcuenecujarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua.
⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcueneriviabinexa, pexaniajatabëcuene ata penajamatabëxainaenexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuene ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuenia Dioso pejumelivaisi apo baracuaicuajai tsane.

⁶ Bajara pijinia pacuenia muxujiobabiabianame pevëjëavi penajamatabëcuenecatatsinexa pibisiacuene pexanaeyaniva.
⁷ Xamë xaniavaetsia bajarapamonae ëpexaniacuene tsitaexanaponaponaename. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcueneriviaya.
⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabelia: “Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje,” jai pëtsa.
¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepaenënexa pejumelivaisi pexaniajailivaisicuene.

¹¹ Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi.
¹² Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisiacuene vajaexanaejavami. Bitso vajajitsipaejava ata mapanacuapijicuene vajaxainaenexa,

becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuene vajaexanaeyaniva. Nexata Dioso pejitsipaecuenia betoexanavanapatsi. Dioso cjunaviaya xaniavaetsia bejinavanapatsi. ¹³ Bajarapacuenia Dioso cjunaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacapanepaenexa. Bajaraponë penivenivenaectotia yajavapatsianica. ¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuene vajaexanaeoneconivecua. Nacavecuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuene Jesucristo vajatoexanaenexa.

¹⁵ Daxita bajarapacuenia muxujiobaponaename. Jamatabëcuenebabataponaename asaëya bajarapamonae. Asaëya muxujiobabiabianame pibisiacuene itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bijiaya pecataenexa.

3

Pacuenia Dioso pejumecovënëtsivi pexaniacuene bexanavanapa yabara pelivaisi

¹ Dioso pejumecovënëtsivi, Cretatunaeto nacuapijivi, namatabënapitsiaexanaename yayataeya pejumecovënëtsinexa gobierno pitorobilivaisi, pejumecovënëtsinexanua gobierno pijajivi ata. Itorobianamenua bajarapamonae pexanaenexa daxitaxua pexaniacuene. ² Muxujiobabiabianame bajarapamonae itsajivi ata pibisiacuenia pebaracuaicuaijainaniva. Muxujiobabiabianame bajarapamonae, itsamonae itsacueniabi atatsi, pecuenececanaviatsiyaniva. Muxujiobabiabianame bajarapamonae pexaniajamatabëcuenia pebarëcuaicuaijainexa daxitajivijavabelia. Itorobianamenua daxitajivivecua beveliajamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia

nacuaevetsivi ata nacaitoroba. Naxuabiaya saya jinavana-patsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonaecuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi. ⁴ Bajara vajaitsivimi ata, itsiata Dioso, vajanacacapanepaenënexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuena ata Dioso nacaasiva daxitatsi mapanacuapijivitsije. ⁵ Dioso nacacapanepaena vaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana. ⁶ Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bjarapacuenia Dioso Espiritu Santo nacatoitorobica Jesucristo vajanacacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta. ⁷ Bjaraxuata Dioso vaxaitsi yabara jumaitsi: “Bjarapamonae baja aneconijibia taniji,” jai Dioso. Tsipaji nacaitaxutotsoniatane. Nexata vaxaitsi xainaenatsi matababi apo pevereverecaejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipaebaponaenexa bjarapalivaisi. Nexata Dioso pejumecovënëtsivi ëpexaniacuene pexanaenexa pejamatabëcueneenaenexatsi. Bjarapalivaisi bitso xanepana daxitajivi pejumecovënëtsinexa. ⁹ Nexata navecuaitavetsianame saya jema natsiquejemalivaisixi itsamonaepcabarëcuaicuaijaiyaniva. Navecuaitavetsianamenua judiövi pijasalinaivimi pevënëxi yabara pecabarëcuaicuaijaiyaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsiyaniva. Bjarapacuenia pecabarëcuaicuaijajava apo xanepanae tsipae itsacuenejavayonexa ata.

¹⁰ Itsamonaepenajumetsënëtsilivaisi jivi tsipaebapona. Nexata bjarapamonae penajumetsënëtsilivaisita Dioso pejumecovënëtsivi navecuanatsanaeyaexanapona. Bjarapamonae jumeitavetsianame. Anijatobeje ata jumeitavetsianame. Nexata bjarapamonae

copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. ¹¹ Yapëtaneme rabaja mapacueenje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajaraponë naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi

¹² Catoitorobialiamsi Artemas. Itsa jume, catoitorobialiamsi Tíquico. Bajaraponë itsa patsialia xamëjavabelia, nexata xamë bepíjia renamë tsane xanëjavaberena. Nacaxitarabianatsibeje Nicápolis tomarata. Daxita emarapae raja ponapon-aenajë Nicápolis tomarata. ¹³ Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaicuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto. ¹⁴ Pamonaе vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamonaе bitso bepejiobivi. Pëtsa saya bajarapamonae jinavanapa nacuenebinejeva.

Pacuenia Pablo itsamonae jamatabënajina yabara pelivaisi

¹⁵ Daxita pamonaе yajavaponaponajë, cajamatabënajinalia. Pajamatabënajinaliajë daxita pamonaе pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

Mapabaxutoje San Pablo toyaquina Filemónjavabelia

Pacuenia Pablo mapabaxutoje toyaquina Filemónjavabelia yabara pelivaisi

¹ Xanë Pablonë, Jesucristo pijajivitonëxaenë, Jesucristo pelivaisi jivi tsipaebabiabajë. Bajaraxuata nenaneconitsiaexana. Nexata penaneconitsivi pejebabiabibota naneconitsiaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, pacatoyaquinatsibeje mapabaxutoje. ² Patoyaquinajëbejenua mapabaxutoje pamonaë Dioso pejumecovënëtsivi, nijabota penacaetuatabiavivi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënënë ata. Pacuenia xanë Dioso pijacuene tonacuenebabiabajë, bajarapacuenia Arquipo ata Dioso pijacuene tonacuenebabiaba. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo tovajëta Filemón Diosojavabelia yabara pelivaisi

⁴⁻⁵ Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënajinatsi, catovajëtabiabatsi Diosojavabelia. Nexata pexaniajamatabëcuene rajutabiabajë Diosojavabelia xamë yabara. ⁶ Pamonaë ata Diosojavabelia najamatabëcuenecopaba xamë pexanialivaisi netsipaebixae, bajarapamonaë ata tovajëtabiabajë Diosojavabelia. Tovajëtabiabajë bajarapamonaë xaniavaetsia peyapëtaenexa Dioso vajanacayavenonabiabijava Jesucristo pijajivixae. ⁷ Itsamonaë ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsipaji daxita Dioso pejumecovënëtsivi jamatabëcuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanë Cristo taneitorobinëxae, nejamatabëcuenecaëjēpa picani tacaitorobinexa xua bexaname Dioso pecasiv-abarëyanexa. Itsiata baitsi jane apo caitorobi tsanetsi. ⁹Tacaasivaxae, saya pexaniacuena cavajētatsi pexaniacuene tanetoexanaenexamē. Xanë Pablonē, perujunēnē baja. Maparucaeje naneconitsiaponaponajē penaneconitsivi pejebabiabibota Jesucristo pijajivitonëxaenē. ¹⁰ Majotaje, xanëjavata, nijajivitonē Onésimo patajopa, pecavecuanajetabajiravinē. Nexata cavajētatsi pexaniacuene tanetoexanaenexamē Onésimojavabelia. Onésimo raja betaxēnatocuenia tataenē pejumecovēnētsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovēnēta baja Jesucristo pelivaisi. Jesucristo pelivaisi Onésimo jumecovēnēta majotaje, penaneconitsivi pejebabiabibota.

¹¹ Onésimo baja cajena bajayata bedajubinēcuenia comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucaeje Jesucristo baja pelivaisi Onésimo pejumecovēnētsixae, xanēnexa xaniavaetsia netonacuenebaponapona. Nexata baja aeconoxae itsa naviatsipa xamējavabelia, xamēnexa ata xaniavaetsia catonacuenebijitsipa. ¹² Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tsipaji Onésimo bitso tasivanē. Itsa baja ponaponaena xamējavatalia, jamatabēnajinabiabianajē bitso. ¹³ Naneconitsiaya ponaponajē penaneconitsivi pejebabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanē xanëjavata peponaponaenexa. Nexata Onésimo itsa ponaponaejitsipa xanëjavata, neyavenonaponaponaejitsipa xaniavaetsia. Taneyavenonaenexa, betanetoitorobinēmēcuenia neyavenonabiabijitsipa. ¹⁴ Itsiata baitsi jane apo jitsipaenē Onésimo taneyavenonaponaponaenexa copiaya cavajētsinejevatsi. Apo jitsipaenēnua tacavajētsinexa tanetocopatsinexamē bajaraponē taneyavenonabiabinexa. Biji rajane picani jitsipajē cavajētsinejevatsi nijacuate tanetocopatsinexamē bajaraponē. ¹⁵ Onésimo picani itsa cavecuanajetabajirava, cavecuanatsata caematacabibeje. Itsiata baja icatsia aeconoxae xamējavabelia naviatsijitsialia. Nexata jane baja daxitamatacabijavabelianexa nijajivitonē tsaponapona tsane. ¹⁶ Pētsa baja taneme saya nijajivitonēcuenia. Biji rajane nijajivitonē ata, Dioso pejamatabēcueneta asivaya taename benejuyapijinēcuenia.

Xanë picani bitso asivanë Onésimo. Itsiata xanë bajaraponë tasivajava matatoxenetsia, xamë bitso asivamë tsane. Tsipaji xamë bajaraponë nijajivitonë. Nejuyapijinëna baja Dioso pejamatabëcueneta.

¹⁷ “Pablobeje rabaja patanajuaponaponanëbeje,” itsa nesivajamatabëjamë tsane, nexata Onésimo xaniavaetsia copiapitsianame, pacuenia xanë necopiapitabiabame. ¹⁸ Onésimo itsa catonaneconita, itsa camoneyabanua, nexata xanë bajaraxuamatamo neyanijobianame. ¹⁹ Peneta raja paitanebërëtoyo jumaitsi: “Xanë Pablonë. Camatamotsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. ²⁰ Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaenamë.

²¹ Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaitsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaitsi. ²² Caecuenia tavajënaeyabelia cavajëtatsi tavajënaelia nijabota tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitsinë: “Pacuenia bajarapamonae netovajëcabiaba Diosojavabelia, bajarapacuenia Dioso netocopatsiana,” jamatabëjanë taponaenexa paxamëjavabelia.

Pacuenia itsamonae jamatabënajinatsi Filemón yabara pelivaisi

²³ Epafra, ponëbeje panajuaponaponajëbeje penaneconit-sivi pejebabiabibota Jesucristo pijinia pijajivitonëxae, bajaraponë cajamatabënajinalia. ²⁴ Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanaacuenebivi Dioso pijacuene. ²⁵ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

Mapabaxutoje Dioso pijajivitonë toyaquina judíovijavabelia

Pacuenia Dioso pexënato itoroba jivijavabelia petocuaicuai-jainexatsi yabara pelivaisi

¹ Bajayatami Dioso anijatonë najamatabëcueneitajëtabiaba Diosojumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatatabëcueneitajëtabiaba profetavijavabelia matababita bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuenia Dioso roviaia barëcuaicuaijai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. ² Nexata jane baja aeconoxae, mapamatacabitaje, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaje, daxitacuene yajava. Nexata daxitacuene mapanacuateje Dioso pexënato tocopata pevetsinexa. ³ Nexata pacuenia Dioso bitso ayaijamatabëcuenenë, pexaniajamatabëcuenenënuua, bajara pijinia Dioso pexënato ata jamatabëcueneitsi. Dioso pexënato caëjëpatsi daxitacuene pexanaenexa pijumesaëta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponë pexanaecujinae mapanacuaje, bajaraponë pejamatabëcueneta abaxë tsiteca xanepana mapamatacabijavaberena ataje. Bajaraponë nacasivatëpa cruzata vajanacavecuaxuabinexa pibisiacuene vajaexanaeneconimi. Bajaraxuacujinae pona jane baja athëbëabetsia peecaenexa paxa Dioso pemuxuneneta, pecujanenia, penajuaevetsinexabeje daxitacuene.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi mata-toxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuene pevetsinexa. Dioso saya ángelevi tocopata beveliajamatabëcuenejava pevetsinexa. ⁵ Dioso baja cajena jumaitsi pexënatojavabelia mapacueniaje: Xamë raja taxënatomë. Xanë raja axanë, jai Dioso.

Dioso icatsia jumaitsi pexënato yabara mapacueniaje:
 Xanë raja bajaraponë paxanë. Xanë raja bajaraponë taxënato,
 jai Dioso pexënato yabara.

Bajarapacuenia Dioso apo jumaitsi ángelevi yabara.
 Biji rajane Dioso pexënato yabara jumaitsi. Bajaraxuata
 nayapëtane Dioso pexënato bitso ayaijamatabëcuenenëcuene
 ángelevi matatoxenetsia. ⁶ Pacujinae Dioso itorobijitsiatsica
 pepo caenë pexënato mapanacuata penaexanaenexa, Dioso
 jumaitsi pexënato yabara mapacueniaje:

Daxita tajajivi, ángelevi, pematatabacabëta tonubenaena ayai-
 jamatabëcuene perajutsinexa bajaraponëjavabelia,
 jai Dioso pexënato yabara.

⁷ Dioso icatsia jumaitsi ángelevi yabara mapacueniaje:
 Tajajivi, ángelevi, tanelivaisipaebinexa, bepijia pona pacue-
 nia jovibo. Bajarapamonae beisotocotiata verebiabi-
 ana daxita pamonae naneconita xanëjavaberena,
 jai Dioso ángelevi yabara.

⁸ Itsiata baitsi jane icatsia Dioso pexënatojavabelia jumaitsi
 mapacueniaje:

Diosomë, daxita xua evetame, daxitamatacabijavabelianexa
 evetsianame. Xua xamë evetame, xaniavaetsia
 evetabianame. ⁹ Xamë jitsipame jivi
 pexaniacuene pexanaejava. Apo jitsipaemë
 pibisiacuene pexanaejava. Bajaraxuata xanë,
 nijaDiosonë, cajamatabëcuenebarëyayaexanatsi.
 Cajamatabëcuenebarëyayaexanatsi daxita itsamonae
 matatoxenetsia, jai Dioso pexënatojavabelia.

¹⁰ Icatsia Dioso pexënatojavabelia jumaitsi mapacueniaje:
 Xamë petuxanenëmë. Itsa abaxë daxitacuene ajibi, xamë ex-
 aname mapanacuaje. Nesaëta exaname daxita itabox-
 opijicuene yajava. Xua jivi apo tae, bajaraxua ata
 exaname. ¹¹ Daxita bajaraxua, nexanaejava, verevere-
 caena. Itsiata baitsi jane xamë apo vereverecaemë
 tsane daxitamatacabijavabelianexa. Daxita xamë nex-
 anaejava, perujujava naexanaena. Pacuenia jivi pe-
 naxatatsijava, perujujava banaexana, bajara pijinia
 itsi tsane nexanaejava. ¹² Pacuenia jivi baquiona
 penaxatatsijava, bajarapacuenia itsamatacabi xamë
 quionaename itaboxo, ira yajava, pejananacua icatsia
 nexanaenexa. Itsiata baitsi jane xamë tsitecaename.
 Apo vereverecaemë tsane,
 jai Dioso pexënatojavabelia.

¹³ Dioso baja cajena caeto ata ángeleviyajuvënënëjavabelia
 apo jumaitsi mapacueniaje:

Ecare abaxë tacujuanenia daxitacuene vajanajuaeavetsinexabeje. Nijavajabitsaë abaxë copiaya vecatsivajënae jumecovënëtsiaexanaenatsi nitorobicuenianexa, apo jai Dioso ángeleviyajuvënënëjavabelia.

Biji rajane Dioso pexënatojavabelia bajarapacuenia jumaitsi. ¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonae jumecovënëta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi

¹ Dioso pexënato bitso ayaijamatabëcuenenë ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajënaeyabelia asaëyata bejumecovënëtatsi bajarapapexaniajailivaisi vajajumecovënëtsijava, itsamatacabijavabelia ata vajacopatsiyanima. ² Bajayata palivaisi Dioso najumecopata Moiséspijinëta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinëjavabelia. Xaniajai baja cajena bajarapalivaisi. Pamonae apo jumecovënëtsi bajarapalivaisi, paneconivajëto xaina, bajarapaneconivajëtota Dioso naneconitsiaexanatsi. ³ Itsa namuxujematatsi papinijicueneta Dioso nacapanepaejitsia, ¿detsa pacuenia nacacaëjëpaejitsipa vajacuata vajanacapanepaenexa? Ajibi. Vajatuxanenë Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapëtane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. ⁴ Nexata nayapëtane bajarapamonae vajanacatsipaebilivaisi pexaniajailivaisicuene. Tsipaji Jesucristo petsipaebilivaisitsi, jivi itsa tsipaebavanapa, Dioso pesaëta pinijicuenë pexanaejavanë tsitaexanapona. Bajarapamonae piavitanevi ata jamatejemayaexanapona. Petëpaevi ata icatsia asaëyaexanapona. Espíritu Santo ata jamatabëcuene caëjëpaeayaexanaponatsi, caejivi canacujitsia, bajarapamonae pexanaenexa pacuenia Dioso tojitsipatsi.

Pacuenia baja Jesucristo naexana bejivitonëcuenia yabara pelivaisi

⁵ Papejanaanacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi

pevetsinexa. Biji rajane jivi tocopatsianatsi pevetsinexa bajarapanacua. ⁶ Tsipaji Dioso pejumelivaisibaxutota, tajëvelia jumaitsi pacuenia jivi ayaijamatabëcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomë, jivi matatoxenetsia bitso ayaijamatabëcuenenë atamë, ¿detsa xuajitsia itsiata jivi sivanajamatabëxainame nevetsinexa? ⁷ Jivi itsa exaname, ángelevivecua jivi beveliajamatabëcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovënëtsixae, ayaijamatabëcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava,

jai Dioso pejumelivaisibaxutota Dioso pejumecovënëtsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxë apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonëcuenia naexana mapanacuataje, bajaraponë ata ángelevivecua beveliajamatabëcuenenë picani naexana. Dioso pitaxutotsoniataxae daxita mapanacuapijivije, Dioso pexënato itorobica penaexanaenexa mapanacuata, pesivatëpaenexa daxitajivi pijaneconi yabara. Jesús baja daxitajivi pesivatëpaexae, aeconoxae baja Dioso tocopatatsi Jesús athëbëtatsia pecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponënexa. Dioso daxitacuene pexanaecujinae, Dioso abaxë pejamatabëcueneta daxitacuene tsiteca xanepana mapamatacabijavaberena ataje. Daxita pamonaе jumecovënëtatsi, pexicuenia petaevi, Dioso jitsipa pebarëevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaе najamatabëcuenecopata Jesucristojavabelia, peyajavaponaponaenexa Dioso pijapenivenivenaenacuataatsia. ¹¹ Jesucristo baja cajena jivi tsata Dioso pijajivinexa. Nexata pamonaе Jesucristo tsata Dioso pijajivinexa, bajarapamonaе, Jesús yajava, benacaeaxapijivi baja tanetsi Dioso. Bajaraxuata Jesús, Dioso pexënato, pijajivi yabara itsa cuaicuaijai, apo ajumeura: “Tajuyapijivi,” pejaijava. ¹² Jesús pijajivi yabara pejumaitzijavanexa, Dioso pejumelivaisibaxutota tajëvelia jumaitsi mapacueniaje:

Taxa Diosomë, tajuyapijivijavabelia cavajunupaebianatsi.
 Nexata daxita bajarapamonae tabarënacætuatsijavata,
 xamënexa catonaxëanaenatsi, tanaxëanaejavata ayaija-
 matabëcuene tacarajutsinexa,
 jai Dioso pejumelivaisibaxutota Jesús paxa Diosojavabelia
 pejumaitsijavanexa.

¹³ Jesús icatsia pijajivi yabara pejumaitsijavanexa, Dioso
 pejumelivaisibaxutota tajëvelia jumaitsi mapacueniaje:

Xanë ata najamatabëcuenecopatsianajë taxa Diosojavabelia
 taneyavenonaenexa pacuenia najamatabëcuenecopaba
 tajuyapijivi,
 jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pe-
 jumelivaisibaxutota tajëvelia jumaitsi mapacueniaje:

Jajavaponaponajë baja mapamonaeje, Dioso pexi tanetoco-
 patsivi tatoevetsinexa,
 jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi.
 Bajaraxuata Jesús ata naexana mapanacuataje,
 pacuenia vaxaitsi banaexanatsi, peponaponaenexa
 mapanacuataje. Nexata Jesús penaexanaexae
 mapanacuataje pacuenia vaxaitsi banaexanatsi, caëjëpatsi
 pebeyaxuabinexatsi vajanacasivatëpaenexa. Jesús baja
 itsa nacasivatëpa, jamatabëcuenematatoxeneta dovathi.
 Nexata baja copiaruca dovathi vajanacaitorobabiabijava.
 Nexata jivi tēpae ata tsane, itsiata icatsia asaë tsane
 petëpaecujinae. ¹⁵ Bajarapacuenia Jesús vajanacasivatëpaexae,
 nacavecuaajibiaexana baja vajacujunavabiabijavami,
 vajatëpaejava. Vajatëpaejava picani cujunavabiabatsi
 daxita vajajinavanapaematacabianë. ¹⁶ Jesús baja cajena
 patsica mapanacuayabetsicaje, jivi peyavenonaenexa,
 pamonae Abrahampijinë pepo pemomoxi, bailsi Dioso
 pejumecovënëtsivi. Jesús apo patsi peyavenonaenexa
 ángelevi. ¹⁷ Bajaraxuata Jesús naexana mapanacuataje
 pacuenia vaxaitsi banaexanatsi, jivi petocuaicuai-
 jainexa Diosojavabelia. Jesús nacaitaxutotsoniatane.
 Nacatoexana pexaniacuene. Jesús nacatoexana
 pacuenia Dioso itorobatsi vajanacatoexanaenexa. Jesús
 pijacuata nacopata pebeyaxuabinexatsi, bajaraponë
 pejamatabëcueneta Dioso vajanacavecuaajibiaexanaenexa
 pibisiacuene vajaexanaeiconimi. ¹⁸ Nexata Jesús
 jamatabëcuenecaëjëpatsi peyavenonaenexa pijajivi, dovathi
 pejamatabëcuenejëtsivitsi. Tsipaji baja copiaya Jesús ata
 jamatabëcuenejëtatsi dovathi. Bejiobiaexanatsinua.

3

Pacuenia bitso Jesús ayaijamatabëcuenenë Moiséspijinë matatoxenetsia yabara pelivaisi

¹ Tajamonae, Dioso papijajivimë, Dioso pacajunata papijajivinexamë. Nexata xaniavaetsia pacanaëjère Jesucristo yabara. Bajaraponë Dioso nacatoitorobica vajanacatsipaebinexa Dioso pejumelivaisi, vajanacatocuaicuaijainexanua vajatuxanenë Diosojavabelia.

² Bajayatami Moiséspijinë daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovënëta Dioso pitorobicueniatsi.

³ Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainaenë,

ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë

Moiséspijinë matatoxenetsia. ⁴ Caebocanacujitsia tanetsi jivi pexanajebixae bajarapabonë. Itsiata baitsi jane

mapanacuata Dioso pexanaejavanëta, jivi exanejeba bonë. ⁵ Bajayata Moiséspijinë Dioso itorobatsi daxita Dioso

pijajivi petoevetsinexa xaniavaetia. Nexata Moiséspijinë Dioso pijajivi itsa toevetaponapona, tajëvelia itorobatsi

petsipaebinexa jivijavabelia pacuenia itsamatacabijavabelia Dioso jumaitsijitsia pijajivijavabelia. ⁶ Cristo Dioso

pexënatoxae, xaniavaetsia toeveta paxa Dioso pijajivi. Vaxaitsi baja Dioso vajajumecovënëtsivi, Dioso nacatane

pijajivitsi. Tsipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena

xaniavaetsia Jesucristo itsa jumecovënëtavanapaenatsi vajatëpaejavabelianexa. Jamatabëcuenebarëyaya jinavanapatsi.

Tsipaji yapëtanetsi Dioso pexaniajaicuene vajanacacapanepaenëxa.

Pacuenia Dioso pejumecovënëtsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia

ayaijamatabëcuenenë. Bajaraxuata Espíritu Santo Dioso pejumelivaisibaxutota jumaitsi mapacueniaje:

Ajena, mapamatacabitaje, itsa pajumetaneme pacuenia Dioso jumaitsi, pëtsa pajamatabëcuenetajamë

panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë.

Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi

Dioso apo jumecovënëtsi ata, bajarapamonaemi itsiata

abaxë Dioso apo verebiabitsi. ⁹ Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaibeje Dioso ayai cuene pexanaejavanë, tsitaexanapona bajarapamonae peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. ¹⁰ Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitsi: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. ¹¹ Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitsi: “Bajarapamonae apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espiritu Santo panijasalinaivimi yabara Dioso pejumelivaisibaxutota.

¹² Tajamonae, dovathivecua panajamatabëcuenevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, pe-najamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. ¹³ Nexata namataenetsia panajamatabëcueneyavenonare daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitojorobiyaniatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabiyaniva Dioso pejumecovënëtsijava. ¹⁴ Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë,

jai Dioso pejumelivaisibaxutota.

¹⁶ ¿Detsa pamonaē bajayata bajarapacuenia jumetae ata Dioso pejumaisijavatsi, itsiata apo jumecovēnētsi? Baitsi pamonaemi bajayata Moiséspijinē matacapona Egipto nacuaverena. ¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatēpa petusato nacuata. ¹⁸ ¿Detsa jane pamonaemijavabelia Dioso najumecapanepaeya jumaitsi: “Apo pajonemē tsane xanējavaberena,” jai? Bajarapacuenia Dioso najumecapanepaeya jumaitsi apo pejumecovēnētsivitsijavabelia. ¹⁹ Nexata yapētanetsi panijasalinaivimi apo pejonejava Diosojavabelia. Tsipaji apo jumecovēnētsi Dioso pitorobicueniatsi.

4

¹ Dioso baja cajena najumecapanepaeya jumaitsi vajajonenexa bajaraponē pijanacuayabetsia vajanacuer-aevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabēcuenexaniavaetavanapatsi. Tsipaji itsamonae paxamēyajuvēnēvi apo jonecapanepae tsipae Dioso pijanacuayabetsia itsa apo jumecovēnētsi Dioso. ² Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovēnētsi. ³ Nexata vaxaitsi Dioso vajajumecovēnētsivi, nacacaējēpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovēnētsivi apo jone tsane. Tsipaji bajarapitsivi yabara Dioso bajayata jumaitsi mapacueniaje:

Anaepanaenajē apo tanejumecovēnētsivijavabelia. Nexata najumecapanepaeya jumaitsinē baja: “Bajarapamonaē apo jone tsane xanējavaberena,” janē, jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponējavatatsia, itsiata apo jone. ⁴ Yapētanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponējavatatsia. Tsipaji Dioso pejumelivaisibaxutota jumaitsi mapacueniaje:

Dioso baja daxita mapanacuaje, daxitacuene yajava, itsa vereta pexanaejava, vemaxēnacueraeveta siete matacabita,

jai Dioso pejumelivaisibaxutota.

⁵ Icatsia Dioso pejumelivaisibaxutota jumaitsi Dioso apo pejumecovënëtsivi yabara mapacueniaje:

Bajarapamonae apo jone tsane xanëjavaberena, pejinavana-paenexa xanëjavata,”

jai Dioso pejumelivaisibaxutota.

⁶ Pamonae baja picani copiaya jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamonae tajajivi, jonena xanëjavaberena,” jai. Nexata pamonae jumecovënëtapona Dioso, jonena Dioso pijanacuayabetsia.

⁷ Bajarapacuenia bajayata itsamonae Dioso apo pejumecovënëtsixae, nexata icatsia Dioso caëjëta itsamat-acabi itsamonae pejonenexa. Bajarapacuenia Dioso itsa caëjëta itsamonae pejonenexa, mapamatacabitaje cajena caëjëta itsamonae pejonenexa. Bajayata Davidpijinë Dioso itorobatsi tajëvelia pevajunupaebinexa itsamonae mapamatacabitaje pejoneponaejavanexa Diosojavabelia. Nexata bajayata Davidpijinë tajëvelia itsa vajunupaeba itsamonae mapamatacabije pejonejavanexa Diosojavabelia, jumaitsi mapacueniaje:

Mapamatacabitaje itsa pajumetaneme Dioso pa-
pecajumaitsijava, pëtsa pajamatabëcuenetajamë
panejumecovënëtsinexa Dioso,

jai Davidpijinë tajëvelia.

⁸ Bajayata Josuépijinë vajasalinaivimi petusato nacuajavaverena matacapona Israel nacuajavaberena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuatatsia. Nexata panacua yabara jumaitsi: “Dioso pijajivi pejinavanapaenacuanexa, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonae pejonenexa Diosojavabelia. Tsipaji baja vajasalinaivimi bajayata baja pata Israel nacuata. ⁹ Bajaraxuata yapëtanetsi pacuenia abaxë Dioso tocopata mapamatacabitaje itsamonae ata Dioso pejumecovënëtsinexa pejonenexa Dioso pijanacuayabetsia. ¹⁰ Pajivi jonena Dioso pijanacuayabetsia peponaponenexa Diosojavatatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana. ¹¹ Daxita vaxaitsi vajajitsipaejamatabëcueneta, bejitsipatsi Dioso pijanacuayabet-

sia vajajonenexa, bajaraponëjavatatsia vajajinavanapaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamon-aemi apo becuenejëpaetsi.

¹² Dioso cajena pejumelivaisi bitso asaë. Nexata Dioso pejumelivaisi cajëjëpatsi ayaicuene pexanaenexa pijumesaëta. Dioso pejumelivaisi bitso pexiuajilivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeyaexana pacuenia pepacuene jamatabëcueneitsitsi. ¹³ Vaxaitsi Dioso vajanacaexanaevi, apo nacacaëjëpae Dioso vajavecyanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayajamatabëcuenenë, jivi petocuaicuaijainë Diosojavabelia, yabara pelivaisi

¹⁴ Jesús cajena Dioso pexënato, ayajamatabëcuenenë. Pepo sacerdotenë vajanacatocuaicuaijainë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaë tsavanapaetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijainë, nacajamatabëcueneyapëtane pacuenia vaxaitsi jamatabëcueneitsitsi. Nexata dovathi itsa nacajamatabëcuenejëta pibisiacuene vajaexanaenexa, Jesús nacajamatabëcueneyapëtane. Bajarapacuenia nacajamatabëcueneyapëtane tsipaji Jesús ata abaxë itsa ponapona mapanacuataje, jamatabëcuenejëtatsi dovathi. Itsiata baitsi jane Jesús caeto ata pibisiacuene apo exanae. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5

¹ Sacerdotevivyajuvënënë, caenë, itapetatsi sacerdotevi penamatacaitorobinënexa, daxitajivi petocuaicuaijaitisabiabinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeneconi Dioso pevecuaajibiaexanaenexatsi. ² Sacerdotenë cajëjëpatsi dovathi pejamatabëcuenejëtsinexatsi pibisiacuene pexanaenexa. Tsipaji bajaraponë ata saya jivitonë. Nexata sacerdotenë

jamatabējumaitsi jivi yabara: “Jamatabēcueneyapētaniji pamonaē abaxē apo yapētaē Dioso pejumelivaisi. Nexata pibisiacuene exana. Jamatabēcueneyapētanijinua pamonaē dovathi jamatabēcuenējētatsi pibisiacuene pexanaenexa,” jamatabējai sacerdotenē. Bajaraxuata jivi pibisiacuene itsa exana, sacerdotenē itaxutotsoniatane jivi.³ Sacerdotenē ata apo ajamatabēcuenesaē. Sacerdotenē dajubinē, pijana yajava, Diosojavabelia ofrendacuena rajutabiaba jivi pibisiacuene pexanaeneconi Dioso pevecuaajibiaexanaenexatsi. Bajarapacuenia itsa rajutabiaba, bajaraponē ata pibisiacuene pexanaeneconi Dioso pevecuaajibiaexanaenexatsi, yajavarajutabiaba.

⁴ Itsanē ata pijacuata pepo sacerdotenē apo naexanaē daxitajivi petocuaicuajainexa Diosojavabelia daxitajivi peyaiyataenexatsi. Biji rajane sacerdoteviyajuvēnēnē, caenē, Dioso itapetatsi pepo sacerdotevi penamatacaitorobinē pexanaenexatsi, pacuenia bajayata Aarónpijinē ata Dioso itapetatsi pepo sacerdotenē pexanaenexatsi. Nexata bajayata Aarónpijinē ata daxitajivi yaiyatanetsi.⁵ Bajara icatsia itsi Cristo ata. Pijacuata apo naexanaē pepo sacerdotenē, vajanacatocuaicuajainexa Diosojavabelia. Biji rajane Dioso itapetatsi Cristo pepo sacerdotenēnēnē daxitajivi peyaiyataenexatsi. Cristojavabelia copiaya Dioso jumaitsi mapacueniaje:

Xamē raja taxēnatomē. Xanē raja axanē,
jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexēnato pepo sacerdotenēnēnē. Jumaitsi mapacueniaje:

Xamē raja pepo sacerdotenēmē tsane daxitamata-cabijavabelianexa. Jivi netocuaicuajainē tsane xanējavaberena. Pacuenia bajayatami itsi Melquisedec, bajara xamē ata itsimē tsane,
jai Dioso pexēnatojavabelia.

⁷ Jesucristo abaxē itsa ponapona mapanacuataje, pinijijumeta yaitaxutonueya vajēta Diosojavabelia. Bajarapacuenia vajēta Diosojavabelia pecapanepaenexatsi petēpaejavavecua. Nexata Jesucristo xaniavaetsia Dioso jumetanetsi. Tsipaji Jesucristo jamatabējumaitsi Dioso yabara: “Jitsipajē taneexanaenexa pacuenia taxa netojitsipa,” jamatabējai.⁸ Jesucristo, Dioso pexēnato, ayaijamatabēcuenenē ata, itsiata paxa jumecovēnēta. Nexata pijacuata nacopata pebejiobiaexanaenexatsi pacuenia Dioso tojitsipatsi.⁹ Nexata Jesucristo paxa itsa jumecovēnēta, nacopata pebeyaxuabinexatsi jivi pesivatēpaenexa.

Nexata daxita pamonaē jumecovēnētavanapa pacuenia Jesucristo itorobatsi, Dioso rajutsianatsi matakabi apo peverevereceaeva. ¹⁰ Dioso baja cajena itapetatsi Jesús pepo sacerdotenēnexa, jivi petocuaicuaijainexa Diosojavabelia, pacuenia bajayata itsi Melquisedecpijinē.

Pacuenia Dioso pejumecovēnētsivi muxujibatsi pecopabianiva Dioso pejumecovēnētsijava yabara pelivaisi

¹¹ Xainajē picani ayailivaisi patacatsipaebinxaxa paneyapētaenexa pacuenia Cristo pepo sacerdotenē vajanacatocuaicuaijainexa Diosojavabelia. Itsiata baitsi jane ayapēbeje patacajumeyapētaeayaxanaenexa bajarapalivaisi. Pacuenia pejevaxi beaxayo bayapētaepona vajacujarubijava, bajara pajamatabēcueneitsimē. ¹² Bajayajebi baja picani Jesucristo pajumecovēnētame. Juya baja picani bepatsipaebaponame itsamonaējavabelia. Itsiata baitsi jane abaxē panamatavenoname icatsia papecatsipaebinxaxa bajarapalivaisi. Palivaisi picani yapēxanepana, Dioso pejumelivaisi, itsiata apo pajumeyapētaemē. Nexata abaxē panamatavenoname icatsia papecatsipaebinxaxa bajarapalivaisi. Pacuenia pejevaxinacuetoxi emitobarēmene apa, apo xae abaxē pexaejava, bajara pajamatabēcueneitsimē. Tsipaji palivaisi ayapēbejevājeto, apo pacacājēpae orijibia panejumeyapētaenexa. ¹³ Pamonaē abaxē namatavenona petsipaebinxatsi peyapēxanepanaelivaisixi, Dioso pejumelivaisi, bajarapamonaē pejamatabēcuene abaxē mito bepiapaenacuetoxi. Bajarapamonaē abaxē apo yapētae pexanaenexa pacuenia Dioso tojitsipatsi. ¹⁴ Pacuenia penaveretsivi pijacuata xane pexaejava, bajara jamatabēcueneitsi pamonaē pejamatabēcuenevitsabivi Diosojavabelia. Nexata pacuenia Dioso itorobatsi, jumecovēnēta. Najamatabēxainabiaba pexanaenexa ēpexaniacuene. Apo jitsipae pibisiacuene pexanaejava.

6

¹ Vaxaitsi Dioso vajajumecovēnētsijavaveliacujinae, vajavajēnaeyabelia jumecovēnētaponatsi vajajamatabēcuenevitsabaponaenexa Diosojavabelia, pacuenia jamatabēcuenevitsabapona bitso Dioso pejumecovēnētsivi. Bajaraxua baja vaxaitsi yapētanetsi. Nexata baja apo namatavenonaetsi icatsia vajanacatsipaebinxaxa Cristo pelivaisi, pacuenia copiaya nacatsipaeba pamatakabi ajena najamatabēcueneocopatsi Diosojavabelia. Vaxaitsi baja copabatsi pibisiacuene vajaexanabiabijava. Najamatabēcuenepeñeyorotatsi baja Diosojavabelia. Bajaraxuata apo namatavenonaetsi baja icatsia

itsajivi ata vajanacatsipaebaponaenexa bajaraxua vajayapëtaenexa. ² Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsimatana-cobebuata ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonae naneconita Diosojavabelia, naneconitsiajinavanapaejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa. ⁴ Itsamonae baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëecatsi. ⁵ Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. ⁶ Itsiata baitsi jane bajarapamonae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepeñëyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonae jamatabëcuenejëpa pamonaemi bajayata Jesucristo beyaxuabatsi cruzata. Tspaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejjava, apo xanepanae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infiernojavabelia.

Pjamatabëcuene yabara Dioso pejumecovënëtsivi casaë tsa-vanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata

copaba, bajara paxamë apo paitsimë tsane. Dioso panejume-covënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacacapanepaena.¹⁰ Dioso ëpexaniacuene exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaaponame Cristo bitso panejitsipaejava.¹¹ Pacatojitsipatsi, pacaejivimë canacujitsia, itsamonae panetsitanacueneitajëtaaponaeenexa namataenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Dioso-javabetsia.¹² Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

¹³ Bajayata Dioso pexaniajaijumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuaijaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacacuaicuaijai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuaijaijitsia, ajibi. Tsipaji baja pematatsënëa Dioso matatoxenetsia ayaijamatabëcuenenë ajibi. Bajaraxuata Dioso pexaniajaijumeta navënëcacuaicuaijaiya jumaitsi pacuenia toexanaejitsia Abrahampijinëjavabelia.¹⁴ Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabiabianatsi. Xainaenamenua ayaibitsaëto nemomoxi,” jai Dioso pexaniajaijumeta.¹⁵ Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsitsi.¹⁶ Itsamonae Dioso pevënë bacacuaicuaijai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata

pejumaitsijava bajarapamonaejavabelia: “Apo pacajumex-
 aniaataetsi,” pejaijava. Tsipaji Dioso pevënë cacuaicuajai
 pexaniajaijumeta. ¹⁷ Dioso baja cajena pexaniajaijumeta
 najumecapanepaeya jumaitsi jivi peyavenonaenexa.
 Dioso najamatabëcueneitajëta jivijavabelia xaniajai
 peyavenonaejava jivi pejumeaebivanivatsi, “Jemajai raja.
 Dioso epatua itsajamatabëcuene xainaena,” pejaiyanivatsi.
 Bajaraxuata nexata Dioso tajëvelia navënëcacuaicuajaiya
 jumaitsi Abrahampijinëjavabelia mapacueniaje: “Xanë
 Diosonëxaenë, najumecapanepaeya cajumaitsitsi pepacuene
 tacatoexanaenexa pacuenia najumecapanepaeya cajumait-
 sitsi,” jai Dioso Abrahampijinëjavabelia. ¹⁸ Bajarapacuenia
 Dioso najumecapanepaeya pejumaitsicujinae, acuenebi
 epatua itsajamatabëcuene pexinaejava. Tsipaji baja
 Dioso acuenebi penajumetsënëtsijava. Nexata vaxaitsi
 Dioso vajanacapanepaejavanexa vajajumecovënëtsivi,
 bejamatabëjematsi. Apo bejamatabëcuenebëjaitsi. Tsipaji baja
 yapëtanetsi Dioso pexaniajaijava vajanacapanepaenexa,
 pacuenia baja bajayata tajëvelia najumecapanepaeya
 jumaitsi. ¹⁹ Cristo vajanacasivatëpaenë, athëbëtsia
 peecaexae Dioso pemuxuneneta, nexata baja yapëtanetsi
 vajanacapanepaejavanexa Diosojavabelia. Nexata
 ajamatabëcuenesaëtsi tsavanapae Dioso vajajume-
 covënëtsijava. ²⁰ Jesús athëbëabetsia vajavajënaeyabetsia
 pona vajanacatoexanarutsinexatsia namuto. Nexata
 jane baja Jesús athëbëtsia pepo sacerdotenë Dioso
 exanatsi, jivi petocuaicuajainexa Diosojavabelia
 daxitamatacabijavabelianexa. Nexata Jesús pepo
 sacerdotenë pacuenia bajayatami itsi Melquisedecpijinë.

7

*Pacuenia Jesús pepo sacerdotenë pacuenia bajayatami itsi
 Melquisedecpijinë yabara pelivaisi*

¹ Bajayatami Melquisedecpijinë ponapona. Salem-
 tomara pevetsinëmi. Bajaraponëmi sacerdotenë, jivi
 petocuaicuajainexa, athëbëtsia peecaenë, Diosojavabelia.
 Nexata bajarapamatacabi Abrahampijinë vajabitsaë
 exana itsanacuanë pevetsivijavabelia. Itsa baja
 Abrahampijinë verebiaba pijavajabitsaë, naviarena.
 Nexata penaviatsinërena caxitajarabatsi Melquisedecpijinë.
 Nexata Melquisedecpijinë jumaitsi Abrahampijinëjavabelia:
 “Catovajëtsianatsi Diosojavabelia pecayavenonabiabinexa,”
 jai. ² Abrahampijinë pijavajabitsaë peverebiavivimi pecobe-
 covë penotsijavanë, caponapona. Nexata bajaraxua diez
 xuabejeyajuvënëjavanë tsaponae, Abrahampijinë caejavayo

ofrendacuenia rajutapona Melquisedecpijinējavabelia. “Melquisedec,” ita jai hebreojumeta, mapajumetaje pejumaitsijume: “Dioso pitabarata aneconijibia xaniavaetsia jivi pevetsinē,” pejaijume. “Salemtomara pevetsinē,” ita jai hebreojumeta, mapajumetaje pejumaitsijume: “Jamatabēcuenexanepanaeya tomara pevetsinē,” pejaijume. Nexata Melquisedecpijinē Salemtomara pevetsinēmi. ³ Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaiti. Penaexanaejava ata yabara, petēpaejava ata yabara, apo jumaiti. Nexata pacuenia Dioso pexēnato, Jesucristo, jivi petocuaicuaijinē Diosojavabelia daxitamatacabijavabelianexa, bajara pijinia itsi Melquisedecpijinē. Melquisedecpijinē jivi petocuaicuaijinē Diosojavabelia daxitamatacabijavabelianexa.

⁴ Nexata aeconoxae pacanaējēre mapacuenije. Melquisedecpijinē bitso ayaijamatabēcuenenē vajasalinainēmi Abrahampijinē matatoxenetsia. Bajaraxuata Abrahampijinē ayaijamatabēcuenenēmi ata, ofrenda rajuta Melquisedecpijinējavabelia. Pamatacabi Abrahampijinē pijavajabitsaē verebiaba, pecobecovē nota. Nexata Abrahampijinē ita caxitajaraba Melquisedecpijinē, diez xuabejeyajuvēnjavanē tsaponae, caejavayo rajutapona Melquisedecpijinējavabelia. ⁵ Bajayatami Dioso najumecopata Moiséspijinēta. Bajarapalivaisi juya itorobatsi Levípijinēmi pexi, pemomoxi ata, sacerdotevi penaexanaponaevinexa, jivi petocuaicuaijaivinexa Diosojavabelia. Nexata Levípijinē pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexainaeyajuvēnjava. Baitsi tocopatatsi pematomoyanijobinexa diez xuabejeyajuvēnjavanē tsaponae, caejavayo pevecuapitaponaenexa. Nacaevirivi ata, daxita bajarapamonae Abrahampijinē epemomoxi ata, itsiata Dioso tocopatatsi nacaevirivi ata pexainaeyajuvēnjavanē perajutsinexatsi. ⁶ Melquisedecpijinē picani Levípijinē apo pemomo. Itsiata Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnjavanē tsaponae, caejavayo rajutapona. Nexata Melquisedecpijinē jumaiti Abrahampijinējavabelia: “Catovajētsianatsi Diosojavabelia pecayavenonabiabinexa,” jai Abrahampijinējavabelia, ponējavabelia Dioso najumecapanepaeya jumaiti peyavenonaenexa. ⁷ Pajivi jumaiti: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenējivi Dioso pitabarata pajiviyo tovajētsijitsia matatoxenetsia. Daxita baja cajena

yapëtanetsi bajarapacuene. ⁸ Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvënëjavanë, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanë, petëpaevinexa. Tsipaji saya jivi. Itsiata baitsi jane Dioso pejumelivaisibaxutota Melquisedecpijinë yabara jumaitsi pacueniaje: “Melquisedec abaxë mapamatacabita ataje asaë tsaponaponae. Nexata tsiteca jivi tocuaicuajai tsabiabi Diosojavabelia,” jai. ⁹⁻¹⁰ Bajayatami Abrahampijinë ofrenda rajuta Melquisedecpijinëjavabelia. Bajarapamatacabi abaxë Levípijinë apo naexanae. Pexi ata abaxë ajibi. Pemomoxi ata abaxë ajibi, pamonae jane baja mapamatacabitaje sacerdotevi naexana jivi petocuaicuajainexa Diosojavabelia. Itsiata paofrenda Abrahampijinë rajuta Melquisedecpijinëjavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinë daxitanexa yaiyataeya ofrenda rajuta Melquisedecpijinëjavabelia.

¹¹ Pamatacabi Aarónpijinë, pexi ata, sacerdotevi baja tsavanapae, bajarapamatacabi judíovi pejumecovënëtsinexa Dioso Moiséspijinëta najumecopata. Pamonae Aarónpijinë pexi, Levípijinë baja cajena pemomoxi. Judíovi itsa jumecovënëtsipa Dioso Moiséspijinëta penajumecopatsilivaisi Dioso aneonijibia petaenexatsi, nexata Dioso apo itorobitsica tsipae Cristo, ponë beMelquisedecjamatabëcuenenë, jivi petocuaicuajainexa Diosojavabelia daxitamatacabijavabelianexa. Dioso Moiséspijinëta penajumecopatsilivaisi pejamatabëcueneta Dioso aneonijibia judíovi itsa taejitsipa, nexata icatsia Dioso saya mataropotsia pepo sacerdotenë exanaponaejitsipa Aarónpijinë pemomoxi. ¹² Nexata Cristo sacerdotenë itsa exanatsi, jivi petocuaicuajainexa Diosojavabelia daxitamatacabijavabelianexa, yajavacopatatsi pijinia itsalivaisi Dioso Moiséspijinëta penajumecopatsilivaisivecua. ¹³ Vajatuxanenë, ponë Dioso pejumelivaisibaxutota tajëvelia vajunupaebatsi, bajaraponë Levípijinë apo pemomo. Biji rajane saicayavirianë. Bajaraponë pijaviriavi bajayata caenë ata sacerdotenë apo naexanae. ¹⁴ Vajatuxanenë itsa naexana mapanacuataje, daxitajivi baja cajena yapëtane penaexanaejava mapanacuataje. Vajatuxanenë naexana Judápijinë pemomoyota. Daxitajivi yapëtanenua pacuenia bajayata Moiséspijinë tajëvelia vajunupaeba pamonae sacerdotevi naexanaponaejitsia. “Judápijinë pemomoxi ata sacerdotevi naexanaena,” apo jai picani.

¹⁵ Bajaraxuata vaxaitsi xaniavaetsia jane baja yapëtanetsi

pepatsijava itsaviriasacerdotenē. Tsi paji Cristo, ponē jane baja pepo sacerdotenē jivi petocuaicuajainexa Diosojavabelia daxitamatacabijavabelianexa, bajaraponē beMelquisedecjamatabēcuenenē. ¹⁶ Levípijinē pemomoxi sacerdotevi exanaponatsi. Tsi paji bajayata Moiséspijinē tocopata bajarapamonaeyajuvēnēvi sacerdotevi pexanaenexatsi. Itsiata baitsi jane Cristo, pepo sacerdotenē itsa exanatsi jivi petocuaicuajainexa Diosojavabelia daxitamatacabijavabelianexa, Levípijinē pemomoxae, pepo sacerdotenē apo exanaetsi. Jume baja cajena. Biji rajane Cristo pepo sacerdotenē exanatsi icatsia piasaēxae petēpaecujinae. ¹⁷ Dioso baja cajena tajēvelia pexēnatojavabelia pejumaisijava, Dioso pejumelivaisibaxutota jumaitsi mapacueniaje:

Xamē raja pepo sacerdotenēmē tsane daxitamatacabijavabelianexa. Pacuenia Melquisedec jamatabēcuenetsi, bajarajamatabēcuenetsimē tsane, jai baja cajena tajēvelia Dioso pejumelivaisibaxutota Dioso pejumaisijava pexēnatojavabelia.

¹⁸⁻¹⁹ Nexata baja palivaisimi copiaya Dioso Moiséspijinēta najumecopata jivi pejumecovēnētsinexa, Dioso baja copiarucaeyaexana. Tsi paji bajarapalivaisimi apo caējēpaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tsi paji baja Cristo vajanacasivatēpaexae, bajaraponē pejamatabēcueneta Dioso baja aneconijibia nacatane. Nexata nacatocopata vajajamatabēcuenesaya vajaimoxoyotsinexa Dioso.

²⁰ Dioso baja cajena tajēvelia najumecapanepaeya jumaitsi Cristo pepo sacerdotenē pexanaenexatsi, jivi petocuaicuajainexa Diosojavabelia daxitamatacabijavabelianexa. ²¹ Pamonaemi bajayata copiaya Cristo pevajēnaeya sacerdotevi exanaponatsi, bajarapamonaemi yabara Dioso bajarapacuenia apo jumaitsi. Itsiata baitsi jane tajēvelia Dioso najumecapanepaeya jumaitsi Cristo pepo sacerdotenē pexanaenexatsi. Bajaraxuata tajēvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya itsa jumaitsi, itsajamatabēcuenes icatsia epatua apo xainae. Bajaraxuata tajēvelia Dioso pexēnatojavabelia pejumaisijava, Dioso pejumelivaisibaxutota jumaitsi mapacueniaje: “Xamē baja cajena pepo sacerdotenēmē tsane daxitamatacabijavabelianexa. Pacuenia Melquisedec jamatabēcuenetsi, bajarajamatabēcuenetsimē tsane,”

jai Dioso pejumelivaisibaxutota tajëvelia Dioso pejumaitsi-
java pexënatojavabelia.

²² Bajarapacuenia tajëvelia Dioso najumecapanepaeya pe-
jumaitsixae Cristo yabara, nexata yapëtanetsi xua Cristo
nacatoexana, bitso pexaniacuene. Bajaraxua bitso pexani-
acuene, palivaisimi copiaya Dioso Moiséspijinëta najumeco-
pata matatoxenetsia. ²³ Copiaya pamonaemi sacerdotevi ex-
anaponatsi, ayaibitsaëto jonepona sacerdotevinexa. Tsipaji
tëpapona. Nexata apo caëjëpaetsi pevetsinexa daxitamatacabi-
javabelianexa. ²⁴ Itsiata baitsi jane Jesús baja icatsia apo
tëpae tsane. Nexata pepo sacerdotenë tsane daxitamatacabi-
javabelianexa. Nexata baja icatsia itsanë pepo sacerdotenë
apo exanaetsi tsane. ²⁵ Nexata pajivi najamatabëcuenecopata
Diosojavabelia pibisiacuene pexanaeneconi Dioso pevecuaa-
jibiaexanaenexatsi, daxitamatacabijavabelianexa Dioso ve-
cuaajibiaexanaenatsi. Bajarapacuenia daxitamatacabijav-
abelianexa pibisiacuene pexanaeneconi vecuaajibiaexanae-
natsi Jesús pejamatabëcueneta. Tsipaji Jesús daxitamatacabi-
javabelianexa asaë tsaponaponae tsane jivi petocuaicuai-
jainexa Diosojavabelia.

²⁶ Pacuenia baja Jesús pepo sacerdotenë, bajarapitsinë
vaxaitsi vajanamatavenonaexae, Jesús baja patsica. Jesús
cajena Dioso pejamatabëcuenejëpaenë, pianeconijibinë
Diosojavabelia. Pibisiacuene pexanaevi ata, apo ja-
matabëcuenebijianaetsi. Tocopatatsi peecaenexa athëbëtatsia,
paxa Dioso pemuxuneneta, penajuae vetsinexabeje
daxitacuene. ²⁷ Pacuenia itsamonae pepo sacerdotevi
jamatabëcueneitsi, bajara Jesús apo jamatabëcueneitsi.
Itsamonae pepo sacerdotevi, daxitamatacabi dajubi
beyabiaba ofrendacuenia bajarapavi perajutsinexa
Diosojavabelia, perajutsinexa pijana ata. Bajarapacuenia
sacerdotevi exanabiaba, pibisiacuene pexanaeneconi
Dioso pevecuaajibiaexanaenexatsi, itsamonae ata
pibisiacuene pexanaeneconi Dioso pevecuaajibiaex-
anaenexatsi. Bajarapacuenia Jesús apo exanae. Jesús
saya nacopata pebeyaxuabinexatsi ofrendacuenia
penarajutsinexa Diosojavabelia. Bajarapacuenia
Jesús itsa nacopata pebeyaxuabinexatsi, caecuenia
matamota daxitajivi pibisiacuene pexanaeneconimi
daxitamatacabijavabelianexa. ²⁸ Bajayata palivaisi Dioso
Moiséspijinëta najumecopata, bajarapalivaisi Dioso tocopata
pepo sacerdotevi penaexanaenexa mapanacuapijivi.
Bajarapamonae apo caëjëpae atatsi pejinavanapaenexa
pibisiacuene exanaenejeva, itsiata Dioso tocopata
pepo sacerdotevi penaexanaenexa. Itsiata baitsi jane

bjaraxuacujinae Dioso najumecapanepaeya jumaitsi Dioso pexênato pepo sacerdotenë penaexanaenexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuaijainë Diosojavabelia yabara pelivaisi

¹ Xua yabara baja pacatsipaebatsi, maitsiye. Aeconoxae baja xainatsi Jesús, pepo sacerdotenë vajanacatocuaicuaijainexa Diosojavabelia. Bajaraponë ecaeyaexanatsi athëbëtatsia, Dioso ayaijamatabëcuenenë pemuxuneneta, pecujuanenia, penajuaeavetsinexabeje daxitacuene.

² Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenë penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonaepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bjaraxuata Jesucristo ata, vajanacatocuaicuaijainë Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebeyaxuabinexatsi ofrendacuenia penarajutsinexa Diosojavabelia.

⁴ Itsa abaxë Jesucristo mapamatacabi ata ponaponaejitsipa mapanacuataje, apo sacerdotenë tsipae. Jesucristo apo exanae tsipae pacuenia itsamonae sacerdotevi exanabiaba. Bjarapamonae saya dajubi beyabiaba ofrendacuenia bajarapavi perajutsinexa Diosojavabelia Moiséspijinë pitorobicueniatsi. ⁵ Xua Jesucristo athëbëtatsia exanaponapona, bjaraxua saya sacerdotevi cuenecataeya exanavanapa templobota mapanacuataje. Bjaraxua sacerdotevi cuenecataeya pexanavanapaenexa, Dioso tocopatatsi. Yapëtanetsi baja cajena xua Jesucristo athëbëtatsia exana, bjaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bjaraxuata mapamatacabijavaberena ataje sacerdotevi templobota exanapona pacuenia Moiséspijinë Dioso tsitajëtatsi petsutojumata. ⁶ Itsiata baitsi jane Cristo, ponë pepo sacerdotenë, xua Dioso athëbëtatsia tocopatatsi petonacuenebinexa, bjaraxua bitso ayaijamatabëcuene.

Xua bajayata sacerdotevi Dioso tonacuenebavanapa mapanacuataje, beveliamatabëcuenejava saya. Tsipaji Cristo jivi tocuaicuaijai tsane Diosojavabelia daxitamatacabi-javabelianexa. Cristo nacayavenonabiabiana. Pepacuene baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaitsi vajanacarajutsinexa, baitsi matacabi apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. ⁸ Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaitsijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matacabi apo peverevereaejava. Bajarapacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata. ⁹ Bajarapamonae pijasalinaivimi bajayata matakarenanë Egipto nacuaverena. Bajarapamatacabi baja najumecapanepaeya jumaitsinë pacuenia bajarapamonaemi yavenonaejitsianë picani. Itsiata baitsi jane bajarapamonaemi apo nejumecovënëtsi. Bajaraxuata copatajë baja bajarapamonaemi tayavenonaejava,

jai Dioso pejumelivaisibaxutota tajëvelia Dioso pejumaitsijava Israelpijinë pemomoxi yabara.

¹⁰ Dioso icatsia tajëvelia pejumaitsijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëëthëtota yapëtaeyaexanaponaenajë pacuenia netojinavanapaejitsia. Nexata bajarapamonae pejamatabëëthëttojavavetsina jitsipaena tanejumecovënëtsinexa. Nexata bajarapamonae pijaDiosonënë tsane. Bajarapamonae pijinia tajajivi tsane. ¹¹ Nexata bajarapamatacabi itsajivi ata apo

jumai tsane itsanëjavabelia, pijamonaenëjavabelia ata: “Xamë ata beyapëtaneme Dioso,” apo jai tsane. Tsipaji baja daxitajivi neyapëtaena. Neyapëtaena beveliajamatabëcuenevi. Neyapëtaena ayaijamatabëcuenevi ata. Daxita bajarapamonae neyapëtaena. ¹² Xanë baja daxita tajajivi pibisiacuene pexanaenecomimi, vecuaajibiaexanaenajë. Apo najamatabënapitsinë tsane bajarapapibisiacuenemi, jai Dioso pejumelivaisibaxutota bajayata tajëvelia Dioso pejumaitsijava.

¹³ Bajarapacuenia Dioso itsamatacabijavabelia icatsia najumecapanepaeya pejumaitsijavanexa yabara jumaitsi. Tsipaji baja ajumematamobi palivaisimi copiaya Dioso najumecapanepaeya jumaitsi judíovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

9

Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtatsia ata peecaabo, yabara pelivaisi

¹ Dioso copiaya najumecopata Moiséspijinëta. Bajarapalivaisita itoroba Israel pemomoxi pexanaenexa Dioso pijacarpaboxaneto, bajarapabota Diosojavabelia penavajëcabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota.

² Itsa baja vereteta carpaboxaneto Diosojavabelia penavajëcabiabibonexa, bajarapabo ënëtuatuajë yatuucutsiaya epatajërëtsiarena rurena ayaipapaëbërëpana. Bajarpaënëyatuucutsijava jumavereca, paënëtuatuajë pevënë Lugar Santo. Bajarajota nuta candelerovënëjava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia.

³ Bajara papapaëbërëpanacujinaereca, paënëtuatuajë, pevënë pijinia Lugar Santísimo, itsajota baitsi Dioso peponaponaenexa yatuucuta. ⁴ Bajarapaënëyatuucutsijava tuatuajëta, nuca orota pexanaejava, altarvënëjava. Bajara paaltarjumata jeba petuxujuvijavanë, inciensovënëjavanë, petajuitsinexa. Bajarapaënëyatuucutsijava tuatuajëta boca baula, orota pexanaebaula. Bajarapabaula ënëtuatuajëta nuca orota pexanaebotellabë. Bajarapabotellabëta yanuca pexaejava, manávënëjava. Bajarapabaula ënëtuatuajëta bocanua Aarónpijinëmi pijanaeboyoy.

Bajarapanaeboyoy bajayata Aarónpijinë: “Baxujuvare,” itsa jai, baxujuvatababiaba. Bajarapabaula ënëtuatuajëta

bocabejenua ibopanabeje. Bajarapaibopanatabeje Dioso jivi pitavetsilivaisi najumeyaquinabuata. ⁵ Bajarapabaula matatsënëta anijanëbeje pecorofeto pexainaenëbeje nucabeje. Bajaraponëbeje beángelnëbeje, jumapecataeya pexanaenëtsibeje. Bajaraponëbeje nutatsibeje Dioso pijapenivenivenaecotia pitajëtsinexabeje. Bajaraponëbeje pecorofetota baula matatsënëcaranatanucabeje. Nexata pepo sacerdotenë caevai canacujitsia bajarapabaula jumatsicababiaba dajubinë pijanata. Pepo sacerdotenë bajarabaula itsa jumatsicababiaba, jamatabëjumai tsabiabitsi: “Dioso nacaitaxutotsoniataena. Nacavecuaajibiaexanaena pibisiacuene vajaexanaeneconimi,” jamatabëjai tsabiabi pepo sacerdotenë dajubinë pijanata baulajuma petsicababiabijavata. Itsiata aeconoxae apo necuenecaëjëpae patacatoyaquinaponaenexa pajamatabëcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajëcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pënëyatuucutsijava penamataxainaeënëtuatuajëtsina, sacerdotevi jinavana-pabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. ⁷ Nexata bajarapabo pënëyatuucutsijava penamataxainaeënëtuatuajëtsina cujinaereca, paënëtuatuajëjavabereca, sacerdotevi pepo penamatacaitorobinë caenë joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinë jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeneconi Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapëtae, Dioso pevecuaajibiaexanaenexatsi. ⁸ Espíritu Santo pejamatabëcueneta nacayapëtaeyaexana mapacueneye. Pamatacabi abaxë Dioso pijacarpaboxaneto piapiapapaëbërëpanaxanetota ënëtuatuajë yatuucutarurena, sacerdotevi Dioso pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajëtsinexa Diosojavabelia. Bajaraxua vajayapëtaenexa Espíritu Santo pejamatabëcueneta nacayapëtaeyaexana. ⁹ Bajaraxua bajayata sacerdotevi exana comparacióncuenia ajena mapamatacabijavaberenaje

vajanacayapëtaeyaexanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapëtanetsi mapacueneye. Bajarapacuenia jivi exanae ata, nacueratabiaba. Tsipaji jivi dajubinëvi ofrendacuenia rajutabiabi ata Diosojavabelia, tsiteca pijaperujujamatabëcuene xainavanapa. ¹⁰ Paperujulivaisimi bajayata Dioso Moiséspijinëta najumecopata, jivi apo itorobitsi penajamatabëcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabëquiatsinexanua. Bajarapacuenia itorobatsi bajarapalivaisimi pejumecovënëtavanapaenexa abaxë Cristo pepatsivajënaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaexanaenexa pejanalivaisita.

¹¹ Capanepaeya baja pata Cristo, pepo sacerdotenë. Bajaraponë vajanacatocuaicuaijainënexa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athëbëabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo itsa junua bajarapabotatsia, caecueneta junua bajarapaboënëalia, Lugar Santísimojavabelia, itsajota baitsi Dioso peponaponaenexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacacapanepaenexa. ¹³ Xaniajai. Bajayata Israelpijinë pemomoxi itsa naneconita Diosojavabelia, abaxë apo tocopatabiabitsi penajonenexa Diosojavabelia penavajëcabiabibojavabelia. Nexata Israelpijinë pemomoxi copiaya matatsicababiabatsi chivojanata, torojanata ata. Becerrami altarvënëjavajumata petajuitsiipumana ata tsimataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajëcabiabibojavabelia. ¹⁴ Bajarapacuenia bajayata Dioso tocopatatsi dajubinë pijana pejamatabëcueneta Israelpijinë pemomoxi pejonenexa Diosojavabelia penavajëcabiabibojavabelia. Dajubinë pijana matatoxenetsia Cristo bitso caëjëpatsi vajanacayavenonaenexa Dioso pexënatoxae. Espiritu Santo, apo pevereverecaenë daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatëpaenexa. Cristo cajena caeto ata pibisiacuene apo exanae. Nexata

Cristo pijanata nacavecuaajibiaexana baja pibisiacuene vajaexanaeneconimi. Bajarapaneconi yabara picani Diosovecua vajanaxuabiviminexa. Bajarapacuenia Cristo vajanacatoexanaexae, tonacuenebavanapatsi piasaëtsaponaponaeñe Dioso.

¹⁵ Nexata Jesucristo pejamatabëcueneta nacavecuaajibi-aexana baja vajaneconimi. Nexata baja aneconijibia Dioso nacatane. Bjaraxuata daxita pamonaë Dioso junatatsi, rajutsianatsi matababi apo pevereverecaejava, pacuenia baja Dioso najumecapanepaeya jumaitsi perajutsinexatsi. Cristo ita nacasivatëpa, nacaneconimatamota baja. Nexata nacavecuaajibiaexana daxita paneconimi xainatsi ita abaxë jumecovënëtavanapatsi copiaya palivaisimi Dioso Moiséspijinëta najumecopata. ¹⁶⁻¹⁷ Itsajivi petëpaevajënaë, yaquina pecobcovë yabara. Bjarapajivi ita tëpa, pijamonae pevënamuto penatsicobetsanaenexa. Nexata yaquina pacuenia caejivi canacujitsia pitaponaëjitsia. Itsiata baitsi jane abaxë ita asaë tsaponaponae pecobcovë pexinaejivi, ajumematamobi abaxë bajarapalivaisi. Matapania baja ita tëpa pecobcovë pexinaejivi, jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petëpaejivi yaquina petëpaevajënaeya pecobcovë yabara. ¹⁸ Bajara pijinia itsi paperujulivaisimi bajayata Dioso Moiséspijinëta najumecopata Israelpijinë pemomoxi pejumecovënëtsinexa. Jumenamatamotapona Israelpijinë pemomoxi dajubi pebeyabiabixae ofrendacuenia bajarapavi perajutsinexa Diosojavabelia. ¹⁹ Bajayata Moiséspijinë copiaya tsipaeba daxitajivijavabelia daxitajivi bajarapalivaisi pejumecovënëtavanapaenexa. Nexata Moiséspijinë pita hisopovënë naeboxi pepacëtetsicunuyo petsobialanamaëtota. Bjaraxuacujinaë bajarapacunuyo Moiséspijinë jabuta merata, becerrojanata, chivojanatanua, peyajavamatajërëbijanarata. Nexata Moiséspijinë tsmatatsicaba pabaxutota itanerubena palivaisi Dioso najumecopata Moiséspijinëta. Bjaraxuacujinaë Moiséspijinë daxitajivi tsmatatsicabapona. ²⁰ Nexata Moiséspijinë jumaitsi jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovënëtavanapaename. Nexata pacuenia Dioso najumecapanepaeya pacajumaitsi, pacatocopiapatsiana,” jai Moiséspijinë jivijavabelia. ²¹⁻²² Bjaraxuacujinaë icatsia Moiséspijinë tsicabanajanaejaeba Diosojavabelia penavajëcabiabibo ënëtuatujë. Xuanë bajarapabo ënëtuatujëta xaina pecanacuenebinexa Dioso pijacuene,

daxita bajaraxuanë yajavatsicabanajaenajaeba. Bajarapacuenia pexanaenexa itoroba baja cajena Dioso Moiséspijinëta penajumecopatsilivaisimita. Itoroba dajubinë pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanë, jivi ata Dioso aneconijibia petaenexa. Tsipaji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinë itsa beyaxuaba, pijanata itsa matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi

²³ Diosojavabelia penavajëcabiabibota, xuabeje xaina pecanacuenebinexa Dioso pijacuene, dajubinë pijanata bajayata Moiséspijinë tsicabanajaenajaeba. Bajarapacuenia Moiséspijinë itsa exana, tajëvelia comparacióncuenia itajëtapona jivi peyapëtaenexa itsamatacabijavabelia Cristo pesivatëpaejavanexa mapanacuapijivi. Cristo dajubinë pijanata apo tsicabanajaenajaebi Diosojavabelia penavajëcabiabibo ënëtuatuajë. Biji rajane Cristo nacopata pebeyaxuabinexatsi. Nexata Cristo pijana pejamatabëcueneta, mapanacuapijivi pibisiacuene pexanaeneconi, Dioso baja vecuaajibiaexanatsi. Cristo cajena bitso jananamamatamota Dioso pitabarata, dajubinë pejana matatoxenetsia. ²⁴ Cristo baja cajena vajanacasivatëpaecujinae, athëbëabetsia pona. Aeconoxae baja Cristo athëbëtatsia eca, paxa Dioso pemuxuneneta, vajanacatocuaicuajitsecaenexa Diosojavabelia. Nexata Dioso pepo pijabotatsia Cristo nacatocuaicuajit tsaponae. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajëcabiabibonexa, bajarapabo saya cuenecataeya exana pacuenia athëbëtatsia Dioso pepo pijabo itsi. ²⁵ Sacerdotevi pepo penamatacaitorobinë, bajaraponë judionë. Caevai canacujitsia cajoneyabiaba dajubinë pijana Lugar Santísimovënëjavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatëpaenexa, icatsia baja pematatsënëa apo nacopatsi petëpaenexa. ²⁶ Dioso mapanacuaaje pexanaejavaveliacujinae, Dioso itsa tocopatsipa Cristo jivi pesivatëpaponae exana caevai canacujitsia, nexata Cristo bitso anijatonë jivi pijaneconi yabara sivatëpaponaejitsipa. Itsiata baitsi jane Cristo caeto petëpaecujinae, icatsia baja apo tēpae.

Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatëpaenexa, pibisiacuene vajaexanaeneconimi vajanacavecuajibiaexanaenexa. ²⁷ Bajara pijinia pacuenia vaxaitsi ata caeto tēpaponanatsi. Bajaraxuacujinae jane baja Dioso naneconitsiaexanaponaena daxita pamonaē pijaneconi pexainaēvi. ²⁸ Bajara pijinia pacuenia Cristo caeto nacopata pebeyaxuabinexatsi vajanacasivatëpaenexa, ayaibitsaētōxanetotsi pibisiacuene vajaexanaeneconi vajanacavecuajibiaexanaenexa. Bajaraxuacujinae Cristo baja athëbëabetsia pona. Icatsia patsianica cotocaevijava. Itsiata baitsi jane baja icatsia apo nacasivatëpae tsane pibisiacuene vajaexanaeneconi yabara. Saya baja nacasivapatsianica vajavajënaēvetavanapaēvi vajanacacaponanexa athëbëabetsia.

10

¹ Palivaisi bajayata Dioso Moiséspijinëta najumecopata, bajarapalivaisi saya Dioso najumecopata tajëvelia vajayapëtaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinëta penajumecopatsilivaisi, sacerdotēvi exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuēnia pevi perajutsinexa Diosojavabelia, pibisiacuene pexanaeneconi Dioso pevecuajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabëcuēnēxaniavaetsitsi. ² Pacuenia bajayata itorobatsi Dioso Moiséspijinëta penajumecopatsilivaisi, sacerdotēvi exanabiaba. Dajubinë beyaxuababiaba ofrendacuēnia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuajibiaexanaejitsipatsi pibisiacuene pexanaeneconi, nexata bajarapamonae apo yanajamatabëxainae tsipae pijaneconi. Nexata baja itsa aneconijibi tsipae, pematatsënëa dajubinë apo beyaxuababiabi tsipae ofrendacuēnia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. ³ Bajarapacuenia dajubinë caevai canacujitsia beyaxuababiabi ata ofrendacuēnia pevi perajutsinexa Diosojavabelia, itsiata jivi jamatabëcuēnēbarëyaya apo jinavanapae. Biji rajane bajarapacuenia exanabiabi ata, pevajënaeyabelia tsiteca yanajamatabëxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo caējëpaetsi jivi pijaneconi pepacuene pevecuajibiaexanaenexatsi.

⁵ Bajaraxuata Cristo pepatsicujinaetsica mapanacuayabet-sicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuenia.

Apo jitsipaemënuua dajubinë ata pebeyaxuababi-abijava pevi pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatëpaenexa pijaneconi yabara.

⁶ Jivi picani dajubinë beyaxuababiaba ofrendacuenia pevi pecarajutabiabinexa, altarpvënëjavajumata pecatotajuitsinexa. Jamatabëjumai tsabiabi bajara-pamonae: “Tajaneconi Dioso nevecuaajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenebarëyamë bajaraxua yabara.

⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi,

jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenebarëya jivi dajubinë pebeyaxuababiabi-
java ofrendacuenia pevi perajutabiabinexa Diosojavabelia.

⁹ Icatsia Cristo jumaitsi paxa Diosojavabelia mapacuenia-
aje: “Bajara jane manucajëje pacuenia jitsipame tacatoex-
anaenexa,” jai Cristo. Cristo baja mapanacuapijivi pibisi-
acuene pexanaeneconi yabara sivatëpa cruzata pacuenia
paxa Dioso itorobatsi. Nexata sacerdotevi dajubinë pe-
beyaxuababiabijava ofrendacuenia pevi perajutabiabinexa
Diosojavabelia, Cristo baja copiarucaeyaexana. ¹⁰ Pacuenia
Dioso tojitsipatsi, Jesucristo nacopata pebeyaxuabinexatsi
vajanacasivatëpaenexa cruzata. Bajarapacuenia Jesucristo
nacasivatëpa vajanacavecuajibiaexanaenexa pibisiacuene
vajaexanaeneconimi. Caeto baja Jesucristo nacasivatëpa
daxita mapanacuapijivitsije.

¹¹ Caematacabi canacujitsia picani sacerdotevi
nubenabiaba altarpvënëjava muxuneneta, dajubinë itsa
beyaxuaba, ofrendacuenia pevi perajutabiabinexa
Diosojavabelia. Itsiata baitsi jane bajarapacuenia
exanabiabi ata, Dioso pepacuene apo vecuaajibiaexanaetsi
pibisiacuene pexanaeneconi.

¹² Jesucristo baja cajena
nacopata pebeyaxuabinexatsi, vajanacaneconimata-
motsinexa pibisiacuene vajaexanaeneconimi. Caeto
baja Jesucristo tēpa pibisiacuene vajaexanaeneconi
vajanacaneconimatamotsinexa daxitamatacabijav-

abelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaevevtsinexabeje daxitacuene. ¹³ Cristo abaxë aeconoxae athëbëtatsia ecaya. Jamatabëcueneevetecaya abaxë pijavajabitsaë paxa Dioso petojamatabëcueneamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. ¹⁴ Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeneconimi daxitamatacabijavabelianexa. ¹⁵ Cristo baja cajena caeto vajanacasivatëpaejavanexa daxitamatacabijavabelianexa, Espíritu Santo tajëvelia nacayapëtaeyaexana. Espíritu Santo tajëvelia nacayapëtaeyaexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaitsi mapacueniaje:

¹⁶ Najumecapanepaeya tajajivi yabara pejanalivaisi itsamat-
acabi jumaitsinë tsane mapacueniaje: “Caejivi canacu-
jitsia pejamatabëëthëtota yapëtaeyaexanaponaponaenajë
pacuenia netojinavanapaejitsia. Nexata
bajarapamonae pejamatabëëthëttojavavetsina jitsipaena
tanejumecovënëtsinexa,”

jai Dioso.

¹⁷ Bajaraxuacujinae icatsia Dioso jumaitsi mapacueniaje:
Apo najamatabënapitsinë tsane itsamatacabijavabelia ata
daxita papibisiacuene bajarapamonae exana,
jai Dioso tajëvelia pija-jivi yabara.

¹⁸ Nexata jane baja Cristo nacasivatëpa pibisiacuene
vajaexanaeneconimi Cristo pejamatabëcueneta Dioso
vajanacavecuajibiaexanaenexa. Nexata baja pematatsënëa
dajubinë apo beyaxuababiabi tsanetsi ofrendacuena
pevi vajarajutabiabinexa Diosojavabelia, pibisiacuene
vajaexanaeneconi Dioso vajanacavecuajibiaexanaenexa.

*Pacuenia saya vajajamatabëcuene imoxoyotsijitsiatsi Dioso
yabara pelivaisi*

¹⁹ Tajamonae, Jesucristo baja vajanacasivatëpaexae,
aeconoxae baja Dioso nacatocopata ajunavijibia
vajajonenexa Dioso pijanacuayabetsia. Nacatocopatanua
bajarajotatsia vajajonenexa Lugar Santísimovënëjavabelia,
itsajota baitsi Dioso ponapona. ²⁰ Jesucristo nacatoexana
pejananamuto vajaponaenexa athëbëabetsia, Dioso
vajanacarajutsinexa matababi apo pevereverecaejava.
Jesucristo baja itsa nacasivatëpa cruzata, nacasivatëpa
vajapatsinexa Diosojavabetsia. ²¹ Bajayata sacerdotevi
tovetavanapa Dioso pijacarpaboxaneto. Bajara pijinia

pacuenia aeconoxae Jesucristo, pepo sacerdotenē jane baja, nacaevetaponapona vaxaitsi vajanacatocuaicuajainexa Diosojavabelia. ²² Bajaraxuata vajajamatabēethētojavavetsina vajajamatabēcuene saya bimoxoyotatsi Dioso. Bēpēnēa vajajamatabēcueneta Dioso yamaxēitojorobiaya apo bejumecovēnētsitsi. Tsipaji yapētanetsi Dioso vajanacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanaeneconimi Dioso nacavecuaajibiaexana. Nexata baja nacaajamatabēcuene xuirajibiaexana Jesucristo vajanacasivatēpaexae. Vajanacabautisabijavata, nacaperabēquiatanua pi-axuirajibimerata. ²³ Vajavajēnaeyabelia asaēyata copiaevetavanapaenatsi Dioso vajanacapanepaejavanexa. Bajarapacuenia asaēyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabiabianatsi Dioso vajanacapanepaejavanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena. ²⁴ Nexata vaxaitsi namataenetsia benayavenonatsi vajanajamatabēcueneitajētsinexa vajanasivacuene. Namataenetsianua pexaniacuene benatoexanabiabatsi. ²⁵ Itsamonaē baja vaxaitsiyajuvēnēvi copabapona penajoneyabiabijava vajanacaetuatabiabiobjavabelia. Vaxaitsi nexata bajarapamonae apo becuenejēpaetsi. Namataenetsia benajamatabēcueneasaēyaexanaponatsi. Aeconoxae baja bitsoyo biamamatabēcuenesaētsi tsavanapae. Tsipaji baja imoxoyo pevajēnae vajatuxanenē pepatsinexatsica.

²⁶ Vaxaitsi tsiteca vajavajēnaeyabelia pibisiacuene itsa exanaponaejitsipatsi, yapētae atatsi Cristo vajanacasivatēpaejava, nexata nacatoacuenebi tsipae Dioso vajanacavecuaajibiaexanaenexa pibisiacuene vajaexanaeneconi. ²⁷ Bajarapacuenia vajavajēnaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ēvajanananeconitsia exanaejavanexa. Pamatacabi Dioso pijavajabitsaē naneconitsiaexanaena pinijiisotojavabelia peverebiabinexa, bajarapamatacabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. ²⁸ Bajayata Dioso Moiséspijinēta najumecopata jivi pejumecovēnētsinexa. Nexata pajivi apo jumecovēnētsi Dioso Moiséspijinēta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaitsi pibisiacuene pexanaejivi yabara: “Pataniji pepacuene pibisiacuene pexanaejiva mapajivije,” itsa jai, nexata bajarapajivi apo itaxutotsoniataetsi. Beyaxuabatsi

pibisiacuene pexanaeneconi yabara. ²⁹ Pacanaējēre mapacueneje. Pajivi apo jumecovēnētsi Dioso Moiséspijinēta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovēnētsijava Dioso pexēnato pesivatēpaejavatsi pijaneconi yabara. Pajivi copata pejumecovēnētsijava Dioso pexēnato pesivatēpaejavatsi pijaneconi yabara, bajarapajivi tane Dioso pexēnato pesivatēpaejavatsi bepiamatamobicujiru. Apo canaējētsinua Espiritu Santo piasivajavatsi. ³⁰ Yapētanetsi baja cajena Dioso pejumaitsijava mapacueniaje: “Pamonae pibisiacuene exanapona itsamonaejavabelia, bajarapamonae xanē naneconitsiayaexanaenajē,” pejajiva. Jumaitsinua Dioso mapacueniaje: “Xanē Diosonēnē, naneconitsiaexanaenajē tajajivi,” jai. ³¹ Pajivi Dioso apo jumecovēnētsi, nexata Dioso itsa naneconitsiaexanaenatsi, jbitso piayaicuene taeyaexanaenatsi piasaētsaponaponaenē Dioso!

³² Panajamatabēnapire pacuenia pajamatabēcueneitsimē tsavanapae pamatacabi ajena Cristo pajumecovēnētame. Bajarapamatacabi pajamatabēcuenesaēmē tsavanapae panejumecovēnētsijava vajatuxanenē pelivaisi, itsamonae pacabejiobiaexanae ata bajarapalivaisi yabara. ³³ Paxamēyajuvēnēvi baja cajena jivi ayaibitsaēto pitabarata itsamonae capocaponatsi. Ayaicuena baja cajena bejiobiaexanatsinua bajarapamonae pitabarata. Nexata pijinia itsamonae paxamēyajuvēnēvi bitso sivanajamatabēxaina bajarapacuenia papecayajuvēnēbejiobia exanaexaetsi. ³⁴ Paxamē paitaxutotsoniataneme pamonaē jebatsi penaneconitsivi pejebabiabibota Dioso pejumelivaisi yabara. Paxamē itsamonae pacavecuanotsi ata panijairanēmi, panecobecovējavaximi yajava, itsiata paxamē pajamatabēcuenebarēyamē. Bajarapacuenia pajamatabēcuenebarēyamē tsipaji baja payapētaneme xua athēbētatsia paxinaejitsiamē. Bajaraxua mapanacuapijicuene matatoxenetsia bitso pexaniacuenejava. Tsipaji daxitamatacabijavabelianexa apo peverevereaejavanexa. ³⁵ Bajaraxuata pētsa pacopabame panesivanajamatabēcuenecopatsijava Diosojavabelia papecayavenonaenexa. Dioso cajena athēbētatsia pacarajutsiana ayaicuenejava panenajamatabēcuenecopatsixae bajaraponējavabelia. ³⁶ Bajayajebi ata panevajēnaeyabelia paexanaponare pacuenia Dioso pacatojitsipa. Nexata xua yabara tajēvelia Dioso najumecapanepaeya jumaitsi papecarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso

pejumelivaisibaxutota tajëvelia jumaitsi mapacueniaje:

Bepijia patsianica ponë patsijitsiatsica. Apo cuene-
najematsi tsane pepatsinexatsica. ³⁸ Nexata
pajivi Dioso aneconijibiatanetsi Diosojavabelia
penajamatabëcuenecopataponaponaexae, bajarapajivi
xainaena matabi apo peverevereaejava. Itsiata
baiti jane pajivi nevecuanaviata pecovëyabelia, apo
sivajamatabëcuenebarëyanë tsane,
jai Dioso pejumelivaisibaxutota.

³⁹ Itsiata baiti jane vaxaitsi vajacovëyabelia Diosovecua
apo naviabi tsanetsi Diosovecua vajanaxuabiyaniava. Biji
rajane vaxaitsi najamatabëcuenecopabatsi Diosojavabelia
ëvajanacapanepaejavabelianexa.

11

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

¹ Itsa pepacuenene vaxaitsi xaniavaetsia naja-
matabëcuenecopatatsi Diosojavabelia, nexata naja-
matabëxainatsi mapacueniaje: “Abaxë daxitacuene apo
copiapatsi ata, xua yabara Dioso najumecapanepaeya
jumaitsi, itsiata yapëtaniji pexaniajaicuene. Pacuenia
Dioso najumecapanepaeya jumaitsi, xaniajai baja cajena.
Pepacuenene Dioso exanaena,” jamatabëjaitsi. ² Bajayata
vajasalinaivimi jumecovënëta Dioso. Nexata bajarapa-
monaemi jamatabëjumaitsi tsabiabi: “Pacuenia Dioso
najumecapanepaeya jumaitsi, pepacuenene neyavenonaena,”
jamatabëjai tsabiabi. Bajaraxuata bajarapamonaemi yabara
Dioso jumaitsi: “Sivajamatabëcuenebarëyanë,” jai.

³ Vaxaitsi ata jumecovënëtatsi Dioso. Nexata yapëtanetsi
pexaniajaicuene mapacuenia pejumaitsilivaisije: “Dioso
baja cajena nacua exana daxitacuene yajava. Dioso saya
pijumeta daxitacuene exana. Daxita xua aeconoxae vajaitax-
utota tanetsi, Dioso baja cajena exana. Abaxë pamatacabi
ajibi itsacuenejavayo ata mapanacuataje, Dioso baja cajena
exana daxitacuene,” pejailivaisi yapëtanetsi pexaniajaicuene.

⁴ Bajayatami Abelpijinë najamatabëcuenecopata Diosojav-
abelia. Abelpijinë jumecovënëta pacuenia Dioso itoro-
batsi. Nexata Abelpijinë dajubinë beyaxuaba. Nexata
ofrendacuenia pevi rajuta Diosojavabelia. Dioso nexata
sivajamatabëcuenebarëyatsi. Abelpijinë pijinia pematapi-
jinëmi, Caïnpijinë, apo jumecovënëtsi pacuenia Dioso itoro-
batsi. Saicaya pijinia itsaviriajava ofrendacuenia rajuta
Diosojavabelia. Dioso nexata apo sivajamatabëcuenebarëyatsi
Caïnpijinë. Nexata Abelpijinë bajayatami baja tëpae ata,

itsiata mapamatacabijavaberena ataje vënëlivaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso itsa jumecovënëtatsi, Dioso vajanacasisvabarëyajavanexa.

⁵ Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajarabatsi. Nexata itsamonae jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenebarëyatsi.

⁶ Pajivi apo najamatabëcuenecopatsi Diosojavabelia, bajarapajivi yabara Dioso apo jamatabëcuenebarëya. Pajivi najamatabëcuenecopatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaе asaëyata vajëta Diosojavabelia pibisiacuene pexanaeneconi pevecuaajibiaexanaenexatsi, bajarapamonae pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noépijinëmi ata najamatabëcuenecopata Diosojavabelia. Nexata Noépijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noépijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcoxaneto exana pebarëpanepaenexa pijamonae mapaira pebubutsijavavecuaje. Bajarapacuenia Noépijinëmi pijamonae pebarëjumecovënëtsixae Dioso, nexata Dioso aneconijibia tanetsi. Bajarapamatacabi daxita mapanacuapijivimi apo jumecovënëtsi Dioso. Caenë Noépijinë pijamonae barëjumecovënëta Dioso. Nexata daxita pamonaemi apo jumecovënëtsi Dioso, nayapëtane bitso penaneconitsijava Diosojavabelia.

⁸ Bajayata Abrahampijjinëmi ata najamatabëcuenecopata Diosojavabelia. Nexata Dioso itsa itorobatsi Abrahampijjinë pevecuapitsapaenexa pijanacuami, jumecovënëta. Nexata baja Abrahampijjinë pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijjinë abaxë apo natsivajënaeyapëtae ata panacuayabelia patsijitsia, itsiata vecuapitsapa pijanacuami Dioso pitorobixaetsi. ⁹ Panacuata Abrahampijjinë Dioso patsiaexanatsi, bajarapanacuata itsiata Abrahampijjinë pepo pijabo apo exanae. Carpabota saya ponapona. Becaematacabibejenexa saya pepatsinëcuenia carpabota Abrahampijjinë ponapona. Itsiata bajayajebi bajarapanacuata carpabota ponapona.

Abrahampijinē pexēnato ata, Isaacpijinē, bajarapaira Dioso rajutsiapaebi atatsi, itsiata Isaacpijinē ata carpabota ponapona. Bajara icatsia itsi Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata Jacobpijinē ata carpabota ponapona. ¹⁰ Bajarapacuenia Abrahampijinē bajayajebi carpabota saya ponapona. Tsipaji abaxē vajēnaeevetaponapona pecaponaenexatsi athēbēabetsia, Dioso pexanaetomarabetsia, apo pevereverecaetomarabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijinē pijava pevēnē Sara. Bajarapovami ata najamatabēcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaitsitsi pexēnato pexainaenexa. Bajaraxuata xaina pexēnatonēyo. ¹² Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsaponae. Athēbētatsia, itaboxota, bitso navita tulupu. Mapanacuata pijinia tajetabota bitso navita tajetaboatsapērē. Nexata acuenebi itsajivi ata penamataējētsicapanepaenexa tulupu, tajetaboatsapērē ata. Bajara pijinia itsaponae Abrahampijinē pemomoxi. Bitso cajena Abrahampijinē pemomoxi navita.

¹³ Daxita pamonaemi bajayata Dioso jumecovēnēta, tēpa baja. Bajarapamonaemi xua yabara Dioso najumecapanepaeya jumaitsitsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabēcuenēbarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamonae tsitanajamatabēcuenēitajētavanapa. Bajarapamonaemi tsitanajamatabēcuenēitajētavanapa pevetavanapaejava athēbēabetsia Dioso pecaponaejavanexatsi, bajarajotatsia jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabēxainavanapae caevēalia

icatsia penaviabinexa pijanacuamijavabelia. Itsa najamatabëxainaejitsipa caevëalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabëxainavanapa peponaenexa athëbëabetsia. Tshipaji athëbëtatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “Taja Diosomë,” pejaijava Diosojavabelia, Dioso sivabarëyatsi. Vaxaitsi ata baja yapëtanetsi bajarapamonaemi Dioso pesivabarëyajavatsi. Tshipaji baja athëbëtatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajëvelia najumecapanepaeya jumaitsi Abrahampijinëjavabelia. Abrahampijinë pexënato, Isaac, yabara Dioso jumaitsi mapacueniaje: “Nexënato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinë Dioso itorobatsi penacoxibeyaxuabinexa picani. Bajarapacuenia Abrahampijinë Dioso itorobatsi penacoxibeyaxuabinexa picani saya pejamatabëcuenejëtsinexatsi. Abrahampijinë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinë jejai. Nacoxibeyaxuabijitsia picani. ¹⁹ Bajarapacuenia picani Abrahampijinë exanaejitsia Dioso pitorobicueniatsi. Tshipaji Abrahampijinë jamatabëjumaitsi: “Dioso baja cajena caëjëpatsi piasaëyaexanaenexatsi taxënato icatsia piasaënexa,” jamatabëjai Abrahampijinë. Ajena baja picani Abrahampijinë nacoxicacuatsijitsia cusiupata penacoxibeyaxuabinexa, nexata Abrahampijinë jamatabëjumaitsi: “Taxënato baja aeconoxae tëpaena,” jamatabëjai. Nexata bajarapaepatota Abrahampijinë Dioso itavetatsi penacoxibeyaxuabiyaniva. Nexata baja itsiata Abrahampijinë apo nacoxibeyaxuabi. Nexata itsiata Abrahampijinë bepetëpaenë baja nacoxitane. Nexata bajaraxuacujinae icatsia Dioso bepetoasaëyaexanaenëtsi nacoxitane.

²⁰ Bajayata Abrahampijinë pexënato ata, Isaacpijinë, najamatabëcuenecopata Diosojavabelia. Bajaraxuata Isaacpijinë itsa baja perujunë, pexënatobejejavabelia tajëvelia najumecapanepaeya jumaitsi: “Dioso pacayavenonabiabi-anabeje,” jai Isaacpijinë pexënatobejejavabelia. Isaacpijinë pexënatobeje itsanë pevënë Jacob. Itsanë pevënë Esaú. Jacobpijinë itsavënë, Israel. ²¹ Nexata Jacobpijinë ata najamatabëcuenecopata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabiabinexatsibeje.

Ponëbeje Jacobpijinë pemomobeje tovajëta Diosojavabelia, Josépijinë pexënatobeje. Bajarapacuenia Jacobpijinë ita tovajëta Diosojavabelia, pemomobeje, caenë canacujitsia, tovajëta pona. Pecobenaeboupita saya Jacobpijinë nayaëtanucaeya vajëtanuca Diosojavabelia. ²² Bajayata Josépijinë ata najamatabëcuenecopata Diosojavabelia. Bajarapamatacabi Egipto nacuata Josépijinë daxita pijamonae barëponapona, Israelpijinë pemomoxi. Nexata baja Josépijinë ita nayapëtane petëpaejavanexa, tajëvelia vajunupaeba daxita Israelpijinë pemomoxi Dioso pejamatabëcueneta pecapitsapaejavanexatsi Egipto nacuavecua. Josépijinë petëpaevajënae, najumepuenetanua pijamonae pesicaponaenexatsi pamatacabi Dioso pejamatabëcueneta daxita Israelpijinë pemomoxi capitsapatsi Egipto nacuavecua.

²³ Bajayata Moiséspijinë paxapijinë, penapijiva ata, tajëvelia yapëtanebeje Dioso peyavenonaejavanexatsibeje. Nexata bajaraxuacujinae pexënatonëyo xainabeje, Moisésnexe jane baja. Nexata matayatsia caponaponabeje acueyabi pajuametobeje. Bajarapacuenia matayatsia caponaponabeje tsipaji bitso tsitapexanianëyotsibeje. Egiptonacua pepo pevetsinë itoroba picani daxita Israelpijinë pemomoxi penacoxibeyaxuabaponaenexa ita tonaexanatsi pebinëyo. Itsiata bajarapajivibeje apo jumecovënëtsibeje penacoxibeyaxuabinexabeje. Tsipaji apo jumecujunavibeje. ²⁴ Bajaraxuacujinae Moiséspijinë jane baja vitsatatsi Egiptonacua pepo pevetsinë pexënatoyo. Moiséspijinë bajarapova vitsatatsi bepexënatonëyocuenia. Moiséspijinë baja ita penaveretsinë, yapëtane Dioso peyavenonaejavanexatsi. Nexata Moiséspijinë apo jitsipae Egiptonacua pepo pevetsinë bepemomocuenia petaenexatsi. ²⁵ Nexata Moiséspijinë najamatabëcueneveretsia jamatabëjumaitsi: “Tajamonae, Israelpijinë pemomoxi, Dioso pijajivinexa. Nexata yavenonaenajë tajamonae. Egipto nacuapijivi nebejiobiaexanae ata tsane, pacuenia tajamonae bejiobiaexanabiabatsi, itsiata yavenonaenajë,” jamatabëjai Moiséspijinë. Nexata baja Moiséspijinë Egiptonacua pevetsinë bepemomocuenia petaejavatsi ita vecuapitsapa, copata baja pibisiajamatabëcuene, mapanacuapijijamatabëcuene. Tsipaji saya bajarapajamatabëcuene caepatoyonexa jamatabëcuenebarëya. ²⁶ Moiséspijinë Dioso jumecovënëta pacuenia tajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsi. Bajarapacuenia xanë ata Egipto

nacuapijivi nebejiohiaexanaejitsia ata tsane, itsiata Dioso pejitsipaecuena toexanaenajë. Tsipaji xua Dioso athëbëtatsia nerajutsijitsia, bajaraxua bitso pexaniacuene daxita Egipto nacuapijivi pexainaecuene matatoxenetsia,” jamatabëjai Moiséspijinajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiohiaexanaenatsë. ²⁷ Nexata baja Moiséspijinë Egipto nacuavecua pitsapa. Tsipaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baraanaepanae atatsi, apo cjunavi. Pevajënaeyabelia ajamatabëcuenesaë tsanajetaruae pacuenia Dioso itorobatsi pexanaenexa. Moiséspijinë baja apo naviatsi pecovëyabelia. Tsipaji abaxë Moiséspijinë apo tae ata Dioso, itsiata yapëtane Dioso bitso piasaënëcuene Egiptonacua pepo pevetsinë matatoxenetsia.

²⁸ Moiséspijinë Dioso peyavenonaenexatsi, tajëvelia najamatabëcuenecopata Diosojavabelia. Bajaraxuata pamatacabi Moiséspijinë pijamonae barëpitsapa Egipto nacuavecua, ayaicuenia Dioso yavenonatsi pijamonae pebarëpanepaenexa. Bajaraxuata Moiséspijinë pacuenia Dioso itorobatsi, juya daxita pijamonae itoroba. Moiséspijinë pijamonaejavabelia jumaitsi mapacueniaje: “Daxita paxamë, pacaebopijivimë canacujitsia, pabename ovejaxi, pejanapebitoxi. Nexata panijabobaupanë, caebaupa canacujitsia, pamuxunenetsicabianame ovejajanata. Nexata ajena, pameravi, ángelnë najetaruae ata tsane peverebiabinexa pebinacuetoxi, matapijinacuetoxi, itsiata apo pacoxitëpaemë tsane,” jai Moiséspijinë pijamonaejavabelia. Nexata Moiséspijinë pijamonae pijabobaupanë, caebaupa canacujitsia, tsicaba ovejajanata. Nexata ángelnë najetaruae ata peverebiabinexa pebinacuetoxi, matapijinacuetoxi, itsiata Moiséspijinë pijamonae apo coxitëpae. ²⁹ Bajayata pamatacabi Moiséspijinë pijamonae barëpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinë pijamonae barënajamatabëcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabëcueneta nicaba Rojovënë manuamenemaxërana tuatuajëalia. Dioso pejamatabëcueneta benamutocuena toseviaexanaxualiat. Nexata jane baja Egipto nacuapijivi, pamonaë jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

30 Bajayata Jericó tomarapijivi piatayaëibopanaxaneto exana pijatomara matatoyorotsia penayajivicaransinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijinë pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinë pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matabita, caematabita, matatoyorotsia najetarubena siete xuabeje. Nexata jane baja siete matabita bajarapayacaranatsijavaxanetomi jopaica.

31 Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonaë apo yajavatëpae. Tsipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinë pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

32 Apo necuenecaëjëpae baja pematatsënëa itsamonae pelivaisi patacatoyaquinaenexa patacamuxujiobinexa, panenajamatabëcuenecopatsinexa Diosojavabelia papecayavenonaenexa. Apo necuenecaëjëpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftëpijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjëpaenua patacatoyaquinaenexa itsamonae, Diosojumepaëbivimi profetavi, pelivaisi.

33 Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtabuatapona itsanacuanëpijivijavabelia, bajarapanacuanëpijivimi verebabia Dioso peyavenonaexaetsi. Bajarapamonaë pijanacuanëjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenejavayo yabara, Dioso yavenon-

abiabatsi. Yavenonabiabatsi pacuenia Dioso tajëvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaebayabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi. ³⁴ Itsamonae pijinia bajarapamonaeyajuvënëvi xuabi atatsi pinijiisotualia, Dioso peyavenonaexaetsi, itsiata apo tajuetsi. Itsamonae pijinia jamatabëbeyaxuabi atatsi espadata, vecuapanepa Dioso peyavenonaexaetsi. Pamonaе pijinia apo aitatsaca picani penavajabitsaëtsinexa, bajarapamonaе ata bitso baja piatatsacavi naexanapona vajabitsaë penaexanabuataponaejavata Dioso peyavenonaexaetsi. Nexata bajarapamonaе pijavajabitsaë cuenamoneyaba. Vecuarëcëpecatsi. ³⁵ Bajayata pijinia petiriavi penajamatabëcuenecopatsixae Diosojavabelia peyavenonaenexatsi, itsa coxitëpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaejavatatsi, itsamonae tëpabiaba. Bajarapacuenia yajuvënëexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëtavanapaejava. Bajarapacuenia apo copabi Dioso pejumecovënëtsijava. Tsipaji bajarapamonaе jamatabëjumaitsi tsavanapae: “Mapanacuataje taponaponaеjava matatoxenetsia bitso jitsipajë matacabi apo peverevereцаejava Dioso tanerajutsinexa,” jamatabëjai tsavanapae bajarapamonaе. ³⁶ Itsamonae pijinia Diosojavabelia penajamatabëcuenecopatsixae, itsamonae capocaponabiabatsi. Jumatitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cëbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonëta saya tseconabiabatsi pebeyaxuabinexatsi. Itsamonae pijinia petëpaenexa, epacaucubatsi sierrata. Itsamonae pijinia jamatabëcuenejëtatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaexae penaxatabijava, bajarapamonaе naxataba ovejaboco, chivoboco ata. Pexainaеjava ata apo xinae. Nexata bitso bejiobi bajarapamonaе. Barajinabiabatsi. Bejiobiaexanatsinua. ³⁸ Bajarapamonaemi petusato nacuanëjava jinaruta. Petsutonë nacuanëjava ata, jinaruta. Pitajanitonëjava perubenaevajuanë jaita

meravi pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi. ³⁹ Daxita bajarapamonaemi najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxë bajarapamonaemi itsa asaë tsavanapae, mapanacuataje Dioso abaxë apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tëpa, Dioso jane baja rajutatsi matabi apo peverevereaejava. ⁴⁰ Dioso abaxë evetavanapaeyaexanatsi xua rajutsijitsiatsi bajarapamonae. Tsipaji Dioso apo najamatabëxainae ëbajarapomonaejavabelia perajutsinexa bajaraxua. Vaxaitsi ata mapamatabita vajajinavanapaevi, bajarapamonae yajava, Dioso jamatabënacarajuta bajarapapexaniacuene, matabi apo peverevereaejava.

12

Pacuenia vajavajënaeyabelia becaasaë tsavanapaetsi Dioso vajajumecovënëtsijava Jesucristo cruzata vajanacasivatëpaexae yabara pelivaisi

¹ Pamonaе yabara pacatoyaquinatsi, bajayata najamatabëcuenecopaba Diosojavabelia peyavenonaenexatsi. Nexata bajarapamonaemi vajavënëlvivaisitaexae, bemuxunanajamatabëcuenesaëtatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaejava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocaëjëta vajanacaitorobinë. Bajara pijinia pacuenia Dioso pitabarata xaniavaetsia bejinavanapatsi asaëyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisiajamatabëcuene xainatsi. Tsipaji bajarapapibisiajamatabëcuene nacaitorobabiaba pibisiacuene vajaexanaenexa. Bajarapapibisiajamatabëcuene baja becopabatsi vajaexanavanapaenexa xua Dioso nacaitoroba. ² Itsa najamatabëcuenecopatatsi Diosojavabelia vajanacayavenonaponaenexa, nexata benajamatabënapitabiabatsi Jesús. Tsipaji Jesús vajanacasivatëpaexae, Dioso aneconijibia nacatane. Jesús pejamatabëcueneta Dioso nacayavenonana vajaajamatabëcuenesaë tsavanapaenexa Dioso vajajumecovënëtsijava matapania vajanacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi

jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajënaeyapëtane pejamatabëcuenebarëyajanexa icatsia ita asaë petëpaecujinae, daxitajivi pijaneconi pematamotsixae. Aeconoxae baja nexata Jesús tronovënëjavata athëbëtatsia eca, Dioso pemuxuneneta, pecujuanenia, penajuaevetsinexabeje daxitacuene.

³ Pacanaëjère Jesús piamamatabëcuenesaë tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuenie pacanaëjëtsianame itsamonae ita pacabejiobiaexana Jesús panejumecovënëtsijava yabara. Nexata apo pacueranaemë tsane Dioso panetonacuenebijava. Apo pajamatabëcuenefaefaenaemënuatsane.

⁴ Paxamë panajamatabëcuenesaëtavanapame pibisiacuene paneexanaeyaniva. Bajarapacuenia panajamatabëcuenesaëtavanapae atamë pibisiacuene paneexanaeyaniva, itsiata abaxë pibisiacuene pexanaevi apo pacayajuvënëbeyaxuabi. Bajaraxuata panevajënaeyabelia bepanajamatabëcuenesaëtavanapame pibisiacuene paneexanaeyaniva.

⁵ Pëtsa panacofënëtime Dioso papecamuxujibijava papecajamatabëcueneasaëya exanaenexa ita pacamuxujioba bepapeximëcuenia. Tsipaji Dioso pejumelivaisibaxutota paxamë yabara jumaitsi mapacueniaje:

Taxi, xanëjavaberena panenaneconitsixae, ita pacananeconitsiaexanaenatsi, pëtsa payaanaepaname. Pëtsa pasivajamatabëcuenefaefamenue ita pacabijatanetsi xua yabara pananeconitime.

⁶ Pacananeconitsiaexanaenatsi. Tsipaji xanë muxujiobiaya bananeconitsiaexanajë pajivi asivanë, baitsi daxita pamona taxicuena tataevi, jai Dioso pejumelivaisibaxutota paxamë yabara.

⁷ Nexata patonacaevere Dioso muxujiobiaya papecananeconitsiaexanaenexa. Tsipaji Dioso papeximëcuenia pacatane. Jivi ata baja cajena pexi muxujiobiaya banacoxivitsata. ⁸ Nexata Dioso muxujiobiaya ita apo pacaevetsi tsipae, Diosojavabelia pananeconitsi atamë, nexata Dioso papeximëcuenia apo pacatae tsipae. Tsipaji jivi ata, pexi pexinaevi, muxujiobiaya banacoxiconita.

⁹ Vaxaitsi abaxë pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yaiyatanetsi. Nexata biji vaxaitsi bitsoyo bejumecovënëtsi vaxa Dioso, ponë eca athëbëtatsia, vajanacarajutsinexa matacabi apo pevereverecaejava.

10 Itsa abaxë vaxajivi mapanacuata nacavitsata, muxujiobiaya banacaconita. Tshipaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vajaexanaejava. Nexata bajarapacuenia Dioso nacajamatabëcueneyavenona vajaperujumatabëcuenemivecua vajanajamatabëcuene pënëyorotsinexa Diosojavabelia. Nexata pacuenia Dioso jamatabëcueneitsi, bajara vaxaitsi ata vajajamatabëcueneitsinexa. 11 Paepatota vaxa Dioso nacamuxujiobiaya nacananeconitsiaexana, bajarapaepatota abaxë apo sivajamatabëcuenebarëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëtane baja xua yabara naneconitsiaexanatsi. Nexata baja copata bajaraxua. Nexata baja jamatabëcuenebarëyaya xaniavaetsia ponapona.

Pacuenia tsiayaitsi tsane pajivi namuxujemata Dioso pejumelivaisi yabara pelivaisi

12 Pacopabare baja panejamatabëcuenecueranaejavami. Panevajënaeyabelia panajamatabëcuenesaëtaponare. Tshipaji baja panajamatabëcuenecopatame Diosojavabelia papecayavenonaenexa. 13 Pëtsa pajumecovënëtame itsalivaisi Dioso pejumelivaisivecua. Ëpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamonae abaxë apo ajamatabëcuenesaë Dioso pejumecovënëtsijava, pacaitaxutua ajamatabëcuenesaë tsaponae tsane.

14 Daxitajivijavabelia pexaniajamatabëcuene patoxainare. Nexata aneconijibia pajinavanapaename Dioso pitabarata. Pajivi aneconijibia apo ponaponae tsane Dioso pitabarata, bajarapajivi Dioso apo yjavaponaponae tsane. 15 Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsiyaniva papecaitaxutotsoniataejava panepujumecovënëtsivi Dioso. Pacuenia piatsaxaënëboto daxitamera bijianaiejitsipa, bajara pajamatabëcueneitsimë tsipae caenë ata, paxamëyajuvënënë, pibisiacuene itsa exanaejitsipa. Pacajamatabëcuene bijianaiejitsipa padaxitamë. 16 Panayajivitaemanua itsanë ata, paxamëyajuvënënë, pejaitsiyaniva itsava pepo pijavavecua. Petiriva ata pejaitsiyaniva itsanë pepo pamonavecua. Panayajivitaemanua panejumeaebiyaniya Dioso najumecapanepaeya papecajumaitisijava. Pëtsa Dioso panejumeaebame pacuenia bajayata Esaúpijinë jumeaeba Dioso

najumecapanepaeya pejumlahitsijavatsi. Esaú picani matapijinëxae, Dioso yavenonabiabijitsiatsi. Nexata itsajota Esaú bitso piajani, pejuyapijinëjavabelia pexaejava caenabani namitsavajëta. Nexata pejuyapijinë jumaittsi: “Pacuenia nexaejava nevajëtame, carajutsianatsi. Nexata xua Dioso cayavenonabiabiapaeba, bajaraxua juya xanë netocopatsianame,” jaitsi. Nexata Esaú jejai. Pejuyapijinëjavabelia baja tocopata xua picani Dioso yavenonabiabijitsiatsi. ¹⁷ Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiabiapaebatsi. Esaúpijinë picani paxa itoroba Diosojavabelia petovajëtsinexatsi Dioso peyavenonabiabinexatsi paxa pevënamuto. Itsiata baitsi jane paxa apo jumejejaitsi. Nexata Esaúpijinë bitso nua pejuyapijinë petocopatsixae xua picani Dioso yavenonabiabijitsiatsi. Itsiata baja acuenebi pexanaejava. Bajaraxuata paxamë ata pëtsa pacopabame Dioso panejumecovënëtsijava Dioso najumecapanepaeya papecajumait-sijava.

¹⁸ Paxamë panejumecovënëtsixae Dioso, pacatocopata roviaalia panevajëtsinexa Diosojavabelia. Nexata apo panamatavenonaemë paneponaenexa itsanacujavabelia panevajëtsinexa Diosojavabelia. Bajayata Israelpijinë pemomoxi pata ibotsutoxanetotabuyaberena. Nexata bajarapatsutotabuta navajëca Diosojavabelia. Nexata bajarapatsutojumatsia Israelpijinë pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava. ¹⁹ Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuaijajavatsica athëbëvetsica bajarapamonaejavabelia. Nexata judíovi pecajunavi bitso, vajëta Diosojavabelia Dioso pecuaicuaijaiyaniva pematatsënëa. ²⁰ Bajarapacuenia Israelpijinë pemomoxi vajëta Diosojavabelia tsipaji bitso jumecujunava Dioso pejumlahitsijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonëta. Itsa jume, becuererebonëta cacuatsianatsi pebexuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exanaenatsi,” pejajavatsica Dioso athëbëvetsica, Israelpijinë pemomoxi bitso jumecujunava. ²¹ Nexata Israelpijinë pemomoxi bajarapajume itsa jumetane, pecajunavi, bitso neconecojai. Moiséspijinë ata jumaittsi: “Xanë ata rabaja tacajunavi, bitso neconecojanë,” jai.

²² Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata

panepatsinexa Dioso pijatomarabetsia roviaalia
 panevajëtsinexa Diosojavabelia. Bajarapatomaratsia
 eca Dioso, piasaëtsaponaponaenë. Bajarapatomara pevënë
 Jerusalén. Eca Siónvënë tsutojumata. Bajarapatomaratsia
 Dioso pijajivi ángelevi, miles paángelevibeje, yajavaponapona.
 23 Bajarapatomaratsia payajavanacaetuatsianame
 itsamonae, pamonaë panevajënaeya jumecovënëta
 Dioso. Bajarapamonae vënëyaquinarubatsi bajarap-
 atomaratsia. Panacaetuatsianame Dioso pitabarata,
 ponë naneconitsiaexanaena daxita pamonaë naneconita
 bajaraponëjavabelia. Payajavanacaetuatsianamenua
 daxita pamonaemi tēpa Dioso pepua pejumecovënëtsivi.
 24 Panajamatabëcuenecopatame baja Jesucristojavabelia,
 ponë pejamatabëcueneta Dioso nacavecuaajibiaexana
 vaneconimi. Nexata Dioso aneconijibia nacatane. Bajayata
 Abelpijinë itsa beyaxuabatsi, ponë beyaxuabatsi, juya picani
 xanepana peyamatomobeyaxuabinexatsi. Itsiata baitsi jane
 pamatacabi Jesús beyaxuabatsi cruzata, itsajivi ata apo
 najamatabëxainae Jesús peyamatomobeyaxuabinexatsi.
 Tsipaji Jesús petëpaejava pejamatabëcueneta, Dioso
 aneconijibia taejitsia daxita pamonaë jumecovënëta Dioso.

25 Bajaraxuata Dioso pejumelivaisi vajanacatsipaebijava,
 bejumecovënëtsi. Bajayata pamonaë apo jumecovënëtsi
 Dioso Moiséspijinëta penajumecopatsilivaisi, naxuaba
 Diosovecua. Dioso apo capanepaetsi bajarapamonae.
 Vaxaitsi ata bitsoyo Dioso nacananeconitsiaexanaejitsipa
 itsa apo jumecovënëtsitsi ponë nacajunata athëbëvetsica.
 26 Paepatotata pina Dioso athëbëvetsica Sinaivënë
 tsutojumavetsica cuaicuaijai, baja pina paepatotata ira
 najëaba. Nexata icatsia xuacujinae bexëa Dioso tajëvelia
 najumecapanepaeya jumaitsi mapacueniaje: “Itsamatacabi
 icatsia ira najëabiaexanaenajë. Nexata jane baja caecuenia
 ira, itaboxo yajava, najëabiana,” jai Dioso tajëvelia
 najumecapanepaeya. 27 Xua yabara tajëvelia Dioso
 najumecapanepaeya jumaitsi, maitsi tsaneje. Mapairaje,
 itaboxo yajava, itsa najëabiana, daxitacuene xua Dioso exana
 mapanacuataje, vereverecaena. Itsiata Dioso pejumelivaisi,
 pijatomara ata, apo vereverecae tsane. 28 Xua itsamatacabi
 Dioso nacamatacopsiana athëbëtatsia vajatovevetsinexa,
 bajaraxua apo vereverecae tsane. Bajaraxuata vaxaitsi
 pexaniajamatabëcuene rajutatsi Diosojavabelia. Yaiyataeya
 vajajamatabëthëtovetsina Diosojavabelia jumai tsabiabi
 tsanetsi: “Diosomë, bitso ayaijamatabëcuenenëmë,”
 jai tsabiabi tsanetsi Dioso vajanacasivajamatabëcuene
 barëyanexa. 29 VajaDioso jivi penaneconitsiaexanaenë.

Pacuenia isoto vayofo ita tajuenajetaruca, verebiaba daxita piabejjava petajuejavata, bajara pijinia pacuenia Dioso verebiabiana pamonaē pibisiacuene pexanaēvi.

13

Pacuenia bexanavanapatsi Dioso vajanacasivajamatabēcuene barēyanexa yabara pelivaisi

¹ Pētsa pacopabame namataenetsia panenasivajava Dioso panejumecovēnētavanapaēvi. Panevajēnaeyabelia namataenetsia panaasivamēre. ² Pētsa panacofēnētame xaniavaetsia panecopiapitabiabinexa apo paneyapētaēvi ata ita pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita ángelevi, apo yapētaē ata ángelevicuene.

³ Panajamatabēnapitabiabare pamonaē jebatsi penaneconitsivi pejebabiabibota Dioso pejumecovēnētsixae. Paxamē ata, bajarapamonaē yajava, bepanenajuananeconitsivi panataema. Pamonaē ata bejiobiaexanatsi Dioso pejumelivaisi yabara, bajarapamonaē ata pajamatabēcuenyavenonare. Paxamē ata, bajarapamonaē yajava, bepapecabejiobiaexanaēvi panataema.

⁴ Daxitajivi beyaiyatane penacojiobijivi. Pajivibeje baja napitabeje, apo benavecyanamatayajitsibeje. Pebi apo bejaitsi itsava pijavavecua. Petiriva pijinia apo bejaitsi itsanē pamonavecua. Tsipaji Dioso naneconitsiaexanaena bajarapitsipibisiacuene pexanaēvi.

⁵ Pētsa bitso pajitsipame palata. Pasivajamatabēcuenebarēyamēre saya xuayovajēto paxainame. Tsipaji Dioso jumaitsi mapacueniaje: “Apo copatsinē tsane patacayavaponaponaejava,” jai Dioso. ⁶ Bajaraxuata ajumejunavijibia namataenetsia najumaitstitsi mapacueniaje:

Dioso cajena vajanacayavenonaenē. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabēnapitabiabare pamonaemi bajayata pacatsipaeba Dioso pejumelivaisi. Pacanaējēre pacuenia bajarapamonaemi Dioso pejumecovēnētsijavaveliacujinae, xaniavaetsia jinavanapa Dioso pitabarata matapania petēpaejavabelianexa. Bajarapacuenia paxamē ata Dioso pitabarata xaniavaetsia pajinavanapare matapania panetēpaejavabelianexa.

⁸ Jesucristo epatua itsajamatabēcuene apo xainae tsane. Pamatacabibeje ponapona, caejamatabēcuene xainaponaponaena. Pevajēnaeyabelia ata daxitamatacabijavabelianexa, caejamatabēcuene xainaponaponaena.

⁹ Pëtsa pacopabame panejumecovënëtsijava palivaisi baja pajumecovënëtame. Pëtsa pajumecovënëtame itsalivaisi bajarapalivaisivecua. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabëcueneta apo jamatabëcuenesaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacasivatëpa. Nexata pamonae tsiteca ëperujulivaisimi sivajamatabëjumaitsi: “Itsa jumecovënëtaponaponaenajë Dioso Moiséspijinëta penajumecopatsilivaisi, nexata xanë ata Dioso necapanepaena,” sivajamatabëjai, bajarapamonae saya jamatabëcuenenavëxaniaba. Bajarapitsijamatabëcuene penajamatabëxainaevi, apo capanepaetsi tsane Diosojavabetsia. Tsipaji Jesús pesivatëpaejavatsi, apo jumecovënëtsi. ¹¹ Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinë pevi sacerdotenë itsa tajuita, tomarapënëyabelia tajuitabiaba. ¹² Bajaraxuata Jesús ata Jerusalén tomarapënëyabelia bejiobiaexanatsi. Bajaraxuacujinae beyaxuabatsi. Nexata daxita pamonae jumecovënëta Jesús pesivatëpaejavatsi, bajarapamonae Jesús pijana pejamatabëcueneta Dioso vecuaajibiaexanatsi pibisiacuene pexanaeneconimi. ¹³ Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtatsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatëpaenexa vajaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaeevetavanapatsi athëbëpijtomara, patomarata patsijitsiatsi athëbëtatsia. ¹⁵ Jesucristo vajanacasivatëpaexae, Dioso nacamocopata vajavajëtabiabinexa Diosojavabelia. Nexata itsa vajëtabiabinatsi Diosojavabelia, jumaitsitsi tsabiabi tsane: “Diosomë, bitso ayaijamatabëcuenenëmë,” jaitsi tsabiabi tsane Diosojavabelia. Bajarapacuenia

vajajumaitsiabijava Diosojavabelia, Dioso taena ofrendacuena bevajarajutaponaejava Diosojavabelia. Bajaraxuata itsa vajëtabiabianatsi Diosojavabelia, bajarapacuenia jumai tsabiabi tsane. ¹⁶Pëtsa panacofënëtame pexaniacuene panetoexanavanapaejava itsamonaejavabelia. Itsajivi penamatavenonaejava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaejava, Dioso pacasivajamatabëcuenebarëya tsane.

¹⁷ Pamonaë ancianovi, xua pacaitoroba, pajumecovënëtabiabare. Itsamonae ata, pamonaë pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabare. Bajarapamonaë yapëtanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovënëtabiabianame papecaevetsivi papecaitorobicuenia, nexata papecaevetsivi jamatabëcuenyavenonaeya pajinavanapaename. Nexata pacasivajamatabëcuenebarëya tsane papecaevetavanapaejava yabara. Paxamë itsa apo pajumecovënëtsimë tsipae, nexata papecaevetsivi pacasivajamatabëcuenebëjai tsipae. Nexata papecaevetsivi toacuenebi tsipaetsi papecajamatabëcuenyavenonaenexa Dioso panejumecovënëtsijava yabara.

¹⁸ Panetovajëtaponaename Diosojavabelia. Paxanë pajamatabëjumaitsinë: “Vaxaitsi baja apo naneconitsitsi Diosojavabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavanapaenexa, panetovajëtsianame Diosojavabelia. ¹⁹ Panetovajëtaponaenamenua Diosojavabelia Dioso patanetocopatsinexa pataponaenexa paxamëjavabelia. Tsipaji icatsia pajitsipajë bepijia patapatsinexa paxamëjavabelia.

Pacuenia Pablo Dioso pejumecovënëtsivi tovajëta Diosojavabelia, pacuenia ata jamatabënajina itsamonae Dioso pejumecovënëtsivi, yabara pelivaisi

²⁰⁻²¹ Jesucristo vajanacasivatëpacujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëabetsia vajanacacapanepaejavanexa daxitamatacabijavabelianexa. Dioso yavenona daxitajivi jamatabëcuenexanepanaeya pejinavanapaenexa. Nexata pacatovajëtatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajëtajënuu Diosojavabelia Jesucristo pejamatabëcueneta vajanacajamatabëcuenexanebinexa pacuenia jitsipa. Pacuenia oveja pexainaenë xaniavaetsia

evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. Jesucristo bitso ayaijamatabëcuenenë tsaponapona daxitamatacabijavabelianexa! Bajara itsi tsane.

²² Tajamonae, pacaitorobatsi xaniavaetsia panenamuxu-naevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxu-jjobinexa panevajënaeyabelia paneajamatabëcuenesaënexa Dioso panejumecovënëtsijava.

²³ Pexanialivaisiyo pacatoyaquinatsi patacatsipaebinexa mapacueneje. Vajabananë Timoteo rabaja pitsapa penaneconitsivi pejebabiabibovecua. Itsa patsiarena bepijiayo xanëjavaberena, nexata barëponaenajë paxamëjavabelia.

²⁴ Nebajacobiana daxita Dioso pejumelivaisita papecaevetsivi, daxita vajamonae Dioso pejumecovënëtsivi yajava. Vajamonae ata, Italia nacuapijivi, pacajamatabënajinalia.

²⁵ Daxita paxamë pacatovajëtatsi Diosojavabelia papecayavenonaenexa Dioso. Bajara itsi tsane.

Mapabaxutoje Santiago toyaquina Dioso pejumecovënëtsivijavabelia

Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi

¹ Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudíovimë patacabajacobinexa. Israelpijinëmi pexi doce ponëmibeje papemomoxiyajuvënëvimë. Pepo panijanacuata picani panejinavanapaevimi. Aeconoxae baja pepo panijanacuamivecua, nacayajatsia pajinavanapame daxita nacuanëjva.

Pacuenia Dioso pejumecovënëtsivi itsa jamatabëyapëtane pacuene xanepana pexanaenexa, bevajëta Diosojavabelia yabara pelivaisi

² Tajamonae, pasivajamatabëcuenebarëyamë tsane daxitacuene, apo panejitsipaecuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcueneëjëtsinexa Dioso panejumecovënëtsijava yabara. ³ Bajarapacuenia Dioso panejumecovënëtsivi pacajamatabëcueneëjëtaponae paneajamatabëcuenesaë tsaponaeenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. ⁴ Apo panejitsipaecuene pacatocopiapatsi ata, pajamatabëcuenesaëmë tsavanapae tsane bajayajebi. Nexata pajamatabëcuenevitsabaponae name Diosojavabelia. Nexata apo pacatosai cae tsane itsalivaisi ata panejamatabëëthëtota.

⁵ Paxamë itsa pajamatabëyapëtaneme pacuene xanepana paneexanaenexa, nexata bepavajëtame Diosojavabelia papecayapëtaeyaexanaenexa Dioso. Nexata Dioso pacayapëtaeyaexanaenexa pacuene xanepana paneexanaenexa. Dioso cajena bayapëtaeyaexana daxita pamonaevajëta bajaraponëjavabelia. Apo jumeitavetsi cajena itsa vajëtatsi. ⁶ Itsa pavajëtame Diosojavabelia, pajamatabëjumaitsimëre: “Dioso cajena nacayapëtaeyaexanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtaeyaexanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtaeyaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi

Dioso yapëtaeyaexanaejitsiatsi. ⁷⁻⁸ Bajarapajivi anijajamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtaeyaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

⁹ Dioso pejumecovënëtsinë apo xinae ata pecobecovëjavayo, jivi apo yaiyatae atatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsixaetsi Dioso pijajivitonënexa, apo bejiobi tsane daxitamatacabijavabelianexa. ¹⁰ Dioso pejumecovënëtsinë itsa bitso pexainaenë pexinaejava, itsamonae itsa yacajërëtatsi pexinaeacuene, itsiata bejamatabëcuenebarëya Dioso pejumecovënëtsinëxae. Tsipaji pacuenia ponatoxi bepijia matonoverevereca, bajara pijinia itsi tsane bitso pexinaeacuene ata. Bepijia vereverecaena. ¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepijia. Bajara pijinia itsi tsane bitso pexinaejava pexinaevi ata. Yajavavereverecaena pexinaejava pecanajetanucaepatota ata.

Pacuenia Dioso jivi apo jamatabëcueneëjëtsi pibisiacuene pexanaeyaexanaenexa yabara pelivaisi

¹² Pamonaë jamatabëcueneëjëtsi atatsi, najamatabëcuenecataita pibisiacuene pexanaeyaniva, bajarapamonaë jamatabëcuenebarëya. Tsipaji itsa vecuapanepa pejamatabëcueneëjëtsijavatsi, pibisiacuene exanaenejeva, nexata bajarapamonaë Dioso rajutsianatsi pexaniacuenejava. Rajutsianatsi matacabi apo pevereverecaëjava. Bajarapacuene yabara Dioso najumecapanepaëya jumaitsi perajutsinexatsi pamonaë jitsipa Dioso. ¹³ Itsa pacajamatabëcueneëjëta pibisiacuene paneexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcueneëjëta pibisiacuene taexanaenexa,” pajamë pëtsa. Dioso cajena apo jamatabëcueneëjëtsi itsajivi ata pibisiacuene pexanaeyaexanaenexa. Itsajivi ata pijinia apo caëjëpaetsi pejamatabëcueneëjëtsinexa Diosojavabelia pibisiacuene pexanaenexa Dioso. ¹⁴ Pajivi jamatabëcueneëjëtatsi pibisiacuene pexanaenexa, bajarapajivi copiaya pejamatabëëthëtota jamatabënaponapona papibisiacuene jamatabëexana. Nexata jane baja itsa jamatabëcueneëjëtatsi pibisiacuene pexanaenexa, bajarapapibisiacuene exana.

15 Pajivi pibisiacuene exana, bajarapajivi exana pacuenia copiaya pejamatabëethëtotā najamatabëxaina. Nexata tsiteca pibisiacuene itsa exanapona, pepacuene Diosovecua naxuabiana bajarapapibisiacuene pexanaponaexae.

16 Tajamonae bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcueneëjëta pibisiacuene taexanaenexa,” pajamatabëjamë pëtsa. 17 Tsipaji daxita pacuene pepo pexaniacuene, Dioso baja cajena vajanacatoitorobicuenet-sica. Bajaraponë pexanaenë daxita xua naitayotarubena itaboxotatsia. Dioso cajena daxitamatacabijavabelianexa caejamatabëcuene penajamatabëxainaenë. Caejamatabëcuene Dioso nacasivanajamatabëxaina vaxaitsijavaberena. 18 Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtsi, Dioso pexitsi nacaexana. Pamonaē ata cotocaevi Dioso jumecovënëta, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonaē xaniavaetsia jumecovënëta Dioso yabara pelivaisi

19 Tajamonae bitso patacaasivavi, pacanaëjëtsianame malivaisije, palivaisi pacatsipaebijitsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacuaicuajiamë abaxë copiaya xaniavaetsia panajamatabëxainaenejevamë. Apo bepaanaepanaemënuā bepī-jia. 20 Tsipaji itsa anaepanatsi, Dioso apo toexanaetsi pexaniacuene, pacuene Dioso jitsipa. 21 Bajaraxuata pacopabare daxita pibisiacuene panenajamatabëxainaejava. Pacopabarena daxita pibisiacuene paneexanaejava itsamonaejavabelia. Dioso raja pejumelivaisi pacatsijamatabëuba. Bajaraxuata beveliajamatabëcuenevi nataeya pajumecovënëre Dioso pejumelivaisi. Bajarapalivaisi itsa pajumecovënëtamē, nexata pacacapanepaena Diosojavabelia.

22 Pacuenia Dioso pejumelivaisita jumaitsi, jumecovënëtsiaya paexanaponare. Pëtsa pajamatabëjumaitsimë: “Pacuenia Dioso pejumelivaisita jumaitsi, apo exanaē atanë, apo itsacuene,” pajamatabëjamë pëtsa. Tsipaji saya pajamatabëcuenenavëxaniabijitsipame. Nexata itsa apo paexanaemë tsipae pacuenia Dioso pejumelivaisita jumaitsi, pananeconitsipame Diosojavabelia. 23 Pajivi

jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponë naitabaratane tsaxuta. ²⁴ Ponë tsaxuta naitabaratane, penaitabarataecujinae pona baja. Nexata bajaraponë bepíjia nacofënëta pacuenia itabarajumapeitsi. ²⁵ Dioso cajena pejumelivaisi bitso xanepana. Caējëpatsinua vajanacacapanepaenexa bajaraponëjavabelia. Pajivi daxita bajarapalivaisi pitorobicueniatsi exanaponapona copatsinejeva, bajarapajivi bitso Dioso yavenonaenatsi daxitacuenejavabelia.

²⁶ Pajivi jumaitsi ata: “Xanë bitso toexanaponapona jë Dioso pejitsipaecuenia,” jai ata, itsiata itaxutojema itsa cuaicuaijai tsabiabi, bajarapajivi saya jamatabëcuenenavëxaniaba. Tsipaji Dioso apo pejitsipaecuenia cuaicuaijai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. ²⁷ Dioso pejumecovënëtsijivi, pajivi Dioso aneconijibiatanetsi, exanaponapona mapacueniaje. Yavenona tsonijivixi. Yavenonanua pamona pevecuatëpaevitsi bitso itsa namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

2

Pacuenia Dioso pejumecovënëtsivi muxujiobatsi daxitajivi najëpaeya jamatabëcuenexanepanaeya petaenexa yabara pelivaisi

¹ Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. ² Nexata panenacaetuatsijavata, rionë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejiobinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje?

³ Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejiobinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia itsa paexanaejitsipame, pexaniacuene apo paexanaemë tsipae Dioso pitabarata. ⁴ Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuena panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamonaē apo pexainaēvi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabēcuenecopatsiana Cristojavabelia, bitso pexainaēvi tsane athēbētatsia, Dioso pijanacuataatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarēevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. ⁶ Itsiata baitsi jane bajarapacuenia bepejiobivi yabara pejumaitsijava payapētaē atamē, paxamē bijiaya pataeyabiabame bepejiobivi. Ricovi baja cajena xainapona bitso pexainaējava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. ⁷ Ricovi cuaicuaijai tsabiabi pibisiacuena Cristo yabara, ponē vaxaitsi yaiyataeya jumecovēnētavanapatsi.

⁸ Dioso pejumelivaisibaxutota jumaitsi mapacueniaje: “Asivamēre itsamonae ata pacuenia xamē nijacuata nasivamē,” jai. Bajarapalivaisi pexanialivaisi bitso daxitalivaisianē matatoxenetsia. Nexata bajarapalivaisi pepacuene itsa pajumecovēnētsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tsiapaji najēpaeya apo pataemē tsiapae daxitajivi Dioso papecaitorobicuenia. ¹⁰ Pajivi jumecovēnētsi ata Dioso Moiséspijinēta penajumecopatsilivaisi, itsiata bajarapalivaisita caelivaisiyo itsa apo jumecovēnētsi, nexata itsiata naneconitsiana Diosojavabelia bajarapalivaisita caelivaisiyo apo pejumecovēnētsixae. Nexata bajarapajivi daxita bajarapalivaisi apo bepejumecovēnētsijivicuenia, Dioso taenatsi. ¹¹ Dioso jumaitsi: “Pētsa jaitame itsava nijavavecua,” jai. Petiriavinexa pijinia jumaitsi: “Pētsa jaitame itsanē amonavecua,” jai. Dioso icatsia itsajumeyo jumaitsi: “Pētsa beyaxuabame jivitonē,” jai. Nexata ponē apo jaitsi ata itsava pijavavecua, itsiata itsa beyaxuaba jivitonē, Dioso tanetsi daxita bajarapalivaisi apo pejumecovēnētsinēcuenia. ¹² Jesucristo papecaitorobicuenia itsa paexanaename, nexata apo pananeconitsimē tsane Diosojavabelia. Itsa apo pajumecovēnētsimē tsane, nexata pananeconitsianame Diosojavabelia. Bajaraxuata itsa pacuaicuaijamē, pacuaicuaijamēre pexanialivaisi. Paexanavanaparenua pexaniacuene pacuenia Jesucristo pacaitoroba. ¹³ Paxamē itsa apo paitaxutotsoniataemē itsamonae ata, nexata juya Dioso apo pacaitaxutotsoniatae

tsane pamatacabi Dioso naneconitsiaexanaena daxitajivi pibisiacuene pexanaeneconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

¹⁴ Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa. ¹⁷ Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneyapëtaetsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. ¹⁹ “Caenë rabaja tsaponaponae Dioso,” pejailivaisi paxamë pajumecovënëtime. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi

yajava, jumecovënëta: “Caenë rabaja tsaponaponae Dioso,” pejailivaisi. Bajaraxuata dovathi pijajivi barëneconecoja pecajunavi. ²⁰ Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtime. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. ²¹ Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuenia tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. ²² Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcueneitajëta pepacuene Dioso pejumecovënëtsijava pejamatabëëthëtojavavetsina. ²³ Nexata bajarapajamatabëcuenelivaisi yabara Dioso pejumelivaisibaxutota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: “Abraham raja Dioso piasivanëtsi,” jai tsabiabi.

²⁴ Nexata baja paxamë payapëtaneme mapacueneje. Pajivi jumecovënëtsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi. ²⁵ Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tsipaji copiapita xaniavaetsia Israelpijinë pemomobeje. Bajaraponëbeje jivi peyaenëbinëbeje va-

jabitsaë pexanaenexa bajara patomarpijivijavabelia. Rahabpijivami yavenonanua bajaraponëbeje peponaenexabeje saicaya namutua pijavajabitsaë pebeyaxuabiyanivatsibeje. Bajarapacuenia Rahabpijivami pexaniacuene pexanaexae Dioso aneconijibia tanetsi. ²⁶ Piasaëtsaponaponaejivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevajēnaeyabelia. Bajara pijinia vaxaitsi ata jamatabēcuenetsitsi Jesús pelivaisi vajajumecovēnētsivi. “Xanē jumecovēnētajē Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabēcuenetēpaevi Dioso tsitajinavanapatsi.

3

Pacuenia itsi vajeabarēto yabara pelivaisi

¹ Tajamonae, paxamēyajuvēnēvi vēnēlivaisitaniji pacuenia ayaibitsaēto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaēto apo benaexanae jivi livaisi petsipaebaponaevinexa. Paxamē rabaja payapētaneme mapacueneje. Paxanē Jesús pelivaisi jivi patatsipaebaponaevi, paitavetaponajē pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paexanaejitsipajē, Dioso bitso ayaicuenia panenaneconitsiaexanaejitsipa daxitajivi matatoxenetsia. ² Daxitatsi vaxaitsi itsajavata banacajumejemaba pibisiacuenia vajacuaicuaijainexa, pacuenia picani apo becuaiicuaijaitsi. Pajivi pibisiacuenia apo cuaicuaijai, bajarapajivi ajamatabēcuenesaë baja Diosojavabelia. Nexata bajarapajivi caējēpatsi penajamatabēcuenesaëtsinexa daxita pibisiacuene pexanaeyaniva. ³ Caballo vajavēsimumufetsinexa tsicuiboxatatatsi freno. Nexata freno caballovecua tsiquirijavayo ata, itsiata caējēpa caballo vajavēsimumufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenē tsiquiritenapayo ata, barcotabufe cajēnapona itsabelia jamatabēpona peponaenexa. ⁵ Bajara pijinia itsi tsiquiriisotoyo ata. Itsa tajua, naexana ayaiisoto petajuenexa pinijiunu ata. Bajara pijinia itsi vajeabarēto ata. Tsiquirijavayo picani vajeabarēto. Itsiata caējēpatsi pecuaicuaijainexa ayailivaisi. ⁶ Vajeabarēto cajena ayai, pacuenia isoto ayai. Vajeabarētota raja pibisiacuene exanatsi daxita vajavi matatoxenetsia. Nexata vajacuaicuaijajava nacajamatabēcuenebijiana. Tsiquirijiviyotsijavaveliacujinae vajatēpaejavabelianexa, bajarapacuenia cuaicuaijaitsi. Dovathi vajanacaitorobijava vajajumecovēnētsixae,

cuaicuaijaitsi pibisiacuenia. ⁷ Pacanaējēre mapacueneje. Jivi caējēpatsi penaitajuaniaexanaenexa daxitaviriadajubiya-juvēnēvi. Caējēpatsinua penaitajuaniaexanaenexa unupijivi ata, pepunaevi ata. Caējēpatsinua penaitajuaniaexanaenexa pecotobēxēta pejinavanapaevi ata, manuamenepijidujuai ata. Itsamonaē bajarapacuenia naitajuaniaexana baja pejumecovēnēsinsinexatsi. ⁸ Itsiata baitsi jane itsajivi ata apo caējēpaetsi penaēbarētoitavetsinexa jumejemabiaya pibisiacuenia pecuaicuaijajava pecopatsinexa. Vajaēbarēto cajena bitso abeje. Apo nacacaējēpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajaēbarēto. ⁹ Vajaēbarētota pexaniacuenia jumaitsitsi vaxa Diosojavabelia: “Xamē bitso ayaijamatabēcuenenēmē,” jaitsi. Vajaēbarētota icatsia pibisiacuenia cuaicuaijaitsi itsamonaējavabelia. Bajarapamonae picani beyaiyatanetsi. Tsiapaji Dioso nacuenecataeya pexanaevitsi. ¹⁰ Caeēbarētota pexaniacuenia cuaicuaijaitsi Diosojavabelia. Pibisiacuenia ata cuaicuaijaitsi itsamonaējavabelia. Tajamonaē, apo hexanaetsi cajena bajarapacuenia. ¹¹ Pacanaējēre mapacueneje. Mera pepitsapaemēthēatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higuēranaējavaverena apo pitsapae saicayacuai. Uvanaējavaverena ata apo pitsapae saicayacuai. Jume cajena. Bajara pijinia itsi mera pepitsapaemēthē. Caejavatsina apo pitsapae pexaniara, piatsaxara yajava. Bajara pijinia itsi vajaēbarēto ata. Caeēbarētota apo becuaiicuaijaitsi pibisialivaisi, pexanialivaisi yajava. Nexata becuaiicuaijaitsi ēpexanialivaisi.

Pacuenia Dioso pijajivi yapētaeyaexana pexanaenexa pexaniacuene yabara pelivaisi

¹³ Paxamē rabaja xaniavaetsia pajumeyapētaneme Dioso pejumelivaisi. Nexata itsamonaē pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonaē pexaniacuene bepatsitaexanavanapame beveliajamatabēcuenēvi nataeya. Nexata daxitajivi pacacueneyapētaena bitso panejumeyapētaevicuene Dioso pejumelivaisi. ¹⁴ Itsiata baitsi jane bitso itsa pacuenecaēbabiabame itsamonaē, itsa pajitsipabiabamēnua jivi paneevetsivinexa papecaexanaenexa, pētsa jamatabēcuenēnavēxaniabiaya pajumaitsimē mapacueniaje: “Xanē bitso xaniavaetsia yapētaniji Dioso pejumelivaisi,” pajamē pētsa. Tsiapaji saya panajamatabēcuenē capaebijitsipame xaniavaetsia Dioso pejumelivaisi paneyapētaejava. ¹⁵ Dioso pejumelivaisi

itsa payapëtaejitsipame xaniavaetsia, nexata apo panajamatabëxainaemë tsipae bajarapacuenia. Dovathi rajane pejamatabëcueneta pacaitoroba panenajamatabëxainaenexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. ¹⁶ Itsajota jivi cuenecaëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuenejêpaeya apo jinavanapae. Daxitacuene pibisiacuene ata exanavanapa. ¹⁷ Biji rajane Dioso itsa nacayapëtaeyaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatanetsi vajaexanaeyaniva bajarapamonaejavabelia apo pejitsipaecuenia. Najamatabëxainatsi itsamonae ata vajanacamuxujobilivaisi vajajumeyapëtaenexa. Itaxutotsoniatanetsi itsamonae ata. Pexaniacuene exanatsi. Apo najamatabëcuene epatajërërëcaetsi. Apo yamaxëitojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana. ¹⁸ Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuene nua exanavanapaenatsi.

4

Pacuenia jamatabëcueneitsi pajivi jitsipa mapanacuapijicueneje yabara pelivaisi

¹ ¿Detsa xuajitsia paxamëyajuvënëvi anaeya namataenetsia pijanajumenotabiabi pecanabeyabiabi? Bajarapacuenia najumeanaenotabiaba tsipaji pejamatabëëthëtota bitso jitsipa pexanaenexa daxita xua pibisiacuene. Bajaraxuata nabeyabiaba. ²⁻³ Paxamë picani pajitsipame itsacuenejava panexainaenexa. Itsiata apo pacacajêpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexainaejala. Nexata pexainaevi payabarabeyabiabame panejacajërëtsinexa pecobecovë. Paxamë apo paxainaemë panejitsipaecuenia. Tsipaji pavajëcabiabi atamë Diosojavabelia, itsiata apo pacarajutabiabi xua pavajëcame. Tsipaji saya bajaraxua pavajëcabiabame paneexanaenexa daxita xua pibisiacuene. ⁴ Caejamatabëcuene Diosojavabelia apo paxainaemë. ËDioso pijacuene apo pajitsipaemë. Mapanacuata pexainaecuene ata bitso payajavajitsipame. Bajarapacuenia panenajamatabëxainaexae, pacuenia petiriva jamatabëcueneitsi, pova pamonavecua jaita itsanë, bajarapajamatabëcueneitsimë. Payapëtaneme rabaja mapanacuapijicuene bitso pejitsipaevi,

bजारपामोनाे डोसो बेपिजावजबित्साे नाेखाना. बाजारा पिजिना पाखामेे अता पात्सिमेे. ⁵ बाजारपाजामाताबेेकुेने यबारा डोसो पेजुमेलिवािसिबाखुता जुमात्सि मापाकुेनियाे जावजानाेज्जेत्सिनेखा खानिवात्सिया डोसोजावबेलिया: “एस्पिरितु सान्तो, पुने नाकत्सिजामाताबेेका, बाजारापुने बित्सो नाकासिवा. बित्सो नाकातोजित्सिपा वाजासिवानेखा ऐडोसो,” जाे डोसो पेजुमेलिवािसिबाखुता वाजाजित्सिपाेयानिवा मानापानाकुापिज्जिकुेनेजे. ⁶ डोसो काेना नाकायावेना वाजानाजामाताबेेकुेने कातात्सिनेखा पिबिसिाकुेने वाजाखानाेयानिवा. डोसो पेजुमेलिवािसिबाखुता जुमात्सि मापाकुेनियाे: “डोसो यावेना पुमोनाे बेवेलिजामाताबेेकुेनेवि नाताने. पुमोनाे पिजिना बेयािजामाताबेेकुेनेवि नाताने, डोसो अपु यावेनाे,” जाे डोसो पेजुमेलिवािसिबाखुता. ⁷ नेखाता बेवेलिजामाताबेेकुेनेवि नाताेया पाखानावानापारे पाकुेनिया डोसो पाकातोजित्सिपा. पानावेकुाैतावेरे दुवथी. नेखाता दुवथी पाकावेकुानाेजाताबाजिरावियाना. ⁸ पावाजेरे डोसोजावबेलिया. नेखाता डोसो पाकायावेनाेनाेना. पाखामेे पिबिसिाकुेने पानेखानाेवि, पाकापारे बाजारपाकुेने. पाखामेे अनिजामाताबेेकुेनेबेजे पानेखानाेवि, डोसो पिजालिवािसि, पिबिसिजामाताबेेकुेने याजावा. पाकापारे बाजारपाजामाताबेेकुेने डोसो पापेकाजामाताबेेकुेने खानिवात्सिनेखा पिबिसिजामाताबेेकुेनेवेकुा. ⁹ पिबिसिाकुेने पानेखानाेनेकुनि यबारा, बित्सो पानात्सिनाजामाताबेेखानारे. बित्सो पायााुरामेरेनुा. पेत्सा पायाबारेयामेे. ¹⁰ बेवेलिजामाताबेेकुेनेवि पानाताेमा डोसो पितारता. नेखाता पिबिसिाकुेने पानेखानाेनेकुनिमिवेकुा, डोसो पाकाजामाताबेेकुेनेयावेनाेनाेना. नेखाता पानाजामाताबेेकुेनेयुत्सिानामे डोसोजावबेलिया.

Pacuena nacaitaveta itsamonae Dioso pejumecovënëtsivi pibisiacuena vajabaracuaicuajaiyaniva yabara pelivaisi

¹¹ ताजामोनाे, पेत्सा नाजुमत्सेनेत्सिया नामातानेत्सिया पानाबारაკुाैकुाैजामेे. पाजिवा नाजुमत्सेनेत्सिया बारაკुाैकुाैजिाे डोसो पेनाजुाेजुमेकुवेनेत्सिवा, बाजारपाजिवा नानेकुनिता डोसोजावबेलिया. डोसो पेनाजुाेजुमेकुवेनेत्सिवा, पिबिसिाकुेने पेखानाेजावा खानिवात्सिया कुेनेयापेताेनेजेवा, इत्सा जामाताबेेजुमात्सिनुा: “बाजारपामोनाे डोसोवेकुा नाखुाबियाना पिबिसिाकुेने पेखानाेखाे,” इत्सा जामाताबेेजाे, नेखाता बाजारपाजिवा अता नानेकुनिता डोसोजावबेलिया. डोसो पेनाजुाेजुमेकुवेनेत्सिवा, नाजुमत्सेनेत्सिया इत्सा बारაკुाैकुाैजिाे, नेखाता अपु जुमेकुवेनेत्सि पाकुेनिया डोसो इतरोबत्सि. पाकुेनिया डोसो इतरोबत्सि, इत्सा अपु जुमेकुवेनेत्सि, नेखाता अपु बेपेखानिजालिवािसि ताने. कारानाता बाजारपाजिवा जिवा बेपेनानेकुनित्सियाेखानाेने नाताने. ¹² काेने डोसो नाकातानाजुमेकुपाता वाजाजुमेकुवेनेत्सिनेखा. बाजारा जाने पुने नाकानानेकुनित्सियाेखानाेना पिबिसिाकुेने

vajaexanaeneconi yabara. Bajaraponë caenë caējëpatsinua pejumlahitsinexa itsajiviyojavabelia: “Xamë pepacuene naneconitame. Nexata nevecuanaxuabianame infernojavabelia,” pejainexa. Itsa jume, caējëpatsi pejumlahitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamë Dioso apo pacatocopatsi itsamonae yabara panejumlahitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejainexa.

Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi

¹³ Panenamuxunaevere mapalivaisije. Paxamë abaxë xaniavaetsia payapëtaenejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamë tsabiabi. ¹⁴ Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsipaji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaepatoyo saya tsiquirimatacabiyota jinavanapatsi vajatëpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. ¹⁵ Nexata saya bepajumaitsimë: “Itsa Dioso nacatocopatsiana abaxë vajaasaëtsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamë saya. ¹⁶ Paxamë saya bepaayaijamatabëcuenevimë panataeyabiabame. Nexata paneexanaejavanexa, abaxë tajëvelia panavajunupaebabiabame panatsivajënaeyapëtaenejevamë xua Dioso pacatocopatsijitsia paneexanaenexa. Bajarapacuenia ayaijamatabëcuenenë nataeya panenavajunupaebabiabijava, pibisiacuene. Tsipaji panajamatabëxainabiabame bepanijacuata itajara paneexanaejavanexa. Apo pacanaëjëtsimë bajaraxua Dioso papecatocopatsijava, bajarapacuenia paneexanaenexa. ¹⁷ Pajivi yapëtae ata pacuenia picani bexana, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxujiobatsi yabara pelivaisi

¹ Bitso panexainaevi, ipanenamuxunaevere mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. ² Bitso panexainaecuene panexaniavaetsijavami, pacatotsabanaena. Pexaniavirijavanë, panenaxatabijavanëmi ata, daxita pacatoucubaxaena. ³ Palatanëanë ata, bitso penamatamotsinëanë, pacatotasibianatsi. Nexata nayapëtaena bajarapapalata apo panecanacuenebijava. Bajarapapalatata apo paneyavenonaexae itsamonae, pacatotasibianatsi. Isoto pacaveriajaviana daxita panexainaejava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajënae tsaponae pecopiapatsinexa. Dioso pacananeconitsiaexanaena. Tsipaji ëpaxamënexa panatoxaniavaetame panexainaecuene. ⁴ Panejumetaema. Pamonaë pacatonacueneba panijacuene, bajarapamonae tsipaeba itsamonaejavabelia paneyamaxëitojorobijava. Apo pamatamotsimë xaniavaetsia pacuenia picani pamatamotsiapaebame. Nexata vajatuxanenë Dioso, daxita athëbënacuatatsia pevetsinë, jumetanetsi bajarapamonae pepaebijava xaniavaetsia apo panematamotsijava. ⁵ Mapanacuata picani panatsitajinavanapame xaniavaetsia. Pacabarëyamë tsavanapae panexainaecuene. Paexanavanapame panejitsipaecuenia. Pacuenia baca bitso penasitsiepatota beyaxuabatsi, bajara pijinia pacuenia paxamë ata pacatoimoxoyo baja Dioso papecananeconitsia exanaematacabinexa, bitso panenaneconitsixae Diosojavabelia. ⁶ Jivi pananeconitsiaexanabiabame. Pabeyaxuababiabamenua planeconijibivi ata. Bajarapacuenia paexanabiabame pamonaëjavabelia apo caëjëpaetsi papecanayajiviitavetsinexa.

Pacuenia icatsia petuxanenë patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopiaevetavanapaejava vajatuxanenë matapania icatsia pepatsimatacabitsicajavabelianexa. Pabi penacuenebinë, vajënaeeveta ema peubinexa peubijava. Peubiveretsicujinae peubijava, bajayajebi ajamatabëcuenesaëya evetaponapona petonaveretsijavabelianexatsi. ⁸ Bajara pijinia pacuenia paxamë ata bajayajebi itsamonae pibisiacuene pacaexanae ata, pajamatabëcuenesaëmë tsane. Pëtsa pajamatabëcuenefaefaname. Tsipaji rabaja imoxoyo pevajënae tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuaicuajamë Diosojavabelia

panenaneconitsiyaniva. Tsipaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënae tsaponae pepatsinexatsica. Bajaraponë pacaevivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjère profetavimi, pamonami bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainae. ¹¹ Pamonae ajamatabëcuenesaë, bajayajebi bejiobiaexanae atatsi, bajarapamonae aeconoxae baja topexaniacuenetsi tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcueneëjësicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuene.

¹² Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuaijamë itsamonaejavabelia, pexaniajailivaisi pacuaicuaijamë tsabiabi tsane. Pëtsa Dioso pevënë pacuaicuaijamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaittsi mapacueniaje Dioso pitabarata,” pajamë pëtsa. Tsipaji baja pexaniajailivaisi itsa pacuaicuaijamë tsabiabi tsane, itsamonae ata pacacueneyapëtaena apo panenajumetsënëtabiabicuene. Nexata itsa pacayanijoba itsacuenjavayo yabara, roviaia pajumaitsimëre pacuenia panajamatabëxainame. Itsa pajejamëjitsia, pajejamëre roviaia. Itsa jume, “jume!” pajamëre roviaia. Bajarapacuenia roviaia itsa paxaniajamë tsabiabi tsane, nexata apo pananeconitsimë tsane Diosojavabelia. Tsipaji Dioso pevënë apo pacuaicuaijamë tsabiabi tsane papecajumexaniataenexa itsamonae.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. ¹⁵ Petovajëcaejavata, daxita ancianovi itsa jamatabëjumaitsi: “Dioso cajena pepacuene jamatejemayaexanaenatsi mapajivije,” itsa jamatabëjai

ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi. ¹⁶ Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënuua, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëëthëtojavavetsina itsa vajëta, bajaraponë jumenamatamota Diosojavabelia. Ayaicuenia Dioso pexaniacuene toexanaenatsi. ¹⁷ Diosojumepaebinëmi, profeta Elíaspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

¹⁹ Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi. ²⁰ Bepayapëtaneme mapacueneje. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabiyaniva pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeconimi.

Mapabaxutoje San Pedro copiaya toyaquina Dioso pejumecovënëtsivijavabelia

Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi

¹ Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatomaravecua, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ² Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espíritu Santo pejamatabëcueneta pacatsata Jesucristo panejumecovënëtanapaenexa. Dioso pacaitapeta papecavecuaajibiaexanaenexa, daxita pibisiacuene paneexanaeneconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevécua.

Pacuenia Jesucristo pelivaisi pejumecovënëtsivi Dioso rajutsianatsi matabi apo pevereverecaejava yabara pelivaisi

³ Vaxaitsi vajatuxanenë Jesucristo paxa Diosojavabelia jumaitsitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matabi apo pevereverecaejava. ⁴ Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. ⁵ Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajjinavanapaepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacacapanepaenexa. Pamatabi mapanacuaje vereverecaena, nayapëtaena jane baja xua Dioso nacarajutsiana.

6 Bajaraxuata paxamē Dioso papecacapanepae-javanexa, pasivajamatabēcuenebarēyamēre tsavana-pae. Aeconoxae abaxē mapamatacabitaje pacajamatabēcuenebejibitsi ata daxitacuene papecajamatabēcueneējētsijava, itsiata pasivajamatabēcuenebarēyamēre tsavanapae. 7 Pacajamatabēcueneējētaponā papecajamatabēcueneyapētaenexa pepacuene panenajamatabēcuenecopatsijava Jesucristojavabelia. Oronanito ata itsa ējēta, baseta isotota peyapētaenexa itsa pepacuene orojava. Panenajamatabēcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamē ata pacajamatabēcueneējētaponā papecajamatabēcueneyapētaenexa xaniavaetsia panenajamatabēcuenecopatsijava Jesucristojavabelia. Nexata itsa pavecuapanepaenā papecajamatabēcueneējētsijava, panevajēnaeyabelia pajamatabēcuenesaēmē tsaponae tsane Jesucristojavabelia panenajamatabēcuenecopatsijava. Nexata pamatacabi vajatuxanēnē Jesucristo patsianica, pacasivajamatabēcuenebarēya tsane. Dioso ata pacasivabarēya tsane. Daxitajivina pacayaiyataena.

8 Paxamē abaxē Jesucristo apo patae atamē, itsiata pajitsipame. Aeconoxae apo patae atamē Jesucristo, itsiata panajamatabēcuenecopatame bajaraponējavabelia. Jesucristo bitso pasivajamatabēcuenebarēyamē tsavanapae. Jesucristo panesivajamatabēcuenebarēyajava, itsa panajamatabēcuenevajunupaebame itsamonaejavabelia, epatua saya payapētaeayaexanā. Tsipaji xaniavaetsia apo payapētaēmē xaniavaetsia panenajamatabēcuene vajunupaebinexa itsamonaejavabelia peyapētaenexa pacuenia bēpēnēa pajamatabēcuenebarēyamē. 9 Jesucristo papecasivatēpaexae, panajamatabēcuenecopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaeconimi yabara.

10 Bajayatami Diosojumepaebivimi profetavi bajayajebi livaisijaitaponā peyapētaenexa. Nexata baja profetavi itsa yapētane pacuenia Dioso pijajivi capanepaejitsia, nexata profetavi tajēvelia vajunupaebaponā jivijavabelia. Profetavi tajēvelia vajunupaebaponā pacuenia Cristo pejamatabēcueneta Dioso pacaitaxutotsoniataejitsia papecacapanepaenexa. 11 Espiritu Santo baja cajena pejamatabēcueneta bajayata tajēvelia profetavimi yapētaeayaexanaponatsi. Nexata profetavimi bajayata tajēvelia yaquina pacuenia yapētaeayaexanaponatsi Espiritu

Santo pejamatabëcueneta. Nexata profetavimi yaquina pacuenia itsamonae Cristo bejiobiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetatsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. ¹² Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepelivaisinexa. Espíritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamonaë. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavana-paenexa yabara pelivaisi

¹³ Panajamatabëcuenecopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. ¹⁴ Pajumecovënëtavanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinexamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamonaë jumecovënëtatsi, ayajamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bajaraxuata Dioso cjunaviaya bepajinavanapame pamatacabibeje abaxë pasaëmë tsavanapae mapanacuataje. ¹⁸ Paxamë picani naxuabiaya Diosovecua pajinavanapame

panijasalinaivimi abaxë pijacuene itsa pacaasaëmë tsavana-pae. Itsiata baitsi jane aeconoxae baja bajarapacuen-
 evecua Dioso baja pacacapanepa. Payapëtaneme rabaja
 Dioso ayaimatamota papecaneconimatamotsijava papecaca-
 panepaenexa. Apo pacacomuatsi baja cajena pevereve-
 caejavata, pacuenia oro itsi, palata ata. ¹⁹ Dioso baja
 cajena pacacomuata bitso penamatamotsijavata, Cristo pi-
 janata. Pajivi pijaneconi xaina Diosojavabelia, bajarapa-
 jivi oveja, pejanapebito, peperabëxanepanaenë, beyaxuaba
 ofrendacuenia pevi perajutsinexa Diosojavabelia. Nex-
 ata bajarapajivi pijaneconi Dioso baja vecuaajibiaexanatsi
 bajarapaoveja pijana pejamatabëcueneta. Nexata pacue-
 nia oveja, peperabëxanepanaenë, beyaxuabatsi, bajara pi-
 jinia itsi Cristo. Baitsi Cristo, planeconijibinë, nacopata
 pebeyaxuabinexatsi. Nexata Cristo petëpaejamatabëcueneta,
 pacavecuaajibiaexana panijaneconimi. ²⁰ Bajayatami Dioso
 mapanacuaje pexanaevajënaeya ata, Dioso itapetatsi Cristo
 papecasivatëpaenexa. Belia jane baja mapamatacabitaje
 Cristo patsica papecasivatëpaenexa. ²¹ Itsiata baitsi jane
 Cristo petëpaecujinae, acueyabi matacabita, Dioso icatsia
 asaëyaexanatsi. Athëbëtatsia, paxa Dioso pecujuanenia, Cristo
 ecaëyaexanatsi. Bajaraxuata panajamatabëcuenecopatame
 Diosojavabelia papecarajutsinexa matacabi apo pevereve-
 caejava.

²² Nexata baja aeconoxae paxamë pajumecovënëtame
 pexaniajailivaisi, Jesucristo pelivaisi, Espiritu Santo
 papecajamatabëcueneitayotsixae. Nexata pibisiacuene
 paneexanaeneconimi, Dioso pacavecuaajibiaexana.
 Nexata xaniavaetsia pasivamë tsavanapae itsamonae
 ata, Dioso pejumecovënëtsivi. Bajarapacuenia asaëyata
 namataenetsia bepanaasivamë tsavanapae daxita
 panejamatabëëthëtovetsina. ²³ Pacuenia pejananaexanae-
 nacuetoyo itsi, bajara paxamë pajamatabëcueneitsimë Dioso
 pejumelivaisita pejanajamatabëcuene panexainaexae.
 Itsiata baitsi jane bajarapapejanajamatabëcuene
 paneaxajivi apo pacarajutsi. Dioso raja pejumelivaisi,
 apo pevereverecaelivaisinexa panejumecovënëtsixae,
 pejanajamatabëcuene baja paxainame. ²⁴ Dioso
 pejumelivaisi apo pevereverecaejavanexa yabara, Dioso
 pejumelivaisibaxutota jumaitsi mapacueniaje:

Pacuenia vayafopijipona bepijia tsaquena, petsaquenaecu-
 jinae tëpa, bajara pijinia saya itsi jivi ata. Bepijia
 tëpa. Pacuenia pematono ata bepijia tsaquena, nexata
 othopa, bajara pijinia saya itsi ayaijamatabëcuene pex-
 ainaenë ata. Bepijia tëpa. ²⁵ Itsiata baitsi jane Dioso

pejumelivaisi apo vereverecae tsane daxitamatacabijavabelianexa,
jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenua paneyamaxëitojorobabiabijava. Pacoparenua saya yamaxëitojrobiaya panecuaicuaijaitسابيابijava. Tsipaji paxamë yamaxëitojrobiaya pacuaicuaijamë tsabiabi itsamonae bepapexaniajamatabëcuenevimë papecataenexa. Pacoparenua panecuenecaëbabiabijava itsamonae. Pacoparenua panebaracuaicuaijaitسابيابijava pibisiacuena itsamonae. ² Pacuenia pejananaexanaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevajaxaejava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuene naveretsiaexanaena pacuenia Dioso pacatojitsipa. ³ Nexata baja pepacuene pajamatabëcueneyapëtaename vajatuxanenë pexaniajamatabëcuenenëcuene. Bajaraxuata pajitsiponare orijibia panevajënaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë daxitamatacabijavabelianexa yabara pelivaisi

⁴ Vajatuxanenë Cristo raja bepiatajaiboto tsaponaponae. Apo pevereverecaenë daxitamatacabijavabelianexa. Nexata paimoxoyore bajaraponë. Vajatuxanenë Cristo itsamonae apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamë ata rabaja Jesucristojavabelia panenajamatabëcuene copatsixae, bepibotonëmë Dioso pacatane. Nexata padaxitamë Cristo papijavixae, Dioso pacatane bepijatemplobo, ibotonëta bepexanaetemplobo. Tsipaji pacuenia Dioso ponapona templobo, bajara pijinia pacuenia Espiritu Santo pacatsijamatabëeca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneconijibia papecataexae, Diosojavabelia

najamatabëcuenerajutsiaya pavajëtabiabianame Dioso papecasi-vajamatabëcuenebarëyanexa. ⁶ Cristo, ponë athëbëvetsica Dioso itorobijitsiatsica jivi pecapanepaenexa, bajaraponë yabara tajëvelia Dioso jumaitsi: “Ponë itorobianajë, beiboto tsane,” jai. Nexata tajëvelia Dioso pejumaitsijava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitaxanepanatsi daxitaitotonëvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcueneocopatsiana bajaraponëjavabelia, bajarapajivi apo nacueratsi tsane, jai mapacueniaje Dioso pejumelivaisibaxutota tajëvelia Dioso pejumaitsijava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepiatajaiboto tsaponapona, bitso bepenamatamotsiibotonua. Itsiata baitsi jane pamona, Cristo pelivaisi apo pejumecovënëtsivi, bajarapamona bepiabejeiboto tanetsi Cristo. Tsipaji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaëta botabu daxita itsaibo matatoxenetsia, jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara. ⁸ Copiajopanua jane baja Dioso pejumelivaisibaxutota tajëvelia Cristo yabara pejumaitsijava mapacueniaje: “Bajarapaiboto jivi pefirapecaeaxanaeiboto tsane,” pejaijava Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinexamë. Dioso baja papijasacerdotevimë tsavanapaenua, daxitacuenepo pevetsinë panetonacuenebavanapaexae. Dioso

baja papijajivimē tsavanapae panevajunupaebavana-paenexa Dioso ayaicuene pexanaejavanē. Dioso baja cajena pacajunata pibisiajamatabēcuenevecua, mapanacuataje pitaquirijamatabēcuenevecua. Nexata baja pajunuame pexaniajamatabēcuenejavabelia, Dioso pitayotsijamatabēcuenejavabelia. ¹⁰ Paxamē abaxē Cristo panejumecovēnētsivajēnaeya, Dioso picani apo papijajivimē. Itsajivi ata picani abaxē paxamēyajuvēnēvi Dioso apo itaxutotsoniataetsi. Itsiata baitsi jane aeconoxae baja Dioso papijajivimē pacaexana papecaitaxutotsoniataexae.

Pacuenia Dioso pejumecovēnētsivi jinavanapa Dioso pet-onacuenebavanapaenexa yabara pelivaisi

¹¹ Tajamonae bitso patacaasivivi, mapanacuataje abaxē pajinavanapae atamē, athēbētatsia baja Dioso pijanacuatatsia bepanejinavanapaevi panataema. Saya raja caepatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabēpaexaname panecopabinexa. Bajarapitsijamatabēcuene jamatabēnacanamajamatabēcuene bijianaeyaexana vajajamatabēcuenejavavetsina. ¹² Dioso apo peyapētaevi petuatuajēa itsa pajinavanapame, xaniavaetsia patsitajinavanapaename. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatacabijavabelia itsa najamatabēnapitsiana pexaniacuene paneexanaejava, bajarapamonae ata Dioso jumecovēnētsiana. Nexata bajarapamonae jumaitsi tsane Diosojavabelia: “Diosomē, bitso ayaijamatabēcuenenēmē,” jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamonae Dioso apo pejumecovēnētsivi.

¹³ Dioso papijajivixaemē, pajumecovēnēre pacuenia pacaitoroba pamonae nacua pevetavanapaevi. Daxita raja bajarapamonae mapanacuapijivi pejamatabēcueneta evetsiaexanatsi. Nexata pajumecovēnēre presidentenē, ponē jane baja daxitajivi pevetsinē. ¹⁴ Pajumecovēnērenua nacua pevetsivi. Bajarapamonae presidentenē itorobatsi penaneconitsiaexanaenexa pibisiacuene pexanaevi. Itorobatsinua pejumaitsinexa pexaniacuene pexanavanapaevijavabelia: “Xanepana rabaja xua paexaname,” pejainexa. ¹⁵ Bajarapamonae pajumecovēnēre. Tsipaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajava, pamonae apo pejumecovēnētsivi pexanialivaisi, Cristo pelivaisi.

16 Paxamë picani pajumecovënëtavapaname Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. 17 Daxitajivi yaiyataeya pajinavanapare. Itsamonae ata, pamonaе Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponaponaе, bajara pijinia pacuenia Cristo pejumecovënëtsivi ata itsamonae bejiobiaexanae atatsi, piagamatabëcuenesaë tsavanapaenexa, yabara pelivaisi

18 Paxamë itsamonae panetonacuenebavanapaеvi, pacamuxujiobatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Ëpexaniajamatabëcuenevi pëtsa panijatuxanevi pajumeyaiataneme. Pajumeyaiyataema panijatuxanevi, piacujirubejevi ata. 19 Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabiabijitsipa. Nexata panijatuxanevi papecabejiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa. 20 Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa. 21 Bajarapacuenia itsacueneneconi apo paxainaenejevamë, itsamonae pacabejiobiaexanaponaena. Tsipaji Dioso bajarapacuenia pacatocopata itsamonae papecabejiobiaexanaponaenexa. Payapëtaneme rabaja mapacuenije. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejiobiaexanaenexa. 22 Itsacuenejava ata pibisiacuene apo exanae Cristo. Apo yamaxëitojorobi cajena itsajiviyojavabelia ata. 23 Pibisiacuena Cristo bijatae atatsi

itsamonaē, itsiata juya pibisiacuenia apo jumecanaviatsi. Bejiobiaexanaē atatsi jivi, “Neyamatamotsiana Dioso,” apo jai Cristo bajarapamonaējavabelia. Biji rajane bajarapamonaējavabelia Cristo cujirucanaviatsinejeva, copata bajarapamonaē Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaēvi. ²⁴ Cristo cruzata itsa tēpa, tsijumaxuabatsi vaxaitsi pibisiacuene vajaexanaēneconi. Bajarapacuenia Cristo nacatoexana vajacopatsinexa pibisiacuene vajaexanaējava. Bajarapacuenia Cristo nacatoexananua vajavajēnaeyabelia vajajinavanapaenexa Dioso pejitsipaecuenia. Cristo pacasivavajēnērubatsi paxamē papecajamatabēcuene xaniavaetsinexa pibisiajamatabēcuenevecua, xaniavaetsia panejinavanapaenexa Dioso pitabarata. ²⁵ Paxamē picani Diosovecua naxuabiaya pajinavanapame. Pacuenia oveja pevetsinētsivecua naxuabiaya jinavanapa, bajara picani paitsimē. Itsiata baitsi jane aeconoxae baja Cristo pejamatabēcueneta panaviabame Diosojavabelia. Pacuenia pijaoveja pevetsinē xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabēcuene ata Cristo evetaponapona.

3

Pacuenia penacojiobivi xaniavaetsia benabarējinavanapa yabara pelivaisi

¹ Paxamē papetiriavimē, pacamuxujiobatsi mapacueniaje. Pacaevamē canacujitsia paneamonajivi jumecovēnētsiaya pajinavanapare. Pova pamona abaxē apo jumecovēnētsi Jesús pelivaisi, bajarapova xaniavaetsia tsitaponaponaē pamona, pamona ata Jesús pelivaisi pejumecovēnētsinexa. Nexata bajarapova pamonaējavabelia Jesús pelivaisi apo tsipaēbi ata, pamona ata jumecovēnētsiana Jesús pelivaisi xaniavaetsia petsitaponaponaēxae pamona. ² Bajarapacuenia pamona ata Jesús pelivaisi jumecovēnētsiana, pijava itsa cuenetaena Dioso paneyaiyataējava, itsa cuenetaenanua pijava Dioso pitabarata aneconijibia peponaponaējava. ³ Papetiriavimē, pētsa pajamatabējumaitsimē mapacueniaje: “Bepexaniavanē jivi tanetaenexa, naxatatsianajē naitabētsiaya. Namatafaratsianajē naitabētsiaya. Oronanita pexanaējavanēta naitabētsianajē. Itsa jume, nexata bitso pexaniavirianava naxatatsianajē,” pajamatabējamē pētsa. Pētsa bajarapacuenia panajamatabēxainame saya naniavelia panenaitabētsinexa. ⁴ Biji rajane bēpēnēaverena panajamatabēcueneitabēre. Bēpēnēaverena panenajamatabēcueneitabētsinexa, xaniavaetsia aneconijibia

pajinavanapaename Dioso pitabarata. Nexata itsamonae pacaitsacueniabi ata, pëtsa pacuencanaviatame. Nexata xua bēpēnēaverena panajamatabēcueneitabētame, apo pacatovereverecae tsane. Bajarapitsijamatabēcuene pexainaeva tonamatamotsianatsi Diosojavabelia. ⁵ Pamonami petiriavi bajayatami Dioso pejitsipaecuenia exanavanapa, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcuene copata Diosojavabelia. Jumecovēnētavanapanua pamonajivi. ⁶ Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavabelia. Papetiriavimē, panajamatabēcuene copatavanapare Diosojavabelia. Paexanavanaparena pexaniacuene. Pëtsa pacujunavamenua pacaitsacueniabijitsia ata itsajivi papecaitoxaxae. Nexata bajarapacuenia itsa paexanavanapaename, pajamatabēcuenejēpaename Sarapijivami.

⁷ Paxamē papebijivimē, pacamuxujiobatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonae vaxaitsi pebijivitsi nacavecuasaējibi. Payaiyataema tsipaji raja bajarapamonae ata yajava Dioso pacarajutsiana matcabi apo pevereverecaejava. Bajarapacuenia panijavajivi yaiyataeya pabarējinavanapare paneajumeurayaniva panenavajētsijava Diosojavabelia.

Pacuenia pexaniacuene pexanaevi ata itsamonae bejiobi-aexanaenatsi yabara pelivaisi

⁸ Tajamonae bitso patacaasivavi, pematatsēnēa pacamuxujiobatsi mapacueniaje. Najamatabēcuenejēpaeya pajinavanapare. Paxamēyajuvēnējivi itsacuene itsa tocopiapatatsi, nexata bajarapacueni yabara bitso itsa najamatabēxaina, paxamē ata pacobenajamatabēxainare. Daxita Dioso panenajuajumecovēnētsivixae, namataenetsia panaasivamēre. Naitaxutotsoniataeyanua pajinavanapare. Beveliajamatabēcuenevinua nataeya pajinavanapare. ⁹ Itsajivi pibisiacuene itsa pacaexana, pëtsa pacuencanaviatame. Pibisiacuena itsa pacabijatanenua, pëtsa pajumecanaviatame. Biji rajane bajarapajivi patovajēre Diosojavabelia Dioso peyavenonaenexatsi. Tsipaji pamatacabi Dioso pacajunata papijajivinexamē, bajarapacuenia paneexanaenexa, pacaitoroba. Nexata juya paxamē Dioso pacaitaxutotsoniataena pacuenia

najumecapanepaeya pacajumaitsi papecayavenonaenexa.
 10 Bajarapacuene yabara Dioso pejumelivaisibaxutota
 jumaitsi mapacueniaje:

Pajivi jitsipa peponaponaenexa jamatabëcuenebarëyaya,
 bajarapajivi benaebaretoeveta pibisialivaisi
 pecuaicuajaiyaniva. Benaebaretoevetanua
 penajumetsënëtsiyaniya ata. 11 Bajarapajivi
 becopata pibisiacuene pexanabiabijavami
 pexanaponaenexa pexaniacuene. Beponapona
 xaniavaetsia itsajivi ata pebaraanaepanaeyanivatsi.
 12 Bajarapacuenia beponapona. Tsipaji raja Dioso
 naitaxutocaeveta xaniavaetsia pejinavanapaevi.
 Namuxunaevetanua penavajëtsijavatsi baja-
 ronëjavabelia. Dioso cajena baraanaepana pamona
 pibisiacuene pexanavanapaevi,
 jai Dioso pejumelivaisibaxutota.

13 Itsa pajamatabëcuenesaëmë tsavanapae tsane
 pexaniacuene paneexanavanapaejava, nexata
 itsamonae pacabejiobiaexanae ata, itsiata apo
 pacajamatabëcuene bijianaecapanepae tsane. 14 Itsa
 pacabejiobiaexanaena xaniavaetsia pajinavanapae
 atamë, itsiata pajamatabëcuenebarëyamë tsane. Tsipaji
 raja Dioso pacayavenonaena. Pëtsa pacujunavame
 bajarapamonae. Pëtsa panasivajamatabëcuenebëjamënu
 papecabejiobiaexanaejava yabara. 15 Biji rajane
 panejamatabëethëtojavavetsina yaiyataeya pajumecovënëre
 vajatuxanenë Cristo. Panajamatabëcuene veretavana-
 parenu xaniavaetsia panejumecanaviatsinexa itsajivi itsa
 pacayanijoba vajatuxanenë Cristo panejumecovënëtsijava
 yabara. Nexata itsa pacayanijoba mapacueniaje:
 “¿Detsa xuajitsia xamë jumecovënëtame Cristo?” itsa
 pacajai, nexata xaniavaetsia pajumecanaviatsianame.
 Itsiata baitsi jane itsa pajumecanaviatame, paxamë
 beveliajamatabëcuenevi panataename. Nexata
 bajarapajivi yaiyataeya pajumecanaviatsianame. 16 Cristo
 papijajivixaemë, pexaniacuena pajinavanapaename.
 Nexata payapëtaename Dioso pitabarata aneonijibia
 panejinavanapaejava. Nexata itsamonae najumetsënëtsiya
 pacabaracuaicuajai tsabiabi ata tsane, bajarapamonae
 belia najumecopatsiana papecabaracuaicuajaijava.
 Naurabiana papecabaracuaicuajaitsabiabijava yabara.
 17 Pexaniacuene paexanabiabi atamë, Dioso itsa
 pacatocopatsiana itsamonae papecabejiobiaexanaenexa,
 nexata bajaraxua pacatonamatamotsiana Diosojavabelia.
 Itsiata baitsi jane itsamonae itsa pacabejiobiaexanaejitsipa

pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatëpa pibisiacuene vajaexanaeneconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacacapanepaenexa Diosojavabelia. Peperabëtomi baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi. ¹⁹ Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanialivaisi petsipaebinea. Tsipaji bajarapamonae naneconitsia jinavanapa petëpaevi pijanacuata. ²⁰ Bajarapamonaemi bajayata jinavanapa, pamatacabi Noépijinë ponapona. Bajarapamonaemi petëpaevajënae Dioso apo jumecovënëtsi. Noépijinë abaxë itsa exanabuatapona pinijibarcoxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noépijinë, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuene pexanaejavavecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanaejaetsi, nexata yapëtanetsi pepacuene Dioso vajanacacapanepaejavanexa. ²² Jesucristo Dioso piasaëyaexanaecujinaetsi, pona jane baja athëbëabetsia. Nexata athëbëtatsia Jesucristo eca paxa Dioso pecujanenia. Daxita ángelevi Jesucristo jamatabëcueneevetatsi pitorobinexa.

4

Pacuenia Dioso asaëyata betonacuenebavanapatsi, pacuenia Dioso nacajamatabëcuene cajëpaeayaexana, yabara pelivaisi

¹ Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo

pelivaisi pejumecovënëtsixae, bajarapajivi pevajënaeyabelia ajamatabëcuenesaë baja tsaponae. Copata baja pibisiacuene pexanaejava. ² Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipaecuenia baexana. ³ Dioso panejumecovënëtsivajënaeya, pibisiacuene paneexanavanapaeneconi yabara, ayaicuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënu tsabiabi panijabonëjava. Paitajibimënu tsabiabi fiestajava ata. Jumapecataeya pexanaenëanëjavabelia ata panavajëcabiabame. Itsiata baitsi jane aeconoxae baja daxita bajarapacuene pacopabame. ⁴ Nexata pamonaе Dioso apo peyapëtaevi, pibisiacuene panenajuaxanabiabivimi, aeconoxae baja pacasivajamatabëcuenenabenajaca. Tsipaji papibisiacuene bajarapamonaе exana, paxamë baja apo pajamatabëcueneyavenonaemë. Bajaraxuata bajarapamonaе pibisiacuenia pacabaracuaicuaijai. ⁵ Itsiata baitsi jane bajarapamonaе itsamatacabi Dioso pitabarata nubianatsi. Nexata daxita bajarapamonaе pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. ⁶ Petëpaevimijavabelia baja picani bajayata itsamonaе tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonaemi. Itsiata daxita bajarapamonaemi apo jumecovënëtsi Cristo pelivaisi. Itsiata bajarapamatacabi itsamonaе baja jumecovënëta Cristo pelivaisi. Nexata xuacujinae daxita bajarapamonaemi tëpapona. Itsiata baitsi jane pamonaе baja pepuajumecovënëtsi Cristo pelivaisi, tëpa, bajarapamonaе xaina baja matacabi apo pevereverecaejava.

⁷ Imoxoyo rabaja pevajënae pevereverecaenexa mapanacuaje. Bajaraxuata itsacuenejava ata pibisiacuene paexanaenejevamë, xaniavaetsia pajinavanapare. Namataenetsianua najamatabëcueneevetsiaya xaniavaetsia pajinavanapare panenajuavajëtabiabinexa Diosojavabelia. ⁸ Namataenetsia panaasivamëre tsavanapae. Bajarapacuene daxitacuene matatoxenetsia bitso nacatoxanepana vajaexanaenexa. Tsipaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabësitecaetsi. ⁹ Namataenetsia xaniavaetsia panacopiapire panijaboyaberena jamatabëcuenexanepanaeya. ¹⁰ Pacaenëmë canacujitsia Dioso saicayacuenia pacajamatabëcuene cajëpaeayaexanapona Dioso pijacuene

panetonacuenebavanapaenexa. Nexata namataenetsia panajamatabëcueneyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. ¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaexanatsi. Itsajivi pijinia itsa yavenonaejitsia itsanë, bajarapajivi beyavenona pacuenia Dioso jamatabëcuenecaëjëpaeyaexanatsi peyavenonaenexa. Daxita xua paexanaejitsiamë Jesucristo papijajivixae, paexanare jivi peyaiyataenexa Dioso. Dioso baja cajena daxitacuene pitorobinë, penivenivenaecotia pexainaenë daxitamatacabijavabelianexa. Bajara itsi tsane.

Pacuenia Jesucristo pelivaisi pejumecovënëtsivi itsamonaebějiobiaexanapontsi yabara pelivaisi

¹² Tajamona bitso patacaasivavi, pëtsa pajamatabëcuenenabenajacame, itsamona bitso pacabejiobiaexanapona ata. Bajarapacuenepacatocopiapatsiana papecajamatabëcuenejëtsinexa papecajamatabëcueneyapëtaenexa pepacuene panenajamatabëcuenecopatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapatapontsi pejamatabëcuenejëtsinexatsi pejamatabëcueneyapëtaenexatsi pepacuene penajamatabëcuenecopatsijava Diosojavabelia. ¹³ Nexata saya panasivajamatabëcuenebarëyamëre tsavana-pae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabëcuenebarëyamëre. Tsipaji raja paepatota itsamona pacabijatane, ayaijamatabëcuenenë Espiritu Santo, ponë pacayajavaponapona, ayaiacuenia pacayavenonaena. ¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacuene. Pëtsa patoebetame itsamona pijacuene pacajunatsinejeva panetoevetsinexa, bajarapacuenia itsamona panejamatabëitonotsiyaniva. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacuene pexanaevixae, bejiobiaexanatsi bajarapamona,” pejaiyaniva itsa pacabejiobiaexana itsamona. ¹⁶ Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi.

Pexaniajamatabëcuene berajuta Diosojavabelia Jesucristo pelivaisi pejumecovënëtsixae.

17-18 Dioso yapëtane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenenua patoexanabiabame itsamonaejavabelia. Nexata pacasivajamatabëcuenebarëyatsi,” pejainexa Dioso, pexaniacuene pijajivi itsa toexanavanapatsi. Itsiata pamona Dioso pijajivi ata, xaniavaetsia Dioso apo tojinavanapae, pexaniacuenenua apo toexanabiabi itsamonaejavabelia, bajarapamonaejavabelia Dioso jumaitsi tsane: “Paxamë apo pacasivajamatabëcuenebarëyatsi. Tsipaji tajitsipaecuenia apo paexanavanapaemë,” jai tsane. Bajarapacuenia Dioso itsa jumaitsi tsane pejumecovënëtsivitsijavabelia ata, ¿detsa nexata Dioso jumaitsi tsane Dioso apo pejumecovënëtsivitsijavabelia? Nexata Dioso ayaicuenia naneconitsiaexanaena bajarapamona. Pamonaejavabelia Dioso jumaitsi tsane: “Pacasivajamatabëcuenebarëyatsi,” jai tsane, bajarapamona Dioso capanepaena pijanacuayabetsia. Pamonaejavabelia ata Dioso jumaitsi tsane: “Paxamë apo pacasivajamatabëcuenebarëyatsi,” jai tsane, bajarapamona ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovënëtsivitsijavabelia ata, nexata biji pamona apo jumecovënëtsi Dioso pejumelivaisi, pamona pibisiacuene pexanaevi, Dioso apo capanepae tsane pijanacuayabetsia. ¹⁹ Nexata paxamë Dioso pacatocopatsi ata itsamona papocabejibiaexanaponaenexa, pëtsa pajamatabëcuenebëjamë. Tsiteca panevajënaeyabelia pexaniacuene paexanavanapare. Panajamatabëcuene copare papecaexanaenë, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovënëtsivi muxujiobatsi yabara pelivaisi

¹ Aeconoxae ancianovi papecayajavajinavanapae, muxujiobijitsianë. Xanë ata rabaja ancianonënë. Pacuenia itsi bajarapaancianovi, xanë ata rabaja itsinë. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana. ² Pacuenia oveja pevetsivi xaniavaetsia baevetavanapa, bajara pijinia

pacuenia paxamē ata xaniavaetsia paevetavanapare Dioso pejumecovēnētsivi, pamonae Dioso pacatocopata panetoevetsinexa. Jamatabēcuenebarēyaya Dioso pejitsipae-cuenia patoebetavanapare Dioso pejumecovēnētsivi. Pētsa pajamatabējumaitsimē: “Apo jitsipae atanē tatoevetsinexa Dioso pejumecovēnētsivi, itsiata toevetsianajē. Tsipaji Dioso netojitsipa tatoevetsinexa,” pajamatabējamē pētsa. Pētsa pajamatabējumaitsimēnua: “Tanematamotsinexa toevetsianajē,” pajamatabējamē pētsa. Paxamē panejamatabēēthētojavavetsina panejitsipaexae Dioso pejumecovēnētsivi panetoevetsinexa, patoebetavanapare.³ Pamonae Dioso pacatocopata panetoevetsinexa, bajarapamonae pētsa bepapijatuxanevimē panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapaenexa.⁴ Nexata pamatacabi icatsia Cristo patsianica, ponē jane baja pepo vajanacaevetsinēnexa, nacarajutsiana pinijicuene. Xua Cristo nacarajutsiana, apo vereverecae tsane daxita matacabijavabelianexa.

⁵ Paxamē papevējēvimē, pacuenia ancianovi pacaitoroba, pajumecovēnētabiabare. Pacaejivimē canacujitsia namataenetsia panayavenonabiabianame beveliajamatabēcuenevi nataeya. Bajarapacuenia panataema tsipaji raja Dioso pejumelivaisibaxutota jumaiti mapacueniaje:

Dioso apo yavenonae pamonae beayajamatabēcuenevi penataevi. Itsiata baitsi jane Dioso pitaxutotsoniataexae, pexaniajamatabēcuenia yavenona pamonae beveliajamatabēcuenevi penataevi, jai Dioso pejumelivaisibaxutota.

⁶ Nexata saya paxamē beveliajamatabēcuenevi panataema ayajamatabēcuenenē Dioso pitabarata. Nexata Dioso pecaējētsimatacabita, paayajamatabēcuenevimē pacaexanaena.⁷ Dioso papecaasivaxae, pacaevetaponapona. Bajaraxuata daxita panejamatabēcuenebējaijava, pacopare. Pavajēre Diosojavabelia papecayavenonaenexa.

⁸ Nayajivitaeyanua pajinavanapare panijavajabitsaēnē, dovathi, papecayamaxēitojorobianiva. Pacuenia nevēthē itsa piajani, jaitaponapona pexaeyabuatsinēnexa, bajarajamatabēcueneitsi dovathi papecayamaxēitojorobinexa.

⁹ Paepatota dovathi jamatabēpacayamaxēitojoroba panecopabinexa Jesús pelivaisi panejumecovēnētsijava, bajarapaepatota pajamatabēcuenesaēmēre Jesús pelivaisi panejumecovēnētsijava. Diosojavabelia najamatabēcuene copatsiaya dovathi panayajiviitavere. Itsamonae

itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjava dovathi pejamatabëcueneta bejiobiaexanaponatsi. ¹⁰ Itsiata baitsi jane saya caeepatoyo Dioso pacacopatsiana papecabejiobiaexanaenexa. Bajaraxuacujinae Dioso pacajamatabëcueneasaëyaexanaena. Bajaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëtatsia vajanacayajavaecaenexa, penivenivenaenacuatatsia, daxitamatacabijavabelianexa. ¹¹ Dioso baja cajena daxitacuene pevetsinë daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja peyoaquinaelivaisi mapabaxutotaje yabara pelivaisi

¹² Silvano betajuyapijinë taniji bajaraponë ata Dioso pejumecovënëtsixae. Silvano yaquinaeyaexanajë palivaisi pacatoitorobijitsiatsilia. Bajaraponë ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabiabixae, yapëtanetsi baja xaniajai pepacuene Dioso vajanacaasivacuene. Bajaraxuata pacabejiobiaexanabiabi ata, pajamatabëcueneasaëmëre tsavanapae paneyapëtaexae baja bajarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinxamë, bajara pijinia pacuenia bajarapamonae ata Dioso itapetatsi pijajivinexa. Marcos, ponë betaxënatocuenia tataenë, bajaraponë ata pacajamatabënajina. ¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenexanepanaeya panejinavanapaenexa Jesucristo papijajivixaemë. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

*Pacuenia Pedro mapabaxutoje cotocaevi toyaquina Dioso
pejumecovënëtsivijavabelia yabara pelivaisi*

¹ Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tspaji vajatuxanenë Jesucristo, vajanacacapanepaenë, nacaneconimatamota baja.

² Pacatovajëtatsi Diosojavabelia bitso papecayavenonaponaenexa daxitacuene yabara. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

*Pacuenia Dioso pejumecovënëtsivi jamatabëcueneitsi
tsavanapae yabara pelivaisi*

³ Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanaejavanë pexanaexae mapanacuataje, nexata yapëtanetsi Dioso xaniajai vajanacacapanepaejavanexa pacuenia najumecapanepaeya jumaitsi. Dioso vajanacacapanepaejavanexa pinijicuene bitso. Jumecovënëtatsi Dioso vajanacacapanepaejavanexa. Nexata Dioso nacayajavaponapona. Bajaraxuata Dioso pesaëta

nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponaponae, bajara vaxaitsi ata jamatabëcueneitsitsi tsavanapae tsane. ⁵ Nexata pacuenia Dioso jamatabëcueneitsi tsaponaponae, bajara panejamatabëcueneitsinexa, asaëyata Dioso pajumecovënëtaponare. Asaëyata Dioso itsa pajumecovënëtaponaname, nexata icatsia itsajava payapëtaeponaename. Asaëyata paexanavanapare ëpexaniacuene. Asaëyata itsa paexanavanapaename ëpexaniacuene, nexata icatsia orijibia pajamatabëcuenyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. ⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecatuitsinexa pibisiacuene panenajamatabëxainaeyaniva. Paneyapëtaecujinae panenajamatabëcuenecatuitsinexa pibisiacuene panenajamatabëxainaeyaniva, icatsia payapëtaename dovathi pejamatabëcueneta bajayajebi pacajamatabëcuenejëtaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcuenejëtaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. ⁷ Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

⁸ Daxita bajaraxua asaëyata panevajënaeyabelia itsa paexanavanapaename, nexata pacuenia Dioso jamatabëcueneitsi tsaponaponae, bajara pajamatabëcueneitsimë tsane. Bajarapacuenia asaëyata itsa paexanavanapaename, nexata pajamatabëcuenevitsabaponaename Dioso panejumecovënëtsijava. Nexata Dioso ata tsitaxanepanaenatsi xua patonacuenebavanapame. Nexata vajatuxanenë Jesucristo panejamatabëcuenyapëtaejava, apo panacueratsimë tsane. ⁹ Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevécuajibiaexanaejavatsi pibisiacuene pexanaeconimi.

¹⁰ Tajamonae, bajaraxuata pacaasaëmère tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia ita paexanavanapaename, Dioso panejumecovënëtsijavavecua, apo pajopaemë tsane. Pacacapanepaena Dioso. ¹¹ Nexata Dioso pacatocopatsiana panejonenexa vajatuxanenë Jesucristo vajanacacapanepaenënexa, pijanacuayabetsia, apo pevereverecaenacuayabetsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcuenesaëmënuu baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. ¹³ Abaxë tasaëtsaponaponaeepato mapanacuataje, netsitaxanepana patacamuxujiobinexa, bajarapacuenia patacanajamatabënapitsia exanaponaenexa.

¹⁴ Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanexa. ¹⁵ Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniava. Nexata ita tēpajë, paxamë tavēnamuto panenajamatabënapitabiabinexa pacuenia pacamuxujiobatsi.

Pacuenia Jesucristo pijajivijavabelia tsitanajamatabëcueneitajëta ayaijamatabëcuene pexainaenëcuene yabara pelivaisi

¹⁶ Imata vajatuxanenë Jesús pelivaisi ita pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebitsi. Tsipaji baja pataitaxutota pataniji vajatuxanenë ayaijamatabëcuene pexainaenëcuene. ¹⁷ Xaniavaetsia baja cajena pajumetaniji pamatacabi paxa Dioso athëbëvetsica barëcuaicuaijaitsi. Bajarapaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: “Mara ponë taxënatoje, tasivanë. Bitso sivajamatabëcuenebarëyanë,” jaitsica paxa Dioso athëbëvetsica. ¹⁸ Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuaijajitsitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuaijajavatsitsica.

¹⁹ Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënère

profetavimi pepaebilivaisi. Profetavimi pepaebilivaisi, pexaniajailivaisixae, belámpara picani. Pacuenia lámpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamatacabi icatsia Jesucristo patsianica. ²⁰ Xaniavaetsia pacanaëjère daxitacuenevécua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinexa itsamonaejavabelia, itsamonaë ata peyapëtaenexa pajamatabëcuenelivaisi xaina bajaraxua. Matapania pajivi Espíritu Santo yapëtaeyaexanatsi, caëjëpatsi xaniavaetsia pevajunupaebinexa bajaraxua. ²¹ Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanaë bajarapalivaisi. Profetavimi Dioso pijajivixae, pacuenia Espíritu Santo yapëtaeyaexanatsi, paebabiaba.

2

Pacuenia Dioso pejumecovënëtsivi muxujibatsi penajumetsënëtsilivaisi petsipaebaponaevi pejumecovënëtsiyaniva yabara pelivaisi
(Jud 4-13)

¹ Bajayata itsamonaë tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjjava. Itsamonaë pacatsipaebiana penajumetsënëtsilivaisi. Bajarapamonae yamaxëitojorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanënë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepíjia Dioso verebiabiana bajarapamonae. ² Bajarapamonae pevitota pibisiacuene exanavanapaena. Nexata bajaraxua yabara jumaitsi tsane: “Apo itsacuene itsiata, bajaraxua exanaë atatsi,” jai tsane bajarapamonae. Nexata ayaibitsaëto paxamëyajuvënëvi jumecovënëtsiana.

Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonaе Dioso apo pejumecovënëtsivi pibisiacuenia baracuaicuaijai tsane pexanialivaisi, Jesucristo pelivaisi. ³ Nexata pamonaе penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

⁴ Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infiernojavabelia. Nexata bajarajota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaeви. ⁵ Dioso cajena aneconijibia apo copatsi bajayatami ata pamonaе pibisiacuene exana. Dioso ira bubutsiaexana bajarapamonae penaxuabinexa. Caenë, Noépijinë, Dioso capanepa pijamonae yajava, siete pajiviyobeje. Noépijinë picani itavetabiaba jivi pibisiacuene pexanaeyaniva. ⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata ëipumana. Bajarapacuenia Dioso verebiaba bajarapamonaemi, pamonaе cotocaevi jinavanapa, peyapëtaenexa, bajarapamonae ata pibisiacuene pexanaeyaniva.

⁷ Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonaemi bitso pibisiacuene pexanaejava, nexata bitso sivanajamatabëxainabiaba. ⁸ Lotpijinë pexaniacuene pexanaenë, bajarapamonaemi tuatuajëta naponapona. Nexata caematacabi canacujitsia Lotpijinë bitso sivanajamatabëxainabiaba, itsa tane bajarapamonaemi pibisiacuene pexanaejava, itsa vënëlvaisitanenua pibisiacuene pexanaejava. ⁹ Bajaraxuata vaxaitsi baja yapëtanetsi mapacueneje. Vajatuxanenë caëjëpatsi pejamatabëcueneasaëyaexanaenexa pajivi najamatabëcuenecopata vajatuxanenëjavabelia. Nexata pajivi najamatabëcuenecopata vajatuxanenëjavabelia,

dovathi itsa jamatabëcuenejëtatsi, vajatuxanenë jamatabëcueneasaëyaexana. Vajatuxanenë caëjëpatsinua pibisiacuene pexanaevi, nabejiobitsiaya pejinavana-paeyaexanaenexa, mapanacuataje abaxë itsa asaë tsavanapae. Bajarapacuenia vajatuxanenë nabejiobitsiaya jinavanapaeyaexanaena penaneconitsiaexanaenexa icatsia petëpaecujinae ata, pamatacabi naneconitsiaexanaena daxita pijaneconi pexainaevi.

¹⁰ Pamonaevi bitso casaë tsavanapae pibisiacuene pexanaejava pijacuata penatojitsipaecuenia, bajarapamonae bitso ayaicuenia Dioso naneconitsiaexanaena itsamonae penaneconitsiaexanaejava matatoxenetsia. Pamonaevi ata apo jumecovënëtsi vajatuxanenë pevetsicuenetsi, bajarapamonae ata Dioso bitso ayaicuenia naneconitsiaexanaena. Pamonaevi penajumetsënëtsilivaisi petsipaebaponaevi, apo yayiatae itsamonae ata. Ajamatabëcuenetajanua. Apo jumejunavinua bajarapamonae pibisiacuenia pebaracuaicuaijainexa ángelevi. ¹¹ Angelevi biji picani bitso piasaëvi penajumetsënëtsilivaisi petsipaebaponaevi matatoxenetsia. Nexata ángelevi vajatuxanenë pitabarata pejinavanapaexae, bitso piasaëvi ata penajumetsënëtsilivaisi petsipaebaponaevi matatoxenetsia, itsiata pibisiacuenia apo baracuaicuaijai penajumetsënëtsilivaisi petsipaebaponaevi.

¹² Pamonaevi penajumetsënëtsilivaisi petsipaebaponaevi, beveliajamatabëcuenevi saya. Pacuenia saya jinavanapa unupijidujuai, bajara saya jamatabëcueneitsi bajarapamonae. Apo najamatabëxainae pexanialivaisi. Saicaya xua jamatabëexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaevi penajumetsënëtsilivaisi petsipaebaponaevi, pibisiacuenia baracuaicuaijai tsabiabi xaniavaetsia apo peyapëtaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonae. ¹³ Nexata Dioso bajarapamonae juya bejiobia jinavanapaeyaexanaena. Tsipaji bajarapamonae itsamonae bejiobiaexanabiaba. Bajarapamonae pibisiacuene itsa exanabiaba, barëya tsabiabi. Bajarapamonae apo pacajamatabëcuenejëpae ata, nanacaetuatsiana itsa panacaetuatame. Nexata yamaxëitojorobiaya pacayajavanabanebiabiana fiesta paneexanaematacabi. Bajarapamonae pibisiacuene pexanabiabixae tsane, nexata panetuatuajëta bepiauxuirajava tsane.

¹⁴ Bajarapamonae itsa tane petiriva, pibisiacuene jamatabëexanabiaba pevitota bejarapovajavabelia. Apo yabaracueranaevi pibisiacuene pexanaejava.

Penajumetsënëtsilivaisi petsipaebaponaevi, pibisiacuene exanaeyaexanabiaba pamonaē abaxē apo ajamatabēcuenesaē Dioso pejumecovënëtsijava. Bajarapamonaē bitso jitsipa daxitacuene pexainaejava ēpamonaenexa. Bitso yapētanenua pepitsinexa xua jitsipa. Nexata bajarapamonaē Dioso bitso ayaicuenia naneconitsiaexanaena. ¹⁵ Bajarapamonaē baja Diosovecua naxuabiaya jinavanapa. Tsipaji baja copaba pexaniajailivaisi pejumecovënëtsijavami. Apo jumecovënëtsi Dioso. Nexata bajarapamonaē cuenejēpa Diosojumepaebinēmi, profeta Balaampijinēmi, Beorpijinēmi pexēnato. Balaampijinēmi bajayata itsamonaē tsipaebatsi palata pibisiacuene picani pexanaenexa. Nexata baja picani Balaampijinēmi jejai pibisiacuene pexanaenexa. ¹⁶ Itsiata baitsi jane Balaampijinē Dioso itavetatsi bajarapapibisiacuene bitso pexanaeyaniva Dioso pitabarata. Balaampijinē pijaburrota yanajetaruca. Dioso cuaicuaijaiyaexana burro. Nexata pacuenia jivitonē bacuaicuaijai, bajarapacuenia Balaampijinē pijaburro barēcuaicuaijaitsi pitavetsinexatsi pibisiacuene pexanaeyaniva. Nexata picani xua Balaampijinē jamatabēexana, copata baja.

¹⁷ Pamonaē penajumetsënëtsilivaisi petsipaebaponaevi, apo jumenamatamotsi. Yapētanetsi pacuenia baitsi meramatathaibēmi itsa tseveca. Meramatathaibēmi itsa tseveca, apo jamatabēcueneyavenonaē itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaē petsipaebaponaevi penajumetsënëtsilivaisi. Itsajivi ata apo jamatabēcueneyavenonaē bajarapamonaē petsipaebilivaisita. Pacuenia itarērēbo ata jovibota xaniavaetsia caecovēta apo rucae, bajara jamatabēcuenetsi bajarapamonaē. Caejamatabēcuenē apo xainae. Nexata Dioso bajarapamonaē bitso ayaicuenia naneconitsiaexanaena. Bajarapamonaē pitaquirinacuata naneconitsia jinavanapaena daxitamatacabijavabelianexa. ¹⁸ Bajarapamonaē ayaijamatabēcuenēvi nataeya cuaicuaijai tsabiabi. Itsiata baitsi jane saya natsiquejemalivaisi cuaicuaijai tsabiabi. Bajarapamonaē yamaxēitojorobiaya jumai tsabiabi: “Apo itsacuene raja apo payaiyatae atamē petiriva. Pibisiacuene itsa jamatabēpaexaname panevitota petirivajavabelia, paexanare,” jai tsabiabi bajarapamonaē. Bajarapacuenia bajarapamonaē othopaeyaexanapona pamonaē pejanajumecovënëtsivi Dioso. Tsipaji pibisiacuene exanaeyaexanapona. ¹⁹ Bajarapamonaē yamaxēitojorobiaya jumai tsabiabinua: “Itsa panejumecovënëtsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonaē

penajumetsënëtsilivaisi petsipaebaponaevi. Itsiata baitsi jane bajarapamonae apo jamatabëcuenecaëjēpaetsi daxita xua pexaniacuene pexanaenexa. Saya ëpibisiacuene exanabiaba. Bajaraxuata Dioso bajarapamonae verebiabiana. Tsipaji bajarapamonae pibisiacuene exanabiaba pijacuata penatojitsipaecuenia, pacuenia pejamatabëcuene itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabëcuene bepijajivitonëtsi naexanatsi. Tsipaji pacuenia vajajamatabëcuene nacaitoroba, exanaponatsi. ²⁰ Pamonae baja yapëtane vajatuxanenë Jesucristo, ponë capanepaejitsiatsi pibisiacuene pexanaeneconimivecua, bajarapamonae baja Dioso vecuaajibiaexanatsi pibisiacuene pexanaeneconimi. Pajamatabëcuenemi ata jitsipaeyaexanabiabatsi pibisiacuene pexanaenexa, bajarapajamatabëcuenemi ata baja vecuaajibiaexanatsi. Itsiata baitsi jane bajarapamonaeyajuvënëvi icatsia pibisiacuene itsa exanapona, nexata icatsia bajarapajamatabëcuene pejumecovënëtaaponaxae, bitso naneconitsiana Diosojavabelia. Nexata jane baja copiaya pexainaeneconimi matatoxenetsia, bitsoyo ayaineconi natsixainaena. ²¹ Pamonae copaba pexaniajailivaisi pejumecovënëtsijavami, bitso ayaineconi natsixaina Diosojavabelia. Bajarapamonae itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tsipaji apo yapëtae tsipae bajarapalivaisi. Nexata baja peyapëtaexae bajarapalivaisi, pecopabixaenua pejumecovënëtsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia. ²² Bajayatapijilivaisi jumaitsi mapacueniaje: “Aviri peyacabicujinae, icatsia nayacabixanë. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevëalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabëcueneitsi pamonae icatsia caevëalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

¹ Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujiobinexa nexata xaniavaetsia panenajamatabëxainaenexa. ² Panajamatabënapire pacuenia Diosojumepaebivimi profetavi bajayata tajëvelia jumaitsi. Pana-

jamatabēnapirenuā pacuenia baja cajena apóstolevi pacatsipaeba vajatuxanenē Cristo pelivaisi. Cristo, ponē papecapanepaenēnexa, copiaya tsipaeba apóstolevijavabelia. Nexata juya apóstolevi paxamējavabelia pacatsipaeba. ³ Xaniavaetsia panamuxunaevere daxitacuenēvecua paneyapētaenēxa mapacuenēje. Nacua pecopiarucaevajēnaeyotanēxa, najetarubēnaena itsamonae pecapocaponaevinēxa pexaniajailivaisi. Bajarapamonae exanavanapaena pibisiacuene pacuenia pijacuata natojitsipa. ⁴ Bajarapamonae Cristo pepatsijavanexatsica apo pejumecovēnētsixae, najumequenetsiataeya saya jumaitsi tsane: “Jica Cristo icatsia pepatsijavanexatsica pacuenia baja Cristo tajēvelia najumecapanepaeya jumaitsi? Bajayata vajavajēnaeyapijivimi, pamonae jumecovēnēta Cristo pepatsijavanexatsica, vajēnaeēvetavanapa picani. Itsiata Cristo apo patsitsica. Nexata bajarapamonaemi belia baja tēpa Cristo patsinejevatsica. Daxitanacua abaxē itsiata tsitecanuca Dioso pexanaecujinae,” jai tsane saya bajarapamonae apo pejumecovēnētsixae Cristo pepatsijavanexatsica. ⁵ Bajarapacuenia jumaitsi tsane tsipaji bajarapamonae apo canaējētsi tsane pacuenia bajayata Dioso itoroba saya pijumeta itaboxo penaexanaenēxa mapanacua yajavaje. Nexata mapairanexaje, manumene tuatuajēatsina Dioso ira jumapitsapaeyaexanaina. ⁶ Bajayata pijinia mapanacuaje Dioso itsa bubutsiaexana, daxitajivi Dioso verebiaba merata. ⁷ Itsiata baitsi jane itaboxo, ira yajava, daxita xua tanetsi, Dioso pejamatabēcueneta abaxē xaniavaetsia tsitecanuca. Dioso abaxē xaniavaeta itsamatacabi isotota peveriapaenēxa. Dioso isotota veriapaena mapanacuaje, itaboxo yajava, pamatacabi naneconitsiaexanaena daxita pijaneconi pexinaeivi. Bajarapamatacabi Dioso naneconitsiaexanaena pibisiacuene pexanaeivi. Dioso verebiabiana daxitacuene.

⁸ Tajamonae bitso patacaasivavi, pētsa panacofēnētame mapacuenēje. Vajatuxanenē saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Bet-sitacaematacabi tsanucaetsi saya vajatuxanenē. ⁹ Itsamonae jamatabēcuenenavēxaniabiaya jamatabējumaitsi: “Dioso bitso cuenenajemata pexanaenēxa pacuenia najumecapanepaeya jumaitsi,” jamatabējai. Vajatuxanenē raja apo cuenenajematsi. Xua raja vajatuxanenē bajayajebi becuenenajematsi, abaxē saya eveta jivi pejumecovēnētsinexatsi. Tsipaji vajatuxanenē apo jitsipae itsajivi ata pevecuanaxuabijavatsi. Vajatuxanenē raja jitsipa daxitajivi pecopabinēxa pibisiacuene pexanabiabijava, penajamatabēcuenepēnēyorotsinēxa Diosojavabelia.

¹⁰ Vajatuxanenē baja cajena icatsia jemata patsianica. Pa-

matacabi jivi jamatejema jinavanapaena, jemata vajatuxanenē patsianica. Pacuenia penacobetoxotsinēnexa jemata bapata, itsajota apo jamatabēnajinaetsi, bajara pijinia itsi tsane vajatuxanenē. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athēbēpijicuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

11 Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuenia! 12 Bepacopiaevetavanapame vajatuxanenē pepatsijavanexatsica. Vajatuxanenē pijacuene bepatonacuenebavanapame bepijia pepatsinexatsica. Pamatacabita vajatuxanenē patsianica, itaboxo vereverecaena isotota. Daxita athēbēpijicuene veriajaviana isotocotiata. 13 Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajēvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ēpexaniacuene exanavanapaena, xua Dioso tojitsipatsi.

14 Tajamonae bitso patacaasivavi, pejanaitaboxo, pejanairanua, panetaenexa, panecopiaevetavanapaepato xaniavaetsia pajinavanapaename. Nexata pamatacabi vajatuxanenē icatsia patsianica, pacasivabarēya tsane. Bajarapacuenia pacasivabarēya tsane itsa pacacaxitajarabiana jamatabēcuenexanepanaeya aneconibia panejinavanapaejavata. 15 Pacanaējēre xua yabara abaxē vajatuxanenē apo patsitsica. Abaxē raja apo patsitsica daxitajivi apo pejumecovēnētsixae Dioso. Tsipaji daxitatsi vajatuxanenē jamatabēnacacapanepa pijanacuayabetsia. Pacuenia daxitatsi vajatuxanenē jamatabēnacacapanepa pijanacuayabetsia, bajaraxua vajaasivanē, vajabananē Pablo, peyapētaenexa Dioso yavenonatsi. Nexata Pablo peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuayabetsia. 16 Pablo baja cajena peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuayabetsia. Pablo peyaquinaelivaisianē, itsalivaisi ayapēbeje tsabiabi vajajumeyapētaenexa xua yabara Pablo yaquina. Nexata palivaisi apo jumeyapētaetsi, apo yapētaetsi pajamatabēcuenelivaisi xaina. Nexata pamonae xaniavaetsia apo jumeyapētae Pablo peyaquinaelivaisianē, juya tsipaebabiaba itsamonaejavabelia apo jumeyapētae ata. Pamonae ata caejamatabēcuene apo xainae Dioso

pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, perubenaelivaisianë ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷ Tajamonae bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënëtsilivaisi papecatsipaebiyanima. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecua. ¹⁸ Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuu vajatuxanenë Jesucristo, ponë pacacapanepaejitsia pibisiacuene paneexanaeneconivecua. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayaijamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivijavabelia

Cristo vajanacajamatabëcuene asaëyaexanaenë yabara pelivaisi

¹⁻² Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuu patacobeta. Nexata bajaraponë pelivaisi pacatsipaebatsi. Bajaraponë matakabi apo pevereverecejave pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. ⁶ Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vajaexanaejave ata. ⁷ Itsiata vaxaitsi xaniavaetsia itsa jumecovënëtavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato,

vajanacasivatēpaexae, nacavecuaajibiaexanaena daxita vajapibisiajamatabēcuenemi.

⁸ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconijibitsi. Tsipaji pibisiacuene apo exanaetsi,” itsa jaitsi, nexata saya jamatabēcuenenavēxaniabatsi. Pexaniajailivaisi, Dioso pejumelivaisi, apo nacatsijamatabēcaae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuaajibiaexana pibisiacuene vajaexanaeneconimi. Nacavecuaajibiaexananua daxita pibisiajamatabēcuene vajaxinaejavami. ¹⁰ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabēcuenenavēxaniabatsi. Dioso pejumelivaisi ata apo nacatsijamatabēcaae. Bajarapacuenia itsa jumaitsitsi, nexata Dioso tanetsi bepenajumetsēnētšinē. Tsipaji Dioso pejumelivaisibaxutota jumaitsi pacuenia daxitatsi pibisiacuene ēvajaexanaevi.

2

Cristo vajanacatocuaicuaijainē Diosojavabelia yabara pelivaisi

¹ Tajamonae, pacatoyaquinatsi mapalivaisije patacamuxujobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenē, vajanacatocuaicuaijainē Diosojavabelia. Bajaraponē cajena caeto ata pibisiacuene apo pexanaenē. ² Jesucristo vajanacasivatēpaexae, nacavecuaajibiaexana baja daxita pibisiacuene vajaexanaeneconimi. Itsiata ēvaxaitsi apo nacasivatēpae. Daxita mapanacuapijivije pibisiacuene pexanaeneconi pevecuaajibiaexanaenexa, Jesucristo sivatēpa.

³ ¿Detsa pacuenia nayapētanetsi Dioso pijajivitsi? Itsa exanavanapatsi pacuenia Dioso nacaitoroba, nayapētanetsi Dioso pijajivitsi. ⁴ Itsajivi jumaitsi ata: “Xanē raja cajena Dioso yapētaniji,” jai ata, itsiata itsa apo jumecovēnētši pacuenia Dioso itorobatsi, bajarapajivi saya najumetsēnēta. Pexaniajailivaisi cajena, Dioso pejumelivaisi, apo tsijamatabēcaetsi.

⁵ Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëtanapaenatsi Dioso, nexata nayapëtaevanapaenatsi vajayavajinavanapaejava Dioso. ⁶ Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷ Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa. ⁸ Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtanapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tsipaji bajarapalivaisita Jesucristo nacajamatabëcueneitayotapona.

⁹ Itsajivi jumaitsi ata: “Xanë raja Dioso pitorobicuenia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneitaquiri tsaponapona. ¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneitayotatsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi. ¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneitaquiri tsaponapona. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeneconi yabara. Bajara jamatabëcueneitsi tsipaji pevajënaeyabelia dovathi yaajamatabëcueneitaquiriaya exanaponatsi piagamatabëcueneitaquirixae.

¹² Tajamonae, pacatoyaquinatsi mapalivaisije. Tsipaji baja Dioso pacavecuaajibiaexana pibisiacuene paneexanaeneconimi Jesucristo papecasivatëpaexae. ¹³ Patavajënaepijivimë, pacatoyaquinatsi mapalivaisije. Tsipaji baja payapëtaneme Jesucristo, ponë baja cajena athëbëtsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata

papevëjëavimë, pacatoyaquinatsi mapalivaisije. Tsipaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tsipaji baja vaxa Dioso payapëtaneme. ¹⁴ Patavajënaeyapijivimë, imata baja cajena itsabaxuto pacatoyaquinatsi. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tsipaji baja pajamatabëcuenesaëmë Dioso panjume covënëtsijava. Pacatsijamatabëeca baja Dioso pejumelivaisi. Nexata baja dovathi pajamatabëcueneamoneyabame.

¹⁵ Pëtsa pajitsipame mapanacuapijicueneje. Pëtsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemë tsipae Dioso. ¹⁶ Pajamatabëcuene jivi jitsipaeyaexanabiabatsi pibisiacuene pexanaenexa, bajarapajamatabëcuene apo pitsapae Diosojavaverena. Bajarapajamatabëcuene pitsapa mapanacuataje. Pajamatabëcuene ata jivi najamatabëxainaeyaexanabiabatsi penaxainaeyabinexa xua itajitsipa, bajarapajamatabëcuene ata pitsapa mapanacuataje. Pajamatabëcuene ata jivi najamatabëxainaeyaexanabiabatsi beayaijamatabëcuenevi penataenexa, bajarapajamatabëcuene ata pitsapa mapanacuataje. Daxita bajarapajamatabëcuene pitsapa mapanacuataje. Bajarapajamatabëcuene apo pitsapae vaxa Diosojavaverena. ¹⁷ Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamona exanavanapa Dioso pitorobicueniatsi, jinavanapaena daxitamatacabijavabelianexa.

Pexaniajailivaisi, penajumetsënëtsilivaisi ata, yabara pelivaisi

¹⁸ Tajamonae, imoxoyo rabaja pevajënae tsaponae pevereverecaenexa mapanacuaje. Pavënëlivaisitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayaibitsaëto, pamona Cristo cueneitoyatsi. Bajarapamonae pepatsixae, yapëtanetsi imoxoyo baja pevajënae tsaponae pevereverecaenexa mapanacuaje. ¹⁹ Pamona Cristo cueneitoyatsi, bajarapamonae vaxaitsiyajuvënëvimi picani. Itsiata baja nacavecuapitsapa. Bajarapamonae pepacuene apo vaxaitsiyajuvënëvi cajena. Itsa peneta bajarapamonae vaxaitsiyajuvënëvi tsipae, nexata tsitecaeya najinavanapaejitsipa vaxaitsita. Bajaraxuata

bajrapamonae nacavecuapona baja. Nexata daxitajivi xaniavaetsia yapētane bajrapamonae pepacuene Dioso apo pejumecovēnētsivicuene.

²⁰ Cristo rabaja pacarajuta Espiritu Santo. Bajraxuata daxita paxamē payapētaneme baja pexaniajailivaisi, Dioso pejumelivaisi. ²¹ Pacatoyaquinatsi mapabaxutoje tsipaji baja payapētaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapētaeyaexanaenexa pexaniajailivaisicuene Jesús pelivaisi. Tsipaji baja bajaya payapētaneme bajrapalivaisi pexaniajailivaisicuene. Payapētanemenua baja Jesús pelivaisijavaverena acuenebi pepitsapaejava penajumetsēnētsilivaisi. Tsipaji pexaniajailivaisijavaverena acuenebi pepitsapaejava penajumetsēnētsilivaisi.

²² ¿De jane peneta jumaitsi pepo penajumetsēnētsijivi? Pajivi peneta pepo penajumetsēnētsijivi, jumaitsi mapacueni-aje: “Jesús raja apo Cristo, ponē Dioso athēbēvetsica itorobijitsiatsica vajanacacapanepaenexa,” jai. Bajara peneta pejumaitsiijivi, pepo penajumetsēnētsijivi jane baja. Bajrapajivi Cristo pijavajabitsaējivi. Bajrapajivi apo jumecovēnētsi Dioso. Apo jumecovēnētsinua Dioso pexēnato ata. ²³ Pajivi peneta jumaitsi: “Jesús raja Dioso apo pexēnato,” jai, bajrapajivi Dioso apo yajavaponaponaetsi. Pajivi pijinia peneta jumaitsi: “Jesús raja Dioso pexēnato,” jai, bajara jane pajivi Dioso yajavaponaponatsi.

²⁴ Bajraxuata paxamē baja palivaisi pajumetaneme panejumecovēnētsijavaverenacujinae, panevajēnaeyabelia tsiteca pacajinavanapare. Bajrapalivaisi tsiteca itsa pacatsijamatabēcaena, nexata panevajēnaeyabelia payajavajinavanapae name Dioso. Payajavajinavanapae namenua Dioso pexēnato ata, Cristo. ²⁵ Jesucristo rabaja najumecapanepaeya jumaitsi vajanacarajutsinexa matakabi apo peverevereaejava.

²⁶ Pacatoyaquinatsi mapabaxutoje patacayapētaeyaexanaenexa panenayajivitaenexa pamonae jamatabēpacayamaxēitojoroba. ²⁷ Paxamē rabaja Espiritu Santo pacatsijamatabēca, ponē pacarajuta Jesucristo. Bajraxuata apo panamatavenonaemē baja itsajivi ata papecatsipaebinexa paneyapētaenexa daxitacuene. Tsipaji baja daxita xua Espiritu Santo pacayapētaeyaexanapona, pexaniajaicuene baja cajena. Penajumetsēnētsicuene baja cajena Espiritu Santo apo pacayapētaeyaexanapona. Pacuenia Espiritu Santo pacayapētaeyaexanapona, bajrapacuenia pajumecovēnētaponare panevajēnaeyabelia paneyajavajinavanapae name Cristo.

²⁸ Tajamonae, ajamatabëcuenesaëya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatacabi bajaraponë patsianica. Nexata apo aura tsanetsi bajaraponëjavabelia pamatacabi patsianica. ²⁹Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepapapëtaneme mapacuenije. Pamonaë peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaëjère vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapëtaexae, nexata bajarapamonae vaxaitsi ata apo nacayapëtae Dioso pexicuenetsi. ²Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapëtaetsi abaxë pacuenia itsamatacabi vaxaitsi cueneitsi-jitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejëpaenatsi. Tsipaji cuenetaenatsi pacuenia Cristo cueneitsi. ³ Cristo pibisiacuene apo pexanaenë caeto ata. Bajaraxuata daxita pamonaë copi-aevetavanapa Cristo pepatsijavanexatsica, pevajënae tonajamatabëcuene xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovënëtsi palivaisi Dioso najumecopata jivi pejumecovënëtsinexa. Pibisiacuene itsa exana, nexata Dioso pitavetsijava exana. ⁵ Payapëtaneme rabaja mapacuenije. Cristo patsica mapanacuayabetsicaje vajanacavecuaajibiaexanaenexa pibisiacuene vajaexanaeconomie. Cristo baja cajena caeto ata pibisiacuene apo pexanaenë. ⁶ Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajënaeyabelia pibisiacuene exanaponapona, bajarapajivi apo tae baja cajena Cristo. Apo yapëtaenua cajena. ⁷ Tajamonae, pëtsa panacopatame itsajivi ata papecayamaxëitojorobinexa. Pajivi exanabiaba pexaniacuene, Dioso pejitsipacuene, bajarapajivi Dioso aneconijibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi. ⁸ Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata

Dioso pexënato patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami piajibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponaponae. Tsipaji baja Dioso najamatabëcuenenajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. ¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

Pacuenia vaxaitsi namataenetsia benaasivatsi tsavanapae yabara pelivaisi

¹¹ Dioso baja cajena panejumecovënëtsijavaveliacujinae, pajumetaeyabiabame pejumaitsilivaisi mapacueniaje: “Vaxaitsi namataenetsia benaasivatsi tsavanapae,” pejailivaisi. ¹² Vaxaitsi nexata apo bitoyatsi itsamonae ata. Pacuenia bajayatami Caínpijinë itoya pejuyapijinëmi, bajara apo bitsitsi vaxaitsi. Caínpijinë dovathi pijajivitonë tsaponaponae. Nexata beyaxuaba pejuyapijinëmi. Pacatsipaebijitsiatsi pacuene yabara Caínpijinë beyaxuaba pejuyapijinëmi. Caínpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Caínpijinë beyaxuaba pejuyapijinëmi.

¹³ Tajamonae, pëtsa pajamatabëcuenenabenajacame paxamë ata itsa pacaitoya mapanacuapijivije. ¹⁴ Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneasaëyaexana vajanajamatabëcuenecopatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaexanaejava. Tsipaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona. ¹⁵ Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacueneje. Jivibenë baja cajena apo xinae tsane matababi apo peverevereaejava. ¹⁶ Yapëtanetsi baja cajena mapacueneje. Jesucristo vajanacaasivaxae, nacopata pebeyaxuabinexatsi vajaneconì yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitsitsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,”

bejamatabëjaisi. ¹⁷ Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsijava: “Xanë bitso Dioso jitsipajë tajamatabëëthëtojavavetsina,” pejaijava. ¹⁸ Tajamonae, “Asivanë raja itsamonae ata,” apo bejaisi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jinavanapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. ²⁰ Dioso baja cajena bitso ayaijamatabëcuenenë. Dioso peyapëtaenë daxitacuene. Bajaraxuata vaxaitsi jamatabëjumaitsi atatsi: “Xanë bitso ajamatabëcuenebejenë pibisiacuene taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. ²² Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavanapatsi pacuenia nacaitoroba. Pacuene yabara Dioso sivajamatabëcuenebarëya, bajarapacuene ata vaxaitsi exanavanapatsinua. ²³ Dioso raja nacaitoroba vajajamatabëjumaitsinexa mapacueneje: “Jesús baja patsica, ponë copiaevetavanapatsi vajanacacapanepaenexa. Bajaraponë Dioso baja cajena pexënato,” vajajamatabëjainexa. Nacaitorobanua namataenetsia vajanaasivatsavana-paenexa. ²⁴ Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaexana pepacuene Dioso vajanacayajavaponaponaejava.

4

Espiritu Santo yabara, Cristo pijavajabitsaë ata, yabara pelivaisi

1 Tajamonae bitso patacaasivavi, itsamonae itsa pacajumai tsane mapacueniaje: “Espíritu Santo raja, ponē netsijamatabēeca, netsipaeba. Nexata juya bajarapalivaisi pacatsipaebatsi,” itsa pacajai tsane, pētsa abaxē caecuenia pajumecovēnētame. Copiaya abaxē pajamatabēcueneējēbianame paneyapētaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabēcueneējēbianame tsipaji raja daxitajava mapanacuajavaje yacājēpa penajumetsēnētsilivaisi petsipaebanajetarubenaevi. Bajarapamonae penajumetsēnētsilivaisi daxitajivijava tsipaebanajetarubena. BeDioso itajara pejumelivaisi petsipaebivicuenia, tsipaebanajetarubena. ² Nexata bajarapacuenia copiaya itsa pajamatabēcueneējēbianame, payapētaename pamonae tsijamatabēecatsi Espiritu Santo. Pamonae raja peneta pepacuene Espiritu Santo tsijamatabēecatsi, jumaitsi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonae pepacuene Espiritu Santo tsijamatabēecatsi. ³ Pamonae peneta jumaitsi mapacueniaje: “Jesucristo raja Dioso apo pexēnato,” jai, bajarapamonae cajena apo tsijamatabēecaetsi Espiritu Santo. Bajarapamonae tsijamatabēecatsi ponē cueneitoyatsi Cristo. Ponē baja pavēnēlivaisitaneme pepatsijavanexa, ponē Cristo cueneitoyatsi, bajaraponē pata baja. Ponapona rabaja mapanacuajavaje. ⁴ Tajamonae, paxamē rabaja Dioso papijajivimē. Nexata baja penajumetsēnētsilivaisi papecatsipaebivi, apo pacayamaxēitojorobicapanepae. Apo caējēpaetsi papecayamaxēitojorobijava. Tsipaji ponē pacatsijamatabēeca, bajaraponē bitso piasaēnē, ponē ponapona mapanacuajavaje, matatoxenetsia. ⁵ Pamonae tsipaebapona penajumetsēnētsilivaisi, bajarapamonae saya Dioso apo peyapētaevi. Bajaraxuata mapanacuapijicuene cacuaicuaijai. Nexata pamonae bitso jitsipa maēpanacuapijicueneje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapētane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapētane pajivi tsijamatabēecatsi Espiritu Santo. Espiritu Santo baja cajena jivi pexaniajailivaisi petsipaebinē. Bajara pijinia pacuenia nayapētane pajivi ata tsijamatabēecatsi dovathi. Dovathi baja cajena penajumetsēnētsilivaisi jivi petsipaebinē.

Dioso vajanacaasivanē yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtae Dioso. ⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapëtaeyaexana mapacueniaje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matabacabi apo pevereveceajava vajaxainaenexa pexënato vajanacasivatëpaexae. ¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso rapicani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuajibiaexana daxita pibisiacuene vajaexanaeneconimi.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxë Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayajavaponapona. Dioso vajanacatojitsipaecuenia itsamonae ata vajaasivanexa, Dioso nacajamatabëcueneasaëyaexanapona. ¹³ Vaxaitsi yajavajinavanapatsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicue Dioso vajanacayajavaponapona. Tsipaji baja Dioso nacarajuta Espíritu Santo. ¹⁴ Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵ Pajivi jumaitsi mapacueniaje: “Jesús raja Dioso pexënato,” jai, bajarapajivi Dioso yajavaponapona. Bajarapajivi pijinia Dioso ata yajavaponaponatsi.

¹⁶ Nexata vaxaitsi jamatabëcuenyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonaes itsamonae ata namataenetsia naasiva tsavanapae, bajarapamonaes Dioso yajavaponapona. Bajarapamonaes ata pijinia Dioso yajavajinavanapa. ¹⁷ Nexata pacuenia Dioso nacatojitsipa itsamonae ata vajanasivatsavana-paenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuene pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane

Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸ Itsa yapëtanetsi Dioso vajanacaasivajava, apo cjunavitsi itsacuenējaata. Tsipaji Dioso itsa nacaasiva, nacavecuaajibiaexana vajajunavijavami. Pajivi Diosojavabelia naneconita, yapëthane Dioso penaneconitsiaexanaejavanexatsi. Bajaraxuata daxitacuene cjunava. Pajivi cjunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cjunava.

¹⁹ Vaxaitsi Dioso asivatsi tsipaji Dioso copiaya nacaasiva. ²⁰ Pajivi jumaitsi ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. ²¹ Pajivi asiva Dioso, bajarapajivi biasiva itsajivi ata, Dioso penajuajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcueneamoneyabatsi yabara pelivaisi

¹ Pajivi jumecovënëta: “Jesús raja Cristo, ponë Dioso athëbëvetsica itorobijitsiatsica vajanacacapanepaenexa,” pejailivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. ² Bajara pijinia pacuenia vaxaitsi ata hexanatsi itsa asivatsi Dioso. Itsa jumecovënëtatsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tsipaji bajarapamonae Dioso pexi exanatsi. ³ Vaxaitsi itsa asivatsi Dioso, nexata pacuenia Dioso nacaitoroba, jumecovënëtatsi. Pacuenia Dioso nacaitorobapona vajatoexanaenexa, apo nacatsitaayapëbeje. ⁴ Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacajëpaeyaexanapona vajaexanaenexa pacuenia Dioso nacaitorobapona. Najamatabëcueneocopatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcueneamoneyabaponatsi. ⁵ Pajivi jumecovënëta Jesús Dioso pexënatocuene, bajarapajivi cajëpatsi dovathi pejamatabëcueneamoneyabinexa.

Pacuenia yapëtanetsi Jesús pepacuene Dioso pexënatocuene yabara pelivaisi

⁶ Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espíritu Santo ata nacayapëtaeyaexana Jesucristo pepacuene Dioso pexënatocuene. Espíritu Santo baja cajena pexaniajainë. Nexata Espíritu Santo vajanacayapëtaeyaexanaejava, Jesús Dioso pexënatocuene, bejumecovënëtatsi. ⁷ Athëbëtatsia jinavanapa acueyabi ponëbeje, penajamatabëcuenejëpaevi, pevajunupaebivi Jesucristo Dioso pexënatocuene. Pamonaë jinavanapa athëbëtatsia, mapamonaëje: Dioso, Jesucristo, Espíritu Santo. Bajarapamonaë acueyabi ponëbeje, penajamatabëcuenejëpaevi, caenë rabaja picani tsaponaponae. ⁸ Mapanacuata ataje acueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. Yapëtanetsi Espíritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Yapëtanetsinua Jesús cruzata pebeyaxuabijavatsi ata pejamatabëcueneta. Bajarapaacueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. ⁹ Dioso baja cajena nacayapëtaeyaexana Jesús Dioso pexënatocuene. Mapanacuapijivi ata, itsa nacatsipaeba itsacuenelivaisiyo, nexata jumecovënëtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtatsi xaniavaetsia pacuenia nacatsipaeba. Tsipaji Dioso bitso pejumenamatamotsinë. Bitso pexaniajainë. ¹⁰ Pajivi jumecovënëta Jesús Dioso pexënatocuene, bajarapajivi pejamatabëëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tsipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene. ¹¹ Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matakabi apo peverevereaejava. Nexata Dioso pexënatoto pejamatabëcueneta xainaenatsi matakabi apo peverevereaejava. ¹² Pajivi yajavaponaponae Dioso pexënatoto, bajarapajivi xainaena matakabi apo peverevereaejava. Pajivi apo yajavaponaponae tsane Dioso pexënatoto, bajarapajivi apo xinae tsane matakabi apo peverevereaejava.

Pacuenia Juan muxujioba pecopatsivajënae baja petoy-aquinaelivaisi mapabaxutotaje yabara pelivaisi

¹³ Pacatoyaquinatsi mapalivaisije panejumecovënëtsivi Dioso pexënato. Pacatoyaquinatsi paneyapëtaenexa maticabi apo peverevereaejava panexainaejavanexa.

¹⁴ Yapëtanetsi Dioso vajanacajumetaejava ita vajëtatsi vajanacatojitsipaecuenia. Bajaraxuata apo jumejunavitsi vajavajëtsinexa Diosojavabelia. Jamatejematsi Dioso pitabarata.

¹⁵ Yapëtanetsi Dioso vajanacajumetaejava ita vajëtatsi. Nexata yapëtanetsi Dioso vajanacarajutsijavanexa xua vajëtatsi.

¹⁶ Dioso panenajuajumecovënëtsivi ita pataename pibisiacuene pexanaejava, patovajëtsianame Diosojavabelia, Dioso pejamatabëcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajëtsianame ita payapëtaename paneconi yabara abaxë Dioso apo vecuanaxuabijitsia. Itsajava raja jivi pibisiacuene ita exana, bajarapaneconi yabara pepacuene jivi Diosovecua naxuabiana. Nexata baja ita payapëtaename paneconi yabara pepacuene baja bajarapajivi Diosovecua naxuabijitsia, pëtsa patovajëtame Diosojavabelia. Bajarapitsineconi baja pexainaevi panetovajëtsinexa Diosojavabelia, apo pacaitorobitsi. ¹⁷ Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava ita copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸ Yapëtanetsi baja cajena mapacueneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexënato, Jesucristo, evetatsi bajarapajivi. Nexata dovathi apo itsacueniabitsi.

¹⁹ Yapëtanetsi daxita vaxaitsi Dioso pexicuenetsi. Yapëtanetsinua itsamonae dovathi pitorobabiabijavatsi pibisiacuene pexanaenexa.

²⁰ Yapëtanetsinua baja Dioso pexënato, Jesucristo, athëbëvetsica pepatsijavatsica. Patsica vajanacajamatabëcuene yapëtaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexënato, Jesucristo. Bajaraponë ata pepo Dioso baja cajena, vajanacarajutsinënexa maticabi apo peverevereaejava. ²¹ Tajamonae, panayajiviitavere papecatsipaebiyaniya palivaisi tsipaebapona pamonaevajëcabiaba jumapecataeya pexanaenëanëjavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonae jumecovënëta Dioso pejumelivaisi, bajarapamonae ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenon-abiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso paca-toexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcuenebarëyanë itsa caxitajarabaxuabajë nexiyajuvënëvi, pejumecovënëtavanapaevi pacuenia vaxa Dioso nacaitoroba. ⁵ Tajabanava, aeconoxae catsipaebatsi namataenetsia vajanasisvanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasivatsavanapaenexa.

Penajumetsënëtsilivaisi daxitanacuanëjava petsipaebanaje-tarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaeivi peyamaxëitojorobivi baja cajena. Bajarapamonae Cristo

pijavajabitsaë. ⁸ Panayajivitaevanapare papecavecuaxu-
 abiyaniwa xua pasivanacuenebavanapame Dioso papecara-
 jutsinexa. Bajarapacuenia panayajivitaevanapare Dioso
 papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaponapona
 palivaisi Cristo tsipaebapona, bajarapajivi vaxa
 Dioso yajavaponaponatsi. Vaxa Dioso pexënato ata
 yajavaponaponatsi. Pajivi pijinia copata pejumecovënëtsijava
 palivaisi Cristo tsipaebapona, bajarapajivi Dioso apo
 yajavaponaponaetsi.

¹⁰ Nexata bajarapitsijivi itsa
 pona paxamëjavabelia livaisi papecatsipaebinexa, pëtsa
 pacajunuame panijaboyaberena. Pëtsa pabajacobamenua
 bajarapitsijivi. ¹¹ Pajivi bajacobijitsipa bajarapitsijivi,
 jamatabëcueneayavenonaejitsipa pibisiacuene pexanaejava.
 Bajaraxuata pëtsa pabajacobame bajarapitsijivi.

*Pacuenia Juan jumaitsi pecopiarutaponaelivaisita yabara
 pelivaisi*

¹² Xanë picani xainajë ayailivaisi patacamuxujobinexa.
 Itsiata abaxë apo jitsipaenë bajarapalivaisi patacatoy-
 aquinaenexa mapabaxutotaje. Evetajë abaxë taponaejava
 paxamëjavabelia patacataenexa, patacabarëcuaicuajainexanua,
 vajajamatabëcuenebarëyanexa bitso.

¹³ Nejuyapijiva Dioso pitapetsivatsi pexi, catona-
 jumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënënë yabara pelivaisi

¹ Gayo bitso tacaasivanë. Xanë ancianonënë, catoy-aquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

² Catovajëtabiabatsi Diosojavabelia. Catovajëtabiabatsi dax-itacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë.

³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenenarëyatsi.

⁴ Pamonae tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtavanapaejava, nexata bitso sivajamatabëcuenenarëyanë tsabiabi. Itsacuenejava ata pematatsënëa bajarapacuenia apo nejamatabëcuenenarëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname.

⁶ Pamonae Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebapon-aenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane.

⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonae Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa

yavenonatsi, nexata Dioso nacatane bajarapamonaeta Dioso pijacuene bevajatonanacuenebivi.

Pacuenia Diótrfes pibisiacuene exana yabara pelivaisi

⁹ Xanë bajayata copiaya toyaquinajë Dioso pejumečovënëtsivi, panijatamarata pejinavanapaevi. Itsiata bajarapabaxutota taitorobicuenia Diótrfes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa.

¹⁰ Bajaraxuata itsa patsianajë xamëjavata, catsipaebianatsi daxita pacuenia Diótrfes exana. Bajaraponë pibisiacuena tanebaracuaicuajijajava, taneyabaranajumetsënëtsijava ata, catsipaebianatsi. Itsacuenejavanënuua pematatsënëa pibisiacuene exanabiaba. Diótrfes apo copiapitabiabi xaniavaetsia pamonaë Dioso pejumečovënëtsivi. Itsamonae ata itaveta pecopiapitsiyaniva pepatsivi. Nexata picani pamonaë Diótrfes itaveta, itsiata copiapitabiaba Dioso pejumečovënëtsivi. Nexata pamonaë Diótrfes itavetsi ata, itsiata copiapitabiaba, bajarapamonaë Diótrfes jamatabëvecuacapsapa Dioso pejumečovënëtsivi penacaetuatsibovecua bajarapamonaë pematatsënëa penajoneyaniva bajarapabota.

¹¹ Gayo, pëtsa exanaponaponame pacuenia pibisiajamatabëcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuena Demetrio vënëlivaisipaebatsi pexaniacuene pexanaponaponaëjava. Espíritu Santo baja cajena pexaniajailivaisi jivi peyapëtaeyaexanaenë. Nexata Espíritu Santo jivi yapëtaeyaexanaponatsi pexaniacuene Demetrio pexanaponaponaëjava. Paxanë ata baja cajena payapëtaniji Demetrio pexaniacuene pexanaponaponaëjava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaëjava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujjobinexa. Itsiata abaxë apo jitsipaenë bajarapalivaisi tacatoyaquinaenexa

mapabaxutotaje. ¹⁴ Tsipaji jamatabëcatanetsi bepijia. Nexata abaxë tajacuata cabarëcuaicuaijaisi tsane.

¹⁵ Catovajëtatsi Diosojavabelia pecayavenonaenexa jamatabëcuenexanepanaeya neponaponanexa. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecajavaponaponaexae. ² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavana-paenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsianiva penajumetsënëtsilivaisi petsipaebavana-peavitsi yabara pelivaisi

(2 Pe 2.1-7)

³ Tajamonae bitso patacaasivavi, jamatabëpacatoyaquinatsi picani matavëjêa paneyapëtaenexa Dioso papecacapanepae-javanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepae-javanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsianiva bajarapamonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. ⁴ Tsipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia

Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

⁵ Payapëtaneme rabaja mapacueneje. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacuene, itsiata jitsipajë panenajamatabënapitsinexa icatsia bajarapacuene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tsipaji bajarapamonae apo jumecovënëtsitsi.

⁶ Panajamatabënapirenuu pacuenia Dioso exana ángelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapaenua itsajota picani Dioso tocopata pejinavanapaenexa. Bajaraxuata Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavana-paeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaángelevi ata naneconitsiaexanaena daxitamatacabijavabelianexa.

⁷ Panajamatabënapirenuu Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaecotocaevi jinavanapa mapamatacabitaje, peyapëtaenexa. Nexata bajarapamonae ata pibisiacuene pexanaeyaniva, apo peverevereceaesotojavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanae ata pamonaemi bajayata pibisiacuene exanavanapa, itsiata pamonaepenajumetsënëtsilivaisi pacatsipaebavanapa, apo canaëjëtsi Dioso penaneconitsiaexanaejavanexatsi. Pamonaepenajumetsënëtsilivaisi pacatsipaebavanapa, pibisiacuene exanabiaba. Bajarapamonae pina majitsinaebota tane papibisiacuene bajarapamonae exanaejitsia. Bajaraxuata nexata bajarapamonae pibisiacuene

exanabiaba pevitota. Apo jumecovënëtsi pacuenia Dioso itorobatsi. Dioso pijaángelevi ata bajarapamonae pibisiacuenia baracuaicuajai tsabiabi. ⁹ Angelnë Miguel, ángelevi penamatacaitorobinë. Angelnë Miguel bitso ayaijamatabëcuenenë ata, yaiyatane dovathi. Pibisiacuenia apo baracuaicuajai. Apo bijataenua. Bajayata Moiséspijinë petëpanucaenë jamatabëpitatsi picani dovathi. Nexata ángelnë Miguel apo copatsi Moiséspijinë dovathi pepitsinexatsi. Nexata dovathibeje, ángelnë Miguelbeje, najumenotabeje Moiséspijinëmi yabara. Itsiata bajarajota ángelnë Miguel pibisiacuenia apo bijatae dovathi. Saya xaniavaetsia ángelnë Miguel jumaitsi dovathijavabelia: “Dioso raja cabijataena,” jai. ¹⁰ Itsiata baitsi jane pamonaë penajumetsënëtsilivaisi pacatsipaebavanapa, xaniavaetsia ángelevi apo tae ata, apo yapëtae atanua, pibisiacuenia baracuaicuajai tsabiabi. Nexata pacuenia unupijidujuai apo cujarubi atatsi, itsiata pijacuata yapëtane pexanaejavanexa, bajara pijinia pacuenia bajarapamonae ata saya pijacuata yapëtane mapanacuapijicuene pexanaenexa. Nexata exanavanapa pibisiacuene pacuenia jamatabëexana. Nexata itsamatacabi Dioso verebiabiana bajarapamonae bajarapapibisiacuene pexanaexae.

¹¹ ¡Bitso bejiobi tsane pamonaë penajumetsënëtsilivaisi pacatsipaebavanapa! Bajarapamonae Dioso naneconit-siaexanaena. Tsi-paji pacuenia bajayata Caínpijinë jamatabëcueneitsi, bajarapamonae ata jamatabëcueneitsi tsavanapae. Bajayata Caínpijinë pibisiacuene exanaponapona pacuenia jamatabëexana. Pacuenia bajayata Balaampijinë ata jamatabëcueneitsi, bajarajamatabëcueneitsi tsavanapae pamonaë penajumetsënëtsilivaisi pacatsipaebavanapa. Bajayata Balaampijinë Dioso apo jumecovënëtsi pacuenia itorobatsi. Balaampijine palata pepitsinexa, jivi matacapona pibisiacuene pexanaenexa. Pacuenia bajayata Corépijinë ata jamatabëcueneitsi, bajara jamatabëcueneitsi tsavanapae pamonaë penajumetsënëtsilivaisi pacatsipaebavanapa. Bajayata Corépijinë apo jumecovënëtsi pacuenia Moiséspijinë itorobatsi. Nexata Corépijinë beyaxuabatsi Dioso. Bajara pijinia pacuenia pamonaë penajumetsënëtsilivaisi pacatsipaebavanapa, pibisiacuene pexanaexae, nexata Dioso verebiabiana bajarapamonae. ¹² Pamonaë penajumetsënëtsilivaisi pacatsipaebavanapa, payajavanacaetuatabiabame itsa panacaetuatabiabame panenabaninexa. Paxamë panacaetuatabiabame namataenetsia panenasivaxae. Nexata bajarapamonae najoneyabiaba panenacaetuatsijavata. Bajarapamonae

pibisiacuene pexanabiabixae, bepiaxuirajava paxamë tuatuajëta. Bajarapamonae aurajibia ayaijava xaeyabiaba. Petocopatsinexa itsamonae ata penaxaenexa, apo naja-matabëxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Èpamonae saya naeveta. Bajarapamonae pexanaejava, itsacuenejavayonexa ata apo xanepanae. Yapëtanetsi pacuenia itsi vaita. Vaita itarërëbo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi totsaquenae atatsi, apo jamatabëcuene yavenonaetsi. Bajara saya jamatabëcueneitsi tsavanapae pamonaе penajumetsënëtsilivaisi pacatsipaebavanapa. Tsipaji apo jamatabëcuene yavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae apo xanepanae itsacuenejavayonexa ata. Bajara saya jamatabëcueneitsi tsavanapae pamonaе penajumetsënëtsilivaisi pacatsipaebavanapa. Tsipaji apo jamatabëcuene yavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae peubinë yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonaе penajumetsënëtsilivaisi pacatsipaebavanapa pibisiacuene pexanabiabixae. Nexata bajarapamonae Dioso xuabianatsi infernojavabelia. ¹³ Pacuenia malataca caecovëta apo rucae, caponanua piaxuirapërë pitapayabelia, bajara saya jamatabëcueneitsi tsavanapae pamonaе penajumetsënëtsilivaisi pacatsipaebavanapa. Caejamatabëcuene apo xainabiabi. Bajarapamonae piauracuene pexanabiabixae, nexata bepiaxuirajava paxamë tuatuajëta. Bajarapamonae pejamatabëcueneta jamatabëcuenebijianabiaba itsamonae Dioso pejume-covënëtsivi. Pacuenia athëbëvetsica tulupu othopaena pevereverecaenexa, bajara pijinia pacuenia bajarapamonae ata vereverecaena. Diosovecua naxuabiana. Tsipaji copaba pejumecovënëtsijavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pitaquirinacuata jinavanapaena daxitamatacabijavabelianexa.

¹⁴ Enocpijinë bajayata ponapona. Bajaraponëmi Adánpijinë pemomoxiyajuvënënë. Nexata Enocpijinë Dioso pejamatabëcueneta bajayata tajëvelia vajunupaeba, pamonaе aeconoxae mapamatacabitaje penajumetsënëtsilivaisi pacatsipaebavanapa. Enocpijinë baja cajena bajayata tajëvelia bajarapamonae yabara jumaitsi mapacueniaje:

“Vajatuxanenē Cristo, pijajivi ángelevi, ayaiBITSÄETOXANETO yajava, najetarucaena. ¹⁵ Najetarucaena penaneconitsiaexanaenexa daxita pamonaē apo exanaē Dioso pitorobicueniatsi. Najetarucaena penaneconitsiaexanaenexana daxita pamonaē pibisiacuenia baracuaicuajai Dioso,” jai baja cajena bajayata tajēvelia Enocpijinē. ¹⁶ Pamonaē penajumetsēnētsilivaisi pacatsipaebavanapa, apo sivajamatabēcuenebarēya itsacuenejavayo ata. Nexata pibisiacuenia baracuaicuajai tsabiabi daxita xua bajarapamonaē tocopiapataponatsi. Apo jumecovēnētsi pacuenia Dioso itorobatsi. Nexata bajarapamonaē exanavanapa pijacuata penatojitsipaecuenia. Bajarapamonaē ayaijamatabēcuenevi nataeya navajunupaebabiaba xua exana. Itsamonaējavabelia itsa cuaicuajai, pexaniacuenia cuaicuajai tsabiabi. Bajarapacuenia pexaniacuenia cuaicuajai tsabiabi saya pebarēyataenexatsi, perajutsinexatsinua penamatavenonaējavanē.

Pacuenia Dioso pejumecovēnētsivi muxujibatsi pejumecovēnētsiyanima penajumetsēnētsilivaisi petsipaebavanapaevitsi yabara pelivaisi

¹⁷ Tajamonaē bitso patacaasivavi, panajamatabēnapire pacuenia baja cajena tajēvelia pacatsipaeba apóstolevi, vajatuxanenē Jesucristo pijajivi. Apóstolevi baja cajena tajēvelia pacatsipaeba pepatsijavanexa penajumetsēnētsilivaisi papecatsipaebivinexa. ¹⁸ Apóstolevi baja cajena tajēvelia pacajumaitsi mapacueniaje: “Nacua pecopiarucaevajēnaeyota, itsamonaē capocaponaena pexaniajailivaisi, Dioso pejumelivaisi. Bajarapamonaē exanavanapaena pibisiacuene, pacuenia pijacuata natojitsipa,” pacajai baja cajena tajēvelia apóstolevi. ¹⁹ Pamonaē penajumetsēnētsilivaisi pacatsipaebavanapa, bajarapamonaē papecatsipaebilivaisita, Dioso panejumecovēnētsivi pacanavecuanatsanaeyaexanapona. Bajarapamonaē saya najamatabēxaina ēmapanacuapijijamatabēcueneje. Nexata pibisiacuene exanavanapa pacuenia pijacuata natojitsipa. Bajarapamonaē Espíritu Santo apo tsijamatabēcaetsi.

²⁰ Tajamonaē bitso patacaasivavi, asaēyata Dioso pajumecovēnētavanapare. Pacuenia Espíritu Santo pacaitoroba, pavajētabiabarē Diosojavabelia. ²¹ Paxamē bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejevamē, pacopiaevetavanapare maticabi apo pevereverecejava papecarajutsinexa vajatuxanenē papecaitaxutotsoniataexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeaebapona. Bajarapitsivi payavenonare xaniavaetsia pejumecovënëtsinexa bajarapalivaisi. ²³ Bajarapamonae isotojavabelia bepejopaevinexa. Tsipaji pibisiacuenejavabelia jamatabējopa. Bjaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonaponare bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

Pacuenia apóstolenë Judas itoroba daxita Dioso pejumecovënëtsivi: “Dioso, bitso ayaijamatabëcuenenëmë,” pejainexa Diosojavabelia yabara pelivaisi

²⁴ Dioso caējëpatsi papecaevetsinexa pibisiacuene paneexanaeyaniva. Nexata pamatacabi Dioso naneconitsiaexanaena daxita pijaneconi pexainaevi, paxamë ata pacanubenaeyaexanaena bajaraponë Dioso, penivenivenaectia pexainaenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. ²⁵ Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bjaraxuata daxitajivi bejumaitsi Diosojavabelia: “Diosomë, bitso ayaijamatabëcuenenëmë,” bejai. Betsipaebaponanua itsamonaejavabelia Dioso bitso ayaijamatabëcuene pexainaenëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaējëpaejavatsi pevetsinexa daxitajivi. Bjarapacuenia Dioso jamatabëcueneitsi tsaponaponae mapanacuaje pexanaevajënaeya, mapamatacabi ataje, daxitamatacabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaáangel xanëjavabetsica. Nexata bajaraxuanë jumapecataeya tajëvelia netsitajëta Jesús pijaáangel. Neyapëtaeyaexananua pajamatabëcuenelivaisi xaina bajaraxuanë. ² Nexata daxita bajaraxuanë pacuenia tani, pelivaisi yaquinajë mapabaxutotaje. Pacuenia Dioso nejumaisi, yaquinajë. Pacuenia Jesucristo ata jumaisi, bajaraxua ata yaquinajë.

³ Pajivi tsimuxulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaeta namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaisi, bajarapamonaeta jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaeta tsaponaeta pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina sietepatomarabejepijivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi sietepapabitsaëtomébeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeyaata, Dioso ponapona. Daxitamatacabijavabelianexaata Dioso ponapona. Pacatovajëtatsi Diosojavabelia papecajamatabëcuenebarëyayaexanaenexa, papecayavenonaenexanua. Sietepaespíritubeje nubena Dioso peecaejava, tronovënëjava, pitabarata. Pacatojitsipatsi bajarapamonaeta papecajamatabëcuenebarëyayaexanaenexa, papecayavenonaenexanua. ⁵ Jesucristojavabeliaata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja

namataxainaeya Dioso asaëyaexanatsi petëpaejavavecua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuaajibiaexana daxita pibisiacuene vajaexanaeneconimi. ⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayaijamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

⁷ ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonae ata yenecacuatatsi, bajarapamonae ata taenatsi. Daxita nacuanëpijivi, pamonae Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

⁸ Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtatsi yabara pelivaisi

⁹ Xanë Juannë, panijabananënë. Tsiipaji najujumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivixaemë, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë.

¹⁰ Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji.

¹¹ Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa.

Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejepijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tataenexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. ¹³ Bajaraxuanë petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana. ¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia baco-tia itsi, bajara itaxutocotia itsi. ¹⁵ Petaxubeje ata nivenivenabeje pacuenia banivenivena broncevënëjjava pesetsijava, be-oronanitomi. Pecuaicuaijajava najumeta pacuenia banajumeta jonca. ¹⁶ Pecujanenia cobenanuca siete patuluputo-beje. Pecuibuatsina pitsapa anijabarëneniabeje pexiujai-espada. Pacuenia matabipijijumeto itsa aitavajënae, xani-avaetsia baitayota, bajarapacuenia itabaranaitayota.

¹⁷ Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. ¹⁸ Xanë rajane baja pepo tasaëtsaponaponaenë daxitamatacabijavabelianexa. Xanë picani tëpajë. Itsiata baitsi jane icatsia asaënë tatëpaecujinae. Nexata baja asaënë tsaponaponaedaxitamatacabijavabelianexa. Dioso netocopata tacapanepaenexa tajajivi peponaeyaniva infernojavabelia. Netocopatanua tananeconitsiaexanaenexa pijaneconi pexainaevi peponaenexa infernojavabelia. ¹⁹ Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. ²⁰ Xuanë, siete patuluputobeje, tacujanenia cobenanucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi

penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainaje. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatuajëta penucaenë.

2

Pacuenia Juan vajatuxanenë Jesús itorobatsi petoy-aquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi

¹ Jesús icatsia nejumlahtsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujuanenia cobenanuca, siete xuabeje orota pexanaejavanë pematatuta penaitayotanubenaejavanë tuatuajëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: ² “Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaeyava. Yapëtanijinua panecuenenataejitsibijava pibisiacuene pexanaevi. Yapëtanijinua nayajivitaeya panejinavanapaeyava itsamonae papecayamaxëitojorobiyaniya. Itsamonae picani papecayamaxëitojorobinexa, pacajumai tsabiabi: ‘Paxanë raja paapóstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae. ³ Paxamë bajayajebi pacajamatabëcuenesaëmë tsavanapae Dioso panejumecovënëtavanapaeyava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panenacuenebavanapaexae, pacasivajamatabëbarëyatsi. ⁴ Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata copiaya panejitsipame. ⁵ Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë

tsane. ⁶ Itsiata baitsi jane pacasivajamatabëcuenebarëyatsi patanejamatabëcuenejëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata kujiruitoyanë. ⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espíritu Santo,” pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavaanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

⁸ Jesús icatsia nejumaitsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tēpa. Itsiata baitsi jane icatsia asaë petëpaecujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ⁹ “Yapëtaniji daxita xua paexanavanapame. Yapëtanijinua itsamonae papecabejibiaexanaponaejava. Yapëtanijinua bepanejobivicuene. Itsiata baitsi jane itsamatacabi Diosojavatatsia bitso panexainaevi tsane. Yapëtanijinua pibisiacuenia papecabaracuaicuaijajava judíovi, Dioso apo pejumecovënëtsivi. Bajarapamonae cajena saya dovathi pijajivi. ¹⁰ Pëtsa pacujunavame itsamonae, pacabejibiaexanaejetsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenejëbinexa, papecajamatabëcueneyapëtaenexa xaniajai pepacuene patanejumecovënëtsijavamë. Pacabejibiaexanaponaena diez pamatacabibeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianatsi matacabi apo pevereverecajava. ¹¹ Itsa pamuxuvojorubename, panatojumetaema pacuenia

Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi apo itsacueniabi tsanetsi cotocaevi patëpaejava,’ jai Espiritu Santo,” pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi

¹² Jesús icatsia nejumaitsi:

—Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaiespada.

Jesús nitoroba Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹³ “Yapëtaniji daxita xua paexanavanapame. Yapëtanijinua dovathi pijajivi tuatuajëta panejinavanapaejava. Itsiata baitsi jane pajamatabëcuenesaëmë tsavanapae patanejumecovënëtavanapaejavamë. Bajayata Antipaspijinë tajumelivaisi jivijavabelia tsipaebabiaba. Nexata Antipaspijinë paxamë tuatuajëta dovathi pijajivi pebeyaxuabijavatsi, patae atamë, itsiata apo pacopatsimë patanejumecovënëtavanapaejavamë. Bajarapacuenia patanejumecovënëtavanapaeaxamë, pacasivajamatabëcuenëbarëyatsi. ¹⁴ Itsiata baitsi jane itsajamatabëcuenëjavaxi yabara pananeconitame xanëjavaberena. Bajarajota Pérgamo tomarata paxamëyajuvënëvi muxubijia-penetapona itsamonae pibisiacuene pexanaenexa. Bajayata Balaampijinëmi jivi peyamaxëitojorobabiabinëmi ponapona. Nexata Israelpijinë pemomoxi penaneconitsinexa Diosojavabelia, Balaampijinëmi itoroba Balacpijinëmi pemuxubijia-penetaponaenexa Israelpijinë pemomoxijavabelia. Nexata Balacpijinëmi muxubijia-peneta Israelpijinë pemomoxi penaponaenexa fiestajavabelia. Nexata fiestajavata itsamonae dajubinë itsa beyaxuaba, jumapecataeya pexanaenëanëjavabelia ofrendacuenia perajutsiyajuvënëvi naxane Israelpijinë pemomoxi. Balacpijinëmi muxubijia-penetanua Israelpijinë pemomoxi pibisiacuene pexanaenexa pevitota. Bajara pijinia pacuenia aeconoxae paxamëyajuvënëvi ata exanapona.

Pérgamo tomarapijivi pibisiacuene pexanaenexa, muxubijiapenetapona. ¹⁵ Itsamonae pijinia paxamëyajuvënëvi nicolaítavi petsipaebaponaelivaisi jumecovënëtavanapa. Nexata tanejumecovënëtsivi pibisiacuene pexanaenexa, bajarapamonae muxubijiapenetapona. ¹⁶ Bajaraxuata paxamë xaniavaetsia panajamatabëcuenepënëyorore Diosojavabelia. Itsa jume, xanë nexata naxanitsiayo ponaenajë paxamëjavabereca tabarënabenexa bajarapamonae tacuibuatsina pepitsapaeepadata. ¹⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi rajutsianajë pexaenexa manávënëjava, athëbëpijjava, pejamatabëcuene asaëyaexanaejavanexatsi. Rajutsianajënuua penioponaeiboto. Bajarapaiboto pijumata bajarapajivi vënërutsianajë pejanavënë. Itsajivi ata apo vënëyapëtae tsanetsi. Caejivi, bajarapaiboto pepitsijivi, navënëyapëtaena,’ jai Espíritu Santo,” pejailivaisi toyaquinare Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Tiatira tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁸ Jesús icatsia nejumaitsi:

—Tiatira tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Dioso pexënato, ponë pitaxutobeje naitayota. Pacuenia isotocotia bacotia itsi, bajara pitaxutocotiaitsinë, ponë petaxubejenivenivena ata pacuenia banivenivena bronzevënëjava pesetsijava, beoronanitomi.

Jesús nitoroba Tiatira tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹⁹ “Yapëtaniji daxita xua paexanavanapame. Yapëtanijinua itsamonae ata paneasivatsavanapaejava. Yapëtanijinua patanesivanajamatabëcuene copatavanapaejavamë. Yapëtanijinua panetonacuenebijava Dioso. Yapëtanijinua paneajamatabëcuenesaë tsavanapaejava, itsamonae pacaitsacueniababiabi ata. Yapëtanijinua pacuenia panetonacuenebavanapame pamatacabi ajena panejumecovënëtame. Yapëtanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabëbarëyatsi. ²⁰ Itsiata

baitsi jane itsajamatabëcueneyo yabara pananeconitame xanëjavaberena. Tsipaji apo pacujiruitavetsimë Jezabelvënëva pibisiacuene pexanaejava. Bजारapova beprofetava, Diosojumelivaisi bepepaebiva, natane. Nexata patajajivimë bजारapova pacayajuvënëyamaxëitojorobapona baja. Bजारapova papecayajuvënë yamaxëitojorobinexa jumai tsabiabi: 'Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuena pevi perajutsinexa jumapecataeya pexanaenëanëjavabelia, bजारapaviyajuvënëjava xae atatsi, itsiata apo itsacuene,' jai tsabiabi bजारapova patajajivimë papecayajuvënë yamaxëitojorobinexa. ²¹ Bजारapova picani pecopatsijava pibisiacuene pexanabiabijavavecua, bajayajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepënëyorotsi xanëjavaberena. ²² Bजारapova nexata avitaniaexanaenajë camata pebobocaenexa. Nexata pamonaе paxamëyajuvënëvi itsa apo copatsi tsane bजारapova pitorobicueniatsi pexanavanapaejava, pamatabëxëyo pevitota pibisiacuene exana bजारapova pitorobicueniatsi, nexata bजारapamonae ata bitso nabejobitsiaexanaenajë. ²³ Bजारapova pexi ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bëpënëa pejamatabëëthëtota, penajamatabëxainaecuene ata, tayapëtaenëcuene. Pacaejivimë canacujitsia xuavajëto panetonacuenebavanapame, bajara pijinia pitsijavavajëto pacarajutsianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. ²⁴ Paxamë apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamë apo pajumecovënëtsimë dovathi pijalivaisi, palivaisi Jezabel jivi tsipaebapona. Bजारapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bजारaxuata apo pacaitorobitsi panejumecovënëtsinexa pematatsënëa itsalivaisi, piyapëbejelivaisi. ²⁵ Nexata pacaasaëmëre tsavanapae panejumecovënëtsijava Dioso pejumelivaisi matapania ètapatsimatacabitsica javabelianexa. ²⁶ Itsamonae èpetëpaejavabelianexa, catsitecavanapaena tanesivanajamatabëcuene copatavanapaejava. Tajitsipaecuene ata netoexanavanapaena. Bजारapamonae itsamatacabi tocopatsianajë pevetsinexa daxitanacuapijivi. ²⁷ Bजारapamonae itsamatacabi daxitanacuapijivi itsa evet-

siana, ajumesaëya itorobabiabiana pejumecovënëtsinexatsi. Pacuenia xanë ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë. Pacuenia atsananito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamonae Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi. ²⁸ Pamonae tajajivi, rajutsianajë pexainaenexa papinijicotia xainajë ayaijamatabëcuenevinexa. ²⁹ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia,” pejailivaisi toyaquinare Tiatira tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

3

Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanapaevi penamatacaitorobinëjavabelia yabara pelivaisi

¹ Jesús icatsia nejumaitsi:

—Sardis tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë xaina siete paespíritubeje, Dioso pijaespíritu, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: “Yapëtaniji daxita xua paexanavanapame. Yapëtanijinua itsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijinua bëpënë panejamatabëcuenefaefaenaejava patanejumecovënëtsijavamë.

² Nexata namataenetsia panajamatabëcueneasaëyaexanare. Pajamatabëcueneitsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuensaëya exanaenamenua itsamonae ata, pamonae pijinia jamatabëcuenefaefaenapona tanejumecovënëtsijava. Tsipaji baja bajarapamonae imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsitapexaniacuene.

³ Panajamatabēnapire palivaisi baja copiaya itsamonae pacatsipaeba xanē patacapanepaejavanexa yabara. Pacaasaēmēre tsavanapae bajarapalivaisi panejumecovēnētavanapaejava. Pacopabare pibisiacuene paneexanabiabijava. Panajamatabēcuenepēnēyorore Diosojavabelia. Namataenetsia itsa apo panajamatabēcueneasaēyaexanaemē tsane patanejumecovēnētsijavamē, nexata jemata patsiarecajē patacananeconitsiaexanaenexa. Apo payapētaemē tsane paepatota patsijitsianēreca. Tsipaji paepatota apo panejamatabēnajinaemē, jemata patsiarecajē. Pacuenia penacobetoxotsinēnexa jemata bapata, paepatota apo jamatabēnajinaetsi, bajara pijinia xanē ata itsinē tsane.

⁴ Paxamē Sardis tomarata panejinavanapaevi, itsamonae paxamēyajuvēnēvi pibisiacuene apo exanae. Pacuenia itsi pamonaē apo toaxuiratsi penaxatabijavanē, bajara pijinia jamatabēcueneitsi tsavanapae bajarapamonaē Dioso pitabarata aneconijibia pejinavanapaexae. Itsamatacabi bajarapamonaē xanējavata jinavanapaena. Bajarapamonaē itsamatacabi xanējavata itsa jinavanapaena, pianeconijibixae, naxatabiana penioponaējavanē.

⁵ Pamonaē nejumecovēnētavanapaena ēpetēpaejavabelianexa, bajarapamonaē naxatabiana penioponaējavanē. Bajara-pamonaē apo vēnēiquinaenē tsane pabaxutota vēnērubena pamonaē matacabi apo peverevereceaējava pexainaevinexa. Biji rajane pamonaē tajajivi, vēnēyapētaēyaexanaponaēnajē taxajavabelia, taxa pijaāngelevijavabelia ata. ⁶ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnētsivijavabelia,” pejailivaisi toyaquinare Sardis tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaējavanē tuatuajēta penucaenē.

Pacuenia Juan vajatuxanenē Jesús itorobatsi petoyaquinaenexa Filadelfia tomarata Dioso pejumecovēnētavanapaevi penamatacaitorobinējavabelia yabara pelivaisi

⁷ Jesús icatsia nejumaitsi:

—Filadelfia tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē pianeconijibinē, ponē copiaevetavanapatsi icatsia pepatsijavanexatsica vajanacacapanepaenexa.

Pacuenia bajayata Davidpijinē eveta Israelnacua, bajara pijinia pacuenia Jesús evetsiana mapanacuaje. Evetsiana athēbētatsia ata, Dioso pijanacua. Nexata

itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caëjëpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubenaenexa tsane. Nexata itsajivi ata apo caëjëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ⁸ “Yapëtaniji daxita xua paexanavanapame. Apo pasaëmë. Itsiata panejumecovënëtavanapame. Apo panayavajunuaxainaemë patajajivicuenemë. Bajaraxuata pacatocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo caëjëpaetsi tsane papecacopatsiaexanaenexa talivaisi jivi panetsipaebaponaenexa. ⁹ Panejumetaema. Itsamonae rabaja judíovi ata, dovathi pijajivi. Tsipaji apo nejumecovënëtsi. Bajarapamonae jamatabëcuenenavëxaniabiaya jumai tsabiabi: ‘Paxanë raja pajudíovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tsipaji apo nejumecovënëtsi. Bajarapamonae itsamatacabi paneitabarata pematabacabëta pacatonubenaeyaexanaenatsi. Nexata bajarapamonae yapëtaena paxamë patacaasivacuene. ¹⁰ Pacaitorobatsi patanejumecovënëtsijavamë bajayajebi panecasaëtsavanapaenexa. Nexata baja bajarapacuenia panejumecovënëtavanapame. Bajaraxuata nexata pamatacabi daxitanacuapijivi piayaicuene taeponaena, paxamë pacaevetsianatsi. Nexata paxamë apo pacaitsacueniabi tsane. ¹¹ Naxanitsiayo rabaja ponaenajë paxamëjavabereca. Xaniavaetsia baja pacaasaëmëre tsavanapae patanejumecovënëtavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. ¹² Pamonaen nejumecovënëtavanapaena ëpetëpaejavabelianexa, bajarapamonae taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso pijamatabëcuenesaë tsavanapaxae tsane tanejumecovënëtavanapaejava.

Bajarapamonae taxa Dioso athëbëtatsia yajavajinavana-paena daxitamatacabijavabelianexa. Nexata taxa Dioso pevënë yaquinarutsianajë bajarapamonaejavabelia. Yajavayaquinarutsianajë taxa Dioso pijatomara pevënë. Bajaratomara, pejana Jerusaléntomara. Bajaratomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajë bajarapamonaejavabelia. ¹³ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Laodicea tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁴ Jesús icatsia nejumaitsi:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacacapanepaenexa.

Bajaraponë pexaniajailivaisi jivi tsipaebabiaba. Pexanaenëna daxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹⁵ “Yapëtaniji daxita xua paexanavanapame. Yapëtanijina patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijina bevelia patanetonacuenebavanapaejavamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë. Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonae apo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamonae xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji roviaalia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. ¹⁶ Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena.

Bजारapitsira apo jitsipaetsi vajaapaenexa. Nexata vajaapaeyaniva, navecuaepatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenē pacuenia bēpēnēa panejamatabēcuenevetsina pajamatabēcuenesimē tsavanapae. Baitsi apo jitsipaenē bevelia patanejitsipaejavamē. Bajaraxuata pacanavecuaxuabianatsi. ¹⁷ Paxamē pajamatabējumaitsimē tsabiabi: ‘Xanē baja cajena bitso daxitacuene taxainaenē. Daxita xua nacuenebaponaponajē taxinaejavanexa, netocapitsapapona. Nexata itsacuenejava ata apo namatavenonaenē,’ pajamatabējamē tsabiabi. Itsiata baitsi jane Diosojavabelia apo panejamatabēcuenexanepanaexae, pepacuene apo pajamatabēcuenebarēyamē tsavanapae. Apo payapētaemēnua bitso bepanejibicuene Dioso pitabarata. Paxamē cajena Dioso pacatane bepantaxutotsēcēnaevi bitso, bepanejumasajinaevinua. ¹⁸ Bajaraxuata pacamuxujibijitsiatsi. Panevecuapire bitso penamatamotsijava paricovinexamē jane baja Diosojavatatsia. Panevecuapirenua penioponaenaxatatsijava panenaxatatsinexa, panenaperabēcaranatsinexa Dioso pitabarata paneaurajavavecu. Panevecuapirenua paneitaxutotsēcēnaevaē panetaenexa jane baja xaniavaetsia. Nexata dovathi pijacuene panayajivitaename papecayamaxēitorobijaniva. ¹⁹ Daxita pamonae tasivavi, muxujibajē peyapētaenexa. Naneconitsiaexanajēnua pecopatsinexa apo tajitsipaecuene pexanaejava. Nexata asaēyata panejumecovēnēre. Pacopabare pibisiacuene paneexanabiabijava. Panajamatabēcuenepēnēyorore Diosojavabelia. ²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanē ata panejamatabēēthēto itsa panetobaupatsianame, pacatsijamatabējonenatsi. Nexata pacayajavaponaponae-natsi daxitamatacabijavabelianexa. ²¹ Xanē baja cajena taxa Dioso taneitorobicuenia jumecovēnētaponaponajē ētatēpaejavabelianexa. Nexata baja aeconoxae yajavaecajē taxa peecaejavata, pijatronovēnējavata. Pamonae pijinia nejumecovēnētavanapaena ēpetēpaejavabelianexa, bajarapamonae pijinia tocopatsianajē tayajavaecaenexa tronovēnējavata. ²² Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnēsivijavabelia,” pejailivaisi toyaquinare Laodicea tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

4

Pacuenia Juan tane Dioso pijajivi Dioso pijanacuatatsia yabara pelivaisi

¹ Icatsia taniji baupa penabaupatanucaejava athëbëtatsia. Ponë baja copiaya jumetaniji pecuaicuaijajava betrompetajume, bajaraponë icatsia pecuaicuaijajava jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuaijajava.

² Nexata bajarapaepatota nayapëtaniji athëbëtatsia Espiritu Santo pesaë tayajavaponaponaejava. Athëbëtatsia taniji tronovënëjava. Bajarapatronota Dioso taeyetajë.

³ Dioso, ponë eca bajarapatronota, itabaracotiabatsi. Pacuenia cotiaitsi penamatamotsiibotonë, bajara itabaracotiaitsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bajarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucacae bajarapaaravalibo.

⁴ Bajarapatrono matatoyorotsia taenubajënuva veinticuatro patronobeje. Caetronota canacujitsia ecapona ancianonëanë. Bajarapaancianovi naxatabena penioponaejavanë. Orotta pexanaecoronanë mataena. ⁵ Patronota eca Dioso, bajarapatronojavaverena yamaxë binebinejai. Najumetajununua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejumecovënëtavanapaevi, Espiritu Santo peyavenonabiabijavanexatsi.

⁶ Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaitothiavi, ayainëanë. Trono matatoyorotsia nubena. Bajarapamonae pitabarayareca, pejumareca ata, itaxutorubenaponareca. ⁷ Copiaya ponë, benevëthë petsobianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi.

⁸ Ponëanë, cuatro ponëbeje piaitothiavi taniji, xainapona seis pacorofetobeje caenë canacujitsia. Bajarapamonae daxitanëanëreca itaxutorubenaponareca. Bëpënëaverena ata bajarapacuenia itaxutorubenaponareca. Matabijebi, meravijebi ata, apo copatanubena pejumaitsanubenaejava Diosojavabelia.

Bitso nianeconijibinē. Bitso ayaijamatabēcuenenēmē. Nexata cacaējēpa daxitacuene nexanaenexa. Ajena, mapamatacabitaje, ponaponame. Mapanacujaje nexanaevajēnaeya ata, ponaponame. Daxitamatacabijavabelianexa ata ponaponame, jai tsanubenaē bajarapamonae Diosojavabelia.

⁹ Pamonaē cuatro ponēbeje piatiothiavi, pexaniajamatabēcuenenua rajutabiaba Diosojavabelia. Bajarapamonae pexaniajamatabēcuenē itsa rajutabiaba Diosojavabelia, jumai tsabiabi mapacueniaje:

—¡Diosomē, nenivenivenaecotia bitso pinijicuene! ¡Ayaijamatabēcuenenēmē bitso! jai tsabiabi.

Bajarapacuenia jumai tsabiabi tronota peecaenējavabelia, daxitamatacabijavabelianexa peponaponaenējavabelia. ¹⁰ Pamonaē cuatro ponēbeje piatiothiavi, bajarapacuenia itsa jumai tsanubenaē Diosojavabelia, nexata pijinia bajarapaepatota pamonaē veinticuatro ponēbeje ancianovi pematabacabēta tonubenajunua Dioso pitabarata, daxitamatacabijavabelianexa peponaponaenē pitabarata. Bajarapacuenia tonubenajunua Dioso pitabarata peyaiyataexae. Bajarapaancianovi Dioso pijatronojavabelia topenelia pijacoronanē. Bajarapaancianovi Diosojavabelia jumai tsanubenaē:

¹¹ Patajatuxanenēmē, patajaDiosonēmē. Xanepana itsamonaējavabelia patacavajunupaebaponaējava nenivenivenaecotia pexinaējava. “Diosomē, bitso ayaijamatabēcuenenēmē,” pacajai tsaponaetsinua. Xanepananua patajumaitsaponaējava: “Dioso cajena bitso piasaēnē,” patajaitsaponaējava. Tsipaji baja daxitacuene nexanaenē. Nejitsipaecuenia daxitacuene exaname. Mapamatacabijavaberena ata abaxē tsiteca daxitacuene nexanaējava nexanaecujinae. Bajarapacuenia abaxē tsiteca daxitacuene nexanaējava xamē nejamatabēcueneta, jai tsanubenaē ancianovi Diosojavabelia.

5

Pacuenia Juan athēbētatsia cobetaeyeta Dioso pequionae-cuyalatobaxuto pecobenaecaejava yabara pelivaisi

¹ Athēbētatsia taeyetajē Dioso. Tronota eca. Pequionae-cuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje upicatsanaruba. ² Nexata taenutajē bitso piasaēāngelnē. Bajarapaāngelnē piniijumeta jumaitsi mapacueniaje:

—¿Jipatsa nexata jamatabëcuenecaëjÿpatsi Dioso petocopatsinexatsi pesaracaenexa sellovënëjavaxi, bajarapacuyalatoxaxuto piupicatsanarubiselloxi? jai.

³ Itsiata baitsi jane ajibi pejamatabëcuenecaëjÿpaejivitsi bajarapacuyalatoxaxuto piupicatsanarubiselloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjÿpaetsi cajena. Nexata itsajivi ata Dioso apo tocopatsi pesaracaenexa bajarapacuyalatoxaxuto piupicatsanarubiselloxi bÿpënëa paitane rubena petaenexa. ⁴ Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjÿpaejivitsi bajarapacuyalatoxaxuto pequionaejava pebaxuisinaenexa pelebinexa. ⁵ Nexata itsanë ancianoviyajuvënënë nejumlahitsi:

—Pëtsa baja nuame. Caenë raja jamatabëcuenecaëjÿpatsi bajarapacuyalatoxaxuto pequionaejava pebaxuisinaenexa. Bajaraponë Judápijinë pemomoxiyajuvënënë. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënënë. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjÿpatsi pesaracaenexa bajarapacuyalatoxaxuto piupicatsanarubiselloxi, nejai ancianoviyajuvënënë Jesucristo yabara.

⁶ Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaе cuatro ponëbeje piaithiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematabiabarutsivajÿnëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rabaja pijinia paespíritubeje, Dioso pijae-spírituanë. Bajarapasiete paespíritubeje Dioso baja itoroba daxitanacuanëjava. ⁷ Nexata jane baja Dioso, ponë eca tronota, ponë pequionaecuyalatoxaxuto cobenaeca pecujuaenia. Corderonë cujitalalia. Corderonë jane baja vecuapita bajarapacuyalatoxaxuto. ⁸ Corderonë baja itsa pita bajarapacuyalatoxaxuto, nexata pamonaе cuatro ponëbeje piaithiavi, Corderonë pitabarata pematabacabëta tonubenajunua. Bajara pijinia pacuenia pamonaе veinticuatro ponëbeje ancianovi, Corderonë pitabarata pematabacabëta tonubenajunua. Caeciano canacujitsia saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaponaеjavami Diosojavabelia, Dioso tane bajarabepitsi-

tuxujuvijava. ⁹ Nexata pamonaе cuatro ponēbeje piatothiavi, pamonaе pijinia veinticuatro ponēbeje ancianovi, daxita bajarapamonaе, naxēana Corderojavabelia mapapejanavajije. Penaxēanaejavata vajita jumaitsi Corderojavabelia mapacueniaje:

Cajamatabēcuenecaējēpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabēcuenecaējēpanua bajarapacuyalatobaxuto piupicatsanarubiseloxi ata nesaracaenexa. Bajarpacuenia cajamatabēcuenecaējēpa baja tsipaji baja cabeyaxuaba pataneneconimatamotsinexamē. Nexata padaxitaviriajumevi atanē, padaxitanacuanēpijivi atanēnua, nijanata baja panecomuatame Diosonexa. ¹⁰ Paneexanamenua baja Dioso papijajivinē itsamatacabi Dioso patanebarēevetsinexa daxitacuene. Paneexanamenua baja pasacerdotevinē jivi patatocuaicuaijajitsabiabivinexa Diosojavabelia. Paneexanamenua baja nacuanē pataevetsivinexa,

jai ancianovi Corderonējavabelia penaxēanaejavata mapapejanavajije.

¹¹ Trono matatoyorotsia nubena cuatro ponēbeje piatothiavi. Nexata piatothiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaēto, millones paángelbeje nubena. Nexata bajarapaángelvi pecuaicuaijajava jumetaniji. ¹² Angelevi ayaijumeta jumaitsi mapacueniaje:

Corderonē, ponē picani beyaxuabatsi, bitso ayaijamatabēcuenenē. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapētaenexa. Tocopatatsinua pinijisaē pexainaenexa. Tocopatatsinua itsamonaе pejumaitsinexatsi: “Xamē bitso ayaijamatabēcuenenēmē,” pejainexatsi. Tocopatatsinua pevajunupaebinxatsi penivenivenaеcotia pexinaejava. Tocopatatsinua daxita pamonaе jumecovēnētatsi, pexaniajamatabēcuenе perajutsinexatsi bajaraponējavabelia. Bajarpacuenia tocopatsi tsipaji ayaijamatabēcuenenē bitso,

jai tsanubenaе mapacueniaje ángelevi Jesús yabara.

¹³ Jumetanijinua icatsia daxita Dioso pexanaevi pecuaicuaijajava. Athēbēpijivi cuaicuaijai. Mapanacuapijivi ata cuaicuaijai. Petēpaevimi ata cuaicuaijai. Manuame-nianēpijivi ata cuaicuaijai. Nexata daxita bajarapamonaе

Diosobeje Jesúsbeje yabara jumaitsi mapacueniaje:

Diosomë, tronota neecaenë. Xamë pijinia Corderonëmë.
 Paxamëbejexavabelia pexaniajamatabëcuene
 pacarajutatsi. Paxamëbeje bitso ayaijamatabëcuene
 panexainaenëbeje. Panenivenivenaecotiabeje
 paxainamebeje. Nexata panenivenivenaeco-
 tiabeje panexinaejavabeje itsamonaejavabelia
 pacavajunupaebaponatsi. Pinijisaë bitso
 panexainaenëbeje. Bajarapajamatabëcuene
 panejamatabëcuenetsitecaenëbeje daxita matababi-
 javabelianexa,

jai daxita Dioso pexanaevi Diosobeje Jesúsbeje yabara.

¹⁴ Pamonae pijinia cuatro ponëbeje piaithiavi jumaitsi tsaponae mapacueniaje:

—¡Bajara itsi tsane! jai bajarapamonae.

Nexata pamonae veinticuatro ponëbeje ancianovi, pe-
 matabacabëta tonubenajunua Dioso pitabarata. Pexaniaja-
 matabëcuene rajutanubena Diosojavabelia, daxitamatababi-
 javabelianexa peponaponaenëjavabelia.

6

Siete pasellobeje yabara pelivaisi

¹ Corderonë taenutajë. Penamataxainaesello sarananuca.
 Nexata pamonae cuatro ponëbeje piaithiaviyajuvënënë,
 caenë pecuaicuajaijava ayaijumeta, jumetaniji. Pecuaicuajai-
 java, beyamaxëjume najumeta. Nexata jumetaniji: “¡Nax-
 anitsia!” pejaijava caballojumata peponaenëjavabelia.

² Nexata bajaraxuacujinae icatsia taniji perenajava
 penioponaecaballota peyanajetarucaenë. Caballojumata
 peecaenë, cobenaeca bitsabi. Rajutatsi corona
 penamataxatatsinexa. Bajaraxuacujinae pona
 pijavajabitsaë pebarënenexa. Nexata pijavajabitsaë
 cueneamoneyabanajetaruca pepacuene ëpecopiarucaeya
 exanaejavabelianexa.

³ Bajaraxuacujinae icatsia Corderonë sarananuca itsasello,
 pecotocaevijava. Nexata pamonae cuatro ponëbeje piaithi-
 aviayajuvënënë, icatsia itsanë: “¡Naxanitsia!” pejaijava,
 jumetaniji.

⁴ Nexata bajaraxuacujinae icatsia taniji perenajava
 petsobiacaballota peyanajetarucaenë. Caballojumata
 peecaenë, piapiaespada rajutatsi. Tocopatatsi
 pecopiarucaeyaexanaenexa mapanacuata jivi xaniavaetsia
 pejinavanapaecuenemi. Jivi jane baja namataenetsia
 nabeyaexanaejitsia daxita nacuanëjava.

⁵ Bajaraxuacujinae icatsia Corderonē sarananuca itsasello, acueyabijava. Nexata pamonaē cuatro ponēbeje piaithiaviyajuvēnēnē, acueyabinē icatsia: “iNaxanitsial!” pejajjava, jumetaniji.

Nexata bajaraxuacujinae icatsia taniji perenajava petsae-biacaballota peyanajetarucaenē. Caballojumata peecaenē, cobenaeca pepesabaponaējava. ⁶ Icatsia jumetaniji pamonaē cuatro ponēbeje piaithiavijavata pejumaitsijava mapacueniaje: “Janibomatacabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajaraparanē bitso namatamota,” pejajjava, jumetaniji.

⁷ Bajaraxuacujinae icatsia Corderonē sarananuca itsasello, cuatrojava. Nexata pamonaē cuatro ponēbeje piaithiavi, pecopiarucaenē jane baja: “iNaxanitsial!” pejajjava, jumetaniji.

⁸ Nexata bajaraxuacujinae icatsia taniji perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitanecuenia ata. Unupijinēanē piayainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonē sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajē pebobenaējava altarjavabēxēpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaējava. ¹⁰ Daxita pamonaemi bajayata beyejebatsi, Diosojavabelia pinijijumeta jumai tsanubenaē:

—Diosomē, pepo pexaniajamatabēcuenenēmē. Pacuenia najumecapanepaeya jumaisimē, bajarapacuenia exanabiabame. ¿Detsa pamatacabibeje abaxē saica nenaneconitsiaexanaenexa mapanacuata pejinavanapaevije, pamonaē panebeyejeba? jai tsanubenaē altarjavabēxēpanata pebobenaēvi.

¹¹ Nexata jane baja bajarapamonae Dioso rajutatsi penioponaenaxatabijavanë. Abaxë Dioso itorobatsi bajarapamonae penacueraevetanubenaenexa. Tsipaji abaxë saica itsamonae Dioso pijajivi, Jesucristo ata petonacuenebivi, pebeyejebinexatsi. Bajaraxuata bajarapamonae abaxë nacuer-aevetsiaexanejebatsi Dioso.

¹² Bajaraxuacujinae icatsia Corderonë sarananuca itsasello, seisjava. Nexata icatsia taniji bitso ira penajëabijava. Maticabipijjuameto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijjuameto pijinia bitso itaxutotsobia. Pacuenia pijana batsobia, bajara itaxutoitsi. ¹³ Nexata tulupu irabetsica othopaica. Pacuenia naejavacuai baothopaica, naejava itsa najëaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonëmi, petunaetonëmi ata, najëaba. ¹⁵ Nexata daxita mapanacuanëjavaje jivi pevetsivi, namatayaba ibovajuanëjava. Namatayaba ibotoxanetonë tuatuajëjava ata. Daxita ayaijamatabëcuenenëanë, bitso riconëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. ¹⁶ Nexata penamatayabivi jumaitsi ibotsutonëjavabelia, ibotoxanetonëjavabelia ata:

—Panetsimataothopare. Dioso, ponë eca tronota, bajara-ponëvecua panematayatsianame. Pinijicuenia raeta pananeconitsiaexanaena Corderonë. Bajaraxuavecua panematayatsianame, jai picani pamonaen penamatayabivi.

¹⁷ Tocopiapatatsi jane baja pinijicuenia Dioso pananeconitsiaexanaematacabitsi. Itsajivi ata cajena apo caëjëpaetsi pevecuapanepaenexa Dioso pananeconitsiaexanaecuenetsi.

7

Pacuenia Juan tane athëbëtatsia pacuenia itsamatacabi itapaitanerubijitsiatsi Israel nacuapijivi Dioso pijajivixae yabara pelivaisi

¹ Icatsia taniji cuatro ponëbeje ángelevi. Bajarapaángelevi nacua matatoyorotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua

caranatanubena. Caenae ata naejava penajëabiyaniva jovibota, caranatanubena ángelevi. ² Tanijinua icatsia itsaángelnë penajetarucaenë orientejavavetsina. Bajarapaángelnë caponapona piasaënë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejejavabelia. Pamonaе cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejejavabelia jumaitsi mapacueniaje:

³ —Dioso pijajivi yajava peitsacueneyaniva, pëtsa abaxë pabijianame ira, naejavaenë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

⁴ Bajaraxuacujinae jumetaniji jivi ayaibitsaëtoxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonaе itapaitanerubatsi Dioso pijasellota, daxita bajarapamonaе Israelpijinëmi pexi doce ponëmibeje pemomoxiyajuvënëvi.

⁵ Nexata Dioso pijasellota itapaitanerubatsi doce mil pajivibeje, Judápijinëmi pemomoxiyajuvënëvi. Doce mil pijinia pajivibeje, Rubénpijinëmi pemomoxiyajuvënëvi. Doce mil pijinia pajivibeje, Gadpijinëmi pemomoxiyajuvënëvi. ⁶ Doce mil pijinia pajivibeje, Aserpijinëmi pemomoxiyajuvënëvi. Doce mil pijinia pajivibeje, Neftalípijinëmi pemomoxiyajuvënëvi. Doce mil pijinia pajivibeje, Manasépijinëmi pemomoxiyajuvënëvi. ⁷ Doce mil pijinia pajivibeje, Simeónpijinëmi pemomoxiyajuvënëvi. Doce mil pijinia pajivibeje, Levípijinëmi pemomoxiyajuvënëvi. Doce mil pijinia pajivibeje, Isacarpijinëmi pemomoxiyajuvënëvi. ⁸ Doce mil pijinia pajivibeje, Zabulónpijinëmi pemomoxiyajuvënëvi. Doce mil pijinia pajivibeje, Josépijinëmi pemomoxiyajuvënëvi. Doce mil pijinia pajivibeje, Benjamínpijinëmi pemomoxiyajuvënëvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinëmi pexi doce ponëmibeje pemomoxiyajuvënëvi.

Pacuenia Juan athëbëtatsia tane jivi ayaibitsaëtoxanetonë, penioponaejavanë penaxatabivi, yabara pelivaisi

⁹ Icatsia taniji jivi ayaibitsaëtoxanetonë. Bajarapamonaе daxitanacuanëpijiviyajuvënëvi, daxitaviriajumevi-yajuvënëvi. Bajarapamonaе nubena Dioso peecaetrono pitabarata, Corderonë ata pitabarata. Jivi cajena ayaibitsaëtoxanetonë bitso. Itsajivi ata cajena apo caëjëpaetsi

penamataējētsicapanepaenexa bajarapajivibitsaētoxanetonē. Daxita bajarapamonae ēpenioponaejavanē penaxatabivi. Cobenanubena benaxarebobaxutonē. ¹⁰ Daxita bajarapajivibitsaētoxanetonē vavajai tsanubenaē ayaijumeta. Jumaitsi tsanubenaē mapacueniaje:

VajaDioso, ponē Corderonē yajavaeca tronota, bajaraponē nacacapanepa pibisiacuene vajaexanaeneconimivecua. Bajarapacuenia nacacapanepa Corderonē pejamatabēcueneta,

jai tsanubenaē bajarapajivibitsaētoxanetonē.

¹¹ Trono matatoyorotsia nubena cuatro ponēbeje piaithiavi. Nexata piaithiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabēcuenē rajutanubena Diosojavabelia.

¹² Bajarapaángelevi ira taenubenaeya jumai tsanubenaē mapacueniaje:

¡Bajara itsi tsane! PatajaDiosomē, pexaniajamatabēcuenē pacarajutabiabianatsi daxitamatacabijavabelianexa. Nenivenivenaecotia nexainaejava, daxitacuene neyapētaenēcuenē ata, pacavajunupaebapon-aenatsi daxitajivijavabelia. Daxitajivi casivajamatabēcuenēbarēya tsabiabi tsane itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaēnē daxitamatacabijavabelianexa. Cajamatabēcuenēcaējēpa nexanaenexa daxitacuene ata daxitamatacabijavabelianexa. Bajara itsi tsane,

jai tsanubenaē irataeya daxita bajarapaángelevi Diosojavabelia.

¹³ Nexata itsanē ancianonē nejumaitsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonē.

¹⁴ Xanē nexata jumaitsinē:

—Xamē raeta jane yapētaneme, janē ancianonējavabelia.

Nexata ancianonē nejumaitsi:

—Mara pamonaēje nacua pecopiarucaevajēnaeya, piayaijunavixaneto pecanicabanubenaevimije. Corderonē pesivatēpaexaetsi, bajarapamonae pibisiacuene pexanaeneconimi vecuaajibiaexanatsi baja. Bajaraxuata penioponaejavanē naxataba. ¹⁵ Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponē eca tronota, bajaraponē evetsianatsi peyajavajinavanapaexae. ¹⁶ Bajarapamonae

baja apo namatavenonae tsane pexaejava. Apo namatavenonae tsane mera ata. Icotia ata apo tsajavi tsanetsi. Icotia piatajajava ata apo jamatabëitonotsi tsanetsi. ¹⁷ Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë maticaponabiabianatsi itsabelia rubena iravetsina pepitsaparubenaemeranë, jivi piatavayaexanaemeranëjavabelia. Daxita bajarapamonae Dioso pijanacuatatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

8

Sietejava sello yabara pelivaisi

¹ Icatsia Corderonë sarananuca cuyalatobaxuto piupicatsatarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. ² Bajaraxuacujinae icatsia taniji siete ponëbeje angelevi. Dioso pitabarata nubena. Nexata bajarapaangelevi rajutatsi siete patrompetabeje. ³ Icatsia xuacujinae itsanë ángelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvënëjava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëabijava. Nexata bajarapatuxujuvijava ángelnë buata altarjumata. Bajarapaaltar, orota pexanaealtar, nuca Dioso peecaetrone pitabarata. ⁴ Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaponaejumemi Diosojavabelia. ⁵ Bajaraxuacujinae ángelnë altarjumavecua nota pitatsajaviitaire. Bajarapaitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëaba.

Siete patrompetabeje yabara pelivaisi

⁶ Siete paángelbeje canaveretanubena pijatrompetanë piobinexa.

⁷ Nexata jane baja penamataxainaeángelnē oba pijatrompeta. Nexata bitso pecainejebimatarejetonē othopareca irabereca. Bajara pacainejebimatarejetonē matajērēaba isoto. Matajērēabanua pijana yajava. Nexata jane baja ira tajuepona daxita nacuanējava. Panacuanējava ira tajuepona, pairavajēto tajuepona matatoxenetsia itsiata yajuvēnēnacopatapona. Daxitaira apo veriajavaponae. Nexata panacuanējava ira tajuepona, daxita naejavanēmi, pejuvijavanēmi ata, yajavatajuepona.

⁸ Bajaraxuacujinae icatsia pecotocaeviángelnē oba pijatrompeta. Taniji bepinijitsutoxaneto petajueyecaejava. Bajaraxua jopareca manuameniareca. Manuamenemi nexata pijana. Pamenevajēto ēpijanamene tsarucae, bajarapamenevajēto matatoxenetsia itsiata pijananejeva yajuvēnēnacopata. ⁹ Pamanuamene ēpijanamene tsarucae, bajara pamanuamenepijidujuaimi tēpa baja. Pamanuamene pijinia pijananejeva nacopata, bajara pamanuamenepijidujuai apo tēpae. Pamanuamene ēpijanamene tsarucae, bajarapamanuameneta perubenaebarcoxanetonēmi ata napeneta. Pamanuamene pijinia pijananejeva nacopata, bajarapamanuameneta perubenaebarcoxanetonē apo napenetsi.

¹⁰ Bajaraxuacujinae icatsia acueyabiángelnē oba pijatrompeta. Nexata pinijituluputoxaneto jopareca irabereca. Bajarapatuluputoxaneto tajuerucaponareca. Pacuenia bepinijiisotocotiaxaneto bacotia itsi, bajaracotia itsi tsarunaereca. Panacuata jopa bajarapatuluputo, bajarapanacuata daxita perubenaemenianēmi, bijiana baja. Iravetsina mera pepitsaparubenaejavanēmi ata, bijiana baja. Nexata baja abeje daxita bajarapameranēmi. Panacuata apo jopae bajarapatuluputo, bajarapanacuata perubenaemenianē, apo bijiana. Nexata xanepana daxita bajarapameranē. Mera iravetsina pepitsaparubenaejavanējava ata, xanepanarubena. ¹¹ Bajarapatuluputo pevēnē Ajenjo. Pamerajavareca jopareca bajarapatuluputo, bajarapamera atsaxa baja. Jivi ayaibitsaētoxanetonē tēpa penatsiapaexae bajarapamera.

¹² Bajaraxuacujinae icatsia cuatroángelnē oba pijatrompeta. Nexata jane baja itaxutobijiana matabipijijuameto. Itaxutobijiana meravipijijuameto ata. Itaxutobijiana tuluputonē ata. Nexata matabipijijuameto bijiaya naitayota. Meravipijijuameto ata bijiaya naitayota.

¹³ Bajaraxuacujinae icatsia taniji itsanē ángelnē pepunana-jetarucaenē. Pepunanajetarucaenē ángelnē jumai tsanaje-tarucae ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnēbeje penacopabivi! jai tsanajetaruae ángelnē pepunanajetaruaenē.

9

¹ Bajaraxuacujinae icatsia cincoángelnē oba pijatrompeta. Nexata taniji athēbēvereca ángelnē perunaejavareca irabereca. Nexata bajarapaángelnē Dioso rajutatsi llave, iravetsina pepitsapaeméthēxaneto pijallave.

² Nexata jane baja bajarapallaveta ángelnē méthēxaneto vēpacasarana. Ángelnē jane baja vēpata méthēxaneto. Nexata bajarapaméthēxanetojavatsina pitsapaina etsēxēxaneto. Pitsitsēxēxaneto bapitsapa pinijipabixaneto itsa tajuita, bajarapitsitsēxēxaneto pitsapaina bajarapaméthēxanetojavatsina. Nexata bajarapatsēxēta matabipijijuametomi itaxutoaitaquiriayaexana. Itaboxo ata aitaquiriayaexana.

³ Bajarapatsēxējavaverena pitsapa bosesē. Bajarapabosesē daxitanacuanējava punanajetarubena. Bajarapabosesē caējēpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa.

⁴ Bajarapabosesē apo itorobitsi pebijianaenexa itsacuenejava ata xua pejuvijava. Nexata bajarapabosesē apo bijianaponae pona. Apo bijianaponae naejavanē ata. Tsipajī itorobatsi pecacuatsinexa saya ējivi. Nexata pamonae Dioso pijasellota apo itapaitanerutsitsi, bajarapamonae pecacuatsinexa.

⁵ Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bajarapabosesē jivi itsa cacuatsianatsi, bitso jivi navixaetaena. Pavixaevajēto aqueto itsa cacuata, baatane, bajarapavixaevajēto jivi navixaetaena.

⁶ Nexata pamonae cacuatsianatsi bajarapabosesē, jitsipaena picani petēpaenexa bajayajebi penavixaetaeyaniva. Itsiata baitsi jane bajarapamonae Dioso abaxē apo tocopatsi tsane petēpaenexa. Penabeyaxuabinexa ata, Dioso apo tocopatsi tsane.

⁷ Bajarapabosesē ajumabocotaja. Pacuenia vajabitsaē itsa nabejitsia, pijacaballo bajumaxataba hierropananē pijavajabitsaē petojorojoronaeyanivatsi, bajara itsanubenaē bajarapabosesē. Beorota pexanaecoronanē namataxatabanubena. Pacuenia pebi itabaraitsi, bajaraitabaraitsi.

⁸ Pematana xaina. Pacuenia petiriva matanaitsi, bajara matanaitsi. Pevonotonē pijinia benevēthēvonotonē.

⁹ Bajarapamonae pejumabocotonē yajavanaexana baja cajena behierrojumabocotonē pejorojoronaeyanivatsi itsajivi ata. Pecorofē najumeta. Pacuenia vajabitsaē

penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe. ¹⁰ Bajarapabosese pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. ¹¹ Bosese cajena xaina ángelnë pitorobinënexatsi, pinijimëthëxaneto pevetsinë. Bajarapaángelnë hebreojumeta pevënë Abadón. Griegojumeta pijinia Apolión, “Peverebiabinë,” pejaijume.

¹² Bajarapapiayaicuene penamataxainaejava. Itsiata baitsi jane abaxë saica anijavabeje.

¹³ Bajaraxuacujinae icatsia seisángelnë oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucazona. Bajarapamataetonë tuatujëta jumepitsapa. ¹⁴ Bajarapaaltarjavaverena jumaiti seisángelnë trompeta pexainaenëjavabelia mapacueniaje:

—Isicare cuatro ponëbeje ángelevi, pamona e cëbejebatsi pinijimenejavata, Eufratesvënë menejavata, jai bajarapaaltarjavaverena.

¹⁵ Nexata jane baja pecëbejebiánglelevimitsi isicatsi. Isicatsi bajarapaángelevi pebenexa jivi. Bajarapaángelevi jivi ayaibitsaëtonë beponaejitsia daxitanacuanëjava. Bajara saya cajena ëxuanexa, paángelevi Dioso jamatabëcueta pexainaenëjavabelia mapacueniaje:

—Isicare cuatro ponëbeje ángelevi, pamona e neeve-tanubena Dioso pitorobinexatsi jivi pebeponaenexa paepatota tocaëjëtatsi. ¹⁶ Nexata icatsia jumetaniji bajarapaángelevi pijajivi, vajabitsaëvi, pitorobijava peponaenexa caballota. Doscientos millones ponëbeje vajabitsaëvi pona jivi pebeponaenexa daxitanacuanëjava.

¹⁷ Bemajitsinaebota taniji bajarapamona e caballota peponaejava. Vajabitsaëvi namëpabëxataba hierropananë pejorojoronaeyanivatsi pijavajabitsaë. Vajabitsaëvi penamëpabëxatabijavanë itabëta acueyabi paviriabejejavata. Itabëta mapaviriabejejavataje. Itabëta petsobiajavata. Itabëta perajenaejavata. Itabëta pevayanaejavata. Bajarapaviriabejejavata itabëta. Pacuenia nevëthëmatabocoto itsi, bajaramataboco itsi bajarapacaballuanë. Pecuibovojo-tonëjavavetsina pitsapa pitarunutsicotia, ëtsëxë yajava, azufre ata yajava. ¹⁸ Xuanë caballuanë pecuibovojo-tonëjavavetsina pitsapa, bajaraxuanë jivi ayaibitsaëtoxanetonë yatëpazona

daxitanacuanëjava. Pabitsaëtovajëto tëpa, bajarapabit-saëtovajëto matatoxenetsia nacopata mapanacuataje. ¹⁹ Bajarapacaballuanë cajëjpati jivi pebeponaenexa pecuibovojotonëta, pebosotonëta ata. Bajarapacaballuanë pebosotonëupianë bejomomatabocotonë. Pacuenia jomo pematabocotota cajëjpati jivi pesininexa pebeyaxuabinexa, bajara itsi bajarapacaballuanë pebosotonëupianë.

²⁰ Itsiata baitsi jane pamonaë peyajuvënëtëpaevi, pamonaë penacopabivi, bajarapamonaë tsiteca pibisiacuene exanavanapa. Apo copatsi dovathivijavabelia penavajëcabiabijava. Apo copatsinua pecobeta jumapecataeya pexanaenëanëjavabelia ata penavajëcabiabijava. Bajaraxuanë saya pexanaenëanë oronanitonëta, platananitonëta ata, bronzejavanëta ata, ibotonëta ata, naejavanëta ata. Nexata bajaraxuanë apo cajëjpaetsi petaenexa. Apo cajëjpaetsi pejumetaenexa ata. Apo cajëjpaetsi peponaenexa ata. ²¹ Pamonaë peyajuvënëtëpaevi, pamonaë penacopabivi, bajarapamonaë apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

10

Pacuenia Juan tane ángelenë pecobenanucaejava cuyalato-baxutoyo yabara pelivaisi

¹ Icatsia taniji itsaángelnë athëbëvetsica perunaëjavatsica. Runaica mapanacuayabetsicaje. Bajarapaángelnë bitso piasaëángelnë. Itarërëbo tuatuajëta najetaruca. Natsimatatsënërutana jetaruca aravalibo. Itabaranaitayotanajetaruca. Pacuenia matabicipijiumeto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsohia, bajarapacuenia cotiatsobia. ² Cuyalato-baxutoyo baxupatanuca. Pecujanenia pataxu nataxunutanuca manuamenebox-overeca. Petsavenonenia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevëthë itsa fiaba ayaijume, bajarapacuenia ayaijume. Pevavajaicujinae siete payamaxëbeje najumeta athëbëtatsia. ⁴ Yamaxë penajumetsicujinae, yaquinaëjitsianë picani pajamatabëcuene yabara yamaxë penajumetsijava neyapëtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

—Muetsia saya xainare pajamatabëcuene yabara yamaxë penajumetsijava, cayapëtaeyaexana. Pëtsa yaquiname bajara-palivaisi, nejai athëbëvetsica.

⁵ Bajaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanuca athëbëabetsia pecujuanenia pacobe.
⁶ Bajarapaángelnë nacobeyotsiaya jumai tsanucæ:

—Dioso, daxitamatacabijavabelianexa peponaponaenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponë pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajëvelia najamatabëxaina pexanaenexa. ⁷ Itsa rabaja paepatota siete ángelnë obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivijavabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumaitsi profetavimijavabelia, jai tsanucæ nacobeyotsiaya ángelnë.

⁸ Copiaya pajume jumetaniji athëbëvetsica tanejumaitsi-
 java, bajarapajume icatsia jumetaniji. Nejumaitsi icatsia
 athëbëvetsica mapacueniaje:

—Ponë ángelnë nataxunutanuca manuameneboxovereca, irajumavereca ata, bajarapaángelnë kujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

⁹ Nexata kujiliajë ángelnë. Vajëtajë nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

—Äjã, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnë.

¹⁰ Nexata baja ángelnë bajarapacuyalatobaxutoyo vecuapitajë. Xaniji jane baja. Nexata jane baja cuiboxaicajë. Pacuenia jabëra xaica, bajara itsi. Itsiata baitsi jane taquijonicujinae tacotsorotubereca atsaxa. ¹¹ Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpijivi. Tsipaebare pacuenia Dioso sivanajamatabëxaina daxitavirijumevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

11

Pacuenia itsamatacabi anijanēbeje jivi tsipaebaponaenabeje palivaisi Dioso yapētaeyaexanaenatsibeje yabara pelivaisi

¹ Icatsia taniji ángelnē. Nerajuta piapianaebo. Nejumaitsi mapacueniaje:

—Nonotapunare. Caponare mapanaeboje necaējēbinexa Dioso pijatemplobo, necaējēbinexa altarvēnējava ata. Namataējētsianamenua pajivibeje bajarapatemplobota navajēca Diosojavabelia. ² Itsiata pētsa caējētame templobopanabo. Tsipaji bajarapapanabo tocopata baja Dioso apo pejumecovēnētsivīnexa, pamonae saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yaiyatae tsane judíovi pijatomara. ³⁻⁴ Bajayata profetanēmi peyaquinaebaxutota, comparacióncuenia tajēvelia jumaitsi mapacueniaje: “Anijanaebeje, olivonaebeje, anijajavabeje pijinia pitayotanucaejavabeje, nubenaena mapanacuapijivi pijatuxanenē Dioso pitabarata,” jai. Bajarapacuenia comparacióncuenia tajēvelia itsa jumaitsi, tajēvelia vajunupaeba anijanēbeje jivi petsipaebanajetarucaejavanexabeje palivaisi Dioso yapētaeyaexanaenatsibeje. Nexata anijanēbeje Dioso itorobiana jivi petsipaebanajetarucaenexabeje palivaisi Dioso yapētaeyaexanaenatsibeje. Palivaisi bajaraponēbeje Dioso yapētaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaēbērējava. Bajarapacuenia naxatatsianabeje bitso pesivajamatabēcuenebējaixabeje tsane pamonae apo peyaiyataevi Jerusaléntomara, nejai ángelnē.

⁵ Itsajivi itsa jamatabēitsacueniabianatsibeje, bajaraponēbeje nayajivitajuitsianabeje pecuibovojotovetsina pepitsapaecotiata, pitarunutsicotiata. ⁶ Bajaraponebanajetarucaenabeje. Naxatatsianabeje piayopapaēbērējava. Bajēbeje caējēpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapētaeyaexanaenatsibeje, bajarapamatacabibeje abaxē ema apo jopaeyaexanaeabeje tsane. Caējēpaenatsibejenua mera ata pijanara pexanaenexabeje. Caējēpaenatsibejenua daxitaviria piayaicuene pecapitsapaenexabeje pamatacabita jitsipaenabeje. ⁷ Bajaraponēbeje itsa veretsianabeje palivaisi Dioso yapētaeyaexanaenatsibeje jivi petsipaebanajetarucaejavabeje, bitso piayainē pitsapaenina pinijimēthēxanetojavatsina. Bitso piayainē pitsapaenina pebenexatsibeje bajaraponēbeje. Nexata

amoneyabianatsibeje. Nexata baja beyaxuabianatsibeje. ⁸ Nexata petëpaenëbeje bocaenabeje Jerusalén tomaraxaneto callejavata. Bajarapatomarata bajayatami vajatuxanenë ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuene exana. ⁹ Nexata bajaraponëbeje, Jerusaléntomara callejavata petëpaenëbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemëthëtsinexatsibeje bajaraponëbeje. Nexata daxitaviriajumevi, daxitanacuanëpijivi ata, taeyabuatsianatsibeje. ¹⁰ Dioso apo pejumecovënëtsivi sivajamatabëcuenebarëyatsibeje tsane petëpanucaejavabeje. Bitso cajena barëya tsane Dioso apo pejumecovënëtsivi. Nexata pebarëyajamatabëcuene fiesta exanaena. Namataenetsia narajutsiana amoneya itsacuenejavanë. Bajarapacuenia exanaena Dioso apo pejumecovënëtsivi bajaraponëbeje petëpaejavabeje yabara. Tsipaji Dioso apo pejumecovënëtsivi jumaitsi tsane: “Copiaruca rabaja maponëbeje livaisi vajanacatsipaebabiabijavaje. Copiaruca baja vajanacajamatabëitonotabiabijava,” jai tsane. ¹¹ Itsiata baitsi jane petëpaecujinaebeje, acueyabi pamatacabibejecujinae itsamatacabi epatua, icatsia Dioso piasaëjumali rajutsianatsibeje. Nexata petëpaejavabejevecua namatacotsianabeje. Daxita cajena pamonaë taeyabuatsianatsibeje petëpanucaejavabeje, bitso cujunavianatsibeje. ¹² Bajaraxuacujinaë bajaraponëbeje jumetaenabeje athëbëvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponëbeje junaeniabeje athëbëabetsia itarërëbo tuatuajëjavabetsia. Daxita pitoyavitsibeje pëtaenubenaenatsibeje. ¹³ Bajara jane paepatota ira najëabiana. Nexata Jerusalén tomarata, itsajota diez pabobeje najuaenaena, caebo yajuvënëjopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajëabita tëpaena. Jerusalén tomarapijivi, pamonaë nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomë, ayaijamatabëcuenenëmë bitso, jai tsane pecajunavi Diosojavabelia, athëbëtatsia peecaenëjavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejava bepijia najetarucaena, acueyabijava.

Sietenē baja ángelnē pijatrompeta piobijava yabara pelivaisi

¹⁵ Sietenē jane baja ángelnē oba pijatrompeta. Nexata athëbëvetsica pinijijumeta pejumaitsijava, jumetaniji. Jumaitsi mapacueniaje:

Daxitanacuanëpijivi rajane baja vajatuxanenē Cristobeje, Diosobeje, evetaponaponaenabeje. Bajaraponëbeje evetaponaponaenabeje daxitamatacabijavabelianexa,

pejaijava athëbëvetsica, jumetaniji.

¹⁶ Nexata pamonaē veinticuatro ponëbeje ancianovi, pamonaē ena pijatronota Dioso pitabarata, daxita bajaramonaē irataeya bobena. ¹⁷ Bajarapamonaē ancianovi irataeya jumai tsanubenaē Diosojavabelia:

Xamë Diosonëmë, nijamatabëcuenesaënē daxita mapanacuanē pevetsivivecuaje. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Daxitamatacabijavabelianexa ata ponaponame. Pexaniajamatabëcuene pacarajutatsi. Tsipaji baja taxuxuabame pinijisaëta nevetaponaponaenexa daxita mapanacuanëpijivije. ¹⁸ Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonaē. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamonaē catotsipaebavanapa nijumelivaisi itsamonaējavabelia, bajarapamonaē jane baja rajutsianame xua toxainame bajarapamonaē nerajutsinexa. Pamonaē ayaijamatabëcuene pexinaevi ata, cavënëlivaisiyaiyatane. Pamonaē beveliajamatabëcuene pexinaevi ata, cavënëlivaisiyaiyatane. Bajarapamonaē ata jane baja rajutsianame xua toxainame bajarapamonaē nerajutsinexa. Tocopiapatatsinua baja pijinia neverebiabinexa daxita pamonaē bijiana mapanacuaje, pamonaē ata jamatabëcuenebijiana pecajumecovënëtsivi,

jai tsanubenaē irataeya ancianovi Diosojavabelia.

¹⁹ Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenaē pacuenia Dioso najumecapanepaeya jumaitsi pijajivi pecapanepaenexa pijaneconive-

cua. Yamaxë binebinejai. Najumetanua. Ira najëabanua. Bitso pecainejebimatarejetonë irabetsica othopaica pinijicuenia.

12

Pacuenia Juan athëbëtatsia tane dragón bitso pianaepanaejava yabara pelivaisi

¹ Athëbëtatsia ayaicuene naitajëta vajanacayapëtaeyaexanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtatsia petiriva taenutajë. Petiriva jumanava naitayotanuca. Pacuenia matacabipijjuameto baitayota, bajarapacuenia jumanava naitayotanuca. Meravipijjuametojavavelia nataxunutanuca. Namataxatatanuca doce patuluputobeje pexainaecorona. ² Bajarapova petiriva penacueto peyacotajinaeva. Pevixaenotsijavatatsi bitso yaaëäjai. ³ Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. ⁴ Bajaraponë, dragón, nabosovebabia. Nexata penabosovebabejavata tulupu ayaijava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtatsia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxixaenexatsi picani. ⁵ Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuata jivi pepo pevetsinë tsane. Itsa evetsiana, ajumesaëya itorobabiabiana pejumecovënëtsinexatsi. ⁶ Nexata petiriva penacuetonëyo pevecuanaexanaecujinaetsi, najetabajirava petusato nacuayabelia, itsabelia Dioso tsivajënaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

⁷ Bajaraxuacujinae athëbëtatsia vajabitsaë exana. Angelevi penamatacaitorobinë, Miguelvënënë, pijaängelevi yajava, barënabia dragónjavabelia. Dragón pijinia, pijaängelevi yajava, barënabia Migueljavabelia. ⁸ Itsiata baitsi jane dragón kujirumoneyabatsi. Nexata apo tocopatsitsi caenë ata dragón pijajivitonë penacopatsinexa athëbëtatsia. ⁹ Dragón cajena ayainëxaneto. Itsiata baitsi jane xuabicatsi athëbëvetsica daxita pijajivi yajava. Nexata bajaraponë pevënë Dovathi. Itsavënë Satanás. Bajaraponë bajayata itsa

naitajëta jivijavabelia, naitajëta bejomocuenia. Bajaraponë jivi yamaxëitojorobabiaba daxitanacuanëjava.

¹⁰ Nexata jumetaniji pinijijumeta athëbëvetsica pejumaitsi-
java. Jumaitsi mapacueniaje:

—Copiapata rabaja Dioso vajanacacapanepaejavanexa vajaneconivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacue neconitabiaba Diosojavabelia Dioso vajanajuajumecovënëtanapaevi, bajaraponë baja xuabicatsi athëbëvetsica. Baitsi dovathi. Bajaraponë picani Dioso pitabaratsia nuca. Nexata bajaraponë daxita matabijebi, daxitameravijebi ata, Diosojavabelia neconitabiaba Dioso vajanajuajumecovënëtanapaevi. ¹¹ Dioso vajanajuajumecovënëtanapaevi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebapona sua itsamonaejavabelia Cristo pecapanepaejavanexatsi pijaneconivecua. Dioso vajanajuacovënëtanapaevi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi. ¹² Athëbënacuatatsia panejinavanapaevi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajiohimë tsane. Paxamë ata, manuameneta panejinavanapaevi, bitso cajena bepajiohimë tsane. Bajarapacuenia bitso bepajiohimë tsane tsipaji baja panetuatuajëatsica dovathi xuabicatsi. Nexata baja aeconoxae bitso bajaraponë anaepanapona. Tsipaji baja yapëtane caematabibeje saya petonacopatsijavatsi pexuabinexatsi infernojavabelia, pejaijume athëbëvetsica pinijijumeta, jumetaniji.

¹³ Nexata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo. ¹⁴ Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponaponaenexa. Nexata bajarajotalia Dioso rajutabiabatsi pexaejava acueyabi pavaibeje epatua. ¹⁵ Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picani petiriva. ¹⁶ Itsiata baitsi

jane petiriva Dioso yavenonatsi. Ira nexata navoconareca ayaijava. Nexata pamerami dragón pecuibovojotuatina pitsapaina, bajarapamëthëareca joneca. ¹⁷ Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyejebinexa. Bajarapamonae jumecovënëtavanapa Dioso pejumelivaisi pitorobicueniatsi. Bajarapamonae caasaë tsavanapaenua penavajunupaebijava Jesucristo pejumecovënëtavanapaejava. Nexata bajarapamonae dragón tsimaxëponatsi pebeyejebinexatsi.

13

Pacuenia piayainëbeje pelivaisi Juan yaquina yabara pelivaisi

¹ Nucajë manuamene tajetabota. Nexata taenucajë manuamenejavatsina pepitsapaejavatsina piayainë. Siete pamatabocotobeje diez pamataetobeje pexainaenë. Caemataeto canacujitsia xainapona corona. Caematabocoto canacujitsia Dioso apo pejitsipaevënëanë itanerubena. ² Ponë piayainë taenucajë pepitsapaejavatsina, benevëthë picani. Itsiata petaxu betsonëtaxu. Pecuibovojoto pijinia benevëthë petsobianëcuibovojoto. Bajaraponë nasaërajutatsi dragón. Pijatrono ata rajutatsi. Jamatabëcuene caëjëpaeyaexanatsinua ayaicuenia pitorobinexa daxitajivi mapanacuajavaje. ³ Piayainë caematabocoto matabocovajënëbatsi apo bepeyaasaëvajënënexa itajara. Itsiata baja bajarapavajënë matanacëta. Nexata daxitanacuanëpijivi itsa tane bajaraponë pematavajënënacëtsijava, bitso jamatabëcuenenabenajaca. Nexata bajarapamonae jumecovënëta bajaraponë. ⁴ Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematabacabëta navajëcabiaba dragónjavabelia. Pematabacabëta navajëcabiabanua piayainëjavabelia ata. Bajarapamonae najumaitsi mapacueniaje:

—Ajibi cajena itsanë ata pejamatabëcuenecaëjëpaenëtsi pacuenia itsi mapapiayainëje. Ajibi cajena itsanë ata pecaëjëpaenëtsi pebarënabenexa maponëje pecuenea-moneyabinexa, najai bajarapamonae piayainë yabara.

⁵ Piayainë tocopatatsinua pibisiacuenia Dioso pebaracuaicuaijainexa. Tocopatatsinua pejumaitsabiabinexa: “Xanë cajena bitso ayaijamatabëcuenenënë Dioso matatoxenetsia,” pejaitsiabiabinexa. Tocopatatsinua pitorobinexa jivi mapanacuajavaje cuarenta y dos pajuame-tobeje, baitsi acueyabi pavaibeje epatua. ⁶ Bajaraponë exanapona pacuenia tocopatatsi. Bitso pibisiacuenia

Dioso baracuaicuajai tsabiabi. Dioso pijatemplobo ata pibisiacuenia baracuaicuajai tsabiabi. Athëbëtsatsia pejinavanapaevi ata pibisiacuenia baracuaicuajai tsabiabi. ⁷ Tocopatatsinua vajabitsaë pexanaenexa Dioso pijajivijavabelia. Tocopatatsinua pecueneamoneyabinexa vajabitsaë itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanëpijivi ata. ⁸ Nexata daxita mapanacuapijivije pematabacabëta navajëcabiaba piayainëjavabelia. Dioso nacua pexanaevajënaeya, Dioso nacua pexanaecujinae ata, bajarapamonae apo vënërubena Corderonë pijacuyalatobaxutota. Corderonë jivi rajuta matababi apo pevereverecejave pesivatëpaexae cruzata.

⁹ Itsa pamuxuvojorubename, panatojumetaema mapali-vaishje. ¹⁰ Pamonae Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonae pijinia Dioso pijajivi espadata bena, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabëcuenecopatsinexa Diosojavabelia epatua copatsinejeva.

¹¹ Bajaraxuacujinae icatsia taenucajë iravetsina pepitsapaejava itsanë piayainë. Anijamataetobeje pexainaenë. Pacuenia oveja pebito mataeitsi, bajara pemataeitsinë. Itsiata baitsi jane pecuaicuajaijava, pacuenia dragón pecuaicuajaijava jumeitsi, bajarajumeitsi.

¹² Papiayainë copiaya pitsapaina manuamenejavatsina, bajaraponë yajavaponapona. Nexata papiayainë copiaya pitsapaina manuamenejavatsina, nasaërajuta iravetsina papiayainë cotocaevi pitsapainajavabelia. Nexata papiayainë cotocaevi iravetsina pitsapaina, daxita mapanacuapijivi itoroba papiayainë copiaya manuamenejavatsina pitsapainajavabelia pematabacabëta penavajëcaenexa. Baitsi ponë apo bepeyaasaëvajënënexa itajara matavajënënacëta baja, bajaraponëjavabelia daxita mapanacuapijivije pematabacabëta penavajëcaenexa.

¹³ Nexata papiayainë iravetsina cotocaevi pitsapaina, ayaicue pexanaejava jivi tsitaexanapona. Pitatsajaviitaire ata athëbëvetsica othopaeyaexana irabetsica daxitajivi petaenubenaevavata. ¹⁴ Bajarapacuenia ayaicue pexanaejava pexanaponaexae, yamaxëitojoroba mapanacuajava pejinavanapaevi. Bajarapaayaicue exanapona, papiayainë copiaya manuamenejavatsina pitsapaina, pitabarata. Bajaraxuacujinae, papiayainë

cotocaeui iravetsina pitsapaina, itorobapona Dioso apo pejumecovënëtsivi pexanaenexa pejumapecataenë. Nexata Dioso apo pejumecovënëtsivi, papiayainë copiaya manuamenejavatsina pitsapaina, bajaraponë jumapecataeya exana jane baja. ¹⁵ Nexata papiayainë cotocaeui iravetsina pitsapaina, caëjëpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuaijainexa. Pamonaë pematatabacabëta apo nanavajëcae bajarapajumapecataenëjavabelia, beyaxuabi-aexanapona. ¹⁶ Papiayainë cotocaeui iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi beveliajamatabëcuenevi. Itanerubaponatsi ayaijamatabëcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaë ata dajubicuenia canajetatsi itsamonaëjavabelia amoneya petonacuenebabiabinexa. Itanerubaponatsi pamonaë ata dajubicuenia apo canajetsitsi itsamonaëjavabelia amoneya petonacuenebabiabinexa. ¹⁷ Nexata pajivi aitanejibi, apo tocopatsitsi itsacuenejavayo ata pecomuatseinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. ¹⁸ Mapajamatabëcuenelivaisi bepacanaëjëtameje xaniavaetsia paneyapëtaenexa. Pajivi yapëtane, canaëjëtsi piayainë pijanúmero. Tsipaji bajaraponë panúmero xaina pevënënexa. Panúmero bajaraponë xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxëanaejava yabara pelivaisi

¹ Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonaë pitapathaitota itanerubena Corderonë pevënë, Corderonë paxa ata pevënë. ² Bajaraxuacujinaë jumetaniji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijijonca. Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta,

ayaibitsaëto xaneto itsa najuaracata. ³ Corderonë pijajivi naxëananubena pejanavaji trono pitabarata, cuatro ponëbeje piaithiavi pitabarata ata, ancianovi ata pitabarata. Itsajivi ata cajena apo caëjëpaetsi pecujaninexatsi bajarapavaji. Pamonae ciento cuarenta y cuatro mil pajivibeje, ëbajarapamonae, caëjëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapebijivi penaexanaejavaverenacujinae apo naperabëquenetsiatae petirivajavabelia. Apo jamatabëcuenebijianaetsi itsajivi ata. Bajarapamonae pënajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa, Corderonë ata pijajivinexa. ⁵ Bajarapamonae caeto ata apo najumetsënëtsi. Aneconijibi tsavanapae Diosojavabelia.

Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnë taniji pepunanajetarucaejava. Canajetaruca pexanalivaisi, apo pevereverecaelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanëpijivi, daxitaviriajumevi ata. ⁷ Ángelnë pinijijumeta jumai tsanajetarucæ:

—Dioso cunjaviaya pajinavanapare. “Xamë bitso ayaijamatabëcuenenëmë,” pajamëre tsabiabi Diosojavabelia. Copiapata rabaja Dioso penaneconitsiaexanaponaenexa daxitajivi. Ponë itaboxo exana, ira ata, manuamene ata, mera pepit-saparubenaejavanë ata, bajaraponëjavabelia panematocabëta panavajëtabiabare, jai tsanajetarucæ ángelnë pinijijumeta.

⁸ Icatsia cotocaevi taniji itsanë ángelnë pepunanajetarucæjava. Jumai tsanajetarucæ bajarapaángelnë:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajëcabiaba jumapecataeya pexanaenëanëjavabelia. Nexata belia daxita nacuanëpijivi ata navajëcabiaba jumapecataeya pexanaenëanëjavabelia. Babilonia tomarapijivimi jumapecataeya pexanaenëanëjavabelia penavajëcaejamatabëcueneta, jamatabëcuenebijianapona daxitanacuanëpijivi. Nexata pacuenia pevitota pibisiacuene pexanabiabiva pejamatabëcueneta, daxitajivi jamatabëcuenebijianapona, bajara pijinia pacuenia Babilonia tomarapijivimi ata jumapecataeya pexanaenëanëjavabelia

penavajëcabiabijamatabëcueneta, jamatabëcuenebijianapona daxitanacuanëpijivi. Bajaraxuata bajarapacuenia verebiabatsi, jai tsanajetarucaë ángelnë, ponë cotocaevi taniji pepunanajetarucajava.

⁹ Bajaraxuacujinae icatsia taniji acueyabiángelnë pepunanajetarucajava. Bajarapaángelnë pinijijumeta jumai tsanajetarucaë:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainë pevënëta pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia. ¹⁰ Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaicuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabëfaenaena Dioso pijaánglelevi pitabarata, Corderonë ata pitabarata. ¹¹ Athëbëabetsia bajarapaisototsëxë junaenia daxitamatacabijavabelianexa. Ayaicuenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabëfaenaejava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi itsa nacopatanua piayainë pevënëta pitanerutsinexatsi, bajarapacuenia Dioso naneconitsiaexanaenatsi. ¹² Bajaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Beacaasënuua tsavanapae Jesúsjavabelia penajamatabëcuene copatsijava, jai tsanajetarucaë acueyabi ángelnë pepunanajetarucajavata.

¹³ Bajaraxuacujinae jumetaniji athëbëvetsica tanejumaitsijava. Nejumaitsi athëbëvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenebarëya baja tsavanapae tsane pamonaë tēpapona Dioso pepua pejumecovënëtsivi,” pejaiitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenebijava. Pamatacabi abaxë bajarapamonae asaë tsavanapae mapanacuataje, daxita xua pexaniacuene exanavanapa, bajaraxuajamatabëcuene Dioso athëbëtatsia

matamotsianatsi. Bajaraxuata jamatabëcuenebarëya tsavana-pae tsane bajarapamonae, nejai Espiritu Santo.

Pacuenia itsamatacabi Dioso naneconitsiaexanaejitsia daxita pamonaë pijaneconi pexainaevi yabara pelivaisi

¹⁴ Icatsia taniji penioponaëitarërëbo. Bajarapaitarërëbo tuatuajëta jivitonë eca. Itarërëbo tuatuajëta peecaenë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Namataxatateca orocorona. Cobenaeca bemasete pexiujaijava pecaucubinexa penaveretsiruanë. ¹⁵ Nexata icatsia itsanë ángelnë pitsaparena temploboënëverena. Bajarapaángelnë asaëyata vavajai itarërëbo tuatuajëta peecaenëjavabelia. Jumaitsi bajarapaángelnë:

—Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploboënëverena.

¹⁶ Nexata bajaraxuacujinae ponë eca itarërëbo tuatuajëta, bemasete pexiujaijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

¹⁷ Bajaraxuacujinae icatsia athëbëtatsia itsaángelnë pitsaparena temploboënëverena. Bajaraponë ata capona bemasete pexiujaijava pecaucubinexa penaveretsiruanë. ¹⁸ Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje:

—Mapanacuayaberecaje caucubaremeca daxita uvaruanë, penaveretsiruanë, jai.

¹⁹⁻²⁰ Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pemarëbeneyujubataxuabijavata, pinijijanaraxaneto pitsapona. Nexata bajarapajanaraxaneto navotanucapona. Bajarapajanaraxaneto penavotanucaponaëjava, piapiajava xaina trescientos pakilómetrobeje. Piavajubajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua

ata taniji, pinijivaxixaneto ěněabelia piothotajarabijava pemarkěbeneyujubataxuabinexa, xaina mapajamataběcuenelivaisije. Itsamatacabi āngelně caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaiBITSaětoXanetoně tĕpaena. Nexata bajarapacuenia ayaijana xuabiana.

15

Pacuenia Juan tane athĕbĕtatsia siete ponĕbeje āngelevi, siete xuabeje piayaijavanĕ pecaponaevi peverebiabinexa mapanacuaje, yabara pelivaisi

¹ Icatsia taniji athĕbĕtatsia pinijicuene pitajĕtsijava pacuenia itsamatacabi itsijitsia mapanacuataje. Pinijicuene pitajĕtsijava itsa taniji, nabenajacajĕ bitso. Siete paāngelnĕbeje capona siete xuabeje piayaijavanĕ peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaejava, copiarucaena baja.

² Nexata icatsia taeyetajĕ bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainĕ. Cueneamoneyabanua bajaraponĕ jumapecataeya pexanaenĕtsi ata. Tsipaji pamonaenubena bajarapamene boxojumavereca, itorobi atatsi bajaraponĕbejejavabelia pematabacabĕta pevajĕcaenexa, apo jumecovĕnĕtsi. Apo nacopatsinua pitanerubinexatsi piayainĕ pijanumerota, panumero xaina piayainĕ pevĕnĕnexa. Bajaraxuata bajarapamonae canubena arpa, Dioso perajutsiarpatsi.

³ Bajarapamonae naxĕananubena Moissĕspijinĕ, Dioso pijajivitonĕ, pevaji. Bajarapavaji Corderonĕ ata pevaji. Penaxĕanaejavata, bajarapamonae vajita jumai tsanubenaen mapacueniaje:

Xamĕ Diosomĕ, nijamataběcuenesaĕnĕ daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamĕ daxitanacuanĕ nevetsinĕ. Daxita xua pexaniacuene, nexanaenĕ. Penajumetsĕnĕtsicuene jivi neyamaxĕitojorobinexa, apo nexanaenĕ. ⁴ Daxitajivi xamĕ pecacujunavinĕ tsane. "Dioso cajena bitso ayaijamataběcuenenĕ," cajai tsane. Xamĕ rabaja cajena caenĕmĕ nianeconijibinĕ, caeto ata pibisiacuene apo nexanaenĕ. Daxita nacuanĕpijivi xamĕjavaberena patsiana pematabacabĕta xamĕjavabelia penavajĕcaenexa. Bajarapacuenia

catoitsane tsipaji baja daxitajivi tane ëpexaniacuene
nexanaponaponaejava,
jai tsanubena Diosojavabelia bajarapamonae
penaxëanaejavata.

⁵ Bajaraxuacujinae icatsia taniji athëbëtatsia templobo
ënëtuatuajëalia peyatuucutsipana penapatsijava. Bajara
paënëyatuucutsijavaënëta bajayatami Dioso Moiséspijinëta
penajumecopatsilivaisi peyaquinaeibopananë xaniavaete-
jeba.

⁶ Bajarapatemploboënëverena pitsaparena siete
paángelnëbeje. Bajarapamonae capona siete xuabeje
piayaijavanë, bajaraxuanëta mapanacuaje peverebiabinexa.
Bajarapaánglelevi naxataba pexaniaviriapapaëbërëjavanë, pi-
axuirajibijavanë. Peniojaijavanë bitso. Nacorobëcëbanubena
oropananë.

⁷ Bajaraxuacujinae pamonaе cuatro
ponëbeje piathothiyajuvënëne, ángelëvijavabelia rajuta
copanë. Piayainë caeángelnë canacujitsia rajutapona
caecopa. Bajarapacopanë orocopanë. Dioso, ponë
daxitamatacabijavabelianexa peponaponaenë, ayaicuenia
anaeya naneconitsiaexanaena pamonaе naneconita
bajaraponëjavabelia. Xuanë vënëba bajarapacopanë,
bajaraxuanëta Dioso naneconitsiaexanaena bajarapamonae.

⁸ Bajarapatemplobo tuatuajëmi bitso vënëca ëtsëxë.
Bajarapatsëxë pitsapa Dioso ayaijamatabëcuenenëjavaverena.
Itsajivi ata cajena apo caëjëpaetsi pejonenexa bajarap-
atemplobo ënëtuatuajëabelia. Xuanë siete paángelnëbeje
capona, piayaijavanë, itsa baja panepaena, matapania jivi
caëjëpaenatsi pejonenexa bajarapatemplobo ënëtuatuajëabelia.

16

*Pacuenia Juan tane athëbëtatsia pacuenia itsamatacabi
Dioso naneconitsiaexanaejitsia daxita pijaneconi pexainaevi
yabara pelivaisi*

¹ Icatsia jumetaniji templobojavaverena pinijijumeta peju-
maitsijava. Siete paángelnëbejejavabelia jumaitsi mapacueni-
aje:

—Paponare baja iranëjavabereca paneepacaponaenexa
jane baja xuanë siete pacopabeje vënëca, piayaijavanë. Dioso
jane baja anaeya ayaicuenia penaneconitsiaexanaenexa,
daxita pamonaе naneconita bajaraponëjavabelia, pejaijava,
templobojavaverena jumetaniji.

² Nexata jane baja pona penamataxainaeángelnë. Pecapon-
aera epatajaraba iranëjavabereca. Nexata daxita pamonaе
piayainë pevënëitanetota itanerubatsi, daxita bajarapamonae
bajarapaepatota bitso perabëtsabanareca. Nexata bitso aper-
abëtane bajarapamonae. Bajarapamonae bajarapapiayainë

jumapecataeya pexanaenëtsijavabelia ata pematatabacabëta penavajëcaevi.

³ Bajaraxuacujinae icatsia pecotocaeviángelnë pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

⁴ Bajaraxuacujinae icatsia acueyabiángelnë pijacopapijira epatajaraba menianëjavabereca mera, iravetsina pepit-saparubenaevanëjavabereca ata. Nexata daxita bajarapameranëmi naexana ëpijanaranë. ⁵ Bajaraxuacujinae jumetaniji mera pevetsiángelnë pejumaitisijava Diosojavabelia. Jumaitsi mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Pibisiacuene pexanaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piayainë pijajivi bajarapameranë penatsiapaenexa. ⁶ Bajarapamonae bajayata beyejeba nijajivimi. Pamonae ata cavajunupaebapona, beyejeba. Bajaraxuata bajarapacuenia meranë pijanaranë naexanayaexaname penatsiapaenexa bajarapamonae, jai Diosojavabelia mera pevetsiángelnë.

⁷ Icatsia jumetaniji itsaángelnë altarjavaverena pejumaitisijava. Jumaitsi mapacueniaje:

—Xamë Diosomë, nijamatatabëcuenesaenë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, bajarapaneconivajëtota bananeconitsiaexaname. Itsa aneconijibi tsipae, nexata cajena apo naneconitsiaexanaemë tsipae, pejajjava itsaángelnë altarjavaverena jumetaniji.

⁸ Bajaraxuacujinae icatsia cuatroángelnë pijacopapijira epatajaraba. Epatajaraba matababipijijuametojavabetsica. Nexata matababipijijuameto pecotiata jivi bitso ayaicuenia tsajavatsi. ⁹ Itsiata bajarapamonae apo copabi pibisiacuene pexanabiabijava. Apo najamatatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë caëjëpatsi daxitacuene pexanaenexa, bajaraponë caranata pibisiacuenia baracuaicuaijai.

¹⁰ Bajaraxuacujinae icatsia cincoángelnë pijacopapijira epatajaraba. Epatajaraba piayainë pijatronojavabereca. Piayainë jane baja pevetsinacuami aitaquiri tsanucuae. Piayainë jane baja pijajivi bitso penavixaetaexae, navonosine. ¹¹ Itsiata baitsi jane bajarapamonae

apo copabi papibisiacuene exanavanapa. Apo najamatabëcuenepënyorotsi Diosojavabelia. Biji rajane Dioso, ponë athëbëtatsia peecaenë, bajaraponë caranata bajarapamonae pibisiacuenia baracuaicuaijai. Bajarapacuenia bajarapamonae Dioso pibisiacuenia baracuaicuaijai penavixaetaexae, bitso peperabëtsabanaexaenua.

¹² Bajaraxuacujinae icatsia seisángelnë pijacopapijira epatajaraba. Epatajaraba pinijimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitojorobiprofetanë pecuibovojotuatsina. ¹⁴ Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëexanaenexa Diosojavabelia. Dioso pajamatabëcuenesaënë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaitsi. ¹⁵ Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcueneaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinxexa, baxaniavaeta penaxatatsijava pecaponaenexa pejumasaajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejajjava Jesús, jumetaniji. ¹⁶ Nexata jane baja dovathi pijajivi caetuatatsi daxitanacuanë pevetsivi. Caetuatatsi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteángelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatujëta Dioso peecaetronojavavere na pinijijumeta jumaitsi:

—Daxita rajane baja vereta, jai athëbëtatsia templobo ënëtuatujëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëba

pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpjiitomaranëmi ata othopa irata. Dioso nexata najamatabënapita pinijitomaraxanetopijivimi, Babilonia tomara-pijivimi. Ayaicuenia Dioso baranaepana Babilonia tomara-pijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomara-pijivimi. ²⁰ Itsa ira najëaba, daxitatunaetonëmi, daxitatsutonëmi ata, ajibi baja. Ira namatajëpa baja. ²¹ Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejava cuarenta pakilobeje. Nexata mapanacuapijivi pibisiacuena Dioso baracuaicuaijai. Tsipaji athëbëvetsica piothopaejava, bitso pecainejebimatarejetonë, bitso piayaicue.

17

Pacuenia itsamatacabi Dioso naneconitsiaexanaena pamonaë navajëcabiaba jumapecataeya pexanaenëanëjavabelia yabara pelivaisi

¹ Pamonaë siete paángelnëbeje, siete pacopabeje pecaponaevi, bajarapaángleleviyajuvënënë, caenë rena xanëjavaberena. Bajarapaángelnë nejumlahitsi:

—Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxoyojavata. Bajarapatomarapijivi Diosojavabelia apo navajëcabiabi. Caranata saya navajëcabiaba jumapecataeya pexanaenëanëjavabelia. Nexata pacuenia petiriva pevitota bitso pibisiacuene pexanabiabiva jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabëcueneta jamatabëcuenebijiana itsamonaë ata. Bajara pijinia pacuenia Babilonia tomarapijivi ata pexanabiabijava pejamatabëcueneta, jamatabëcuenebijiana ayaibitsaëttoxaneto itsanacuanëpjiivi ata. ² Tsipaji itsanacuanë pevetsivi patabiaba Babilonia tomaraberena. Nexata bajarapamonaë ata copaba Diosojavabelia penavajëcabiabijava. Caranata saya Babilonia tomarapijivi cuenejëpaeya navajëcabiaba jumapecataeya pexanaenëanëjavabelia. Nexata jamatabëcuenebijianatsi bajarapamonaë ata, nejai bajarapaángelnë.

³ Bajaraxuacujinae Espíritu Santo netsijamatabëvënëca. Nexata bemajitsinaebota ángelnë nebarëpona petusato nacuyabelia. Bajarajotalia taeyetajë petiriva. Bajarapova

eca piayainē, petsobianē, pejumata. Bajaraponē peperabētuaeca, Dioso apo pejitsipaevēnēanē, itanerubena. Bajarapapiayainē xaina siete pamatabocotobeje diez pamataetobeje. ⁴ Nexata bajarapova penaxatatsijavareca itsajava pabanaeya saējai. Itsajava tsobia. Naitabēteca orojavanēta, perlavēnējavanēta ata, penamatamotsiibotonēta ata. Cobenaeca orocopa. Pibisiacuene bitso pexanaejava pevitota, bajarapajamatabēcuenelivaisi vēnēca bajarapacopata. ⁵ Bajarapova pitapathaitota vēnēyaquinarutatsi. Pajamatabēcuenelivaisi yabara bajarapova pitapathaitota vēnēyaquinarutatsi, itsajivi ata apo yapētae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabēcuenebijianaevavatsi, jumapecataeya pexanaenēanējavabelia penavajēcabiabinexa. Bajarapatomaraverena pitsapanua jivi pejamatabēcuenebijianaevavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vēnēyaquinarutatsi. ⁶ Taeyetajē icatsia bajarapova. Aitajibi tsecae Dioso pijajivimi pijanarata. Pamonaē ata beyejebatsi pevajunupaebixae Jesús, bajarapamonaemi ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabēcuenenajunaviacajē. ⁷ Nexata ángelnē nejumaitsi:

—¿Detsa xuajitsia jamatabēcuenenajunaviacame? Cayapētaeyaexanaenatsi pajamatabēcuenelivaisi xaina mapovaje. Ponē piayainē siete pamatabocotobeje diez pamataetobeje pexainaenē, ponējumata bajarapova eca, bajaraponē ata pajamatabēcuenelivaisi xaina, cayapētayaexanaenatsi. ⁸ Mapapiayainē tanemeje, bajaraponē picani bajayata ponapona mapanacuataje. Itsiata baja aeconoxae bajaraponē ajibi. Itsiata baitsi jane itsamatacabi pinijimēthēxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponēmi beyaxuabianatsi pepacuene jane baja bajaraponē pecopiarucaenexa. Daxita mapanacuapijivije, pamonaē Corderonē pijacuyalatobaxutota apo vēnērubenae Dioso nacua pexanaevajēnaeya, Dioso nacua pexanaecujinae ata, bajarapamonaē matakabi apo pevereverecaejava apo xinae tsane. Bajarapamonaē jamatabēcuenenajunaviacaena piayainē itsa pitsapaenina pinijimēthēxanetojavatsina, nejai ángelnē.

⁹ Icatsia ángelnē nejumaitsi:

—Pamonaē baja peyapētaevi, pamonaē baja caējēpatsi pejumeyapētaenexa, bajarapamonaē pejumeyapētaenexa mapalivaisije. Papiayainē xaina siete pamatabocotobeje,

ponëjumata taeyetame petiriva, anijajamatabëcuenelivaisibeje itajëta. Bajaraponë pematabocotonë, siete pamatabocotobeje, mapajamatabëcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabëcuenelivaisi yajavaxainaje. ¹⁰ Siete rabaja pijinia ponëbeje Babiloniatomara pevetsivi. Nexata Babiloniatomara pevetsiviyajuvënëvi cinco baja ponëbeje pitsapa. Seisnë abaxë aeconoxae eveta Babiloniatomara. Sietenë abaxë apo taxuxuabi pevetsinexa. Itsiata sietenë itsa evetsiana, bajayajebi apo evetsi tsane. ¹¹ Papiayainë, petsobianë, taneme, mapajamatabëcuenelivaisi xainaje. Bajaraponë picani bajayata eveta Babiloniatomara. Itsiata baja aeconoxae bajaraponë apo evetsi. Tsipaji baja tëpa. Itsiata baitsi jane icatsia bajaraponë pinijimëthëxanetojavavetsina pitsapaenina Babiloniatomara icatsia pevetsinexa. Nexata icatsia bajaraponë itsa evetsiana, ochonë baja evetsiana Babiloniatomara. Bajaraponë abaxë bajayata itsa ponapona, siete ponëbeje Babiloniatomara pevetsiviyajuvënëniemi baja cajena. Bajaraponë icatsia Babiloniatomara itsa evetsiana, pevetsicujinae bajaraponëmi beyaxuabianatsi pepacuene jane baja bajaraponë pecopiarucaenexa, nejai ángelnë.

¹² Icatsia ángelnë nejumaitsi:

—Ponë piayainë pemataetonë taneme diez pamataetobeje, mapajamatabëcuenelivaisi xainaje. Diez rabaja pijinia ponëbeje, itsamatacabi nacuanë evetsiana. Nexata bajarapamonae itsamatacabi nacuanë itsa evetsiana, evetsiana diez panacuabeje. Tsipaji caenë canacujitsia evetaponaena caenacua. Bajarapamonae abaxë apo taxuxuabi bajarapanacuanë pevetavanapaenexa. Itsiata baitsi jane itsa taxuxuabijitsia nacuanë jane baja pevetavanapaenexa, copatsianatsi pijanacuanëjava pevetsinexa saya caepatoyovajëto. Bajarapamonae itsa evetsiana pijanacuanëjava, piayainë barëevetsianatsi. ¹³ Pamonaë diez ponëbeje, diez pijinia panacuabeje itsamatacabi itsa evetsiana, barënajamatabëcuenejëpaenatsi piayainë. Nexata bajarapadieze ponëbeje jumaitsi tsane piayainëjavabelia:

—Xamë pacatocopatsianatsi patanematacaitorobinëexamë, jai tsane.

¹⁴ Pamatacabi bajarapadieze ponëbeje evetavanapaena pijanacuanë, piayainë vajabitsaë barëexanaenatsi Corderonëjavabelia. Daxita pamonaë Corderonë pijajivi, pamonaë Dioso pejunatsivi, bajarapamonae pijinia Corderonë barëbena piayainëjavabelia. Nexata Corderonë

cueneamoneyabiana piayainējavabelia. Cueneamoneyabiana tsipaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai āngelnē.

¹⁵ Angelnē icatsia nejumaitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinavanapa jivibitsaētoxanetonē daxitaviriajumevi, daxitanacuanēpijivinua. Bajarapajamatabēcuenē yabara taneme bajarapamanuamene.

¹⁶ Pamonae diez panacuabeje pevetsivinexa, bajarapamonae piayainē barēitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua.

Bajaraxuacujinae tajuitsiana isotota. ¹⁷ Pamonae diez ponēbeje itsamatacabi nacuanē itsa evetsiana, bajarapamonae najamatabēcuenējēpaena petocopatsinexa piayainē pijanacuanē petoevetsinexatsi. Bajarapacuenia najamatabēcuenējēpaena tsipaji baja cajena Dioso jamatabēcuenēitorobatsi bajarapacuenia pexanaenexa bajarapamonae. Nexata piayainē bajarapamonae pijanacuanē bajayajebi toevetsianatsi matapania pecopiapatsijavabelianexa daxita pacuenia Dioso tajēvelia najumecapanepaeya jumaitsi.

¹⁸ Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabēcueneta mapanacuanē pevetsivi pibisiacuene exanapona, nejai āngelnē.

18

Pacuenia Babilonia tomaraxanetomi copiaruca yabara pelivaisi

¹ Icatsia itsaāngelnē taniji perunaejavatsica athēbēvetsica. Caējēpatsi pinijicuenia piayaicuene pitorobinexa. Bajarapaāngelnē pinijicotia yajavarunaica. Ira itayota daxitanacuanējava. ² Ayajumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ējoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiaviriavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena. ³ Babilonia tomarapijivi navajēcabiaba jumapecataeya pexanaenēanējavabelia. Nexata belia

daxitanacuanē pevetsivi ata, pijajivi yajava, navajēcaponā jumapecataeya pexanaenēanējavabelia. Nexata Babilonia tomarapijivi jumapecataeya pexanaenēanējavabelia penavajēcabiabijamatabēcueneta, daxita xua pibisiacuene pexanaejamatabēcuenetanua, jamatabēcuenebijianapona daxitanacuanēpijivi. Babilonia tomarapijivi bitso xainapona ayaijava palata pibisiacuene pexanaejamatabēcueneta. Nexata pijinia pamonaē Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai ángelnē.

⁴ Bajaraxuacujinae icatsia athēbēvetsica jumetaniji itsajume. Jumaitsi mapacueniaje:

—Paxamē patajajivimē, papitsapare baja Babilonia tomaravecua. Papitsapare baja pibisiacuene paxamē ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaējitsipa, nexata copiapatsipa itaboxojavabetsia. Dioso cajena yapētane daxita Babilonia tomarapijivi pibisiacuene pexanaejava. ⁶ Bajarapamonae bejiobiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaicuenia bejiobiaexanaena. ⁷⁻⁸ Babilonia tomarapijivi bitso beayaijamatabēcuenēni natane. Natocomuacabiaba ayaijava penamatamotsijavanē pibisiacuene pexanabiabimatamota. Bajarapamonae pejamatabēēthētota jamatabējumaitsi tsabiabi: “Xanē raja majota ecajē nacua betaevetsinē. Nexata apo jamatabēcuenēbējanē tsane itsacuenejavayo ata yabara. Apo namatavenonaenē tsane itsacuenejavayo ata,” jamatabējai tsabiabi bajarapamonae pejamatabēēthētota. Bajarapacuenia Babilonia tomarapijivi pejamatabējumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petēpaecuene, pemataneuyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenē Dioso bitso piasaēnē.

⁹ Babilonia tomarapijivi pejamatabēcueneta daxitanacuanē pevetsivi jamatabēcuenēbijianapona. Nexata daxitanacuanē pevetsivi copaba Dioso pejumecovēnētsijavami. Natocomua-

cabiabanua ayaijava penamatamotsijavanë. Nexata bajaramonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. ¹⁰ Bajarapamonae pecajunavi, tajë vecuanubenaena Babilonia tomarapijivimi itsa tajuenatsi. Bajarapamonae najumai tsane:

—¡Bitso baja rovia bejiobi mapamonaeje! ¡Pinijitomaraxanetota, Babilonia tomaraxanetota, pejinavanapaevimi peyaiataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonae pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. ¹² Bajarapamonae capatabiaba oronanita pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petsobiajavanë. Capatabiabanua daxitavirianaevjava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatamotsinaejavanë ata, broncenani ata, hierronani ata, mármolvënëibo ata. ¹³ Capatabiabanua canelavënëjavanë, especiavënëjavanë ata, inciensovënëjavanë ata, mirravënëjavanë ata. Capatabiabanua petuxujuviranë, vinoranë ata, aceiteranë ata, pexaniaviriatrigobenonë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa. ¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejitsipaecuenemi tovereverecatsi baja! ¡Tovereverecatsi baja bitso pexainaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxë itsa apo tajuetsti, pamonae pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. ¹⁶ Bajarapamonae daxita najumai tsanubena tsane:

—¡Bejiobitatsi bitso pinijitomaraxanetota pejinavanapaevimi! Bajarapatomarapijivimi naxatababiaba pexaniaviri-apapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavañeta, perlavënëjavanëta ata, penamatamotsiibotonëta ata. ¹⁷ ¡Caepatoyocujinae saya verevereca baja bitso pexinaejavami! najai tsanubena tsane daxita bajarapamonae.

Daxita pamona barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubena tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubena tsane.

¹⁹ Pamona tsëxëtaenubenaena, natsimataothocaena atsabenonë, bitso pesivanajamatabëxainaexae Babilonia tomarapijivimi. Yaitaxutonueya najumai tsanubena tsane:

—¡Bitso pinijicuenia bejiobitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaexae, bitso pexinaevi naexana daxita pamona barco pexinaevi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubena tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëángelnë yotaxuaba ibotoxaneto. Bajarapaiboto pinijiibotoxaneto bitso. Nexata ángelnë manúameniabereca asaëyata xuabareca bajarapaibotoxaneto. Ángelnë jumaitsi mapacueniaje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. ²² Ajumejibi baja tsane pijacallejava arpa peracatabiabijava. Ajumejibi baja tsane flauta

ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiabijava pecaquiatabiabiibotoxanetota. ²³ Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaicuaijaitisabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexinaejava pecanajetabiabavanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitorobiaya penajorobabiabijava, jai bajarapaángelnë.

²⁴ Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebibatsi. Babilonia tomarapijivi pejamatabëcueneta, Dioso pijaivimi ata beyejebibatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹ Bajaraxuacujinae jumetaniji jivi ayaibitsaëtoxaneto athëbëtatsia. Pinijijumeta jumai tsaponae mapacueniaje:

“Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. Bajaraponë nacacapanepa vajaneconivecua. Penivenivenaecotia pexinaenë. Pijamatabëcuenesaënë bitso. Daxitacuene pexanaenexa pecaëjëpaenëtsi. ² Itsa naneconitsiaexana jivi, paneconivajëto jivi xaina bajaraponëjavabelia, bajarapaneconivajëtota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabëcueneta jamatabëcuenebijianapona daxitanacuanëpijivi. Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamona,

jai jivi ayaibitsaëtoxaneto athëbëtatsia.

³ Bajaraxuacujinae bajarapamona icatsia jumaitsi:

—“¡Diosomë, ayaijamatabëcuenenëmë bitso!” jaitsi vaxaitsi Diosojavabelia. Athëbëabetsia petsëxëjunaejavatsia Babilonia tomarapijivimi petajuëtsëxëtsi, apo vereverecanucæ tsane daxitamatacabijavabelianexa, jai bajarapamona.

⁴ Pamona veinticuatro ponëbeje ancianovi, pamona piinia cuatro ponëbeje paitothiavi, daxita bajarapamona Dioso yayyataeya irata bobena. Ira taenubena. Bajarapamona irata jumai tsanubenae Diosojavabelia, tronota peacaenëjavabelia:

—¡Xanepana rabaja nexanaejava! ¡Bitso ayaijamatabëcuenenëmë! jai tsanubenae irata bajarapamonae Diosojavabelia.

⁵ Bjaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabëcuene panexainaevi, beveliajamatabëcuene panexainaevinua, pexaniajamatabëcuene parajutabiabare vajaDiosojavabelia, jai tronojavaverena.

Corderonë penacasabifesta yabara pelivaisi

⁶ Icatsia jumetaniji ayaibitsaëttoxaneto jivi pecuaicuaijajava. Bajarapamonae pecuaicuaijajajava, jumetaniji bepinijijoncajume. Beyamaxëjume ata, ayaijume, najumeta. Jumai tsaponae bajarapamonae mapacueniaje:

VajaDioso piamatabëcuenesaënë daxita mapanacuata jivi pevetsivi matatoxenetsia. Taxuxuaba rajane baja daxitanacuanëjava Dioso jivi pevetsinexa. Bjaraxuata vaxaitsi jumaitsitsi: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. ⁷ Sivajamatabëcuenebarëyatsi Dioso. Nexata tsipaebatsi itsamonaejavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bjarapacuenia jumaitsitsi tsipaji baja copiapata fiesta pexanaematacabinexa, Corderonë penacasabifestanexa. Petiriva rabaja naxaniavaeta Corderonë penacasabivanexa. ⁸ Bjarapova rajutatsi bitso pexaniaviriapapaëbërëjava penaxatatsinexa, piaxuirajibijava, bitso peniojaijava, jai bajarapamonae.

“Bjarapova rajutatsi bitso pexaniaviriapapaëbërëjava penaxatatsinexa,” itsa jai, comparacióncuenia pejumaitsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconi yabara,” pejainexa picani. Bjarapajamatabëcuenelivaisi: “Bjarapova rajutatsi bitso pexaniaviriapapaëbërëjava penaxatatsinexa,” pejaijava comparacióncuenia.

⁹ Nexata bjaraxuacujinae ángelnë nejumaitsi:

—Yaquinare mapejumaitsilivaisije: “Jamatabëcuenebarëya pamonae junatatsi Corderonë penacasabifestajavaberena,” pejailivaisi. Daxita xua catsipaebatsi, bjaraxua pepacuene Dioso taneitorobijava, nejai ángelnë.

¹⁰ Nexata tamatabacabëta tonucajunuajë ángelnë pitabarata. Pexaniajamatabëcuene picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, Dioso panenajuajumecovënëtsivi xaniavaetsia pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaexanatsi pamonaë jivijavabelia tsipaebapona Dioso pejumelivaisi.

Pacuenia athëbëtsia Juan tane Cristo penioponaecaballojumata pecaejava yabara pelivaisi

¹¹ Taniji itaboxo penapatsijava. Tanijinua penioponaecaballo. Bajarapacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. ¹² Pitaxutobeje naitayota. Pacuenia isoto bacotiatsobia, bajara itaxutocotiaitsi. Bajaraponë matapona ayaijava coronanë. Pitapata vënëruca. Itsiata baitsi jane itsajivi ata apo vënëyapëtaetsi. Ëbajaraponë pijacuata navënëyapëtane. ¹³ Penaxatatsijavareca tsobia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë. ¹⁴ Bajaraponë pënaponatsi vajabitsaë ayaibitsaëtoxaneto, athëbëpijivi. Bajarapamonae naxataba bitso pexaniaviriapapaëbërëjavanë, piaxuirajibijavanë, bitso peniojaijavanë. Bajarapamonae ata yapona penioponaecaballuanëta. ¹⁵ Ponë vajabitsaë barëexana, bajaraponë pecuibuatsina pitsapa pexiujaiespada penaneconitsiaexanaenexa daxitanacuanëpijivi. Bajaraponë daxitanacuanëjava jivi pevetsinëexa. Itsa evetsiana, ajumesaëya itorobabiabiana pejumecovënëtsinexatsi. Pacuenia uvaruanë itsa barëmeneyujubataxuaba, ayaiarëmene pitsapa pexanaenexa vinoranë, bajara pijinia pacuenia daxitanacuanëpijivi, pijaneconi pexinaevi, Dioso itsa verebiabiana, ayaijana xuabiana. Dioso, ponë piamatabëcuenesaënë daxitanacuanë pevetsivi matatoxenetsia, ayaicuenia naneconitsiaexanaena bajarapamonae pebaraanaepanaexae. ¹⁶ Ponë vajabitsaë barëexana, bajaraponë pijacamisajumavelia penaxatatsijavata, pevënëitanebërëtoto ruca. Pethaëttojumata ata pevënëitanebërëtoto ruca. Jumai tsarucae bajarapaitanebërëtoto: “Maponëje daxitanacuanë pevetsivi ata pepo pevetsinë. Daxita petuxanevi ata pijatuxanenë,” jai tsarucae.

¹⁷ Bajaraxuacujinae taenutajë ángelnë, icotiata penucaenë. Pinijijumeta vavajai tsanucae daxita quequeremonaejavabelia. Jumai tsanucae mapacueniaje:

—Naxanitsia. Panacaetuanare payaibitsaëtoxanetomë ayaijava panenabaninexa Dioso pejamatabëcueneta.
¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaemi dajubicuenia pecanajetsivimitsi itsamonaejavabelia amoneya petonacuenebinexa, apo pecanajetsivimitsi ata, beveliajamatabëcuene pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucae ángelnë quequeremonaejavabelia.

¹⁹ Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënabia penioponaecaballota peponaenëjavabelia, bajaraponë pijajivijavabelia ata.
²⁰ Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevenëitanetota pitanerubaponaenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaënëbeje isotopucabelia. Bajarapapuca tajueyabiaba azufre yajava.
²¹ Nexata daxita bajaraponëbeje pijajivi, pamonaenae nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapomonaemi pevi.

20

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

¹ Icatsia taniji ángelnë perunaejavatsica athëbëvetsica. Cobenarunaica pinijimëthëxaneto pijallave. Cobenarunaicanua

ayaicadenamaëtoxaneto. ² Bajarapaángelnë vaetaba dragón, ponë pevënë Dovathi. Itsavënë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. ³ Pinijimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovënëjavata yamëthëvëpajumacatsata. Nexata dovathi apo caëjëpaetsi tsane peyamaxëitojorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxëitojorobaponaponaenexa.

⁴ Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaeivi. Tanijinua itsamonae ata, pamonae bajayata vësiucubejebatsi. Bajarapacuenia bajarapamonaemi bajayata vësiucubejebatsi tsipaji jivi tsipaebapona Jesús pelivaisi. Tsipaebanajetarubenana Dioso pejumelivaisi. Bajarapamonae apo navajëcae pematabacabëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevënëitanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonaemi icatsia Dioso piasaëyaexanaejavatsi, taniji. Pacuenia ata bajarapamonae mil pavaibeje Cristo barëevetatsi mapanacuaje, taniji. ⁵⁻⁶ Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caecuenia ayaibitsaëto. ¡Pamonae copiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, planeconijibivinua! Cotocaevi patëpaejavanexa, acuenebi baja itsacuene pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinexa, jivi petocuaicuaijaitabiabivinexa Diosojavabelia. Bajarapamonae Cristo barëevetsianatsi mapanacuaje mil pavaibeje. Itsamonae petëpaevimi, pamonae abaxë nacopabanubena, Dioso icatsia asaëyaexanaenatsi bajarapamil pavaibejecujinae.

⁷ Itsa baja panepaena mil pavaibeje, dovathi icatsia isinaenatsi mëthëvecua pepitsapaenexa. ⁸ Pitsapaena icatsia jivi peyamaxëitojorobinexa daxitanacuanëjava. Bajarapacuenia yamaxëitojorobiana jivi ayaibitsaëtoxanetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapëre navita, bajara itsi tsane dovathi pijajivi, vajabitsaë. ⁹ Bajarapamonae vajabitsaë copiata jivi benajetarubenaena daxitanacuanëjava. Bajarax-

uacujinae matatoyoronaena jane baja Jerusaléntomara pev-
erebiabinexa picani Dioso pijajivi, Dioso piasivatomarata,
Jerusalén tomarata, pejinavanapaevi. Itsiata baitsi jane
dovathi pijajivi Dioso tsixuabianicatsi isoto athëbëvetsica.
Nexata tajuenatsi daxita vajabitsaëmi, dovathi jane baja pi-
jajivimi. ¹⁰ Nexata dovathi, ponë jivi yamaxëitojorobaponaena
daxitanacuanëjava, xuabialiatsi isotopucalia, azufre yajava
petajueyabiabipucalia. Bajarapapucalia baja cajena copi-
aya xuabatsibeje piayainëbeje peyamaxëitojorobiprofetanëbeje.
Nexata bajarajota bajarapamonae Dioso naneconitsiaex-
anaenatsi daxitamatacabijavabelianexa. Nexata bajarajota
bajarapamonae isoto petajuta bitso jamatabëfaenaena. Ba-
jarapamonae bitso pejamatabëfaenaejava isoto petajuta tsite-
caena daxitamatacabijavabelianexa.

*Pacuenia Juan tane pacuenia itsamatacabi jivi nubenae-
jitsia penioponaetrone pitabarata Dioso penaneconitsiaex-
anaenexatsi yabara pelivaisi*

¹¹ Icatsia taniji penioponaetronoxanetojumata
peecaenë. Bajaraponë nacua baja vereverecaeyaexana.
Itaboxo ata baja vereverecaeyaexana. ¹² Taenubajë
daxita petëpaevimi penubenaejava Dioso pitabarata.
Nubena Dioso penaneconitsiaexanaenexatsi. Bajara-
pamonae ayaijamatabëcuene pexainaevimi. Itsamonae
beveliajamatabëcuene pexainaevimi. Taeyejebajënu
cuyalatobaxutonë. Bajarapacuyalatobaxutonë baxu-
panejeba. Bajarapacuyalatobaxutonëta itanerubena
daxita petëpaevimi pacuenia exanavanapa petëpaevajënaeya
mapanacuataje. Itsacuyalatobaxuto ata taeyabu-
atajë. Bajarapacuyalatobaxuto ata baxupatabuata.
Bajarapabaxutota vënërubena pamonaе matababi apo
pevereverecaeyajava pexainaevinexa. Nexata caejivi
canacujitsia Dioso pijaneconi petorutaponaexaetsi, caejivi
canacujitsia paneconivajëto xaina. Bajarapaneconivajëtota
Dioso naneconitsiaexanaponatsi. ¹³ Manuameneta
petëpaevimi ata, daxita pitsapaina. Jivi ata petëpaecujinae,
pejinavanapaenacuajavavetsina, ira bëxëpanavetsina, daxita
pitsapaina. Nexata caejivi canacujitsia paneconivajëto xaina,
bajarapaneconivajëtota Dioso naneconitsiaexanaponatsi.
¹⁴ Bajaraxuacujinae jivi petëpaeyaexanaejamatabëcuenemi,
jivi petëpaecujinae pejinavanapaenacuami ata yajava,
Dioso xualia isotopucalia. Bajarapapuca jivi cotocaevi
patëpaejava petëpaeyaexanaepuca. ¹⁵ Pamonaе apo
vënërubenaе, pabaxutota vënërubena pamonaе matababi
apo pevereverecaeyajava pexainaevinexa, bajarapamonae
peneliatsi bajarapapucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

¹ Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. ² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi. ³ Nexata jumetaniiji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. ⁴ Dioso itaxutobarëmeneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani vereverecaeyaexanajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë matacabi apo pevereverecaejava. Tocopatsianajë bajarapamonae amoneya pexainaenexa matacabi apo pevereverecaejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë. ⁷ Pajivi tsiteca jumecovënëtaponapona tajumelivaisi ëpetëpaejavabelianexa,

bजारपजिवि खाने पिजा Diosonēnē tsane. Bजारपजिवि पिजिना taxēnatojiviyo tsane. ⁸ Itsiata baitsi jane pamonaē pejunavivi tajumelivaisi yabara itsamonae pebejiobiaexanaeyanivatsi, pamonaē ata apo tanejumecovēnētsivi, pamonaē ata pitoyavi itsamonae, pamonaē ata pevitota pibisiacuene pexanaēvi, bजारपामonaē ponaena petajueyabiabipucajavabelia. Pamonaē ata penajorobivi, pamonaē ata jumapecataeya pexanaēnēanējavabelia penavajēcaēvi, pamonaē ata penajumetsēnētsivi, daxita bजारपामonaē ponaena petajueyabiabipucajavabelia. Bजारपapuca tajueyabiaba azufre yajava. Bजारapatēpaejava cotocaēvi jane baja petēpaejava tsane, nejai Dioso, tronojumata pecaenē.

Pacuenia Juan tane pejana Jerusalēntomara pacuenia it-samatacabi itsijitsia yabara pelivaisi

⁹ Nexata jane baja rena caenē āngelnē. Bजारapaāngelnē siete paāngelnēbeje siete pacopabeje piayaijavanē pevēnēcaecopanē pepacaēviyajuvēnēnē. Bजारapaāngelnē nexata nejumaitsi:

—Naxanitsia. Catsitajētsianatsi pova Corderonē pijavanexa, nejai āngelnē.

¹⁰ Bजारaxuacujinae Espiritu Santo netsijamatabēvēnēca. Nexata bemajitsinaebota āngelnē nebarēpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia āngelnē netsitajēta Dioso pijatomara, pinijitomaraxaneto, Jerusalēntomara. Athēbēvetsica Dioso javavetsica runaica bजारapatomara. ¹¹ Bजारapatomara cotianiveniveneca Dioso pijapenivenivenaēcotiata. Pacuenia penamatamotsiiboto jaspevēnēiboto cotianivenivena, bजारapacuenia cotianiveniveca. Nasabanua pacuenia nasaba vidriojava. ¹² Bजारapatomara matatoyorotsia yacaranata piaitayaēibopanaxanetota. Bajara payacaranatsijavaxaneto mataropotsia catsanaruba ibopananē. Bajara payacaranatsijavaxaneto apia athēbēabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata āngelevi, caenē canacujitsia, nucapona caebaupa canacujitsia. Bजारapabaupanējava Israelpijinē pexi, doce ponēmibeje, pevēnēanē vēnērubena. ¹³ Acueyabi pabaupabeje xainapona caeyenepana canacujitsia. Estevēnēnēnia payenepana xaina acueyabi pabaupabeje. Nortevēnēnēnia pijinia payenepana xaina acueyabi pabaupabeje. Survēnēnēnia pijinia payenepana xaina acueyabi pabaupabeje. Oestevēnēnēnia pijinia payenepana xaina acueyabi pabaupabeje. ¹⁴ Jerusalēntomara matatoyorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonē sasavia jebapona, doce

paibotoxanetobeje. Bajarapaibotoxanetonë, caeibotoxaneto canacujitsia pejumavelia, Corderonë pijajivi doce ponëbeje, apóstolevi, pevēnēanē rubena.

15 Paāngelnē nebarēcuaicuaijai, cobenaponapona oronaebo. Bajarapaoronaebota pecaējēbinexa Jerusaléntomara, pecaējēbinexa baupanē ata, pecaējēbinexa Jerusaléntomara matatoyorotsia peyacaranatsiibopanaxaneto ata. 16 Jerusaléntomara matatoyorotsia peyacaranatsiibopanaxaneto, daxitayenepananē namatajēpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajērētsialia ata payenepanabeje. Nexata jane baja āngelnē pecaējēbinaebota caējēba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajērētsialia ata xaina bajarapacuenia, dos mil doscientos pakilómetrobeje. Athēbēabetsia ata piapiajava bajarapacuenia xaina, dos mil doscientos pakilómetrobeje. 17 Bajaraxuacujinae āngelnē caējēba Jerusalén tomara matatoyorotsia peyacaranatsiibopanaxaneto peyapētaenexa paitayaētovajēto xaina. Jerusaléntomara matatoyorotsia peyacaranatsiibopanaxaneto, piaitayaējava xaina sesenta y cuatro pametrobeje. Pavirianaebota mapanacuapijivi bacaējēba, bajarapavirianaebota āngelnē caējēba.

18 Jerusaléntomara matatoyorotsia peyacaranatsiibopanaxaneto, exana jaspevēnēibota. Jerusaléntomara ėorojavanēta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi. 19 Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonē sasavia tsivajēnaejeba. Bajarapaibotoxanetonē itabētsiaya jumacatsanaruba daxitaviria ibotonēta, bitso penamatamotsiibotonēta. Penamataxainaeibotoxaneto itabēta jaspevēnēibotonēta. Pecotocaeviiibotoxaneto itabēta zafirovēnēibotonēta. Acueyabiibotoxaneto itabēta āgatavēnēibotonēta. Cuatroibotoxaneto itabēta esmeraldavēnēibotonēta. 20 Cincoibotoxaneto itabēta ónicevēnēibotonēta. Seisibotoxaneto itabēta cornalinavēnēibotonēta. Sieteibotoxaneto itabēta crisólitovēnēibotonēta. Ochoibotoxaneto itabēta berilovēnēibotonēta. Nueveibotoxaneto itabēta topaciovēnēibotonēta. Diezibotoxaneto itabēta crisoprasavēnēibotonēta. Onceibotoxaneto itabēta jacintovēnēibotonēta. Doceibotoxaneto itabēta amatis-tavēnēibotonēta. 21 Doce rabaja pabaupabeje. Doce rabaja pijinia paperlavēnējavatabeje, bitso penamatamotsijavanēta, exana caebaupa canacujitsia. Bajarapatomarata caecalle

ruca daxitacallevecua bitso ayaicallexaneto. Bajarapacalle
 ëorojavanëta pexanaecalle. Nasaba bitso. Pacuenia nasaba
 vidriojava, bajara itsi.

²² Bajarapatomarata apo taenë templobo. Itsiata baitsi
 jane daxita bajarapatomara betemplo. Bajarapacuenia
 betemplobo tsipaji Dioso, daxita mapanacuata jivi
 pevetsivi matatoxenetsia piamatabëcuenesaënë,
 Corderonëbeje, ponaponabeje bajarapatomarata. ²³ Dioso
 ayaijamatabëcuenenë pijapenivenivenaecotiata itayota
 bajarapatomara. Corderonë ata itayota pijapenivenivenae-
 cotiata bajarapatomara. Bajaraxuata apo namatavenonae
 bajarapatomarata pitayotsinexa matabicipijjuameto,
 meravipijjuameto ata. ²⁴⁻²⁶ Daxitanacuanëpijivi, pamonae
 baja Dioso capanepatsi pijaneconivecua, bajarapamonae
 itsamatacabi jinavanapaena Diosobeje Corderonëbeje
 pijapenivenivenaecotiata. Daxitanacuanë pevetsivi
 pijatomaranëjavaverena capatsiana bajarapatomaraberena
 bitso penamatamotsijavanë, Dioso yaiyataeya perajutsinexa.
 Daxitamatacabijavabelianexa, bajarapatomara baupatanut-
 siana. Bajarapatomarata ajibi tsane meravi. ²⁷ Itsiata
 baitsi jane bajarapatomaraberena pibisiagamatabëcuene
 pexinaeivi, apo jone tsane. Piauracuene pexanaeivi,
 penajumetsënëtsivi ata, apo jone tsane. Jonena ëpamonae
 vënërubena Corderonë pijacuyalatobaxutota. Corderonë
 pijacuyalatobaxutota vënërubena pamonae matababi apo
 peverevereceajava pexinaeivinexa.

22

¹ Bajaraxuacujinae icatsia ängelnë netsitajëta pepamene,
 bitso pitaranaemene. Nasaba bitso. Pacuenia vidriojava
 nasaba, bajara itsi. Bajarapamene jivi petëpaejavavecua pi-
 aitavayaexanaemene. Bajarapamene pitsaparena Diosobeje
 Corderonëbeje pijatronojavaverena. ² Bajarapamene
 bocapona ayaicallexaneto tuatuajëareca. Bajarapamene
 itapayareca anijamuxubërëneniabeje nubena naejavanë, jivi
 petëpaejavavecua piavitavayaexanaenaenë. Bajaraponaenë
 caevaita nacuaitapona doce panacuaitsibeje. Caejuameto
 canacujitsia nacuaitapona. Bajaraponaenë pebaxuta
 xanepana daxitanacuanëpijivi penavaëbinexa, pejamateje-
 manexa piavitanejavavecua. ³ Nexata bajarapatomarata
 ajibi tsane jivi pejamatabëcuenebijianaejavanexatsi. Nexata jivi
 pibisiacuene apo exanae tsane. Diosobeje Corderonëbeje
 pijatronota ecaenabeje pijajivi pitorobabiabinexabeje
 daxitamatacabijavabelianexa bajarapatomarata. Nexata
 daxita pamonae Dioso pijajivi, pexaniajamatabëcuene
 rajutsiana Diosojavabelia. ⁴ Bajarapamonae Dioso

itabarataena. Dioso pevënë ata rucaena bajarapamonae pitapathaitota. ⁵ Bajarapatomarata ajibi tsane meravi. Pepo petuxanenë Dioso pijapenivenivenaecotia itayotsiana. Nexata bajarapatomarata pejinavanapaevi apo namatavenonae tsane lámparacotia, matabipijijumetocotia ata. Pamonae jinavanapaena Dioso pijanacuata, Dioso pijanacua barëevetsianatsi daxitamatabijavabelianexa.

Pacuenia baja imoxoyo pevajënae Jesucristo pepatsijavanexatsica yabara pelivaisi

⁶ Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuenene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumlahtsi:

—Jesús raja jumaitsi: “¡Bepijia patsianicajë!” jai. ¡Nexata pavivi jumecovënëta Dioso pejumelivaisi, neyaquinaelivaisi mapabaxutotaje, bajarapavivi jamatabëcuenebarëya tsane Jesús itsa patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. ⁹ Itsiata baitsi jane ángelnë nejumlahtsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamonae Diosojumepaebivi profetavi, pacuenia ata pamonae jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumlahtsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaitsi, bajara-pacuenia Dioso exanaena. ¹¹ Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ëpibisiacuene yabara

penajamatabëxainaeivi ata, tocopare pecatsitecaenexa penajamatabëxainaejava ëpibisiacuene yabara. Itsiata baitsi jane pijinia pamonaë pexaniacuene pexanavanapaeivi, catsitecae pevajënaeyabelia pexaniacuene pexanavanapaejava. Pamonaë ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

¹² Icatsia ángelnë nejumaitsi:

—Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamonaë xaniavaetsia netonacuenebavanapa. Pamonaë pijinia pibisiacuene exanavanapa, naneconitsiaexanaenajë. ¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

¹⁴ Icatsia ángelnë nejumaitsi:

—Jamatabëcuenebarëya baja pamonaë pibisiacuene pexanaeconimi Dioso vecuajibiaexanatsi, pejumecovënëtsixae Jesucristo pesivatëpaejavatsi. Bajarapamonaë itsamatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua piaitavayaexanaenae pecuaixanexa. ¹⁵ Itsiata baitsi jane daxita pamonaë Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamonaë bitso ëpibisiacuene pexanaevi, penajorobivi ata, pevitota pibisiacuene pexanaevi ata, jivivevi ata, jumapecataeya pexanaenëanëjavabelia penavajëcabiabivi ata, bitso penajumetsënëtsivi ata. Daxita bajarapamonaë nacopabanubenaena Dioso pijatomarajumavelia, nejai ángelnë.

¹⁶ Nexata Jesús nejumaitsi:

—Xanë rabaja Jesúsne. Itorobajë tajaángelnë pecatsipaebinexa palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaángelnë catsipaeba. Xanë rabaja nacuaevetsinëmi Davidpijinë pemomoxiyajuvënëne. Xanë rabaja tajamatabëcueneitayotsinë daxitajivi pexaniajailivaisita, nejai Jesús.

¹⁷ Espíritu Santo jumaitsi. Petiriva ata, pova Corderonë pijavanexa, bajarapova ata jumaitsi. Jumaitsideje Jesúsjavabelia mapacueniaje:

—Naxanitsiayo patsianimica, jaiibeje.

Pamonaë jumetane bajarapacuenia pejumaitsijavabeje Jesúsjavabelia, bajarapamonaë ata bejumaitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabëethëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonae Dioso rajutsianatsi matababi apo peverevereaejava. Tocopatsianatsi bajarapamonae amoneya pexainaenexa matababi apo peverevereaejava itsa jumecovënëta Cristo pesivatëpaejavatsi. Tsipaji Cristo jivi petëpaejavavecua piatavayaexanaenë.

¹⁸ Daxita pamona leba Dioso pejumelivaisi, tayaquinaelivaisi mapabaxutotaje, jamatabëcuenereviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicuene yabara jumaiti mapabaxutotaje, bajarapacune Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamona matababi apo peverevereaejava pexainaevinexa, matababi apo peverevereaejava apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matababi apo peverevereaejava pexainaevinexa pelivaisi, Dioso pijatomara ata pelivaisi, jumaiti mapabaxutotaje.

²⁰ Jesús, ponë itoroba pijaángelnë tanetsipaebinxaxa pacuenia itsamatababi itsijitsia mapanacuataje, bajaraponë nejumaiti mapacueniaje:

—Bepijia patsianicajë, jai.

Nexata xanë jumaitinë:

—Je. Xanepana rabaja. Jesús pepo petuxanenëmë, jnaxanitsiayo patsianimica! janë.

²¹ Pacatovajëtatsi daxita paxamë vajatuxanenë Jesucristo papecayavenonaenexa. Bajara itsi tsane.